

Holy Bible

Aionian **Edition®**

**Leb-Thur
Thur Bible**

Holy Bible Aionian Edition ®

Leb-Thur

Thur Bible

Language: Thur

Uganda (Acholi, Kiyandongo), Sudan (Acholi, Magwi)

Creative Commons Attribution ShareAlike 4.0 International, 2018-2025

Source text: eBible.org

Source version: 7/10/2025

Source copyright: Creative Commons Attribution ShareAlike 4.0

Wycliffe Bible Translators and SIL Uganda, 2024

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language

Translator resources at <https://AionianBible.org/Third-Party-Publisher-Resources>

Volunteer help and comments are welcome and appreciated!

Celebrate Jesus Christ's victory of grace!

Preface

Thur at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Thur at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

OLD TESTAMENT

Acaki 1
Nwö Cík 39

NEW TESTAMENT

Matayo 69
Marako 94
Luka 110
Jon 137
Tic k'Ėkwëna 157
Roma 183
1 Korinti 195
2 Korinti 206
Galatia 214
Epeco 218
Pilipi 222
Kolocai 225
1 Tecalonika 228
2 Tecalonika 231
1 Timoteo 233
2 Timoteo 236
Tito 239
Pilemon 241
Yakobo 242

APPENDIX

Reader's Guide
Glossary
Maps
Destiny
Illustrations, Doré

OLD TESTAMENT



Kinge na dong öryëmö dhanö ökô, ên oketho cerubim yo kukîdê më pwodho më Eden. Êka oketho pala abadê na lyêl mac, wîrê tungi êka tungi, më gwökô yoo na cîdhô yo yath më kwô.
Acaki 3:24

Acaki

1 Ī acaki Obanga ocweo polo ēka lobo. **2** Lobo onwongo obedo atata na gin mōrō ope iē, pīny na cōl onwongo oumo pii na tye ĩ nam ēka Tipo k'Obanga onwongo olyero ĩ wi pii. **3** Cē Obanga okobo nī, “Ēk tar obed na tye,” ēka tar obedo na tye. **4** Obanga ōnēnō nī tar onwongo bē, ēka ēn opoko tar kī ĩ kom pīny na cōl. **5** Obanga ōcakō nying tar nī “kiceng,” ēka pīny na cōl nī “kiwor.” Pīny ocido ēka pīny oru—manōn nīnō mē acēl. **6** Cē Obanga okobo nī, “Ēk gin n'ōpēdhērē obed na tye ĩ dyere pii na poko pii kī ĩ kom pii.” **7** Obanga ocweo gin n'ōpēdhērē na poko pii na tye pīny kī ĩ kom pii na tye malō. Ēka obedo nī kōmanōn. **8** Obanga ōcakō nying gin n'ōpēdhērē na poko pii nī “polo.” Pīny ocido ēka pīny oru—manōn nīnō mē arīō. **9** Cē Obanga okobo nī, “Ēk pii na tye ĩ thē polo ōgūrē kanya acēl ĩ kabedo acēl ēk ngōm n'ōthwō onen.” Ēka obedo nī kōmanōn. **10** Obanga ōcakō nying ngōm n'ōthwō nī “lobo” ēka pii n'ōgūrē kanya acēl ōcakō nyingē nī “nam.” Ēka Obanga ōnēnō onwongo nī bē. **11** Cē Obanga okobo nī, “Ēk gin na mar otuu ĩ wi lobo: gin n'ēpīdhō na nyakō nyig-gī ēka yen na tye ĩ lobo na nyakō nyig-gī na kodhi tye iē, na lūbērē kī kothgī.” Ēka obedo nī kōmanōn. **12** Gin na mar ōcakō tuu ĩ wi lobo: gin n'ēpīdhō na nyakō nyig-gī na lūbērē kī kothgī ēka yen na nyakō nyig-gī na kodhi tye iē na lūbērē kī kothgī. Ēka Obanga ōnēnō onwongo nī bē. **13** Pīny ocido ēka pīny oru—manōn nīnō mē adek. **14** Cē Obanga okobo nī, “Ēk jami na miō tar obed na tye ĩ wi polo mē poko kiceng kī ĩ kom kiwor, ēk gin obed na calō anyuth mē poko karē, nīnō ēka mwaka, **15** ēk obed gīnī tar na ryēny kī ĩ wi polo mē mēnyō wi lobo.” Ēka obedo nī kōmanōn. **16** Obanga ocweo jami arīō na thwon na ryēny—mana thwōnē mē lōōnō kiceng, ēka mana tīdī mē lōōnō kiwor. Ēn thon oketho cēr. **17** Obanga okethogī ĩ wi polo mē mēnyō lobo, **18** mē lōōnō kiceng ēka kiwor, ēka mē poko tar kī ĩ kom pīny na cōl. Ēka Obanga ōnēnō onwongo nī bē. **19** Pīny ocido ēka pīny oru—manōn nīnō mē angwēn. **20** Cē Obanga okobo nī, “Ēk gin na kwō opong ĩ pii mē nam, ēka wīny ōngwēc gīnī malō ĩ wi polo.” **21** Obanga ocweo leeni na thwon mē nam, gin na kwō kibēc na bedo ĩ nam, na lūbērē kī kothgī, ēka kī wīny na bwomgī tye na lūbērē kī kothgī. Ēka Obanga ōnēnō onwongo nī bē. **22** Obanga ōmīōgī gum ēka okobo nī, “Nywōl ĩnya unu, ipong unu ĩ pii na tye ĩ nam, ēka wīny thon ōnya ĩ wi lobo.” **23** Pīny ocido ēka pīny oru—manōn nīnō mē abic. **24** Cē Obanga okobo nī,

“Ēk gin na kwō obed tye ĩ wi lobo na lūbērē kī kothgī: leeni mē pacō, leeni na wotho ĩ wi ngōm kī korgī, ēka leeni mē thim, acēlacēl kī kothe.” Ēka obedo nī kōmanōn. **25** Obanga ocweo leeni mē thim na lūbērē kī kothgī, leeni mē pacō na lūbērē kī kothgī, ēka leeni na wotho ĩ wi ngōm kī korgī na lūbērē kī kothgī. Ēka Obanga ōnēnō onwongo nī bē. **26** Cē Obanga okobo nī, “Eru ecweu dhanō na cal kī onu, ēka ēmīōgī ōlōō rēc mē ĩ nam, wīny na ngwēcō kī malō, leeni mē pacō, wi lobo thūkūl, ēka leeni na wotho ĩ wi ngōm kī korgī.” **27** Cē Obanga ocweo dhanō ĩ cal mērē kikokome, Obanga ocweogī ĩ cal mērē, ocweo ēcwō ēka dhakō. **28** Obanga ōmīōgī gum ēka okobo nī, “Nywōl ĩnya unu, ipong unu lobo ēka ĩlōō unu. Lōō unu rēc na tye ĩ nam, wīny na ngwēcō kī malō, ēka gin na kwō kibēc na wotho ĩ wi ngōm.” **29** Cē Obanga okobo nī, “An amīōwu kodhi kibēc mē wi lobo thūkūl na nyakō nyig-gī ēka yen kibēc na nyakō nyig-gī na kodhi tye ĩ ĩgī. Un ibino camōgī. **30** Ēka leeni kibēc mē thim, wīny kibēc na ngwēcō malō, leeni kibēc na wotho ĩ wi ngōm—jami kibēc na yweo na kwō tye ĩ komgī—an amīō jami kibēc na mar mē acamagī.” Ēka obedo nī kōmanōn. **31** Obanga ōnēnō jami kibēc na ēn ocweo, ēka onwongo nī bē rwōk. Pīny ocido ēka pīny oru—manōn nīnō mē abicēl.

2 Cē Obanga otyeko cweno polo ēka lobo kī jami kibēc na tye iē. **2** ĩ nīnō mē abirō, Obanga onwongo otyeko tic mērē na ēn obedo ka tīmō, ēka oyweo kī ĩ kom tic mērē kibēc. **3** Ēka Obanga ōmīō gum ĩ kom nīnō mē abirō cē ōmīō ōdōkō na leng, piēn ĩ nīnō nōn ēn oyweo kī ĩ kom tic mērē kibēc mē cwec na ēn otio. **4** Man ēnē kite na polo ēka lobo ōcakērē kōdē ĩ karē n'ecweogī. ĩ karē na Rwoth Obanga ocweo lobo ēka polo— **5** yath mōrō mē thim onwongo bara tye ĩ wi lobo ēka kit lum mōrō mē thim onwongo bara otuu, piēn Rwoth Obanga onwongo bara ōmīō kōth ocwe ĩ wi lobo ēka dhanō mōrō onwongo ope na myero opur ngōm, **6** ēntō pii ōcakō cwer kī ĩ ngōm ĩ wi lobo ēka obido wi ngōm kibēc— **7** cē Rwoth Obanga ocweo dhanō kī ĩ apua mē ngōm, ōkūdhō yamō mē kwō ĩ ume, ēka dhanō ōdōkō gin na kwō. **8** Rwoth Obanga oketho pwodho ĩ Eden, kī kukidē, ēka oketho dhanō na ēn ocweo kunōn. **9** Ēka Rwoth Obanga oketho koth yen kibēc mē tuu kī ĩ ngōm—yen n'onwongo bē kī ĩ wang jō ēka bē mē acama. Yath mē kwō ēka yath mē ngeo gin na bē ēka gin na rac onwongo tye ĩ dyere pwodho. **10** Kulo onwongo molo yaa kī ĩ Eden na kelo pii ĩ pwodho, ēka kī kany nōn pokere ĩ kulo angwēn. **11** Nying kulo mē acēl ēnē Picon, ēn mōl rimo lobo

Kabila kibéc, kanya gol nwongere ië. 12 (Gol më lobo nön bër; odok yath n'ecwodo nî bedola ëka kite na welgi tæk n'ecwodo nî onik tye thon kunön.) 13 Nyíng kulo më ariö ënë Gikon, ën möl rimo lobo Kuc kibéc. 14 Nyíng kulo më adek ënë Tigiric, ën möl dök yo kukidë Aciria. Ëka kulo më angwën ënë Euparate. 15 Rwoth Obanga ökwanyö dhanö cë oketho i pwodho më Eden ëk ën opur ëka ögwöki. 16 Ëka Rwoth Obanga öciko dhanö nî, "In itwëro camö nyig yath mörö kékën na tye i pwodho, 17 ëntö yath më ngeo gin na bër ëka gin na rac, in myero kür ícam, piën i ninö na in ibino camö nyig yath nön, ënë in ibino thöö ködë." 18 Cë Rwoth Obanga döki okobo nî, "Ba bër nî dhanö myero obed kënë. Pî manön, an abino cweno ngat na kõnyö ën n'opore pirë." 19 Cë Rwoth Obanga onwongo dong ocweo leeni më thim kibéc ki kom ngöm ëka wíny kibéc na ngwëcö ki malö. Ën okelogi both dhanö ëk önën kite na myero öcak ki nyíng-gí ködë, ëka nyíng mörö na dhanö öcakö ki gin na kwö acélacél, manön dökö nyíngë. 20 Dhanö öcakö nyíng leeni më pacö kibéc, wíny na ngwëcö ki malö ëka leeni më thim kibéc. Ëntö ngat na myero ököny Adam n'opore pirë onwongo pod ope. 21 Cë Rwoth Obanga ömiö ninö ömakö wang dhanö rwök, i karë na ën tye ka ninö, Obanga ökwanyö cogo lak nget dhanö acél ëka ömwönö kakarë ki ringo. 22 Cë Rwoth Obanga ocweo dhakö ki i kom cogo lak nget na ën ökwanyö ki i kom dhanö, ëka okelo dhakö both dhanö. 23 Cë Dhanö okobo nî, "Man ënë cogo më cogona ëka ringo më ringo koma, ebino cwodo ën nî 'dhakö', piën ökwanyö ën ki i kom dhanö." 24 Pí tyën köp nî ecwö bino wëkö apap mërë ëka aya mërë cë ribërë ki dhakö mërë ëka jö ariö bino dökö kom acél. 25 I karë nön ecwö ki dhakö mërë onwongo tye gíni kotula ëka lewic onwongo ba makögi.

3 Thwol onwongo obedo lee na ryëk n'obedo jö ököra ki kin leeni më thim na Rwoth Obanga onwongo ocweo. I ninö mörö acél, thwol obino cë okobo both dhakö nî, "Adyer Obanga okobo nî, 'Un myero kür ícam nyig yath mörö kékën ki i pwodho?'" 2 Dhakö okobo both thwol nî, "Wan ëtwëro camö nyig yen kibéc na tye i pwodho, 3 ëntö Obanga okobo nî, 'Kür ícam unu nyig yath na tye i dyere pwodho, ëka kür igud unu; ka ícamö unu, ibino unu thöö.'" 4 Ëntö thwol okobo both dhakö nî, "Adyer un ba ibino thöö. 5 Piën Obanga ngeo nî ka ícamö unu, wangwu bino yabërë, ëka ibino bedo unu calö Obanga, nakun ingeo unu gin na bër ëka gin na rac." 6 I karë na dhakö önënö nî nyig yath onwongo bër më acama, nen na bër ki i wang jö ëka thon twëro mïö ryëkö,

dhakö öpüdö ëka öcamö. Ën thon ömiö nököenë both cwörë n'onwongo tye ködë kanya acél cë öcamö. 7 Cë gin jö ariö kibéc wang-gí öyabërë ökö, ëka ongeogini nî etye gíni kotula, gin öcakö kwönö pot ölam kanya acél më umo komgi. 8 Cë gin owinyo Rwoth Obanga ka tye ka woth i pwodho i caa na piny okwe, ëka opono gíni ökö ki both Rwoth Obanga i kin yen na tye i pwodho. 9 Ëntö Rwoth Obanga ocwodo Adam nî, "In itye kwene?" 10 Dhanö ögamö nî, "An awinyo ka in itye ka woth i pwodho ëka an abedo na lwor piën onwongo atye kotula, cë an apono." 11 Ëka Rwoth Obanga okobo nî, "Nga n'okobo nî in itye kotula? In ícamö nyig yath na an acikö nî kür ícam?" 12 Dhanö okobo nî, "Dhakö na in imiö botha ënë ömiä nyig yath ëka acamö." 13 Cë Rwoth Obanga openyo dhakö nî, "Ngö ene na in itimö?" Dhakö ögamö nî, "Thwol öbwöla ëka acamö." 14 Rwoth Obanga okobo both thwol nî, "Piën in itimö man, 'In elami na löö ki kin leeni më pacö kibéc, ëka leeni më thim kibéc! In ibino ywari ki ii ëka ibino camö apua i karë më kwöni kibéc. 15 An abino ketho adagë i kin in ëka dhakö, ëka i kin ëkwaëni ëka ëkwaë mërë, akwarë bino göönö wi, ëka in ibino tongo opunye." 16 Cë ën okobo both dhakö nî, "An abino mëdö arem na thwönë rwök i karë më nywöl; in ibino nywölö ëthiñö k'arem. Mitini bino bedo i kom cwori, ëka ën bino löönöni." 17 Ëka okobo both Adam nî, "Piën in iwinyo köp ka dhaköni ëka ícamö nyig yath n'onwongo aciki nî, 'In myero kür ícam,' 'Ëlamö ngöm ökö piri ibino tic na tæk k'arem ëka ibino cem pî karë më kwöni kibéc. 18 Ngöm bino cëgö okudhi ëka öcöcök, ëntö in ibino camö ngwedo më thim. 19 In ibino camö cem ki kwok na cwer ki i terinyimi, naka ka ibino dök i ngöm, kite na yam ekwanyi ki i apua, piën in ibedo apua, ëka ibino dök i apua." 20 Adam öcakö nyíng dhakö mërë Eba, piën ën bino dökö aya ka jö na kwö kibéc. 21 Rwoth Obanga öyübö löör lee, ömiö both Adam ëka dhakö mërë cë oruko gíni. 22 Ëka Rwoth Obanga okobo nî, "Dhanö dong ödökö ngat na cal ki onu, nakun ngeo poko gin na bër ëka gin na rac. Kür döki ëmií öryë cingë më püdö nyig yath më kwö ëka öcam cë ökwö pî naka naka." 23 Pí manön Rwoth Obanga öryëmögi ökö ki i pwodho më Eden më cidhö puro ngöm na yam ekwanyö ën ki ië. 24 Kinge na dong öryëmö dhanö ökö, ën oketho cerubim yo kukidë më pwodho më Eden. Ëka oketho pala abadë na lyël mac, wirë tungi ëka tungi, më gwökö yoo na cidhö yo yath më kwö.

4 Adam obedo ki dhakö mërë Eba, cë öyac ëka önywölö Kain, nakun kobo nî, "Rwoth ökönya

ömïö anwongo athîn n'ëcwö." 2 Kinge ên önywölö ömîn mërê Abel. Abel ödökö akwath, êka Kain ödökö apur pwodho. 3 Kinge karê mörö, Kain okelo cem mörö kî ï pwodho mërê ömïö both Rwoth na calö mïc. 4 Êntö Abel okelo êthîn rom mërê n'obedo kaö kî dwologi. Rwoth cwinye obedo na yom ï kom Abel êka oyeo mïc mërê, 5 êntö Rwoth ba oyeo Kain kî mïc mërê. Cê man ömïö Kain ökëcö na cwinye ba yom. 6 Cê Rwoth openyo Kain nî, "Pîngö in ïkëcö? Pîngö cwinyi ba yom? 7 Ka in ïtîmö gin na tye atîr, ba ebino yeeno? Êntö ka in ba ïtîmö gin na tye atîr, bal buto ï dholokek na calö lee na ger mê kürö nekoni, êntö in myero îlöö ên." 8 Kain okobo both ömîn mërê Abel nî, "Ërö ëcidhî ï pwodho." Êka ï karê na gin tye ï pwodho, Kain öcakö lwëny ï kom ömîn mërê Abel êka oneko ökö. 9 Cê Rwoth okobo both Kain nî, "Omeru Abel tye kwene?" Ên ögamö nî, "An ba angeo, an abedo ngat na gwökö ömëra?" 10 Rwoth okobo both Kain nî, "Ngö na in ïtîmö? Winy kany! Remo k'omeru tye ka kok botha kî ï ngöm. 11 Kobedi dong elami êka eryemi ökö kî ï ngöm, n'ongamo dhögê mê madhō remo k'omeru na in ïönyö. 12 Ngöm ba dök bino cëgö cem nini ka ipuro. In ibino bedo ngat na lathö alatha na parê ope wi lobo." 13 Cê Kain okobo both Rwoth nî, "Pwod na in imïa pëk na ba arömö dangö. 14 Nën! Tin dong itye ka ryëmöna ökö kî ï pwodho, êka an ba dök abino nen ï nyimi. An abino bedo ngat na lathö alatha ï wi lobo, êka ngat mörö kékên na bino nwongona bino nekona." 15 Êntö Rwoth okobo bothe nî, "Pathî nî kōmanōn, ka ngat mörö oneko Kain, ebino cülö kwor ï kome wang abirö." Cê Rwoth oketho alama ï kom Kain êk ka ngat mörö onwongo ên kür oneki. 16 Kain öya ökö kî ï nyim Rwoth cê öcidhō obedo ï lobo Nod na tye kukidê mê Eden. 17 Kain obedo kî dhakö mërê, êka öyac cê önywölö Enoka. Kain ögërö pacö na dit êka öcakö kî nying wode Enoka. 18 Enoka önywölö Irad, Irad önywölö Mekujael, Mekujael önywölö Metuacel, êka Metuacel önywölö Lamek. 19 Lamek önyömö mon ariö, acêl nyingê Ada êka nökenê ca nyingê Jila. 20 Ada önywölö Jabal, ên onwongo obedo kwarö ka jö na bedo gini ï kēma êka gwökö leeni mē pacö. 21 Ömîn mërê nyingê onwongo ecwodo nî Jubal, ên onwongo obedo kwarö ka jö kibëc na göö adungu êka küdhö oletu. 22 Jila thon önywölö wode, Tubal Kain, na ênê obedo athedh jami mē tic kibëc mē mola êka nywenyo. Amîn Tubal Kain onwongo ecwodo nî Naama. 23 ï ninö mörö acêl, Lamek okobo both mon mërê nî, "Winya unu, un mon-na, winy unu köpna. An aneko dhanö n'ömïa ret, aneko awobi pî wanöna. 24 Ka ebino cülö kwor ka Kain wang abirö, cê mē

ka Lamek bino bedo wang pyer abirö wie abirö." 25 Adam obedo kî dhakö mërê dökî, êka önywölö wode cê öcakö nyingê Ceth, nakun kobo nî, "Obanga ömïa athîn nökenê dökî n'oleo kakar Abel na Kain oneko." 26 Ceth thon önywölö wode êka öcakö nyingê Enoc. ï karê nön jîi öcakö wörö Rwoth nakun etio kî nyingê.

5 Man ênê cöc na nyutho êkwaê k'Adam. ï karê n'Obanga ocweo dhanö, ên ocweo na cal ködê. 2 Ên ocweogî ëcwö êka dhakö cê ömïögî gum. Êka ï karê na ên ocweogî, öcakö nying-gî "Dhanö." 3 ï karê na dong Adam obedo ï wi lobo pî mwaka 130, ên önywölö wode na cal ködê kikokome, êka öcakö nyingê Ceth. 4 Kinge na dong önywölö Ceth, Adam obedo ï wi lobo pî mwaka 800 nakun onwongo önywölö awope nökenê êka anyira. 5 Adam obedo ï wi lobo pî mwaka 930 kibëc êka öthöö. 6 ï karê na dong Ceth obedo ï wi lobo pî mwaka 105, ên obino önywölö Enoc. 7 Êka kinge na ên dong önywölö Enoc, Ceth obedo ï wi lobo pî mwaka 807 nakun onwongo önywölö awope nökenê êka anyira. 8 Ceth obedo ï wi lobo pî mwaka 912 kibëc êka öthöö. 9 ï karê na dong Enoc obedo ï wi lobo pî mwaka 90, ên obino önywölö Kenan. 10 Êka kinge na ên dong önywölö Kenan, Enoc obino obedo ï wi lobo pî mwaka 815 nakun önywölö awope nökenê êka anyira. 11 Enoc obino obedo ï wi lobo pî mwaka 905 kibëc êka öthöö. 12 ï karê na dong Kenan obedo ï wi lobo pî mwaka 70, ên obino önywölö Malalel. 13 Êka ï karê na ên dong önywölö Malalel, Kenan obino obedo ï wi lobo pî mwaka 840 nakun onwongo önywölö awope nökenê êka anyira. 14 Kenan obino obedo ï wi lobo pî mwaka 910 kibëc êka öthöö. 15 ï karê na dong Malalel obedo ï wi lobo pî mwaka 65, ên obino önywölö Jared. 16 Êka kinge na ên dong önywölö Jared, Malalel obino obedo ï wi lobo pî mwaka 830 nakun onwongo önywölö awope nökenê êka anyira. 17 Malalel obino obedo ï wi lobo pî mwaka 895 kibëc êka öthöö. 18 ï karê na dong Jared obedo ï wi lobo pî mwaka 162, ên obino önywölö Enoka. 19 Êka ï karê na ên dong önywölö Enoka, Jared obino obedo ï wi lobo pî mwaka 800 nakun onwongo önywölö awope nökenê êka anyira. 20 Jared obino obedo ï wi lobo pî mwaka 962 kibëc êka öthöö. 21 ï karê na dong Enoka obedo ï wi lobo pî mwaka 65, ên obino önywölö Methucela. 22 Êka kinge na ên dong önywölö Methucela, Enoka obino ökwö ï nyim Obanga ï yoo n'opore pî mwaka 300 nakun onwongo önywölö awope nökenê êka anyira. 23 Enoka obino obedo ï wi lobo pî mwaka 365 kibëc. 24 Enoka ökwö ï nyim Obanga ï yoo n'opore êka obino orwenyo, piën Obanga otero ên ökö. 25 ï

karë na dong Methucela obedo i wi lobo pĩ mwaka 187,  n obino  nyw l  Lamek. 26  ka kinge na  n dong  nyw l  Lamek, Methucela obino obedo i wi lobo pĩ mwaka 782 nakun onwongo  nyw l  awope n k n   ka anyira. 27 Methucela obino obedo i wi lobo pĩ mwaka 969 kib c  ka  th  . 28   kar  na dong Lamek obedo i wi lobo pĩ mwaka 182,  n obino  nyw l  wode. 29 C   cak  n y g  Noa  ka okobo n , “ n bino kelo niwa yweo ki   tic m  c ngwa na wan eyelere    i kom ng m na Rwoth  lam .” 30 Kinge na dong  nyw l  Noa, Lamek obino obedo i wi lobo pĩ mwaka 595 nakun onwongo  nyw l  awope n k n   ka anyira. 31 Lamek obino obedo i wi lobo pĩ mwaka 777  ka  th  . 32 Kinge na dong Noa tye ki mwaka 500,  n obino  nyw l  Cem, Kam  ka Yapec.

6   kar  na dhan   cak  nya i wi lobo  ka  nyw l  g n  anyira, 2 awope k'Obanga  n n  n  anyira ka dhan  b c ,  ka  cak  g n  ny m  m k  ki i kin-g  na g n  y r . 3 C  Rwoth okobo n , “Tipona ba bino bedo i kom dhan  p  naka naka, pi n  n obedo kom na th  , nin  m  kw gi bino bedo mwaka 120 k k n.” 4 J  Nepili onwongo tye g n  i wi lobo i kar  nonu— ka kinge—i kar  n'awope k'Obanga obedo g n  k'anyira ka dhan   ka  nyw l  k dg   th n . G n  n  onwongo j  na t k i kar  na c n,  ka j  na ngere. 5 Rwoth  n n  n  bal ka j  na tye i wi lobo      na thw n  rw k,  ka thama m  cwinyg  kib c opong m  t m  gin na reco k k n i kar  kib c. 6 Rwoth cwinye ba obedo na yom p  cweno dhan  i wi lobo, c  cwinye ocwer rw k. 7  ka Rwoth okobo n , “Abino tyeko dhan  na yam acweo i wi lobo—dhan   ka leeni,  ka gin n'ecweo kib c na wotho i wi ng m,  ka winy na ngw c  ki mal —pi n cwinya ba yom ni acweogi.” 8  nt  Rwoth onwongo tye ki cwiny na b r i kom Noa. 9 Man  n   kwa  ka Noa. Noa onwongo obedo dhan  na kite at r abonge bal m r  ki i kin j i i kar  m r ,  ka obedo kw  i nyim Obanga i yoo n'opore. 10 Noa onwongo tye ka awope m r  adek: Cem, Kam  ka Yapec. 11 Lobo onwongo  bal  k  ki i nyim Obanga  ka opong ki t m m  gero. 12 Obanga  n n  kite na lobo  bal k d , pi n j  kib c na tye i wi lobo onwongo  bal  kw gi  k . 13 C  Obanga okobo both Noa n , “An amoko thamana m  tyeko gin na kw  kib c na tye i wi lobo, pi n g n  mi  lobo opong ki t m m  gero. An abino tyekogi  k  kanya ac l  ka ki wi lobo. 14 P  man n y b dong yeya ki bao m  yath caiprac; pok    na papath,  ka ipu     ka kungee k'odok lam. 15 Man  n  kite na myero in  y b k d : Bor ka yeya myero obed mita 135, lac m r  mita 22  ka bor m r  jo mal  myero obed mita

13. 16 G r wi yeya  ka ityek  k  nakun  w k  mal  m r  dong nucu mita. Keth dhlokek i kom yeya kuc l  ka ipok    k r adek—p ny, dyere  ka mal . 17 An abino kelo abwal pii i wi lobo m  tyeko gin na kw  kib c na tye i th  polo, gin n'ecweo kib c na tye ki kw  i komgi. Gin na kib c na tye i wi lobo bino th    k . 18  nt  an abino ketho cik r na kodi,  ka in ibino d ny  i yeya—in  ka awopeni, dhak ni  ka mon k'awopeni. 19 In myero ikel i yeya jami kib c na kw  ka ar   ar  , lee n'obedo  cw   ka lee n'obedo dhak ,  k obed g n  na kw  kanya ac l kodi. 20 Koth winy na papath ar    cw  ki dhak , koth leeni na papath ar    cw  ki dhak   ka gin n'ecweo kib c na wotho i wi ng m bino g n  bino bothi  k  gw kg  obed na kw . 21 Ter koth cem na papath m  acama  k  gw ki m  acamani  ka p  leeni kib c.” 22 Noa  tim  gin na kib c kite n'Obanga  cik   n k d .

7 C  Rwoth okobo both Noa n , “C dh i  d yeya, in  ka j  m  odi kib c, pi n an anwongo n  in  n  kiteni at r ki i kin rok m  kar  ni. 2 Ter koth leeni n' cam  abir  ka ar   ar  , lee n'obedo  cw   ka lee n'obedo dhak ,  ka koth leeni na ba  cam  ka ar   ar  , lee n'obedo  cw   ka lee n'obedo dhak , 3  ka thon koth winy abir , winy  n'obedo  cw   ka winy  n'obedo dhak , m  gw k  kothgi bedo na kw  i wi lobo kib c. 4 Cak r  kobedini kinge nin  abir , an abino mi  k th cwe i wi lobo p  nin  pyer angw n kiceng  ka kiwor,  ka an abino tyeko gin na kw  kib c na tye i wi lobo na an acweo.” 5  ka Noa  tim  gin na kib c na Rwoth  cik   n m  t m . 6 Noa onwongo dong tye ki mwaka 600 i kar  n'abwal pii opong i wi lobo. 7  ka Noa, awope m r , dhak  m r   ka mon k'awope m r     ny  g n  i yeya m  bw th ki i abwal pii. 8 Leeni n' cam   ka leeni na ba  cam  ka ar   ar  , winy  ka gin n'ecweo kib c na wotho i wi ng m, 9 n'obedo  cw   ka n'obedo dhak  obino g n  both Noa  ka    ny  g n  i yeya, kite n'Obanga  cik  Noa k d . 10  ka kinge nin  abir  abwal pii opong i wi lobo. 11   mwaka 600 m  kw  ka Noa, i nin  dwe apar abir  m  dwe m  ar  —i nin  n n wang pii kib c omwoc  ka polo thon  yab r . 12  ka k th ocwee i wi lobo p  nin  pyer angw n, kiceng  ka kiwor. 13   nin  n n kikokome Noa  ka awope m r , Cem, Kam  ka Yapec, kanya ac l ki dhak  m r   ka mon k'awope m r  adek,    ny  g n  i yeya. 14 G n    ny  kanya ac l ki leeni m  thim kib c na l b r  ki kothgi, leeni m  pac  kib c na l b r  ki kothgi, gin n'ecweo kib c na wotho i wi ng m na l b r  ki kothgi  ka winy kib c na l b r  ki kothgi, gin na kib c na tye ki bwomgi. 15 Gin n'ecweo kib c na tye ki yweo

mê kwô ï komgî obino ginî both Noa êka ôdônyô ginî ï ôd yeya ka ariô ariô. 16 Leeni na papath n'obedo cwô êka mon, kite n'Obanga ôcikô ên kôdê obino ôdônyô ginî ï yeya both Noa. Cê Rwoth ocegogî ï ôd yeya. 17 Kôth obedo cwee ï wi lobo pî ninô pyer angwên, êka abwal pii opong ï wi lobo naka otingo yeya malô kî ï kom lobo. 18 Kôth ocwee êka ômiô pii ômêdêrê rwôk ï wi lobo naka yeya olyero ï wi pii. 19 Kôth ocwee rwôk ï wi lobo naka ômiô pii oumo kite na boco kibêc na tye ï thê polo. 20 Kôth ômêdêrê kî cwee ï wi lobo naka pii ômwônyô wi kite na kadhô puti pyer ariô. 21 Gin môrô kékên na kwô n'onwongo wotho ï wi lobo—wîny, leeni mê pacô, leeni mê thim, gin n'ecweo kibêc na wotho ï wi ngôm êka kî jîi kibêc ôthôô ginî ôkô. 22 Gin na kibêc na tye ï wi ngôm n'onwongo tye kî yweo mê kwô ï kome ôthôô ôkô. 23 Gin na kwô kibêc n'onwongo tye ï wi lobo etyekogî ôkô; dhanô, leeni, gin n'ecweo kibêc na wotho ï wi ngôm êka wîny kibêc na ngwêcô kî malô etyekogî ôkô kî ï wi lobo. Noa êka jô n'onwongo tye kôdê ï yeya kékên ênê odong. 24 Abwal pii opong ï wi lobo pî ninô 150.

8 Êntô Obanga opo ï kom Noa kî leeni mê thim kibêc, êka kî leeni mê pacô n'onwongo tye kanya acêl kôdê ï yeya, êka ooro yamô ï wi lobo, cê pii ôcakô dwon ôkô. 2 Wang pii na thuth kî ï ngôm êka pii na yaa kî ï polo ocung ôkô, cê kôth kî ï polo ocok ôkô. 3 Pii ômêdêrê mê dwon kî ï wi lobo. Kinge ninô 150, pii onwongo odwon ôkô. 4 ï ninô dwe apar abirô mê dwe mê abirô, yeya obino ocung ï wi kite mê Ararat. 5 Pii ômêdêrê mê dwon naka ï dwe mê apar, êka ï ninô mê acêl mê dwe mê apar, wi kite na boco ôcakô ginî nen. 6 Kinge ninô pyer angwên, Noa ôyabô wang derica n'onwongo ên otuco ï kom yeya, 7 êka ooro akûrûk yôkô, cê ôcakô ngwêc, nakun wirê tungi kî tungi, naka pii ôthwô ôkô kî ï wi lobo. 8 Cê Noa ooro amam mê nêno ka pii dong odwon ôkô kî ï wi ngôm. 9 Êntô amam ba onwongo kanya myero epye iê, piên pii onwongo pod tye ï wi lobo kibêc. Cê amam ôcakô dôk cen both Noa ï yeya. Noa olyao cîngê êka ôgamô amam cê odwongo yo bothe ï yeya. 10 Ên ôkûrô pî ninô abirô nôkênê, êka dôkî ooro amam yo yôkô kî ï yeya. 11 ï karê n'amam ôdôk bothe ï yeya kothyeno, amam onwongo otingo pot yath jeituni na thîc ï dhôgê na ên ôpudô. Cê Noa ôniang nî pii dong otyeko dwon ôkô kî ï wi lobo. 12 Cê Noa ôkûrô pî ninô abirô nôkênê, êka dôkî ooro amam, êntô amam ba dôk odwogo bothe. 13 ï karê na Noa onwongo dong tye kî mwaka 601, ï ninô mê acêl mê dwe mê acêl mê mwaka na nyen, pii onwongo dong

odwon ôkô kî ï wi lobo. Noa ôcakô pudho wi yeya ôkô, cê ônêno nî wi ngôm onwongo ôthwô ôkô. 14 ï ninô dwe pyer ariô wie abirô mê dwe mê ariô, wi lobo kibêc onwongo ôthwô ôkô. 15 Cê Obanga okobo both Noa nî, 16 "Donyi yôkô kî ï yeya, in êka dhakôni, awopeni êka mon-gî. 17 Kel gin na kwô kibêc na tye ginî kanya acêl kodi yôkô—wîny, leeni êka gin na kibêc na wotho ginî kî korgî ï wi ngôm—êk ônya ginî ï wi lobo, ônywôl ginî êka ômêdêrê na pol ï wi lobo." 18 Cê Noa odonyo yôkô, kanya acêl k'awope mêrê, dhakô mêrê, êka mon k'awope mêrê. 19 Leeni kibêc, gin na kibêc na wotho kî korgî ï wi ngôm, êka wîny kibêc—gin na kibêc na wotho ï wi lobo—odonyo ginî yôkô kî ï yeya, na lûbêrê kî kothgî. 20 Cê Noa ôgêrô keno tyêr both Rwoth êka ôkwanyô koth leeni kî wîny n'êcamôgî, êka ôtyêrô tyêr awanga ï wi keno tyêr. 21 Rwoth ongweo gin na ngwece kur na yomo cwinye, cê Rwoth okobo kî ï cwinye kênê nî, "An ba dôkî abino lamô lobo pî dhanô, kadî bed thama mê cwinye opong kî bal cakêrê kî ï karê mê thino mêrê. An ba dôkî abino neko gin na kwô kibêc kite na yam atîmô. 22 "Ka lobo pod tye, karê mê cwôc êka kac, ngîcô êka lyetho, oro êka cwîr, kiceng êka kiwor, ba bino jik na twal."

9 Cê Obanga ômiô gum ï kom Noa êka êthinô awope mêrê nakun kobo bothgî nî, "Nywôl ïnya unu, êka ipong unu lobo. 2 Leeni kibêc mê thim bino ginî lworoni, naka thon wîny kibêc na ngwêcô kî malô, gin na wotho ginî kî korgî ï wi ngôm, êka kî rêc kibêc na tye ï nam; etyeko miôgî ï cîngwu. 3 Gin na kibêc na kwô êka na wotho, bino bedo cem na mewu. Kite na calô amiô bothwu ngwedo, kobedi dong an amiôwu jami kibêc. 4 "Êntô kûr ïcam unu ringo na remo pod tye iê, piên remo obedo kwô mêrê. 5 Êka ka ênyô remowu, an abino miô pwod both lee môrô kékên. Êka both dhanô acêlacêl thon, an abino miô pwod pî kwô k'awodhe. 6 "Ka ngat môrô ôdnyô remo ka dhanô, dhanô thon bino ônyô remo mêrê; piên Obanga ocweo dhanô ï cal mêrê. 7 Êntô pî un, nywôl unu, mêdêrê unu na pôl, êka ïnya unu ï wi lobo." 8 Cê Obanga okobo both Noa êka awope mêrê nî, 9 "Nên! An amoko cikêrêna kodwu êka k'êkwaêwu na bino lûbô kôrwu 10 kî gin na kwô kibêc n'onwongo tye ginî kodwu—wîny, leeni mê pacô êka kî leeni mê thim kibêc, gin na kibêc n'odonyo yôkô kî ï yeya kodwu—kî gin na kwô kibêc na tye ï wi lobo. 11 An amoko cikêrêna kodwu nî abwal pii ba dôkî bino neko gin na kwô; abwal pii ba dôkî bino bedo na tye mê tyeko wi lobo." 12 Êka Obanga okobo nî, "Man ênê anyuth mê cikêrêna na an aketho ï kin an kodwu êka

kí gin na kwô kibéc na tye kodwu, cikêrê na bino bedo na twal i rok kibéc. **13** An aketho lúth kóth na mēga i edou, éka bino bedo anyuth mē cikêrêna i kin an éka kí wi lobo. **14** Ka an akelo edou i wi lobo éka lúth kóth orire i edou, **15** an abino po i kom cikêrêna na tye i kin an kodwu éka kí gin na kwô kibéc kí kothgi. Abwal pii ba dôki bino bedo na tye mē tyeko gin na kwô kibéc. **16** Ka lúth kóth orire i edou, an abino nēnô, cé abino po i kom cikêrê na ba jik i kin Obanga éka koth gin na kwô kibéc na tye i wi lobo." **17** Cé Obanga okobo both Noa ni, "Man ênê anyuth mē cikêrê na an aketho i kin an kí gin na kwô kibéc na tye i wi lobo." **18** Awope ka Noa n'odonyo gini kí i yeya ênê Cem, Kam éka Yapec. (Kam ênê obedo apap ka Kanaan.) **19** Man ênê awope adek ka Noa, éka kí i kin-gi ênê jô n'obino ôkêth gini i wi lobo thûkûl. **20** Kinge abwal pii, Noa obino ôdôkô apur éka opuro pwodho ôlôk. **21** I ninô môrô acêl ên ômadhô kôngô ôlôk cé ômêr ôkô, éka obuto kotula i ôd kēma mērê. **22** I karê na Kam, apap ka Kanaan, ônēnô apap mērê na tye kotula, ên ôcîdhô okobo both omego mērê n'onwongo tye gini yôkô. **23** Cé Cem éka Yapec otero gini bôngû cûka n'otîngi i wi baagi, cé ôcakô woth gini ayongec, éka oumo gini kom apapgi n'onwongo tye kotula. Terinyimgi onwongo nēnô yo kanya path, naka ba dôk ônēnô gini kom apapgi n'onwongo tye kotula. **24** I karê na Noa oco kí i wang ninô na kôngô ôlôk dong othum ôkô kí i wie, cé opo i kom gin na wode na tîdî ôtîmô i kome, **25** ên okobo ni, "Cen obed i kom Kanaan! Ên obed opii na rwôm mērê tîdî i kin opii k'omogo mērê." **26** Ên thon okobo ni, "Pak obed both Rwoth, Obanga ka Cem! Êk Kanaan obed opii mērê. **27** Êk Obanga ômîi wang lobo ka Yapec obed na lac êk Yapec obed i kēma ka Cem éka Kanaan obed opii mērê." **28** Kinge n'abwal pii opong i wi lobo, Noa obedo i wi lobo pi mwaka 350. **29** Noa obino obedo i wi lobo pi mwaka 950, cé dong ôthôô.

10 Man ênê côc na nyutho êkwaê ka Cem, Kam éka Yapec awope ka Noa n'obino ônywôlô gini êthînô na pol kinge abwal pii. **2** Awope ka Yapec gin ene: Gomer, Magog, Madai, Jaban, Tubal, Mecak éka Tîrac. **3** Awope ka Gomer gin ene: Acikenaj, Ripat éka Togarma. **4** Awope ka Jaban gin ene: Elica, Tarcic, Kitim, éka Rodanim. **5** Jô na tye i dhô nam opokere gini ôkô kí i kom jô nôn. Man ênê êkwaê ka Yapec kí lobogi, nakun ngat acêlacêl twakô lēbgî, na calô kakagi kí rokgî tye kôdê. **6** Awope ka Kam gin ene: Kuc, Ejip, Put éka Kanaan. **7** Awope ka Kuc gin ene: Ceba, Kabila, Cabta, Raama éka Cabteca. Awope ka Raama gin ene: Ceba éka Dedan. **8** Kuc onwongo

obedo apap ka Nimrod, n'ôcakô bedo alwēny na tēk kí i wi lobo. **9** Ên onwongo obedo thwôn adwar na tēk i nyim Rwoth, ênê ômîô ekobo ni, "Calô Nimrod n'obedo thwôn adwar na tēk i nyim Rwoth." **10** Acaki mē lôc mērê onwongo obedo i Babel, Erek, Akad éka Kalne, na tye i lobo Cinar. **11** Cakêrê kí i lobo nôn, ên ôcîdhô naka i Aciria, kanya ên ôgêrô iê Ninebe, Rekobot Ir, Kala, **12** éka Recen, n'obedo kabedo na tye i kin Ninebe kí Kala, manôn ênê pacô na dit. **13** Ejip onwongo obedo apap ka jô Lud, jô Anam, jô Leab, jô Naptuk, **14** jô Patruc, éka jô Kacluk (man ênê kaka na Pilicîtain ôya gini kí iê) éka jô Kaptor. **15** Kanaan onwongo obedo apap ka Cidon athîn kaô mērê, éka jô Kit, **16** jô Jebuc, jô Amor, jô Girgac, **17** jô Kibi, jô Arka, jô Cin, **18** jô Abad, jô Jemar, éka jô Kamat. Kinge, kaka ka jô Kanaan ôkêth gini ôkô. **19** Wang lobo ka jô Kanaan ôcakêrê kí i Cidon odok kôdê yo kutung Gerar, mē thuno kôdê naka i Gaja, éka dôk kôdê yo Codom, Gomora, Adma éka Jeboim mē thuno kôdê naka yo Laca. **20** Man ênê awope ka Kam na lûbêrê kí kakagi éka lēbgî, i katedogi éka i rokgî. **21** Cem ômîn Yapec na dit obino ônywôlô awope thon, Cem ênê onwongo obedo kwarô k'awope ka Eber kibéc. **22** Awope ka Cem gin ene: Elam, Acur, Arpakcad, Lud éka Aram. **23** Awope ka Aram gin ene: Uj, Kul, Geter éka Mac. **24** Arpakcad onwongo obedo apap ka Cela, éka Cela onwongo obedo apap ka Eber. **25** Eber obino ônywôlô awope ariô: Ngat acêl ebino êcakô nyingê Peleg, piên i karê mērê ênê jô mē lobo obino opokere, ômîn mērê ebino êcakô nyingê Yokotan. **26** Yokotan onwongo obedo apap ka Almodad, Celep, Kajarmabet, Jera, **27** Adoram, Ujal, Dikla, **28** Obal, Abimael, Ceba, **29** Opir, Kabila éka Jobab. Man ênê onwongo obedo gini awope ka Yokotan. **30** Lobo na gin onwongo obedo gini iê ôcakêrê kí i Meka, ôdôk kôdê yo kutung Cepar i lobo n'otîngere malô na tye yo kukidê. **31** Man ênê awope ka Cem, na lûbêrê kí kakagi éka lēbgî na tye i lobogi éka rokgî. **32** Man ênê kaka k'awope ka Noa, na lûbêrê k'ekwaēgi, i kin rokgî. Rok ôcakô kēth i wi lobo thûkûl kinge abwal pii.

11 Yam côn jô mē wi lobo thûkûl onwongo twakô gini lēb acêl éka kôp acêl. **2** I karê na jîi ôcakô woth nakun êdôk yo kukidê, gin onwongo kany môrô n'obedo bar i Cinar éka obedo gini kunôn. **3** Gin ôcakô twak kên-gî ni, "Bin unu, êk êgôô birîk éka êwang na bër." Gin otio kí birîk nakaka kidi, éka odok lam mē mwônô kin-gî. **4** Cé gin dôki okobo ni, "Bin unu, êk êgêr pacô onu, kí gedo na bor na thuno malô i wi polo, êk êmîi nying onu ongere éka kûr êkêth ata

ĩ wi lobo kibęc.” 5 Ĕntō Rwoth oidho pĩny mē nēnō pacō ěka gedo na bor na jĩĩ onwongo tye ka gērō. 6 Cē Rwoth okobo nĩ, “Ka gĩn na calō jō n’ōribērē acēl na twakō gĩnĩ lēb acēl ōcakō gĩnĩ tĩmō nĩ kōman, cē gĩn mōrō na gĩn bino yūbō mē tĩmō ba bino lōōnōgĩ. 7 Bin unu, ěcidh pĩny erurubo lēbgĩ ěk kūr ngat acēlacēl ōnĩang ĩ lēb awodhe.” 8 Cē Rwoth ōkēthōgĩ kĩ kunōn ĩ wi lobo thūkūl, ěka ōwēkō gĩnĩ gērō pacō nōn. 9 Manōn ěnē ōmiō ěcakō nĩyngē nĩ Babel—piēn kany nōn ěnē Rwoth orurubo kĩ lēb mē wi lobo thūkūl, ěka kĩ kunōn ěnē Rwoth ōkēthōgĩ kōdē ĩ wi lobo kibęc. 10 Man ěnē ěkwaē ka Cem. ĩ karē na Cem onwongo dong tye kĩ mwaka 100, ěn ōnywōlō Arpakcad, kinge mwaka ariō n’abwal pii opong kōdē ĩ wi lobo. 11 ěka kinge na ěn ōnywōlō Arpakcad, Cem obedo ĩ wi lobo pĩ mwaka 500, ěka ěn onwongo dong ōnywōlō awope nōkēnē ěka anyira. 12 ĩ karē n’Arpakcad obedo ĩ wi lobo pĩ mwaka 35, ěn obino ōnywōlō Cela. 13 ěka kinge na ěn ōnywōlō Cela, Arpakcad obedo ĩ wi lobo pĩ mwaka 403 ěka ěn onwongo dong ōnywōlō awope nōkēnē ěka anyira. 14 ĩ karē na Cela obedo ĩ wi lobo pĩ mwaka 30, ěn ōnywōlō Eber. 15 ěka kinge na ěn ōnywōlō Eber, Cela obedo ĩ wi lobo pĩ mwaka 403 ěka ěn onwongo dong ōnywōlō awope nōkēnē ěka anyira. 16 ĩ karē n’Eber obedo ĩ wi lobo pĩ mwaka 34, ěn ōnywōlō Peleg. 17 ěka kinge na ěn ōnywōlō Peleg, Eber obedo ĩ wi lobo pĩ mwaka 430 ěka ěn onwongo dong ōnywōlō awope nōkēnē ěka anyira. 18 ĩ karē na Peleg obedo ĩ wi lobo pĩ mwaka 30, ěn ōnywōlō Reu. 19 ěka kinge na ěn ōnywōlō Reu, Peleg obedo ĩ wi lobo pĩ mwaka 209 ěka ěn onwongo dong ōnywōlō awope nōkēnē ěka anyira. 20 ĩ karē na Reu obedo ĩ wi lobo pĩ mwaka 32, ěn ōnywōlō Cerug. 21 ěka kinge na ěn ōnywōlō Cerug, Reu obedo ĩ wi lobo pĩ mwaka 207 ěka ěn onwongo dong ōnywōlō awope nōkēnē ěka anyira. 22 ĩ karē na Cerug obedo ĩ wi lobo pĩ mwaka 30, ěn ōnywōlō Nakor. 23 ěka kinge na ěn ōnywōlō Nakor, Cerug obedo ĩ wi lobo pĩ mwaka 200 ěka ěn onwongo ōnywōlō awope nōkēnē ěka anyira. 24 ĩ karē na Nakor obedo ĩ wi lobo pĩ mwaka 29, ěn ōnywōlō Tera. 25 ěka kinge na ěn ōnywōlō Tera, Nakor obedo ĩ wi lobo pĩ mwaka 119 ěka ěn onwongo dong ōnywōlō awope nōkēnē ěka anyira. 26 Kinge na Tera obedo ĩ wi lobo pĩ mwaka 70, ěn onwongo dong ōnywōlō Abram, Nakor ěka Aran. 27 Man ěnē ěkwaē ka Tera. Tera ōnywōlō Abram, Nakor ěka Aran. ěka Aran ōnywōlō Lot. 28 ĩ karē na Tera apap k’Aran pod kwō, Aran obino ōthōō ĩ Ur n’obedo lobo ka jō Kaldaya. 29 Abram ěka Nakor obino onyomo gĩnĩ. Nĩyng dhakō k’Abram onwongo ecwodo nĩ Carai ěka nĩyng dhakō ka Nakor onwongo

ecwodo nĩ Milca, ěn onwongo obedo nyaka Aran, apap ka Milca ěka Icika. 30 Ĕntō Carai onwongo ope k’athĩn mōrō piēn onwongo ba nywōl. 31 Tera ōkwanyō wode Abram, akwarē Lot wod ka Aran, ěka cii wode Carai, dhakō ka Abram. Gĩn kibęc ōya ōkō kĩ ĩ Ur n’obedo pacō ka jō Kaldaya mē cidhō yo lobo Kanaan. Ĕntō ĩ karē na gĩn othuno ĩ Aran, cē gĩn kono obedo kany nōn. 32 Tera obedo ĩ wi lobo pĩ mwaka 205, ěka ōthōō ĩ lobo Aran.

12 Rwoth okobo both Abram nĩ, “Yaa ōkō kĩ ĩ lobo thurwu, kĩ ĩ kin jōwu ěka jō mē ōt k’apapnĩ ěk ĩcidh ĩ lobo na an abino nyutho nini. 2 “An abino miōni ibedo rok na dit, ěka abino miōni gum; An abino miō nyingi bedo na dit, ěka in ibino bedo dhanō mē gum both jō nōkēnē. 3 An abino miō gum both jō na bino miōni gum, ěka ngat mōrō kēkēn na bino lamōni an thon abino lamō; ěka rok kibęc na tye ĩ wi lobo bino nwongo gĩnĩ gum na yaa kĩ bothi.” 4 Cē Abram ōya, kite na Rwoth okobo ninē kōdē, ěka Lot thon owotho kōdē. Abram onwongo tye mwaka 75 ĩ karē na ěn yaa kĩ ĩ lobo Aran. 5 Abram owotho kĩ dhakō mērē Carai, Lot wod k’ōmin mērē, kĩ jamigĩ kibęc n’onwongo gĩn tye kōdē ěka kĩ jĩĩ na gĩn onwongo kĩ ĩ lobo Aran. Gĩn ōya ōcidhō, ěka othuno gĩnĩ ĩ lobo Kanaan. 6 Abram owotho ĩ lobo naka othuno ĩ kabedo na tye ĩ Cekem. Kany nōn ěn oketho kēma mērē ĩ nget yath na thwōnē mē More. ĩ karē nōn jō Kanaan onwongo tye gĩnĩ ĩ lobo nōn. 7 Cē Rwoth onen both Abram ěka okobo nĩ, “An abino miō lobo nĩ both ěkwaēni.” Cē ěn ōgērō keno tyēr both Rwoth n’onen both. 8 Kĩ kany nōn, ěn ōcakō dak ōkō nakun dōk yo kukidē lobo n’otingere mē Betel ěka oguro kēma mērē iē, Betel nwongo tye kĩ kuthō ěka Ai nwongo tye kĩ kukidē. Ĕn ōgērō keno tyēr kany nōn both Rwoth ěka ōwōrō nĩyng Rwoth. 9 Cē Abram ōmēdērē kĩ woth mērē na cidhō yo Negeb. 10 Kec onwongo opodho ĩ lobo Kanaan, ōmiō Abram ōcidhō yo Ejip mē bedo kunōn pĩ karē mōrō, piēn kec onwongo rac rwōk. 11 ĩ karē n’Abram onwongo dong cwōk dōnyō ĩ Ejip, ěn okobo both dhakō mērē Carai nĩ, “An angeo nĩ in ibedo dhakō na leng rwōk. 12 Ka jō mē Ejip oneni gĩnĩ, gĩn bino kobo nĩ, ‘Man ěnē dhakō mērē.’ Cē gĩn bino nekona ōkō, ěntō ebino wēkōni na kwō. 13 Kob bothgi nĩ in ibedo amēra, ěk ōmiōgĩ obed kōda na bēr pi in ěka kwōna ba ebino neko.” 14 ĩ karē n’Abram obino ĩ Ejip, jō Ejip onwongo ōnēnō dhakō mērē nĩ leng rwōk. 15 ĩ karē n’editē ka Parao ōnēnō Carai, gĩn ōpakō ěn both Parao, ěka etero ĩ pacō ka Parao. 16 Parao ōgwōkō Abram na bēr pĩ Carai. Abram ōgamō rom, dhok, kene n’obedo cwō ěka kene na mon, etic

n'obedo cwö, etic n'obedo mon, ëka kinaga. 17 Ëntö Rwoth ooro two na reco i kom Parao ëka ki jö më ödë pî Carai dhakö k'Abram. 18 Cë Parao ocwodo Abram ëka okobo ninë ni, "Ngö na in itimö i koma? Pingö in ba ikobo nina ni Carai obedo dhaköni? 19 Pingö in ikobo ni ën obedo ameru, ëka imiö atero ën na calö dhaköna? Dhaköni dong ene, kwany ën ëka icidh ökö ki kany!" 20 Cë Parao ömiö twëro both jögë i kom Abram, ëka gin ömiö ën öcidhë ki dhakö mërë ëka ki jami kibëc n'onwongo ën tye ködë.

13 Abram öya ökö ki Eijp gin ki dhakö mërë, ëka ki jami kibëc n'onwongo ën tye ködë më cidhë i Negeb, ëka Lot thon owotho ködë. 2 I karë nön, Abram onwongo ölöny ki leeni më pacö, ki ryal ëka ki gol. 3 Ën obedo ka mëdërë ki wowotha nakun yaa ki i Negeb naka othuno i Betel, kanya ën onwongo oguro këma mërë ië cön, i kabedo na tye i kin Betel ëka Ai. 4 Man onwongo obedo kabedo na ën öcakö gërö keno tyër ië, ëka kany nön ënë Abram öwörö Rwoth ië dök. 5 Lot, n'onwongo wotho gin k'Abram onwongo thon tye ki rom, dhok ëka këma. 6 Ëntö ngöm onwongo ope na römö miöggi bedo kanya acël, piën limgi onwongo dwong rwök na miöggi ba römö bedo kanya acël. 7 Dhaa öcakërë i kin ëkwath k'Abram ëka më ka Lot. I karë nön jö Kanaan ëka jö Periji onwongo thon bedo gin i lobo nön. 8 Abram okobo both Lot ni, "Ba amitö ni dha mörö obed na tye i kin in ki an, onyo i kin ëkwathni ëka mëga, piën onu ebedo utmego. 9 Lobo kibëc tye n'omere i nyimi. Kobedini myero in ipokiri ökö ki botha. Ka in idök yo kucam, an abino dök yo kucem, ka in idök yo kucem an abino dök yo kucam." 10 Cë Lot öcakö tingo wangë ëka önënë ni lobo n'opwodere më Jordan onwongo opong ki pii na bër, calö pwodho ka Rwoth, ëka calö lobo më Eijp na dök yo Joar. (Man ötimërë na bara Rwoth otyeko Codom ëka Gomora.) 11 Lot öyërö gire kënë, lobo kibëc n'opwodere i Jordan ëka ödök yo kukidë. Man ömjö jö arïö ni opokere. 12 Abram obedo i lobo më Kanaan, nakun Lot obedo i kin taun na döngö n'opwodere ëka oguro këma mërë na cwök ki Codom. 13 Jö Codom onwongo obedo gin i jö na kitegi reco ëka balgi onwongo dwong rwök both Rwoth. 14 Kinge na dong Lot opokere ki both Abram, Rwoth okobo both Abram ni, "Ting wangi malö ki kanya in itye ië ëka inën kukuju ëka kukwap, kukidë ëka kuthö. 15 Lobo kibëc na in itye ka nënë an abino miöni ëka both ëkwaëni na twal. 16 An abino miö ëkwaëni bedo calö kwo më dhö nam, ëk ka ngat mörö twëro kwanö kwo më dhö nam, cë ëkwaëni bino kwanërë. 17 Yaa malö, icak lübö bor mërë ëka arii

mërë, piën an abino miöni." 18 Cë Abram ökwanyö këma mërë ëka öcidhë obedo i nget yath na thwönë më Mamre na tye i Kebron, kanya ën ögërö keno tyër ië both Rwoth.

14 I karë nön rwoth Amrapel më Cinar, rwoth Ariok më Elacar, rwoth Kedorlaomer më Elam, ëka rwoth Tidal më Goim, 2 öcidhë gin i më lwëny i kom rwoth Bera më Codom, rwoth Birca më Gomora, rwoth Cinab më Adma, rwoth Cemeber më Jeboim, ëka rwoth më Bela (manön, Joar). 3 Rwdhi ni kibëc öribö gin i acikarigi kanya acël i Ora më Cidim (Nam më Kadö). 4 Gin onwongo obedo i thë löc ka Kedorlaomer pi mwaka apar arïö, ëntö i mwaka më apar adek gin öcakö jem ökö. 5 I mwaka më apar angwën, rwoth Kedorlaomer ëka ki rwdhi n'onwongo öribërë ködë obino öcakö lwëny ëka ölöö gin i jö Repa ki i Aciterot Karnaim, jö Jujim ki i Kam, jö Emim ki i Cabe Kiriataim 6 ëka jö Kori ki i kite më Ceir, naka i El Paran na cwök ki thim. 7 Cë ödök gin i cen ëka öcidhë gin i yo En Micipat (manön, Kadec). Gin öcidhë ölöö lobo ka jö Amalek, ëka jö Amor n'onwongo bedo gin i Ajajon Tamar. 8 Cë rwoth më Codom, rwoth më Gomora, rwoth më Adma, rwoth më Jeboim ëka rwoth më Bela (manön, Joar) öya ëka öyübërë gin i më lwëny i Ora më Cidim 9 i kom rwoth Kedorlaomer më Elam, rwoth Tidal më Goim, rwoth Amrapel më Cinar ëka rwoth Ariok më Elacar—rwdhi angwën ölwënyö i kom rwdhi abic. 10 Ora më Cidim onwongo opong ki bur odok lam na cöl, ëka i karë na rwdhi më Codom ëka Gomora ngwëcö gin i, jö mökö opodho gin i ië cë jö nököne n'odong öngwëcö gin i ökö yo wi kite. 11 Cë rwdhi angwën n'ölö, öyakö jami kibëc na pürgi tük ki cem ka jö Codom ëka Gomora, cë öcidhë gin i ökö. 12 Gin thon obino otero gin i Lot wod k'ömin Abram ki jami mërë, piën ën onwongo bedo i lobo Codom. 13 Ngat acël n'onwongo öbwöth obino otero köp ni both Abram dhanö më Iburu. Abram onwongo bedo na cwök ki yen na thwon ka Mamre dhanö më Amor, ömin Ecikol ëka Aner, gin kibëc onwongo ribërë k'Abram. 14 I karë n'Abram owinyo ni Lot wod k'ömin mërë ëmakö ökö, ën ocwodo jö 318 n'opwonyere, n'ënywölögi i parë ëka öcidhë ölübö ki kök lang naka i Dan. 15 I kiwor, Abram opoko etic mërë më lwëny i komgi ëka ölöögi nakun ryëmögi naka yo Koba, kukuju më Damaciko. 16 Abram odwongo jami kibëc ëka okelo Lot wod k'ömin mërë ki jami mërë, kanya acël ki mon ëka ki jö nököne. 17 Kinge n'Abram odwogo ki kanya ën ölöö Kedorlaomer ëka rwdhi n'onwongo öribërë ködë, rwoth më Codom obino më

romo k'Abram i Ora me Cabe (manon, Ora ka Rwoth). 18 Ce rwoth Melkijedek me Calem okelo ogati eka kongö olök. En onwongo obedo alamdhök k'Obanga na Malö Rwök, 19 eka omiö gum both Abram nakun kobo ni, "Gum k'Obanga na Malö Rwök obed i kom Abram, Obanga n'ocweo polo eka lobo. 20 Eka pak obed both Obanga na Malö Rwök, n'omiö langni i cingi." Ce Abram omiö acel me apar me jami kibec bothe. 21 Rwoth me Codom okobo both Abram ni, "Mia jii eka in igwök jami obed meg." 22 Entö Abram okobo both rwoth me Codom ni, "An atyeko tingo cinga nakun acikara both Rwoth, Obanga na Malö Rwök, n'ocweo polo ki lobo 23 ni ba abino gamö gin mörö ki bothi, kad'i thon wicu, onyo del wör, ek kür ibin ikob ni, 'An ene amiö Abram olöny.' 24 An ba abino gamö gin mörö entö ngö n'awopena öcamö eka jami n'obedo me ka jo n'owotho köda yo both Aner, Ecikol eka Mamre. Miigi oter jamiigi n'epoko nig." 15

Kinge man, Rwoth otwak k'Abram i wang lek, nakun kobo ni, "Abram, kür ibed na lwor! An abedo kwot na meg, cül na meg bino bedo na thwönë." 2 Entö Abram ögamö ni, "Rwoth Obanga Won Twër, ngö na in ibino miöna nakun ape k'athin mörö eka dhanö na bino leeno jamina ene Eliejer me Damaciko?" 3 Abram döki okobo ni, "In ba imia athin mörö, eka atic ni n'enywölö i öda ene bino leeno jamina." 4 Ce Rwoth döki otwak köde ni, "Dhanö ni ba bino leeno jamini, entö wodi kikokome na in inywölö ene bino leeno jamini." 5 Ce Rwoth okelo Abram yökö eka okobo ninë ni, "Nen malö i wi polo eka ikwan wel cër—ka adyer in irömö kwanögi." Ce en okobo ninë ni, "Ekwaeni thon bino bedo na pol kömanön." 6 Abram oketho yee märe i kom Rwoth, eka omiö ekwanö en ni kite atir. 7 Ce Rwoth döki okobo ninë ni, "An abedo Rwoth na ene okeli yökö ki i Ur na tye i lobo ka jo Kaldaya, me miöni lobo ni ek obed meg." 8 Entö Abram ögamö ni, "Rwoth Obanga Won Twër, an atwëro ngeno ningö ni lobo ni bino bedo mega?" 9 Rwoth okobo both Abram ni, "Kel nina nya raa mörö me mwaka adek, nya dyel me mwaka adek, thwön römö me mwaka adek, akur eka athin amam." 10 En okelo jami ni kibec both Rwoth, ce ongununo igi ariö ariö eka öcanögi na dul acelacel kemo awodhe, entö winy en ba ongununogi. 11 Ka acuth obino me camö ringogi, Abram ryemögi ökö. 12 I karé na ceng dong cwök dönyö, ninö ömakö wang Abram rwök, eka piny na cöl cuc oumo en ökö. 13 Ce Rwoth okobo ninë ni, "Myero inge atir ni ekwaeni bino bedo Erok i lobo na pathi meg. Ebino miögi bedo opii eka ebino yelögi pi mwaka 400. 14 Entö an

abino miö pwod i kom jo na bino yelögi, eka kinge gin bino yaa ökö ki kunön nakun nwongo tye gini ki lim na pol. 15 Entö in ebino ikoni kanya acel ki kwereni ki kuc. Ebino ikoni na dong itii. 16 Kinge rok me angwen, ekwaeni bino dwogo gini cen kany piën bal ka jo Amor bara römö ketho can i komgi." 17 I karé na ceng dong ödönyö, eka piny ödökö na cöl, agulu na iro dung ki te ki mac na lyel i raa onen eka owok i dyere ringo n'engunguno ki kom lee acelacel. 18 I ninö nön ene Rwoth oketho cikere märe k'Abram nakun kobo ni, "An amiö lobo ni both ekwaeni, cakere ki i kulo me Ejjp thuno köde naka i kulo na thwönë me Euparate, 19 lobo ka jo Keni, jo Keniji, jo Kadmon, 20 jo Kit, jo Periji, jo Repa, 21 jo Amor, jo Kanaan, jo Girgac eka jo Jebuc."

16 Carai dhakö ka Abram ba önywölö ninë ethinö mörö. Entö onwongo tye k'atic märe n'obedo nya jo Ejjp na nyingé Agar. 2 Carai okobo both Abram ni, "Rwoth öjuka ökö me nwongo ethinö, cidhi ibed k'aticna gwök onyo abino nwongo athin mörö ki bothe." Abram oyeo ngö na Carai okobo. 3 Ce kinge na dong Abram obedo i Kanaan pi mwaka apar, Carai ökwanyö atic märe Agar n'obedo nya jo Ejjp eka omiö both Abram me bedo dhakö märe. 4 Abram obedo k'Agar, eka öyac. I karé n'Agar ongeö ni dong eyac, en öcakö caö adit märe Carai. 5 Ce Carai okobo both Abram ni, "Can na an atye ka nwongo myero obed i wi. An amiö aticna i cingi eka kobedini en ongeö ni en dong eyac, ce öcakö caöna. Ek Rwoth öngöl i kin ön nga na rac." 6 Abram ögamö ni, "Aticni tye i cingi, tim gin mörö kekén na in ithamö ni ber i kome." Ce Carai öcakö yelo Agar rwök naka omiö öngwécö ökö ki bothe. 7 Malaika ka Rwoth onwongo Agar i nget kulo na tye i thim na cidhö yo Cur. 8 Malaika okobo ninë ni, "Agar, atic ka Carai, in ibino ki kwene, eka icidhö yo kwene?" En ögamö ni, "An atye ka ngwéc ökö ki both Carai." 9 Ce Malaika ka Rwoth okobo ninë ni, "Dök cen both Carai eka ibed i thö léc märe." 10 Ce malaika ömédère me kobo ninë ni, "An abino medö ekwaeni bedo na pol na ba kwanère." 11 Malaika ka Rwoth okobo ninë thon ni, "In kobedini dong i yac eka ibino nywölö athin n'ecwö. Ibino cakö nyingé Icimael, piën Obanga owinyo koko me cwer cwinyi. 12 En bino bedo calö kana na ger, en bino bedo na ger nakun lwönyö i kom jo kibec eka jo kibec bino lwény i kome, eka en bino bedo kéné ki both utmegö märe kibec." 13 Agar ömiö nying ni both Rwoth n'otwak köde ni, "In ibedo Obanga na nëna," piën okobo ni, "An dong anenö Obanga na nëna." 14 Ene ömiö kulo nön ecwodo ni Beer Lakai

Roi. Kulo nön nwrongere i dyere Kadec ëka Bered. 15 Agar önywölö n'Abram athin n'ëcwö ëka Abram öcakö nyingë Icimael. 16 Abram onwongo dong tye ki mwaka 86 i karë na Agar önywölö ninë Icimael.

17 I karë n'Abram dong othuno mwaka 99, Rwoth onen bothe ëka okobo ni, "An Obanga Won Twër kibëc, kwö i nyima i yoo n'opore abonge bal mörö. 2 An abino moko cikëréna i kin an ki in ëka abino miö ëkwaëni bino bedo na pol." 3 Abram oryebere piny i ngöm i nyim Obanga, ëka Obanga okobo ninë ni, 4 "An amoko cikëréna kodi. In ibino bedo kwarö ka rok na pol. 5 Nyingi ba dökü ebino cwodo ni Abram, ëntö Abraam, piën an amii idökö kwarö ka rok na pol. 6 An abino miö ëkwaëni bedo na pol; an abino miöni idökö rok na pol, ëka rwothi bino yaa ki bothi. 7 An abino moko cikëréna kodi ëka ëkwaëni na bino lüböni, ëka ëkwaëgi kibëc obed cikëré na bino bedo na twal pi run kibëc. An abino bedo Obangani ëka Obanga k'ëkwaëni na bino lüböni. 8 An abino miö lobo Kanaan kibëc bothi—lobo na in kobedini itye ië na calö arok ëk obed megü na twal ëka ëkwaëni na bino lüböni. An abino bedo Obangagi." 9 Cë Obanga okobo both Abraam ni, "In myero igwök cikëréna, in ëka ëkwaëni na bino lüböni i run më anyim. 10 Man ënë cikëréna kodi ëka ëkwaëni na bino lüböni, cikëré na myero igwöki: Cwö kibëc na tye i kinwu myero ëlir. 11 Un myero ilir wi del komwu më cwö, ëka man bino bedo anyuth më cikëré i kin an ëka un. 12 Pi rok na tye ka bino, ëthinö awope kibëc na tye ninö aboro myero ëlir, naka thon ëthinö awope n'ënywölö i kinwu onyo ëwilö ki ciling ki both Erok na ba ënywölögi i kin ëkwaëni. 13 Kono kadü ënywölö i odi onyo iwölö ki cilingni, myero ëlirgi. Cikëréna na tye i del komwu myero obed cikëré na bino bedo na twal. 14 Dhanö mörö n'obedo ëcwö na ba ëlirö del wi kome më cwö, ebino kwanyö ökö ki i kin jögë, piën nwongo ën ötürö cikëréna." 15 Obanga thon okobo both Abraam ni, "Dhaköni, in ba dök ibino cwodo ën ni Carai; nyingë bino bedo Cara. 16 An abino miö gum bothe ëka abino miöni athin n'ëcwö na yaa ki bothe. Abino miö gum both Cara ëk obed aya ka rok na pol, rwothi ka jii bino yaa ki bothe." 17 Abraam oryebere piny i ngöm, önyërö ëka ötwak kënë ni, "Dhanö na tye ki mwaka 100 twërö nywölö athin? Cara twërö nywölö athin nakun ën dong tye ki mwaka pyer abungwën?" 18 Ëka Abraam okobo both Obanga ni, "Öma mii Icimael olee jami na in icikö!" 19 Cë Obanga okobo ni, "Pe, ëntö dhaköni Cara bino nywölö nini athin n'ëcwö, ëka ibino cakö nyingë Icaka. An abino moko cikëréna ködë na bino

bedo na twal ëka ëkwaë mëré na bino lübö ën. 20 Ëka pi Icimael, an awinyo kwacni, adyer an abino miö ën gum, abino miö ën nywölö nya na pol rwök. Ën bino bedo kwarö ka rwothi apar ariö ëka abino miö ën dökö rok na dit. 21 Ëntö an abino moko cikëréna ki Icaka, athin na Cara bino nywölö nini i koth karë ni i mwaka na bino." 22 I karë na ën dong otyeko twak k'Abraam, Obanga öya ökö ki bothe. 23 I ninö nön kikokome Abraam ökwanyö wode Icimael kanya acël ki jö kibëc n'ënywölö i pacö mëré, onyo n'öwilö ki ciling mëré, jö kibëc n'obedo cwö na tye i pacö mëré ölirögi kite n'Obanga okobo ninë. 24 Abraam onwongo dong tye ki mwaka më dit mëré 99 i karë n'ëlirö ën, 25 ëka wode Icimael onwongo dong tye ki mwaka apar adek i karë n'ëlirö ën. 26 Abraam ëka wode Icimael ëlirögi i ninö nonu kikokome. 27 Cwö kibëc n'onwongo tye i pacö mëré, ëka cwö kibëc n'ënywölö i pacö onyo n'ëwilö ki both arok, ëlirögi kanya acël ködë.

18 Rwoth dökü onen both Abraam i nget yen na thwon na tye i Mamre, n'onwongo ën obedo i dholokek më këma mëré i karë na piny lyeth. 2 Ën otingo wangë, ëka cücüth önenö jö adek n'ocung ginü ki cecen. I karë na ën önenögi, öringö ki i dhö këma mëré më romo ködgi, cë oryebere piny i ngöm. 3 Abraam okobo ni, "Rwothna, ka itye ki cwiny na bër i koma, kür ikadh aticni akadha. 4 Ëk ekel pii mörö na nönök, ilwök unu ki tyënwu, ëka dong iywe unu i the yath ni. 5 Ëk acidh akel niwu gin mörö më acama, ëk ömii inwong unu tükö mörö, ëka dong imëdërë unu ki wothwu—kite n'onwongo ibino unu ködë botha." Gin ögamö ni, "Eyo, tim kite na in ikobo ködë." 6 Cë Abraam öbünyö cidhö yo both Cara i këma, okobo ninë ni, "Kwany mökö ngano na römö agweti adek piöpiö ëk inyöbi, ëka ited k'ogati mörö." 7 Cë Abraam öringö i öd okul dhok, öyërö wod thwon na ringo mëré pod yom na bër, ëka ömiö both atic mëré, n'öyübö piöpiö. 8 I karë na cem dong öcëc, Abraam okelo cak na wac, cak na libü, ringo na gin otedo, ëka oketho i nyimgi. Ën ocung i nget yath nakun kürögi na gin tye ka cem. 9 Cë gin openyo ni, "Dhaköni Cara tye kwene?" Abraam ögamö ni, "Ën tye i këma." 10 Cë Rwoth okobo ni, "Adyer an abino dwogo bothi i mwaka na bino i koth karë ni, ëka dhaköni Cara nwongo dong tye ki wode." Cara onwongo tye ka winyo köpgi ki i dholokek më këma, n'onwongo tye i nge Abraam. 11 I karë nön Abraam gin ki Cara onwongo dong otii ginü ökö ëka mwakagi onwongo thon thwonë, mwaka ka Cara thon më nywölö athin onwongo dong opoth ökö. 12 Cara önyërö kënë,

nakun kobo ni, "Kinge na dong an atii, eka adwongna thon dong otii okö, pod döki atwëro bedo ki miti me nywölö athin?" 13 Cê Rwoth okobo both Abraam ni, "Pिंगö Cara önyëro nakun kobo ni, 'Adyer an döki atwëro nywölö athin, na dong atii okö?' 14 Tye gin möro na tēk na löö Rwoth? An abino dwogo bothi i karē n'opore i mwaka na bino, nwongo Cara dong tye ki wode." 15 Entö Cara obedo na lwor eka okobo twodo ni, "An gira ba anyëro." Entö Rwoth ögamö ni, "Eyo, in inyëro." 16 I karē na wele öya me cidhö ökö, gin ödök yo kutung Codom, eka Abraam ökwangögi me nyuthigi yoo. 17 Cê Rwoth okobo ni, "Myero an amüng n'Abraam gin na an acwök timö? 18 Adyer Abraam bino bedo rok na thwönē, eka na tēk, na rok kibēc na tye i wi lobo bino nwongo gum na yaa ki bothe? 19 Piēn an dong atyeko yëro ēn, ēk onyuth n'ēthiñö mērē eka jö me ödē na bino lübö körē me lübö yoo ka Rwoth nakun tio gini gin na tye atir. Cê Rwoth bino miö Abraam gin na yam ēn öciko." 20 Cê Rwoth okobo ni, "Koko i kom Codom eka Gomora ödökö na thwönē rwök, eka balgi dong rac rwök. 21 An abino cidhö bothgi ēk acidh anēn ka adyer gin na gin tye ka timö, na koko mērē othuno botha. Cê ka pe, an abino ngeno." 22 Cê jö ariö ölökerē eka öcakö gini woth me cidhö yo Codom, entö Abraam odong nakun ocung i nyim Rwoth. 23 Abraam önyikö na cwök yo bothe eka okobo niñē ni, "In ibino tyeko jö na kitegi atir kanya acēl ki jö na reco? 24 Cê ka jö na kitegi atir bino nwongērē pyer abic i pacö nön? Adyer in ibino tyeko kabedo nön ökö eka ba ibino wëkö pacö nön pi jö pyer abic na kitegi atir na tye gini iē? 25 Adyer ba opore in me timö ni kömanön—me neko jö na kitegi atir kanya acēl ki jö na reco, nakun imiö jö na kitegi atir thon bedo na rom ki jö na reco. Adyer ba opore in me timö ni kömanön! Angöl-köp me lobo kibēc ba bino timö gin na tye atir?" 26 Rwoth ögamö ni, "Ka an anwongo jö na kitegi atir pyer abic na tye gini i Codom, an abino wëkö kabedo nön kibēc pürgi." 27 Cê Abraam döki ötwak ni, "Kite na dong an atwak both Rwoth ki tēk cwiny, kadī bed ni an ba abedo gin möro entö apua eka buru. 28 Cê ka jö na kitegi atir tye pyer angwēn wie abic? In ibino tyeko pacö nön kibēc pi jö abic n'orem?" En ögamö ni, "Ka an anwongo jö pyer angwēn wie abic, an ba abino tyeko." 29 Eka Abraam okobo döki ni, "Cê ka ibino nwongo jö pyer angwēn kēkēn kunön?" En ögamö ni, "Pi jö pyer angwēn an ba abino timö gin möro." 30 Eka döki okobo ni, "Kür akēmö omaki, in Rwoth, an abino twak döki. Ka cê ibino nwongo kunön jö pyer adek kono?" Cê en ögamö ni, "Ba abino timö ka cê abino nwongo jö pyer adek kunön."

31 Abraam döki okobo ni, "Kite na dong an atwak both Rwoth ki tēk cwiny, cê ka jö pyer ariö kēkēn ēnē bino nwongere kunön?" En ögamö ni, "Pi jö pyer ariö, an ba abino tyeko pacö nön." 32 Me ajiki Abraam okobo ni, "Rwoth, kür akēmö omaki i koma, ēk atwak kicēl kēkēn. Cê ka in ibino nwongo jö apar kēkēn kunön?" En ögamö ni, "Pi jö apar nön, an ba abino tyeko pacö nön." 33 I karē na dong Rwoth otyeko twak k'Abraam, en öya ökö eka Abraam ödök i kabedo mērē.

19 I karē n'emalaika ariö othuno gini i Codom kothyeno, gin onwongo Lot obedo i dhö wangkac me pacö. I karē na Lot önēnögi, en öya malö me romo ködgi, eka oryebere piny i ngöm. 2 En okobo ni, "Editena, akwaöwu an aticwu ēk ibin unu i pacöna. Ilwök tyēnwu eka inin unu kany, cê dong iya unu kodiko cön me mēdērē ki woth na mewu." Gin ögamö ni, "Pe, wan ebino niñö i dyere pacö." 3 Entö Lot ödiögi rwök, cê gin ölökerē ödönyö gini i ödē. En otedo cem nigī, otedo ogati abonge thöbi, eka öcamö gini. 4 Na gin bara öcidhö i kabuto, cwö kibēc na tye i pacö me Codom—jö na thini eka jö n'otii—obino cê ögürö gini öti. 5 Gin öcakö redo ki nying Lot ni, "Jö n'obino gini bothi woro kothyeno tye gini kwene? Kelgi yökö bothwa kany, ēk ebut ködgi." 6 Lot ödönyö yökö bothgi, eka oloro dholokek ökö, 7 nakun kobo bothgi ni, "Akwaöwu, utmegona, kür itim unu tim me kipyedē. 8 Nēn, an atye k'anyirana ariö na bara ongere gini ki cwö. Ek akelgi bothwu, itim unu gin na un imitö ködgi. Entö kür itim unu gin möro i kom jö ni, piēn gin dong tye i thē gwök na mēga." 9 Gin oredo ni, "Yaa ökö ki i nyimwal!" Eka okobo gini döki ni, "Nyeri obino kany na calö arok eka kobedini mitö bedo angöl-köp! Wan ebino timö gin na rac i komi na löö gin." Gin ömēdērē me diö Lot, nakun cidhö gini me türö dholokek. 10 Entö emalaika ariö olyao cing-gi yökö, cê öywaö gini Lot i öti eka oloro gini dholokek ökö. 11 Cê gin öbörö wang jö na dito eka jö na thini n'onwongo tye gini i dholokek me öti ki thö wang, ek kür onwong gini dholokek. 12 Emalaika ariö okobo both Lot ni, "In itye ki jö möro nökēn kany n'onyomo i pacöni, awope, anyira onyo ngat möro n'obedo watni? Yaa unu ködgi ökö ki kany, 13 piēn wan ecwök tyeko kabedo ni ökö. Koko na tye i kom jö na tye iē ödökö na thwönē i nyim Rwoth, eka en oorowa ni ek etyēkgi ökö." 14 Cê Lot ödönyö yökö, eka ötwak ki jö n'onwongo mitö nyömö anyira mērē. En okobo ni, "Yaa unu ökö piöpiö ki i kabedo ni, piēn Rwoth cwök tyeko pacö ni ökö." Entö jö n'onwongo mitö nyömö anyira mērē, öthamö gini ni en onwongo woco awoca. 15 Kodiko na piny dong ruu, emalaika

ariö öbunyö ginĩ Lot, nakun kobo ginĩ nĩ, "Yaa ökö! Kwany dhaköni ëka anyirani ariö na tye ginĩ kany, ëk kür etyekwu ökö ka ebino pwodo pacö nĩ." 16 İ karë na ën obedo galërë, emalaika ömakö cingë ëka cing dhakö mërë, cing anyira mërë ariö cë öpëögi yökö kĩ ĩ pacö, piën Rwoth onwongo tye kĩ kica ĩ komgi. 17 İ karë na dong ekelögi yökö, malaika acël okobo nĩ, "Rĩng ĩlar unu kwöwu! Kür ĩnën unu ngewu, ëka kür icung unu kany mörö ĩ ora! Rĩng unu ĩ wi kite, ëk kür ĩthöö unu!" 18 Ĕntö Lot okobo bothgi nĩ, "Pe, adwongna. 19 An aticni anwongo cwiny na bër rwök ĩ nyimi, ëka inyutho kica na thwönë rwök pi larö kwöna. Ĕntö ba atwërö rĩngö yo wi kite, pëkö ni bino podho ĩ koma cë abino thöö ökö. 20 Nën, pacö na cwök na an arömö rĩngö yo ĩë, ëka tidi mörö. Ĕk arĩng yo ĩë Ĕntö pacö nön tidi rwök. Pathi nĩ kömanön? Cë kwöna twërö bwöth." 21 Malaika okobo nĩnë nĩ, "Bër, an awinyo kwacni, ba abino tyeko pacö nön. 22 Ĕntö rĩng yo kunön piöpiö, piën an ba abino timö gin mörö na bara ithuno kunön." (Manön ënë ömiö pacö nön ecwodo nĩ Joar.) 23 İ karë na Lot othuno ĩ Joar, ceng onwongo dong odonyo. 24 Cë Rwoth ooro mac ëka calpa na lyël kĩ ĩ polo n'ocwe pĩny calö köth ĩ kom Codom ëka Gomora. 25 Ĕn otyeko taun na döngö nön ginĩ kanya acël kĩ ngömgĩ, ëka jö kibëc na bedo ginĩ ĩ taun na döngö, ëka thon gin na mar n'otu ki ĩ ngöm. 26 Ĕntö dhakö ka Lot ogwilo nge, ëka ölökerë ödökö kadö n'ocung kamë wir. 27 Kodiko mërë Abraam öya cön, cë öcidhö ĩ kabedo na ën onwongo ocung ĩë ĩ nyim Rwoth. 28 Ĕn önenö Codom ëka Gomora, cë önenö iro na dung kĩ ĩ kabedo kibëc na tye ĩ lobo nön na cal kĩ mac na lyël kĩ ĩ kenö. 29 İ karë n'Obanga otyeko peci na tye ĩ kabedo na Lot onwongo bedo ĩë, ën opo ĩ kom cikërë mërë gin k'Abraam ëka ölarö Lot kĩ ĩ kom can na thwönë rwök. 30 Lot ëka anyira mërë öya ginĩ ökö kĩ ĩ Joar, cë öcidhö obedo ginĩ ĩ wi kite, piën onwongo lworo ginĩ bedo ĩ Joar. Ĕn ëka anyira mërë ariö obedo ginĩ ĩ rwo. 31 İ nĩnö mörö acël, nyarë na dit öcakö kobo both amĩn mërë na tidi nĩ, "Apap ön dong otii ökö, ëka ëcwö mörö ope ĩ wi lobo na myero obed kĩ ön kite na cik më wi lobo kibëc mitö. 32 Bin, ëmĩi apap ön ömadh köngö ölö, ëk ebed ködë ëka enwong ëthinö." 33 İ kiwor nön gin ömiö apapgi ömadhö köngö ölö, ëka anyaka na dit ödönyö ĩ öt cë obedo k'apap mërë. Lot ba ongeö caa na nyarë obedo ködë, ëka caa na ën öya ködë malö. 34 Kodiko mërë nyarë na dit okobo both amĩn mërë na tidi nĩ, "Woro kiwor abedo k'apap ön. Ĕk döki ëmĩi köngö ölö tin kiwor, ëka in döki ĩcidhi ibed ködë, ëk enwong ëthinö n'aya kĩ both apap ön." 35 Cë gin ömiö apapgi ömadhö köngö ölö ĩ kiwor nön thon,

ëka nyarë na tidi öcidhö obedo ködë. Ĕn döki ba ongeö caa na nyarë obedo ködë ëka caa na ën öya ködë malö. 36 Manön kite n'anyira ka Lot ariö öyac ginĩ k'apapgi ködë. 37 Nyarë na dit önywölö athĩn n'ëcwö, ëka öcakö nyĩngë Moab. Ĕnë obedo kwarö ka jö Moab më tin. 38 Nyarë na tidi thon önywölö athĩn n'ëcwö, ëka öcakö nyĩngë Ben Ami. Ĕnë obedo kwarö ka jö Amon më tin.

20 Abraam öcakö woth më cidhö ĩ lobo më Negeb cë ën obedo ĩ dyere Kadec ëka Cur. Ĕn obedo ĩ Gerar pi karë mörö na nönök na calö arok, 2 ëka kĩ kunön Abraam öcakö kobo both jö kibëc nĩ, "Cara obedo amëra." Cë Abimelek, rwoth më Gerar, ooro jögë më cidhö ömö Cara bothe. 3 Ĕntö ĩ kiwor mörö acël, Obanga onen both Abimelek ĩ wang lek ëka okobo nĩnë nĩ, "In iterö dhakö na dong ënyömö ökö, ëka pi manön in ibino thöö." 4 Abimelek onwongo bara obedo ködë ëka ën okobo nĩ, "Rwoth, in ibino neko rok mörö na ba öbalö? 5 Abraam okobo nĩna nĩ Cara obedo amĩn mërë, ëka Cara thon okobo nĩ Abraam obedo ömĩn mërë. An atimö man na cwinya leng, ëka cinga thon ba ötimö gin mörö." 6 Cë Obanga döki okobo bothe ĩ wang lek nĩ, "Eyo, angeö nĩ ĩtimö kömanön na cwinyi leng, ëka manön ënë ömiö an ajuki kĩ ĩ timö bal ĩ nyima. Manön ënë gin n'ömiö an ba amii ibedo ködë. 7 Kobedini dong dwök dhakö ni both cwörë, piën cwörë obedo adwarpiny, ëka ën bino lëgö piri cë ibino kwö. Ĕntö ka ba ĩdwökö, adyer myero inge nĩ in kanya acël kĩ jö më pacöni kibëc ibino unu thöö." 8 Kodiko mërë cön, Abimelek ocwodo etic mërë kibëc, ëka ĩ karë na ën okobo bothgi ngö n'ötimërë, gin obedo kĩ lworo na thwönë rwök. 9 Cë Abimelek ocwodo Abraam bothe ëka okobo nĩnë nĩ, "Ngö na in ĩtimö ĩ komwa? Ngö na an abalö nini, n'ömiö in ikelo bal na thwönë ĩ koma ëka ĩ kom kerna? In ĩtimö gin n'onwongo myero kür ĩtim ĩ koma." 10 Ĕka Abimelek openyo Abraam nĩ, "Ngö n'ömiö ĩtimö gin ni?" 11 Abraam ögamö nĩ, "Piën an athamö nĩ, 'Ngat mörö ope na lworo Obanga ĩ kabedo ni, ëka gin bino nekona ökö pi dhaköna.' 12 Adyer ën obedo amëra kikokome, nyaka apapna kadĩ bed ba obedo athĩn k'ayana, ëka ën ödökö dhaköna. 13 İ karë n'Obanga ökwanya ökö kĩ ĩ pacö k'apapna, akobo nĩnë nĩ, 'Man ënë kite na myero in inyuth nĩna marni: Kabedo kibëc na in ebino cidhö ĩë, ibino kobo nĩ, 'Ĕn obedo ömëra.' 14 Cë Abimelek okelo rom ëka dyegi, dhok, opii na cwö ëka opii na mon cë ömiögi both Abraam, ëka Abimelek ödwökö Cara yo both Abraam. 15 Ĕka Abimelek okobo nĩ, "Nën, lobona ene kibëc; bed kany mörö na in ĩmitö." 16 Ĕn

okobo both Cara ni, "Nën, an amiö omeru cêkël na rômö elip acël. Man obedo më cülöni pî bal mörö kékên na an atimö i komi ëka më nyutho both jö kibêc ni in ba ibalö gin mörö." 17 Cê Abraam ölēgö both Obanga, ëka Obanga öcangö Abimelek, dhakö mërë, ëka opii mërë na mon, ëk döki önywöl gîni ëthîno, 18 piën Rwoth onwongo olo ro öd nyodo kibêc ki i öt ka Abimelek pî köp i kom Cara, dhakö ka Abraam.

21 Rwoth ömiö gum both Cara kite na ën onwongo okobo cön, ëka Rwoth ötimö kite n'onwongo ën öcîkö. 2 Cara öyac ëka önywölö athîn awobi both Abraam i karë më tio mërë, i karë n'Obanga öcîkö ën ië kikokome. 3 Abraam öcakö nyîng athîn na Cara önywölö ni lcaka. 4 I karë na wode lcaka onwongo dong tye ninö aboro, Abraam öllirö ën kite n'Obanga onwongo öcîkö ën ködë. 5 Abraam onwongo dong tye ki mwaka mia acël i karë n'enywölö wode lcaka. 6 Cara okobo ni, "Obanga ömia anyërö ki yom cwiny ëka jö kibêc na bino winyo köp ni bino nyërö gîni köda ki yom cwiny." 7 Ëka ömëdö döki na kobo ni, "Nga n'onwongo bino kobo both Abraam ni Cara bino dödhö ëthîno? Nën, an anywölö ninë athîn awobi i karë më tio mërë." 8 lcaka ödöngö ëka ëkwanyö ökö ki i cak. Abraam öyübö karama na thwönë rwök i ninö n'ëkwanyö ën ki i cak. 9 Kinge na karama othum, Cara önenö awobi na Agar n'obedo dhanö më Ejip önywölö gin k'Abraam tye ka nywarö lcaka. 10 Cê Cara okobo both Abraam ni, "Ryëm dhakö ni n'obedo opii gin ki wode ökö piën wod ka dhakö ni ba bino nywakö gin më alea ki woda lcaka." 11 Köp ni ocwero cwiny Abraam rwök piën lcamael onwongo thon obedo wode. 12 Ëntö Obanga okobo both Abraam ni, "Kür imiî cwinyi ocwer rwök i kom awobi ëka opiini Agar. Tim gin na kibêc na Cara kobo nini, piën ëthîno ka lcaka ënë ebino cwodogî ni ëkwaëni. 13 An abino miö wod ka dhakö n'obedo opii dökö rok thon, piën ën thon obedo wodi." 14 Abraam öya kodiko cön, ökwanyö cem mörö ëka ocwe më pii cê ömïögî both Agar. Ën okethogî i wi baë, ömiö athîn bothe ëka ömïögî öcîdhö. Agar öcîdhö ki yore ëka obedo ka lath i thim më Beerceba. 15 I karë na pii othum ökö ki i ocwe, ën ocibo athîn i thë bunga mörö acël. 16 Cê ën öcîdhö ëka obedo pîny na cwök, na bor mërë röm ki kanya athërö jik ië k'eyuo, piën ën onwongo öthamö ni, "Ba amitö nënö athîn-na ka thöö." Ëka ën obedo kany nön na bobor ködë, cê ën öcakö koko. 17 Obanga owinyo athîn ka kok, ëka malaika k'Obanga ocwodo Agar ki i polo cê okobo ninë ni, "Agar, ngö na rac? Kür ibed ki lworo, Obanga owinyo koko k'athîn ki kanya obuto ië. 18 Yaa malö, iting athîn ëka imak

cîngë, piën an abino miö ëkwaë mërë dökö rok na dit." 19 Cê Obanga öyabö wang Agar ëka önenö kulo na pii tye ië. Ën öcîdhö ötwömö pii cê öpikö pong ocwe ëka ömiö athîn omodho. 20 Obanga onwongo tye k'athîn ni na ën tye ka döngö. Ën obedo i thim ëka ödökö adwar. 21 Ën obedo i thim më Paran, ëka aya mërë önyömö ninë nyakö ki i lobo më Ejip. 22 I karë nön Abimelek ëka Pikol adit acikari mërë öcîdhö gîni both Abraam ëka okobo ni, "Obanga tye kodi i gin na kibêc na in i'timö. 23 Kobedini kwongiri botha kany i nyim Obanga ni ba ibino bwölöna onyo ëthînoña onyo ëkwaëna. Nyuth nîna ëka lobo na in itye kabedo ië na calö arok, gin na bër na an thon atimö bothi." 24 Abraam okobo ni, "An akwongara." 25 Cê Abraam okok both Abimelek pî kulo na pii tye ië n'onwongo etic k'Abimelek ocere gîni ökö ië. 26 Ëntö Abimelek okobo ni, "An ba angeo nga n'ötîmö gin ni. In ba ikobo nîna, ëka an awinyo köp ni tin." 27 Cê Abraam ökwanyö rom ëka dhok cê ömïögî both Abimelek, ëka jö ariö ni öcîkërë i kin-gî. 28 Abraam öyërö nyirom abirö okethogî path, 29 ëka Abimelek openyo Abraam ni, "Pîngö in iketho rom abirö na path ki kom rom nökökë?" 30 Ën ögamö ni, "Gam rom abirö ni ki i cînga, na calö caden ni an yam akünyö kulo ni." 31 Manön ënë ömiö ecwodo kabedo nön ni Beerceba, piën jö ariö okwongere gîni kunön. 32 Kinge na cîkërë ötimërë i Beerceba, Abimelek ëka Pikol adit acikari mërë ödök gîni i lobo ka jö Pilicitain. 33 Abraam öpîdhö yath tamarik i Beerceba, ëka kany nön ënë ën öwörö Rwoth, Obanga na Bedo Naka. 34 Ëka Abraam obedo i lobo ka jö Pilicitain pî karë na lac.

22 Kinge karë mörö, Obanga ötëmö Abraam. Ën okobo ninë ni, "Abraam!" Abraam ögamö ni, "An enene." 2 Cê Obanga okobo ni, "Kwany wodi acël kékên lcaka, na in imarö, ëka icîdh i lobo më Moria, ëk ityër ën kunön na calö tyër awanga i wi kidi mörö acël na an abino kobo nini." 3 Kodiko cön Abraam öya ëka otweo then më bedo i wi kana mërë. Ën ökwanyö etic mërë ariö ëka wode lcaka. I karë na ën dong otongo yen më tyër awanga, ën öcakö woth më cîdhö i kabedo n'Obanga onwongo okobo ninë. 4 I ninö më adek Abraam otingo wangë malö ëka önenö kabedo nön ki kanya bor. 5 Cê Abraam okobo both etic mërë ni, "Bed unu kany ki kana nakun an ëka awobi ni ëcîdhö yo tung ca më wörö Obanga ëka ebino dwogo bothwu." 6 Abraam ökwanyö yen më tyër awanga cê oketho i wi wode lcaka, nakun ën ömakö mac ëka pala i cîngë. I karë na jö ariö ni tye ka woth kanya acël, 7 lcaka okobo both apap

mërë Abraam nĩ, "Apap!" Apap mërë ôgamö nĩ, "Eyo woda." Icaka ôgamö nĩ, "Mac êka yen tye kany, êntö römö mē tyēr awanga tye kwene?" 8 Abraam ôgamö nĩ, "Woda, Obanga kikokome bino miö römö mē tyēr awanga." Êka jö ariö ni ömëdërë gini mē woth kanya acël. 9 İ karë na gin othuno İ kabedo n'onwongo Obanga okobo nĩnë, Abraam ôgërö keno tyēr kany nön êka ôcanö yen İ wie. Ên otweo wode Icaka êka opyelo İ wi keno tyēr, İ wi yen. 10 Cë Abraam ôkwanyö pala êka otingo cingë malö mē neko wode. 11 Êntö malaika ka Rwoth ocwodo Abraam kĩ İ polo nĩ, "Abraam! Abraam!" Ên ôgamö nĩ, "An enene." 12 Ên okobo nĩ, "Kür iketh cingi İ kom awobi nön. Kür itim gin mörö İ kome. Kobedi dong an angeo nĩ in ilworo Obanga, piën in ba itwona wodi, wodi acël kékën." 13 Abraam otingo wangë, cë önëñö römö tye yo kungee na tunge omoko ökö. Ên öcidhö cë ôkwanyö römö êka ötyërö na calö tyēr awanga nakaka wode. 14 Abraam öcakö nying kabedo nön nĩ "Rwoth ênë bino miö." Êka naka tin ekobo nĩ, "İ wi kidi ka Rwoth ebino miö." 15 Malaika ka Rwoth ocwodo Abraam wang mē ariö kĩ İ polo. 16 Cë okobo nĩ, "Rwoth okobo nĩ, 'An akwongara kĩ nyinga këna, piën in itimö gin ni êka ba itwona wodi, wodi acël kékën, 17 an abino miöni gum, êka an abino miö êkwaëni bedo na pol calö cër na tye İ wi polo êka na calö kwo na tye İ dhö nam. Êkwaëni bino löönö jami mē pacö ka lang-gĩ, 18 êka kĩ kom êkwaëni, rok kibëc na tye İ wi lobo bino bedo kĩ gum, piën in ibedo kĩ winy İ koma.'" 19 Cë Abraam odwoba both etic mërë, êka öcakö cidhö gini yo Beerceba kanya Abraam obedo ië. 20 Kinge karë mörö, ekobo both Abraam nĩ, "Milca thon önywölö êthinö k'omeru Nakor: 21 Uj obedo athin kaö, ömĩn mërë Buj, Kemuel (apap k'Aram), 22 Keced, Kajo, Pildac, Jidlap êka Betuel." 23 Betuel önywölö Rebeka. Milca önywölö êthinö aboro kĩ Nakor ömĩn Abraam. 24 Nakor onwongo thon tye kĩ dhakö nökenë n'ecwodo nĩ Reuma, n'önywölö thon awope: Teba, Gaam, Taac êka Maaca.

23 Cara obedo İ wi lobo pĩ mwaka 127. 2 Ên öthöö İ Kiriati Arba (na kobedini ecwodo nĩ Kebron) na tye İ lobo Kanaan. Abraam ödönyö İ këma mē kumo pĩ Cara êka okoko ên. 3 Cë Abraam öya kĩ İ nget lyël ka dhakö mërë êka öcidhö okobo both jö Kit nĩ, 4 "An abedo welo êka arok İ kinwu. Cadh nĩna unu kany mörö mē ik êk aik dhanöna n'öthöö ië." 5 Jö Kit ôgamö dhö Abraam nĩ, 6 "Adwong, winywa. In ibedo ngat na dit İ kinwa kany. Ik kom athööni İ bur lyël mörö na bër na in iyërö kĩ kin bur lyenewa ni. Ngat mörö ope na bino kwërö nini İ bur lyënë mē

iko athööni ië." 7 Cë Abraam öya êka oryebere piny İ nyim jö Kit. 8 Ên okobo bothgi nĩ, "Ka un iye mē miöna iko athööna, cë winya unu êka kwa unu nĩna Epron wod ka Joar 9 êk öcadh nĩna rwo mē Makpela, n'obedo mēgë na tye İ ajiki mē pwodho mërë. Peny unu ên êk öcadh nĩna İ wel mërë kikokome na römö wilö êk obed na calö kabedo mē ik na tye İ kinwu." 10 İ karë nön Epron onwongo obedo İ kin jö Kit êka ên ôgamö dhö Abraam na jö Kit kibëc tye ka winyo, n'onwongo obino gini İ kabedo mē athuko na tye İ dhö wangkac mē pacö mërë. 11 Ên okobo nĩ, "Pathĩ nĩ kömanön rwothna, winy köpna. An amiö pwodho bothi, êka amiö rwo na tye ië. An amii İ nyim jö na mēga. Ik jö na megı ië." 12 Abraam döki oryebere İ nyim jö Kit 13 êka okobo both Epron na gin tye ka winyo nĩ, "Winy unu köpna, ka un iye. An abino cülö wel mē pwodho. Yee unu nĩna êk aik dhaköna n'öthöö kunön." 14 Epron ôgamö dhö Abraam nĩ, 15 "Winy köpna, rwothna, wel lobo nön römö cëkël mē ryal 400, êntö ngö ênön na tye İ kin an kĩ in? Ik jö na megı n'öthöö ië." 16 Abraam oye köp ka Epron, cë opimo wel ryal İ nyim jö Kit na römö cëkël mē ryal 400, nakun pimo kĩ kidi ratili n'écath pimo kĩ jami İ karë nön. 17 Pwodho ka Epron na tye İ Makpela, n'onwongo tye kukidë mē Mamre—pwodho êka rwo na tye ië, êka yen kibëc na tye İ wang abakëth mē pwodho—onwongo ëmiö ökö 18 both Abraam na calö mēgë İ nyim jö Kit n'onwongo obino gini İ dhö wangkac mē pacö. 19 Kinge manön Abraam oiko dhakö mërë Cara İ rwo na tye İ pwodho mē Makpela na tye kukidë mē Mamre (manön, Kebron) na tye İ lobo mē Kanaan. 20 Jö Kit ömiö pwodho êka rwo n'onwongo tye ië both Abraam na calö kabedo mē ik.

24 Abraam onwongo dong otii êka mwaka mërë mē tio onwongo pol. Rwoth onwongo ömiö ên gum İ gin na kibëc. 2 Abraam okobo both atic mërë na dit na tye İ ödë n'onwongo ênë löö gin na kibëc n'onwongo ên tye ködë nĩ, "Keth cingi İ kin ema. 3 An amitö nĩ in ikwongiri kĩ nying Rwoth, Obanga n'ocweo polo kĩ lobo, nĩ in ba ibino nyömö nĩ woda dhakö kĩ İ kin anyira ka jö Kanaan, na an atye İ kin-gĩ. 4 Êntö ibino cidhö İ lobo n'ënywöla ië êka both wedena kikokome cë inyöm dhakö nĩ woda Icaka." 5 Atic k'Abraam openyo ên nĩ, "Cë ka dhakö ênë ba oyeo mē bino köda İ lobo ni? An myero ater wodi İ lobo na yam in iya kĩ ië?" 6 Abraam ôgamö nĩ, "Gwokiri, kür iter woda yo kunön. 7 Rwoth, n'obedo Obanga n'ocweo polo, n'ökwanya kĩ İ öt k'apapna, kĩ İ lobo n'ënywöla ië êka n'ötwak köda cë öcikërë botha kĩ kwong nĩ, 'Abino miö êkwaëni lobo ni,' ên

bino oro malaika mërë më cidhō anyim nini êk in
 ñnyōm dhakō nī woda kī kunōn. 8 Êntō ka dhakō
 ênë òkwërō më bino kodi, cë in ibino bedo agōnya
 kī kom kwongna ni. Êntō kūr iter woda yo kunōn.”
 9 Cë atic k'Abraam oketho cingë i kin em adwong
 mërë ëka okwongere bothe na lübërë kī kōp ni. 10 Cë
 atic k'Abraam òkwanyō jami kibëc na bëcō n'adwong
 mërë òmiō bothe ëka otweogī inge kinaga apar
 k'adwong mërë cë òcakō woth më cidhō yo Aram
 Naaraim, i pacō kanya Nakor onwongo bedo ië. 11
 I karë na ën othuno kunōn, ën òmiō kinaga orumo
 cōng-gī piny i nget kulo na tye i nge pacō. Piny
 onwongo dong kothyeno caa na mon bwōrō kōdë yo
 kulo më cidhō twōmō pii. 12 Cë ën òlëgō nī, “Rwoth,
 Obanga k'adwongna Abraam, mīi gin na abino ië
 ocoberë, ëka inyuth kicani both adwongna Abraam.
 13 An enene, acung i nget kulo, ëka anyira ka jīi na
 bedo gīnī i pacō nī tye ka bino më twōmō pii. 14 An
 abino kobo both nyakō mōrō acël nī, ‘Mīa pii amodhi,’
 cë okobo nī, ‘Modhi, ëka an abino miō kinagani thon
 modho,’ mīi ën obed nyakō na in iyyērō pī aticni lcaka.
 Ëka manōn miō an angeo nī in dong inyutho kicani
 both adwongna.” 15 Na bara ën otyeko lëga, nyakō
 mōrō obino n'otingo agulu mërë i wi baë. Nyingë
 onwongo ecwodo nī Rebeka. Ën onwongo obedo
 nyaka Betuel wod ka Milca n'onwongo obedo dhakō
 ka Nakor òmin Abraam. 16 Nyakō ni onwongo leng
 rwōk, nyakō na bara ongeo ëcwō, na ngat mōrō bara
 obedo kōdë. Ën òcidhō yo kulo, cë òtwōmō pii i agulu
 mërë ëka odwogo cen. 17 Atic k'Abraam òbūnyō
 woth më romo kōdë ëka okobo ninë nī, “Ōma mīa pii
 mōrō kī i aguluni amodhi.” 18 Nyakō ògamō nī, “Eyo
 adwongna, modh pii.” Cë ën òkwanyō agulu òkō kī i
 wi baë otingo atinga i cingë nakun atic k'Abraam tye
 ka modho. 19 Kinge na ën dong òmiō pii më amodha,
 nyakō okobo nī, “An abino twōmō pii pī kinagani thon,
 naka ka gīn otyeko modho.” 20 Cë piōpiō ën òōnyō
 pii i òd pwa, ëka òringō òdōk cen më twōmō pii kī i
 kulo pī kinaga mërë kibëc. 21 Atic k'Abraam òlīng
 ba okobo gin mōrō, ëntō ën obedo ka nēnō Rebeka
 alīlīng, piën ën onwongo mitō ngeo ka cë Rwoth òmiō
 woth mërë ocoberë onyo pe. 22 I karë na kinaga
 otyeko gīnī modho, atic k'Abraam òkwanyō gwīlū um
 n'obedo gol ëka atëgō ariō cë òmiōgī bothe. 23 Cë
 ën openyo nī, “In ibedo nyaka nga? Ōma kob nīna,
 kabuto mōrō tye i òt k'apapni na wan ëtwērō ninō ië i
 kiwor?” 24 Nyakō ògamō ninë nī, “An abedo nyaka
 Betuel, wod ka Milca n'onywōlō both Nakor.” 25 Ën
 òmëdërë nī, “Wan etye kī cem na rōmō, ëka kabuto
 pī un më ninō i kiwor.” 26 Cë atic k'Abraam okulo wie
 piny ëka òwōrō Rwoth, 27 nakun kobo nī, “Pak obed

both Rwoth, Obanga k'adwongna Abraam, n'ògwōkō
 mar ëka gen mërë na ba lōkërë i kom adwongna.
 Rwoth òtëla i wothna yo òt ka wede k'adwongna.”
 28 Cë Rebeka òringō ëka okobo gin n'òtīmërë kibëc
 both jō na tye i òt k'aya mërë. 29 Rebeka onwongo
 tye k'òmin mërë n'ecwodo nī Laban, n'òringō më
 romo k'ëcwō nōn i kulo. 30 Cücūth na ën ònēnō gwīlū
 um, atëgō kī i ngut cing amīn mërë, ëka owinyo gin
 n'onwongo Rebeka òtwakō i kom ngō n'atic k'Abraam
 okobo ninë, ën òcidhō both atic k'Abraam n'onwongo
 ocung i nget kinaga na cwōk kī kulo. 31 Laban okobo
 ninë nī, “Bin, in na Rwoth òmiō gum i komi! Pingō in
 icung kany? An ayūbō òt nini ëka kabedo pī kinaga.”
 32 Atic k'Abraam òcidhō yo pacō gīn kī Laban, ëka
 ëgōnyō yēc kī nge kinaga cë ëmiōgī cem ëka kabuto.
 Ëmiō pii both atic k'Abraam ëka jō na ën owotho kōdë
 ëk òlwōk gīnī tyēn-gī. 33 I karë n'ekelo cem i nyime,
 ën okobo nī, “An ba acemo naka ka an akobo gin
 na myero akob.” Cë Laban okobo nī, “Kob niwa.” 34
 Atic k'Abraam okobo nī, “An abedo atic k'Abraam. 35
 Rwoth òmiō gum na thwōnë rwōk both adwongna,
 ëka ën òdōkō alōnyō. Rwoth òmiō ën rom ëka dhok,
 ryal ëka gol, etic n'obedo cwō ëka etic na mon, kinaga
 ëka kene. 36 Cara, dhakō k'adwongna, ònywōlō ninë
 athīn n'ëcwō i karë më tio mërë, ëka Abraam òmiō
 jami kibëc n'obedo mëgë bothe. 37 Ëka adwongna
 òmiō an akwongo kwong, ëka okobo nī, ‘In myero kūr
 ñnyōm dhakō nī woda kī i kin anyira ka jō Kanaan, i
 lobo ni na an akwō ië, 38 ëntō cidh i òt k'apapna ëka
 yo both kakana, cë ñnyōm dhakō nī woda.’ 39 “Cë
 an apenyo adwongna nī, ‘Cë ka dhakō òkwërō woth
 kōda?’ 40 “Adwongna ògamō nī, ‘Rwoth na an abedo
 kwō i nyime i yoo n'opore, bino oro malaika mërë
 wotho kodi ëka miō wothni cobere, ëk in ñnyōm dhakō
 nī woda kī i kakana kikokome ëka kī i òt k'apapna. 41
 Cë ka in i cidhō i kakana, in ibino bedo agōnya kī
 kom kwongna kadī bed gīn bino kwërō më mīōni—in
 ibino bedo agōnya kī kom kwongna.’ 42 “I karë na
 an abino i kulo tin, an akobo nī, ‘Rwoth, Obanga
 k'adwongna Abraam, ka in i mitō, mīi wothna ocoberë.
 43 An enene, an acung i nget kulo nī; ka nyakō mōrō
 obino më twōmō pii ëka an akobo ninë nī, ‘Ōma mīa
 pii mōrō amodhi kī i aguluni,’ 44 cë ka ën okobo nīna
 nī, ‘Modhi, ëka an abino twōmō pii amīō kinagani
 thon modho,’ ëk ën obed nyakō na Rwoth òyērō pī
 wod k'adwongna.’ 45 “Na an bara atyeko lëga kī i
 cwinya, Rebeka obino n'otingo angulu i wi baë. Ën
 òdōnyō i kulo cë òtwōmō pii, ëka an akobo ninë nī,
 ‘Ōma mīa pii mōrō amodhi.’ 46 “Rebeka òkwanyō
 agulu kī i wi baë piōpiō ëka okobo nī, ‘Modhi, an
 abino miō kinagani thon modho.’ Cë an amodho ëka

ën ömiö kînağa thon omodho. 47 “An dong apenyo Rebeka nî, ‘In ibedo nyaka nga?’ “Ën ögamö nî, ‘An abedo nyaka Betuel wod ka Nakor, na Milca önywölö nîñë.’ “Cë an aketho gwîlî ü ume ëka atëgö i ngut cingë, 48 cë arumo cönga pîny ëka awörö Rwoth. An apakö Rwoth, Obanga k’adwongna Abraam, n’ötëla i yoo n’atîr më nwongo akwar nyaka ömîn adwongna pî wode. 49 Kobedini dong ka ibino nyutho marni ëka kîcani both adwongna, kob nîna; ëka ka pe, kob nîna, ëk ange gin na myero an atîm.” 50 Laban ëka Betuel ögamö gîni nî, “Man obedo yûb ka Rwoth; wan ba ërömö kobo gin mörö bothi. 51 Rebeka ene; ter ën ëk öcîdh obed dhakö ka wod k’adwongni, kite na Rwoth onyutho nini ködë.” 52 I karë n’atic k’Abraam owinyo ngö na gin okobo, ën orumo cöngë pîny i nyim Rwoth. 53 Cë atic k’Abraam ökwanyö gol, ryal ëka böng cë ömiö both Rebeka; ën thon ömiö mîc na welgî tæk both ömîn nyakö ëka aya ka nyakö. 54 Kinge man, atic k’Abraam ëka jö na ën owotho ködë ocemo cë öninö gîni kunön. I karë na gin oco kodiko mërë, atic k’Abraam okobo nî, “Yee nîna adök cen both adwongna.” 55 Ëntö ömîn nyakö k’aya ka nyakö ögamö gîni nî, “Ëk nyakö obed bothwa pî nîñö na römö apar; cë ën twërö cîdhö.” 56 Ëntö atic k’Abraam okobo bothgî nî, “Kür i jûka unu, kite na Rwoth dong ömiö wothna ocobere na bër. Wëka unu acîdh ëk adök cen both adwongna.” 57 Cë gîni okobo nî, “Eru ecwod nyakö ëk epeny ngö na ën römö kobo.” 58 Cë gîni ocwodo Rebeka ëka epenyo ën nî, “In ibino woth k’ëcwö nî?” Rebeka ögamö nî, “An abino cîdhö.” 59 Cë gîni oye n’amin-gî Rebeka kanya acël k’atic mërë na dhakö n’ögwökö ën i karë na ën pod tîdî më cîdhö k’atic k’Abraam ëka kî jö na ën owotho ködë. 60 Ölamö gîni gum i kom Rebeka ëka ekobo nîñë nî, “Amînwa, in myero ibed aya ka jö na pol; ëkwaëni myero obed na tæk ëka ölöö gîni lang-gî.” 61 Cë Rebeka k’etic mërë n’obedo anyira öyübërë cë obedo gîni i wi kînağa ëka owotho gîni k’atic k’Abraam. 62 I karë nön Icaka onwongo obino kî i Beer Lakai Roi, piën ën onwongo bedo i Negeb. 63 I kothyeno mörö acël, Icaka onwongo tye ka lath i bar, i karë na ën otingo wangë malö, ën öñëñö kînağa na pol ka tye ka bino. 64 Rebeka thon otingo wangë malö cë öñëñö Icaka. Rebeka opye pîny kî i wi kînağa mërë 65 ëka openyo atic k’Abraam nî, “Ëcwö mëñë ca na tye i bar nakun tye ka bino më romo kod onu?” Atic k’Abraam ögamö nî, “Manön adwongna.” Cë Rebeka ökwanyö atam ëka oumo kî terinyime. 66 Atic k’Abraam okobo gin na kibëc na ën ëtîmö both Icaka. 67 Cë Icaka okelo Rebeka i këma k’aya mërë ëka obedo ködë,

ödökö dhakö mërë na ën ömarö. Cwiny Icaka okwe kinge thöth k’aya mërë Cara.

25 Abraam dökî obino önyömö dhakö nököñë na nyingë Ketura. 2 Ën obino önywölö nîñë Yimran, Yokocan, Medan, Midian, Icibak ëka Cuak. 3 Yokocan önywölö Ceba ëka Dedan. Ëkwaë ka Dedan ëñë jö Acurit, jö Letuc, ëka jö Leum. 4 Awope ka Midian ëñë Epa, Eper, Anok, Abida, ëka Elda. Man kibëc onwongo obedo gîni ëkwaë ka Ketura. 5 Abraam ömiö gin na kibëc na ën onwongo tye ködë both wode Icaka. 6 Ëntö i karë na ën onwongo pod kwö, ën obino ömiö mîc both ëthîñö na mon mërë nököñë önywölö ëka ömiögî öcîdhö ökö kî both Icaka yo ngöm na tye yo kukîdë. 7 Abraam obino obedo i wi lobo pî mwaka 175. 8 Cë öthöth na mwaka mërë dong dit, na dong otengo rwök cë eiko ën kanya acël kî kwere mërë. 9 Awope mërë Icaka ëka Icimael, oiko gîni ën i rwo më Makpela na cwöcwök kî Mamre, i pwodho ka Epron wod ka Joar n’obedo dhanö më Kit, 10 kunön ëñë pwodho na yam Abraam öwîlö kî both jö Kit ëka eiko ën kî dhakö mërë Cara ië. 11 Kinge na dong Abraam öthöth, Obanga obino ömiö wode Icaka gum, cë Icaka obedo na cwöcwök kî Beer Lakai Roi. 12 Man ëñë ëkwaë ka Icimael wod k’Abraam, na Agar, atic ka Cara n’obedo nya jö Ejip, önywölö both Abraam. 13 Man ëñë nying awope ka Icimael, na lübërë kî kite n’ënywölögî ködë körë kî körë. Nebayot ëñë obedo kaö ka Icimael ëka dong Kedar, Adbel, Mibcam, 14 Micma, Duma, Maca, 15 Adad, Tema, Jetur, Napic ëka Kedema. 16 Man ëñë awope ka Icimael, n’onwongo obedo gîni rwodhi më kaka apar ariö na lübërë kî peci ëka këmagî. 17 Icimael obino obedo i wi lobo pî mwaka 137 cë dong öthöth, ëka eiko ën kanya acël kî kwere mërë. 18 Lobo ka jö ka Icimael öcakërë kî i Kabila thuno ködë naka yo Cur, na cwök kî wang lobo më Ejip na dök yo Aciria. Ëka gîni onwongo bedo na dagërë gîni kî utmegogî nököñë kibëc. 19 Man ëñë ëkwaë ka Icaka wod ka Abraam. Abraam önywölö Icaka. 20 Icaka onwongo dong tye kî mwaka pyer angwën i karë na ën nyömö Rebeka nyaka Betuel n’obedo dhanö më Aram na tye i Paddan Aram, ëka amin Laban dhanö më Aram. 21 Icaka obino ölögö both Rwoth pî dhakö mërë, piën Rebeka onwongo obedo alür. Rwoth ögamö lëga mërë cë dhakö mërë Rebeka obino öyac. 22 Ëthîñö obedo ka twomere këñ-gî kî ië, cë Rebeka okobo nî, “Pîngö gin ni tye ka timërë i koma?” Cë ën openyo Rwoth. 23 Ëka Rwoth okobo nîñë nî, “Rok ariö tye i ii, ëka rok ariö kî bothi bino pokere gîni ökö, rok acël bino bedo na tæk na löö awodhe, ëka athîn na dit bino

tic pi athin na tidi." 24 I karë na caa mërë më nywöl dong örömö, Rebeka obino ongeon n' adyer etye ki rudi i ië. 25 Athin n'ëcakö nywölö onwongo kwar ëka kome opong yer, cë gin obino öcakö nyingë Ecau. 26 Kinge, ebino ënywölö ömïin mërë n'ömakö opuny tyën Ecau, cë gin obino öcakö nyingë Jakob. Icaka onwongo dong tye ki mwaka 60 i karë na Rebeka nywölö ëthinö mërë. 27 Ëthinö awope ödöngö ëka Ecau obino obedo adwar na tye ki dirü, ën onwongo marö woth i lum, ëntö Jakob onwongo obedo dhanö na ling alinga na marö bedo pacö. 28 Icaka onwongo marö Ecau rwök piën onwongo marö camö ringo leeni na ën neko, ëntö Rebeka onwongo marö Jakob. 29 I ninö mörö acël Jakob onwongo tye ka tede dëk, cë Ecau obino ki i lum na kec oneko. 30 Ën okobo both Jakob ni, "Mia dëk nön mörö acam piën kec oneka rwök." (Ënë ömïö onwongo ecwodo ën thon ni Edom.) 31 Jakob ögamö ni, "An abino miöni ka in imia twëroni më bedo kaö." 32 Ecau ögamö ni, "Nën, an dong acwök thöö, ngö na twëro më bedo kaö timö nina?" 33 Ëntö Jakob okobo ni, "Kwongiri botha kono." Cë Ecau okwongere nakun cadhö twëro mërë më kaö both Jakob. 34 Cë Jakob ömïö Ecau kwon ëka dëk. Ën ocemo ëka omodho cë öya öcidhö. Manön ënë kite n'Ecau öcadhö ki twëro mërë më kaö.

26 I karë mörö kec na rac rwök obino opodho i lobo n'onwongo Icaka bedo ië na path ki kec na yam opodho i karë k'Abraam. Icaka obino öcidhö i pacö më Gerar both Abimelek rwoth më Pilicitain. 2 Cë Rwoth onen both Icaka ëka okobo ni, "Kür icidhö yo Ejip, bed i lobo na an akobo ni ibed ië. 3 Bed i lobo ni pi karë mörö na nönök, ëka an abino bedo kodi ëka amii gum. Pi in ëka ëkwaëni an abino miöwu lobo ni kibëc ëka abino cobo kwong na an acikara ködë both apapni Abraam. 4 An abino miö ëkwaëni bedo na pol calö cër na tye i wi polo ëka abino miögi lobo ni kibëc, ëka pi ëkwaëni, jö kibëc më lobo bino nwongo ginii gum, 5 piën Abraam obedo ki winy i koma, ötimö gin na an akobo ninë ni ötim, ögwökö köpna ëka cikna." 6 Cë Icaka obino obedo i Gerar. 7 I karë na cwö më kabedo nön openyo ën pi dhakö mërë, ën okobo ni, "Ën obedo amëra," piën ën onwongo tye ki lworo më kobo ni, "Ën obedo dhaköna." Ën öthamö ni, "Cwö më kabedo ni twëro nekona pi Rebeka piën ën leng rwök." 8 I karë na Icaka obedo kunön pi karë na lac, Abimelek rwoth më Pilicitain önenö Icaka ki i wang derica ka tye ka tuko ki dhakö mërë Rebeka. 9 Cë Abimelek ocwodo Icaka ëka okobo ninë ni, "Ën obedo dhaköni adyer! Pingö in ikobo ni ën obedo ameru?"

Icaka ögamö ninë ni, "Piën athamö ni ërömö nekona ökö pirë." 10 Cë Abimelek okobo ni, "Ngö na in itimö i komwa? Ngat mörö acël onwongo römö bedo ökö ki dhaköni, ëka in onwongo irömö kelo bal ni i wiwa." 11 Cë Abimelek öcikö jö kibëc ni, "Ngat mörö n'ogudo ëcwö ni onyo dhakö mërë ebino neko ökö." 12 I karë na Icaka opuro i mwaka nön, ën ökaö kac na thwönë na kadhö wang mia acël na ën öcwö ökö, piën Rwoth ömïö gum bothe. 13 Icaka obino ölöny, ëka lönyö mërë ömëdërë naka obino obedo thwön alönyö. 14 Ën onwongo tye ki rom ëka dyegi, dhok ëka etic na pol naka ömïö jö Pilicitain nyeko ömakögi ökö i kome. 15 Cë kulo kibëc na yam etic k'apap mërë Abraam ogolo i karë k'Abraam, jö Pilicitain obino öcülö ökö, nakun eumo ökö ki lobo. 16 Cë Abimelek okobo both Icaka ni, "Yaa ökö ki bothwa piën in dong idökö na tük rwök na lööwa ökö." 17 Cë Icaka öya ökö ki kany nön ëka öcidhö oguro këma mërë i ora më Gerar ëka ën obedo kunön. 18 Cë Icaka döki ogolo kulo na yam egolo i karë k'apap mërë Abraam, na jö Pilicitain obino öcülö kinge thöö k'Abraam, ëka öcakö nying-gi kite na yam apap mërë Abraam öcakö ködë. 19 Etic ka Icaka ogolo kulo i öd ora ëka onwongo ginii pii na mit na möl. 20 Ëntö ëkwath më Gerar ödhaa ginii k'ëkwath ka Icaka nakun kobo ginii ni, "Pii ni obedo mëwa!" Cë Icaka öcakö nying kulo nön Ecek, piën gin ödhaa ködë. 21 Cë etic mërë döki ogolo kulo nökenë ëntö manön thon ödhaa ködgi ië, cë ën öcakö nyingë Citina. 22 Ën öya ki kunön ëka ogolo kulo nökenë, cë ngat mörö ba döki ödhaa ködgi ië. Ën öcakö nying kulo nön Rekobot nakun kobo ni, "Kobedini Rwoth dong ömïöwa kabedo na lac ëka onu ebino löny i lobo ni." 23 Icaka obino öcidhö naka yo Beerceba. 24 I kiwor nön, Rwoth onen bothe ëka okobo ninë ni, "An abedo Obanga k'apapni Abraam. Kür ibed na lwor piën an atye kodi. An abino miöni gum ëka abino miö wel ëkwaëni nya dökö na pol pi aticna Abraam." 25 Icaka ögërö keno tyër kunön ëka öwörö Rwoth. Ën ögërö këma mërë ëka etic mërë ogolo kulo nökenë kunön. 26 Cë Abimelek öya ki i Gerar kanya acël k'amii thama mërë Aujat ëka Pikol n'obedo adit wi acikari mërë cë obino ginii yo both Icaka. 27 Icaka openyogi ni, "Pingö ibino unu botha nakun idaga unu ëka iryëma unu ökö?" 28 Gin ögamö ni, "Wan ënenö kanyalër ni Rwoth onwongo tye kodi, cë ömïö wan ekobo ni, 'Myero wan ebed ki kwong i kinwa ëka in.' Ëk wan emok cikërë kodi 29 ëk kür itim gin mörö na rac i komwa, kite na wan thon ba ebino ëtimö gin mörö na rac i komi, ëntö emii icidhö ki kuc. Ëka kobedini Rwoth dong ömïö gum bothi." 30 Icaka dong öcakö yübö nigü karama cë gin ocemo

ëka omedho. **31** Kodiko mërë cön gin okwongere both ngat acêlacêl. Cê lcaka ömïögi öcidhō kî yorgi ëka gin öwêkō ên kî cuc. **32** Ī nîñō nonu etic ka lcaka obino ëka okobo gîni both lcaka köp ĩ kom kulo na gin ogolo. Gîn okobo nî, "Wan enwongo pii!" **33** Ēn öcakō nying kulo nön Ciba, ëka naka tin nying pacō nön ecwodo nî Beerceba. **34** Ī karê n'Ecau dong tye kî mwaka pyer angwên, ên obino önyömō Judit nyaka Beerî dhanō mē Kit ëka thon Bacemat nyaka Elon dhanō mē Itite. **35** Gîn obino ömïō cwer cwiny both lcaka ëka Rebeka rwök.

27 Ī karê na dong lcaka otii ëka wangē ödökō na görū, na ba dökî römō nēñō piny, ên ocwodo wode na dit Ecau ëka okobo ninē nî, "Woda." Ecau ögamō nî, "An enene apap." **2** lcaka okobo ninē nî, "An dong atii ökö, ëka ba angeo nîñō mē thōōna. **3** Kobedini dong, kwany jamini mē dwar—ocwe athērō ëka atum êk ĩcidh ĩ lum ĩdwar lee mörō nîna. **4** Yüb nîna koth cem na mît na an amarō ëka ikel nîna acam, êk amii gumna na bara athōō." **5** Ī caa nön Rebeka onwongo tye ka winyo ka lcaka twak kî wode Ecau. Ī karê n'Ecau dong öcidhō ĩ lum mē dwarō lee êk ekel, **6** Rebeka okobo both wode Jakob nî, "Nën, an awinyo apapni kobo both omeru Ecau nî, **7** 'Kel nîna ringo lee mörō ëka ĩyüb nîna na mît mē acama, êk an amii gumna ĩ nyim Rwoth na bara athōō.' **8** Dong, woda, winy na bër ëka ĩtîm gin na an akobo nini. **9** Cidh ĩ kin rom kî dyegi êk ikel nîna nyi dyegi ariō n'öcwēê êk ayüb n'apapni na mît kite na ên marō ködê. **10** Cê iter both apapni öcam êk omii gum mērē na ên bara öthōō." **11** Jakob okobo both aya mērē Rebeka nî, "Ēntō ömëra Ecau kome opong yer, ëka an koma pwöth. **12** Cê ka apapna oguda? Arömō nen calō ngat na bwölō ên ëka römō kelo cen nakaka gum." **13** Aya mērē okobo ninē nî, "Woda, êk cen obin ĩ koma. Tîm gin na an akobo nini kēkēn, cidhî ëka ikelgî nîna." **14** Cê Jakob öcidhō ëka onwongo dyegi cê okelo both aya mērē, cê Rebeka öyübō cem na mît kite na lcaka marō ködê. **15** Cê Rebeka ökwanyō böng na bécō ka wode na dit Ecau n'onwongo tye ĩ öt, ëka ömïō wode na tidi Jakob oruko. **16** Ēn thon oumo cingē ëka kanya yer ope ië kî ĩ ngute k'adëla dyegi. **17** Cê ên ömïō cem na mît ëka kwon na ên öyübō both wode Jakob. **18** Jakob öcidhō both apap mērē ëka okobo nî, "Apapna!" lcaka ögamō nî, "Eyo woda, nga êñön?" **19** Jakob okobo both apap mērē nî, "An abedo Ecau athîn kañni. An atimō kite na in ikobo nîna ködê. Yaa malō ibed abeda ëka ĩcam ringo leena êk imîa gumni." **20** lcaka openyo ên nî, "Woda! Inwongo ningō piöpïö?" Jakob ögamō nî, "Rwoth

Obangani ömîa anwongo." **21** Cê lcaka okobo both Jakob nî, "Woda, bin na cwök êk agudi, êk ange ka in ibedo woda Ecau adyer onyo pe." **22** Jakob öcidhō na cwök both apap mērē lcaka, cê lcaka ogudo ên ëka okobo nî, "Dwoni cal kî dwön Jakob, êntō cingi obedo cing Ecau." **23** Ēn ba ongeö Jakob piën cingē onwongo obedo yer calō cing ömîm mērē Ecau, cê lcaka ömïō Jakob gum. **24** lcaka dökî openyo ên nî, "Adyer in ibedo woda Ecau?" Jakob ögamō nî, "An êñön." **25** Cê ên okobo nî, "Woda, kel ringo leeni nön mörō acam, êk amii gumna." Jakob okelo both cê ên öcamō ëka okelo thon kóngō ölöc mörō cê lcaka ömadhō. **26** Cê apap mērē lcaka okobo ninē nî, "Bin kany, woda, êk inödh lema." **27** Cê ên öcidhō, ëka öñödhō lem apap mērē. Ī karê na lcaka ongweo ngwec böng mērē, ömïō ên gum nakun kobo nî, "Eyo, ngwece ka woda cal kî ngwece pwodho na Rwoth dong ömïō gum. **28** Êk Obanga omii thoi mē polo ëka lönyō mē lobo bël na büp ëka pig ölöc na nyen. **29** Êk rok otii nini ëka ĩi oryebere piny mē wöröni. Bed rwoth ĩ nyim utmegoni, êk awope ka ayani oryebere piny mē wöröni. Êk jō na lami, ëlamgî ëka jō na mii gum, ëmîigî gum." **30** Kinge na lcaka dong otyeko miō gum ëka Jakob dong öcidhō ökö kî bothe, ömîm mērē Ecau othuno kî ĩ dwar. **31** Ēn thon öyübō cem na mît ëka otero both apap mērē. Cê okobo n'apap mērē nî, "Apapna, yaa malō ibed abeda ëka ĩcam ringo leena êk imîa gumni." **32** Apap mērē lcaka openyo ên nî, "In ĩnga?" Ecau ögamō nî, "An wodi Ecau, kañni." **33** lcaka kome ömyël rwök ĩ karê na ên onwongo nî Ecau êñön cê okobo nî, "Nga kara n'ödwarō ringo lee ëka okelo nîna? An pod acamō acama ëka amïō gum na bara in ibino ëka dong adyer bino bedo kî gum!" **34** Ī karê n'Ecau owinyo köp k'apap mērē, ên oredo kî koko rwök na cwinye cwer nakun kobo both apap mērē nî, "Apapna, mîa an thon gum!" **35** Ēntō lcaka okobo ninē nî, "Omeru obino öbwöla ëka otero gumni ökö." **36** Ecau okobo nî, "Pathî Jakob êñön adyer? Ēn dong öbwöla wang ariō. Ēn otero twëröna na calō kaō, ëka kobedini dökî otero gumna!" Cê ên openyo apap mērē nî, "Ba ĩwêkō nîna gum mörō?" **37** lcaka ögamō dhō Ecau nî, "An amïō ên obedo rwoth ĩ nyimi ëka amïō wede mērē kibéc obedo etic mērē. Amïō ên kal ëka pig ölöc na nyen. Dong ngö na an arömō timō nini, woda?" **38** Ecau okobo both apap mērē nî, "Apapna, in itye kî gum acêl kēkēn? Apapna, mîa an thon gum!" Cê Ecau okok rwök. **39** Apap mērē lcaka ögamō dhögē nî, "Kabedoni bino bedo na bor kî lobo na cëgō cem, na bor kî thoi mē polo na malō. **40** In ibino kwō kî pala abadëni ëka ibino tic pi omeru. Ēntō ka in ibino jëm ninē, in ibino

bedo agönya kî bothe." 41 Ecau obedo k'adagë i kom Jakob piën apap mërë ömïö ën gum mërë ökö. Cë okobo ën kënë nî, "Ninö më kumo pî thöo ka apapna dong cwök, cë abino neko ömëra Jakob ökö." 42 I karë n'ekobo both Rebeka ngö na wode na dit Ecau okobo, ën ocwodo Jakob wode na tidi ëka okobo ninë nî, "Omeru Ecau ödiö cwinye kî thama më nekonî. 43 Kobedini dong, woda, tîm gin na an akobo. Lüü ökö yo both ömëra Laban na tye i Aran. 44 Bed bothe pî karë mörö naka ka omeru cwinye dong okwe. 45 Ka omeru cwinye dong okwe ëka wie dong owil ökö kî i kom ngö na in itimö i kome, cë an abino oro köp bothi ëk idwogi cen kî kunön. Pîngö an amitö rwenyo un jö ariö i ninö acël?" 46 Cë Rebeka okobo both Icaka nî, "An dong adhero kî kit kwö k'anyira ka jö Kit ökö. Ka Jakob bino nyömö dhakö kî kin mon më lobo nî, kî i kin mon ka jö Kit calö man, cë kwöna dong bino bedo na kõny mërë ope."

28 Cë Icaka ocwodo Jakob bothe, ëka omotho nakun cîkö ën nî, "Kür ñnyöm dhakö mörö kî kin anyira më Kanaan. 2 Yaa ökö pïöpïö i'cidh yo Paddan Aram i öt ka kwaröni Betuel n'obedo apap k'ayani, ëk ñnyöm dhaköni kî kunön kî kin anyira ka Laban n'obedo ömîn ayani. 3 Obanga Won Twër kibëc omii gum, ëk omii ñnya unu na pol, ëka omii ëkwaëni na pol, ömëd welwu naka ibed unu jö na pol. 4 Ëk Obanga omii ëka ëkwaëni gum na ën ömïö both Abraam, ëk in igam lobo na kobedini ibedo ië na calö arok, lobo na yam Obanga ömïö both Abraam!" 5 Cë Icaka ooro Jakob yo Paddan Aram both Laban, wod ka Betuel më Aram, n'obedo ömîn Rebeka n'onwongo obedo aya ka Jakob ëka Ecau. 6 I karë nön Ecau öniang nî Icaka ömïö gum both Jakob, ëka ooro ën më cidhö yo Paddan Aram ëk önyöm dhakö kî kunön. Ëka i karë na ën ömïö gum both Jakob, ën öcîkö Jakob nî, "Kür ñnyöm dhakö mörö n'obedo dhanö më Kanaan." 7 Jakob owinyo köp k'apap mërë ëka aya mërë, cë öcidhö yo Paddan Aram. 8 Cë Ecau öniang nî kite k'anyira më Kanaan ba oyomo cwiny apap mërë Icaka, 9 cë Ecau öcidhö both Icamael, ëka önyömö Makalat, amîn Nebayot ëka nyaka Icamael wod k'Abraam, ömëdö i kom mon mërë n'onwongo ën tye ködë cön. 10 Jakob öwëkö Beerceba ëka öcakö cidhö yo Aran. 11 I karë na ën othuno i kabedo mörö, öcakö buto kany nön piën piny onwongo dong ocido ökö. Ën otingo kidi mörö acël ëka otheno kî wie, cë öniön ökö. 12 Lek obino i wie, nakun tye ka nönö madala më idho na tyënë ocung piny i ngöm, na wie othuno malö i wi polo, ëka emalaika k'Obanga onwongo idho piny ëka idhö ginî malö. 13 Ën önenö

Rwoth ocung yo kuwie malö, nakun kobo ninë nî, "An abedo Rwoth, Obanga k'apapni Abraam, ëka Obanga ka Icaka. An abino miöni ëka ëkwaëni ngöm na in ibuto ië. 14 Ëkwaëni bino bedo calö kwo më dhö nam, ëka un ibino mëdërë yo kuthö, yo kukidë, yo kukuju, ëka yo kukwap. Jö kibëc më wi lobo bino n'wongo ginî gum na yaa kî bothi ëka ëkwaëni. 15 An atye kanya acël kodi ëka abino gwököni kanya in ibino cidhö ië kibëc, ëka an abino dwongoni cen i lobo nî. An ba abino wëköni ata naka ka acobo gin n'onwongo akobo bothi." 16 I karë na Jakob ocoo kî i wang ninö mërë, ën okobo nî, "Adyer Rwoth tye i kabedo nî, ëka an onwongo ba angeo." 17 Cë lworo ömakö, nakun kobo nî, "Kabedo nî opodho cwinya! Man ënë öt k'Obanga kikokome. Man ënë dholokek më polo." 18 Kodiko cön Jakob öya malö, otingo kidi n'onwongo otheno kî wie, cë ocibo na calö wir, ëka öönyö möö i wie. 19 Ën öcakö nyëng kabedo nön nî Betel, kadî bed nyëng pacö nön onwongo ecwodo nî Luj. 20 Cë Jakob okwongo kwong nakun kobo nî, "Ka Obanga bino woth köda, nakun gwöka i woth nî, ëka bino miöna cem më acama kî böng më aruka, 21 ëka adwogi naka i öt ka apapna kî kuc, cë Rwoth bino bedo Obangana. 22 Cë kidi nî na an acibo malö na calö wir bino bedo öt k'Obanga, ëka gin na kibëc na in ibino miöna, an abino miöni acël më apar."

29 Cë Jakob ömëdërë kî woth mërë, ëka othuno i lobo ka jö më kukidë. 2 I karë na ën othuno i kabedo nön, ën önenö kulo na tye i pwodho, ëka öthipan rom adek n'obuto ginî piny na cwök kî nget kulo nön, piën rom onwongo modho pii kî i kulo nön. Kidi më dhö kulo onwongo thwönë rwök. 3 I karë n'öthipan rom kibëc güre ginî kunön, ëkwath kwanyö ginî kidi ökö kî i dhö kulo ëka cakö miö ginî rom modho pii. Cë kinge na dong öthipan rom omodho pii, gin dwökö kidi kakarë i dhö kulo. 4 Jakob openyo ëkwath nî, "Utmegona, un ñya unu kî kwene?" Gin ögamö nî, "Wan ëya kî i Aran." 5 Jakob okobo bothgi nî, "Un ingeo Laban n'obedo akwar Nakor?" Gin ögamö nî, "Eyo, wan engeo ën." 6 Cë Jakob openyogi nî, "Ën tye na bër?" Gin ögamö nî, "Eyo, ën tye na bër. Nën, nyarë Racel ëca tye ka kelo rom." 7 Cë Jakob okobo nî, "Ceng pod tye malö, ëka man ba obedo caa më güre öthipan rom kanya acël. Mii unu rom pii ëk omodhi, ëka itergî i kwath dökî." 8 Gin ögamö nî, "Wan ba ëtwërö miögî pii, naka wang na rom kibëc ögüre ginî kanya acël, ëka n'wongo ëkwanyö kidi ökö kî i dhö kulo. Cë wan dong ëcakö miö rom modho pii." 9 I caa n'onwongo ën pod tye ka twak ködgi, Racel obino kî rom k'apap

mërë, piën ën onwongo obedo akwath. 10 Ī karë na Jakob ònënò Racel nyaka Laban, n'obedo nero mërë, ëka kī rom ka nero mërë Laban, Jakob òcakò cīdhò anyim cë òkwanyò kidi òkò kī ĩ dhò kulo ëka òmiò rom ka nero mërë omodho pii. 11 Cë Jakob ònòdhò lem Racel, ëka òcakò kok rwòk kī yom cwinye. 12 Ī karë na Jakob okobo both Racel nī ën ebeto wat k'apap mërë ëka wod ka Rebeka, cë ën òrīngò okobo both apap mërë. 13 Cūcūth na Laban owinyo kōp ĩ kom Jakob wod k'amīn mërë, ën òbūnyò ngwéc mē cīdhò romo kōdē. Òthūnò kore ëka ònòdhò leme, cë otero ën naka ĩ òdē. Kī kunòn Jakob okobo kite na ën ebeto kōdē wat both Laban. 14 Cë Laban okobo nīnē nī, "Adyer in ibeto koma kikokome ëka remona." Cë obedo gīnī kanya acēl kōdē pī dwe acēl. Kinge na Jakob obedo bothe pī dwe acēl, 15 Laban okobo both Jakob nī, "Myero in itii nīna tic abonge cūl piën òn ebeto wat? Kob nīna, kite na myero an aculi kōdē." 16 Laban onwongo tye k'anyira mërë ariò, nyarë n'adit nyingē onwongo ecwodo nī Lea, ëka nyarë na tīdī nyingē onwongo ecwodo nī Racel. 17 Lea onwongo wangē gōrū, ëntò Racel onwongo tīr ëka leng rwòk. 18 Jakob onwongo marò Racel rwòk, cë okobo nī, "An abino tio tic nini pī mwaka abirò pī nyari na tīdī Racel." 19 Laban ògamò nī, "Beto na bër ka an amiò ën bothi, nakaka miò both ëcwò mörò nòkēnē. Pī manòn, bed botha kany." 20 Cë Jakob obino otio tic pī mwaka abirò ëk ëmiē ënyòm Racel, ëntò karë nòn onwongo obedo calò nīnò mörò na nònòk kī bothe piën cwinye onwongo òmarò Racel rwòk. 21 Cë Jakob okobo both Laban nī, "Mīa dong dhakòna ëk abed kōdē, piën karë na òn emoko dong othum òkò." 22 Cë Laban òyūbò karama mē nyom ëka ocwodo lwak kibēc mē kabedo nòn. 23 Ëntò kothyeno na pīny dong ocido, ën okelo nyarë Lea òmiò both Jakob, ëka Jakob obedo kōdē. 24 (Laban òmiò atic mërë na nyakò na nyingē Jilpa both nyarë Lea mē beto calò atic mërë.) 25 Kodiko mërë na pīny dong oru, Jakob ònënò nī Lea ënē onwongo tye kanya acēl kōdē. Cë Jakob okobo both Laban nī, "Man ngò na in ĩtīmò ĩ koma? An onwongo ba abeto ka tic bothi pī Racel? Pīngò in ĩbwòla?" 26 Laban ògamò nī, "Ba obeto thekwaròwa kī kany mē miò nyakò na tīdī mē anyòma na bara ënyòmò nyakò na dit. 27 Tye kono yūb mē nyom mē cabīt ka nyara nī, cë wan ebino miòni nyakò na tīdī thon, ëntò in myero itii tic nīna pī mwaka abirò nòkēnē." 28 Ëka Jakob obino òtīmò nī kōmanòn. Ī karë na Jakob otyeko cabīt acēl kanya acēl kī Lea, Laban obino òmiò nyarë Racel bothe mē beto dhakò mërë. 29 (Laban obino òmiò atic mërë na nyakò na nyingē Bila

both nyarë Racel mē beto calò atic mërë.) 30 Jakob obino obedo kī Racel thon. Ën òmarò Racel rwòk na lōò Lea, cë ën obino otio tic both Laban pī mwaka abirò nòkēnē. 31 Ī karë na Rwoth ònënò nī Jakob ba marò Lea, cë òyabò òd nyodo mërë, ëntò Racel onwongo obedo alūr. 32 Lea òyac, ëka ònywölò athīn n'ëcwò, cë ën òcakò nyingē Reuben, nakun ën okobo nī, "Piën Rwoth ònënò can na mēga, adyer dong cwòra bino maròna." 33 Ëka ën dōkī ògamò iē, cë ònywölò athīn n'ëcwò, ëka okobo nī, "Piën Rwoth owinyo nī an ba ëmara, òmīa dōkī man thon." Cë ën òcakò nyingē Cimeon. 34 Kinge dōkī ën ògamò iē, cë ònywölò athīn n'ëcwò, ëka okobo nī, "Kobedini dong cwòra bino moko ĩ koma, piën anywölò nīnē awope adek." Manòn ënē òmiò ëcakò nyingē Lebi. 35 Ëka dōkī ògamò iē, cë ònywölò athīn n'ëcwò, ëka okobo nī, "Man ënē karë na an abino pakò Rwoth iē." Ën òcakò nyingē Yuda. Cë ën ocung kono òkò.

30 Ī karë na Racel ònënò nī ba dōk ëtwërò nywölò ëthīnò both Jakob, cë nyeko òcakò makò ën ĩ kom amin mërë. Ëka ën okobo both Jakob nī, "Mīa anwong ëthīnò, ka ope cë abino thòò òkò." 2 Cë akēmò òmakò Jakob ĩ kom Racel, ëka okobo nīnē nī, "An adòkò Obanga, n'ojuki nywölò ëthīnò?" 3 Cë Racel ògamò nī, "Aticna na nyakò Bila ene, bed kōdē ëk ònywölò ëthīnò mörò nīna, ëk an thon anwong ëthīnò na yaa kī bothe." 4 Cë Racel òmiò atic mërë Bila both Jakob na calò dhakò mërë, ëka Jakob obedo kōdē. 5 Bila ògamò iē, ëka ònywölò athīn n'ëcwò kī Jakob. 6 Cë Racel okobo nī, "Obanga otyeko ngölò nīna kōp n'atīr; ën owinyo kokona, ëka òmīa athīn n'ëcwò." Manòn ënē òmiò ën òcakò nyingē Dan. 7 Bila atic ka Racel ògamò iē dōkī, cë ònywölò kī Jakob athīn mē ariò n'obeto ëcwò. 8 Cë Racel okobo nī, "An abeto yelara k'amēra rwòk, ëka alōò ën òkò." Cë ën òcakò nyingē Naputali. 9 Ī karë na Lea ònënò nī ba dōk ëtwërò nywölò ëthīnò, ën òkwanyò atic mërë na nyakò Jilpa, ëka òmiò both Jakob na calò dhakò mërë. 10 Jilpa, atic ka Lea, ònywölò athīn n'ëcwò kī Jakob. 11 Cë Lea okobo nī, "Gum na bër òmaka!" Ëka ën òcakò nyingē Gad. 12 Jilpa, atic ka Lea, dōk ònywölò athīn mē ariò n'ëcwò kī Jakob. 13 Cë Lea okobo nī, "Kobedini dong an cwinya yom! Ëka mon bino cwodona gīnī nī ngat na cwinye yom," cë ën òcakò nyingē Acer. 14 Ī karë n'ëcòkò cem kī ĩ pwothi, Reuben òcidhò ĩ pwodho cë onwongo mandurek ëka okelo both aya mërë Lea. Ī karë na Racel obino both Lea, okobo nīnē nī, "Mīa mandurek ka wodi mörò." 15 Ëntò Lea ògamò nī, "In ĩmaò cwòra òkò kī botha, in ĩthamò nī kōp nòn onwongo tīdī mörò?"

Ēka kobedini ĩmĩtō kwanyō mandurek ka woda ōkō thon?" Racel okobo nĩ, "Eyo, ěn twērō bedo kodi tin kiwor nakaka mandurek ka wodi." 16 ĩ karē na Jakob odwogo kĩ ĩ pwodho kothiyeno nōn, Lea ōcĩdhō mē romo kōdē ĩ yoo, cē okobo nĩnē nĩ, "Myero tin ĩdōny ĩ ōda, piēn atyeko pangoni kĩ mandurek ka woda." Cē Jakob ōcĩdhō obedo kōdē ĩ kiwor nōn. 17 Obanga owinyo lēga ka Lea ēka ōgamō ĩē cē ōnywōlō athĩn mē abic n'obedo ēcwō kĩ Jakob. 18 Cē Lea okobo nĩ, "Obanga dong otyeko cūlōna pĩ miō aticna na nyakō both cwōra." Pĩ manōn ěn ōcakō nyingē ĩcakar. 19 Lea dōkĩ ōgamō ĩē ēka ōnywōlō athĩn mē abicēl n'obedo ēcwō kĩ Jakob. 20 Cē Lea okobo nĩ, "Obanga dong otyeko miōna mĩc na bēr. Kobedini dong cwōra bino miō wōrō botha, piēn an anywōlō nĩnē ēthĩnō na cwō abicēl." ěn ōcakō nyingē Jabulon. 21 Kinge karē mōrō, ěn obino ōnywōlō nyarē, cē ōcakō nyingē Dina. 22 Cē Obanga opo ĩ kom Racel; owinyo lēga mērē ēka ōyabō ōd nyodo mērē. 23 ěn ōgamō ĩē, cē ōnywōlō athĩn n'ēcwō, ēka okobo nĩ, "Obanga ōkwanyō lewic ōkō kĩ botha." 24 Cē ōcakō nyingē Yocepu, ēka okobo nĩ, "Rwoth myero ōmia athĩn n'ēcwō nōkēnē." 25 Kinge na dong Racel ōnywōlō Yocepu, Jakob okobo both Laban nĩ, "Yee nĩna ēk acĩdh dong yo lobo thurwa. 26 Mĩa mon-na k'ēthĩnōna, na an atio bothi pĩrgĩ, ēk dong acac cĩdhō. In ingeo tic na tēk na an atio bothi." 27 ěntō Laban okobo nĩnē nĩ, "Ka in ĩnēnō nĩ an atye kĩ cwiny na bēr bothi, akwai nĩ ĩbedi. An anĩang ōkō cōn nĩ piri ěnē ōmiō Rwoth ōmia gum." 28 ěn ōmēdērē mē kobo nĩ, "Kob nĩna wel ōcarani, ēka an abino cūlō gin mōrō kēkēn na in ĩmĩtō." 29 Jakob okobo nĩnē nĩ, "In ingeo kite na an atio tic nini ēka kĩ kite na an agwōkō kĩ ĩlmni kōdē. 30 Adyer ĩlmni onwongo nōnōk ĩ karē na an bara abino, ěntō kobedini dong ōmēdērē ōdōkō na pol rwōk. Rwoth ōmiō gum bothi ĩ kom jami kibēc na an atimō. ěntō kobedini, naka awene na an myero atim gin mōrō pĩ jō mē ōda?" 31 Laban openyo nĩ, "In ĩmĩtō nĩ an amii ngō?" Jakob ōgamō nĩ, "Kūr ĩmĩa gin mōrō. ěntō ka in ibino yee mē timō nĩna gin mōrō acēl, cē an abino mēdara mē gwōkō ĩlmni. 32 Yee nĩna tin ēk acĩdh awoth ĩ kin ĩlmni kibēc, ēka ayēr rom n'obedo omer onyo okomol kĩ ĩ kin-gĩ, ēka k'ēthĩnō rom na cōl gĩnĩ kibēc, kanya acēl kĩ dyegi n'omer gĩnĩ. Man bino bedo ōcara na mēga. 33 Ēka adwogi ka gen-na bino nen ĩ karē mē anyim, ka in ibino mē nēnō nĩ an atero ōcarana na ōn eyere ĩē. Ka in ibino nwongo dyēl mōrō kēkēn na ba obedo omer onyo okomol onyo rōmō mōrō na kome ba cōl, manōn ebino kwanō nĩ gin n'ēkwālō." 34 Cē Laban oye ēka okobo nĩ, "Bēr, ebino timō nĩ kōmanōn kite na in

ikobo kōdē." 35 ĩ nĩnō acēl nōn, Laban obino ōkwanyō nywogi dyegi n'omer onyo n'okomol, megĩ dyegi kibēc n'amer onyo n'akomol (man onwongo ōlĩnga na tar kibēc) ēka k'ēthĩn rom na cōl kibēc, cē ōmiōgĩ ĩ cĩng awope mērē nĩ ēk ōgwōkgĩ. 36 Cē ěn obino ōyūbō woth mē nĩnō adek ĩ kin ěn kĩ Jakob, nakun Jakob odong mē mēdērē mē gwōkō ĩlm ka Laban n'odong. 37 Cē Jakob obino otongo jang yen na thĩc na mar kĩ kom yen adek na papath, ēka ōpwōcō pōkgĩ ēk korgĩ na tar onen. 38 Cē Jakob oketho jang yen n'ēpwōcō ĩ kabedo kibēc na rom modho pii kĩ ĩē, ēk obed ĩ nyim rom ka bino gĩnĩ modho. ĩ karē na rom wapere ka bino gĩnĩ modho pii, 39 gĩn wapere ĩ nyim jang yen, ēka miō nywōlō ēthĩnōgĩ n'obedo okomol, ēka n'omer onyo ōlĩnga. 40 Jakob opoko ēthĩnō rom na path, ěntō ōmiō rom nōkēnē kibēc okemo rom ka Laban n'okomol ēka man acōl. Cē opoko ĩlm mērē na path nakun ba rĩbō kĩ ĩlm ka Laban. 41 Ka karē na megĩ rom na komgĩ tēk karēgĩ ōrōmō mē kwarogĩ, Jakob pyelo jang yen ĩ pii na tye ka mōl ĩ nyimgĩ ēk gĩn owapere na cwōk kĩ jang yen. 42 ěntō ka rom na gōrū tye ka wapere, ěn ba pyelo jang yen kany nōn. Cē rom na gōrū bedo mē ka Laban ēka rom na komgĩ tēk bedo mē ka Jakob. 43 Manōn ōmiō Jakob ōdōkō thwōn alōnyō na tye kĩ rom na pol ēka dyegi, etic na mon ēka etic na cwō, kinaga ēka kene.

31 Jakob owinyo nĩ awope ka Laban onwongo tye ka kobo nĩ, "Jakob otero jami kibēc n'onwongo apapwa tye kōdē ēka onwongo lōnyō nĩ kibēc kĩ ĩ kom ĩlm k'apapwa." 2 Ēka Jakob thon ōnēnō nĩ Laban ba dōkĩ nēnē na bēr kite n'onwongo tye kōdē cōn. 3 Cē Rwoth okobo both Jakob nĩ, "Dōk ōkō cen ĩ lobo ka kwereni ēka wedeni, cē an abino woth kodi." 4 Cē Jakob ooro dhanō mōrō mē cwodo Racel ēka Lea mē bino ĩ bar kanya ĩlm mērē onwongo tye ĩē. 5 ěn okobo bothgĩ nĩ, "An atye ka nēnō nĩ apapwu ba tye ka nēnōna na bēr kite na cōn, ěntō Obanga n'apapna wōrō obedo ka gwōkōna. 6 Un ingeo nĩ an atio tic both apapwu kĩ tēkōna kibēc, 7 ēka apapwu obedo ka bwōlōna nakun lōkō ōcarana wang apar twal. ěntō Obanga ba oyeo nĩnē mē timō gin mōrō na rac ĩ koma. 8 ĩ karē kibēc ka ěn okobo nĩ, 'Leeni n'enywōlō n'obedo ōlĩnga bino bedo cūlni,' cē leeni kibēc nywōlō ēthĩnōgĩ n'obedo ōlĩnga; ēka ka ěn okobo nĩ, 'Leeni n'enywōlō n'obedo omer bino bedo cūlni,' cē leeni kibēc nywōlō ēthĩnōgĩ n'obedo omer. 9 Manōn ěnē kite n'Obanga ōkwanyō ĩlm k'apapwu cē ōmiōgĩ botha. 10 "ĩ karē mē wapere ka rom kĩ dyegi, an anēnō kĩ ĩ lekna nywogi na tye ka kwaro megĩ dyegi ēka megĩ rom na komgĩ obedo omer ēka

okomol onyo ölinga. 11 Malaika k'Obanga ocwoda i wang lek ni, 'Jakob.' An agamö ni, 'An ene.' 12 Cê malaika okobo nina ni, 'Ting wangi malö ëka inên ni nywogi kibêc na tye ka kwaro megî dyegi obedo omer, okomol onyo ölinga, piên an anênö gin na kibêc na Laban obedo ka timö i komi. 13 An abedo Obanga më Betel, kanya in iwiro möö ië i wi kidi ëka kanya in ikwongo kwong kodë botha. Kobedini dong yaa ökö piöpiö ki i lobo ni ëka idök cen yo lobo kanya enywoli ië.' 14 Cê Racel ëka Lea okobo both Jakob ni, 'Wan pod etye ki gin mörö më alea ki i öt k'apapwa? 15 Ên ba bino nënöwa na calö Erok? Ên ba öcadhöwa këkën, ëntö öcamö thon lim n'onwongo imiö bothe piirwa. 16 Adyer lim kibêc na dong Obanga ökwanyö ökö ki both apapwa obedo mëwa ëka ëthinöwa. Dong itim gin na kibêc n'Obanga okobo nini.' 17 Cê Jakob oketho ëthinö mëre ëka mon mëre i ngee kinaga, 18 ên ökölö leeni mëre më pacö ki jami kibêc na ên onwongo ki i Paddan Aram, ëka öcakö cidhö më dök cen i lobo Kanaan kanya apap mëre lcaka ökwö ië. 19 I karë na Laban onwongo öcidhö më nyarö yer rom mëre, Racel ökwälö cal obanga k'apap mëre ginî ki i öt. 20 Jakob thon öbwölö Laban dhanö më Aram nakun ba okobo ninë woth mëre. 21 Ên ölüü ki lim kibêc n'onwongo ên tye kodë, ëka öngölö kulo Euparate, nakun dök yo lobo n'otingere më Gilead. 22 Kinge ninö adek, ekobo both Laban ni Jakob ölüü ökö. 23 Laban ökwanyö wede mëre ölüü ki kôr Jakob pi ninö abirö ëka ëmakö ên i lobo n'otingere më Gilead. 24 Êntö i kiwor Obanga obino both Laban dhanö më Aram i wang lek ëka okobo ninë ni, 'Gwokiri, kür i cidhö ikob gin mörö na bër onyo na rac both Jakob.' 25 Jakob onwongo dong oguro këma mëre i lobo n'otingere më Gilead i karë na Laban ömakö ên. Laban ëka wede mëre thon oguro këmagi kany nön. 26 Cê Laban okobo both Jakob ni, 'Ngö na in itimö? In i'bwöla, ëka itero anyirana na calö jö n'ëmakögi ki i dhö lwëny. 27 P'ingö in ilüü alüa imüng na ba inianga? P'ingö ba ikobo nina ëk amii cidhö unu ki yom cwiny nakun iwero unu wer ki bul ëka adungu? 28 In thon ba imia amotho ëkwaëna ëka anyirana. In itimö gin mörö më mingö. 29 An atye ki twër më wanöwu kibêc, ëntö i kiwor n'opoth Obanga k'apapni okobo nina ni, 'Gwokiri, kür i cidhö ikob gin mörö na bër onyo na rac both Jakob.' 30 Man dong iya ökö, piên imitö dök i öt k'apapni. Êntö p'ingö in ikwälö obangana ginî?' 31 Jakob ögamö dhö Laban ni, 'An onwongo alwor, piên an athamö ni in itwërö gamö anyirani ökö ki botha têték. 32 Êntö ka in inwongo ngat mörö na tye k'obangani ginî, ngat nön ba bino

kwö. Rang gin mörö këkën n'obedo megî i nyim wede onu ëka ikwany i'cidhö kodë." Jakob ba ongeo ni Racel onwongo ökwälö cal obanga k'apap mëre ginî. 33 Laban ödönyö i këma ka Jakob, i këma ka Lea ëka i këma ka mon ariö n'obedo etic, ëntö ên ba onwongo gin mörö. Kinge na ên odonyo yökö ki öd këma ka Lea, ên ödönyö i këma ka Racel. 34 Êntö Racel onwongo ökwanyö cal obanga k'apap mëre ginî, cê okethogî i gin më bedo i ngee kinaga ëka obedo i wie. Laban örangö jami kibêc na tye i öd këma, ëntö ba onwongo gin mörö. 35 Racel okobo both apap mëre ni, 'Adwongna, kür akëmö omaki i koma ka inênö ni ba atwërö yaa malö i nyimi, piên an atye ki two dwena.' Cê Laban ömëdërë ki rangö cal obanga mëre ginî ëntö ba onwongo. 36 Akëmö ömakö Jakob, cê öcakö twak ki Laban nakun kobo ni, 'Ngö na rac na an atimö?' Ên openyo Laban ni, 'Bal ngö na an atimö na miö in itye ka lübö kôra rwök? 37 Kobedini na dong in i'rangö i jamina kibêc, inwongo gin mörö n'obedo megî? Keth i nyim wedeni ëka mëga, cê imiigi öngöl köp i kin ön jö ariö. 38 "An abedo bothi pi mwaka pyer ariö. Megi rom ëka megî dyegini igi ba ööny. An thon ba acamö nywogini mörö. 39 Ka lee më thim oneko romni onyo dyegini an ba akelo bothi, an kikoma ênë acülö. Êka, in imia acülö pi lee mörö n'orwenyo, kadî bed ni ëkwälö kiceng onyo kiwor. 40 Man ênë kite n'onwongo an atye kodë: Ceng wanga kiceng ëka koyo neka kiwor, cê ninö kwërö wanga ökö. 41 Pi mwaka pyer ariö na an abedo kodë i pacöni, an atio bothi mwaka apar angwën pi anyirani ariö, ëka pi mwaka abicël pi limni. In ibedo ka lökö öcarana wang apar küli! 42 Ka Obanga k'apapna, Obanga k'Abraam ëka Obanga n'apapna lcaka wörö, onwongo ba ögwöka, in onwongo itwërö ryëmöna ki cinga nono. Êntö Obanga önênö kite na an limö ki can kodë, tic na tæk na an atimö, ëka ocoki i kiwor n'opoth." 43 Laban okobo both Jakob ni, 'Lea ëka Racel obedo ginî anyirana, ëthinögi obedo ginî ëkwaëna, ëka lim kibêc obedo mëga. Gin na in itye ka nënö kibêc obedo mëga. Êntö ngö na an atwërö timö i kom anyirana tin, onyo ëthinö na gin önywölö? 44 Bin dong, ëk emok cikërë, in ëka an, ëk obed caden i kin ön." 45 Cê Jakob ökwanyö kidi ëka oketho na calö wir. 46 Ên okobo both wede mëre ni, "Cök unu kite mörö." Gin öcökö kite ëka eurogi i athuketh, cê ocemo ginî i nget athuketh. 47 Laban öcakö nyëng kabedo nön ni Jegar Caduta, ëntö Jakob öcakö nyëngë ni Galeed. 48 Laban okobo ni, "Kite n'euro ni obedo caden më cikërë tin, i kin in ki an." Manön ênë gin n'ömiö ecwodo ni Galeed. 49 Onwongo thon ecwodo ni Mijpa, piên ên okobo

nĩ, "Ēk Rwoth ɔgwók kin ɔn ĩ karē na ngat acélačél bino bedo na bor ki both awodhe. 50 Ka in ibino yelo anyirana onyo ka in ibino nyómō mon nókēnē mē mēdō ĩ kom anyirana, kadĩ bed nĩ ngat mōrō ope kod onu, myero ipo nĩ Obanga obedo caden ĩ kin in kĩ an." 51 Cē Laban dōkĩ okobo both Jakob nĩ, "Athuketh mē kidi ni ene, ēka an aketho wĩr ni ĩ kin in kĩ an." 52 Athuketh ni obedo caden, ēka wĩr ni obedo caden, na an ba abino kadhō mē bino bothi mē wanōni, ēka in ba ibino kadhō athuketh mē kidi ni ēka wĩr ni mē bino wanōna. 53 Ēk Obanga k'Abraam ēka Obanga ka Nakor, Obanga k'Apapgĩ, ɔngōl kōp ĩ kin ɔn." Cē Jakob okwongo kwong ki nyĩng Obanga n'apap mērē lcaka wōrō. 54 Jakob oneko lee ēka ɔtyērō na calō tyēr awanga ĩ wi kidi, cē ocwodo wede mērē mē bino cem. Kinge na gĩn otyeko cem, gĩn ɔnĩnō ĩ wi kidi kunōn. 55 Kodiko cōn na pĩny dong oru, Laban omotho ēkwaē mērē ēka anyira mērē kĩ nōdhō lemgĩ, ēka ɔlamō nĩgĩ gum. Cē opokere kōdgĩ ēka ɔdōk yo pacō mērē.

32 Jakob ɔmēdērē ki woth mērē, ēka emalaika k'Obanga oromo kōdē. 2 ĩ karē na Jakob ɔnēnōgĩ ēn okobo nĩ, "Man ēnē kabedo k'Obanga!" Cē ēn ɔcakō nying kabedo nōn nĩ Makanaĩm. 3 Cē Jakob ooro ēkwēna anyim both ɔmĩn mērē Ecau na tye ĩ lobo mē Ceir, lobo mē Edom. 4 Ēn ɔcīkōgĩ nĩ, "Man ēnē ngō na un ĩcīdhō kobo both adwongna Ecau: 'Aticni Jakob okobo nĩ: An abedo both Laban ēka an abedo bedo kunōn naka tin. 5 An atye kĩ dhok, kene, rom ēka dyegi, etic n'obedo cwō ēka etic n'obedo mon. Kobedini an aoro kōp ni yo bothi adwongna, ēk ibed ki cwiny na bē ĩ koma.'" 6 ĩ karē n'ēkwēna odwogo gĩnĩ both Jakob, gĩn okobo nĩ, "Wan ēcīdhō both omeru Ecau, ēka ēn tye ka bino ki jō mia angwēn mē romo kodi." 7 Lworo ɔmakō Jakob rwōk, ēka cwinye thon opodho. Ēn opoko jō n'onwongo tye bothe, rom kĩ dyegi, dhok, ēka kĩnaga ĩ gurup ariō. 8 Ēn ɔthamō nĩ, "Ka Ecau obino ēka ocelo kabedo acél, cē mana odong twērō bwōth." 9 Cē Jakob ɔlōgō nĩ, "Aa Obanga k'apapna Abraam, Obanga k'apapna lcaka, Aa Rwoth n'okobo nĩna nĩ, 'Dōk cen yo loboni ēka both wedeni, cē an abino gwōkōni,' 10 an ba apora ki marni kībēc ēka gen-ni na in inyutho both aticni. An onwongo atye kĩ lūdha mē woth ĩ karē na an angōlō kulo Jordan, ēntō kobedini an dong atye kĩ lĩm na pol n'opokere ĩ gurup ariō. 11 An alēgō nĩ ĩlara kĩ kom ɔmēra Ecau, piēn an atye kĩ lworo nĩ ēn twērō bino mē celona ēka thon mon-na k'ēthĩnōgĩ. 12 Ēntō in ikobo nĩ, 'An abino gwōkōni ēka abino mĩō ēkwaēni bedo calō kwo mē dhō nam,

na ba bino kwanērē.'" 13 Jakob ɔnĩnō kunōn, ēka ki kom ngō na ēn onwongo tye kōdē, ēn ɔtyērō ēka ooro both ɔmĩn mērē Ecau na calō mĩc: 14 megĩ dyegi mia ariō ēka nywogi pyer ariō, megĩ rom mia ariō ēka thwoni rom pyer ariō, 15 megĩ kĩnaga k'ēthĩnōgĩ pyer adek, megĩ dhok pyer angwēn ēka thwoni apar, megĩ kene pyer ariō ēka thwoni kene apar. 16 Jakob ɔmĩōgĩ both etic mērē, nakun poko gĩnĩ ĩ ēthĩpan, cē okobo both etic mērē nĩ, "Apē unu anyim nĩna ēka kin ēthĩpan myero obed na lalac." 17 Ēn ɔcīkō atic acél na tēlō wigĩ nĩ, "Ka ɔmēra Ecau oromo kodwu ēka openyo nĩ, 'Un ibedo jō ka nga? ĩcīdhō unu yo kwene? Leeni ka nga ene na un itye ka kōlō?' 18 Cē un myero ikob nĩ, 'Obedo mē aticni Jakob. Ēmĩō na calō mĩc both adwongna Ecau, ēka ēn tye odong cen ĩ ngewa.'" 19 Jakob thon ɔmĩō cīk ni both atic mē ariō, mē adek, ēka both jō nókēnē kībēc n'onwongo tye ka lūbō kōr ēthĩpan, nakun kobo nĩ, "Myero ikob unu kōp na rōm arōma both Ecau ka iromo unu kōdē. 20 Myero thon ikob unu nĩ, 'Aticni Jakob tye ĩ ngewa tye ka bino.'" Piēn ēn ɔthamō nĩ, "An abino yomo cwinye kĩ mĩc na an atye ka oro anyim. Kinge, ka an anēnō ēn, cē onyo twērō jōlōna." 21 Cē Jakob ooro mĩc ɔcīdhō anyim nĩnē, nakun ēn kikome ɔnĩnō ɔkō kanya onwongo ēn tye ĩē ĩ kiwor nōn. 22 ĩ kiwor nōn Jakob ɔya malō cē otero mon mērē ariō, etic mērē ariō n'obedo mon, awope mērē apar acél, ēka ɔngōlō ĩ kulo Jabok yo lōka tung ca. 23 Ēn oterogĩ ēka ɔmĩōgĩ ɔngōlō ĩ kulo kanya acél kĩ jami mērē kībēc. 24 Jakob onwongo odong kēnē. Cē ēcwō mōrō ɔgamērē kōdē naka ĩ caa na pĩny dong cwōk ruu. 25 ĩ karē n'ēcwō ɔnēnō nĩ ba ērōmō lōōnō Jakob, ēn otwomo wi bam Jakob ēka ɔwĩl ɔkō nakun pod gamērē kōdē. 26 Cē ēcwō nōn okobo nĩ, "Wēka acīdh ɔkō, piēn pĩny dong cwōk ruu." Ēntō Jakob ɔgamō nĩ, "An ba abino wēkōni ĩcīdhō naka wang ĩmĩa gum." 27 Ēcwō nōn openyo nĩ, "In nyingi nga?" Ēn ɔgamō nĩ, "Jakob." 28 Cē ēcwō nōn okobo nĩ, "Nyingi ba dōkĩ ebino cwodo nĩ Jakob, ēntō lcarael, piēn in igamiri k'Obanga ēka kĩ jĩ naka ĩlōō." 29 Jakob okobo nĩ, "Ōma kob nĩna nyingi." Ēntō ēn ɔgamō nĩ, "Pĩngō ipenyō nyinga?" Cē ɔmĩō Jakob gum kĩ kany nōn. 30 Jakob okobo nĩ, "An anēnō Obanga wang kĩ wang, ēka an pod akwō." Cē ēn ɔcakō nying kabedo nōn nĩ Peniel. 31 Ceng odonyo malō n'onwongo Jakob tye ka yaa kĩ ĩ Peniel, ēntō ēn onwongo kōmō pĩ bamē n'ɔwĩl. 32 Man ɔmĩō naka tin jō lcarael ba camō gĩnĩ ler ringo bam, piēn bam Jakob onwongo etwomo na cwōk kĩ ler.

33 Ī karē na Jakob tye ka yaa kī kany nōn, ěn otingo wangē ěka ōnēnō Ecau tye ka bino kī jōgē mia angwēn. Cē ěn ōcakō poko ěthīnō ĩ kin Lea, Racel ěka etic na mon ariō. **2** ěn oketho etic na mon k'ěthīnōgī anyim, Lea k'ěthīnō mērē ōlūbō kōrgī, ěka Racel kī Yocepu odong angec. **3** Jakob kikome ōcīdhō anyim ěka oryebere pīny wang abīrō na ěn tye ka cīdhō na cwōk k'ōmīn mērē. **4** ěntō Ecau ōringō mē romo kī Jakob ěka ōthūnō ngute cē ōnōdhō leme. Cē utmego ariō ōcakō gīnī koko. **5** Ī karē n'Ecau otingo wangē ěka ōnēnō mon k'ěthīnō, ěn openyo nī, “Ěthīnō ka nga ene?” Jakob ōgamō nī, “Man ěthīnō n'Obanga ōmīō both aticni pī kīca mērē.” **6** Cē etic na mon k'ěthīnōgī othuno ěka oryebere gīnī pīny. **7** Cē Lea k'ěthīnō mērē obino ěka oryebere gīnī pīny. Mē ajiki Yocepu ěka Racel obino gīnī anyim cē gīn thon oryebere pīny. **8** Ecau openyo Jakob nī, “Gurup na an aromo kōdgī thērē nīngō?” Jakob ōgamō nī, “Ěk ibed kī cwiny na bē ĩ koma, adwongna.” **9** ěntō Ecau okobo nī, “An dong atye kī leeni na pol ōmēra. Wēk gīn na in itye kōdē obed megī.” **10** ěntō Jakob ōkwērō nakun kobo nī, “Ka in ěnēnō nī an ayomo cwinyi, cē ĩgam mīc na an amii. Pīen adyer, ka an anēnō terinyimi, rōm nī anēnō terinyim Obanga. Pī koth cwiny na bē na in ĩjōla kōdē. **11** Ōma gam mīc nī na an akelo bothi, pīen Obanga onyutho kīca mērē ĩ koma ěka an atye kī mēga na rōma.” Jakob ōmēdērē kī dīō Ecau naka oye mē gamō mīc. **12** Cē Ecau okobo nī, “Eru ewothu kanya acēl, ěka an abino tēlō yoo.” **13** ěntō Jakob okobo nīnē nī, “Adwongna ngeo nī ěthīnō pod thīthīnō, ěka an myero agwōk rom kī dhok na dōdhō ěthīnōgī. Ka ĩmīōgī owotho na bor rwōk kadī pī nīnō acēl, leeni kībēc bino thōō ōkō. **14** Ěk adwongna ōcīdh anyim n'atic mērē, nakun an awotho momoth n'oporo woth ka leeni n'ōtēlō yoo ěka mē k'ěthīnō, naka ka an abino thuno both adwongna ĩ Ceir.” **15** Cē Ecau okobo nī, “Ěk awēk jō na mēga mōkō bothi.” ěntō Jakob ōgamō nī, “In kūr ĩtīm nī kōmanōn. Adwongna bed kī cwiny na bē ĩ koma, ĩwēk dong obed nī kōmanōn.” **16** Cē ĩ nīnō nōn Ecau ōcakō woth mērē mē dōk cen yo Ceir. **17** ěntō Jakob ōcīdhō yo Cukot kanya ěn ōgērō ōt ĩē ěka ōyūbō okul pī leeni mērē. Manōn ěnē ōmīō ecwodo kabedo nōn nī Cukot. **18** Kinge na Jakob ōya ōkō kī Paddan Aram, ěn othuno na bē ĩ pacō mē Cekem na tye ĩ Kanaan ěka obedo na cwōk kī pacō. **19** Jakob ōwīlō ngōm na ěn oguro kēma mērē ĩē kī both ěthīnō ka Kamor, apap ka Cekem, ĩ wel mē cīlīng mia acēl. **20** Kany nōn ěnē ěn ōgērō keno tyēr ěka ōcakō nīyīngē nī El Eloē Icarael.

34 Ī nīnō mōrō acēl Dina, nyaka Lea na ěn ōnywōlō kī Jakob, ōcīdhō mē ĩmō mon mē lobo nōn. **2** Ī karē na Cekem wod ka Kamor dhanō mē Kibi, rwoth mē kabedo nōn, ōnēnō ěn cē ōmakō obedo kōdē tētēk. **3** Cwinye onwongo ōmarō Dina nyaka Jakob. ěn ōmarō nyakō nakun twak kōdē kī mar. **4** Cekem okobo n'apap mērē Kamor nī, “Nyōm nīna nyakō nī obed dhakōna.” **5** Ī karē na Jakob owinyo nī nyarē Dina ebodo kōdē tētēk, awope mērē onwongo tye gīnī kī leeni mē pacō ĩ thim. Jakob ōlīng alīnga ba okobo gīn mōrō naka k'awope mērē odwogo pacō. **6** Cē Kamor, apap ka Cekem, ōcīdhō mē twak kī Jakob. **7** Ī karē n'awope ka Jakob owinyo gīnī kī ĩ thim ngō n'ōtīmērē ĩ kom Dina, odwogo gīnī ōkō. Gīn onwongo ōkēcō rwōk ěka akēmō thon ōmakōgī pīen Cekem ōtīmō gīn mē lewic na ba bē ĩ Icarael nakun bedo kī nyaka Jakob tētēk—gīn mōrō na myero kūr ōtīmērē. **8** ěntō Kamor okobo bothgī nī, “Woda Cekem tye kī mar gīn kī nyari. Ōma mī ěnyōm nyari obed dhakō mērē. **9** Wēk nyom obed tye ĩ kinwa kodwu, mī ĩ unu anyirawu bothwa, ěka un thon ĩnyōm anyirawa obed monwu. **10** Un ĩtwērō bedo ĩ kinwa, ibino bedo unu ĩ lobo nī kite na un ĩmītō. Bed unu ĩē, cadh unu cath ĩē, ěka inwong unu jami kī ĩē.” **11** Cē Cekem okobo both apap ka Dina ěka utmego mērē nī, “Bed unu kī cwiny na bē ĩ koma, ěka an abino mīōwu ĩm kībēc na un ibino ngōlō. **12** Ngōl unu wel ĩm kite na un ĩmītō kōdē, ěka an abino mīō gīn mōrō kēkēn na un ibino penyona. ěntō mia unu nyakō nī ěk anyōm obed dhakōna.” **13** Awope ka Jakob ōgamō gīnī kī yoo mē bwōl ĩ karē na gīn ōtwak kī Cekem ěka apap mērē Kamor pīen Cekem obedo k'amīn-gī Dina tētēk. **14** Gīn okobo bothgī nī, “Wan ba ětwērō mīō amīnwa both ěcwō na ba ělīrō pīen bino bedo mē lewic bothwa. **15** Wan ětwērō yee pī tyēn kōp acēl: Ka un ĩtwērō yee mē bedo kamē wan nakun ĩlīrō unu cwō kībēc. **16** Cē wan ebino mīō anyirawa ěka wan ebino kwanyō anyirawu mē bedo mēwa. Wan ebino bedo ĩ kinwu ěk ebed wat. **17** ěntō ka un ba ibino yee mē līrē, wan ebino kwanyō amīnwa ěka ěcīdhō kōdē ōkō.” **18** Kōpgī oyomo cwiny Kamor ěka wode Cekem. **19** Cekem n'onwongo obedo dhanō n'ěwōrō kī ĩ pacōgī ba ōgalērē mē tīmō gīn n'ekobo nīnē pīen ěn onwongo mītō Dina nyaka Jakob rwōk. **20** Cē Kamor ěka wode Cekem ōcīdhō gīnī ĩ dhō wangkac mē pacōgī ěka ōtwak gīnī both jō mē pacōgī nī, **21** “Jō nī tye gīnī na bē kod onu. Eru ewekugī obed ĩ lobo onu ěka ōcadh gīnī cath ĩē, pīen lobo tye na lac na rōmōgī. Onu ětwērō nyōmō anyiragī ěka gīn thon twērō nyōmō anyira onu. **22** ěntō gīn twērō bedo kod onu na calō wat ka cwō kībēc na tye both onu oye mē

liré na caló gín. 23 Éntò ka onu étimò man, leenigi éka kí limgí kibéc ba twèrò bedo mè onu? Gín na myero onu étim éné mè yee, éka gín twèrò bedo kany kod onu.” 24 Cwò kibéc n'òcòkèrè ì dhò wangkac oye gínì kóp ka Kamor éka wode Cekem. Cwò kibéc n'òcòkèrè gínì ì dhò wangkac éllirögí. 25 Kinge nínò adek, n'ajemegí onwongo pod lith, awope ka Jakob ariò, Cimeon éka Lebi, utmego ka Dina, ókwanyò gínì pala abadégí cè ócìdhò gínì ì pacò na wegí méré ba ngeo éka oneko gínì cwò kibéc. 26 Gín oneko Kamor éka wode kí pala abadé, ókwanyò gínì Dina kí ì ót ka Cekem éka ócìdhò gínì kódè ókò. 27 Í karé n'awope ka Jakob nòkèné obino gínì kanya lyene tye iè, gín óyakò jami kí ì pacò pièn amin-gí onwongo ebodo kódè tètèk. 28 Gín otero rom kí dyegi, dhok, kene éka jami kibéc n'onwongo tye ì pacò éka ì pwothi. 29 Gín otero limgí kibéc, mon-gí kibéc, éthínögí éka jami kibéc na gín óyakò kí ì udigí. 30 Cè Jakob okobo both Cimeon éka Lebi ní, “Un ikelo pèkò ì koma éka imia unu adòkò dhanò na rac both jò Kanaan éka jò Periji—both jò na bedo gínì ì lobo ni. Wel onu nòk, éka ka gín óribèrè mè lwèny kòda, an éka jò mè óda ebino tyeko ókò.” 31 Éntò gín ógamò ní, “Onwongo pore mè miò èn bedo k'aminwa caló ólaya?”

35 Kinge karé mörò, Obanga okobo both Jakob ní, “Yaa malò icidh yo Betel èk ibed kunòn, éka igèr keno tyèr kunòn both Obanga, n'obino onen both ì karé na in itye ka ngwèc ókò kí both omeru Ecau.” 2 Cè Jakob okobo both jò mè ódè éka both jò kibéc n'onwongo wotho kódè ní, “Yuu unu obanga nòkèné gínì na tye bothwu ókò. Lónyèrè unu éka ilòk unu bõngwu. 3 Kinge onu ebino yaa écìdhò yo Betel, kanya an abino gèrò keno tyèr both Obanga, n'owinyo lègana ì karé na an atye ì pèkò éka n'obedo gwòkòna kí kanya an abedo ka woth iè.” 4 Cè gín ómíò Jakob obanga nòkèné gínì kibéc n'onwongo gín tye kódè éka gwílú n'onwongo tye ì ithgí. Jakob oikogí ì thè yath na thwónè na cwòk kí Cekem. 5 Cè gín ócakò woth, éka lworo n'óya kí both Obanga opodho ì kom peci kibéc na cwòk n'ógürögí èk ngat mörò kúr ólúb kòrgi. 6 Kinge nínò na nòkòk, Jakob éka jò mè ódè kibéc othuno gínì yo Luj (manòn, Betel) na tye ì lobo Kanaan. 7 Èn ógèrò keno tyèr kunòn, éka ócakò nying kabedo nòn El Betel, pièn kany nòn èné Obanga onyuthere kódè bothe ì karé na èn tye ka lüü kí both ómín méré. 8 Í karé na gín tye kunòn, Debora apidi ka Rebeka na dhakò n'ógwòkò èn óthòò ókò éka eiko èn ì thè yath na thwónè na tye ì Betel cè ebino écakò nyingé Allon Bacut. 9 Kinge na Jakob odwogo kí ì Paddan Aram, Obanga dòkí onen both

Jakob éka ómíò gum. 10 Obanga okobo bothe ní, “Nyingi obedo Jakob, éntò in ba dòkí ebino cwodoní ní Jakob; nyingi bino bedo Icarael.” Cè Obanga ócakò nyingé Icarael. 11 Cè Obanga okobo bothe ní, “An abedo Obanga Won Twèr kibéc, nywól éka ìnya ì wel na pol. Rok éka jò mè rok kibéc bino yaa kí bothi, éka rwodhi bino bedo ì kin ékwaèni. 12 Lobo na an amíò both Abraam éka Icaca an thon amíò yo bothi, éka an abino miò lobo ni yo both ékwaèni kí kori.” 13 Cè Obanga óya ókò kí bothe kí ì kabedo n'onwongo èn ótwak kódè iè. 14 Jakob oketho kidi n'obedo wír ì kabedo kanya Obanga onwongo ótwak kódè iè. Èn óönyò mic amadha iè, éka óönyò thon móò iè. 15 Jakob ócakò nying kabedo n'Obanga onwongo ótwak kódè iè ní Betel. 16 Kinge manòn, Jakob kí jò mè ódè óya gínì ókò kí ì Betel. Í karé na gín pod tye na bobor kí ì Eparat, rem mè nywól ógòò Racel éka rem méré onwongo tèk. 17 Í karé na èn tye kí rem nywól na tèk, acól mon okobo bothe ní, “Kúr ibed kí lworo, pièn in ìnywólò awobi nòkèné.” 18 Éntò Racel onwongo cwòk thòò, éka na bara óthòò, èn ócakò nyingé Ben Oni. Éntò Jakob ócakò nyingé ní Benjamin. 19 Cè Racel óthòò éka eiko ì yoo n'onwongo etye ka cidhò yo Eparat (manòn, Bethel). 20 Jakob oketho kidi ì wi lyél ka Racel, éka kidi nòn pod tye kany nòn naka ì nínò ni. 21 Jakob, n'ecwodo thon ní Icarael, ómèdèrè kí woth méré éka oguro kèma méré yo nge Migdal Eder. 22 Í karé na Jakob tye ì lobo nòn, Reuben obedo kí Bila n'obedo dhakò k'apap méré nòkèné, éka Jakob owinyo kóp nòn. Jakob onwongo tye k'awope apar ariò: 23 Awope ka Lea onwongo obedo: Reuben, athin kaó ka Jakob, Cimeon, Lebi, Yuda, Icakar éka Jabulon. 24 Awope ka Racel onwongo obedo: Yocepu éka Benjamin. 25 Awope ka Bila atic ka Racel onwongo obedo: Dan éka Naputali. 26 Awope ka Jilpa atic ka Lea onwongo obedo: Gad éka Acer. Man onwongo obedo awope ka Jakob n'énywólögí kí ì Paddan Aram. 27 Jakob obino odwogo both apap méré Icaca n'onwongo tye ì Mamre, na cwòk kí Kiriath Arba (manòn, Kebron), kanya Abraam éka Icaca onwongo obedo gínì iè. 28 Icaca obedo ì wi lobo pí mwaka 180. 29 Cè óthòò na mwaka méré dong dit, na dong otengo rwòk cè eiko èn kanya acél kí kwere méré. Awope méré Ecau éka Jakob oiko èn.

36 Man èné ékwaè k'Ecau (ecwodo thon ní Edom). 2 Ecau ónyòmò mon méré kí both jò Kanaan: Ada nyaka Elon n'obedo dhanò mè Kit, éka Okolibama nyaka Ana akwar Jibeon dhanò mè Kibi— 3 èn thon ónyòmò Bacemat nyaka Icimael éka amin Nebayot. 4

Ada önywölö n'Ecau Elipaji, Bacemat önywölö Reuel, 5 ëka Okolibama önywölö Jeuc, Jalam ëka Kora. Man awope k'Ecau n'ënywölögi ki i lobo Kanaan. 6 Ecau otero mon mërë, ëthïnö awope ëka anyira, jö kibëc më ödë, leeni mërë, ëka jami kibëc na ën onwongo ki i lobo Kanaan, cë öcïdhö ködë i lobo nökënë ki both ömïn mërë Jakob. 7 Pïën jamigï onwongo pol rwök na gïn ba römö bedo kanya acël; lobo n'onwongo gïn bedo ië onwongo ba römögï piën leenigï onwongo pol. 8 Cë Ecau (manön, Edom) öcïdhö obedo i Ceir i lobo n'otingere malö. 9 Man ënë ëkwaë k'Ecau, kwarö ka jö Edom na bedo ginï i lobo n'otingere më Ceir. 10 Man ënë nying awope k'Ecau: Elipaji, wod ka dhakö k'Ecau n'ecwodo ni Ada, ëka Reuel, wod ka dhakö k'Ecau n'ecwodo ni Bacemat. 11 Awope ka Elipaji onwongo obedo: Teman, Omar, Jepo, Gatam ëka Kenaj. 12 Wod k'Ecau n'ecwodo ni Elipaji, onwongo thon tye ki dhakö nökënë n'ecwodo ni Timna n'önywölö ninë Amalek. Man onwongo obedo ëkwaë ka dhakö k'Ecau n'ecwodo ni Ada. 13 Awope ka Reuel onwongo obedo: Nakat, Jera, Camma ëka Mija. Man onwongo obedo ëkwaë ka dhakö k'Ecau n'ecwodo ni Bacemat. 14 Awope ka dhakö k'Ecau n'ecwodo ni Okolibama nyaka Ana akwar Jibeon, na ën önywölö n'Ecau ënë: Jeuc, Jalam ëka Kora. 15 Man ënë ëkwaë k'Ecau n'obino ödökö ginï rwodhi: Awope k'Elipaji n'obedo kaö k'Ecau: rwoth Teman, rwoth Omar, rwoth Jepo, rwoth Kenaj. 16 rwoth Kora, rwoth Gatam ëka rwoth Amalek. Man onwongo obedo rwodhi n'öya ki both Elipaji ki i lobo Edom; gïn onwongo obedo ëkwaë ka Ada. 17 Man ënë awope ka Reuel wod k'Ecau: rwoth Nakat, rwoth Jera, rwoth Camma ëka rwoth Mija. Man ënë onwongo obedo rwodhi n'öya ki both Reuel ki i lobo më Edom. Gïn onwongo obedo ëkwaë ka dhakö k'Ecau n'ecwodo ni Bacemat. 18 Awope ka dhakö k'Ecau n'ecwodo ni Okolibama: rwoth Jeuc, rwoth Jalam ëka rwoth Kora. Man ënë onwongo obedo rwodhi n'öya ki both dhakö k'Ecau Okolibama nyaka Ana. 19 Man ënë onwongo obedo awope k'Ecau (manön, Edom) ëka man ënë onwongo obedo rwodhigi. 20 Man ënë onwongo obedo awope ka Ceir dhanö më Kori, n'onwongo bedo ginï i lobo nön: Lotan, Cobal, Jibeon, Ana, 21 Dicon, Ejer ëka Dican. Man ënë onwongo obedo rwodhi ka jö Kori, ëkwaë ka Ceir më lobo Edom. 22 Awope ka Lotan onwongo obedo: Kori ëka Emam. Timna onwongo obedo amïn Lotan. 23 Man ënë onwongo obedo awope ka Cobal: Alban, Manaat, Ebal, Cepo ëka Onam. 24 Man ënë onwongo awope ka Jibeon: Aia ëka Ana. Man Ana n'obino onwongo pii na lyeth ki i thim i karë na ën tye ka kwaö kene k'apap mërë

Jibeon. 25 Man ënë onwongo ëthïnö ka Ana: Dicon ëka Okolibama nyaka Ana. 26 Man ënë onwongo obedo awope ka Dicon: Kemdan, Eciban, Itran ëka Keran. 27 Man ënë onwongo obedo awope ka Ejer: Bilan, Jaaban ëka Akan. 28 Man ënë onwongo obedo awope ka Dican: Uj ëka Aran. 29 Man ënë onwongo obedo rwodhi ka jö Kori: rwoth Lotan, rwoth Cobal, rwoth Jibeon, rwoth Ana, 30 rwoth Dicon, rwoth Ejer, ëka rwoth Dican. Man ënë onwongo obedo rwodhi ka jö Kori, na lübërë ki kite na kakagi tye ködë i lobo Ceir. 31 Man ënë rwodhi n'ölöö ginï löc i lobo më Edom na bara rwoth mörö më Icaael ölöö löc. 32 Bela wod ka Beor obino ödökö rwoth më Edom. Pacö mërë ebino ëcakö nyingë Dinkaba. 33 I karë na Bela öthöö, Jobab wod ka Jera n'öya ki i Bojra oleo ka tyënë na calö rwoth. 34 I karë na Jobab öthöö, Kucam n'öya ki i lobo ka jö Teman oleo ka tyënë na calö rwoth. 35 I karë na Kucam öthöö, Kadad wod ka Bedad, n'ölöö Midian i lobo më Moab, obino oleo ka tyënë na calö rwoth. Pacö mërë ebino ëcakö nyingë Abit. 36 I karë na Kadad öthöö, Camla n'öya ki i Macireka oleo ka tyënë na calö rwoth. 37 I karë na Camla öthöö, Caul n'öya ki i Rekobot na tye i dhö kulo më Euparate oleo ka tyënë na calö rwoth. 38 I karë na Caul öthöö, Baal Kanan wod ka Akbor oleo ka tyënë na calö rwoth. 39 I karë na Baal Kanan wod ka Akbor öthöö, Kadad oleo ka tyënë na calö rwoth. Pacö mërë ebino ëcakö nyingë Pau, ëka nying dhakö mërë onwongo ecwodo ni Meketabel nyaka Matred, nyaka Mejaab. 40 Man ënë rwodhi n'öya ki both Ecau, ki nying-gi, na lübërë ki kakagi ëka lobogi: rwoth Timna, rwoth Alba, rwoth Jetet, 41 rwoth Okolibama, rwoth Ela, rwoth Pinon, 42 rwoth Kenaj, rwoth Teman, rwoth Mibjar, 43 rwoth Magdiel ëka rwoth Iram. Man ënë onwongo obedo rwodhi më Edom, na lübërë ki kite na gïn obedo ködë i lobo n'obedo mëgi. Man ënë Ecau akwar jö Edom.

37 Jakob obedo i lobo Kanaan, kanya onwongo yam apap mërë obedo ië. 2 Man ënë köp më thëkwarö më öt ka Jakob. I karë na Yocepu dong othuno mwaka apar abirö, ën onwongo kwaö rom ëka dyegi kanya acël ki utmego mërë, awope ka Bila ëka më Jilpa, n'obedo ginï mon k'apap mërë Jakob. Ën okelo köp na rac i kom utmego mërë both apap mërë. 3 Jakob onwongo marö Yocepu rwök na löö awope mërë nökënë piën ënywölö ën i karë na ën dong otii. Ën öyübö ninë böngü na bor na badë boco. 4 I karë na utmego mërë önënë ni apapgï marö Yocepu rwök löögï ökö, gïn öcakö dagö ën ëka onwongo ba dökï ëtwak ködë ki yom cwiny. 5 I kiwor mörö acël Yocepu

oleko lek cê okobo both utmego mërë, gin òmédèrë kî dagò èn rwòk. **6** Èn okobo nîgî nî, "Winy unu lek na an aleko: **7** Aleko nî onu onwongo etye ka rîdhò kal kî i pwodho, cê kal na an atweo ôya malò ocung atîr, êka kal na un itweo obino ôgürò mëga dyere cê oryebere gîni pîny i nyim mëga." **8** Utmego mërë ôcakò gamò nîné nî, "In îthamò nî ibino lôôwa? In ibino lôôwa adyer?" Cê utmego mërë ôcakò mèdèrë gîni amèda më dagò èn rwòk pî lek mërë nòn êka pî kôp na èn ôtwakò. **9** Cê Yocepu dôkî oleko lek nòkèné, êka okobo both utmego mërë nî, "Winy unu, aleko lek nòkèné dôkî nî ceng, dwe êka cêr apar acêl oryebere gîni pîny i nyima." **10** Î karê na èn okobo lek mërë nòn both apap mërë êka utmego mërë, apap mërë ocoko èn nakun kobo nî, "Koth lek ngò na in ileko nòn? In îthamò nî ayani, an êka utmegoni adyer ebino ryebere pîny i nyimi?" **11** Adînga ôcakò makò utmego mërë rwòk i kome, èntò apap mërë ôkanò kôp nòn kîbêc i cwinye. **12** Î ninò mörò acêl, utmego ka Yocepu ôcidhò gîni kwaò rom êka dyegi k'apapgi na cwòk kî Cekem, **13** Icarael okobo both Yocepu nî, "Utmegoni ôcidhò gîni yo kukwath na cwòk kî Cekem. Bin êk aori bothgi." Èn ôgamò nî, "An enene." **14** Apap mërë okobo nîné nî, "Cîdh înen ka utmegoni êka rom kî dyegi tye gîni na bër êk idwogi ikob nîna." Èn ooro Yocepu më yaa kî i ora më Kebron. Î karê na Yocepu othuno i Cekem, **15** êcwò mörò onwongo èn tye ka lath i dye bar, cê openyo Yocepu nî, "Ngò na in îrangò?" **16** Èn ôgamò nî, "An arangò utmegona. In îrômò kobo nîna kanya gin kwaò kwath iê?" **17** Êcwò nòn ôgamò nîné nî, "Gîn dong ôya ôkò kî kany. An awinyo ka gin kobo nî, 'Eru êcidh unu yo Dotan.'" Yocepu ôcakò lûbò kôrgî cê onwongogî na cwòk kî Dotan. **18** Èntò i karê na utmego mërë ônenò èn kî kanya bobor, gin ôcakò yûbò kôp më neko èn ôkò. **19** Cê ôtwak i kin-gî kên-gî nî, "Won lek êca tye ka bino! **20** Bin unu enek èn ôkò êk ebol i bur mörò acêl kany, êk ekob nî lee mörò na ger èné omwodo. Cê dong ebino nënò kite na lek mërë gîni bino cobere kôdê." **21** Î karê na Reuben owinyo kôp ni, èn ôtémò më larò Yocepu ôkò kî i cing-gî nakun kobo nîgî nî, "Eru kûr enek èn. **22** Kûr îony unu remo mörò. Eru ebol èn i bur mörò kany i thim, èntò kûr eketh cing onu i kome." Reuben okobo kôp ni piën èn onwongo ôyûbèrë më kwanyò èn ôkò kî ôd bur êk êdwòk èn cen both apap mërë. **23** Î karê na Yocepu othuno both utmego mërë, gin ôgönyò böngü mërë na èn oruko n'onwongo bor êka badê onwongo boco. **24** Gîn ômakò èn cê obolo gîni i bur. Î bur onwongo tye nono, pii onwongo ope iê. **25** Cê gin ôcakò bedo pîny më cem, i karê na gin ônenò gurup ka jò Icmael

n'ôya gîni kî i Gilead. Kinagagî onwongo ôyèò odok, mörò na kur êka mûra nakun tye ka cîdhò gîni yo Ejip. **26** Yuda ôcakò kobo both utmego mërë nî, "Ngò na onu ebino nwongo ka eneko ômin onu êka êmüngò thöò mërë ôkò? **27** Bin, êk êcadh unu èn ôkò both jò Icmael, êk kûr eketh cing onu i kome, piën èn obedo ômin onu, kom onu kikokome." Utmego mërë oyeo. **28** Cê i karê n'êcadh wîl më Midian owok gîni na cwòk, utmego mërë ôywaò Yocepu ôkò kî ôd bur êka ôcadhò gîni èn ôkò both jò Icmael pî cêkêl më ryal pyer arîò cê jò më Icmael otero Yocepu naka yo Ejip. **29** Î karê na Reuben odwogo cen i bur êka onwongo Yocepu ope iê, èn ôyècò böng mërë ôkò kî i kome pî cwer cwiny. **30** Èn ôdök cen both utmego mërë êka okobo nî, "Awobi ni ope kunön! Ngò na an abino timò kobedini?" **31** Cê gin ôkwanyò böngü ka Yocepu êka ôngénò gîni kî remo ka dyêl na gin oneko. **32** Otero gîni both apapgi êka okobo gîni nî, "Wan enwongo böngü ni. Nèn ka obedo böngü ka wodi onyo pe." **33** Î karê na èn ônenò, okobo nî, "Man böngü k'athîn na kikokome. Lee na ger omwodo èn. Adyer lee ôkidhò Yocepu na thithinò." **34** Cê Jakob ôcakò yècò böng mërë ôkò kî i kome êka otweo böng cöla i pyèrë, cê okoko wode pî karê na lac. **35** Awope êka anyira mërë kîbêc obino gîni më kweo cwinye, èntò èn ôkwèrò ôkò nî kûr ekwe cwinye. Nakun kobo nî, "Pe, ba obedo nî kômanön. An abino lûbò kôr athîn-na kî koko naka thon i bur." Apap mërë obedo koko èn kômanön. (Sheol h7585) **36** Jò Midian otero gîni Yocepu yo Ejip êka ôcadhò gîni èn both Potipa n'obedo adit etic ka Parao nakun èné lôô acikari kîbêc na kûrò pîny.

38 Î karê nën, Yuda ôya ôkò kî both utmego mërë êka ôcidhò më bedo both êcwò mörò më Adulam na nyingê Kira. **2** Kî kunön, Yuda ônenò nyaka Cua dhanò më Kanaan, cê ônyömò êka obedo kôdê. **3** Dhakò nòn obino ôyac êka ônywölò wode cê ôcakò nyingê Er. **4** Èn dôkî ôyac êka ônywölò wode cê ôcakò nyingê Onan. **5** Èn obino ôyac dôkî êka ônywölò wode nòkèné cê ôcakò nyingê Cela. Gîn onwongo bedo i Kejib i karê na èn nywölò Cela. **6** Yuda obino onwongo dhakò na nyingê Tamar, cê ônyömò nî kaò mërë Er. **7** Èntò Er kaò ka Yuda, kwò mërë onwongo rac kî i wang Rwoth, cê Rwoth obino oneko èn ôkò. **8** Cê Yuda okobo both Onan ômin Er nî, "Cîdh iter dhakò k'omeru êka icob ticni na calò ômin cwörë, êk înywöl èthinò ka wi omeru." **9** Èntò Onan ongeò nî èthinò ba bino bedo mëgê, cê i karê na èn bedo kî dhakò k'ômin mërë, èn wèkò remo mërë ôny ôkò pîny më jûkò êk kûr ênywöl èthinò ka

wi ömîn mërë. 10 Gin na ên ötimö onwongo rac kî i wang Rwoth, cê ömiö Rwoth oneko ên ökö thon. 11 Ĩ karë na ên dong öthöö, Yuda okobo both Tamar, dhakö ka wode nî, "Cidh ibed i öt k'apapni na calö dhakö na cwörë öthöö naka ka woda Cela ödöngö." Ĕn okobo nî kômanön piën ên onwongo tye kî lworo nî Cela thon bino thöö ökö kamë utmego mërë. Cê Tamar ödök yo pacögi më bedo i öt k'apap mërë. 12 Kinge karë mörö, dhakö ka Yuda n'obedo nyaka Cua öthöö. Ĩ karë na Yuda otyeko nîñö më kumo pî dhakö mërë ëka cwinye dong okwe, ên öcakö yaa më cidhö yo Timna both cwö mörö n'onwongo nyarö yer rom mërë. Ĕn owotho kanya acël k'okone mërë Kira dhanö më Adulam. 13 Cê ekobo both Tamar nî, "Kwaröni tye ka cidhö yo Timna më nyarö yer rom mërë." 14 Tamar ögönyö böng mërë më cöla ökö, oumo wangë k'atam ëk ömîi kür enge ên, ëka öcidhö obedo pîny i nget dhö wangkac na cidhö yo Enaim, na tye i yoo na cidhö yo Timna. Piën ên ongeö nî Cela dong ödöngö ökö ëntö ba ëmiö ölakö ên calö dhakö mërë. 15 Ĩ karë na Yuda öñënë ên i nget yoo, ên öthamö nî ködë obedo ölaya mörö, piën onwongo oumo wangë ökö kî böngü. 16 Yuda ba ongeö nî dhakö ka wode ënön cê öcidhö bothe i nget yoo ëka okobo nîñë nî, "Wëk abed kodi." Tamar openyo ên nî, "Ngö na in ibino miöna ka an abedo kodi?" 17 Yuda ögamö nî, "An abino oro nini athîn dyël kî i kin dyegina." Tamar döki openyo ên nî, "Ngö na in ibino jengo pî tutunu naka ka ioro athîn dyël?" 18 Yuda ögamö nî, "Ngö na in imîttö nî ajeng nini?" Ĕn ögamö nî, "Mîa agith na nyingi tye ië kî thöl mërë, ëka lüth na in imakö i cingi." Yuda ömiögi bothe cê ên obedo ködë ëka Tamar öyac ökö ködë. 19 Kinge manön, Tamar ödök cen pacö, ökwanyö böng nön ökö kî i kome, ëka öcakö ruko böng cöla më dha thöö. 20 Yuda öcidhö ëka ooro okone mërë Kira dhanö më Adulam k'athîn dyël, ëk okel cê ögam jami mërë na ên ejengo both dhakö, ëntö Kira ba obino onwongo ên. 21 Cê ên openyo cwö mörö n'onwongo bedo ginî kany nön nî, "An atwërö nwongo ölaya mörö n'onwongo bedo i nget yoo na cidhö yo Enaim kwene?" Gin ögamö nî, "Ölaya mörö ope na bedo kany." 22 Ĕn ödök cen both Yuda ëka okobo nî, "An ba anwongo ên, ëka cwö na bedo kany nön okobo nîna nî, 'Ölaya mörö ope kany.'" 23 Cê Yuda okobo nî, "Ëk ên dong ögwök ngö na ên tye ködë, onyo onu ebino dökö gin më anyëra. Ka kômanön, an aoro nîñë athîn dyël ëntö ba inwongo ên." 24 Kinge dwethe adek, ekobo both Yuda nî, "Cii wodi Tamar obedo tic calö ölaya, ëka öyac ökö." Yuda ömiö twërö nî, "Kel unu ên yökö ëka iwang unu ên naka i thööl!" 25 Ĕntö i caa n'etye ka

kelo ên yökö, ên ooro köp both kwarö mërë Yuda nî, "An ayac k'ëcwö won jami nî. Nën ka irömö ngeo won agith, thöl ëka lüth nî?" 26 Yuda ongeö ëka okobo nî, "Ĕn obedo dhanö na kite atir na löa ökö, piën an ba amiö woda Cela më nyömö ên." Kinge manön, Yuda ba döki obedo ködë. 27 Ĩ karë na nîñö më nywöl ka Tamar örömö, ebino enwongo nî ên bino nywölö rudi. 28 Ĩ caa na ên tye ka nywöl, athîn acël okelo cingë yökö, cê acöl mon ökwanyö thöl na kwar cê otweo i ngut cing athîn ëka okobo nî, "Man ênë öcakö bino." 29 Ĕntö i caa na ên ödwökö cingë ökö, ömîn mërë odonyo ëka dhakö na cölö Tamar okobo nî, "Man ênë kite na in idonyo ködë yökö!" Ĕka ëcakö nyingë Perej. 30 Cê ömîn mërë dong ënywölö kî i nge na thöl na kwar tye i ngut cingë, cê ëcakö nyingë nî Jera.

39 Ĩ karë n'etero Yocepu yo Ejip, Potipa, dhanö më Ejip n'onwongo obedo adit etic ka Parao na löö wi acikari na kürö pîny, öwölö Yocepu kî both jö Icimael n'otero ên kunön. 2 Rwoth onwongo tye kî Yocepu ëka ömiö jami kibëc na ên timö wotho na bër. Ĕn onwongo bedo i öt k'adwong mërë n'obedo dhanö më Ejip. 3 Ĩ karë n'adwong mërë öñënë nî Rwoth tye kî Yocepu, ëka Rwoth ömiö jami kibëc na ên timö wotho na bër, 4 ên obedo kî cwin na bër rwök i kom Yocepu nakun ketho ên më bedo atic mërë, ëka ömiö ên më löönö ödë ëka jami kibëc na ên tye ködë. 5 Cakërë i karë na ên oketho Yocepu më löönö ödë ëka jami kibëc na ên tye ködë, Rwoth ömiö gum i öt ka Potipa pî Yocepu. Gum ka Rwoth onwongo tye i kom jami kibëc na Potipa onwongo ut ködë, kî i öt ëka kî i pwothi thon. 6 Manön ömiö Potipa öwëkö jami mërë kibëc na ên tye ködë i thë twërö ka Yocepu. Bedo ka Yocepu i ödë ömiö ên ba döki parö gin mörö këkën na path kî cem na ên camö. Yocepu onwongo ödöngö na bër ëka leng rwök. 7 Kinge karë mörö, dhakö k'adwong mërë öñirö Yocepu cê okobo nîñë nî, "Bin ibed köda!" 8 Ĕntö Yocepu ökwërö ökö nakun kobo nî, "Nën, bedona kany ömiö adwongna ba döki parö pî gin mörö këkën na tye i ödë, ëka thon ên dong ogena kî jami mërë kibëc na ên tye ködë. 9 Ngat mörö ope na dit kî i öt ni na löa. Adwongna ömîa twërö i kom jami kibëc na ên tye ködë na path kî in këkën, piën in ibedo dhakö mërë. An döki arömö timö thwön gin na rac kôman ëka abalö i nyim Obanga?" 10 Kono kadî dhakö nön obedo ka diö ên nîñö kî nîñö, Yocepu obino ökwërö cidhö ködë ökö i wi ka buto ëka thon më bedo ködë kanya acël. 11 Ĩ nîñö mörö acël, n'etic më öt kibëc onwongo ope ginî i öt, Yocepu öcidhö i öt më tio tic mërë. 12 Cê dhakö ka Potipa ömakö böngü mërë nakun kobo nî, "Bin ibed

kōda!" Ēntō Yocepu ōmwōmērē yōkō nakun wēkō bōngū mērē dong ī cingē. 13 Ī caa na ēn ōnēnō nī Yocepu ōmwōmērē yōkō nakun wēkō bōngū mērē dong ī cingē, 14 ēn ocwodo etic na tio ī ōdē ēka okobo nīgī nī, "Nēn cwōra okelo dhanō mē lburu kany mē nywarō onu! Ēn odonyo ī ōt kany mē bedo kōda tētēk, ēntō an aredo rwōk. 15 Cē na ēn owinyo nī an aredo rwōk, ēn ōmwōmērē yōkō nakun wēkō bōngū mērē botha." 16 Ēn ōgwōkō bōngū ka Yocepu bothe naka adwong mērē obino pacō. 17 Cē ēn okobo gin n'ōtīmērē nōn both cwōrē nī, "Opīi mē lburu na in ikelo kany obino ī ōda ēka ōtēmō mē nywarōna. 18 Ēntō ī caa na an aredo rwōk, ēn ōmwōmērē yōkō ēka ōwēkō bōngū mērē botha." 19 Ī karē n'adwong ka Yocepu owinyo ngō na dhakō mērē okobo nīnē, nakun kobo nī, "Man ēnē kite n'opiini ōtīma kōdē," ēn ōngō rwōk. 20 Cē ōmakō Yocepu otero ī buc kanya etweo emabuc ka rwoth iē. Ēntō ī karē na Yocepu tye ī buc kunōn, 21 Rwoth onwongo tye kōdē, onyutho kīca mērē bothe ēka ōmiō ēn obedo kī cwiny na bēr ī nyim ngat na lōō buc. 22 Ngat na lōō buc oketho Yocepu mē bedo adit na lōō emabuc kibēc ēka kī jami kibēc n'ētīmō ī buc. 23 Ngat na lōō buc onwongo ba dōkī parō pī gin mōrō kēkēn na tye ī thē gwōk ka Yocepu, piēn Rwoth onwongo tye kī Yocepu ēka ōmiō jami kibēc na ēn tīmō wotho na bēr.

40 Kinge karē mōrō, adit na lōō poko kōngō ōlōk ēka adit na lōō tēdo ogati ka rwoth mē Ejip ōtīmō gīnī bal both adwong-gī n'obedo rwoth mē Ejip. 2 Parao onwongo ōngō ī kom edite tic mērē arīō, adit na lōō poko kōngō ōlōk, ēka adit na lōō tēdo ogati, 3 cē oterogī ī buc ī ōt k'adit na kūrō pīny, kanya Yocepu onwongo etweo iē. 4 Adit na lōō acikari na kūrō pīny ōmiōgī both Yocepu cē ēn ōgwōkōgī. Kinge na gīn dong obedo ī buc pī karē mōrō, 5 ngat acēlacēl—adit na lōō poko kōngō ōlōk ēka adit na lōō tēdo ogati ka rwoth mē Ejip n'onwongo etweogī ī buc—oleko lek mērē ī kiwor acēl nōn, nakun kōr lek ka ngat acēlacēl path. 6 Ī karē na Yocepu obino bothgī kodiko mērē, ēn ōnēnōgī na cwinygī ba yom. 7 Cē ēn openyo edite tic ka Parao n'onwongo etweogī ī buc kōdē ī ōt k'adwong mērē nī, "Pīngō cwinywu tin ba yom?" 8 Gin ōgamō nī, "Wan kibēc tin eleko lek, ēntō ngat mōrō ope na rōmō gōnyō nīwa thērē." Yocepu okobo nīgī nī, "Pathī Obanga ēnē gōnyō kōr lek? Kob nīna unu lekwu." 9 Adit na lōō poko kōngō ōlōk ōcakō kobo lek mērē both Yocepu nakun kobo nī, "Ī lekna, an anēnō yath ōlōk ī nyima, 10 ēka ī kom yath onwongo tye iē jangē adek, cūcūth na pod odhugo mē cakō thuro, cē ōnyakō nyige ēka ōcēk ōkō. 11 Okopo ka

Parao onwongo tye ī cīnga, cē apūdō nyig ōlōk ēka abīō ī okopo ka Parao cē amīō ī cīngē." 12 Yocepu okobo nīnē nī, "Lek nonu ene, jang ōlōk adek nyutho nīnō adek. 13 Ī kin nīnō adek, Parao bino gōnyōni ēka bino dwōkōnī ī dhō ticni cē in ibino miō ēn okopo ī cīngē, kite na yam iitīmō kōdē cōn ī karē na in ibedo adit na lōō poko kōngō ōlōk mērē. 14 Ēntō myero ipo pīra ka jami kibēc bino woth na bēr kodi, akwai nī in thon iitīm nīna kīca ēka iitham pīra, ēk ikob both Parao kōp ī koma ēk ēn thon ōgōnya ōkō kī ī ōd buc nī. 15 Piēn an ēkwala akwala tētēk kī both jō lburu ēka thon etwea ī buc kany nono na ba abalō gin mōrō." 16 Ī caa n'adit na lōō tēdo ogati ōnēnō nī ēgōnyō lek k'awodhe na bēr, ēn thon okobo both Yocepu megē nī, "An thon aleko lek nī onwongo adoko aditi adek mē ogati ī wia. 17 Ī adita na malō onwongo tye iē kwa ogati na papath pī Parao, ēntō wīny onwongo tye ka camō ogati kī ī adita na an ayēō ī wia." 18 Yocepu ōgamō nī, "Lekni nōn thērē ene: Aditi adek nyutho nīnō adek thon. 19 Ī kin nīnō adek Parao bino gōnyōni ōkō ēka nguno nguti cē ngabō komi ī wi yath ēka wīny bino camō ringo komi ōkō." 20 Ī nīnō mē adek onwongo obedo nīnō na yam ēnywōlō Parao iē, ēka ēn ōyūbō karama pī edite mērē kibēc. Ēn ōcakō kelo adit na lōō poko kōngō ōlōk ēka adit na lōō tēdo ogati ī nyim edite mērē. 21 Ēn ōdwōkō adit na lōō poko kōngō ōlōk ī tic mērē, ēk ēn dōkī ōmēdērē kī miō okopo ī cīng Parao, 22 ēntō ēn ōngabō adit na lōō tēdo ogati kite na Yocepu ōgōnyō kī lek mērē. 23 Adit na lōō poko kōngō ōlōk ba dōkī opo pī Yocepu; wie obino owil ōkō ī kome.

41 Kinge mwaka arīō, Parao rwoth mē Ejip oleko lek nī ēn onwongo ecung ī lak kulo mē Nail. 2 Cē dhok abīrō n'oluk ēka n'ōcwēē odonyo gīni yōkō kī ī kulo ēka ōcakō gīni camō lum. 3 Cē dhok abīrō nōkēnē n'ōlūbō kōrgī odonyo kī ī kulo mē Nail na komgī rarac ēka omogere obino ocung gīnī ī nget dhok n'onwongo tye ī lak kulo. 4 Cē dhok n'onwongo rarac ēka omogere ōcamō dhok abīrō n'oluk ēka n'ōcwēē ōkō. Cē Parao ōcakō coo ōkō kī ī wang nīnō. 5 Ēn dōkī ōnīnō cē oleko lek mē arīō mērē. Oleko nī ēnēnō wī kal abīrō na komgī yot ēka bēr, ōcēk nakun tye ka dōngō ī kom tyēn kal acēl. 6 Kinge manōn, wī kal abīrō nōkēnē n'oner ōdōngō na rarac ēka yamō na lyeth mē oro onerogī ōkō. 7 Cē wī kal abīrō na rarac ōcakō mwōnyō wī kal na bēcō ōkō. Parao ocoo kī ī wang nīnō cē onwongo nī eleko lek dōkī. 8 Kodiko na pīny dong oru, cwinye onwongo ba yom, cē ōmiō ēn ooro kōp mē cwodo ajwogi ēka ēryēkō kibēc mē Ejip. Parao ōcakō kobo nīgī lek mērē, ēntō ngat mōrō

ope n'onwongo twërö gönyö ninê lek nön. 9 Cê adit na löö poko kõngö ölok okobo both Parao nî, "An tin dong apo i kom balna. 10 I karê n'onwongo Parao cwinye öwang i kom etic mërê, cê otweowa k'adit na löö tedo ogati i öt k'adwong na löö kürö pîny. 11 Cê i ninö mörö acêl wan kibêc ebino eleko lek i kiwor acêl, êka lek acêlacêl onwongo tyên köp mërê papath. 12 Awobi mörö më lburu onwongo tye ködwa i buc. Ên onwongo obedo atic k'adit na kürö pîny. Wan ebino ekobo ninê lekwa êka ên obino ögönyö niwa, nakun gönyö lek ka ngat acêlacêl n'opore kî lek mërê. 13 Êka kite na ên ögönyö kî lekwa, obino ocobere kômanön. An ebino êdwôka i dhö ticna, êka adit na löö tedo ogati ebino êngabö kome i wi yath." 14 Parao öcakö oro më cwodo Yocepu, cê ekelo ên piöpiö kî i buc. Êmiö ölyêlô wie, ölökö böng mërê êka obino i nyim Parao. 15 Parao okobo both Yocepu nî, "An aleko lek êka ngat mörö ope na twërö gönyö tyên köp mërê. Êntö an awinyo köp i komi nî in ka iwinyo lek itwërö gönyö tyên köp mërê." 16 Yocepu ögamö dhö Parao nî, "Pathî an, êntö Obanga bino miö Parao agam na yomo cwinye." 17 Cê Parao okobo both Yocepu nî, "I lekna, an onwongo acung i lak kulo më Nail, 18 êka dhok abirö n'öcwêê na komgî oluk odonyo kî i kulo êka öcakö gîni camö lum. 19 Kî kõrgî, dhok abirö nökênê dôkî odonyo kî i kulo na komgî rarac, êka n'omogere rwök. Koth dhok na rarac nön anaka yam bara anênö i lobo më Ejip. 20 Dhok n'onwongo omogere na komgî rarac, öcakö camö dhok abirö n'öcakö donyo n'öcwêê na komgî oluk. 21 Êntö kadî kinge na gin dong öcamö dhok n'öcwêê nön, gin mörö ope na nyutho nî gin öcamö dhok n'öcwêê nön ökö, piên onwongo gin pod omogere êka komgî rarac calö kite n'onwongo gin tye ködê cön. Na dong atyeko lek nön, cê acoo ökö kî i wang ninö. 22 "An thon anênö wi kal abirö n'öddöngö i tyên kal acêl n'öcêk na bër. 23 Kî kõrgî, anênö wi kal abirö na reco, n'önwêng na yamö na lyeth më oro onero. 24 Wi kal n'önwêng ömwönyö wi kal abirö na bécö ökö. Akobo lek ni both ajwogi, êntö ngat mörö onwongo ope na twërö gönyö tyên köp mërê nîna." 25 Cê Yocepu okobo both Parao nî, "Lek ka Parao tye acêl kékên. Obanga onyutho both Parao gin na ên cwök timö. 26 Dhok abirö na bécö nyutho mwaka abirö êka wi kal abirö na bécö nyutho thon mwaka abirö. Lek nön tyên köp mërê tye acêl kékên. 27 Dhok abirö n'omogere na komgî rarac n'obino kî kõrgî, êka wi kal abirö na yamö na lyeth më oro onero nyutho mwaka abirö më kec. 28 "Obedo kite na an akobo both Parao: Obanga otyeko nyutho both Parao ngö na ên êcwök timö. 29 Pî mwaka abirö, cem bino

cêk na büp i lobo Ejip kibêc. 30 Êntö kinge manön, mwaka abirö nökênê bino lübö na kec bino bedo na tye iê, wi jîi bino wil ökö i kom cem na yam öcêk nîgi i Ejip. Êka kec nön bino balö lobo rwök. 31 Cem na büp n'onwongo öcêk i lobo ba dôkî ebino po iê, piên kec na bino lübö manön bino bedo na rac rwök. 32 Lek ka Parao na ên oleko arîö nön nyutho nî Obanga ênê omoko köp nön êka Obanga bino miö cobere i karê na cwöcwök. 33 "Dong pî manön, Parao myero örang dhanö mörö na ryêk na niang êk oketh ölöö lobo Ejip kibêc. 34 Parao myero oketh edita na löö lobo, êk gin öcök acêl më abic më cem na bino cêk i lobo Ejip pî mwaka abirö na cem bino cêk na büp. 35 Myero gin öcök cem kibêc i mwaka na cem bino cêk iê na büp, êk êgwök i dere më kanö cem na tye i thê löc ka Parao. 36 Cem nön ebino gwökö pî loboni, më kürö mwaka abirö na kec bino podho i Ejip, êk kür kec onek jö më lobo ni ökö." 37 Parao êka edita mërê kibêc önênö nî thama ni bër. 38 Parao okobo both etic mërê nî, "Êtwërö nwongo dhanö nökênê na cal kî dhanö ni, na tye kî cwiny k'Obanga?" 39 Cê Parao okobo both Yocepu nî, "Kite na dong Obanga onyutho köp ni kibêc bothi, ngat mörö ope na ryêk êka na wie tio calö in. 40 In ênê ibino löönö öda êka jöga kibêc bino bedo i thê löcni. An abino löönöni pî then na an atye iê kékên." 41 Parao okobo both Yocepu nî, "An kobedini dong akethi më bedo alöc më Ejip kibêc." 42 Cê Parao öwödhö agîth mërê n'eketho anyuth iê kî i nya cîngê êka örepö i nya cîng Yocepu. Ên thon oruko Yocepu kî böng na mîmîla na bécö êka ömiö oruko nyör n'ëyübö kî gol i ngute. 43 Parao ömiö Yocepu öngwêcö kî gadigadi na calö alübkörê më arîö kî löc, nakun jîi kibêc wöô kî redo i nyime nî, "Rum cöngwu pînyl!" Manön ênê kite n'eketho kî Yocepu më bedo alöc më lobo Ejip kibêc. 44 Cê Parao okobo both Yocepu nî, "An Parao, dhanö mörö ope na bino tingo cîngê onyo tyênê i lobo Ejip kibêc abonge twëröni." 45 Parao ömiö nyîng both Yocepu nî Japenat Panea êka ömiö ên önyömö Acenat nyaka Potipera, n'onwongo obedo alamdhök më On, më bedo dhakö mërê. Cê Yocepu öcakö wowotha më rimo lobo Ejip kibêc. 46 Yocepu onwongo dong tye kî mwaka pyer adek i karê na ên dönyö i tic ka Parao rwoth më Ejip. Êka Yocepu öya ökö kî i nyim Parao cê öcakö wowotha i lobo më Ejip kibêc. 47 I mwaka abirö, cem obino öcêk na büp rwök. 48 Yocepu öcökö cem n'öcêk i lobo Ejip pî mwaka abirö nonu cê ökanö i dêrö më kanö cem na tye i kabedo kibêc i peci. I pacö acêlacêl, ên oketho cem n'öya kî i pwothi kibêc n'ögürö kany nön. 49 Yocepu ökanö cem na büp rwök i dere më kanö cem, naka onwongo dong cal kî kwo

na tye i dhō nam, cē ōmiō ēn ōwēkō pimo ōkō piēn onwongo dwong rwōk na ba rōmō pimere. 50 Na mwaka mē kec bara othuno, Yocepu onwongo dong tye k'ēthinō awope arīō n'Acenat nyaka Potipera, alamdhōk mē On, ōnywōlō. 51 Yocepu ōcakō nying kaō mērē Manace nakun kobo nī, "Piēn Obanga ōmiō wia owil ōkō kī i can-na ēka kī i ōt k'apapna kibēc." 52 Athin mē arīō ēn ōcakō nyingē Epraim, nakun kobo nī, "Piēn Obanga ōmīa anywōl i lobo na an anēnō can iē." 53 I karē na mwaka abirō mē cem na būp dong ojik i lobo Ejip, 54 cē mwaka abirō mē kec ōcakērē, kite na Yocepu yam okobo kōdē. Kec onwongo ōmakō lobo kibēc, ēntō i lobo mē Ejip kibēc cem onwongo tye iē. 55 I karē na dong cem othum ōkō kī i lobo Ejip kibēc, jīi ōcakō koko both Parao pi cem. Cē Parao okobo both jō mē Ejip kibēc nī, "Cidh unu both Yocepu ēk iitim unu ngō na ēn bino kobo niwu." 56 I karē na kec onwongo ōrōmō lobo kibēc, Yocepu ōyabō dere mē kanō cem ēka ōcakō cadhō cem both jō mē Ejip, piēn kec onwongo dong tye na rac i lobo Ejip kibēc. 57 Jō mē lobo nōkēnē thon obino ginī yo Ejip mē wilō cem kī both Yocepu piēn kec onwongo dong tye na rac rwōk i wi lobo thūkūl.

42 I karē na Jakob owinyo nī cem tye i Ejip, ēn okobo both awope mērē nī, "Pingō inēnērē unu anēna kenwu?" 2 Cē ēn okobo nī, "An awinyo nī cem tye i Ejip. Cidh unu yo kunōn ēk iwīl unu cem mōrō pi onu ēk ēkwō ēka kūr ēthōō." 3 Cē utmego ka Yocepu apar ōcidhō ginī yo Ejip mē wilō cem. 4 Ēntō Jakob ba ooro Benjamin ōmīn Yocepu kōdgī, piēn ēn onwongo tye kī lworo nī onyo gin mōrō na rac rōmō timērē i kome. 5 Cē awope ka Jakob onwongo tye i kin jō n'ōcidhō ginī wilō cem, piēn kec onwongo thon tye i lobo mē Kanaan. 6 Yocepu onwongo dong obedo alōc mē lobo Ejip ēka ēnē onwongo cadhō cem both jōgē. Cē i karē na utmego mērē othuno, gin oryebere ginī piny i nyime na terinyimgī gudo ngōm. 7 I karē na Yocepu ōnēnō utmego mērē, ēn ongeogī ēntō ōtimō na calō ēn ebēdo arok ēka ōtwak kōdgī kī gero nakun penyogī nī, "Un iya kī kwene?" Gin ōgamō nī, "Wan ēya kī i lobo Kanaan mē bino wilō cem." 8 Utmego ka Yocepu ba ongeogī ginī ēn, ēntō Yocepu ongeogī. 9 Cē ēn opo i lek mērē i komgī ēka okobo nigī nī, "Un ibēdo ērōth piny! Un ibino unu mē nēnō kanya ba etye ka gwōkō kī i lobowa." 10 Gin ōgamō nī, "Pe, adwongna, eticni obino mē wilō cem. 11 Wan kibēc ebēdo awope ka dhanō acēl. Eticni obēdo jō na genere, pathī ērōth piny." 12 Yocepu okobo nigī nī, "Pe, Un ibino unu mē nēnō kanya ba etye ka gwōkō kī i lobowa." 13 Ēntō gin ōgamō nī,

"Eticni onwongo tye utmego apar arīō, awope ka dhanō acēl, na bedo i lobo mē Kanaan. Athin na tidi odong both apapwa, ēka acēl dong ope." 14 Yocepu okobo nigī nī, "Obēdo kite na an akobo niwu kōdē: Un ibēdo ērōth piny! 15 Ēka man ēnē kite n'ebino tēmōwu kōdē: An akwongara kī nying Parao, un ba ibino wēkō kany naka ka wang n'ōmīnwu na tidi obino kany. 16 Or unu ngat acēl ōcidh ōdm ōmīnwu, un jō kibēc ebino gwōkōwu i buc, ēk kōpwu ētēm mē nēnō ka ikobo unu kōp adyer. Cē ka ope, adyer ka Parao pod kwō, un ibēdo ērōth piny!" 17 Ēka ēn okethogī kibēc i buc pi nīnō adek. 18 I nīnō mē adek, Yocepu okobo nigī nī, "An abēdo ngat na lworo Obanga, tim unu kōman ēk ibed unu na kwō. 19 Ka un ibēdo jō na genere, wēk unu ōmīnwu acēl odong kany i buc ēk un kibēc iter unu cem pacō pi jōwu na kec tye ka nekogī. 20 Ēntō myero ikel unu ōmīnwu na tidi yo botha, ēka ēniang i kōpwu ēk ōmīi kūr iithōō unu." Cē gin ōtimō kite na ēn okobo kōdē. 21 Gin ōcakō twak i kin-gī kēn-gī nī, "Adyer onu etye ka nwongo pwod pi ōmīn onu. Onu ēnēnō pēkō n'onwongo ēn tye kōdē i caa na ēn dweko onu pi kwō mērē, ēntō onu ba ewinyo; ēnē ōmiō pwod nī tye ka bino i kom onu." 22 Reuben ōgamō nī, "An ba akobo niwu ni kūr iitim unu bal i kome? Ēntō un ba iwinyo! Kobedini dong onu myero ēcūl remo mērē." 23 Gin ba ongeogī nī Yocepu onwongo rōmō niang i kōpgī, piēn onwongo ēgōnyō kōp mērē agōnya. 24 Cē Yocepu ōya ōkō ōdōnyō yōkō kī bothgī ēka ōcakō koko, cē odwogo cen bothgī ēka dōk ōtwak kōdgī. Ēn ōmiō ēmakō Cimeon kī i kin-gī ēka etweo i nyimgī na gin nēnō. 25 Yocepu ōmiō twērō nī ēpik cem pong puku ka ngat acēlacēl, ēdwōk ciling ka ngat acēlacēl i puku mērē, ēka myero ēmīgī gin mōrō mē acama i yoo. Manōn kibēc ētimō nigī. 26 Gin otweo cem i nge kenegī ēka ōcakō ginī woth. 27 I karē na gin othuno kanya gin mītō buto iē, ngat acēl kī i kin-gī ōyabō wi puku ēk ēkwany cem nī kana mērē, ēn ōnēnō ciling mērē ut i puku i wi cem. 28 Cē okobo both utmego mērē nī, "Cilingna edwongo! Enene tye i pukuna." I caa na gin owinyo, cwingygi opodho rwōk nakun ngat acēlacēl lōkērē both awodhe na kome myēl amyēla nakun kobo nī, "Ngō ene n'Obanga tye ka timō i kom onu?" 29 I karē na gin othuno both apapgī Jakob i lobo mē Kanaan, gin okobo nīnē ngō n'ōtimērē kibēc i komgī nī, 30 "Ēcwō n'obēdo rwoth mē Ejip ōtwak kōdwa kī gero ēka oterowa na calō jō na tye ka rōthō piny. 31 Ēntō wan ekobo nīnē nī, 'Wan ebēdo jō na genere, wan ba ebēdo ērōth piny. 32 Onwongo wan etye utmego apar arīō, awope ka dhanō acēl. Acēl dong ope, ēka athin na tidi odong both apapwa i lobo mē

Kanaan.' 33 "Cē ēcwō n'obedo rwoth mē lobo nōn okobo niwa nī, 'Man ēnē kite na an abino ngeo ka onyo un ibedo jō na genere: Wēk ōmīnwu acēl odong botha kany, ēk iter unu cem mē kōnyō jō mē pacōwu na kec tye ka nekogī. 34 Ēntō kel unu ōmīnwu na tidi yo botha, ēk ōmīi an ange ka un ba ibedo ērōth piny ēntō jō na genere. Cē abino miō ōmīnwu cen bothwu, ēka un ibino woth ī lobo nī abonge ayela mōrō." 35 Ī karē na gīn ōnyō cem kī ī pukigī, ngat acēlacēl onwongo ocwe mērē mē cīling n'eketho ī puku mērē. Ī karē na gīn ēka apapgī ōnēnō ocwe kī cīling iē, lworo ōmakōgī. 36 Cē apapgī Jakob okobo nigī nī, "īmīa unu arwenyo ēthīnōna ōkō. Yocepu dong ope, Cimeon dong ope ēka kobedini dōkī imitō unu tero Benjamin. Man kibēc can mērē bino podho ī koma!" 37 Cē Reuben okobo both apap mērē nī, "Ibino neko ēthīnō awopena ariō ōkō ka ba adwongo ēn cen bothi kany. Wēk an agwōk ēn, ēka an abino dwongo ēn cen bothi." 38 Ēntō Jakob okobo nī, "Woda ba bino cīdhō kunōn kodwu, piēn ōmīn mērē dong ōthōō ōkō ēka ēn kēkēn ēnē dong odong. Ka gīn mōrō na rac bino timērē ī kome ī wothwu, cwer cwiny na un ibino miōna bino nekona ōkō." (Sheol h7585)

43 Kec onwongo pod tye na rac ī lobo Kanaan. 2 Ī karē na gīn otyeko camō cem n'onwongo ēwīlō kī ī Ejip ōkō, apapgī okobo nigī nī, "Dōk unu yo Ejip ēk iwīl unu cem mōrō niwa." 3 Ēntō Yuda okobo ninē nī, "Dhanō ca ōcīkōwa nī, 'Ba ibino unu nēnō wanga ka ōmīnwu ope ī kinwu.' 4 Ka onwongo īrōmō oro ōmīnwa kōdwa, wan ebino cīdhō mē wīlō cem nini. 5 Ēntō ka ba ioro ēn kōdwa, wan ba ebino cīdhō, piēn dhanō ca okobo niwa nī, 'Ba ibino unu nēnō wanga ka ōmīnwu ope ī kinwu.'" 6 Jakob ōgamō nī, "Pīngō ikelo unu pēkō nī ī koma mē kobo both dhanō nōn nī itye unu k'ōmīnwu nōkēnē?" 7 Gīn ōgamō nī, "Dhanō nōn openyowa peny na pol na makō komwa ēka kī jō mē pacōwa. Ēn openyowa nī, 'Apapwu pod kwō? Itye unu k'ōmīnwu nōkēnē?' Wan ēgamō peny mērē. Cē wan onwongo ētwērō ngeo nīngō ka ēn bino kobo nī, 'Kel unu ōmīnwu kany?'" 8 Cē Yuda okobo both apap mērē Icarael nī, "Or awobi nī kōda ēka wan ebino cīdhō ōkō pīōpīō, ēk wan, in ēka ēthīnōwa ebed na kwō ēk kūr ēthōō. 9 An kīkoma abino gwōkō ēn; in ibino makōna iē ka ba akelo ēn bothi ī nyimi kany. Cē bal mērē bino bedo ī wia ī karē mē kwōna kibēc. 10 Kite na tye kōdē, kono wan ba ēgalērē, kono wan dong ēcīdhō ēka edwogo wang kīrīō." 11 Cē apapgī Icarael okobo nigī nī, "Ka onwongo twērē, cē tīm unu kōman. Keth unu nyig yen mōkō na bēcō na un īyērō mē lobowa kany ī pukiwu, ēka iter unu

both dhanō nōn calō mīc. Ter unu mōō na kur na nōnōk ēka mōō kic na nōnōk, odok yath kī mūra ēka nyig yen mōkō n'ēcamō. 12 Ter unu thon cīling na rōmō wīlō wīl wang ariō, piēn myero idwōk unu cīling n'onwongo eketho ī wi pukiwu. Caa nōkēnē onwongo ba ōthēna gīnī athēna. 13 Ter unu ōmīnwu thon ēka īdōk unu pīōpīō both dhanō nōn. 14 Ēka wēk Obanga Won Twēr kibēc ōmīiwu kīca ī nyim dhanō nōn ēk ōwēk ōmīnwu nōkēnē ca ēka Benjamin odwog cen kodwu. Na calō kī botha, ka abino rwenyo ēthīnōna, cē wēk obed nī kōmanōn." 15 Gīn ōcakō yaa mē woth nakun nwongo tero gīnī mīc ēka cīling na rōmō wīl wang ariō, kanya acēl kī Benjamin. Ōcīdhō gīnī naka yo Ejip ēka ocung gīnī ī nyim Yocepu. 16 Ī karē na Yocepu ōnēnō Benjamin kanya acēl kī utmego mērē, ēn okobo both atic mērē na gwōkō ōdē nī, "Ter jō nī ī ōda, ngōl lee ēka īyūb cem, piēn gīn bino cem kōda tin kiceng." 17 Atic ōtīmō kite na Yocepu okobo ninē kōdē ēka oterogī ī ōt ka Yocepu. 18 Lworo ōmakō utmego mērē rwōk ī caa n'ekelogī ī ōt ka Yocepu. Gīn ōthamō nī, "Ekelo onu kany pī cīling n'onwongo eketho ī puki onu ī karē na onu ēcakō bino kany. Ēnē ōmīō ekelo onu ī ōt nī, ēk enwong kōp mōrō ī kom onu, ēmak onu ēk ebed opii mērē ēka ēma kene onu ōkō." 19 Cē gīn ōcīdhō naka both atic na gwōkō ōt ka Yocepu ēka ōtwak gīnī kōdē kī ī dholokek nī, 20 "Ōma adwong, wan ebino kany ī ninō mē acēl mē wīlō cem. 21 Ēntō ī kabedo na wan ēcīdhō ecung mē buto iē, ngat acēlacēl ōyabō puku mērē ēka onwongo wel cīling mērē kikokome ī wi puku mērē. Cē wan edwongo. 22 Wan thon ekelo cīling nōkēnē ī kom manōn mē wīlō cem. Wan ba engeo nga ēnē oketho cīlingwa ī pukiwa." 23 Atic ka Yocepu ōgamō nī, "Ayela ope, kūr ibed unu kī lworo. Obangawu, n'obedo Obanga k'apapwu, ēnē oketho cīlingwu ī pukiwu. An abino agamō cīlingwu." Cē ēn okelo Cimeon yōkō yo bothgī. 24 Atic na gwōkō ōt otero utmego ī ōt ka Yocepu, ōmīōgī pii mē lwōkō tyēn-gī ēka ōmīō kenegī cem. 25 Gīn ōyūbō mīcgī mē miō both Yocepu ka bino dwogo kiceng, piēn onwongo ekobo nigī nī gīn bino cem kanya acēl kōdē. 26 Ī karē na Yocepu obino pacō, gīn ōmīō ēn mīc na gīn okelo ēka oryebere gīnī pīny ī nyime. 27 Ēn openyogī kite na gīn tye kōdē ēka dōkī openyogī nī, "Apapwu na un ikobo nī otii tye nīngō? Ēn pod tye na kwō?" 28 Gīn ōgamō nī, "Aticni apapwa pod kwō ēka tye na bēr." Ēka gīn oryebere pīny mē nyutho wōrō bothe. 29 Ī karē na Yocepu ōnēnō ōmīn mērē Benjamin, wod ka aya mērē kikokome, cē openyo nī, "Man ēnē ōmīnwu na tidi na un ikobo nīna?" Cē ēn okobo nī, "Ēk Obanga omii gum, woda." 30 Yocepu

ödönyö yökö piöpiö, piën cwinye onwongo myël i kom ömîn mërë. Ën öcidhö örangö kany mörö na myero ekok ië. Cë ödönyö i öt kabuto mërë ëka okok ië. **31** Kinge ën ölwökö wangë, odonyo yökö ëka ödiö cwinye cë okobo ni, "Wëk epok cem." **32** Epoko cem i mëja mërë kënë, më utmego mërë i mëjagî kën-gî. Jö Ejip na cemo ködë thon i mëjagî kën-gî. Jö Ejip ba cemo kanya acël kî jö lburu piën manön obedo gin më kwer both jö Ejip. **33** Utmego mërë obedo i nyime na lübére kit n'ënywölögî ködë, cakërë kî both kaö naka both athîn na tidi; ëka ngat acëläcël obedo nënöd awodhe kî ur. **34** I karë n'epoko nigî cem kî i mëja ka Yocepu, epoko më ka Benjamin na kadhö më ka jö nökökë kibëc wang abic. Gin ocemo ëka omedho ginî abonge ayela mörö ködë.

44 Kinge na karama othum, Yocepu öcîkö atic mërë na gwökö ödë ni, "Pik cem opong puki ka jö nön na gin twërö tingo, ëka iketh ciling ka ngat acëläcël i dhö puku mërë. **2** Cë iketh ekopo ryalna i dhö puku k'awobi na tidi, kanya acël kî ciling më wilö cem mërë." Ën ötimö kite na Yocepu okobo ninë ködë. **3** Kodiko mërë na piny dong oru, ëmiögî öcidhö kî yorgî yökö kanya acël kî kenegî. **4** Gin onwongo bara öcidhö na bor kî i pacö i karë na Yocepu okobo both atic na gwökö jami mërë ni, "Lüb kör jö nön piöpiö, ëka ka imakögî, cë ikob bothgî ni, 'Pingö un icülö gin na bër kî gin na rac? **5** Pathî ekopo ni ënë adwongna modho ködë ëka thon tio ködë më thyeth? Un itimö gin na rac rwök.'" **6** I karë n'atic ka Yocepu ömakögî i yoo, ën önwö köp ni bothgî. **7** Gin okobo ninë ni, "Adwongwa, ngö n'ömiö in itwakö koth köp nön? Wan ebeto eticni myero kür ëtim koth tim na calö manön! **8** Nën, ciling na wan enwongo i dhö pukiwa, wan edwongo ökö bothi anaka kî i lobo Kanaan. Cë pingö wan myero ëkwal ryal onyo gol kî i öt k'adwongni? **9** Ka ebino nwongo tye both ngat mörö kî i kinwa, ëk ënë öthöö. Wan kibëc ebino bedo opii k'adwongni." **10** Ën ögamö ni, "Wëk unu obed ni kômanön kite na un ikobo ködë. Ngat n'ebino nwongo ekopo bothe ënë bino bedo opiina; jö nökökë ebino wëkögî cidhö." **11** Cë ngat acëläcël öcakö cibo puku mërë piny piöpiö ëka öyabö dhögë. **12** Cë atic ka Yocepu öcakö rangö i puki cakërë kî both ngat na dit naka both ngat na tidi. Ekopo ebino enwongo i puku ka Benjamin. **13** Utmego ka Yocepu öyëcö böng-gî pi cwer cwiny. Cë gin kibëc otweo yëcgî i nge kenegî ëka ödök ginî yo pacö. **14** I karë na Yuda ëka utmego mërë obino ginî i öt ka Yocepu, gin onwongo ën pod tye kany nön, cë opodho ginî piny oryebere i nyime. **15** Yocepu okobo bothgî ni, "Man ngö na un

onwongo itimö timö? Un ba ingeo unu ni dhanö na calö an twërö ngeo jami ni kî thyeth?" **16** Ëka Yuda okobo ni, "Onu ebino kobo ngö both adwongna? Ngö na onu ebino twakö? Onu ebino kwanyö bal kî kom onu ningö? Obanga otyeko nwongo bal i kom aticni. Wan dong ëdökö opii k'adwongna—onu ëka ngat n'enwongo okopo kî bothe." **17** Ëntö Yocepu okobo ni, "An ba atwërö timö ni kômanön! Ëntö ngat n'enwongo ekopo bothe, ënë bino bedo opiina. Un jö nökökë kibëc itwërö unu dök both apapwu kî kuc." **18** Cë Yuda öcidhö bothe ëka okobo ninë ni, "Akawai adwongna, ëk an atwak köp mörö kodi. Kür iwëk akëmoni obed na lyeth i koma, piën in iröm kî Parao kikokome. **19** Adwongna openyo etic mërë ni, 'Un itye k'apapwu, onyo ömînwu nökökë?' **20** Ëka wan ekobo both adwongna ni, 'Wan etye k'apapwa na dong otii ëka ömînwu na tidi n'ënywölö i karë n'apapwa onwongo dong otii ökö. Ömîn mërë öthöö ökö, ëka ën këkën ënë wod k'aya mërë n'odong, ëka apap mërë marö ën rwök.' **21** "Cë in ikobo both eticni ni, 'Kel unu botha, ëk anën ën kî wanga.' **22** Wan ekobo both adwongna ni, 'Awobi ni ba twërö wëkö apap mërë. Ka ën öwëkö; apap mërë bino thöö ökö.' **23** Ëntö in ikobo both eticni ni, 'Ka ömînwu na tidi ba owotho kodwu kanya acël, un ba ibino nënöd wanga dökî.' **24** I karë na wan ëdök yo both aticni, apapna, wan ebino ekobo ninë köp n'adwongna okobo. **25** "Cë apapwa okobo ni, 'Dök unu yo Ejip ëk iwîl unu cem mörö niwa.' **26** Ëntö wan ekobo ni, 'Wan ba ebino cidhö yo kunön. Ka ömînwu na tidi bino cidhö ködwa, cë wan ebino cidhö yo kunön, piën wan ba ebino nënöd wang dhanö ca, thwara ka ömînwu na tidi tye i kinwa.' **27** "Apapna okobo niwa ni, 'Un ingeo ni dhaköna önywölö ëthinö awope ariö. **28** Acël kî kin-gî öwëka ökö, cë an akobo ni, 'Adyer lee na ger ökidhö ën ökö na thithinö." An ba dök anënö ën na twal. **29** Ka ikwanyö unu man ökö kî botha, ëka gin na rac opodho i kome, cë cwer cwiny na un ibino miöna bino nekona ökö.' (Sheol h7585) **30** "Pi manön adwongna, an ba arömö dök both apapna abonge awobi ni. Kwö k'apapwa ocung i kom kwö k'awobi ni. **31** Ka ën önënö ni awobi ni ope i kinwa, cwer cwiny bino miö apapwa thöö ökö. (Sheol h7585) **32** Adwongna, an abino acikara both apapna ni an abino gwökö awobi ni. An akobo ninë ni, 'Ka an ba abino dwongo ën bothi, cë bal mërë bino dwogo i wia i nyim apapna i karë më kwöna kibëc.' **33** "Cë kobedini akwai ni itim bër iye aticni odong kany na calö opii k'adwongna nakaka awobi ni, ëk imîi awobi ni ödök pacö kanya acël kî utmego mërë. **34** An atwërö dök

both apapna ningō ka awobi ni ba owotho kōda? An ba amītō nēnō gin na rac ka podho ī kom apapna.”

45 Cē Yocepu ba dōk ōdiō cwinye ī nyim etic mērē kibēc n'onwongo ocung ī ngete, ēka oredo kī koko nī, “Mīī unu jō kibēc ōya ōcīdh gīnī ōkō kī botha!” Ngat mōrō onwongo ope both Yocepu ī karē na ēn nyuthere both utmego mērē. **2** Ēka ēn oredo kī koko rwōk naka jō mē Ejjip owinyo gīnī. Jō mē ōt ka Parao owinyo gīnī thon. **3** Yocepu okobo both utmego mērē nī, “An ēnē Yocepu! Apapna pod tye na kwō?” Ēntō utmego mērē onwongo ba twērō gīnī gamō kōp mērē, piēn onwongo tye gīnī kī lworo ī nyime. **4** Yocepu okobo both utmego mērē nī, “Bin unu na cwōk botha.” Cē gīn obino na cwōk bothe ēka okobo nīgī nī, “An ēnē ōmīnwu Yocepu, ngat na un yam īcadhō ī Ejjip! **5** Kūr dong ibed unu kī cwer cwiny, kūr īkēc unu ī komwu kenwu pī cadhōna kany, piēn Obanga ēnē yam oora kany ī nyimwu ēk alar kwō ka jīī. **6** Pī mwaka ariō n'opoth kēc onwongo tye ī lobo, ēka pī mwaka abic na tye ka bino, pur kī kac ba bino bedo na tye. **7** Ēntō Obanga oora ī nyimwu ēk agwōk jō na bino dong ī wi lobo, ēka mē larō kwōwu kī yoo mē aura nī. **8** “Pī manōn, pathī un ēnē iora unu kany, ēntō Obanga. Ēn ōmīō an adōkō amīī thama ka Parao, adwong na lōō ōdē kibēc ēka alōc mē Ejjip kibēc. **9** Kobedini dong dōk unu both apapna ēka ikob unu nīnē nī, ‘Man ēnē ngō na wodi Yocepu ōkōbō: Obanga ōmīō abedo ngat na lōō Ejjip kibēc. Bin botha kany; kūr iru. **10** In ibino bedo ī lobo Gocen, ēka ibino bedo na cwōk kōda—in, ēthīnōni ēka ēkwaēnī, romni ēka dhok, ēka jami kibēc na in itye kōdē. **11** An abino gwōkōnī kī kunōn piēn mwaka abic mē kec pod odong anyim, ēk in kī jō mē pacōni, ēka jō kibēc na tye bothi kūr onwong gīnī can.” **12** Cē Yocepu okobo nī, “In ēka ōmēra Benjamin itwērō unu nēnō kī wangwu nī an ēnē atye ka twak kodwu. **13** Myero un ikob both apapna wōrō kibēc n'eketho ī koma ī Ejjip ēka gin na kibēc na un īnēnō. Ēntō kel unu apapna kany pīōpīō.” **14** Cē ēn ōthūnō ngut ōmīn mērē Benjamin ēka okok. Benjamin thon ōthūnō ngute ēka ōcakō koko. **15** Cē Yocepu ōnōdhō lem utmego mērē kibēc nakun kok. Kinge manōn utmego mērē ōtwak kōdē. **16** Ī karē na kōp owinyere ī pacō ka Parao nī utmego ka Yocepu obino gīnī, Parao ēka etic mērē obedo gīnī kī yom cwiny rwōk. **17** Parao okobo both Yocepu nī, “Kob both utmegoni nī, ‘Tīm unu nī kōman: Twe unu yēc ī nge kenewu, ēka īdōk unu ī lobo Kanaan, **18** ēk ikel unu apapwu kī jōwu obin gīnī botha. An abino miōwu lobo na bēr rwōk na tye ī Ejjip ēka ibino unu camō cem na bēr na tye ī

lobo.’ **19** “In thon cikgī nī, ‘Tīm unu nī kōman: Ter unu gadigadi kī ī Ejjip pī ēthīnōwu ēka monwu, ēk ikel unu apapwu obin. **20** Kūr ipar unu pī jamiwu, piēn gin na bēcō kibēc mē lobo Ejjip bino bedo mewu.” **21** Awope ka Icarael ōtīmō gīnī kite na ēn okobo kōdē. Yocepu ōmīōgī gadigadi kite na Parao ōcīkō, ēka ōmīōgī jami na mītērē mē wothgī. **22** Ōmīō both ngat acēlacēl bōng na nyen mē aruka. Ēntō ōmīō Benjamin bōng na bēcō abic mē alōka ēka cēkēl mē ryal mia adek. **23** Ēn ooro n'apap mērē jami nī: Kene apar n'ōyēō gīnī jami na bēcō mē Ejjip, kene na mon apar n'ōyēō kal kī cem, ēka jami nōkēnē na mītērē pī woth k'apapgī. **24** Cē ēn ōmīō utmego mērē ōcīdhō. Na gīn dong tye ka yaa, ēn okobo nīgī nī, “Kūr ibed unu ka dha ī yoo.” **25** Cē gīn ōya ōkō kī ī Ejjip, cē odwogo gīnī ī lobo Kanaan both apapgī Jakob. **26** Gīn ōkōbō bothe nī, “Yocepu pod tye na kwō, ēka ēnē obedo alōc mē Ejjip kibēc.” Cē twak ōlōō Jakob ōkō piēn ba oye ngō na ēn owinyo. **27** Ēntō ī karē n'ekobo nīnē gin na kibēc na Yocepu okobo, ēka na ēn ōnēnō gadigadi gīnī na Yocepu ōmīō mē tingo ēn, cē tipo kom apapgī Jakob ōcakō dwogo. **28** Cē Jakob okobo nī, “Adyer an dong aye! Woda Yocepu pod tye na kwō. An abino cīdhō mē nēnō ēn na pod bara athōō.”

46 Cē Icarael ōcakō woth kī jami mērē kibēc. Ī karē na ēn othuno ī Beerceba, ēn ōmīō tyēr awanga both Obanga k'apap mērē Icaka. **2** Obanga ōtwak kī Icarael ī wang lek ī kiwor nakun kobo nī, “Jakob, Jakob!” Ēn ōgamō nī, “An enene!” **3** Obanga okobo nī, “An Obanga, Obanga k'apapni, kūr ilwor cīdhō yo Ejjip, piēn an abino mīōnī īdōkō rok na dit kī kunōn. **4** An abino cīdhō kodi naka ī Ejjip, ēka an abino dwōkōnī cen dōkī. Cē Yocepu bino ōnyō ngōm ī wīī.” **5** Cē Jakob ōcakō woth kī ī Beerceba, ēka awope mērē otero apapgī, ēthīnōgī ēka mon-gī ī gadigadi na Parao ooro mē tero ēn. **6** Gīn otero leenīgī kī jami na gīn onwongo kī ī lobo Kanaan. Jakob ēka ēthīnō mērē kibēc ōcīdhō gīnī yo Ejjip. **7** Ēn ōcīdhō ī Ejjip k'awope mērē ēka anyira mērē—k'ēkwaē mērē kibēc. **8** Man ēnē nying awope ka Icarael (Jakob ēka ēkwaē mērē) n'ōcīdhō gīnī yo Ejjip: Reuben athīn kaō ka Jakob. **9** Awope ka Reuben gīn ene: Kanok, Pallu, Kejeron ēka Karmi. **10** Awope ka Cimeon gīn ene: Jemuel, Jamin, Okad, Jakin, Jokar ēka Caul (n'obedo wod ka dhakō mē Kanaan). **11** Awope ka Lebi gīn ene: Gercon, Kokat ēka Merari. **12** Awope ka Yuda gīn ene: Er, Onan, Cela, Perej ēka Jera (ēntō Er ēka Onan obino ōthōō gīnī ōkō ī lobo Kanaan). Awope ka Perej gīn ene: Kejeron ēka Kamul. **13** Awope ka Icacar gīn ene: Tola, Puwa, Jacub ēka Cimron. **14**

Awope ka Jabulon gín ene: Cered, Elon éka Jaleel. 15 Man ènè onwongo awope ka Lea na èn ònywölö kí Jakob í Paddan Aram, kanya acél kí nyaré Dina. Awope éka anyira méré kibéc onwongo tye pyer adek wie adek. 16 Awope ka Gad gín ene: Jipon, Kagi, Cuni, Ejibon, Eri, Arodi éka Areli. 17 Awope ka Acer gín ene: Imna, Iciba, Icibi éka Beria. Amin-gí onwongo nyingé Cera. Awope ka Beria gín ene: Keber éka Malkiel. 18 Man ènè onwongo awope ka Jilpa na èn ònywölö kí Jakob, na Laban òmíö both nyaré Lea. Èn ònywölö èthinö apar abicél kibéc. 19 Awope ka Racel dhakö ka Jakob gín ene: Yocepu éka Benjamin. 20 Í lobo Ejip, Yocepu ònywölö Manace éka Epraim kí Acenat, nyaka Potipera alamdhök mé On. 21 Awope ka Benjamin gín ene: Bela, Beker, Acibel, Gera, Naaman, Eki, Roc, Mupim, Kupim éka Arud. 22 Man ènè awope apar angwén kibéc na Racel onwongo ònywölö kí Jakob. 23 Wod ka Dan ene: Kucim. 24 Awope ka Naputali gín ene: Jajeel, Guni, Jejer éka Cilem. 25 Man ènè onwongo awope ka Bila na Laban òmíö both nyaré Racel. Èn ònywölö kí Jakob èthinö abirö kibéc. 26 Jö kibéc n'òcidhö kí Jakob yo Ejip n'onwongo obedo ékwaé méré kikokome, na ba ékwanö mon k'awope méré, onwongo tye pyer abicél wie abicél. 27 Ka ékwanö awope ariö na Yocepu onwongo ònywölö í Ejip, wel jö mé öt ka Jakob n'òcidhö ginií yo Ejip onwongo tye pyer abirö kibéc. 28 Jakob ooro Yuda mé cidhö anyim niné both Yocepu ék onyuth niné yoo na cidhö yo Gocen. Í karé na gín othuno í lobo mé Gocen, 29 Yocepu onwongo óyübö gadigadi méré mé cidhö romo k'apap méré Icarael í Gocen. Í karé na Yocepu othuno bothe, èn òthünö ngut apar méré éka okok pí caa na lac. 30 Icarael okobo both Yocepu ní, "An dong atwëro thöö, piën dong anëno wangi éka aniang ní in pod ikwö." 31 Cè Yocepu okobo both utmego méré éka jö mé öt k'apap méré ní, "An abino cidhö both Parao ék akob niné ní, 'Utmegona éka jö mé öt k'apapna n'onwongo bedo ginií í lobo Kanaan obino ginií botha. 32 Jö ní obedo ginií ékwath éka gwökö ginií leeni. Gín okelo rom kí dyegi éka dhok kí gin na kibéc na gín tye ködë." 33 Ka Parao ocwodowu éka openyowu ní, "Tic ngö na un itio?" 34 Un myero ígam ní, "Wan eticni ebeto ékwath cakërë í karé mé thinowa thuno ködë naka tin, kite na kwerewa onwongo tímö ködë." Cè ebino yeo niwu mé bedo í lobo mé Gocen, piën ékwath kibéc obedo ginií gin mé kwer both jö mé Ejip."

47 Yocepu òcidhö éka okobo both Parao ní, "Apapna éka utmegona obino ginií kí í lobo mé

Kanaan kí rom kí dyegigí éka dhok kí jamigí kibéc na gín tye ködë. Kobedini dong gín tye í lobo mé Gocen." 2 Èn öyëro utmego méré abic éka onyuthogi both Parao. 3 Parao openyo utmego ka Yocepu ní, "Tic ngö na un itio?" Gín okobo both Parao ní, "Wan, eticni, ebeto ékwath kite na kwerewa onwongo obeto ködë." 4 Gín thon okobo both Parao ní, "Wan ebino mé bedo kany pí karé na nönök, piën kec tye na rac rwök í Kanaan éka lum ope pí rom k'eticni. Kobedini dong wan ékwaö ní imíö eticni obed ginií í lobo mé Gocen." 5 Parao okobo both Yocepu ní, "Apapni éka utmegoni obino ginií bothi. 6 Lobo Ejip tye í cingi; keth apapni éka utmegoni í lobo na bër. Mligí obed í lobo Gocen, éka ka ingeo jö möro kí kin-gí na ryék, cè ikethgí mé bedo jö na löö leenina." 7 Cè Yocepu okelo apap méré Jakob éka onyutho èn í nyim Parao. Kinge Jakob ölamö gum í kom Parao. 8 Parao openyo èn ní, "In itye kí mwaka adi?" 9 Éka Jakob okobo both Parao ní, "An dong akwö í wi lobo pí mwaka mia acél kí pyer adek. Éntö mwaka mé wowothana obeto na nönök éka opong kí pëkö; mwaka mé kwöna ba röm kí mwaka mé wowotha ka kwereana." 10 Cè Jakob ölamö gum í kom Parao döki, éka öya ökö kí í nyime. 11 Cè Yocepu ömíö apap méré éka utmego méré kabedo í lobo Ejip éka ömíögi jami í ngöm na bër na tye í Ramecec, kite na Parao okobo niné ködë. 12 Yocepu thon opoko cem both apap méré éka utmego méré kí jö kibéc mé öt k'apap méré, nakun lübö wel èthinögi. 13 Í karé nön cem onwongo ope í lobo kibéc piën kec onwongo rac rwök; jö mé lobo Ejip kí jö mé lobo Kanaan ödökö ginií na görü pí kec n'òdögi. 14 Yocepu öcökö ciling kibéc n'onwongo tye í lobo Ejip éka Kanaan mé cülö cem n'onwongo gín wilö éka okelo í pacö ka Parao. 15 Í karé na ciling ka jö mé Ejip éka Kanaan dong othum, jö Ejip kibéc öcidhö ginií both Yocepu éka okobo ginií ní, "Miiwa cem, pingö in imitö ní wan èthöö í wangi? Cilingwa dong othum ökö." 16 Cè Yocepu ögamö ní, "Kel unu leeniwu, an abino cadhö niwu cem nakun alökö kí leeniwu, kite na dong cilingwu othum ökö." 17 Cè gín okelo leenigi both Yocepu. Èn ömíögi cem nakun èlökö k'angolegi, romgi, dyegigí, dhokgi, éka kenegi. Èn ömíögi cem pí mwaka nön nakun èlökö kí leenigi kibéc. 18 Kinge na mwaka nön othum, gín obino both Yocepu í mwaka nökené éka okobo ginií ní, "Wan ba ètwëro kanö köp möro kí bothi adwongwa, kite na cilingwa dong othum ökö kibéc éka leeniwa obeto megí. Gín möro ope n'odong pí adwongwa na path kí komwa éka ngömwa. 19 Pingö imitö ní wan èthöö í wangi na in inëno, wan kanya acél kí ngömwa? In iwílwä ökö kanya acél kí ngömwa

nakun ilōkō kī cem, ēk wan ēka ngōmwa ebed opii ka Parao. Mīiwa kodhi ēk ebed na kwō kūr ēthōō ēka ngōm kūr odong nono.” 20 Pī manōn Yocepu ōwīlō lobo kibēc mē Ejip pī Parao. Jō Ejip kibēc ōcadhō gini pwothigī ōkō piēn kec onwongo rac rwōk bothgī. Cē lobo ōdōkō mē ka Parao. 21 Yocepu ōmīō jō kibēc ōdōkō opii cakērē kī ajiki lobo mē Ejip kucēl, naka othuno kōdē yo kucēl. 22 Ēntō ēn ba ōwīlō lobo k’ēlamdhōk piēn gin onwongo nwongo cemgī kī both Parao. Manōn ēnē ōmīōgī ba ōcadhō ngōmgī. 23 Yocepu okobo both lwak nī, “Kobedini dong kite na an dong awilōwu ēka ngōmwu pī Parao, kodhi dong ene. Gam unu ēk ipur unu. 24 Ēntō ka icōkō unu cem, mīi unu acēl mē abic both Parao. Angwēn mē abic bino bedo mewu mē kodhi mē apura ēka mē acamawu kanya acēl kī jō mē udiwu.” 25 Gin okobo nī, “In ilārō kwōwa, adwong, ēk ebed kī cwiny na bēr i nyimi. Wan ebino bedo opii ka Parao.” 26 Cē Yocepu oketho n’obedo cīk na makō ngōm i lobo Ejip—naka tin pod tye—nī acēl mē abic mē cem, obedo mē ka Parao. Ngōm k’ēlamdhōk kēkēn ēnē ba ōdōkō mē ka Parao. 27 Jō Icarael obedo gini i Ejip, i lobo mē Gocen. Gin onwongo jami kī kunōn, ōnywōl gini ēka welgī ōmēdērē na pol rwōk. 28 Jakob obedo i lobo mē Ejip pī mwaka apar abirō, ēka mwaka mē kwō mērē onwongo mia acēl kī pyer angwēn wie abirō. 29 Na karē mē thōō ka Jakob onyingo na cwōk, ēn ocwodo wode Yocepu, ēka okobo nīnē nī, “Ka an atye kī cwiny na bēr i nyimi, cē iketh cingi, i kin ema ēka icikiri nī in ibino nyutho nīna kīca ēka gen-ni. Kūr iika i lobo Ejip, 30 Ēntō an amītō nī eika kanya kwerena tye iē; tīnga ōkō kī i Ejip, cē iika i kabedo n’eikogī iē.” Yocepu okobo nī, “An abino tīmō kite na in ikobo kōdē.” 31 Jakob okobo nī, “Kwongiri botha nī in ibino tīmō nī kōmanōn.” Cē Yocepu okwongere bothe ēka Jakob okulo wie pīny i wi kabuto mērē.

48 Kinge karē mōrō ekobo both Yocepu nī, “Apapni two.” Cē ēn otero awope mērē ariō, Manace ēka Epraim. 2 I karē n’ekobo both Jakob nī, “Wodi Yocepu obino bothi,” Icarael ōcūkērē ōya malō ēka obedo i wi kabuto mērē. 3 Jakob okobo both Yocepu nī, “Obanga Won Twēr kibēc onen botha i Luj i lobo Kanaan, ēka kī kunōn ēn ōmīa gum. 4 Ēn okobo nīna nī, ‘An abino mīōni inya ēka abino mēdō welwu. An abino mīōni iōdōkō rok ka jō na pol, ēka an abino mīō lobo ni both ēkwaēni na bino lūbōni mē bedo mēgī na twal.’ 5 “Ēka kobedini, awopeni ariō na in inywōlōgī i lobo Ejip n’onwongo bara abino bothi kany, ebino cwodogī nī mēga. Epraim ēka Manace bino bedo mēga kite na Reuben ēka Cimeon obedo gini mēga.

6 Ēthinō mōrō kēkēn n’ebino nywōlōgī kī kōrgī ebino cwodogī nī megī; ebino kwanōgī kī nying utmegogī i karē na gin poko lobo mē alea. 7 I karē n’onwongo an atye ka dwogo kī i Paddan, gin n’ocwero cwinyā ēnē nī ayani Racel ōthōō nīna ōkō i lobo Kanaan na pod etye i yoo, n’onwongo dong acwōk kī Eparata. Cē aiko ēn kunōn i nget yoo na cīdhō yo Eparata” (manōn ēnē Bethel). 8 I karē na Icarael ōnēnō awope ka Yocepu, ēn openyo nī, “Man jō mēnē?” 9 Yocepu okobo n’apap mērē nī, “Gin ēnē awopena n’Obanga ōmīa kī kany.” Cē Icarael okobo nī, “Kelgi botha kany, ēk alam gum i komgī.” 10 I karē nōn Jakob onwongo ba dōki nēnō pīny na bēr piēn onwongo dong otii. Cē Yocepu okelo awope mērē na cwōk bothe cē ōnōdhō lemgi ēka ōthūnōgī. 11 Jakob okobo both Yocepu nī, “Onwongo athamō nī ba dōk abino nēnō wangi, ēka kobedini Obanga ōmīa anēnō ēthinōni thon.” 12 Cē Yocepu ōkwanyōgī kī i cōng apap mērē Icarael ēka oryebere pīny cē okulo wie i ngōm. 13 Yocepu otero gin kibēc, Epraim i cīngē kucem n’okemo cīng Icarael kucam, ēka Manace i cīngē kucam n’okemo cīng Icarael kucem, ēka okelōgī na cwōk bothe. 14 Ēntō Icarael olyao cīngē kucem ēka oketho i wi Epraim, n’obedo athīn na tīdī, ēka olyao cīngē kucam arii cē oketho i wi Manace n’obedo kaō. 15 Cē ōlamō gum i kom Yocepu ēka okobo nī, “Ēk Obanga na kwarōwa Abraam ēka Icaca obedo gini ka lūbō cīk mērē, Obanga n’onwongo obedo akwathna i kwōna kibēc naka tin, 16 malaika n’ōlara kī kom gin na rac —ōmīi gum both awope ni. Ēk ecwodgī kī nyinga, ēka kī nying kwarōwa Abraam ēka Icaca, ēka gin myero ōmēdērē na pol rwōk i wi lobo.” 17 I karē na Yocepu ōnēnō nī apap mērē oketho cīngē kucem i wi Epraim, cwinye ba obedo na yom. Cē ōkwanyō cīng apap mērē ōkō kī i wi Epraim ēka oketho i wi Manace. 18 Yocepu okobo nīnē nī, “Pathi nī kōmanōn apapna, man ēnē obedo kaō; keth cingi kucem i wie.” 19 Ēntō apap mērē ōkwērō ōkō ēka okobo nī, “An angeo, woda, an angeo. Ēn thon bino bedo rok, ēka ēn thon bino bedo na dit. Ēntō ōmīn mērē na tīdī bino bedo na dit na lōō ēn, ēkwaē mērē bino dōkō rok na pol.” 20 Ōlamō gum i komgī i nīnō nōn, nakun kobo nī, “Jō Icarael bino lamō gum kī nyingi nī, “Ēk Obanga omii ibed calō Epraim ēka Manace.” Cē Jakob oketho nying Epraim i nyim nying Manace. 21 Cē Icarael okobo both Yocepu nī, “An dong acwōk thōō, Ēntō Obanga bino bedo kodwu, ēka ēn bino dwōkōwu i lobo ka kwerewu. 22 Na calō ngat acēl na lōō utmegoni, an amīō bothi kor kidi na an amaō kī both jō Amor kī pala abadē ēka atumna.”

49 Cē Jakob ocwodo awope mērē ēka okobo nī, “Cōkērē unu kanya acēl, ēk akob niwu ngō na bino tīmērē ī komwu ī karē mē anyim. 2 “Gūrē unu ēka iwiny unu, un awope ka Jakob; winy unu apapwu Icarael. 3 “Reuben, in ēnē ibedo athīn kaōna, tēkōna, ēka acaki tēkō koma, in ēnē ilōō kī wōrō, ēka kī tēkō kom. 4 In īcal kī pii na kelo bal, ēka ba ibino dōngō, piēn in ibuto ī kabuto k’apapni, ibedo kī dhakōna ēka ilino kabutona. 5 “Cimeon ēka Lebi obedo gīnī utmego— pala abadēgī ēnē obedo jami mē lwēny. 6 Ba abino bedo ī athukogī, ēk an kūr aribara ī athukogi, piēn oneko gini jīi k’akēmōgī, ēka otongo gīnī odon thwoni kite na īgī mītō. 7 Myero cen obed ī kom akēmōgī, piēn ger, ēka akēmōgī, gwaū rwōk! An abino kēthō ēkwaēgī ī kin jō ka Jakob ēka abino kēthōgī ōkō kī ī Icarael. 8 “Yuda, utmegoni bino pakōni; cingi bino makō ngut langni; awope k’apapni bino ryebere gīnī pīny ī nyimi. 9 Yuda, in īcal k’athīn kibwor, īya kī mwodo lee, athīn-na. Calō kibwor n’ōnywōngō ēka obuto pīny, calō mīn kibwor—nga na twērō ero ēn? 10 Lūth mē lōc ba bino yaa kī both Yuda, onyo lūth k’alōc ba bino yaa kī kin tyēnē, naka ka won mērē obino, ēka rok kibēc bino wōrō ēn. 11 Ēn bino tweno kana mērē ī kom yath ōlōk, ēka athīn kana ī kom jang ōlōk n’ēyērō; ēn bino lwōkō bōng mērē ī kom kōngō ōlōk, bōng mērē ī kōngō ōlōk na kwar. 12 Wangē bino bedo na cōl na lōō kōngō ōlōk, lakē bino bedo na tar na lōō cak. 13 “Jabulon bino bedo ī dhō nam, ēka ēn bino bedo ka cungo ka mel, wang lobo mērē bino mēdērē yo Cidon. 14 “Icakar cal kī kana na tēk, buto pīny ī dyere aditi mē yēc. 15 Ka ēn ōnēn kite na ka yweo mērē bē, ēka kī kite na lobo mērē yomo cwinye, ēn bino lōkō ngee ī kom yēc na pēk ēka dōkō opii ī kom tic na tēk. 16 “Dan bino ngōlō kōp n’atīr pī jōgē na calō kaka acēl mē Icarael. 17 Dan cal kī thwol na tye ī nget gudo, ororo na tye ī nget yoo, na tongo opuny angole gīnī, cē mīō ngat na ngwēcō kōdē podho pīny. 18 “An akūrō lar na megī, Aa Rwoth. 19 “Ēyak bino yakō Gad, ēntō ēn bino lōkērē ēka ryēmō kōrgī. 20 “Cem ka Acer bino cēk na bē; ēn bino mīō cem na mīt n’opore pī rwoth. 21 “Naputali cal kī lee thim na ngwēcō abonge gin mōrō na jūkō, na iē opong kī kōp na bēcō. 22 “Yocepu obedo jang ōlōk na nyak, jang ōlōk na cwōk kī wang pii, na jangē īdhō kor ōt malō. 23 Lang bino lwēny ī kome, gīn bino celo ēn ēka ēlwēnyō ī kome. 24 Ēntō atum mērē bino cung na ba yengere, cingē ōdōkō na tēk, piēn pī cing ngat na Thwōnē ka Jakob, piēn pī Akwath, Kidi mē Icarael, 25 piēn pī Obanga k’apapni na konyi, piēn pī gum na Won Twēr ēnē mii, kī gum na yaa kī malō ī polo, gum

na yaa kī kanya thut na tye pīny, gum mē thuno ēka īc. 26 Gum k’apapni lōō gum ka kite na bedo na twal, nakaka mwaka mē kite na pol. Ēk man kibēc obed ī wi Yocepu, ī kom terinyime, n’obino ōdōkō atēla ka utmego mērē. 27 “Benjamin cal k’orudi na ger, ēn camō lee n’oneko kodiko, kothyeno ēn poko gin na ēn ōyakō.” 28 Man ēnē kaka apar ariō mē Icarael. Man ēnē kōp n’apapgi okobo bothgī ī karē na ēn lamō gum ī komgī. Ēn ōlamō gum n’opore both ngat acēlacēl. 29 Cē ēn ōmīōgī cīk ni: “An dong acwōk cīdhō ōkō both jōga. Iika unu kī kwerena ī ōd rwo na tye ī pwodho ka Epron dhanō mē Kit. 30 Rwo na tye ī pwodho mē Makpela, na cwōk kī Mamre ī Kanaan, n’Abraam ōwīlō mē bedo ngōm mē ik kī both Epron dhanō mē Kit, kanya acēl kī pwodho. 31 Kunōn ēnē eiko Abraam kī dhakō mērē Cara, ēka Icaka kī dhakō mērē Rebeka iē. Kany nōn ēnē an thon aiko Lea iē. 32 Pwodho ēka kī rwo na tye iē onwongo ēwīlō kī both jō Kit.” 33 Ī karē na Jakob otyeko cīkō awope mērē, ēn ōdōlō tyēnē malō ī wi kabuto, cē ōthōō ēka ōdōk both jōgē.

50 Cē Yocepu opodho ī kom apap mērē, okok ēka ōnōdhō leme. 2 Cē Yocepu okobo both etic mērē n’obedo daktae mē wiro kom apap mērē kī yath ēk kūr ōbal, cē daktae owiro kom Icarael. 3 Gīn otyeko nīnō pyer angwēn, piēn manōn ēnē nīnō na mītērē pī wiro kom dhanō kī yath mē talō kome. Jō Ejip okoko gīnī Jakob pī nīnō pyer abirō. 4 Ī karē na nīnō mē kwero cōla opoth ōkō, Yocepu okobo both edite ka Parao nī, “Ka itye unu kī cwiny na bē ī koma, twak unu both Parao na kakara. Kob unu nīnē nī, 5 ‘Apapna ōmīa akwongo kwong ēka okobo nī, “An dong acwōk thōō. Ter koma ī lobo Kanaan ēka iika ī bur lyēl na an akūnyō pī lyēna.” Kobedini dong ēk acīdh aik apapna; cē an abino dwogo.” 6 Parao okobo nī, “Cīdh iik apapni, kite na ēn omii ikwongo kwong.” 7 Cē Yocepu ōcīdhō mē iko apap mērē. Edite ka Parao kibēc owotho kōdē—edite mē ōd pido ēka edite kibēc mē lobo Ejip— 8 kanya acēl kī jō kibēc mē ōt ka Yocepu, utmego mērē ēka jō mē ōt k’apap mērē. Ēntō ōwēkō gīnī ēthīnōgī kēkēn, rom kī dyegi ēka dhok ī lobo mē Gocen. 9 Yocepu ōcīdhō kī gadigadi ēka wegī angole. Ēn owotho kī jō na pol rwōk. 10 Ī karē na gīn othuno ī larū moo mē Atad, na tye na cwōk yo lōka Jordan, cē gīn okok kunōn kī cwer cwiny ēka kī kumo na thwōnē. Yocepu okwero cōla k’apap mērē pī nīnō abirō. 11 Ī karē na jō Kanaan n’onwongo bedo gīnī ī lobo nōn ōnēnōgī kwero cōla ī larū moo mē Atad, gīn okobo nī, “Man ēnē kwero cōla mē cwer cwiny na thwōnē rwōk

both jö Ejip." Manön enë ömïö kabedo nön na cwök kî Jordan ecwodo nî, Abel Micraim. 12 Cë awope ka Jakob obino ötimö gîni kite n'ëcîkögî ködë. 13 Gîn otingo lyënë yo lobo Kanaan, ëka eiko i öd rwo na tye i pwodho më Makpela, na cwök kî Mamre, n'Abraam onwongo öwilö na calö kabedo më ik kî both Epron dhanö më Kit kanya acël kî pwodho. 14 Kinge iko apap mërë, Yocepu ödök yo Ejip kanya acël kî utmego mërë, ëka kî jö nökenë kibëc na en onwongo öcîdhö ködgî më iko apap mërë. 15 I karë na utmego ka Yocepu önënö gîni nî apapgî dong öthöö ökö, gîn okobo nî, "Gwök onyo Yocepu bino kelo köp mörö i kom onu, ëka cülö kwor pî gîn na rac kibëc na onu ëtimö i kome." 16 Cë gîn ooro dwön-gî both Yocepu nakun kobo gîni nî, "Apapni öcîkôwa kî cik ni n'onwongo en bara öthöö: 17 'Man enë ngö na myero ikob unu both Yocepu: An akwai më timö kîca both utmegoni pî bal ëka tim na rac na gîn ötimö i komi.' Öma tim kîca i kom bal k'etic k'Obanga k'apapni." I karë na köp ni othuno bothe, Yocepu okok. 18 Cë utmego mërë thon obino ëka oryebere gîni pîny i nyime nakun kobo gîni nî, "Wan enene, ebedo opiini." 19 Entö Yocepu okobo nigî nî, "Kür ibed unu kî lworö. An atye nakaka Obanga? 20 Un ithëna unu athëna më timö gîn na rac i koma, ëntö Obanga ömïö man ötimërë pî larö kwö ka jö na pol, na calö un itye ka nënö tin. 21 Pî manön, kür ibed unu kî lworö. An abino gwököwu k'ëthinöwu kibëc." Cë en okweo cwinygî ëka ötwak kî mwolo bothgî. 22 Yocepu obedo i Ejip, kanya acël kî jö më öt k'apap mërë kibëc. En obedo i wi lobo pî mwaka mia acël k'apar. 23 Yocepu önënö ëkwaë ka Epraim naka othuno ködë i kom ëkwaë më run më adek mërë. En thon önënö ëthinö ka Makir wod ka Manace; n'onwongo etero na calö obedo mëgë. 24 Cë Yocepu okobo both utmego mërë nî, "An dong acwök thöö. Entö Obanga bino könyöwu, ëka bino kwanyöwu ökö kî i lobo ni, dwököwu yo lobo na en onwongo okwongo both Abraam, Icaka ëka Jakob." 25 Eka Yocepu ömïö ëthinö ka Icarael okwongo gîni kwong ëka okobo nî, "Obanga bino könyöwu. Cë un myero iting cogona ökö kî kany." 26 Cë Yocepu öthöö na mwaka më dit mërë tye mia acël k'apar. Kinge na gîn owiro kî yath më talö kom ëk kür öbal, ebino epyelo kome i canduk lyël kî i Ejip.

Nwö Cìk

1 Man ènè kòp na Muca òtwakò both jò Icarael kibèc ì lòka kulo Jordan kí kukidè ì karè na gín tye ì thim, ì Araba n'opimere kí Cup, ì kin Paran kí Topel, Laban, Kajerot éka Dijabu. **2** (Tero ninò apar wie acél mè woth, yaa kí ì Koreb mè cidhò yo Kadec Barnea nakun ewok kí ì yoo mè Kidi Ceir.) **3** Ì ninò dwe acél mè dwe mè apar wie acél, ì mwaka mè pyer angwèn, ènè Muca okobo both jò Icarael cìk kibèc n'onwongo Rwoth òmiò bothe na makò komgí. **4** Man òtimèrè kinge na èn òlòò Cikon rwoth ka jò Amor, n'onwongo lòò lóc ì Kecbon, éka Og rwoth mè Bacan, n'onwongo lòò lóc ì Acitarot éka Edrei. **5** Ì lòka kulo mè Jordan kí kukidè mè lobo mè Moab, Muca òcakò gònyò tyèn cìk ni nakun kobo ní: **6** Rwoth Obanga onu òtwak kod onu kí ì Koreb ní, "Un dong ibedo ì thè kidi ní pí karè na lac. **7** Yaa unu èk ìcak unu wothwu, ìcidh unu yo lobo n'otingere ka jò Amor, éka jò kibèc na cwók kòdgí na tye ì Araba, ì kite, kí kuthò thè kite, ì Negeb éka ì lobo n'ògürò dhò nam, ì lobo ka jò Kanaan éka ì Lebanon, naka ì kulo na thwònè, n'obedo kulo mè Euparate. **8** Nèn! An dong atyeko miòwu lobo ni. Cidh unu èk ìgam unu lobo na Rwoth okwongere ní ebino miò both kwaròwu Abraam, Icaka, Jakob éka èkwaègí na bino lùbògí." **9** Ì karè nòn, Muca okobo bothgí ní, "An ba dòkí aròmò cobo pèkòwu kèna. **10** Rwoth Obangawu dong òmiò ìnya unu na pol rwók, ènè òmiò tin ipol unu calò cèr na tye ì polo. **11** Èk Rwoth, Obanga ka kwerewu, òmiíwu ìmèdèrè tyèn elip acél éka òmiíwu gum kite na èn òcìkò kódè! **12** Èntò an atwèrò cobo pèkòwu kèna nìngò nakun dong ìdòkò unu yèc na pèk rwók, éka kí kòp kibèc na tye ì kinwu? **13** Yèr unu jò mòkò na ryèk, na nìang éka jò n'èwörògí kí ì kom kakawu acélacél, éka an abino kethogí na calò ètèlawu." **14** Un ibino ìgamò nìna ní, "Gin na in ikobo tye na bèr na wan myero ètìm." **15** Cè an akwanyò ètèla mè kakawu, èryèkò éka jò n'èwörògí. An akethogí mè bedo kí lóc ì komwu na calò edite ka jò elip, edite ka jò mia acél, edite ka jò pyer abic, edite ka jò apar éka na calò ètèla mè kaka. **16** Ì karè nòn an acìkò èngöl-kòpwu ní: Wínyu unu pido na tye ì kin utmegowu éka ìngöl unu kòp n'atìr, kadí kòp tye ì kin omego n'obedo dhanò mè Icarael onyo arok mòrò na bedo bothe. **17** Kür ilengere unu ì ngölò-kòp; un ibino winyo kòp ka ngat na tìdì éka mè ka ngat na dit na ròm aròma. Kür ibed unu kí lworo ì kom ngat mòrò, pièn ngölò-kòp obedo mè k'Obanga. Kel unu kòp mòrò na tèk rwók kí bothwu éka an abino winyo. **18** Ì karè nòn an acìkòwu ì kom jami kibèc

na un onwongo myero itìm. **19** Cè wan èya òkò kí ì Koreb kite na Rwoth Obangawa òcìkòwa kódè. Wan ewok ì thim na lac na un inènò éka ècidhò yo lobo n'otingere ka jò Amor cè ethuno ì Kadec Barnea. **20** Cè an akobo bothwu ní, "Un ithuno ì lobo ka jò Amor n'otingere, na Rwoth Obanga onu tye ka miò both onu. **21** Nèn, Rwoth Obangawu òmiòwu lobo. Cidh unu èk ìgam unu lobo kite na Rwoth Obanga, Obanga ka kwerewu, okobo niwu. Kür ibed unu kí lworo; kür cwinywu thon opodhi." **22** Cè un kibèc ibino unu botha éka ikobo unu ní, "Eru eor cwò mòrò mè cidhò anyim èk òcidh òròth gini lobo ní onu éka odwongi gini kòp both onu ì kom yoo na onu myero èlùbí éka peci na onu ebino dónyò iè." **23** An athamò ní man obedo thama na bèr; cè an ayèrò jò apar arìò, ècwò acél kí ì kaka acélacél. **24** Gín obino òya éka òcidhò gini ì lobo n'otingere, cè obino gini naka ì ora mè Ecìkol éka òròthò gini. **25** Gín òkwanyò nyig yen mòkò mè lobo nòn éka okeko gini bothwa. Gín odwongo kòp bothwa nakun kobo gini ní, "Lobo na Rwoth Obanga onu cwók miò both onu obedo lobo na bèr." **26** Èntò un onwongo ba ìmitò unu cidhò yo malò; un ìjèm ì kom cìk ka Rwoth Obangawu. **27** Un ìngüngüta kí ì kèmawu nakun ikobo unu ní, "Rwoth dagwa; èn òkwanyòwa kí ì Ejip mè miòwa ì cing jò Amor èk otyekwa òkò. **28** Wan ebino cidhò yo kwene? Utmegowa òmiòwa erwenyo genwa òkò. Gín kobo ní, "Jò mè lobo nòn tèk éka boco gini na lóòwa òkò; peci tye na dōngò, na cèl mèrè tye naka malò ì wi polo. Wan thon ènènò jò Anak nòn." **29** Cè an akobo bothwu ní, "Kür ibed unu kí myèl kom; kür ilwor unugí. **30** Rwoth Obangawu, na ènè tèlò nyimwu, ènè bino lwény pírwu, kite na un inènò èn òtìmò ì Ejip, **31** éka ì thim. Kunòn un inènò kite na Rwoth Obangawu ògwòkòwu kódè, na calò kite n'apap tingo kí wode. Èn òtìmò man ì kabedo kibèc na un ìcidhò yo iè naka ithuno unu ì kabedo ni." **32** Èntò kí kom gin na kibèc n'Obanga òtìmò un pod ìkwèrò mè bedo kí gen ì kom Rwoth Obangawu, **33** n'obino ètèlò nyimwu ì wothwu, kí mac ì kiwor éka kí pól ì kiceng, mè nwongo kabedo niwu èk ibed unu iè éka mè nyutho niwu yoo na myero ilüb unu. **34** Ì karè na Rwoth owinyo kòp na un ikobo, èn obedo k'akèmò éka okwongo kwong ni: **35** "Ngat mòrò mè run ni na rac ope kadí k'acél na bino nènò lobo na bèr na an akwongara mè miò both kwerewu, **36** na path kí Kaleb wod ka Jepune. Èn bino nènò lobo nòn. An abino miò èn éka èkwaè mèrè lobo na èn bino nyönò kí tyènè, pièn èn obedo ka lùbò Rwoth kí cwinye kibèc." **37** Akèmò obino òmakò Rwoth thon ì koma pírwu. Èn okobo nìna ní, "In thon ba ibino dónyò kunòn. **38** Èntò Yocua wod ka

Nun n'obedo alüb kori ênë bino dönyö. Dii cwinye, piën ên bino tëlö jö Icarael më gamö lobo nön." 39 Cê Rwoth okobo both onu kibëc ni, "Êthinöwu na pod thithinö gini na un ikobo ni ebino terogi i opii ëka na bara ngeo gini poko gin na bër ki kom gin na rac, gin ênë bino dönyö kunön. An abino miögi ëka gin bino gamö. 40 Êntö un, lökërë ëka idök unu i thim i yoo na cidhö yo Nam na Kwar." 41 Cê un igamö nina ni, "Wan ëbalö i nyim Rwoth. Wan ebino cidhö ëka ëlwënyö kite na Rwoth Obangawa öciköwa ködë." Cê ngat acëlacël oruko jami më lwënyö nakun thamö ni cidhö yo lobo n'otingere obedo gin na yot. 42 Êntö Rwoth okobo nina ni, "Kob niggi, 'Kür icidh unu malö më lwënyö piën an ba abino woth kodwu ëka langwu bino löönöwu.'" 43 An atwak kodwu, ëntö un ba iwinyo. Un ijëm i kom cik ka Rwoth ëka pi awakawu un icidhö i lobo n'otingere. 44 Jö Amor n'onwongo bedo gini kanya otingere nön obino i komwu; gin öryëmö körwu calö kic ëka ölwënyö i komwu ki i Ceir naka othuno i Korma. 45 Cê un idwogo ëka ikok unu i nyim Rwoth, ëntö ên ba owinyo kokowu ëka ba olengo ithe i köpwu. 46 Pi manön, un idong i Kadec ninö na pol—pi karë kibëc na un ibedo kunön.

2 Cê wan ëlökërë ëka ëcidhö i thim, i yoo na dök yo Nam na Kwar, kite na Rwoth öcika ködë. Wan ebedo ka wirë i lobo më Ceir n'obedo lobo n'otingere pi karë na lac. 2 Cê Rwoth okobo nina ni, 3 "Un dong ibedo ka wirë i lobo ni n'otingere pi karë na lac; kobedini dong lökërë unu yo kukuju. 4 Mii jii cik ni gini: 'Un icwök unu wok i lobo ka utmegowu n'obedo ëkwaë k'Ecau, na bedo gini i lobo Ceir. Gin bino bedo ki lworo i komwu, ëntö myero igwökërë unu rwök. 5 Kür icak unu lwënyö i komgi, piën an ba abino miö lobogi mörö bothwu, kadï thon kany mörö na dhanö twërö cung ië. An amiö lobo n'otingere më Ceir both Ecau na calö mëgë. 6 Un ibino wilö cem më acama ëka pii më amodha ki bothgi.'" 7 Rwoth Obangawu ömïöwu gum i kom tic kibëc më cingwu. Ên ögwököwu i wothwu i thim ni na lac. I mwaka pyer angwën ni Rwoth Obangawu obedo ka gwököwu, ëka gin mörö ope n'orem ki bothwu. 8 Cê wan ëcidhö ëkadhö utmegowa n'obedo ëkwaë k'Ecau, na bedo gini i Ceir. Wan ëlökërë ki i yoo më Araba na yaa ki i Elat ëka Ejion Geber, cê ëcidhö i yoo na dök yo thim më Moab. 9 Cê Rwoth okobo nina ni, "Kür icidh unu both jö më Moab ki gero onyo icak unu lwënyö i komgi, piën an ba abino miöwu lobogi mörö. An atyeko miö Ar both ëkwaë ka Lot na calö mëgi." 10 (Jö Emim onwongo bedo gini kunön cön; gin obedo jö na ték ëka pol gini rwök nakun

boco gini calö jö Anak. 11 Jö ni ëkwanögi i kom jö Repa calö jö Anak, ëntö jö Moab cwodogi ni jö Emim. 12 Jö Kori onwongo cön bedo gini i Ceir, ëntö ëkwaë k'Ecau obino öryëmögi ökö. Gin otyekogi ökö kibëc ki i nyimgi ëka obedo gini i kabledogi kite na jö Icarael ötimö ködë i lobo na Rwoth ömiögi na calö mëgi.) 13 Eka Rwoth okobo ni, "Kobedini dong yaa unu malö, ingöl unu ora më Jered." Cê wan ëngölö ora. 14 Cakërë i karë na wan ëya ködë ki i Kadec Barnea naka ëngölö i ora më Jered, onwongo dong römö mwaka pyer adek wie aboro. I karë nön cwö kibëc më run nön n'onwongo obedo gini ëlwënyö obino öthöö gini ökö, kite na Rwoth onwongo okwongere ködë bothgi. 15 Cing Rwoth onwongo tye i komgi naka otyeko jö më run nön kibëc ki i kabledogi. 16 I karë na jö kibëc n'onwongo obedo gini ëlwënyö öthöö othum ökö, 17 Rwoth okobo nina ni, 18 "Tin myero iwok unu ki i wang lobo më Moab na cwök ki pacö më Ar. 19 Êntö ka ibino unu na cwök ki jö Amon, kür icidh unu bothgi ki gero onyo icak unu lwënyö i komgi, piën an ba abino miöwu lobo mörö n'obedo më ka jö Amon. An dong atyeko miö both ëkwaë ka Lot na calö mëgi." 20 (Manön thon onwongo ecwodo ni lobo ka jö Repa, n'onwongo bedo gini kunön; ëntö jö Amon cwodogi ni jö Jamjumim. 21 Gin onwongo obedo jö na ték ëka pol gini rwök nakun boco gini calö jö Anak. Rwoth obino otyekogi kibëc ki i nyim jö Amon, n'öryëmögi ökö ëka obedo gini i lobogi. 22 Man ênë kite na Rwoth ötimö ködë thon i kom ëkwaë k'Ecau n'onwongo obedo gini i Ceir, i karë na ên otyeko jö Kori ökö ki i nyimgi. Cê ëkwaë k'Ecau ögamö lobogi ëka oleo gini na pod bedo gini ië naka tin. 23 Eka pi jö Abi n'obedo gini i peci na thithinö naka othuno i Gaja, jö Kaptor n'obino gini ki i Kaptor otyekogi ökö ëka obedo gini i kabledogi.) 24 "Kinge na dong onu ewok i Moab, Rwoth okobo both onu ni, 'Yaa malö, icak unu dong ngölö ora më Arnon. Nën! An atyeko miö Cikon dhanö më Amor, rwoth më Kecbon, kanya acël ki lobo mërë i cingwu. Cidh unu anyim ëk ilwënyö unu i kome ëka igam unu lobo. 25 I ninö na tin, an abino miö koyo öny i kom rok kibëc na bedo i wi lobo nakun lworo makögi. Gin bino winyo köp i komwu ëka komgi bino myël nakun cwinigi podho pirwu.' 26 "Cê an aoro jii i thim më Kedemot both Cikon rwoth më Kecbon ki köp më kuc, nakun akobo ninë ni, 27 'Yee niwa më wok i loboni. Wan ebino wok nakun ëlübö yoo këkën. Wan ba ebino lökërë yo kucem onyo yo kucam. 28 Cadh niwa cem më acama ëka pii më amodha ki wel më ryal. Yee niwa ewok ki tyënwa këkën— 29 kite n'ëkwaë k'Ecau na bedo gini i Ceir ëka jö Moab na bedo gini i Ar ötimö ködë—naka wan

ëngölö kulo Jordan yo lobo na Rwoth Obangawa tye ka miöwa.' 30 Èntö Cikon rwoth më Kecbon ökwërö ökö nî wan kür ewok na cwök ködë piën Rwoth Obanga onwongo ömïö ën obedo kî cwiny na nwang ëka kî cwiny na tæk ëk ëmïi ën ï cingwu kite na dong ötimö ködë. 31 "Rwoth okobo nîna nî, 'Nën, an dong acakö miö Cikon ëka kî lobo mërë bothwu. Cak unu dong gamö lobo mërë na calö mewu.'" 32 Ì karë na Cikon ëka acikari mërë kibëc obino gîni më lwëny ï komwa kî ï Jakaj, 33 Rwoth Obangawa öcakö miö ën ï cingwa ëka eneko ën kanya acël k'awope mërë ëka k'acikari mërë kibëc. 34 Ì karë nön wan ëgamö peci mërë kibëc. Etyekogî—cwö, mon ëka ëthinö. Ngat mörö ope n'öbwöth na kwö. 35 Wan etero lim na kwö na wan ëyakö ëk ödök mëwa, kanya acël kî jami nökenë n'ëyakö kî ï peci kibëc na wan ëmaögî. 36 Cakërë kî ï Aroer na tye ï nget ora më Arnon ëka kî ï pacö na tye ï ora, më thuno ködë naka ï Gilead, pacö mörö ope na tæk n'ëgërö malö rwök na maö ölööwa. Rwoth Obangawa ömiögî kibëc ï cingwa. 37 Èntö un ba ibino iwok unu na cwök kî lobo ka jö Amon, kadî lobo na tye ï dhö kulo më Jabok onyo peci mörö na tye ï lobo n'otingere, onyo kanya Rwoth Obangawa öjököwa kî ië.

3 Cë wan dökî ëlökërë, ëdök malö ï yoo na cidhö yo Bacan; Og rwoth më Bacan obino ï komwa k'acikari mërë kibëc më bino lwëny ködwa ï Edrei. 2 Èntö Rwoth okobo nîna nî, "Kür ibed kî lworo ï kome, piën an atyeko miö ën bothi k'acikari mërë kibëc ëka kî lobo mërë. In ibino timö ï kome kite na yam itimö ï kom Cikon rwoth ka jö Amor n'onwongo löö Kecbon." 3 Cë Rwoth Obanga onu thon ömïö Og rwoth më Bacan k'acikari mërë kibëc ï cingwa. Wan enekogî kibëc na ngat mörö ba öbwöth na kwö. 4 Ì karë nön wan ëmaö peci mërë kibëc. Pacö mörö ope kî ï peci pyer abicël na wan ba ëmaö kî bothgî—lobo kibëc më Argob na tye ï thë löc ka Og rwoth më Bacan. 5 Peci nî kibëc onwongo ëcëlö kî cël na tæk n'otingere malö rwök ëka dhö wangkac gîni n'eloro kî lote n'obedo nyweny, mëd kî peci na thithinö na pol na ba ëcëlögî. 6 Wan ebino etyeko peci kibëc, kite na wan ebino ëtimö ï kom Cikon rwoth më Kecbon—neko cwö kibëc, mon ëka ëthinö. 7 Èntö lim na kwö ëka jami kibëc na wan ëyakö kî ï pecigî, wan eterogî ëk obed mëwa. 8 Cë ï karë nön wan ëkwanyö lobo nön kî ï cing rwodhi ariö ka jö Amor na tye kukidë më kulo Jordan, cakërë kî ï ora më Arnon naka othuno ködë ï kidi më Kermon. 9 (Jö Cidon cwodo Kermon nî Cirion; ëka jö Amor cwodo nî Cenir.) 10 Wan ëmaö peci kibëc na tye ï lobo n'otingere malö n'öpëdhërë,

lobo Gilead kibëc ëka Bacan naka othuno ködë yo Caleka ëka Edrei, peci na tye ï thë löc ka Og rwoth më Bacan. 11 (Og rwoth më Bacan ënë onwongo odong kënë kî kin jö Repa. Ëka ëtana mërë onwongo ëyübö kî nywenyo. Bor mërë tye mita angwën ëka lac mërë mita ariö. Pod tye ï Raba ï pacö ka jö Amon.) 12 Ì karë nön na onu ëmaö lobo nî, an abino amiö lobo na tye kukuju më Aroer both jö Reuben ëka jö Gad, na tye ï ora më Arnon, kî nucu lobo n'otingere më Gilead, kanya acël kî peci mërë. 13 Lobo Gilead n'odong ëka lobo Bacan kibëc, na ënë lobo ka rwoth Og, an abino amiö both nucu kaka ka Manace. (Lobo kibëc më Argob na tye ï Bacan n'onwongo ecwodo nî lobo ka jö Repa. 14 Jair, akwar Manace, ökwanyö lobo Argob kibëc na cidhö naka ï wang lobo ka jö Gecur ëka jö Maakat; ebino ëcakö kî nyëngë, ëk naka tin Bacan ecwodo nî Kabot Jair.) 15 Ëka an amiö Gilead both Makir. 16 Èntö both jö ka Reuben ëka jö ka Gad amiö lobo n'öcakërë kî ï Gilead cidhö ködë naka ï ora më Arnon (dyere kulo ënë obedo wang apoki mërë) naka othuno ködë ï kulo më Jabok, na ënë wang apoki lobo ka jö Amon. 17 Wang apoki mërë kî kuthö onwongo tye ï kulo Jordan na tye ï Araba, cakërë kî ï nam më Kineret naka othuno ködë ï nam më Araba (nam më Kadö) na tye ï lobo na tye ï kor kidi më Piciga na tye kî kukidë. 18 Ì karë nön an aciköwu nakun akobo nî: "Rwoth Obangawu ömiöwu lobo nî ëk igam unu obed mewu. Èntö jö na mewu kibëc na tæk ï lwëny myero öngöl gîni Jordan nakun nwongo orukere gîni kî jami lwëny më cidhö ködë löka ï nyim utmegowu jö Icarael. 19 Èntö monwu, ëthinöwu, ëka limwu na kwö na pol twërö dong gîni ï peci na an amiöwu. 20 Myero ilwëny unu naka ka Rwoth ömïö utmegowu yweo kite n'ömiöwu ködë, na gin thon onwongo lobo na Rwoth Obangawu bino miögî ï löka kulo Jordan. Kinge manön, ngat acëlacël twërö dök cen ï lobo mërë na dong amiöwu." 21 Ì karë nön, an acikö Yocua nî, "In inënö kî wangi gin na kibëc na Rwoth Obangani ötimö ï kom rwodhi ariö nî. Rwoth bino timö nî kómanön thon ï kom löc kibëc na un ibino thuno ië ka ipoth unu yo kanya un itye ka cidhö ië. 22 Kür ilworgî; Rwoth Obangawu kikokome bino lwëny pirwu." 23 Ì karë nön an akwaö Rwoth nî, 24 "Rwoth Obanga Won Twër, in icakö nyutho both aticni dit na megî ëka kî tæköni. Obanga mënë na tye ï wi polo onyo ï wi lobo na twërö tio tic më aura kite na in itio ködë? 25 Wëk acidh anën lobo na bër na tye yo löka kulo Jordan, lobo na bër n'otingere ëka kite më Lebanon." 26 Èntö Rwoth ökëcö ï koma pirwu ëka onwongo ba dök twërö winyona. Cë Rwoth okobo nî, "Manön öromö, kür dökî itwak köda ï kom

köp ni. 27 Apê ïdih malô ï wi kidi më Piciga, cê inên yo kuthô ëka kukuju, kukwap ëka kukidê. Nên lobo kî wangi, piên in ba ibino ngölô kulo Jordan. 28 Êntô cîk Yocua, ïdiï cwinye ëka ïmiï ën têt cwinu; piên ënê bino poth yo löka ca nakun têtö jö ni, cê bino miögi gamô lobo na in ibino nënô.” 29 Cê wan ebodo ï ora na cwök kî Bet Peor.

4 Kobedini un jö Icarael, winy unu cîk kibêc na an abino pwonyowu. Gwökgî ëk ibed unu na kwô ëk ïdöny ëka ïgam unu lobo na Rwoth, Obanga ka kwereu, tye ka miöwu. 2 Kür imêd unu köp mörô ï kom cîk na an aciköwu ëka kür ikwany unu köp mörô kî iê, êntô gwök unu cîk ka Rwoth Obangawu kite na an amiöwu ködê. 3 Un inênô kî wangwu gin na Rwoth ôtimô ï Baal Peor. Rwoth Obangawu obino otyeko jö kibêc na wörô Baal më Peor kî ï kinwu. 4 Êntô un kibêc na pod iketho genwu ï kom Rwoth Obangawu pod itye unu na kwô naka tin. 5 Nën! An dong atyeko pwonyowu cîk kibêc kite na Rwoth Obangana ôcika ködê, ëk igwök unugi ï lobo na un icwök dönyô iê më gamô dôkö mewu. 6 Gwök unu na bër, piên manôn ënê bino nyutho ryêkô ëka ngecwu both rok, na bino ginî winyo cîk ni kibêc cê kobo nî, “Adyer, rok na dit ni obedo ginî jö na ryêk rwök ëka niang ginî.” 7 Rok mênê na dit na tye k'obangagi na cwök ködgi, kite na Rwoth Obanga onu bedo na cwök kod onu ï karê kibêc na onu êlêgö bothe? 8 Rok mênê nôkênê na dit, na tye kî cîk n'atir ginî na calô man na tin an atye ka ketho ï nyimwu? 9 Êntô gwökêrê unu na bër, kür imiï wiwu owil ôkö kî kom gin na un inênô kî wangwu, onyo kür imiïgi orweny ôkö kî ï cwinywu pî karê më kwöwu kibêc. Pwony unu cîk ni both êthinöwu ëka both êthinögi thon. 10 Po unu ï kom niñô na un icung ï nyim Rwoth Obangawu ï Koreb, ï karê na ën okobo niina nî, “Gür lwak ï nyima ëk owiny ginî köpna ëk opwony ginî kite më wöröna pî karê na gin pod tye na kwô ï wi lobo ëk opwony ginî both êthinögi.” 11 Un ibino na cwök ëka icung unu ï tyên kidi, nakun wi kidi lyêl kî mac naka ï polo, k'edou n'ocido na cöl ëka piny na cöl cuc. 12 Cê Rwoth ôtwak kodwu kî ï mac. Un iwiny köp êntô ba inênô unu kome; dwön kékên ënê owinyere. 13 Ên okobo niwu cîkêrê mërê, cîk apar, na ën ôciköwu më gwökô ëka ôcöögî ï kom kite ariö n'apada. 14 Ëka Rwoth ôcika ï karê nön më pwonyowu kî cîk kibêc na ën ôcika ködê, ëk igwök unu ï lobo na un icidhó gamô më bedo mewu. 15 Myero igwökêrê unu rwök piên ba inênô unu cal gin mörô ï karê na Rwoth ôtwak kodwu ï Koreb kî ï mac na lyêl. 16 Kür ibal unu më yübô cal jwök pîrwu kenwu, cal gin mörô kékên

na un iyübô, kadî ëyübô na cal k'ëcwô onyo dhakô, 17 onyo na cal kî lee mörô na bedo ï wi lobo onyo winyü mörô na ngwêcô malô ï wi yamô, 18 onyo gin mörô na kwô na wotho ï wi ngöm onyo rëc mörô na tye ï öd pii piny. 19 Ëka ka itingo wangi malô ï polo cê inênô ceng, dwe ëka cêr—kî jami kibêc na tye ï polo—kür imiï gin mörô öywa thamawu më ryebere piny ï nyimgî ëka më wörô jami na Rwoth Obangawu ömiö pî rok kibêc nôkênê na tye ï thê polo. 20 Êntô Rwoth ôlaröwu ëka ökwanyöwu ökö kî ï lobo Ejip, n'onwongo cal kî keno theth, më bedo jögê na pîrgî têt kite na un itye ködê kobedini. 21 Akëmô ömakô Rwoth ï koma pîrwu, cê ökwongere nî an ba abino ngölô kulo Jordan ëka dönyô ï lobo na bër na Rwoth Obangawu bino miöwu më bedo mewu. 22 An abino thöô ï lobo ni; an ba abino ngölô kulo Jordan; êntô un icwök ngölô kulo yo löka ëka ibino unu gamô lobo na bër më bedo mewu. 23 Gwökêrê unu ëk kür wiwu owil kî cîkêrê ka Rwoth Obangawu na ën ôcîkêrê kodwu. Kür iyüb unu cal jwök mörô pîrwu na cal kî gin mörô na yam Rwoth Obangawu ôcikô nî kür itim unu. 24 Piên Rwoth Obangawu cal kî mac na wangô piny, ën obedo Obanga na nyek. 25 ï karê më anyim, ka dong inywölô unu êthinô ëka ëkwaëwu cê ibedo unu ï lobo pî karê na lac, kür ibal unu kî yübô cal jwök mörô kékên. Man obedo gin na rac ï wang Rwoth Obangawu ëka bino miö akëmô makô ën ï komwu. 26 An tin acwodo polo ëka lobo më bedo caden ï komwu nî ibino unu thöô pïöpiö kî ï lobo na un itye ka ngölô kulo Jordan më gamô. Un ba ibino bedo kunön pî karê na lac êntô ebino tyekowu ökö. 27 Rwoth bino kêthöwu ökö ï kin rok na papath. Jö na nönök kékên ënê bino dong na kwô ï kin rok na Rwoth bino terowu iê. 28 Kî kunön un ibino wörô obanga na dhanô öyübô ayüba kî cingê kî ï kom yen ëka kite, na ba römô neno, ba winyo köp, ba cemo ëka ba ngweo gin mörô. 29 Êntô ibino unu rangô Rwoth Obangawu kî kunön, ibino unu nwongo ën ka irangô unu kî cwinywu kibêc ëka kî tipowu kibêc. 30 Ka itye unu ï pêkö na jami nî kibêc ôtimêrê ï komwu, cê kinge, ibino unu dwogo both Rwoth Obangawu ëka ibino bedo unu kî winy ï kome. 31 Piên Rwoth Obangawu obedo Obanga na nyakîca; ën ba bino wêkö onyo tyekowu onyo wie ba bino wil kî cîkêrê mërê kî kwereu, na ën omoko bothgi kî kwong. 32 Kobedini peny unu pî karê n'opoth angec, na bara ënywölöwu, cakêrê ï karê n'Obanga ocweo dhanô ï wi lobo; cak penyö kî ï acaki lobo naka ï ajiki. Tye gin mörô na dit rwök na calô man n'ôtimêrê, onyo gin mörô na cal ködê n'obino owinyere? 33 Tye rok mörô na yam owinyo dwön Obanga na twak kî ï mac kite

na un iwinyo kodê êka pod tye gîni na kwô? 34 Onyo obanga mörö tye n'ötēmō kwanyō rok mörö mē bedo mēgē kēnē, kī ī kin rok nōkēnē nakun tēmō cwinygī k'anyuth mē tango êka gin mē aura gîni, kī lwēny, kī tēkō êka kī twērō, kī thwōn lworo na dwong na rōm kī gin na Rwoth Obangawu ōtīmō niwu ī lobo Ejip nakun un itye ka nēnō kī wangwu? 35 Enyutho jami ni bothwu êk inge unu nī Rwoth ēnē Obanga; ba dōk tye Obanga mörö nōkēnē. 36 Ēn ōmīō iwinyo unu dwōnē kī ī polo êk opwonywu. Êka onyutho niwu mac mērē na thwōnē ī wi lobo cē iwinyo unu kōp mērē kī ī mac. 37 Piēn ēn ōmarō kwerewu êka ōyērō êkwaēgī na gīn ōnywōlō, ēn ōkwanyōgī ōkō kī lobo Ejip kī tēkō mērē na dit nakun ēn kīkome tye kodwu. 38 Ēn ōryēmō rok na dōngō êka na tēk lōōwu ōkō kī ī nyimwu, êk ekelwu ī lobogī mē mīō lobogī bedo mewu kite na tye kodē tin. 39 Tin dong myero inge unu êka iketh unu ī cwinywu nī Rwoth ēnē Obanga na tye ī wi polo êka pīny ī wi lobo. Ba dōk tye obanga mörö nōkēnē. 40 Pī manōn, myero īgwōk unu cīk mērē kībēc na an atye ka cīkōwu kodē tin, êk nyimwu êka êkwaēwu obed na leng, êk īkwō unu pī karē na lac ī lobo na Rwoth Obangawu bino mīōwu pī karē kībēc. 41 ī karē nōn Muca opoko peci adek yo kukidē kulo Jordan 42 êk ka ngat mörö oneko dhanō ōring yo kunōn, ka ba ōthēna athēna mē neko awodhe akaka, na kōp mörö ope ī kin-gī cōn. Ēn twērō rīngō ī pacō mörö acēl êka gwōkō kwō mērē. 43 Peci nōn gīn enene: Bejer na tye ī thim n'otingere malō n'ōpēdhērē, pī jō ka Reuben; Ramot na tye ī Gilead pī jō ka Gad, êka Golan na tye ī Bacan pī jō ka Manace. 44 Man ēnē cīk na Muca ōmīō both jō Icarael. 45 Man ēnē cīk kībēc na Muca ōmīō bothgī ī karē na gīn ōya kī ī lobo Ejip. 46 Gīn onwongo tye ī ora na cwōk kī Bet Peor na tye kukidē mē kulo Jordan, na tye ī lobo ka Cikon rwoth ka jō Amor, n'onwongo lōō Kecbon na Muca êka jō Icarael obino ōlōō ī karē na gīn dong ōya ōkō kī ī lobo Ejip. 47 Gīn ōgamō lobo mērē êka lobo ka Og rwoth mē Bacan, rwodhi arīō ka jō Amor na bedo gīnī ī lōka kulo Jordan yo kukidē. 48 Lobo ni ōcakērē kī ī pacō Aroer na tye ī lak kulo mē Arnon cidhō kodē naka ī kidi Cirion (manōn, Kermon), 49 kanya acēl k'Araba kībēc na tye kukidē mē Jordan, na dōk kodē yo nam mē Araba na tye ī thē kidi mē Piciga.

5 Muca ocwodo jō Icarael kībēc cē okobo bothgī nī: Un jō Icarael, winy unu cīk kībēc na an acwōk kobo niwu tin. Pwony unu êka īgwōkērē unu mē lūbōgī. 2 Rwoth Obanga onu ōcīkērē kod onu ī Koreb. 3 Ēn ba oketho cīkērē ni kī kwere onu ēntō oketho cīkērē kod onu kībēc, na pod etye na kwō tin. 4

Rwoth ōtwak kodwu wang kī wang kī ī mac ī wi kidi. 5 ī karē nōn, an acung ī kin Rwoth êka un mē kobo niwu kōp ka Rwoth, piēn un onwongo ilworo mac êka ba īcidhō unu malō ī wi kidi. Êka ēn okobo nī: 6 "An ēnē Rwoth Obangawu n'okelowu kī ī lobo Ejip, lobo mē opii. 7 "Kūr ibed unu k'obanga nōkēnē na path kōda. 8 "Kūr iyūb cal jwōk mörö na megī, onyo cal gin mörö na tye malō ī wi polo, onyo na tye pīny ī wi lobo onyo na tye ī thē pii. 9 Kūr iryebiri pīny ī nyimgī mē wōrōgī. Piēn an, Rwoth Obangani, abedo Obanga na nyek, êka abino pwodo êkwaē ka jō na daga pī bal ka kweregī naka thuno kodē ī kom êkwaē mē adek kī mē angwēn. 10 Ēntō an abino nyutho mar na ba lōkērē both jō elip kī elip na mara êka gwōkō cīkna gīnī. 11 "Kūr icwod nying Rwoth Obangani atata, piēn Rwoth bino mīō kōp lōō ngat na cwodo nyingē atata. 12 "Gwōk nīnō mē Cabīt êk obed na leng, kite na Rwoth Obangani ociki kodē. 13 Tii tic pī nīnō abicēl nakun ityeo ticni kībēc, 14 ēntō nīnō mē abirō ēnē Cabīt ka Rwoth Obangani. Nīnō nōn kūr igud tic mörö, kadī in kikomi, onyo wodi onyo nyari, onyo aticni n'ēcwō onyo na dhakō, onyo thwoni pur, onyo kanani onyo leenini mörö kēkēn, onyo arok mörö na bedo ī peciwu, êk aticni n'ēcwō onyo na dhakō myero oywe thon calō in. 15 Po unu nī un onwongo ibedo opii ī Ejip êka Rwoth Obangawu ēnē ōkwanyōwu ōkō kī kunōn kī thwōn tēkō. Manōn ēnē ōmīō Rwoth Obangawu ōcīkō nī īgwōk unu nīnō mē Cabīt. 16 "Wōr apapni êka ayani, kite na Rwoth Obangani ociki kodē, êk ibed ī wi lobo pī karē na lac êka nyimi obed na leng ī lobo na Rwoth Obangawu tye ka mīōwu. 17 "Kūr ineki. 18 "Kūr īdōny ī elomi. 19 "Kūr īkwāl. 20 "Kūr ikob kōp mē twodo ī kom ngat mörö. 21 "Kūr īnir dhakō ka ngat nōkēnē. Kūr īnir ōt ka ngat mörö, onyo ngōm, onyo etic mērē na cwō onyo na mon, thwōn mē pur onyo kana mērē, onyo gin mörö kēkēn n'obedo mē ka ngat nōkēnē." 22 Man ēnē cīk na Rwoth ōtwakō kī dwōn na longo ī athukowu kībēc kī ī mac na lyēl ī wi kidi, kī ī edou êka pīny na cōl cuc cē ēn ba ōmēdō kōp mörö nōkēnē. Ēn ōcōō cīk nī gīnī ī kom kite n'apada arīō êka ōmīōgī botha. 23 ī karē na un iwinyo dwōn n'odonyo kī ī pīny na cōl, nakun wi kidi tye ka lyēl kī mac, ētēla kībēc mē kakawu êka edongwu obino gīnī botha. 24 Êka un ikobo nī, "Rwoth Obanga onu onyutho nī onu dheo êka dit mērē cē onu ewinyo dwōnē kī ī mac. Tin onu ēnēnō nī dhanō twērō bedo na kwō kadī bed nī Obanga twak kodē. 25 Ēntō kobedini, pīngō onu myero ēthōō? Mac na thwōnē nōn bino camō onu ōkō êka onu ebino thōō ka ēmēdērē mē winyo dwōn Rwoth Obanga onu. 26 Ngat mörö tye na tye kī kom na naka yam owinyo dwōn Obanga na kwō

nakun twak kī ī mac, kite na onu ewinyo ködë, ëka pod tye na kwô? 27 In ïcidh na cwök ëk iwiny köp kibëc na Rwoth Obangawa kobo. Cë ikob niwa gin mörö këkën na Rwoth Obangawa bino kobo nini. Wan ebino winyo ëka ëlübö.” 28 Rwoth owinyo köp na un ikobo botha cë okobo nina nī, “An awinyo köp kibëc na lwak okobo bothi, köp kibëc na gin okobo tye kakarë. 29 Ka onwongo gin mëdërë më bedo kī cwiny n’obedo nī kōmanōn ī karë kibëc, më lworona ëka më gwökö cīkna kibëc, ëk jami kibëc owoth na bër ködgī ëka ëkwaëgī na twal. 30 “Cīdh ikob nigī nī ödök ginī ī këmagī. 31 Ëntō in idong botha kany ëk an akob nini cīkna kibëc, na in myero ipwonygī ködë, ëk öcīdh ölüb ginī ī lobo na an atye ka miögī më bedo mëgī.” 32 Pī manōn, gwökërë unu ëk itīm unu kite na Rwoth Obangawu öcīkōwu ködë; kür ïngël unu yo cīngwu kucem onyo kucam. 33 Lüb unu yoo kibëc na Rwoth Obangawu öcīkōwu, ëk ibed unu na kwô, nyimwu obed na leng ëka ibed unu pī karë na lac ī lobo na un ibino gamö më bedo mewu.

6 Man ënë cīk kibëc na Rwoth Obangawu öcīka nī ëk apwonywu më lübö ī lobo na un ïcidhō ngölö kulo Jordan më gamö bedo mewu, 2 ëk un, ëthīnōwu ëka ëkwaëgī na bino lübögī obed ginī kī wörö ī kom Rwoth Obangawu pī karë më kwōwu na un ïgwökö cīk mërë kibëc na an amīōwu. Man bino miōwu bedo na kwô pī karë na lac. 3 Pī manōn, winy unu jö lcarael, gwökërë unu më lübögī ëk nyimwu obed na leng ëka thon ïnya unu na pol rwök ī lobo na mio na cak kī möö kic möl kī ïë, kite na calö Rwoth, Obanga ka kwerewu, öcīkō ködë. 4 Winy unu jö lcarael, Rwoth Obangawa, ën kënë ënë Rwoth. 5 Mar Rwoth Obangani kī cwinyi kibëc, kī tiponi kibëc ëka kī tēkōni kibëc. 6 Cīk nī ginī na an tin acīkōwu ködë myero obed ī cwinywu. 7 Pwony unu ëthīnōwu kī cīk nōn ginī. Twak unu pīrgī ka ibedo unu pacö ëka ka iwotho unu ī yoo, ka ibuto unu pīny ëka ka ïyaa unu malö. 8 Twegī na calö anyuth ginī më po wiwu ī ngut cīngwu ëka ī ter nyimwu. 9 Cöögī ī kom yen dholokek më udiwu ëka ī kom dhö wangkacwu. 10 Rwoth Obangawu bino kelowu ī lobo na ën öcīkërë kī kwong both kwarōwu Abraam, lcaika ëka Jakob. Lobo nōn tye kī peci na lac na bër rwök, na pathi un ënë ïgërö, 11 udi n’opong kī jami kibëc na bëcö na un ba iketho gin mörö ïë, kulo na un ba igolo, pwothi ölöc ëka yen jeituni na un ba ipīdhö cë ka ïcamö unu ëka iyeng unu, 12 gwökërë unu ëk kür wiwu owil ökö ī kom Rwoth n’okelowu kī ī Ejip, lobo më opii. 13 Wör Rwoth Obangawu, tii unu nīnë këkën ëka ikwong unu kwong na mewu kī nyingë. 14 Kür

iwör unu obanga nökënë, obanga ka rok na tye ī ngetwu, 15 piën Rwoth Obangawu, na tye ī kinwu, obedo Obanga na nyek ëka akëmö mërë bino podho ī komwu cë bino tyekowu ökö kī ī wi lobo. 16 Kür itēm unu Rwoth Obangawu kite na un itīmö ködë kī ī Maca. 17 Myero ïgwök unu cīk ka Rwoth Obangawu kibëc na ën öcīkōwu. 18 Tīm unu gin na tye atir ëka na bër ī nyim Rwoth ëk nyimwu obed na leng ëka ïcidh ïgam unu lobo na bër na Rwoth yam öcīkërë kī kwong both kwerewu, 19 ëka Rwoth bino ryëmö langwu ökö kī ī nyimwu kite na ën okobo. 20 ï karë më anyim, ka ëthīnōwu openyowu nī, “Pīngö Rwoth Obangawa öcīkōwa më lübö cīk nī kibëc?” 21 Un ibino kobo both ëthīnōwu nī, “Wan onwongo ebedo opii ka Parao ī lobo më Ejip, ëntö Rwoth ökwanyōwa ökö kī kunōn kī tēkö më cīngë. 22 Rwoth obino otio anyuth më tango ëka gin më aura ginī—na döngö ëka na reco rwök—ī kom jö Ejip, ī kom Parao ëka ī kom jö më ödë kibëc na wan ënënö kī wangwa. 23 Ëntö ën obino ökwanyōwa ökö kī kunōn më kelowa kany, ëk ëmīwa lobo na ën okwongere nī ebino miö both kwerewa. 24 Rwoth öcīkōwa më lübö cīk nī kibëc ëka më wörö Rwoth Obanga onu, ëk ebed na bër ī karë kibëc ëka ebed na kwô, kite na tye ködë tin. 25 Ka onu ëgwökërë më wörö cīk nī kibëc ī nyim Rwoth Obangawa, kite na ën öcīkō onu ködë, cë ebino bedo jö na kitegī atir.”

7 Ka Rwoth Obangawu bino kelowu ī lobo na un itye ka dönyö ïë më gamö bedo mewu, nakun ryëmö rok na pol ökö kī ī nyimwu—jö Kit, jö Girgac, jö Amor, jö Kanaan, jö Periji, jö Kibi ëka jö Jebuc—rok abirö na pol ëka tēk ginī na lööwu ökö 2 ëka ka Rwoth Obangawu ömīögī ī cīngwu cë ilöö unugi, myero ityek unugi ökö. Kür imok unu cīkërë ködgī, ëka kür thon inyuth kīca mörö bothgī. 3 Kür ïnyömërë unu ködgī. Kür imiī anyirawu both awopegī më anyōma onyo kür ïnyöm unu anyiragī n’awopewu, 4 piën gin bino miö ëthīnōwu lökërë ökö kī botha cë cakö ginī wörö obanga nökënë, ëka akëmö ka Rwoth bino bino ī komwu cë tyekowu ökö piöpīö. 5 Man ënë gin na myero un itīm ī komgī: Tütürö unu keno tyërgī ökö pīny, rëdh unu kite na gin ocibo më awöra ökö pīny, tong unu yen n’ëpidhō kanya gin wörö obangagī na dhakö ïë n’ecwodo nī Acera ëka ïwang unu cal jwogigī ökö kī mac. 6 Piën un ibedo jö na leng both Rwoth Obangawu. Rwoth Obangawu otyeko yëröwu kī kin lwak kibëc na tye ī wi lobo më bedo jögë na pīrgī tēk. 7 Rwoth ba oketho mar mërë ī komwu ëka öyëröwu, pathi nī un onwongo ipol unu na löö rok nökënë, piën un ënë onwongo itye unu na nōnök na löö kī kin rok

kibéc. 8 Ēntō piēn Rwoth onwongo ōmarōwu ēka ōgwōkō kwong mērē na ēn okwongo both kwerewu, ēnē ōmīō ēn ōkwanyōwu ōkō kī tēkō mē cīngē ēka ōkōkōwu kī ī lobo mē opii, kī ī tēkō ka Parao rwoth mē Ejip. 9 Myero dong inge unu nī Rwoth Obangawu ēnē Obanga; ēn obedo Obanga na genere, na gwōkō cīkērē mērē mē mar both wang rok elip kī elip na marō ēn ēka gwōkō gīnī cīk mērē. 10 Ēntō jō na dag Rwoth, ēn bino cūlō kwor ī komgī kī tyekogī; ēn ba bino galērē mē cūlō kwor ī kom jō na dag ēn. 11 Pī manōn, myero īgwōkērē unu mē lūbō cīk kibéc na an amīōwu tin. 12 Ka iwinyo unu cīk nī gīnī ēka īlūbō unu na bēr, cē Rwoth Obangawu bino mēdērē mē gwōkō cīkērē mē mar mērē kodwu kite na ēn okwongo kōdē both kwerewu. 13 Ēn bino marōwu, mīōwu gum ēka mēdō welwu. Ēn bino mīō gum both ēthīnō na un ibino nywōlō, gin na bino cēk ī pwothiwu—kalwu, kōngō ōlōk na nyen ēka mōō jeituni—ēthīn dhok na mewu ēka ēthīn rom kī dyegiwu ī lobo na ēn yam okwongere both kwerewu nī ebino mīōwu. 14 Ebino mīōwu gum na lōō rok nōkēnē; ngat mōrō ope kī ī kin cwō onyo mon na mewu na bino bedo abonge athīn, onyo leeniwu mōrō ope na bino bedo abonge athīn mērē. 15 Rwoth bino gwōkōwu kī ī kom two kibéc. Ēn ba bino mīō two na reco na un ingeo kī ī lobo Ejip makōwu, ēntō ēn bino mīō makō jō kibéc na dagwu. 16 Myero ityek unu rok kibéc na Rwoth Obangawu bino mīō ī cīngwu. Kūr kīca ōmakwu ī komgī ēka kūr īwōr unu obangagī gīnī, piēn manōn bino bedo calō pawaka mē makōwu. 17 Ka un īthamō kenwu nī, “Rok nī tēk lōōwa ōkō. Wan ebino ryēmōgī nīngō?” 18 Ēntō kūr ibed unu kī lworo ī komgī; po unu ī gin na Rwoth Obangawu ōtīmō ī kom Parao ēka jō mē Ejip kibéc. 19 Un īnēnō kī wangwu atēmātēma na dōngō, anyuth mē tango ēka gin mē aura gīnī, cīng na tēk ēka kī twērō mērē na Rwoth Obangawu okelowu kōdē. Rwoth Obangawu bino tīmō nī kōmanōn ī kom rok kibéc na un kobedini ilworo. 20 Rwoth Obangawu bino oro lworo ī kin-gī naka thon jō n’ōkwō n’opono gīnī kī bothwu ebino tyekogī ōkō. 21 Kūr ibed unu kī lworo ī komgī, piēn Rwoth Obangawu na tye ī kinwu, ēn obedo Obanga na dit ēka ngat na myero elwor. 22 Rwoth Obangawu bino ryēmō rok nōn gīnī ōkō kī ī nyimwu momoth. Ba ebino yeo niwu mē tyekogī ōkō wang acēl, piēn wel leeni na ger rōmō mēdērē ēka twērō yelowu. 23 Ēntō Rwoth Obangawu bino mīōgī ī cīngwu, ēn bino mīōgī rubere rwōk naka ibino unu tyekogī ōkō. 24 Ēn bino mīō rwodhigī ī cīngwu, ēka ibino unu rwenyo nīng-gī ōkō kī ī wi lobo. Ngat mōrō ope na bino cung ī nyimwu; ibino unu tyekogī ōkō. 25 Myero īwang unu cal obangagī gīnī kī mac. Kūr īnīr

unu ryal onyo gol na tye ī komgī, ēka kūr īkwany mē bedo mewu onyo bino dōkō pawaka mē makōwu, piēn obedo gin mē kwere both Rwoth Obangawu. 26 Kūr ikel unu gin mōrō mē kwere ī udiwu na mīō etyekowu ōkō calō gin. Myero īkwēr ēka idag unu gin nōn, piēn obedo gin na myero etyek ōkō.

8 Gwōkērē unu mē lūbō cīk kibéc na an atye ka mīōwu tin, ēk ibed unu na kwō ēka īnya unu na pol, īcīdh īdōny unu ī lobo na Rwoth ōcīkērē kī kwong both kwerewu. 2 Myero ipo unu kite na Rwoth Obangawu ōtēlōwu kōdē kī ī thim pī mwaka pyer angwēn, mē mīōwu bedo na mwol ēka mē tēmōwu ēk enge gin n’onwongo tye ī cwinywu, ka onyo ibino unu gwōkō cīk mērē onyo pe. 3 Ēn ōmīō īdōkō unu na mwol, ōmīō kec onekowu, cē ōpīdhōwu kī mana, na un onyo kwerewu onwongo ba ongeo, mē pwonyowu nī dhanō ba kwō kī cem kēkēn ēntō kwō kī kōp kibéc na donyo kī ī dhō Rwoth. 4 Bōngwu ba obino otiī kī ī komwu ēka tyēnwu ba obino okwot ī mwaka pyer angwēn nī kibéc. 5 Myero dong inge unu kī ī cwinywu nī kite na calō dhanō pwonyo athīn mērē, Rwoth Obangawu thon pwonyowu. 6 Myero īgwōk unu cīk ka Rwoth Obangawu, nakun iwotho unu ī yoo mērē ēka ilworo unu ēn. 7 Piēn Rwoth Obangawu tye ka kelowu ī lobo na bēr—n’opong kī ora, kulo mē pii ēka wang pii na mōl ī ora ēka wi kite; 8 lobo na tye kī ngano ēka cayiri, ōlōk ēka yen ōlam, okwer pomegranat, lobo na mōō jeituni ēka mōō kic mōl kī iē; 9 lobo na cem ba nōnōk iē ēka gin mōrō ope na bino rem kī bothi; lobo na kite mērē obedo nywenyo ēka ītwērō kūnyō mola kī ī kite. 10 Ka icemo ēka iyeng unu, pak unu Rwoth Obangawu pī lobo na bēr na ēn ōmīōwu. 11 Gwōkērē unu ēk kūr wiwu owil ōkō ī kom Rwoth Obangawu, na nwongo ba īgwōkō unu cīk mērē kibéc na an atye ka mīōwu tin. 12 Ka icemo ēka iyeng unu, ka īgērō unu udi na bēcō mē bedo iē, 13 ka dhok, rom kī dyegiwu ōnya ōdōkō na pol, ka ryalwu ēka gol ōmēdērē ēka kī jami kibéc na un itye kōdgi ōnya, 14 cē cwinywu cakō wakērē ēka wiwu bino wil ōkō ī kom Rwoth Obangawu n’ōkwanyōwu kī ī lobo Ejip, lobo mē opii. 15 Ēn ōtēlōwu kī ī thim na lac ēka na lik, lobo mē ōrīō na pii ope iē, na thwone ēka ith tye gīnī iē. Ēn ōmīōwu pii n’ōya kī ī lēla. 16 Ēn ōpīdhōwu kī mana kī ī thim, gin mōrō na kwerewu ba ongeo anaka yam, mē mīōwu bedo na mwol ēka mē tēmōwu ēk ī ajiki nyimwu obed na leng. 17 Gwōkērē unu ēk kūr ikob kenwu nī, “Tēkōna ēka twērō mē cīnga ēnē ōmīa anwongo lōnyō nī.” 18 Ēntō po unu ī kom Rwoth Obangawu, piēn ēnē mīō tēkō mē nwongo lōnyō, ēk omok cīkērē mērē na ēn

okwongo both kwereu, kite na tye kôdê tin. 19 Ka wiwu bino wil ôkô i kom Rwoth Obangawu, cê ilûbô unu obanga nôkênê, iwôrô êka iryebere unu piny i nyimgi, an akobo kôp mē caden bothwu tin nî ebino tyekowu ôkô. 20 Ebino tyekowu ôkô calô rok nôkênê na Rwoth otyekogi ôkô kî i nyimwu, cê ebino tyekowu ôkô pî kwêrô winyo dwôn Rwoth Obangawu.

9 Winy unu, jô Icarael. Un kobedini icwôk unu ngôlô kulo Jordan yo lôka, êk icidh unu mē ryêmô rok na tye kunôn, jô na tēk na lôôwu ôkô, na tye kî peci na lac kî cêl na thuno naka i polo. 2 Jô nôn tēk êka boco gîni, jô Anak! Un ingeo kôp i komgi, êka iwinyo unu ka ekobo ni: "Nga na twêrô cung i nyim jô Anak mē lwēny kôdgi?" 3 Êntô myero inge unu tin nî Rwoth Obangawu ênê ngat na tye ka woth i nyimwu na calô mac na wangô piny. Ên kikome ênê bino tyekogi, ên bino lôônôgi ôkô kî i nyimwu. Un ibino ryêmôgi êka ibino nekogî piôpiô, kite na Rwoth ôcikêrê kôdê bothwu. 4 Kinge na Rwoth Obangawu ôryêmôgi ôkô kî i nyimwu, kûr ikob kî i cwinywu nî, "Rwoth okela kany mē gamô lobo ni piên an kitenâ atîr." Manôn obedo pî tîm na reco mē rok ni ênê ômiô Rwoth bino ryêmôgi ôkô kî i nyimwu. 5 Pathî pî kite atîrwu onyo pî leng cwinywu nî un icidh mē gamô lobogi; êntô pî tîm na reco mē rok ni gîni, Rwoth Obangawu bino ryêmôgi ôkô kî i nyimwu, êk ocob gin na ên okwongo both kwarôwu Abraam, Icaka êka Jakob. 6 Myero iniang unu nî pathî pî kite atîrwu ênê ômiô Rwoth Obangawu tye ka miôwu lobo ni na bêr êk igam unu obed mewu, piên un jô na ngutwu nwang. 7 Po unu i kôp ni êka kûr imiî wiwu owl kite na un imiô akêmô ômakô Rwoth Obangawu kî i thim. Cakêrê i ninô na un iya kî Ejip naka ithuno unu i kabedo ni, un ibedo jêm i kom Rwoth. 8 I kidi mē Koreb, un imiô Rwoth obedo k'akêmô, cê ômiô akêmô ômakô ên rwôk i komwu mē tyekowu. 9 I karê na an aidh malô i wi kidi mē gamô kite n'apada, kite n'apada mē cikêrê na Rwoth oketho kodwu, an abino abedo i wi kidi pî ninô pyer angwên kiceng êka kiwor, nakun ba acemo êka ba amodho pii. 10 Rwoth ômia kite ariô n'apada n'Obanga onwongo ôcôô kî cingê. Cîk kibêc onwongo tye i komgi na Rwoth ôtitô bothwu kî i mac na lyêl i wi kidi i ninô mē athuko. 11 Kinge ninô pyer angwên kiceng êka kiwor, Rwoth ômia kite ariô n'apada, kite n'apada mē cikêrê. 12 Cê Rwoth okobo nîna nî, "Yaa malô kî kany icidh yo piny piôpiô, piên jogi na in ikelogi kî i Ejip ôtimô gîni bal. Gîn ôlôkêrê gîni ôkô piôpiô kî i kom gin na an acikôgi êka ôyûbô gîni cal jwôk n'obedo nywenyo." 13 Rwoth okobo nîna nî, "An anênô jô ni êka obedo gîni jô na

ngutgi nwang rwôk! 14 Wêka an kēna, êk atyekgi êka ajwa nying-gi ôkô kî i thê polo. An abino miôni idôkô rok na tēk êka i'nya unu na pol na lôôgi." 15 Cê an alôkara, aidho yo piny kî i wi kidi, nakun kidi tye ka lyêl kî mac. Êka kite ariô n'apada mē cikêrê onwongo tye i cinga gîni. 16 I karê na an anênô, anênô nî i'balô unu i kom Rwoth Obangawu; un i'ûbô cal jwôk na cal kî wod thwôn pîrwu. Un ilôkêrê ôkô piôpiô kî i yoo na Rwoth onwongo ôcikôwu. 17 Cê an amakô kite ariô n'apada êka abologi ôkô piny kî i cinga gîni, angênô ôkô na thithinô i nyimwu. 18 Kinge dôki abuto piny ariyeba cwiny i nyim Rwoth pî ninô pyer angwên kiceng êka kiwor; an ba acemo êka ba amodho pii piên pî bal kibêc na un itimô, nakun itimô unu gin na rac i wang Rwoth n'ômîô akêmô ômakô ên. 19 An abedo kî lworo i kom akêmô ka Rwoth na tēk, piên akêmô onwongo ômakô ên rwôk i komwu mē tyekowu ôkô. Êntô Rwoth dôki obino owinya. 20 Akêmô ômakô Rwoth rwôk i kom Aron mē neko ên, êntô i caa nôn an alêgô pîrê thon. 21 An thon akwanyô gin mē balwu nôn, wod thwôn na un i'ûbô, cê awangô ôkô kî mac. Cê anginginyô êka amiô ôdôkô buru na pwôth calô apua, cê aonyô apua mērê i kulo na mól piny kî i wi kidi. 22 Un thon imiô akêmô ômakô Rwoth kî i Tabera, i Maca êka i Kibrot Ataaba. 23 Êka i karê na Rwoth oorowu kî i Kadec Barnea ên okobo nî, "Cidh unu malô êka igam unu lobo na an amiôwu," êntô un ibino ijêm unu i kom Rwoth Obangawu. Un ba ibedo kî gen i kome êka ba iwinyo unu ên. 24 Un ibedo jêm i kom Rwoth anaka i ninô na an angeowu kôdê. 25 An abuto ariyeba cwiny i nyim Rwoth pî ninô pyer angwên nôn kiceng êka kiwor piên Rwoth onwongo okobo ni ebino tyekowu ôkô. 26 Cê an alêgô both Rwoth êka akobo nî, "Rwoth Obanga Won Twêr, kûr ityek jogi, jô na megî na pîrgi tēk na in ikôkôgi kî tēkôni êka ikwanyôgi kî i Ejip kî tēkô mē cingi. 27 Po i kom aticni Abraam, Icaka, êka Jakob. Kûr ibed ka thamô pî ngut na nwang, timgi na reco êka balgi. 28 Pî manôn lobo na in ikwanyôwa kî i'ê bino kobo nî, 'Rwoth onwongo ba rômô terogi i lobo na ên ôcikêrê kôdê bothgi, êka piên ên onwongo dag-gi, ên ôkwanyôgi êk enekgi ôkô i thim.' 29 Êntô gin obedo jogi na pîrgi tēk na in ikwanyôgi kî tēkôni êka kî twêroni."

10 I karê nôn Rwoth okobo nîna nî, "Yûb kite ariô n'apada calô mē acêl ca êka ibin yo botha i wi kidi malô. Yûb thon canduk mē bao. 2 An abino côônô i kom kite n'apada kôp n'onwongo tye i kom kite n'apada mē acêl ca, na in ibino ingenyôgi ôkô. Cê in myero ikethgi i canduk." 3 Cê an ayûbô canduk

kĩ i kom yath alwĩi ěka an ayũbũ kite ariũ n'apada calũ mē acēl ca gĩnĩ. Ěka an acidhũ malũ i wi kidi ki kite ariũ n'apada i cĩnga gĩnĩ. 4 Rwoth ōcũũ i kom kite n'apada ni ngũ na ěn onwongo ōcũũ cũn, cik apar na ěn onwongo ōtĩtũ bothwu ki i mac, i nĩnũ na un icũkũrē i tyēn kidi. Rwoth ōmĩũgĩ botha. 5 Cē an adwogo pĩny ki i wi kidi ěka aketho kite n'apada i canduk n'onwongo an ayũbũ kite na Rwoth ōcĩka kũdē ěka pod tye gĩnĩ kunũn. 6 (I karē nũn jũ Icarael ōya gĩnĩ ki i Beerot Bene Jakan cē ōcidhũ gĩnĩ i Mocera. Ki kunũn Aron ōthũũ ěka eiko, cē wode Eleajar oleo ka tyēnē na calũ alamdhũk. 7 Gĩn ōya ki kunũn, cē ōcidhũ gĩnĩ yo Gudugoda ěka yo Jotbata, lobo na pii dwong iē. 8 I karē nũn Rwoth opoko kaka ka jũ Lebi path mē tingo canduk mē cikũrē ka Rwoth, mē cung i nyim Rwoth mē tio tic ěka mē lamũ gum ki nyĩngē, kite na gĩn pod tĩmũ kũdē tin. 9 Manũn ěnē ōmĩũ jũ Lebi ba tye gĩnĩ ki dul lobo mũrũ n'obedo mēgĩ i kin utmegogĩ; Rwoth ěnē obedo gĩn n'epoko nĩgĩ kite na Rwoth Obangawu okobo bothgĩ kũdē.) 10 An abedo i wi kidi pi nĩnũ pyer angwēn kiceng ěka kiwor, kite na an abedo kũdē i mē acēl ca. Rwoth obino owinyo lēgana i karē nũn thon cē Rwoth oyeo ni ba ebino tyekowu. 11 Rwoth okobo nĩna nĩ, “Yaa malũ, itēl wi jĩi ěk ōdũny ěka ōgam gĩnĩ lobo na an akwongara mē miũ both kweregĩ.” 12 Kobedini dong, un jũ Icarael, ngũ na Rwoth Obangawu mĩtũ ki bothwu? Gĩn na Rwoth Obangawu mĩtũ ki bothwu ěnē ni lwor unu Rwoth Obangawu, iũb unu yodhi mērē kibēc, iĩmar unu ěn, ěka itii unu both Rwoth Obangawu ki cwinywu kibēc ěka ki tipowu kibēc. 13 Gwũk unu cik ka Rwoth kibēc na an atye ka miũwu tin pi bēr bedowu. 14 Nēn, kadĩ jami kibēc na tye iē malũ i wi polo rwũk, lobo ěka jami kibēc na tye iē obedo mē ka Rwoth Obangawu. 15 Ěntũ Rwoth oketho cwinye i kom kwerewu ěka ōmarũgĩ cē obino ōyērwũ, ěkwaēgĩ, ki i kin rok kibēc, kite na tye kũdē tin. 16 Pĩ manũn, bed unu ki winy both Rwoth ěka iũwēk unu bedo jũ na ngutgĩ nwang. 17 Piēn Rwoth Obangawu ěnē obedo Obanga na lũũ obanga nũkēnē gĩnĩ ěka Rwoth ka rwodhi nũkēnē. Ěn obedo Obanga na dit, na tye ki tēkũ ěka Obanga na myero elwor. Ěn ba lengere i ngũlũ-kũp ěka ba wiũrē ki iĩm. 18 Ěn ngũlũ kũp n'atĩr i kom athĩn kic ěka i kom dha thũũ. Nyutho mar mērē both Erok ěka miũgĩ cem ki gĩn mē aruka. 19 Un myero iĩmar Erok, piēn un thon onwongo ibedo unu Erok i lobo Ejip. 20 Wũr Rwoth Obangawu, tii unu nĩnē kēkēn ěka ikwong unu kwong na mewu ki nyĩngē. 21 Ěn obedo Obanga na myero iĩpak unu; ěn obedo Obangawu, n'ũtĩmũ niwu jami na dũngũ ěka tango mē aura na un iĩnēnũ ki wangwu. 22

Kwewewu n'obino ōcidhũ gĩnĩ i Ejip onwongo tye pyer abĩrũ kibēc, ěka Rwoth Obangawu ōmiũwu iĩdũkũ na pol na calũ cēn na tye i polo.

11 Myero iĩmar unu Rwoth Obangawu ěka iĩtim unu gĩn na ěn mĩtũ; gwũk unu cik mērē kibēc, ěka gĩn na ěn ōcĩkũ i karē kibēc. 2 Po unu tin i kom pwony na Rwoth Obangawu opwonyowu kũdē, an ba atye ka twak k'ēthĩnũwu ěntũ kodwu piēn un ingeo ěka iĩnēnũ unu dit mērē, cĩngē na tēk ěka twērũ mērē. 3 Gĩn ba ōnēnũ tango ěka gĩn mē aura na ěn ōtĩmũ i Ejip both Parao rwoth mē Ejip ěka i lobo mērē kibēc; 4 gĩn na ěn ōtĩmũ i kom acikari mē Ejip, i kom angole ěka gadigadigĩ, i karē na ěn ōmĩũ pii mē Nam na Kwar ōmwũnyũgĩ ōkũ nakun onwongo gĩn tye ka ryēmũ kũrwu, ěka ki kite na Rwoth otyekogĩ kũdē. 5 Gĩn ba ōnēnũ gĩn na ěn ōtĩmũ niwu i thim na un bara ithuno i kabedo ni, 6 onyo gĩn na ěn ōtĩmũ i kom Datan ěka Abiram, ēthĩnũ k'Eliaab wod ka Reuben, i karē na Rwoth ōmĩũ ngũm ōyabērē ki kanya jũ Icarael onwongo bedo iē, cē ōmwũnyũgĩ ōkũ ki jũ kibēc mē dholokegĩ, kēmagĩ ěka gĩn na kwũ kibēc n'onwongo obedo mēgĩ. 7 Ěntũ un ěnē iĩnēnũ ki wangwu jami na dũngũ ni kibēc na Rwoth otio. 8 Pĩ manũn, myero iĩgwũk unu cik kibēc na an atye ka miũwu tin, ěk ibed unu ki tēkũ mē cidhũ dũnyũ iē ěka gamũ lobo na un itye ka ngũlũ kulo Jordan mē bedo mewu, 9 ěk ibed unu pi karē na lac i lobo na Rwoth okwongo mē miũ both kwerewu ěka both ěkwaēgĩ, lobo na mio na cak ki mũũ kic mũl ki iē. 10 Lobo na un itye ka dũnyũ iē mē gamũ ba obedo calũ lobo Ejip, ki kanya un iya unu ki iē, kanya un iĩpidhũ kodhiwu ěka iũnyũ unu pii tē ki cĩngwu calũ pwodho ngwedo. 11 Ěntũ lobo na un itye ka cidhũ mē ngũlũ kulo Jordan mē gamũ ěk obed mewu, obedo lobo n'obedo kitekite ěka ora gĩnĩ, lobo na kũth dwong iē. 12 Obedo lobo na Rwoth Obangawu gwũkũ; wang Rwoth Obangawu tye iē i karē kibēc, cakũrē i acaki mwaka naka i ajiki mērē. 13 Cē ka un ibino lũbũ unu cik kibēc na an atye ka miũwu tin—mē marũ Rwoth Obangawu ěka mē tic nĩnē ki cwinywu kibēc ěka ki tipowu kibēc— 14 cē ěn bino miũ kũth cwe i lobowu i karē mērē kikokome, kũth mē cwĩr ěka kũth mē oro, ěk icũk unu cemwu, kũngũ ōlũk na nyen ěka mũũ jēituni. 15 Ěn bino miũ lum pi dhok na mewu, ěka ibino unu cem cē iyeng unu. 16 Gwũkũrē unu ěk kũr iĩmĩĩ thamawu ōbwũlwũ mē lũkũrē ōkũ mē wũrũ obanga nũkēnē gĩnĩ ěka ryebere pĩny i nyĩngĩ. 17 Ka iĩtĩmũ unu ni kũmanũn, akēmũ bino makũ Rwoth i komwu, cē jũkũ kũth ōkũ ěka miũ kũth ba cwe. Lobo ba bino cēgũ cem ěka ebino tyekowu ōkũ ki i lobo na bēn na Rwoth

tye ka miöwu. 18 Keth unu köpna ni i cwinywu éka i thamawu; twe unugi na calö anyuth i ngut cingwu éka irukugi i terinyimwu. 19 Pwony unu éthinöwu ki cik nön, twak köp nön bothgi ka in itye pacö, ka in itye iwoth i yoo, ka ibuto piny éka ka in iya malö ki i kabuto. 20 Cöögí i kom yen dholokek më udiwu éka i kom dhö wangkacwu, 21 ék nönöwu éka më k'ékwaéwu obed na pol i lobo na Rwoth okwongere më miö both kwerewu, pi karé kibéc na polo pod bino bedo ködë malö i wi ngöm. 22 Ka igwökö unu cik ni kibéc na an atye ka miöwu ék ilüb unu—më marö Rwoth Obangani, ilüb unu yodhi méré kibéc éka më moko i kome— 23 cé Rwoth bino ryémö rok ni kibéc na tye i nyimwu éka un ibino ryémö rok na dito éka na ték na lööwu. 24 Kabeto kibéc na tyénwu bino nyönö bino bedo mewu. Wang lobowu bino cakéré ki i thim thuno ködë yo Lebanon éka cakéré ki i kulo më Euparate naka yo nam Mediteranian. 25 Ngat mörö ope na bino cung i nyimwu. Rwoth Obangawu bino miö jiri podho cwiny éka lworo pirwu i kom lobo kibéc na un ibino cidhö yo ië, kite na én öcikö ködë. 26 Nën, tin an atye ka ketho i nyimwu gum éka cen— 27 gum ka ilübö unu cik ka Rwoth Obangawu na an atye ka miöwu tin; 28 éntö cen bino maköwu ka un ikwérö lübö cik ka Rwoth Obangawu éka ilökéré unu ki i yoo na an aciköwu tin nakun iwörö unu obanga nökéne giní na un ba ingeo. 29 Ka Rwoth Obangawu dong okelowu i lobo na un ibino dönyö ië më gamö bedo mewu, myero ilam unu gum i wi kidi Gerijim éka cen i wi kidi Ebal. 30 Kite na un ingeo ködë ni kite ariö ni tye giní yo kuthö kulo Jordan, nakun cwök ki yen më More i lobo ka jö Kanaan nön na bedo giní i Araba n'opimere ki Gilgal. 31 Un icwök ngölö kulo Jordan më dönyö gamö lobo na Rwoth Obangawu tye ka miöwu. Ka igamö unu éka ibedo unu kunön, 32 gwökéré unu më lübö cik kibéc na an atye ka pwonyowu tin.

12 Man éné cik kibéc na myero ilüb unu na bér i karé kibéc na un ibino bedo i lobo na Rwoth, Obanga ka kwerewu, ömïöwu më gamö. 2 Un myero imuk kabeto kibéc, kanya Erok na un iryémö ki i lobogi wörö obangagi ië. Kabeto na tye malö i wi kite na boco éka i thë yen na potgi mar. 3 Un myero imumuko keno tyérgi, nginginyö unu kitegi na gin wörö éka iwang unu yen n'ëpidhö kanya éwörö obangagi na dhakö ië n'ecwodo ni Acera; tong unu cal jwogi obangagi éka imii unu nying-gi orweny ökö ki i kabeto nön giní. 4 Un myero kür iwör Rwoth Obangawu i kite na gin wörö k'obangagi ködë. 5 Éntö Rwoth Obangawu bino yérö kany mörö ki i kakawu

kibéc. Kanya ebino wörö nyingé ië. Kabeto nön éné un myero icidh éka iwör unu Rwoth Obangawu ië. 6 Kunön éné un myero iter tyér awanga na mewu, tyérwu, acél më apar na mewu, mic na piré ték, gin na in ikwongo akwonga më miö, mic na cwinyi öpwöyö, éka kaö më dhokwu éka rom ki dyegiwu. 7 Kunön, un ibino cem i nyim Rwoth Obangawu, kanya acél ki jö më udiwu éka ibino bedo unu ki yom cwiny i kom jami kibéc na un iketho cingwu ië pién Rwoth Obangawu ömïöwu gum. 8 Un myero kür itim kite na onu étimö ködë tin kany, na ngat acélacél timö gin na én nënö ni bér niné, 9 pién un bara ithuno i kabeto na myero iywe unu ië éka lobo na Rwoth Obangawu tye ka miöwu më bedo mewu. 10 Éntö un ibino ngölö kulo Jordan éka ibedo unu i lobo na Rwoth Obangawu tye ka miöwu më bedo mewu. Én bino miöwu iyweo ki i kom langwu kibéc n'ögüröwu ék ibed unu abonge pékö mörö. 11 Cé un myero ibin unu i kabeto acél na Rwoth Obangawu öyérö më wörö nyingé ië. Kunön éné un myero ikel jami kibéc na an aciköwu ië: tyér awanga na mewu, tyérwu, acél më apar na mewu, éka mic na piré ték na un ikwongo akwonga më miö both Rwoth. 12 Un ibino bedo ki yom cwiny i nyim Rwoth Obangawu, kanya acél k'awopeni, anyirani, etic na cwö, etic na mon éka jö Lebi na bedo giní i peciwu; po ni jö Lebi ba ebino poko nigí lobo mörö onyo gin mörö më bedo mëgi. 13 Gwökéré unu ék kür ityér tyér awanga na mewu i kabeto mörö kékén na un inénö; 14 éntö ibino unu tyérö tyér awanga i kabeto na Rwoth bino yérö ki i kakawu mörö acél. Kunön éné un ibino timö jami kibéc na an aciköwu. 15 Éntö un itwérö neko leeniwu më pacö më acamawu ki i peciwu mörö kékén kite na cwinywu mitö na lübéré ki gum na Rwoth Obangawu miöwu. Jö kibéc na cik ögengö onyo na cik ba ögengö twérö camö giní ringo nön, calö ringo egwethe onyo pura. 16 Éntö kür myero icam unu remo; öny unu ökö piny calö pii. 17 Kür myero icam ki i peciwu acél më apar më kalwu, onyo kóngö ölökwu na nyen, onyo möö jeituniwu, onyo éthinö kaö më rom, dyegi éka dhok, onyo gin mörö kékén na in ikwongo më miö, onyo mic na cwinywu öpwöyö, onyo mic na pürgi ték. 18 Éntö un ibino cem i nyim Rwoth Obangawu i kabeto na én bino yérö. Un, awopewu éka anyirawu, eticwu na cwö éka eticwu na mon, éka jö Lebi ki i peciwu. In myero ibed ki yom cwiny i nyim Rwoth Obangani i jami kibéc na in ibino ketho cingi ië. 19 Myero igwökéré unu kür iwék unu jö Lebi ata i karé kibéc na un ibedo i lobowu. 20 Ka Rwoth Obangawu önyaö wang lobowu kite na én öciköwu ködë, cé cwinyi ömitö ringo éka ikobo ni, “An

amitō camō ringo," cē in itwērō camō ringo kite na cwinyi mitō ködē. **21** Ka kabedo n'ēwörō nying Rwoth Obangawu tye na bor kī kanya un itye iē, cē un itwērō neko leeni kī i kom rom, dyegi ēka dhokwu na Rwoth ōmīōwu, kite na an acikōwu ködē. Un myero icam ringo kite na cwinywu mitō ködē kī i peciwu. **22** Ngat mōrō kēkēn, kadī obedo dhanō na cik ōgēngō onyo na cik ba ōgēngō twērō camō ringo nōn, kite na un icamō kī ringo egwethe onyo pura. **23** Ēntō myero kūr icam unu remo, piēn kwō tye i remo ēka kūr myero icam unu kwō kanya acēl kī ringo. **24** Kūr myero icam unu remo; ōny unu ōkō pīny calō pii. **25** Kūr icam unu remo, ēk nyimwu k'ēthīnōwu na bino lūbō kōrwu obed na leng, piēn nwongo itīmō unu gin na tye atir i wang Rwoth. **26** Ēntō kwany jamini na leng kibēc ēka gin mōrō kēkēn na in ikwongiri mē mīō, ēka icidh i kabedo na Rwoth bino yērō. **27** Mīi unu tyēr awanga na mewu i wi keno tyēr ka Rwoth Obangawu, ringo kanya acēl kī remo. Remo mē tyērwu myero ēōny i kom keno tyēr ka Rwoth Obangawu, ēntō un itwērō camō ringo ōkō. **28** Gwōkērē unu mē lūbō cik ni gini kibēc na an atye ka mīōwu, ēk nyimwu obed na leng i karē kibēc, k'ēthīnōwu na bino lūbō kōrwu, ka un ibino timō gin na bēr ēka na tye atir i wang Rwoth Obangawu. **29** Rwoth Obangawu bino tyeko rok ōkō kī i kabedo na un itye ka cidhō mē gamō lobogī, ka dong igamō unu, ēka ibedo unu iē, **30** kinge na dong etyekogī ōkō kī i nyimwu, gwōkērē unu ēk kūr imok unu i owico mē penyo pī obanga na gin wōrō ēka ikob unu nī, "Rok ni wōrō obangagī nīngō? Wan thon ebino timō nī kōmanōn." **31** Un myero kūr iwōr unu Rwoth Obangawu kite na gin wōrō k'obangagī ködē, piēn i wōrō obangagī, gin timō jami kibēc mē kwer na Rwoth ba mitō. Gin thon tyērō awope ēka anyiragi i wi keno tyēr i nyim obangagī. **32** Myero ilūb unu gin na kibēc na an acikōwu ködē. Kūr imēd onyo ikwany mōrō kī iē.

13 Ka adwarpīny onyo ngat mōrō na leko lek onen i kinwu cē onyutho niwu anyuth mē tango onyo gin mē aura, **2** ēka ka anyuth onyo gin mē aura ōtimērē, cē adwarpīny okobo nī, "Eru ēwōr obanga nōkēnē" (obanga na un bara ingeo) "ēka eru ēwōrgi." **3** Un myero kūr iwiny kōp k'adwarpīny onyo alek nōn. Rwoth Obangawu tye ka tēmōwu mē nēnō ka un imarō ēn kī cwinywu kibēc ēka kī tipowu kibēc. **4** Myero ilūb unu Rwoth Obangawu nakun ilworo unu ēn. Gwōk unu cik mērē kibēc ēka iwōr unu ēn; tii unu nīnē ēka imok unu i kome. **5** Adwarpīny onyo alek nōn myero enek ōkō piēn ēn opwonyo pwony mē jēm i kom Rwoth Obangawu, n'ōkwanyōwu ōkō kī i lobo

Ejip ēka ōkōkōwu ōkō kī i lobo mē opii. Adwarpīny onyo alek nōn ōtēmō mē lōkōwu kī i yoo na Rwoth Obangawu ōcikōwu mē lūbō. Un myero ikwany gin na rac ōkō kī i kinwu. **6** Ka omeru, onyo wodi onyo nyari, onyo dhakō na in imarō, onyo okoneni na cwōk kodi obwoli imūng nakun kobo nī, "Ērō ēcidhī ēwōr obanga nōkēnē gini" (obanga na kwereni onyo in ba ingeo, **7** obanga ka jō n'oguri, kadī tye gini na cwōk onyo na bor, yaa kī i ajiki mē thwok lobo naka i thwok lobo nōkēnē), **8** in myero kūr iyee onyo kūr iwiny kōp mērē. Kūr kīca omaki i kome ēka kūr imūng nīnē. **9** In myero inek ēn ōkō. In ēnē myero icak tingo cingi mē neko ēn ēka jō kibēc bino tingo cing-gi mē neko. **10** Un ibino celo ēn kī kite naka i thōō, piēn ēn ōtēmō mē lōkōwu ōkō kī i yoo ka Rwoth Obangawu, n'ōkwanyōwu ōkō kī i lobo Ejip, n'obedo kabedo mē opii. **11** Cē jō Icarael kibēc bino winyo ēka bedo gini kī lworo, ēka ngat mōrō ba dōkī bino timō gin na rac na cal kī man i kinwu. **12** Ka iwinyo unu kī i pacōwu mōrō acēl, na Rwoth Obangawu tye ka mīōwu mē bedo iē, nī **13** jō mōkō na kitegī reco ōya kī i kinwu ēka ōywaō thama ka jō na bedo i pacō nōn nakun kobo gini nī, "Eru ēcidhī ēka ēwōr obanga nōkēnē gini" (obanga na un bara ingeo). **14** Cē myero ipeny unu kōrē na bēr ēka irang unu kī ryēkō. Ka adyer inwongo unu nī tye atir ēka enwongo nī gin mē kwer ni ōtimērē i kinwu, **15** cē myero inek unu jō na bedo i pacō nōn kibēc kī pala abadē. Tyekugī ōkō kibēc, jō kibēc na tye iē ēka līm kibēc na kwō myero enekgī ōkō. **16** Cōk unu jami kibēc na un iyakō i dyere pacō kanya jīi gūrē iē, ēka iwang unu pacō nōn kī jami kibēc na tye iē na calō tyēr awanga both Rwoth Obangawu. Pacō nōn bino bedo wi obur na twal na ba dōkī ebino gērō. **17** Un myero kūr ikwany unu gin mōrō n'onwongo ētyērō ōkō. Cē Rwoth bino kwanyō akēmō mērē na ger rwōk ōkō, ēka bino timō niwu kīca, nakun nyutho cwiny mē kīca i komwu. Cē bino mīō welwu nya na pol, kite na ēn ōcikērē ködē kī kwong both kwerewu. **18** Pī manōn myero iwiny unu Rwoth Obangawu, mak unu cik mērē kibēc na an atye ka mīōwu tin ēka itim unu gin na tye atir i nyime.

14 Un ibedo ēthīnō ka Rwoth Obangawu. Kūr ingōl unu komwu onyo ilyēl unu terinyimwu pī kwero cōla pī jō n'ōthōō. **2** Piēn un ibedo jō na leng both Rwoth Obangawu. Ēn ōyērōwu kī kom jō kibēc na bedo gini i wi lobo ēk ibed unu jōgē na pīrgī tēk. **3** Kūr icam unu gin mōrō mē kwer. **4** Man ēnē leeni na un itwērō camōgī: dhyang, rōmō, dyēl, **5** aburi, egwethe, rūda, pura, dyegi kī rom na bedo i wi kite. **6** Un itwērō camō lee mōrō kēkēn n'obokoro tyēnē

opokere ië ariö ëka na dwongo lum cë nyamö dökí. 7 Ëntö leeni na dwongo lum cë nyamö dökí, onyo n'obokoro tyën-gí opokere ië ariö, na un ba ibino camö ënë: kinaga, apwöü ëka oduka. Kadi bed nî gin dwongo lum cë nyamö dökí, gín ope k'obokoro tyën-gí n'opokere ië ariö. Gín obedo gin na cik ögëngö kî bothwu. 8 Pünö thon obedo gin na cik ögëngö; kadi bed obokoro mërë opokere ië ariö, ën ba dwongo lum cë nyamö dökí. Un myero kür ícam ringogí onyo gudo komgí n'öthöö. 9 Kí kom gin na kwö kibëc na tye k'oguro na bith í komgí ëka pök komgí. 10 Ëntö gin mörö kékën na ba tye k'oguro na bith í komgí ëka pök komgí, kür ícam unu; piën obedo gin na cik ögëngö niwu më camö. 11 Un itwëro camö winyü mörö kékën na cik ba ögëngö. 12 Ëntö man ënë winy na un myero kür ícam: jür, acuth, acuth na cöl, 13 ocucu, koth okolokol kibëc, 14 koth akürük kibëc, 15 udo, tula, awëwët, koth ölwíthölwith kibëc, 16 tula na thithinö, tula na döngö, tula na tar, 17 tula më thim, jür na döngö, koth winy më kulo kibëc, 18 okolokol, öthëba kori ëka olikolik. 19 Kudi kibëc na tye kí bwomgi obedo gin na cik ögëngö kî bothwu; kür ícamugí. 20 Ëntö gin mörö kékën na cik ba ögëngö na tye kí bwomgi, un itwëro camö. 21 Kür ícam unu gin mörö na in inwongo öthöö kënë. Un itwëro miö both arok mörö na bedo í pacöwu ëk ën öcam; onyo itwëro unu cadhö both welo mörö. Un ibedo jö na leng both Rwoth Obangawu. Kür ited unu ringo athin dyël kí cak k'aya mërë. 22 Myero iketh unu acël më apar më cem n'öcëk kí í pwothiwu thenge mwaka kí mwaka. 23 Cam unu acël më apar më kalwu, köngö ölökwu na nyen, möö jeituniwu ëka ëthin kaö më rom kí dyegi ëka dhokwu í nyim Rwoth Obangawu í kabedo na ën bino yëro më wöro nyingë ië. Ëk ipwony unu kite më lworo Rwoth Obangawu í karë kibëc. 24 Ëntö ka kabedo nön tye na bor ëka Rwoth Obangawu ömiöwu gum, ëka ba irömö unu yëö acël më apar na mewu (piën kabedo na Rwoth Obangawu bino yëro më wöro nyingë ië tye na bor), 25 cë ícadh unu acël më apar ëk ilök unu obed cíling ëka iter unu cíling í kabedo na Rwoth Obangawu bino yëro. 26 Tii unu kí cíling më wilö gin mörö kékën na un ímitö: dhok, rom, köngö ölökö onyo kit köngö mörö na këc, onyo gin mörö kékën na in ímitö. Cë in kanya acël kí jö më odi ibino cem unu kunön í nyim Rwoth Obangawu kí yom cwiny. 27 Kür iwëk jö Lebi na bedo giní í peciwu ata; piën gin ba tye kí lobo mörö onyo gin mörö n'obedo mëgí. 28 Í ajiki më mwaka adek adek, kel unu acël më apar më gin n'öcëk bothwu kibëc ëk íkan unu í peciwu, 29 cë jö Lebi (n'ope giní kí lobo mörö n'obedo

mëgí), Erok mörö na bedo í kinwu, ëthinö kic, ëka mon thöo na bedo giní í peciwu twëro bino giní ëka cemo cë yeng, ëk Rwoth Obangawu ömiöwu gum í tic kibëc na cingwu bino gudo.

15 Í ajiki më mwaka abirö abirö un myero ijäl benyiwu ökö. 2 Man ënë kite na myero ëtím ködë: Ngat acëläcël n'ömiö den both awodhe n'obedo dhanö më Icarael bino jalö ökö na twal. Ën ba bino pido banya mërë kí both dhanö më Icarael onyo ömín mërë, piën karë ka Rwoth më jalö benyi etyeko kobo ökö. 3 In itwëro pido banyani kí both arok, ëntö banya na tye both dhanö më Icarael n'obedo awodhi, myero ijäl ökö. 4 Acan mörö myero kür obed í kinwu, piën Rwoth bino miöwu gum í lobo na Rwoth Obangawu tye ka miöwu më bedo mewu, 5 ka ibino tímö unu gin na Rwoth Obangawu mitö nakun ígwökö unu cik ni kibëc na an atye ka miöwu tin. 6 Piën Rwoth Obangawu bino miöwu gum kite na ën öcikö ködë ëka un ibino miö den both rok na pol ëntö ba ibino unu deno gin mörö. Un ibino löönö rok na pol ëntö rok mörö ope na bino löönöwu. 7 Ka ngat mörö n'obedo acan í kin ewodhwu n'obedo jö Icarael tye í pacö mörö acël í lobo na Rwoth Obangawu tye ka miöwu, kür ímii unu cwinywu obed na nwang onyo kür íkwër unu më könyö. 8 Nakaka manön, bed unu kí cwiny na bër ëk ímii unu den më gin mörö kékën na ën mitö. 9 Gwokiri kür tham mörö na rac ödöny í cwinyi ëka ícak kobo ní, "Mwaka më abirö, n'obedo mwaka më jalö benyi, onyingo na cwök," ëka thamani obed na rac í kom omeru n'obedo acan, cë íkwër miö gin mörö. Ën bino kok í komi í nyim Rwoth, cë in ibino dökö abal. 10 Myero ímii köny bothgí abonge cwinyi mörö na rac. Cë Rwoth Obangawu bino miöni gum í kom ticni kibëc ëka jami kibëc na in ibino ketho cingi ië. 11 Piën jö n'obedo ëcan ba bino rwenyo kí í lobowu. Pí manön an aciköwu ní myero íköny unu utmegowu na tye í lobowu ëka ëcan na mitö köny abonge cwiny mörö na rac. 12 Ka omeru onyo ameru, n'obedo dhanö më Iburu awodhi öcadhërë bothi ëka otio tic bothi pí mwaka abicël, í mwaka më abirö mërë in myero iwëk ën öcidh kí kuc. 13 Ka in iwëkö ën më cidhö, kür ímii öcidh kí cingë nono. 14 In ibino miö ën cidhö kí jami mökö kí í kom romni onyo dyegini, kal ëka köngö ölökö abonge cwinyi mörö na rac. Mii bothe kite na Rwoth Obangawu ömiöwu kí gum. 15 Myero ipo ní un onwongo ibedo opii í lobo Ejip ëka Rwoth Obangawu ökököwu. Manön ënë ömiö an tin amiöwu cik ní. 16 Ëntö ka aticni okobo nini ní, "An ba amitö cidhö kí bothi," piën ën mari kí jö më odi ëka ën tye kí kwö na bër kodi, 17 cë íkwany

pīnū ituc kī ithe ī dholokek ēka ēn bino bedo aticni pī kwō mērē kibēc. Tīm nī kōmanōn pī aticni na dhakō thon. **18** Kūr īmīī obed gin na tēk bothi mē mīō ēn cīdhō abonge cūl mōrō, piēn tic na ēn otio bothi pī mwaka abicēl kadhō tic ka ngat n'epango wang ariō. Cē Rwoth Obangawu bino mīō gum ī kom jami kibēc na in ibino tīmō. **19** Ēthīnō kaō kibēc n'ēnywōlōgī ī kin dhokni onyo romni kī dyegini, myero un ipok ōkō na path pī Rwoth Obangawu. Kūr īmīī kaō mē dhokni mē tio tic mōrō ēka kūr īnyar yer mē kaō ka romni. **20** In kanya acēl kī jō mē odi, ibino camō unu ringogī ī nyim Rwoth Obangawu ī kabedo na ēn bino yērō mwaka kī mwaka. **21** Ēntō ka kany mōrō na rac tye ī kom lee, ongwāl onyo wangē ōthōō, onyo tye kī kany mōrō na rac ī kome, kūr myero ītyēr unu both Rwoth Obangawu. **22** Un ibino camō ī peciwu, kadī bed jō na cik ōgēngō onyo na cik ba ōgēngō twērō gīnī camō, kite na ngat mōrō twērō camō kī ringo egwethe onyo pura. **23** Ēntō kūr myero īcam unu remo; ōny unu ōkō pīny calō pii.

16 Gwōk unu dwe mē Abib ēka ikwer unu nīnō mē Poth ka Rwoth Obangawu; piēn ī dwe mē Abib ēnē Rwoth Obangawu ōkwanyōwu kōdē kī ī Ejip ī kiwor. **2** Un ibino tyērō lee mē Poth kī kom rom onyo dyegiwu both Rwoth Obangawu ī kabedo na Rwoth bino yērō ēk nyingē obed iē. **3** Kūr īcam unu k'ogati n'erubo kī thōbī, ēntō myero īcam unu k'ogati na thōbī ope iē pī nīnō abirō. Man obedo ogati mē can na un īnēnō, piēn īya unu kī ī lobo Ejip nakun ībūnyērē unu abūnya. Man bino po wiwu ī kom nīnō mē Poth na un īya kōdē kī ī Ejip pī karē kibēc mē kwōwu. **4** Myero thōbī mōrō kūr enwong bothwu ī lobowu pī nīnō abirō. Kūr īmīī unu ringo lee mōrō na un ītyērō ī kothyeno mē nīnō mē acēl odong naka kodiko. **5** Myero kūr ītyēr unu lee mē Poth ī pacō mōrō na Rwoth Obangawu tye ka miōwu, **6** ēntō un myero ītyēr lee mē Poth ī kabedo na Rwoth ōyērō mē wōrō nyingē iē ī kothyeno, ī caa na ceng dōnyō, na ēnē karē na un īya kōdē kī ī Ejip. **7** Ted ēka īcam unu ī kabedo na Rwoth Obangawu bino yērō. Cē kodiko idōk unu ī kēmawu. **8** Cam unu ogati na thōbī ope iē pī nīnō abicēl ēka nīnō mē abirō bed unu ī cōkērē mē wōrō Rwoth Obangawu. Kūr itii unu tic mōrō ī nīnō nōn. **9** Ibino unu kwanō cabīt abirō cakērē ī karē na un īcakō kac. **10** Cē ibino unu kwero Karama mē Cabīt gīnī ī nyim Rwoth Obangawu kī mīc na cwinywu ōpwōyō; ibino mīō unu kī kite na Rwoth Obangawu ōmīōwu kī gum. **11** Ibino bedo unu kī yom cwiny ī nyim Rwoth Obangawu ī kabedo na ēn bino yērō na calō kabedo n'ēwōrō nyingē iē. In, ēthīnō awopeni

ēka anyira, eticni na cwō ēka eticni na mon, jō Lebi na bedo ī peciwu ēka Erok na bedo ī kinwu, ēthīnō kic ēka mon thōō na bedo gīnī ī kinwu. **12** Po unu nī un onwongo ibedo unu opii ī lobo Ejip ēka myero īgwōkērē unu mē lūbō cik ni gīnī. **13** Kinge na dong ityeko unu cōkō cemwu ōkō kī ī larū mē pwodo kal ēka ībīō unu ōlōkwu, kwero unu Karama mē Bōlō pī nīnō abirō. **14** Bed unu kī yom cwiny ī karamawu; in, awopeni ēka anyira, eticni na cwō ēka eticni na mon, jō Lebi, Erok na bedo ī kinwu, ēthīnō kic ēka mon thōō na bedo ī peciwu. **15** Kwer unu karama pī nīnō abirō ī nyim Rwoth Obangawu ī kabedo na Rwoth bino yērō. Piēn Rwoth Obangawu bino miōwu gum ī kom cemwu kibēc na un īcēgō ēka ī kom tic mē cingwu cē ibino bedo unu kī yom cwiny rwōk. **16** Cwō kibēc na tye ī kinwu myero obin gīnī ī nyim Rwoth Obangawu wang adek ī mwaka acēlacēl ī kabedo na ēn bino yērō: ī Kwer mē Ogati na Thōbī ope iē, ī Karama mē Cabīt gīnī, ēka ī Karama mē Bōlō gīnī. Ngat mōrō myero kūr obin ī nyim Rwoth kī cingē nono. **17** Ngat acēlacēl myero okel mīc na lūbērē kī kite na Rwoth Obangawu ōmīō kī gum kōdē. **18** Myero iketh unu ēngōl-kōp ēka edite pī kakawu acēlacēl ī peciwu kibēc na Rwoth Obangawu tye ka miōwu ēka gīn bino ngōlō kōp ka jīī atīr. **19** Kūr ilōk unu pido ka dhanō na kōp mērē tye atīr onyo inyuth apokapoka mōrō ī kin dhanō. Kūr iye ēwīlwu kī līm, piēn līm umo wang jō na ryēk ōkō cē balō pido ka jō na kōpgī tye atīr. **20** Ngōl unu kōp atīr, ēka kōp atīr kēkēn, ēk ibed unu na kwō ēka ibed unu ī lobo na Rwoth Obangawu tye ka miōwu. **21** Kūr ipīdh unu yath mōrō mē wōrō obanga na dhakō n'ecwodo nī Acera ī nget keno tyēr ka Rwoth Obangawu na un ibino gērō. **22** Kūr thon icib unu wīr mē kidi mē awōrō, gin mōrō na Rwoth Obangawu ba mītō.

17 Kūr ītyēr thwōn onyo rōmō mōrō n'ongwal onyo na kany mōrō rac kī ī kome both Rwoth Obangani, piēn bino bedo mē kwero bothe. **2** Ka ibino unu nwongo ēcwō onyo dhakō mōrō na bedo ī kinwu, na tye ī pacō mōrō acēl na Rwoth Obangawu ōmīōwu, na tīmō gin mōrō na rac ī nyim Rwoth Obangawu nakun tūrō cikērē mērē, **3** tio both obanga mōrō nōkēnē ēka wōrō ceng onyo dwe onyo cēr onyo gin mōrō kēkēn na tye ī polo na cik ka Rwoth ōkwērō. **4** Ka iwinyo unu kōp nōn, myero īrang unu kōrē na bēr. Ka īrangō unu ēka imoko unu nī obedo tīm mē kwero n'ōtīmērē ī lobo Icarael, **5** myero ikel unu ēcwō onyo dhakō nōn n'ōtīmō tīm na rac nī ī dhō wangkac mē pacōwu ēka icel unu dhanō nōn kī kite naka ī thōō. **6** Ebino neko dhanō nōn pī kōp mē caden ka jō

ariö onyo adek, ëntö ba ebino neko ngat mörö pĩ köp mē caden ka ngat acël këkën. 7 Ecaden ënë bino cakö yuo kite mē neko dhanö nön ëka dong jö kibëc kĩ kõrgĩ. Un myero ikwany unu gin na rac ökö kĩ i kinwu. 8 Ka ekelo pido mörö i nyimwu na ngölö tēk rwök—twērö bedo önyö remo, adoth onyo lwēny—ter unu pido nön gĩnĩ yo kabedo na Rwoth Obangawu bino yērö. 9 Cĩdh both ëlamdhök na gĩn ënë jö Lebi ëka both angöl-köp na tye i dhö tic i caa nön. Peny kĩ bothgĩ cē gĩn bino ngölö köp nön nini. 10 Myero itĩm unu kite na gĩn okobo niwu ködë i kabedo na Rwoth bino yērö. Gwökërë unu mē timö gin na kibëc kite na gĩn okobo. 11 Tii unu kite na gĩn opwonyowu ködë ëka kite na gĩn öngölö niwu. Kür tlökërë unu ökö kĩ i ngö na gĩn okobo niwu. 12 Ngat mörö na bino kwērö winyo köp k'angöl-köp onyo köp k'alamdhök na tio kunön both Rwoth Obangawu myero enek ökö. Myero ikwany unu gin na rac ökö kĩ i Icarael. 13 Cē jö kibëc bino winyo ëka bino bedo gĩnĩ kĩ lworo na ba bino mēdërë gĩnĩ dökĩ kĩ kwērö winyo köp. 14 I karë na un ibino dönyö i lobo na Rwoth Obangawu tye ka miöwu ëka igamö unu, ibedo unu tē cē ikobo unu nĩ, "Eru eketh rwoth na bino löö onu calö rok nökökënë n'ögürö onu," 15 myero inën nĩ iketho unu rwoth na Rwoth Obangawu ënë öyērö. Dhanö na un ibino ketho myero obed kĩ i kin utmegowu kikome. Kür iketh unu arok mörö mē lööwu na ba obedo dhanö mē Icarael. 16 Dhanö nön myero kür obed k'angole mērë na pol onyo ömĩ jĩ ödök gĩnĩ ökö yo Ejip mē nwongo angole nökökënë gĩnĩ, piën Rwoth yam okobo niwu nĩ, "Un myero kür dökĩ idök unu cen yo kunön." 17 Ën myero kür önyöm mon na pol, piën bino miö thama mērë lökërë ökö na path. Ën myero thon kür obed kĩ ryal ëka gol na dwong. 18 Ka ën dong obedo i wi then ker mērë, ën myero öcöo cik ni i buk nakun kwanyö kĩ i kom mē k'ëlamdhök n'obedo jö Lebi. 19 Ën myero ögwök buk ni bothe ëka ökwan pĩ karë kibëc mē kwö mērë ëk opwony lworo Rwoth Obanga mērë ëka ölüb cik ni kibëc na bër. 20 Ën ba bino tingere malö na löö utmego mērë jö Icarael onyo lökërë ökö kĩ i cik. Cē ën ëka ëkwaë mērë bino bedo i löc i ker mērë pĩ karë na lac i lobo Icarael.

18 Ëlamdhök n'obedo gĩnĩ Jö Lebi, na gĩn ënë kaka ka Lebi kibëc, ba bino bedo gĩnĩ kĩ dul lobo mörö n'obedo mēgĩ kĩ i kin jö Icarael. Gĩn bino camö tyër awanga n'ëmiö both Rwoth, piën manön ënë gin n'obedo mēgĩ. 2 Gĩn ba bino bedo kĩ dul lobo mörö mē bedo mēgĩ kĩ i kin utmegogĩ; Rwoth ënë obedo gin n'epoko nigĩ kite na ën okobo bothgĩ. 3 Man ënë bino bedo wang wodhi n'ëlamdhök nwongo

kĩ both jö na bino tyērö gĩnĩ thwön onyo römö: ringo wi bac, ringo lem ëka jamic kibëc. 4 Un myero imiigĩ acaki kac mē kalwu, kõngö ölök na nyen, möö jeituni ëka yer rom n'ëcakö nyarö kĩ kom rom na mewu. 5 Piën Rwoth Obangawu otyeko yērö jö Lebi kĩ i kin kakawu kibëc ëk gĩn ëka ëkwaëgĩ obed jö na tio gĩnĩ kĩ nyiing Rwoth na twal. 6 Ka Alebi mörö öya kĩ i pacö mörö acël na ën bedo tē na tye kany mörö kĩ i Icarael, ëka obino na cwinye öpwöyö yo kabedo na Rwoth bino yērö, 7 ën twērö tic kĩ nyiing Rwoth Obanga mērë calö utmego mērë kibëc n'obedo Jö Lebi na tio kunön i nyim Rwoth. 8 Ën bino nwongo dul mē cem na röm kĩ mē ëlamdhök nökökënë, kadĩ bed nĩ ën onwongo ciling kĩ kom jami na jö mē pacö mērë öcadhö. 9 Ka dong idönyö unu i lobo na Rwoth Obangawu tye ka miöwu, myero ikwër unu lübö kit tim na reco mē kwer na rok na tye kunön timö. 10 Ngat mörö myero kür enwong kĩ i kinwu na wangö wode onyo nyarë calö tyër awanga, na pwonyo bedo dhanö na thyedho onyo tic mē jwöjwök onyo na nēnö jamic dyël onyo tim mörö mē jwök, 11 onyo alam wör, gagĩ, onyo ajwök onyo amak tipo onyo na twak kĩ tipo ka jö n'öthö. 12 Ngat mörö na timö koth tim nĩ obedo gin mē kwer both Rwoth; piën timö koth tim mē kwer nön ömiö Rwoth Obangawu tye ka ryëmö rok nökökënë ökö kĩ i nyimwu. 13 Myero ibed unu abonge bal mörö i nyim Rwoth Obangawu. 14 Rok na un icwök gamö lobogĩ mē bedo mewu obedo gĩnĩ ketho cwinygĩ i köp ka jö na tio tic mē jwöjwök onyo jö na thyedho, ëntö Rwoth Obangawu ba ömiöwu twērö mē timö koth tim nön. 15 Rwoth Obangawu bino miöwu adwarpiny kĩ i kinwu, jö Icarael ewodhwu, na cal köda. Myero iwiny unu ën. 16 Man ënë gin na un ikwaö kĩ both Rwoth Obangawu i ninö na un icökërë i Koreb. I karë nön un ikobo unu nĩ, "Kür imiüwa ewiny dwön Rwoth Obangawa dökĩ, onyo ënën mac mērë na dit rwök piën wan ebino thöo ökö." 17 Cē Rwoth okobo nina nĩ, "Köp na gĩn okobo tye na bër. 18 An abino miögĩ adwarpiny na cal kodi kĩ i kin jö Icarael ewodhgĩ, ëka an abino ketho köpna i dhögë. Ën bino kobo nigĩ köp kibëc na an acikö ën. 19 An kikoma abino penyo ngat mörö na ba bino winyo köpna n'adwarpiny bino kobo kĩ nyiinga. 20 Ëntö adwarpiny na bino poro mē twakö gin mörö këkën kĩ nyiinga na an ba akobo, onyo adwarpiny na kobo köp kĩ nyiing obanga nökökënë gĩnĩ, myero enek ökö." 21 Gwök onyo ibino kobo unu kĩ i cwinyyu nĩ, "Kara wan ebino ngeo nīngö nĩ köp nön ba odonyo kĩ i dhö Rwoth?" 22 Ka adwarpiny ötitö köp mörö kĩ nyiing Rwoth cē köp nön ba ötimërë onyo ocobere, manön ënë köp na ba odonyo kĩ i dhö

Rwoth. Adwarpiny nwongo otwakó kóp nòn kí wie kènè, myero kùr ilwor unu èn.

19 Ka Rwoth Obangawu otyeko rok na lobogí èn tye ka miöwu, éka ka dong ñyémò unugí òkò, cè ibedo unu ì pecigí éka ì udigí, 2 cè ipok unu peci adek na papath pírwu ì lobo na Rwoth Obangawu bino miöwu mè bedo mewu. 3 Ibino unu puro yoo éka ipoko unu wang lobo na Rwoth Obangawu bino miöwu kórè adek mè bedo mewu, èk ka ngat mörö oneko dhanò, èn twèrò ríngò yo iè mè larò kwò mërè. 4 Man ènè kóp na makò ngat n'oneko dhanò éka ríngò mè larò kwò mërè kunò—ngat oneko awodhe na nwongo ba òthèna athèna éka adínga mörö thon onwongo ope ì kin-gí cón. 5 Apór mërè, dhanò mörö twèrò cidhò ì bunga gín k'awodhe mè ngólò yen, cè lèb atong n'èngólò kí yen oore kí ì pur mërè éka ògòò wí awodhe oneko òkò, dhanò nòn twèrò ríngò ì pacò mörö acél kí ì kin peci adek nòn mè larò kwò mërè. 6 Ka onwongo pacò mè larò kwò tye acél kékèn, caa nòkènè twèrò bedo na bor n'acül kwor pí athòò twèrò bedo kí karè mè makò dhanò n'oneko awodhe, kadí bed onwongo ba opore mè aneka, pièn adínga mörö onwongo ope ì kin-gí cón. 7 Man ènè òmiö an aciköwu ní myero ipok unu peci adek pírwu. 8 Ka Rwoth Obangawu bino nyanò wang lobowu kite na èn òcikò both kwerewu kí kwong éka miöwu lobo kibèc na èn òcikò bothgí, 9 un myero ìmèd peci adek nòkènè ì kom manòn. Èn bino miöwu lobo ní ka cè un ìlùbò cik kibèc na an amíöwu—mè marò Rwoth Obangawu éka mè lùbò yoo mërè. 10 Tím unu man èk remo na bal mërè ope kùr òöny ì lobowu na Rwoth Obangawu tye ka miöwu mè bedo mewu, èk bal mè ònyò remo kùr obed ì wiwu. 11 Èntò ka dhanò mörö onwongo dag awodhe éka obedo kùrò èn mè cakò lwény ì kome, éka oneko òkò cè dhanò nòn òrìngò ì pacò mörö acél kí ì kin peci ní, 12 edong mè pacò mërè bino oro kóp mè òmò èn kí kunòn cè èmiö èn ì cing ngat na myero òcül kwor èk enek èn thon. 13 Kíca myero kùr òmakwu ì kome. Myero ikwany unu bal mè thòò ka dhanò n'ope kí bal òkò kí ì Icarael èk nyimwu obed na leng. 14 Kùr ikòb unu wang ngòm k'awodhi na yam edong oketho cón ì lobo na un ibino leeno na Rwoth Obangawu bino miöwu mè bedo mewu. 15 Kóp ba bino lóònò ngat mörö pí kóp ka caden acél pí kit bal mörö na rac na gwók onyo èn òbalò. Myero èngól kóp pí kóp k'ecaden aríò onyo adek. 16 Ka acaden mörö na cwinye rac ocung éka odotho ngat mörö n'òtímò bal, 17 jò aríò na tye kí kóp ì kin-gí myero obin gíní ì nyim Rwoth, ì nyim èlamdhók éka ì nyim èngól-kóp n'onwongo tye gíní ì

tí c'aa nòn. 18 Èngól-kóp bino rangò kór kóp nòn na bér rwók, ka gín onwongo ní acaden obedo ngat na twot nakun okelo adoth mè twodo ì kom òmín mërè, 19 cè ibino miö unu èn pwod, pwod na róm kí mana èn onwongo mitò ketho ì kom òmín mërè. Un myero ikwany unu gín na rac òkò kí kinwu. 20 Jò kibèc bino winyo cè bino bedo gíní kí lworo éka gín na rac na cal kí man ba dòkí bino tímèrè ì kinwu. 21 Myero kíca kùr òmakwu: kwò myero ècül kí kwò, wang ècül kí wang, lak ècül kí lak, cing ècül kí cing, tyèn ècül kí tyèn.

20 Ka ìcidhò unu mè lwény ì kom langwu cè ìnèñò unu angole gíní, gadigadi éka mwony na pol na lóò mewu òkò, kùr ibed unu kí lworo ì komgí, pièn Rwoth Obangawu, n'òkwanyöwu kí ì lobo Ejip, bino woth kodwu. 2 Ka dong ìcwók unu cidhò ìlwény, alamdhók bino bino anyim éka twak kí mwony. 3 Èn bino kobo ní, “Winy unu, un jò Icarael: Tin ibino unu cidhò mè lwény ì kom langwu. Kùr iwék cwinyuwu opodhi onyo ibed unu kí lworo; kùr komwu òmyél onyo kùr ìnyò komwu pí gín. 4 Pièn Rwoth Obangawu ènè tye ka woth kodwu mè cidhò lwény pírwu ì kom langwu mè miöwu lóònógí.” 5 Cè edite na lóò jò na cidhò ì dhò lwény bino kobo bothgí ní, “Ngat mörö tye na pod ògèrò òdè na nyen na bara èlègò gum iè? Wék èn òdòk òkò pacò, onyo caa nòkènè èn bino thòò òkò ì dhò lwény cè ngat nòkènè ènè bino dónyò mè bedo iè. 6 Ngat mörö tye n'òpídhò òlòk mërè ì pwodho cè pod bara òcakò camò nyige? Wék èn òdòk òkò pacò, onyo caa nòkènè èn bino thòò òkò ì dhò lwény cè ngat nòkènè ènè bino camò nyige. 7 Ngat mörö tye na pod òcikèrè kí dhakò cè bara ònyómò? Wék èn òdòk pacò, onyo caa nòkènè èn bino thòò òkò ì dhò lwény cè ngat nòkènè ènè bino nyómò dhakò nòn.” 8 Cè edite thon bino kobo ní, “Ngat mörö tye na lwor onyo na cwinye podho? Wék èn òdòk yo pacò, èk acikari ewodhe kùr cwinygi opodhi kamè èn.” 9 Ì karè n'edite otyeko twak gíní kí jò na cidhò ì dhò lwény, gín bino yèrò edite na tèlò wigí. 10 Ka ìcidhò unu mè celo pacò mörö, un myero kono ìmíi jò mè pacò nòn karè mè penyo pí kuc. 11 Ka gín oyeo cè òyabò dhò wangkacgí gíní, jò kibèc na tye ì pacò nòn bino bedo opiiwu éka bino gíní tio tic na tèk pírwu. 12 Èntò ka gín òkwèrò mè penyo pí kuc cè òyèrò gíní mè lwény kodwu, gür unu pacò nòn kí mwony na mewu. 13 Ka Rwoth Obangawu òmiögi ì cingwu, myero inek unu cwò kibèc na tye ì pacò nòn kí pala abadé. 14 Èntò mon, èthínò, dhok éka kí gín mörö kékèn na tye ì pacò, ìtwèrò unu tero na calò jami n'èyakò mè bedo mewu. Éka ìtwèrò unu tic kí jami n'èyakò na Rwoth Obangawu òmiöwu kí

both langwu. 15 Man ênê gin na un ibino tímô ï kom peci kibêc na tye na bor kodwu êka ï peci ka rok na ba cwök kodwu ginî. 16 Êntô ï peci k'Erok na Rwoth Obangawu bino miöwu mê bedo mewu, kür iwêk unu gin mörô na yweo odong na kwô. 17 Myero ityek unu jô kibêc—jô Kit, jô Amor, jô Kanaan, jô Periji, jô Kibi êka jô Jebuc—kite na Rwoth Obangawu ôciköwu ködê. 18 Ka iwêkö unu obedo ginî na kwô, cê gin bino pwonowu mê lübö gin mê kwer kibêc na gin tímô ï wörô obangagi êka bino miö ïbalô unu ï kom Rwoth Obangawu. 19 Ka igürô unu pacô mörô pi caa na lac, nakun ilwényô unu êk igam, kür ingöl unu yen k'atong, piên un itwêrô camô nyige. Yen thon obedo langwu, na myero ilwény unu ï komgi? 20 Un itwêrô ngölô yen na ba nyakô nyig-gi mê acama êka itii unu ködê mê yübö madala êka pem êk ôkönywu mê idho ï pacô nön na lwényô ï komwu naka ka igamô unu pacô nön.

21 Ka ebino nwongo dhanô mörô obuto n'eneko ï lobo na Rwoth Obangawu tye ka miöwu mê bedo mewu, cê ba engeo ngat n'oneko ên, 2 edongwu êka êngöl-köpwu bino cidhö ginî yökô mê pimo bor piñy cakêrê ki ï kom lyêl naka ï peci na cwök ki kany nön. 3 Cê edong na tye ï pacô na cwök ki kom dhanô n'eneko bino ginî kelo nya raa na bara otio tic mörô, na bara eketho ayokoth ï ngute mê ywaö kwêr wanu. 4 Edong mê pacô nön bino kelo ginî nya raa naka ï ora mörô na pige möl, ï ora mörô na naka yam ba epuro, kanya ba êcwö kodhi mörô iê. Gin bino türô ngut nya raa ökö ï ora kunön. 5 Cê êlamdhök n'obedo Jô Lebi myero obin ginî anyim, piên Rwoth Obangawu öyêrögi pi tic mêrê êka mê lamô gum ki nying Rwoth. Gin myero otyek köp mê pido êka lwény kibêc. 6 Edong kibêc mê pacô na cwök ki kanya enwongo kom dhanô n'eneko iê bino lwökô cing-gi ï kom nya raa na gin ötürô ngute ï ora, 7 cê gin bino kobo ni, "Cingwa ba öönyô remo ka dhanô ni, onyo wangwa ba önênô ka eneko. 8 Rwoth tím kica ï kom jô Icarael na gin ênê jô na megî na yam ikökögi. Kür iketh bal mê remo ka dhanô n'ope ki bal ï wi lwak na megî." Cê itim kica ï kom bal mê remo n'öönyô. 9 Ibino unu lwökô bal mê önyô remo ki ï kinwu kömanön, ka itimô unu gin na nen n'atir ki ï wang Rwoth. 10 Ka icidhö unu mê lwény ï kom langwu, cê Rwoth Obangawu ömiögi ï cingwu êka itero unu jô n'ëmakögi ki dhö lwény, 11 êka in inênô dhakô mörô na leng ki kin jô n'ëmakô ki dhö lwény cê cwinyi ömarô, in itwêrô tero ên êk obed dhaköni. 12 In myero ikel ên yo pari êka il'yêl wie cê ingad lwëtê ökö. 13 Göny böng mêrê n'onwongo ên oruko

ï karê n'ëmakô ködê ki ï dhö lwény. Kinge na ên dong obedo pari êka okumo pi apap mêrê êka aya mêrê pi dwe acêl, cê in itwêrô cidhö bothe mê bedo cwörê êka ên bino bedo dhaköni. 14 Ka inwongo ni cwinyi ba dök mitô ên, cê itwêrô wêkö ên cidhö yo kanya cwinye mitô. In myero kür icadh ên onyo iter ên na calô opii, piên in dong ilanô ên ökö. 15 Ka êcwö mörô tye ki mon arîô, êka marô ngat acêl na löö nökenê ca, êka mon arîô ni kibêc önywölô ginî êthinh awope ninê, êntô athin kaö obedo wod ka dhakô na ên ba marô, 16 ka êcwö ni tye ka poko jami mêrê both awope mêrê, myero ên kür ömii twêrô k'athin kaö both wod ka dhakô na ên marô, nakaka wode kikome n'obedo kaö, wod ka dhakô na ên ba marô. 17 Êntô ên myero onyuth athin kaö ka dhakô mêrê na ên ba marô, nakun doko gin n'epoko ninê wang arîô ki kom jami na ên tye ködê kibêc. Athin awobi nön ênê obedo acaki mê tékö k'apap mêrê. Twêrô k'athin kaö obedo mägê. 18 Ka dhanô mörô tye ki wode na ngute nwang êka obedo ngat na jëm, na ba winyo dhö apap mêrê onyo aya mêrê, kadî bed êgöô ên ki lüth, ba bino winyogi. 19 Apap mêrê êka aya mêrê bino makô ginî ên êka etero both edong ï dhö wangkac mê pacô na ên bedo iê. 20 Gin bino kobo both edong ni, "Wodwa ni ngute nwang êka obedo ngat na jëm. Ên ba wöröwa. Ên obedo ngat n'owor êka amêrê." 21 Cê jô mê pacô nön kibêc bino celo ên ki kite naka thöô. Un myero ikwany gin na rac ökö ki ï kinwu. Jô Icarael kibêc bino winyo cê bedo ginî ki lworo. 22 Ka dhanô mörô ötimô bal na miö ên nwongo pwod mê thöô, êka ingabô unu ên malô ï wi yath, 23 un myero kür iwêk kome öngabêrê ï wi yath naka kiwor. Ik unu kome ökö ï ninô nön, piên dhanô mörô n'ëngabô kome ï wi yath bedo dhanô n'Obanga ölamô. Un myero kür ïbal lobowu na Rwoth Obangawu tye ka miöwu mê bedo mewu.

22 Ka in inênô thwön onyo römô k'omeru n'orwenyo ökö ata, kür inên anêna; myero idwök yo both omeru. 2 Ka won mêrê ba bedo na cwök kodi onyo ba ingeo won mêrê, cê in myero iter lee n'orwenyo nön yo pari êka igwök naka ka won mêrê obino na tye ka rangô. Cê imii bothe. 3 In ibino tímô ni kömanön ï kom kana mêrê, böng mêrê, onyo gin mörô kékên n'omeru orwenyo êka in inwongo; in kür inên anêna. 4 Ka in inwongo kana onyo thwön k'omeru n'opodho piny ï nget yoo, kür inên anêna, êntô köny ên mê tingo malô êk ocung ki tyênê. 5 Dhakô myero kür oruk böng ka cwö, onyo êcwö kür oruk böng ka mon, piên dhanô n'ötímô kömanön bedo mê kwer both Rwoth Obangawu. 6 Ka in tye ka woth ï yoo cê icop ï

kom öd winyü i nget yoo, onyo i wi yath onyo i ngöm, ëka min winyü obuto i kom ëthinë onyo i kom tòngë, kür imak min mërë kanya acël k'ëthinë. 7 In itwëro tero ëthinë, cë iwëkö min mërë cidhō, ëk nyimwu obed na leng ëka ibed unu na kwō pī karë na lac. 8 Ka in igërō öt na nyen, myero iketh gin mörō na jükō podho ka dhanō orum wi öt ëk kür okel bal mē önyō remo i odi ka ngat mörō opodho kī i wi öt. 9 Kür icwō kodhi na papath ariō i pwodho ölkni, ka icwō, miō gin na kibëc n'öcëk ië myero eter i öt k'Obanga, gin na in icwō ië thon naka kī nyig ölökö. 10 Kür itwe thwōn ëka kana kanya acël mē pur. 11 Kür iruk böngü n'obedo yer ëka böngü na pwōth n'ëkwō kanya acël. 12 Myero ikwō töl tacël na lyero i twok böngü angwën na in iruko. 13 Ka ëcwō mörō önyömō dhakō cë obedo ködë, cë ökwërō ën ökö, 14 cë okobo köp na rac i kome, na balō nyíng dhakō nakun kobo nī, "An anyömō dhakō nī, ëntō i karë na an abedo ködë, anwongo gin mörō ope na nyutho nī ën bara ongere k'ëcwō." 15 Cë apap ëka aya ka dhakō nōn bino kelo gīnī gin na nyutho nī ën bara ongere k'ëcwō both edong i dhō wangkac mē pacō. 16 Apap mërë bino kobo both edong nī, "An amiō nyara both ëcwō nī ëk önyöm ëntō ökwërō nyara ökö. 17 Kobedini ën okelo köp mē adoth i kome nakun kobo nī, 'An anwongo gin mörō ope na nyutho nī ën bara ongere k'ëcwō.' Ëntō man ënë gin na nyutho nī nyara bara ongere k'ëcwō." Cë enyodo mërë bino yarō böngü i nyim edong mē pacō. 18 Edong mē pacō bino tero ëcwō nōn ëka epwodo. 19 Gin bino ngölō ninë cül mē ryal mia acël. Gin bino miō both apap ka dhakō, piën ëcwō nōn öbalō nyíng nya jō Icarael na bara ongere k'ëcwō. Cë ën bino mēdërë mē bedo dhakō mërë; ëka myero kür ökwër dhakō nōn pī karë mē kwō mërë kibëc. 20 Ëntō ka köp mē adoth nōn tye atir, ëka gin mörō ope n'enwongo na nyutho nī dhakō nōn bara ongere k'ëcwō, 21 cë jō mē pacō nōn bino kelo dhakō nōn i dholokek mē öt k'apap mërë ëka kī kunōn cwō mē pacō nōn bino celo ën kī kite naka thōō. Ën ötimō gin mē lewic i Icarael nakun obedo timō tim mē ölyang i karë na ën bedo i öt k'apap mërë. Un myero ikwany unu gin na rac ökö kī i kinwu. 22 Ka ebino nwongo ëcwō mörō n'obedo kī dhakō ka ngat nökënë, ëcwō n'obedo ködë ëka dhakō nōn myero enekgī ökö. Un myero ikwany unu gin na rac ökö kī i Icarael. 23 Ka ëcwō mörō kī i pacō oromo kī nyakō na bara ongere k'ëcwō, n'onwongo öcikerë kī ngat mörō mē anyōma cë obedo ködë, 24 un ibino tero jō ariō nōn kibëc yökō i dhō wangkac mē pacō nōn, ëka ecologī kī kite naka i thōō. Eneko nyakō nōn piën ba ögōō oduru ëk ëkönyë ëka eneko ëcwō piën ötürō cīk mē bedo kī

dhakō ka ngat nökënë. Un myero ikwany unu gin na rac ökö kī kinwu. 25 Ëntō ka ëcwō mörō oromo kī nyakō n'öcikerë kī ngat mörō mē anyōma i dye thim cë obedo ködë tètëk, ëcwō kékën n'ötīmō gin nī ënë ebino neko. 26 Kür itim unu gin mörō i kom nyakō; piën ën ba öbalō bal mörō na römō ngölō ninë thōō. Köp nī röm kī köp k'ëcwō n'ölwënyō i kom awodhe cë oneko ökö, 27 piën ëcwō oromo kī dhakō n'ëcikerë ködë mē anyōma i thim cë obedo ködë tètëk ëka dhakō ögōō oduru, ëntō ngat mörō onwongo ope kunōn na twërō könyō ën. 28 Ka ëcwō mörō oromo kī nyakō na bara ongere k'ëcwō n'onwongo ba öcikerë mē anyōma ëka obedo ködë tètëk cë engeogī, 29 ën bino cülō apap ka nyakō ryal pyer abic. Ën myero önyöm nyakō nōn piën ën ötimō bal i kome. Ën ba bino kwërō dhakō nōn pī karë mē kwō mërë kibëc. 30 Dhanō mörō kür obed kī dhakō k'apap mërë; ën myero kür ömīi lewic i kom apap mërë.

23 Dhanō n'edino onyo n'ëngölō kome mē cwō ökö ba bino dönyō i athuko ka Rwoth. 2 Dhanō n'ënywölō i lek ba bino dönyō i athuko ka Rwoth, kadī naka ëkwaëgī mē apar mörō ba bino dönyō i athuko ka Rwoth. 3 Ngat mörō n'obedo dhanō mē Amon onyo dhanō mē Moab ba bino dönyō i athuko ka Rwoth, kadī naka ëkwaëgī mē apar, mörō ba bino dönyō i athuko ka Rwoth. 4 Piën gīn ba obino mē romo kodwu kī cem ëka kī pii i karë na un itye ka bino kī i Ejip. Gīn obino opango Balaam wod ka Beor kī i Petor na tye i Aram Naaraim ëk obin ölamwu. 5 Ëntō Rwoth Obangawu ökwërō winyo köp ka Balaam ökö. Ën obino ölökö köp mē lamōwu ödökö mē gum pīrwu, piën Rwoth Obangawu marōwu. 6 Kür itim unu gin mörō na kelo nigī kuc kodwu ëka lönyō, pī karë mē kwōwu kibëc. 7 Kür icaa unu dhanō mörō mē Edom, piën gīn obedo wat kodwu. Kür icaa unu dhanō mörō mē Ejip, piën ibino ibedo unu Erok i lobogī. 8 Ëthinögī na gīn bino nywölō n'obedo ëkwaëgī mē run mē adek bino dönyō i athuko ka Rwoth. 9 Ka icidhō unu mē lwëny kī langwu, gwökërë unu kī i kom gin mörō na ba leng. 10 Ka ëcwō mörō tye i kinwu na cik ögëngō piën oleko lek mē kiwor, ën myero öcīdh yökō ëka obed kunōn. 11 Ëntō ka pīny dong yutho ën myero ölwökërë, ëka ka ceng ödönyō ën twërō dwogo i laī. 12 Yüb unu kany mörō yökō i nge laī kanya un ibino cidhō ië mē könyërë. 13 Ngat acëlacël myero obed kī gin mörō mē künyō pīny i kin jami mē lwënywu, ëka ka ikonyiri, küny bur ëk ium ökö. 14 Piën Rwoth Obangawu wowotha i dye laīwu mē gwökōwu ëka mē miō langwu i cingwu. Laīwu myero obed na leng ëk kür önën gin mörō na ba leng cë lökërë ökö kī

bothwu. 15 Ka opii mörö öringö ökö ki both adwong mërë cë opono bothi, kür imiï ën ödök both adwong mërë. 16 Miï ën obed i kinwu kany mörö këkën na cwinye mitö ëka i pacö mörö këkën na ën öyërö. Kür idiï ën. 17 Dhanö mörö më Icarael n'obedo ëcwö onyo dhakö myero kür obed ngat na timö tim më ölaya i öt wörö jwök. 18 Kür ikel unu ciling më cül n'enwongo ki kom tim më ölaya n'öya ki both dhakö onyo ëcwö i öt ka Rwoth Obangawu më cülö kwong mörö, piën jami nön kibëc obedo gin më kwer both Rwoth Obangawu. 19 Kür imiï dhanö më Icarael awodhi öcül magoba pi ciling, cem onyo gin mörö këkën na twërö kelo magoba na ën odeno. 20 In itwërö miö arok cülö magoba ëntö pathi dhanö më Icarael awodhi. Gwök unu cik ni ëk Rwoth Obangawu ömiïwu gum i kom gin na kibëc na un ibino ketho cingwu ië i lobo na un itye ka dönyö më gamö bedo mewu. 21 Ka ikwongo kwong both Rwoth Obangani, kür igaliri më cobo, piën Rwoth Obangawu bino penyoni pïrë ëka ibino bedo ngat n'ötümö bal. 22 Ëntö ka ba ikwongo kwong, ba ibino bedo ngat n'ötümö bal. 23 Ëntö gin mörö këkën na donyo ki i dhogi myero inën ni icobo, piën in ikwongo kwong keni ki dhogi both Rwoth Obangani. 24 Ka idönyö i pwodho öläk k'awodhi, in itwërö camö nyig öläk kibëc na cwinyi mitö, ëntö kür iketh mörö i aditani. 25 Ka idönyö i pwodho kal k'awodhi, in itwërö rïdhö kal ki cingi, ëntö kür i'ka kal ki pala.

24 Ka ëcwö mörö önyömö dhakö na ba yomo cwinye piën onwongo gin mörö na rac ködë, ëcwö nön twërö cö waraga më këthö nyom, cë miö i cingë ëka ryëmö ën ökö ki i ödë. 2 Cë kinge na ën dong öya ökö ki i ödë, ën dökö dhakö k'ëcwö nökenë. 3 Ka cwörë më ariö ba mitö ën, ëcwö nön cö waraga ninë më këthö nyom, cë miö i cingë, ëka ryëmö ökö ki i ödë, onyo ka cwörë më ariö nön öthö ökö, 4 cwörë më acël n'ökwërö ën ba dök bino nyömö ën më bedo dhakö mërë kinge na ën dong öbal ökö. Manön bino bedo gin më kwer both Rwoth. Kür ikel unu bal i lobo na Rwoth Obangawu tye ka miöwu më bedo mewu. 5 Ka ëcwö mörö pod onyomo anyoma, myero kür ëmiï öcidhi i dhö lwëny onyo ëmiï tic ka lwak mörö nökenë. Ën myero obed mwaka acël nakun bedo parë ëk okel yom cwiny both dhakö na ën önyömö. 6 Kür ikwany pong onyo nya pong rego na calö gin n'ejengo i den. Piën manön bino bedo calö kwanyö kwö ka dhanö më bedo gin n'ejengo. 7 Ka enwongo ngat mörö kwalö dhanö më Icarael awodhe, ëka tero na rac na calö opii onyo cadhö ën. Ngat n'ökwälö dhanö nön myero enek ökö. Un myero ikwany gin na rac ökö ki i kinwu. 8 Na makö köp i

kom two dhöbü, gwökërë unu rwök ëk ilüb unu gin n'ëlamdhök n'obedo Jö Lebi okobo niwu. Myero ilüb unu na bër ngö na an acikögi. 9 Po unu i kom ngö na Rwoth Obangawu ötimö i kom Miriam ki i wanga yoo kinge na un iya ki i Ejip. 10 Ka imiö gin mörö më adena both awodhi, kür idöny i ödë më kwanyö gin mörö n'ëmiö bothi na calö gin n'ejengo. 11 In myero ibed yökö, ëk dhanö na in imiö gin mörö më adena okel gin na ën ojengo bothi yökö. 12 Ka dhanö nön obedo acan, kür imiï böngü na ën ojengo obut bothi. 13 Dwök böngü mërë na ceng bara ödönyö ëk oumere ködë. Cë ën bino pwöyöni ëka ebino kwanö na calö tic n'atir i nyim Rwoth Obangani. 14 Kür idiï atic na in ipango n'obedo acan ëka na mitö köny, kono kad'i atic nön obedo dhanö më Icarael awodhi onyo arok na bedo i pacöwu mörö acël. 15 In myero imiï cül mërë i nön nön na bara ceng ödönyö, piën ën obedo acan ëka geno gin nön. Ka ba imiö, ën bino kok i komi both Rwoth, ëka ibino bedo ngat n'ötümö bal. 16 Ba ebino neko enyodo pi bal k'ëthinögi, onyo ba ebino neko ëthinö pi bal k'enyodogi. Ngat acëlacël ebino neko pi bal mërë. 17 Kür i'bal pido k'arok onyo k'athin kic mörö, onyo iter böngü ka dha thöö na calö gin n'ejengo. 18 Po unu ni un onwongo ibedo opii i lobo Ejip ëka Rwoth Obangawu obino ökököwu ki kunön. Manön ënë ömiö an aciköwu më lübö cik ni. 19 Ka in itye ka kaö kac ki i pwodhoni, ëka inënö körë mörö na ba i'kaö, kür idök cen më cidhö kaö dök. Myero iwëk odong pi Erok, ëthinö kic ëka mon thöö, ëk Rwoth Obangawu ömiïwu gum i kom tic kibëc më cingwu. 20 Ka ipüdö nyig jeitunini ki i wi yath, kür dök i idök cen më püdö man odong i wi yath. Myero iwëk nyig jeituni n'odong pi Erok, ëthinö kic ëka mon thöö. 21 Ka ipüdö nyig öläk ki i pwodho öläkni, kür dök i idök cen më püdö man odong. Myero iwëk nyig öläk n'odong pi Erok, ëthinö kic ëka mon thöö. 22 Po unu ni un onwongo ibedo opii i lobo Ejip. Manön ënë ömiö an aciköwu më lübö cik ni.

25 Ka jö ariö tye gini ki köp i kin-gi, gin myero oter i nyim okiko ëka ëngöl-köp bino ngölö köp cë gönyö gini dhanö n'ope ki bal ëka ngölö köp i wi dhanö n'öbalö. 2 Cë ka dhanö n'öbalö pore ni myero ëgöö, angöl-köp bino miö ën buto piny ëka ëgöö i nyime ki wel lüth n'oporo bal mërë. 3 Angöl-köp twërö miö ëgöö lüth pyer angwën ëntö kür ökadh manön. Ka ëgöö na kadhö, öminwu ebino lanö i wangwu. 4 Kür itwe dhö thwön ka tye ka nyönö kal më apwoda. 5 Ka utmego na bedo gini kanya acël ëka acël ki kin-gi öthöö ökö abonge athin mörö, myero cii athöö kür önyömërë ki ngat mörö na ba obedo dhanö më

dholokek. Ōmīn cwōrē ēnē bino tero ēn na calō dhakō mērē ēka cobo tic mē bedo cwōrē nakaka ōmīn mērē. 6 Wode na ēn bino nywōlō mē acēl ebino cakō nyingē kī nying ōmīn mērē n'ōthōō, ēk nyingē kūr orweny ōkō kī ī Icarael. 7 Ēntō ka ōmīn athōō ba mītō tero cii ōmīn mērē, dha thōō bino cidhō ī dhō wangkac mē pacō both edong ēka kobo nī, “Ōmīn cwōra ōkwērō mīō nying ōmīn mērē nen ī Icarael; ēn ba mītō cobo tic mē bedo cwōra nakaka ōmīn mērē.” 8 Cē edong mē pacō mērē bino cwodo ōmīn athōō ēka ētwak kōdē. Ka ocere nakun kobo nī, “An ba amītō tero ēn,” 9 cii ōmīn athōō bino cidhō bothe ī nyim edong cē wōdhō wōr acēl ōkō kī ī tyēn ōmīn cwōrē, ngūlō laō dhōgē ī wangē ēka kobo nī, “Man ēnē gin n'ebino tīmō ī kom dhanō mōrō na ba bino nywōlō ēthīnō ka wi ōmīn mērē.” 10 Dholokek ka dhanō nōn ebino cwodo kī ī Icarael nī, “Ōt ka dhanō n'ēwōdhō wōrē ōkō kī ī tyēnē.” 11 Ka cwō arīō tye ka lwēny ēka dhakō ka ngat acēl obino mē kōnyō cwōrē kī both ngat na tye ka lwēny kōdē, ēka otero cīngē cē ōmakō kome mē cwō, 12 un myero ingun unu cīng dhakō nōn ōkō. Kūr kīca ōmakwu ī kome. 13 Kūr ibed unu kī gin mē pimo jami arīō ī ocwewu—acēl na pēk ēka acēl na yot. 14 Kūr ibed unu kī gin mē pimo jami ī ōdwu—acēl na thwōnē ēka acēl na tīdī. 15 Myero ibed unu kī gin mē pimo jami na bēr, na pimo jami ī wangē, ēk ibed unu ī lobo na Rwoth Obangawu tye ka mīōwu pī karē na lac. 16 Piēn jō kībēc na tīmō koth tic nī, jō na tīmō gin na ba tye atīr, gīn obedo gin mē kwer kī both Rwoth Obangawu. 17 Po unu ī kom gin na jō Amalek ōtīmō ī komwu ī yoo ī karē na un īya ōkō kī ī Ejip. 18 Gīn ōlwēnyō ī komwu ī karē na un idhero rwōk na tēkō mōrō ope ī komwu. Gīn oneko jō kībēc n'onwongo odong cen nakun ba lworo gīnī Obanga. 19 Pī manōn, ka Rwoth Obangawu ōmīōwu iyweo kī ī kom langwu kībēc n'ōgūrōwu ī lobo na Rwoth Obangawu tye ka mīōwu ēk īgam unu mē bedo mewu, myero inek unu jō Amalek kībēc ēk ngat mōrō kūr dōkī opo ī komgī na twal kī ī thē polo. Kūr īmīī wīwu owīl!

26 Ka un īdōnyō ī lobo na Rwoth Obangawu tye ka mīōwu na calō mewu ēka īgamō unu ōkō cē ibedo unu iē, 2 kwany unu wī cem mōkō kī ī kom cem kībēc n'ōcakō cēk kī ī ngōm na Rwoth Obangawu tye ka mīōwu ēka ikethgī ī adīta. Cē iter unu ī kabedo na Rwoth Obangawu bino yērō mē wōrō nyingē iē. 3 In myero īcidh both alamdhōk na tye ī dhō tic ī caa nōn ēka ikob nīnē nī, “Tin dong an atuco both Rwoth Obangani nī an athuno ī lobo na Rwoth okwongo both kwerewa mē mīōwa.” 4

Cē alamdhōk bino gamō adīta kī bothi ēka ketho ī nyim keno tyēr ka Rwoth Obangani. 5 Cē in ibino kobo ī nyim Rwoth Obangani nī, “Kwarōna onwongo obedo dhanō mē Aram, n'onwongo wotho awotha. Ēn obino ōcidhō yo Ejip kī jō na nōnōk ēka obedo kunōn cē ōdōkō rok na dīt, na tēk ēka n'ōnya gīnī na pol. 6 Ēntō jō Ejip obedo ka tic kōdwa na rac rwōk ēka ōmīōwa ēlīmō can, nakun ēmīōwa etio tic na tēk. 7 Cē wan ekok both Rwoth, Obanga ka kwerewa, ēka Rwoth ōwinyo kokowa cē ōnēnō pēkōwa, tic na tēk n'eketho ī komwa ēka kite n'ēdīōwa kōdē. 8 Cē Rwoth ōkwanyōwa ōkō kī ī Ejip kī twēr mē badē ēka kī tēkō mērē, kī tīm na kelo lworo na thwōnē, k'anyuth mē tango ēka gin mē aura gīnī. 9 Ēn okelowa naka ī kabedo nī ēka ōmīōwa lobo nī, lobo na mio na cak kī mōō kic mōl kī iē. 10 Cē kobedini dong, an akelo wī cem n'ōcakō cēk kī ī ngōm na in Rwoth īmīa.” Cē in myero iketh adīta ī nyim Rwoth Obangani ēka īwōr ēn. 11 In ibino bedo kī yom cwiny kanya acēl kī jō Lebi ēka Erok na bedo gīnī ī kinwu kī gin na kībēc na bēr na Rwoth Obangani ōmīō bothi ēka jō mē odi. 12 Ka in ityeko mīō acēl mē apar mē gin n'ōcēk ī mwaka mē adek mērē, mwaka mē mīō acēl mē apar, in ibino mīō both jō Lebi, Erok, ēthīnō kic ēka mon thōō ēk gīn obed kī gin mē acama na rōmō mīōgī yeng kī ī peciwu. 13 Cē in ibino kobo ī nyim Rwoth Obangani nī, “An dong atyeko kwanyō acēl mē apar ōkō kī ī ōda ēka amīō both jō Lebi, Erok, ēthīnō kic ēka mon thōō kite na in īcīka kōdē. An ba atūrō onyo wia ba owīl ī kom cīkni gīnī. 14 An ba acamō acēl mē apar ī karē n'onwongo an akwero cōla, onyo kwanyō mōrō kī iē ī karē na cīk ōgēnga, onyo tyērō both tīpo ka ngat n'ōthōō. An awinyo kōp ka Rwoth Obangana; an atīmō jami kībēc na in īcīka iē. 15 Nēn pīny kī ī kabedoni na leng na tye ī polo, mīī gum ī kom jogi Icarael ēka ī kom lobo na in īmīōwa kite na in icikiri kōdē kī kwong both kwerewa, lobo na mio na cak kī mōō kic mōl kī iē.” 16 Tin Rwoth Obangawu ōcīkōwu mē lūbō cīk mērē kībēc. Pī manōn myero īgwōkērē unu mē lūbō kī cwinywu kībēc ēka kī tīpowu kībēc. 17 Tin dong ituco kōp ī kom Rwoth nī ēn obedo Obangani, ēka ibino lūbō yoo mērē nakun īgwōkō cīk mērē kībēc, ēka nī ibino winyo kōp mērē. 18 Rwoth utuco kōp ī komwu nī tin un ibedo jōgē na pīrgī tēk kite na ēn ōcīkērē kōdē, ēka un myero īgwōk cīk mērē kībēc. 19 Ēn utuco nī ebino mīōwu bedo rok na tēk na lōō rok nōkēnē kībēc na ēn eketho ēka un ibino mīō pak kī wōrō ī nyingē. Un ibino bedo jō na leng both Rwoth Obangawu kite na ēn ōcīkērē kōdē.

27 Muca ēka edong mē Icarael okobo gīnī both jīī nī, “Gwōk unu cīk nī kibēc na an tin atye ka miōwu. 2 Ī nīnō na un ibino ngōlō kī kulo Jordan mē dōnyō ĩ lobo na Rwoth Obangawu bino miōwu, un ibino cicibo kite na thwon cē ipu unu komgī kī rangi na tar. 3 Cōō kōp kibēc mē cīk nī ĩ komgī ka ipoth unu yo lōka mē dōnyō ĩ lobo na Rwoth Obangawu tye ka miōwu, lobo na mio na cak kī mōō kic mōl kī ĩē, kite na Rwoth, Obanga ka kwerewu, ōcīkērē kodwu. 4 Ka dong ĩngōlō unu kulo Jordan, cicibo unu kite nī ĩ wi Kidi Ebal kit na an atye ka cīkōwu kōdē tin. Myero ipu unu komgī kī rangi na tar. 5 Gēr unu keno tyēr n’ēyūbō kī kite both Rwoth Obangawu kunōn. Kūr iti unu kī nywenyo mōrō mē paōgī. 6 Myero ĩgēr unu keno tyēr ka Rwoth Obangawu kī kite na lūl ēka ĩryēd unu tyēr awanga ĩ wie both Rwoth Obangawu. 7 Ngōl unu thon tyēr mē kuc nakun ĩcamō unu kunōn, kanya un ibino bedo kī yom cwiny ĩ nyim Rwoth Obangawu. 8 Un myero ĩcōō na bēr kōp kibēc mē cīk nī ĩ kom kite nī na un icicibo.” 9 Cē Muca ēka ēlamdhōk n’obedo Jō Lebi okobo both jō Icarael kibēc nī, “Ling unu moth, un jō Icarael, ēk iwiny unu kōp! Un dong ĩdōkō jō ka Rwoth Obangawu. 10 Pī manōn, un myero dong iwiny unu kōp ka Rwoth Obangawu ēk ĩlūb unu cīk mērē kibēc na an atye ka miōwu tin.” 11 Ī nīnō nōn kikokome Muca ōcīkō jīī nī: 12 Ka ĩngōlō unu kulo Jordan, kaka ka Cimeon, Lebi, Yuda, Icar, Yocepu ēka Benjamin bino cung gīnī ĩ wi Kidi Gerijim mē lamō gum ĩ kom jīī. 13 Ēka kaka ka Reuben, Gad, Acer, Jabulon, Dan, ēka Naputali bino cung gīnī ĩ wi Kidi Ebal mē lamō cen ĩ kom jīī. 14 Cē jō Lebi bino redo gīnī rwōk both jō Icarael kibēc nī: 15 “Cen myero ōmak dhanō mōrō na bino yūbō cal jwōk n’ēpaō apaa onyo nywenyo n’ēliō—n’obedo gin mē kwer both Rwoth, n’adīrū ōyūbō kī cīngē—ēka ocibo ĩ mūng mē awōra.” 16 “Cen myero ōmak dhanō mōrō na ba bino wōrō apap mērē ēka aya mērē.” 17 “Cen myero ōmak dhanō mōrō na bino cwarō kidi mē wang ngōm k’awodhe.” 18 “Cen myero ōmak dhanō mōrō na bino miō athōō wang lūbō yoo na path.” 19 “Cen myero ōmak dhanō mōrō na bino balō pido k’arok, athīn kic onyo dha thōō ēka miō kōp lōō.” 20 “Cen myero ōmak dhanō mōrō na bino buto kī cii apap mērē, piēn nwongo ēn oketho lewic ĩ kom apap mērē.” 21 “Cen myero ōmak dhanō mōrō na bino buto kī lee mōrō kēkēn.” 22 “Cen myero ōmak dhanō mōrō na bino buto k’amin mērē, onyo amin mērē mē babō onyo amin mērē n’aya mērē ōnywōlō k’ēcwō nōkēnē.” 23 “Cen myero ōmak dhanō mōrō na bino buto kī marō mērē.” 24 “Cen myero ōmak dhanō mōrō na bino neko awodhe ĩ mūng.” 25 “Cen myero ōmak dhanō

mōrō na bino gamō ĩm mē wilōnē ĩ mūng ēk enek kī dhanō na ba ōbalō.” 26 “Cen myero ōmak dhanō mōrō na ba bino moko ēka lūbō kōp kibēc na tye ĩ cīk nī.”

28 Ka ibino unu winyo kōp ka Rwoth Obangawu ēka ĩlūbō unu cīk mērē kibēc na an tin atye ka miōwu, Rwoth Obangawu bino miōwu ĩdōkō na tēk na lōō rok kibēc na tye ĩ wi lobo. 2 Gum nī kibēc bino bino ĩ komwu na thwōnē ka iwinyo unu kōp ka Rwoth Obangawu: 3 Gum bino bedo ĩ komwu ĩ pacō ēka ĩ pwothiwu. 4 Gum bino bedo ĩ kom ēthīnōwu, ĩ kom gin na bino cēk ĩ pwothiwu, ēka ĩ kom ēthīnō ĩmwi na kwō—ēthīnō dhokwu ēka ēthīn rom kī dyegiwu. 5 Gum bino bedo ĩ kom adītani ēka ĩ kom gin mē nyōbō ogatīnī. 6 Ibino bedo unu kī gum ĩ karē na un ĩdōnyō ĩ ōt ēka ĩ karē na un idonyo yōkō. 7 Rwoth bino miō ĩlōō unu langwu na bino mē lwēny ĩ komwu. Gin bino mē lwēny ĩ komwu kī ĩ yoo acēl ēntō bino gīnī ngwēc kī bothwu nakun pokere gīnī ĩ yodhi abirō. 8 Rwoth bino miō gum ĩ kom derewu ēka ĩ kom gin na kibēc na cīngwu otio. Rwoth Obangawu bino miōwu gum ĩ lobo na ēn tye ka miōwu. 9 Ka ibino unu gwōkō cīk ka Rwoth Obangawu kibēc nakun ĩlūbō unu, Rwoth bino miōwu ibedo jōgē na leng kite na ēn ōcīkērē kōdē kī kwong bothwu. 10 Cē jō kibēc mē wi lobo bino nēnō nī ecwodowu kī nying Rwoth ēka bino gīnī lworowu. 11 Rwoth bino miōwu jami na pol—ēthīnōwu, ēthīnō ĩmwi na kwō, ēka cem mē pwothiwu bino cēk—ī lobo na yam ēn okwongo both kwerewu mē miōwu. 12 Rwoth bino yabō niwu polo na ēn kanō lōnyō mērē ĩē, mē miō kōth cwee ĩ pwothiwu ĩ karē mērē kikokome ēka mē miō gum ĩ kom tic kibēc na cīngwu bino tio. Un ibino miō jami mē adena both rok na pol ēntō ba ibino unu deno gin mōrō kī both ngat mōrō. 13 Rwoth bino miōwu bedo ētēla, ēka pathī jō n’ētēlōgī. Karē kibēc un ibino bedo anyim nakun ba ibedo unu angeg ka iwinyo unu cīk ka Rwoth Obangawu kibēc na an tin acīkōwu nakun ĩgwōkērē unu mē lūbō. 14 Kūr ĩlōkērē unu ōkō kī ĩ kom cīk na an tin amiōwu, yo cīngwu kucem onyo kucam, onyo lūbō obanga nōkēnē gīnī ēka wōrōgī. 15 Ēntō ka un ba ibino winyo unu kōp ka Rwoth Obangawu onyo ĩgwōkērē unu mē lūbō cīk mērē kibēc na an tin acīkōwu, cē cene nī kibēc bino bino ĩ komwu ēka makōwu: 16 Cen bino makōwu ĩ peciwu ēka ĩ pwothiwu. 17 Cen bino bedo ĩ kom adītani ēka ĩ kom gin mē nyōbō ogatīnī. 18 Cen bino bedo ĩ kom ēthīnōwu ēka ĩ kom gin na bino cēk ĩ pwothiwu, ĩ kom ēthīnō ĩmwi na kwō ēka ĩ kom ēthīnō rom kī dyegiwu. 19 Cen bino makōwu ĩ karē na un ĩdōnyō ĩ ōt ēka ĩ karē na un idonyo yōkō. 20

Rwoth bino oro cene i komwu, wiwu bino rubere eka ebino cokowu ki gero i kom gin na kibec na un ibino tio, naka ka ithum unu oko. Ibino thum unu oko piopio pi timwu na reco na un itimo pien iweka unu oko. 21 Rwoth bino pwodowu ki twoe na reco naka ka en otyekowu oko ki i lobo na un itye ka donyo ie me gamo me bedo mewu. 22 Rwoth bino pwodowu ki twoe na kobere, ki lyetho eka two akwoda, ki lyetho piny eka ceng bino ryeny. Cemwu bino ner eka pur oko. Pwod ni kibec bino bino i komwu naka ka ithoo unu. 23 Polo na tye i the tyenwu bino bedo na tek calo nywenyo. 24 Rwoth bino loko koth me lobowu dokoko apua eka luru; bino yaa ki i polo ony piny i komwu naka tyekowu oko kibec. 25 Rwoth bino mio langwu loowu. Un ibino lweny i komgi ki i yoo acel enta ibino unu ngwec ki bothgi nakun ipokere unu i yodhi abiro, eka jo me lobo kibec bino bedo gini ki thwon lworo pi gin n'otimere i komwu. 26 Lyenewu bino bedo cem ka winy kibec na ngweco ki malo eka me ka leeni me thim, eka ngat moro ope na bino ryemogi oko. 27 Rwoth bino pwodowu ki two bur gini me Ejip, bur na ba cang, gwonyu eka il kom na ba ibino unu cang ki ie. 28 Rwoth bino pwodowu ki poa, thoo wang eka bango wiwu oko. 29 Ibino unu thwathwama kiceng calo athoo wang. Ba ibino bedo unu ki lonyo i kom gin moro keken na un ibino timo. Ebino diowu eka yak jamiwu nino ki nino, enta ngat moro ope na bino konyowu. 30 In ibino cikiri ki dhako me nyomo, enta ngat nokene ene bino bedo kode tetek. In ibino gero ot, enta ba ibino bedo ie. In ibino pidho olok, enta ba ibino camo nyige. 31 Ebino neko thwon pur na meg na in ineno, enta ba ibino camo ringo mere moro. Ebino tero kanani tetek ki bothi, enta ba ebino dwongo. Ebino mio romni both langni, enta ngat moro ope na bino konyoni me dwongogi. 32 Ebino mio awope eka anyirani both rok nokene na in ineno eka wangi bino dhero me nenogi nino ki nino, enta ba ibino bedo ki teko me jukogi cidho kodgi. 33 Rok na ba ingeo unu bino camo cem na un ipuro i pwothiwu, eka ebino diowu pi kar kibec enta gin moro ope na un ibino timo. 34 Gin na wangwu bino nen bino miowu idoko epoa. 35 Rwoth bino pwodoni ki two me cong eka tyeni ki bur na rem rwok na ba bino cang, cakere ki i tyeni piny naka i wi malo. 36 Rwoth bino ryemowu kanya acel ki rwoth na un ibino yero me telowu yo both rok na un onyo kwerewu ba onge. Ibino unu woro obanga nokene n'eyub ki yen eka kidi. 37 Ibino unu doko gin na kelo lworo, gin me carolok eka gin me anyera i kin rok kibec na Rwoth bino kethowu ie. 38 Ibino unu

cwoono kodhi na dwong i pwothiwu, enta ibino unu coko na nonok, pien bonyo bino camo oko. 39 Ibino unu pidho olok eka ibino unu yubogi na ber, enta ba ibino unu madho kongo mere onyo pudho nyige, pien kudi bino camogi oko. 40 Ibino unu bedo ki yen me jeituni i lobowu, enta ba ibino unu tic ki mo mere, pien nyige bino ony oko. 41 Ibino unu nywolo awope eka anyira, enta ba ibino unu gwokogi, pien ebino terogi oko i opii. 42 Bonyo bino camo yen eka cem me lobowu oko. 43 Erok na bedo i lobowu bino doko gini elonyo eka jo na pigi tek rwok, enta un ibino doko ecan eka jo na pigi ba tek. 44 Gin bino miowu den, enta un ba ibino mio den bothgi. Gin bino telo wiwu, enta un ibino dong cen i korgi. 45 Cene ni kibec bino podho i komwu, bino ryemo korwu ce makowu naka ibino thum unu oko kibec, pien ba iwinyo unu kop ka Rwoth Obangawu eka ba imako unu cik mere kibec na en ocikowu. 46 Gin bino bedo anyuth eka tango me aura bothwu eka both ekwaewu naka naka. 47 Pien un ba itio unu both Rwoth Obangawu ki yom cwiny i kar n'onwongo itye unu ki jami na bur, 48 pi manon ibino unu tic both langwu na Rwoth bino orogi i komwu. Kec eka orio pii bino nekowu, ibino unu woth kotula eka can jami kibec bino makowu. Rwoth bino ketho ayokoth n'obedo nywenyo i ngutwu naka ka otyekowu oko kibec. 49 Rwoth bino kelo rok moro me lweny i komwu ki kanya bor, ki i ajiki me lobo, calo jur na bino piny, rok na ba ibino unu niang i lebg. 50 Rok na ger na ba bino paro pi jo n'otii eka kica ba bino makogi i kom jo na thino. 51 Gin bino camo ethino limwu na kwoka cem na bino cek i pwothiwu, naka ka etyekowu oko. Gin ba bino weko niwu kal moro, kongo olok na nyen onyo mo jeituni, ethino dhok onyo ethino rom ki dyegi na mewu naka ka gin otyekowu oko. 52 Gin bino guro peciwu kibec naka ka celwu n'egero na bor rwok na un igeno orodhere piny. Gin bino guro peci kibec na tye i lobo na Rwoth Obangawu tye ka miowu. 53 Pi can na langwu bino ketho i komwu i kar na gin bino guro peciwu, un ibino camo ethinowu, ringo kom awope eka anyira na Rwoth Obangawu omiowu. 54 Naka thon ewo na kite mere ber rwok eka n'obedo nyakica ki i kinwu bino twono omin mere cem, onyo dhako mere na en maro, onyo ethine na pod kwoka. 55 En ba bino nywak kodgi ringo kom ethine na en camo. Pien en ope ki gin moro n'odong nina me acama i kar me can na langwu bino guro ki peciwu kibec. 56 Dhako na kite mere ber rwok eka n'obedo nyakica, n'onwongo ba thamo me nyono piny ki tyene, wange bino cido i kom cwore na en maro, eka wode onyo nyare. 57 En bino kan byero na yaa ki ie eka athin

na ɛn ɔnywɔlɔ, ɛk ɛcam ɛn kɛnɛ i mɔng i karɛ na lang bino gɔrɔwu ɛka can na rac na langwu bino ketho i komwu i peciwu. **58** Ka ba igwɔkɛrɛ unu mɛ lɔbɔ kɔp kibɛc mɛ cik ni, n'ɛcɔɔgi i buk ni, ɛka ka ba ibedo unu ki lworo i nyɛng mɛ dheo na pirɛ tɛk na ɛnɛ nyɛng Rwoth Obangawu, **59** cɛ Rwoth bino mɛdɔ pwod i komwu ɛka i kom ɛkwaɛwu, can na rac rwɔk ɛka odeke na ba cang gini. **60** ɛn bino miɔ two kibɛc mɛ Ejip na yam un ilworo rwɔk mɛ makɔwu, ɛka ba ibino unu cang. **61** Rwoth thon bino miɔwu koth twoe kibɛc ɛka can na ba ɛcɔɔ i buk mɛ cik ni, naka ka etyekowu ɔkɔ. **62** Kadɛ onwongo ipol unu calɔ cɛr na tye malɔ i wi polo, welwu bino dɔkɔ na nɔnɔk rwɔk, piɛn ba iwinyo unu kɔp ka Rwoth Obangawu. **63** Dong kite na calɔ Rwoth cwinye obedo na yom mɛ miɔwu bedo na bɛr ɛka mɛ miɔ welwu nya na pol, kɔmanɔn thon Rwoth cwinye bino bedo na yom mɛ balɔ ɛka tyekowu. Ebino kwanyɔwu ɔkɔ ki i lobo na un itye ka dɔnyɔ iɛ mɛ gamɔ bedo mewu. **64** Cɛ Rwoth bino kɛthɔwu ɔkɔ i kin rok kibɛc, cakɛrɛ ki i ajiki lobo kucɛl naka tung ca. Ki kunɔn un ibino wɔrɔ obanga nɔkɛnɛ gini—obanga n'ɛyɔbɔ ki yen ɛka kidi, na un onyo kwerewu ba ongeo. **65** Ki i kin rok nɔn gini, ba ibino unu nwongo kuc onyo karɛ mɛ miɔ tyɛnwu yweo. Ki kunɔn Rwoth bino miɔ cwinywu podho, ba ibino bedo unu ki gen ɛka tipo komwu bino thɔɔ ɔkɔ. **66** Cwinywu bino ngabɛrɛ angaba pi kwɔwu mɛ anyim. Lworo bino makɔwu kiwor ɛka kiceng abonge gen mɔrɔ pi kwɔwu. **67** Kodiko ibino unu kobo ni, “Kono onwongo obed kothieno!” ɛka kothieno ibino unu kobo ni, “Kono onwongo obed kodiko!”—piɛn pi lworo na bino pong i cwinywu ɛka gin na wangwu bino nɛnɔ. **68** Cɛ Rwoth bino dwɔkɔwu yo Ejip ki mel gini, i yoo na an abino akobo niwu ni ba dɔki ibino nɛnɔ unu. Ki kunɔn, un ibino mirɛ kenwu both langwu mɛ acadha calɔ opii n'obedo cwɔ ɛka mon, ɛntɔ ngat mɔrɔ ope na bino wilɔwu.

29 Man ɛnɛ kɔp mɛ cikɛrɛ na Rwoth ɔcikɔ Muca mɛ ketho ki jɔ Icarael i lobo mɛ Moab, mɛd i kom cikɛrɛ na ɛn onwongo oketho kɔdgi ki i Koreb. **2** Muca ocwodo jɔ Icarael kibɛc kanya acɛl ɛka okobo bothgi: Un inɛnɔ ki wangwu gin na Rwoth ɔtimɔ i Ejip i kom Parao, i kom edite mɛrɛ kibɛc ɛka i kom lobo mɛrɛ. **3** Un inɛnɔ ki wangwu atɛmatɛma na dito gini, anyuth mɛ tango nɔn ɛka gin mɛ aura gini. **4** ɛntɔ naka i ninɔ na tin ni Rwoth ba ɔmiɔwu thama mɛ niang onyo wang mɛ neno onyo ith na winyo piny. **5** An atɛlɔwu ki i thim pi mwaka pyer angwɛn. Bɔngwu ba obino otii, onyo wociwu ba obino othum ɔkɔ ki i tyɛnwu. **6** Un ba ibino i camɔ unu ogati onyo madhɔ

kɔngɔ ɔlɔk onyo kɔngɔ mɔrɔ na kɛc. An abino atimɔ kɔmanɔn ɛk inge unu ni an abedo Rwoth Obangawu. **7** i karɛ na un ithuno i kabedo ni, Cikon rwoth mɛ Kecbon ɛka Og rwoth mɛ Bacan obino gini mɛ lwɛny i kom onu, ɛntɔ onu ɛlɔɔgi ɔkɔ. **8** Onu ebino ɛgamɔ lobogɛ ɛka ɛmiɔ both jɔ Reuben, Jɔ Gad ɛka nucu kaka ka Manace na calɔ lobo na mɛgi. **9** Pi manɔn, gwɔkɛrɛ unu mɛ lɔbɔ kɔp mɛ cikɛrɛ ni, ɛk gin na kibɛc na un ibino timɔ owoth na bɛr. **10** Un kibɛc icung unu tin i nyim Rwoth Obangawu—ɛtɛlawu ɛka rwothiwu, edongwu ɛka editewu, ɛka jɔ nɔkɛnɛ kibɛc mɛ Icarael, **11** kanya acɛl k'ɛthinɔwu ɛka monwu, ɛka Erok na bedo gini i kinwu, na ngɔlɔ yen ɛka na twɔmɔ pii niwu. **12** Un icung kany mɛ dɔnyɔ i cikɛrɛ ki Rwoth Obangawu, cikɛrɛ na Rwoth tin moko kodwu ɛka moko ki kwong, **13** mɛ moko tin ni un ibedo jɔgɛ, ɛk ebed Obangawu kite na ɛn ɔcikɔwu ɛka kite na ɛn okwongo both kwarɔwu Abraam, Icaaka ɛka Jakob. **14** An atye ka ketho cikɛrɛ ni ki kwong mɛrɛ, pathɛ ki un kɛkɛn **15** na tin icung unu kany i nyim Rwoth Obanga onu, ɛntɔ thon ki jɔ na tin ope gini kany. **16** Un kikomwu ingeo unu kite na onu ɛkwɔ kɔdɛ i Ejip ɛka kite na onu ewok kɔdɛ i rok na papath mɛ bino yo kany. **17** Un inɛnɔ unu ki i kin-gi calgi mɛ kwer, cal jwogi n'ɛyɔbɔ ki yath ɛka ki kidi, ki ryal ɛka ki gol. **18** Gwɔkɛrɛ unu ɛk kɔr ɛcwɔ onyo dhakɔ onyo kaka mɔrɔ na tin tye i kinwu na cwinye bino lɔkɛrɛ ɔkɔ ki both Rwoth Obanga onu mɛ cidhɔ wɔrɔ obanga ka rok nɔn gini, man twɛrɔ bedo calɔ orii na dɔngɔ mɛ bedo kwir na kɛc. **19** Ka koth dhanɔ nɔn owinyo kɔp mɛ kwong ni, ɛn bino lamɔ gum i kome kɛnɛ ɛka bino thamɔ ni, “An abino bedo ki kuc, kadɛ gin mɔrɔ na rac ba bino timɛrɛ i koma, kadɛ bed cwinya nwang mɛ lɔbɔ yora kɛna.” Man bino kelo pwod i komwu kibɛc, jɔ na bɛcɔ ɛka jɔ na reco. **20** Rwoth ba bino timɔ kica both dhanɔ nɔn; akɛmɔ ɛka nyeko mɛrɛ bino wangɔ dhanɔ nɔn calɔ mac na lyɛl. Cene kibɛc n'ɛcɔɔ i buk ni bino makɔ ɛn, ɛka Rwoth bino jwaɔ nyɛngɛ ɔkɔ ki i thɛ polo. **21** Rwoth bino poko dhanɔ nɔn ɔkɔ ki i kin kaka mɛ Icarael ɛka bino ketho can i kome, na lɔbɛrɛ ki cene kibɛc mɛ cikɛrɛ n'ɛcɔɔ i Buk mɛ Cik ni. **22** ɛkwaɛwu na bino lɔbɔ kɔrwu ɛka Erok na bino ki kanya bor bino nɛnɔ can n'opodho i kom lobo ɛka twoe na Rwoth ɔmiɔ ɔmakɔ lobo nɔn. **23** Lobo nɔn kibɛc bino wang ɔkɔ ki mac calpa ɛka kadɔ—na gin mɔrɔ ope n'ɛpidhɔ iɛ, gin mɔrɔ ope na tuu ki iɛ, gin mɔrɔ ope na dɔngɔ ki iɛ. Bino bedo calɔ Codom ɛka Gomora, Adma ɛka Jeboim na Rwoth yam ɔbalɔ rwɔk i karɛ n'akɛmɔ ɔmakɔ. **24** Rok kibɛc bino penyo ni, “Pɛngɔ Rwoth ɔtimɔ gin ni i lobo ni? Pɛngɔ akɛmɔ ɔmakɔ ɛn rwɔk?”

25 Ēka agam mërë bino bedo ni, "Gin n'ömïö ötimö ni kômanôn, piën jô ni öwëkö ginî cîkërë ka Rwoth, Obanga ka kweregî, cîkërë na ên oketho kôdgî i karë na ên okelôgî ki i Ejip. 26 Gin ôlökërë ökö ëka öwörö ginî obanga nôkënë ginî nakun ryeberë ginî pîny i nyimgî, obanga na gin ba ngeo, obanga na ên ba ömïögî. 27 Pî manôn akëmö ka Rwoth ömakö lobo ni, ëka ooro ië alem kibëc n'ëcöô i buk ni. 28 Rwoth obino ökwanyögi ökö k'akëmö ëka kî thwôn cwer cwiny na dit kî i lobogî ëka öryëmögi i lobo nôkënë kite na tye kôdë tin." 29 Gin më müng obedo më ka Rwoth Obangawa, ëntö gin na nen obedo më onu ëka kî më ëthinö onu na twal, ëk onu ëlûb köp kibëc më cik ni.

30 Ka gum ni ëka cene ni kibëc na an aketho i nyimwu opodho i komwu, ëka ipo unu ië kî kanya Rwoth Obangawu ökëthöwu ië i kin rok na papath, 2 ëka ka idwogo unu both Rwoth Obangawu k'ëkwaëwu cë ibedo unu kî winy i köp mërë kî cwinywu kibëc ëka kî tipowu kibëc na lûbërë kî köp kibëc na an tin aciköwu kôdë, 3 cë Rwoth Obangawu bino bedo kî kîca i komwu ëka bino cököwu döki kî i kin rok kibëc na ên yam ökëthöwu ië cë dwongo gum bothwu. 4 Kono kadî bed eterowu i lobo na bor rwök, kî kunôn Rwoth Obangawu bino cököwu kanya acël ëka dwongowu cen. 5 Ên bino kelowu i lobo n'obedo më ka kwerewu ëka un ibino gamö më bedo mewu. Ên bino miöwu jami na pol ëka ibino unu nya na pol na kadhö kwerewu ökö. 6 Rwoth Obangawu bino lökö cwinywu ëka cwiny ëkwaëwu ëk îmar unu ên kî cwinywu kibëc ëka kî tipowu kibëc ëk ibed unu na kwö. 7 Rwoth Obangawu bino ketho pwod ni kibëc i kom langwu na dagwu ëka yelowu. 8 Un ibino winyo köp ka Rwoth döki ëka ilûbö unu cik mërë kibëc na an tin amiöwu. 9 Cë Rwoth Obangawu bino miöwu jami na pol rwök i tic kibëc na un ibino timö kî cingwu, i kom ëthinöwu, i kom ëthinö limwu na kwö ëka i kom cem na bino cëk i pwothiwu. Rwoth cwinye bino bedo na yom döki më miö jami nya bothwu, kite na ië obedo na yom i kom kwerewu, 10 ëntö ibino unu winyo köp ëka cik ka Rwoth Obanga onu n'ëcöô i buk ni më cik ëka ilökërë unu both Rwoth Obangawu kî cwinywu kibëc ëka kî tipowu kibëc. 11 Kobedini cik na tin an aciköwu kôdë ba tæk rwök ëka ba tye kanya bor kî bothwu. 12 Ba tye naka yo polo, ëk ömïi ipeny unu ni, "Nga na bino idhö malö i polo më ömö ëka titö niwa, ëk ewiny cë dong ëlûbi?" 13 Onyo ba tye naka yo löka nam tung ca, ëk ömïi ipeny unu ni, "Nga na bino ngölö nam më ömö ëka titö niwa ëk ewiny cë dong ëlûbi?" 14 Pe, köp nön tye na cwök

bothwu; tye i dhöwu ëka i cwinywu na miö itwërö unu lûbö. 15 Nën, an tin aketho i nyimwu gin na bër ëka gin na rac, kwö ëka thöô. 16 Ka ibino unu lûbö cik ka Rwoth Obangawu kibëc na an tin aciköwu, nakun nwongo îmarö unu ên ëka igwökö unu cik mërë kibëc, ibino unu kwö ëka welwu bino mëdërë, cë Rwoth Obangawu bino miöwu gum i lobo na un ibino dönyö ië më gamö bedo mewu. 17 Êntö ka cwinywu ôlökërë ökö ëka ba ibedo unu kî winy, nakun ilökërë unu both obanga nôkënë ginî ëka iryebere unu pîny më wörögi, 18 an tin akobo kanyalër bothwu ni ebino tyekowu ökö. Ba ibino unu bedo pî karë na lac i lobo na un ibino ngölö kulo kulo Jordan më dönyö ië ëka gamö bedo mewu. 19 An tin acwodo polo ëka lobo më bedo caden i komwu ni an aketho i nyimwu kwö ëka thöô, gum ëka cen. Dong kobedini yër unu kwö ëk un ëka ëthinöwu ibed unu na kwö. 20 An thon akobo niwu ni îmar unu Rwoth Obangawu, iwiny unu köp mërë ëka imok unu i kome. Piën Rwoth ënë miöwu kwö, ëka ên bino miö ibedo unu na kwö pî mwaka na pol i lobo na ên okwongere më miö both kwaröwu Abraam, Icaka ëka Jakob.

31 Cë Muca ömëdërë kî twakö köp ni both jö Icarael kibëc ni: 2 "An kobedini dong atye kî mwaka 120 ëka ba dök atwërö tëlöwu. Rwoth okobo botha ni, 'In ba ibino poth yo löka kulo Jordan.' 3 Rwoth Obangawu kikokome ënë bino cidhö anyim niwu yo löka ca. Ên bino tyeko rok ni kibëc na tye i nyimwu, ëka un ibino gamö lobogî më bedo mewu. Yocua thon bino cidhö anyim niwu yo löka ca, kite na Rwoth okobo kôdë. 4 Ēka Rwoth bino timö bothgi gin na ên obino ötimö both Cikon ëka Og, n'obedo ginî rwodhi ka jö Amor, na ên obino otyeko kanya acël kî lobogî. 5 Rwoth bino miögi bothwu, ëka un myero itim unu bothgi gin na kibëc na an aciköwu. 6 Bed unu jô na tæk ëka jô na cwinygi tæk. Kür ibed unu kî lworö mörö, onyo kür imiï komwu ömyël i nyimgî, piën Rwoth Obangawu bino woth kanya acël kodwu; ên ba bino wëköwu onyo kwëröwu." 7 Cë Muca ocwodo Yocua ëka okobo bothe i nyim jö Icarael kibëc ni, "Bed ngat na tæk ëka na cwinye tæk, piën myero icidh kî lwak ni i lobo na Rwoth okwongo më miö both kweregî, ëka myero ipok i kin-gî ëk ögam ginî ödök na calö mëgi. 8 Rwoth kikokome bino cidhö i nyimwu ëka bino bedo kanya acël kodwu, ên ba bino wëköwu onyo kwëröwu. Kür ibed unu kî lworö, kür cwinywu opodhi." 9 Cë Muca öcöô cik ni ginî pîny cë ömïö both ëlamdhök n'obedo Jö Lebi, n'otingo ginî canduk më cîkërë ka Rwoth, ëka both edong kibëc më Icarael. 10 Cë Muca öcîkögî ni:

"Kinge thum ka mwaka abirō abirō, i mwaka mē jalō banya, i karē mē kwero Karama mē Bōlō, 11 ka jō Icarael kibēc bino cōkērē gini i nyim Rwoth Obangani i kabedo na ēn bino yērō, in ibino kwanō cik ni kibēc bothgi na gin tye ka winyo. 12 Gür unu lwak kanya acēl—cwō, mon ēka ēthiñō, ēka erok na bedo gini i peciwu—ēk owiny gini ēka opwonyere gini kite mē lworo Rwoth Obangawu ēka ōgwōkērē gini mē lūbō kōp mē cik ni kibēc. 13 Ēthiñōgi, na ba ngeo gini cik ni, myero owiny ēka opwonyere gini mē lworo Rwoth Obangawu i karē kibēc na an itye ka kwō i lobo na un icidhō ngōlō yo lōka kulo Jordan mē bedo mewu." 14 Rwoth okobo both Muca ni, "Ninōni mē thōō dong cwōk. Cwod Yocua ēk ibed unu kanya acēl kōdē i Kēma mē Rwatērē, ēk an acik ēn." Cē Muca ēka Yocua ōcidhō gini yo Kēma mē Rwatērē. 15 Cē Rwoth onen i Kēma na cal kī wīr mē pōl, ēka wīr mē pōl ocung malō ka wi dholokek mē dōnyō i Kēma. 16 Cē Rwoth okobo both Muca ni: "In ibino cidhō mē yweo kanya acēl kī kwereni, ēka jō ni bino cakō wōrō obanga nōkēnē gini, obanga nōkēnē gini mē lobo na gin tye ka cidhō yo iē. Gin bino wēkōna ōkō ēka bino tūrō gini cikērē na an aketho kōdgi. 17 Cē i ninō nōn akēmō bino makōna i komgi ēka abino wēkōgi ōkō; an abino kanō wanga ōkō kī bothgi, ēka ebino tyekogi ōkō. Can na pol ēka pēkō bino podho i komgi, ēka i ninō nōn gin bino penyo ni, 'Can ni ba obino i komwa piēn Obanga onu ba tye kod onu?' 18 Ēntō an abino kanō wanga ōkō i ninō nōn piēn pī balgi kibēc mē lōkērē ōkō both obanga nōkēnē gini. 19 "Kobedini dong cōō wer ni piny ēka ipwony kī jō Icarael cē iimiği ower, ēk obed caden-na i komgi. 20 Ka an dong akelogi i lobo na mio na cak ēka mōō kic mōl kī iē, lobo na an acikara kī kwong both kweregi, ēka ka gin ōcamō cem oyeng cē ōcwēē gini, gin bino lōkērē both obanga nōkēnē gini ēka wōrōgi, nakun kwēra gini ōkō ēka tūrō cikērēna. 21 Cē ka can na pol ēka pēkō obino i komgi, wer ni bino bedo caden bothgi, piēn ēkwaēgi wigi ba bino wil iē. An angeo yūb mē thamagi na gin ōyūbō, kadī i karē na an bara akelogi i lobo na an acikara kī kwong mē miōgi." 22 Cē Muca ōcōō wer ni piny i ninō nōn ēka opwonyo kī jō Icarael. 23 Rwoth ōmiō cik ni both Yocua wod ka Nun: "Bed ngat na tēk ēka na cwinye tēk, piēn in kikomi ēnē ibino tero jō Icarael i lobo na an acikara kī kwong mē miōgi, ēka an kikoma abino bedo kodi." 24 Kinge na Muca otyeko cōō kōp mē cik ni i buk, cakērē kī i acaki naka i ajiki, 25 ēn ōmiō cik ni both Jō Lebi n'otingo Canduk mē Cikērē ka Rwoth: 26 "Ter unu Buk mē Cik ni ēka iketh unu i nget canduk mē cikērē ka Rwoth Obangawu. Bino bedo kunōn na

calō caden i komwu. 27 Piēn an angeo kite na un ibedo unu jō na jēm ēka jō na ngutgi nwang. Ka un ibedo ka jēm i kom Rwoth na an pod atye na kwō kany acēl kodwu, cē jēmwu bino bedo na rōm kwene ka an dong athōō ōkō! 28 Gür unu edong mē kakawu ēka editewu kibēc i nyima, ēk akob kōp ni bothgi na gin tye ka winyo ēka acwod polo kī lobo mē bedo caden i komgi. 29 Piēn an angeo nī kinge thōōna un ibino tīmō gin na rac ēka ibino unu lōkērē ōkō kī i yoo na an acikōwu kōdē. I karē mē anyim, can bino podho i komwu piēn ibino unu tīmō gin na rac i wang Rwoth nakun iimiō unu akēmō makō ēn kī gin na cingwu otio." 30 Cē Muca ōcakō wero kōp mē wer ni kī wie na gin tye ka winyo cakērē kī i acaki naka i ajiki mērē i nyim lwak mē Icarael n'ōgūrē gini:

32 Cik unu ithwu, un polo ēka lobo, winy unu na bēr kōp na an abino kobo. 2 Wēk pwonyina ōōny i komwu calō kōth, ēka kōpna bino tōn calō thoi, calō kōth na ngidho i kom lum na nyen, calō kōth na dwong i kom lum na mar. 3 An abino pakō nying Rwoth, ēka jōgē bino kobo pī dit mērē! 4 Ēn obedo Lēla, na bal mōrō ope i tic mērē, ēka i yodhi mērē kibēc ēn ngōlō kōp n'atir. Ēn obedo Obanga na genere na ba tīmō gin mōrō na rac, kite tye atir ēka ba lengere. 5 Gin ōtīmō bal i kome; ēka gin ba dōk obedo ēthiñō mērē, ēntō obedo gini rok n'ōlōkērē ēka n'ogom ōkō. 6 Man ēnē kite na un iculō kī Rwoth, un jō na mīng ēka n'ope kī ryēkō? Pathi ēnē Apapwu n'ocweowu ēka ōmiōwu itye na kwō? 7 Po i kom karē na cōn; tham pī run n'opoth gini. Peny apapni, cē ēn bino kobo nini. Peny unu edongwu, ēka gin bino niangōwu. 8 I karē na ēn na Malō Rwōk ōmiō both rok lobo n'obedo mēgi, i karē na ēn opoko jō kibēc, ēn oketho wang lobo ka rok acēlacēl na lūbērē kī wel awope ka jō Icarael. 9 Jō Icarael obedo gini jō ka Rwoth, ēntō ēn ōyērō ēkwaē ka Jakob obedo mēgē. 10 Rwoth obino onwongo jō Icarael i thim, i lobo na lik na dhanō ope iē, ōgūrōgi ēka ōgwōkōgi na bēr; ōgwōkōgi na calō tōng wangē. 11 Ēn cal kī jūr na pwonyo ēthiñē kī ngwēc malō ēka tēngō bwome i wi ēthiñē, na yarō bwome mē tingogi ēka tingogi i bwome. 12 Rwoth kēnē ēnē ōtēlōgi; obanga mōrō onwongo ope bothgi. 13 Ēn ōmiōgi ōidhō malō i lobo n'otingere malō, ēka ōpidhōgi kī cem n'ōcēk i pwothi. Ēn ōmiōgi mōō kic kī i lēla, ēka kī mōō jeituni kī i lobo n'otingere malō, 14 kī cak na wac mē dhok ēka kī cak ka rom ēka dyegi ēka kī dwolo ēthiñō rom ēka dyegi, k'ēthiñō rom ka Bacan n'ēyērō, ēka kī mōkō ngano na pwōth. Un imadhō kōngō ōlōk na bēr. 15 Jecurun ōdōngō n'ōcwēē ēka ōjēm; ka icemo iyeng

unu, ibino bedo unu na pěk ěka na komwu pwöth. un iwěkö Obanga n'ocweowu ěka ikwěro unu Lëla n'obedo alarwu. 16 Gin ömiö nyeko ömakö Obanga pi wöro obangagi ěka ömiö akëmö ömakö ěn i kom cal jwogigi më kwer. 17 Gin ömiö tyërgi both jwogi na ba obedo Obanga— obanga na gin onwongo ba ngeo, obanga na pod onen na nyen, obanga na kwerewu ba öwörögi. 18 Un ikwěro Lëla, n'ögwököwu; wiwu owil ökö i kom Obanga n'önywölöwu. 19 Ëntö Rwoth önenö man cë ökwërogi ökö piën awope ěka anyira mërë ömiö akëmö ömakö ěn. 20 ěka okobo ni, "An abino kanö wanga ökö ki bothgi, ěka anën kite na nyimgi bino bedo ködë; piën gin obedo rok n'ogom, ëthinö na ba genere. 21 Gin ömiö nyeko ömaka i kom gin na ba obedo Obanga ěka ömiö akëmö ömaka ki cal jwogigi na köny mërë ope. An abino miö nyeko makögi i kom jö na ba obedo rok kikokome; an abino miö akëmö makögi i kom rok na ba niang. 22 Piën akëmöna dong omoko mac ökö, ěka tye ka wang naka i thë bur lyël na thut. Bino wangö lobo ki gin n'öcëk ië ěka bino cwinyö mac i acaki thë kite. (Sheol 17585) 23 "Abino dhuro can i wigi ěka abino celo athërona kibëc i komgi. 24 An abino miö kec diögi, two odeke na reco bino tyekogi; an abino oro leeni na ger më thim i komgi, ěka thwone na tye ki kwir më tongogi. 25 Pala abadë bino tyekogi ökö ki i yodhi, lworo bino bedo i pecigi. Awope na thiñö ěka anyira na thiñö bino thum ökö, ëthinö na döth ěka jö na wigi opong lwar. 26 An akobo ni an abino këthögi ěka an abino miö nying-gi rwenyo ökö ki kin jii. 27 Ëntö an ba amiö lang-gi, më bedo k'awaka, ěka okob gini ni, 'Tëköwa dwong; Rwoth ba ötimö gin möro.'" 28 Jö Icarael obedo gini rok na ba ryëk, niang möro ope bothgi. 29 Ka onwongo gin ryëk, ěka öniang gini i köp ni, ěka onge gini gin na bino timërë i komgi! 30 Pingö dhanö acël öryëmö jö elip, onyo jö ariö twëro ryëmö jö elip apar? Rwoth, Kidigi, ökwërogi ökö; Obangagi më aura öwëkögi ökö. 31 Piën lëlagi ba cal ki Lëla onu. na calö lang onu thon twëro yeo ni kömanön. 32 Jang ölökgi ekelo ki i jang ölöc ka jö Codom, ěka ki i pwothi ka jö Gomora. Ölökgi opong ki kwir, ěka öbüng nyig-gi këc. 33 Köngö ölökgi cal ki kwir ka thwol, cal ki kwir k'ororo na kelo thöö. 34 Rwoth okobo ni, "Manön kibëc ba obedo gin na an akanö botha ěka amwönö ökö kanya an akanö limna ië? 35 Obedo ticna më cülö kwor; an abino cülö. i karë na tyën-gi bino cër; ninnögi më can dong cwök, ěka bino podho i komgi athura." 36 Rwoth bino ngölö köp i kom jögë ěka kica bino makö ěn i kom etic mërë, ka ěn önenö tëkögi dong othum ěka dhanö möro ba odong, opii onyo ngat na löörë këñ. 37 Cë

Rwoth bino kobo ni, "Obangagi tye gini kwene, lëla na gin obino opono ië, 38 obanga n'obino öcamö möö tyër awangagi ěka ömadhö gini köngö ölöc më tyër amadhagi? ěk gin öya malö më könyöwu! ěk gin obed jö na gwököwu!" 39 Rwoth okobo ni, "Nën dong kobedini an ěka an këna ěñë abedo Obanga; obanga nököñë ope i ngeta. An ěñë aneko ěka an ěñë amiö kwö, An ěñë awanö ěka an ěñë acangö, ěka ngat möro ope na twëro larö ki i cinga. 40 Atingo cinga malö yo polo ěka akobo ni: Na calö an Obanga na bedo na twal, 41 ka apakö pala abadëna na mimila ěka k'aryëö cinga më ngölö köp cë an abino cülö kwor i kom langna ěka abino ketho can i kom jö na daga gini. 42 An abino miö athërona mër ki remo, nakun pala abadëna bino camö ringo: bino yeng ki remo ka jö n'enekogi ki jö n'ëmakögi, ěka bino tongo wi ëtëla ka lang-gi." 43 Pak unu jögë, un rok kibëc, piën ěn bino cülö kwor më remo k'etic mërë; ěn bino cülö kwor i kom lang mërë ěka bino kwanyö bal ökö ki i lobo ka jögë. 44 Muca obino gin ki Yocua wod ka Nun ěka ötwakö köp më wer ni kibëc na jii tye ka winyo. 45 i karë na Muca owero köp ni kibëc ki wie both jö Icarael, 46 ěn okobo bothgi ni, "Gwök unu köp ni kibëc i cwinywu na tin an atye ka kobo bothwu, ëk icik unu k'ëthinöwu më lübö köp më cik ni kibëc na bër. 47 Köp ni ba obedo köp na köre ope niwu—gin obedo kwöwu. Gwök unu cik ni cë ibino bedo unu pi karë na lac i lobo na un i tye ka cidhö më ngölö kulo Jordan më gamö bedo mewu." 48 i ninnö nön kikokome Rwoth okobo both Muca ni, 49 "Cidh ëk iidh malö i wi kite më Abarim, na tye i lobo Moab; iidh i wi kidi më Nebo n'opimere ki Jeriko ěka inen lobo Kanaan na an acwök miö both jö Icarael. 50 In ibino thöö i wi kidi nön na in iidhö cë ibino cidhö nywakö kabedo ki kwereni kite n'omeru Aron öthöö ködë i wi kidi më Kor cë önywakö kabedo ki kwere mërë. 51 Piën un kibëc ba ibino ibedo unu ki gen i koma i nyim jö Icarael i dhö pii më Meriba Kadec i thim më Jin, un ikwëro wörona i nyim jö Icarael na calö Obanga na leng. 52 Pi manön, in ibino nënö lobo nön ki kanya bor; in ba ibino dönyö i lobo na an abino miö both jö Icarael."

33 Man ěñë gum na Muca dhanö k'Obanga ölamö i kom jö Icarael na ěn bara öthöö. 2 ěn okobo ni, "Rwoth obino öya ki wi kidi Cinai cë onen bothgi i Ceir, ěn öryëny i komgi ki i wi kidi Paran. ěn obino ki jögë na leng elip ki elip ki lëb mac na lyël ki i cingë më kucem. 3 Adyer in kikomi ěñë imarö jii; jö na leng kibëc tye gini i cingi. Gin kibëc ryebere piiny i ka tyeni, ěka nwongo gini pwony ki bothi, 4 cik na

Muca ömïö bothwa, më bedo më ka jö ka Jakob. 5 Ën obino obedo rwoth i Jecurun i karë n'edite ka lwak öcökêrë gîni, kanya acël kî kaka kibêc më Icarael. 6 "Ëk Reuben obed na kwö ëka kür öthöö, jögë thon kür obed na nönök." 7 Ëka man ënë gin na ën okobo i kom Yuda: "Aa Rwoth, winy koko ka Yuda; dwongi ën pacö both jögë. Ën bino lwëny pirë kënë kî cingë. Bed ngat na kõnyö ën i kom lang mërë!" 8 Ëka i kom Lebi ën okobo ni: "Mii both Lebi Tumim ëka Urim na megî both aticni na in igeno. In itëmö ën kî i Maca; in ibino itëmö nî gin tye adyer kî i dhö pii më Meriba. 9 Lebi okobo i kom apap ëka aya mërë nî, 'An ba aparö pirgi.' Ën wie ba opo i kom utmego mërë onyo më ngeo ëthinö mërë kikokome, ëntö ën ögwökö köp na megî ëka ölübö cikêrëni. 10 Gîn bino pwonyo Jakob kî cikni ëka cikni both jö Icarael. Ën bino wangö odok na kur i nyimi ëka tyër awanga kibêc i wi keno tyëni. 11 Aa Rwoth, miî gum i kom dirü mërë kibêc, ëka ibed kî yom cwiny i kom gin na ën otio kî cingë. Göö lang na yaa më lwëny i kome piny, göö lang mërë piny ëk kür dök ölwëny gîni i kome." 12 Ëka i kom Benjamin ën okobo ni: "Ëk dhanö na Rwoth marö obed kî kuc i kome, piën Rwoth gwökö ën i karë kibêc, ëka ngat na Rwoth marö yweo i kin wi baë." 13 I kom Yocepu ën okobo ni: "Rwoth myero ömii gum i lobo mërë kî mic më thoi na bëcö na yaa kî malö i polo, ëka kî pii na thuth na tye piny i thë lobo, 14 kî nyig yen na bëcö na nyak kî ceng, ëka kî cem na cëk dwe kî dwe, 15 kî nyig kodhi na bëcö na cëk i wi kite na cön ëka kî jami na cëk na büp i wi cere na bedo naka naka; 16 kî mic na bëcö më ngöm ëka kî gin na kibêc na cëk i ië, ëka kica ka ngat n'onen kî i bunga na lyël mac. Ëk gum ni kibêc obed i wi Yocepu, ëka i wi ngat n'epoko ökö kî i kin utmego mërë. 17 I dit mërë kî dheo mërë ën obedo calö wod thwön n'obedo kaö; tunge cal gîni kî tung thwön na ger. Kî tunge gîni ën bino twomo kî rok gîni, naka jö na tye i thwok lobo kibêc. Man ënë gumna pî jö Epraim na pol, ëka kî jö ka Manace na römö elip kî elip." 18 I kom Jabulon ën okobo ni: "Cwinyi obed na yom, Jabulon, ka idönyö yökö, ëka in, Icacar, ka ibedo i këmani. 19 Gîn bino cwodo jö kibêc më cidhö yo wi kidi ëka kî kunön gin bino miö tyërgi më kite atir, gin bino nwongo lönyögi kî i nam, kî i kom lönyö n'ëkanö i kwo." 20 I kom Gad ën okobo ni: "Gum obed i kom dhanö n'ömïö wang lobo ka Gad obedo na lac! Gad buto kunön calö kibwor, më yëcö bad lee onyo wie. 21 Ën öyëro lobo mërë na bër, piën nget lobo k'ëtëla onwongo ëkanö pirë. I karë n'edite wi lwak öcökêrë gîni, ën otio gin na Rwoth mitö na tye atir, ëka kî ngölö-köp mërë i kom jö Icarael." 22 I kom Dan ën okobo ni:

"Dan cal k'athin kibwor, na kiirë kî i Bacan." 23 I kom Naputali ën okobo ni: "Naputali, in ipong kî kica ka Rwoth, ëka ipong kî gum ka Rwoth; gam lobo më kuthö ëka kukwap." 24 I kom Acer ën okobo ni: "Ëk gum obed i kom Acer na löö kaka nökenë, ëk cwiny utmego mërë obed na bër i kome, ëka ölwök tyënë i möö jeituni. 25 Nywenyo më loro dhö wangkac na megî bino bedo nywenyo kî mola, ëka tëkö më komi bino bedo na rom kî mwaka më ditni. 26 "Ngat mörö ope na cal k'Obanga ka Jecurun, na ngwécö arii i polo më kõnyöni, ëka kî dheo mërë i kom pöl. 27 Obanga na bedo naka naka ënë obedo ka ponowu, ëka cingë tye piny më tingowu malö. Ën ryëmö langni ökö kî i nyimi, nakun kobo nî, 'Tyekgi ökö!' 28 Pî manön Icarael bino bedo kî kuc, ëkwaë ka Jakob bino bedo gîni abonge ayela mörö i lobo na kal ëka kõngö ölökö na nyen tye ië, kanya polo miö thoi tön piny. 29 Cwinywu obed na yom un jö Icarael! Nga na cal kodwu, rok na Rwoth ölarögi? Ën obedo kwotwu ëka ngat na gwököwu ëka kî pala abadëni më aura. Langwu bino bedo gîni kî myël kom i nyimwu, ëka tyënwu bino nyönö kabadogi kibêc."

34 Cë Muca öya kî i bar më Moab ëka öidhö malö i wi kidi Nebo naka i wi pem më Piciga, n'opimere kî Jeriko. Kî kany nön Rwoth onyutho niinë lobo kibêc—cakêrë kî i Gilead më thuno ködë naka i Dan, 2 ëka kî lobo ka Naputali kibêc, lobo ka Epraim ëka Manace, lobo ka Yuda kibêc më thuno ködë naka yo kuthö nam, 3 Negeb ëka lobo kibêc cakêrë kî i ora më Jeriko, n'obedo pacö më ötit, thuno ködë naka i Joar. 4 Cë Rwoth okobo both Muca nî, "Man ënë lobo na an acikara kî kwong both Abraam, Icaca ëka Jakob i karë na an akobo nî, 'An abino miö both ëkwaëni.' An amii inënë kî wangi, ëntö ba ibino cidhö yo löka tung ca." 5 Ëka Muca, atic ka Rwoth, öthöö kunön i lobo Moab, kite na Rwoth obino okobo ködë. 6 Rwoth oiko ën i lobo Moab, i ora n'opimere kî Bet Peor, ëntö naka tin ngat mörö ope na ngeo kanya lyënë tye ië. 7 Muca onwongo tye kî mwaka 120 i karë na ën thöö, wangë onwongo pod neno na bër ëka kome thon onwongo pod ték. 8 Jö Icarael okoko gîni Muca kî i bar më Moab pî niinö pyer adek, naka karë më koko kî kumo othum. 9 Yocua wod ka Nun onwongo opong kî cwiny më ryëkö piën Muca onwongo oketho cingë i kome. Cë jö Icarael owinyo gîni dhögë ëka ögwökö gîni cik na Rwoth öcökö kî Muca. 10 Anaka nön, adwarpiny mörö nökenë ba dök onen na cal kî Muca i lobo Icarael, na Rwoth ongere ködë wang kî wang, 11 n'otio anyuth më tango nön ëka kî gin më aura gîni na Rwoth ooro ën yo

Ejip—both Parao ěka both edite měrě kiběc ěka lobo
měrě kiběc. 12 Ngat měrě někěně ope n'obedo tio tic
kĭ těkě na dit ěka kĭ gin měkě na kelo lworu kite na
Muca obedo ka tio ĭ nyim jě Icarael kiběc.

NEW TESTAMENT



Yecu òlégò nǐ, “Apap, tīm nǐgǐ kǐca, piēn gǐn ba ngeo ngō na gǐn tye ka tīmō.”

Cě acikari opoko bǒng mǐrě kǐ bolo kwir.

Luka 23:34

Matayo

1 Man ënë kwere ka Yecu Kiricito, akwar Daudi, akwar Abraam: 2 Abraam önywölö Icaka, Icaka önywölö Jakob, Jakob önywölö Yuda ëka omego mërë, 3 Yuda kî dhakö mërë Tamar önywölö gîni Perej ëka Jera, Perej önywölö Kejeron, Kejeron önywölö Ram, 4 Ram önywölö Aminadab, Aminadab önywölö Nacon, Nacon önywölö Calamon, 5 Calamon kî dhakö mërë Raab önywölö gîni Boaj, Boaj kî dhakö mërë Ruth önywölö gîni Obed, Obed önywölö Jece, 6 ëka Jece önywölö rwoth Daudi. Daudi önywölö Colomon, n'onwongo aya mërë obedo dhakö ka Uriä 7 Colomon önywölö Rekoboam, Rekoboam önywölö Abija, Abija önywölö Aca, 8 Aca önywölö Yekocapat, Yekocapat önywölö Joram, Joram önywölö Ujia, 9 Ujia önywölö Yotam, Yotam önywölö Akaj, Akaj önywölö Kejekia, 10 Kejekia önywölö Manace, Manace önywölö Amon, Amon önywölö Yocia, 11 ëka Yocia önywölö Yekonia ëka omego mërë i karë n'etero jö Icarael i lobo Babilon. 12 Kinge na dong etero jö Icarael i lobo Babilon: Yekonia önywölö Celatiel, Celatiel önywölö Jerubabel, 13 Jerubabel önywölö Abiud, Abiud önywölö Eliakim, Eliakim önywölö Ajor, 14 Ajor önywölö Jadok, Jadok önywölö Akim, Akim önywölö Eliud, 15 Eliud önywölö Eleajar, Eleajar önywölö Mathan, Mathan önywölö Jakob, 16 ëka Jakob önywölö Yocepu cwör Maria, n'önywölö Yecu n'ecwodo ni Meciya. 17 Man ënë wang rok apar wie angwën n'ënywölögi kibëc cakërë kî i kom Abraam naka othuno ködë i kom Daudi, apar wie angwën kî kom Daudi naka othuno i karë n'eterogi i Babilon, ëka apar wie angwën kî i karë n'eterogi i Babilon naka othuno i kom Meciya. 18 Man ënë kite n'ënywölö kî Yecu Kiricito: i karë na Maria onwongo öcîkërë më nyömërë kî Yocepu, na gîn bara örwatërë kanya acël, enwongo ni Maria öyac kî təkō ka Tipo Naleng. 19 Yocepu onwongo obedo dhanö na kite atir ëka ba ömitö ni eketh lewic i kom Maria, ëntö onwongo mitö ni ëkwër Maria i müng. 20 i karë na Yocepu pod tye ka thamö köp nön kî i cwinye, malaika ka Rwoth onen bothe i wang lek ëka okobo ni, "Yocepu akwar Daudi, kür ibed kî lworö më tero Maria më bedo dhaköni, piën ic na ën tye ködë ögamö kî təkō ka Tipo Naleng. 21 Ën bino nywölö athîn awobi, ëka in ibino cakö nyingë Yecu, piën ën bino larö jögë kî i kom balgi." 22 Man kibëc ötimërë ëk köp ka Rwoth ocobere na ën okobo kî i dhö adwarpiny ni: 23 "Nyakö na bara ongere k'ëcwö bino yac ëka bino nywölö athîn awobi; ebino cakö nyingë Emmanuel"—na tyën köp mërë ni,

"Obanga tye ködwa." 24 i karë na Yocepu ocoo kî i wang ninö, ën ötimö kite na malaika ka Rwoth öcîkë ën ködë ëka otero Maria obedo dhakö mërë. 25 Ëntö Yocepu ba obedo ködë naka ënywölö athîn awobi. Cë Yocepu öcakö nyingë Yecu.

2 Kinge na dong ënywölö Yecu i Bethelëm na tye i Yudea, i karë n'Erode obedo rwoth, ëryëkö öya kî kukidë obino gîni yo Jerucalëm 2 ëka openyo gîni ni, "Athîn n'ënywölö më bedo rwoth k'Eyuda tye kwene? Wan ënëñö cër mërë kî kukidë cë wan ebino më wörö athîn." 3 i karë na rwoth Erode owinyo köp ni, cwinye opodho rwök, ëka jö më Jerucalëm kibëc cwinygi opodho kanya acël ködë. 4 Erode ocwodo ëlamdhök na dito kibëc ëka epwony cik cë openyogi ka kwene n'onwongo ebino nywölö Meciya ië. 5 Gîn ögamö ni, "i Bethelëm më Yudea, piën man ënë ngö n'adwarpiny onwongo öcö: 6 "“Ëntö in, Bethelëm na tye i lobo më Yuda, in ba itidi rwök kî i kin kaka më Yuda; piën alöc bino yaa kî bothi na ën bino kwaö jöga më Icarael.” 7 Cë Erode ocwodo ëryëkö i müng ëka öniang kî bothgi karë na cër onen ië. 8 Cë ën oorogi yo Bethelëm nakun kobo nigî ni, "Cidh ipeny unu köp i kom athîn ni na bër. Ka inwongo unu, cë ikel unu köp nön botha, ëk an thon acidh awör ën." 9 Kinge na dong gîn owinyo köp ka rwoth, gîn öcakö cidhö kî yorgi, ëka cër na gîn onwongo önenö kî kukidë ötelö nyimgi naka ocung i wi kanya athîn onwongo tye ië. 10 i karë na gîn önenö cër, cwinygi obedo na yom rwök. 11 Gîn ödönyö i öt ëka önenö gîni athîn ëka aya mërë Maria, cë orumo cöng-gi piny ëka ëwörö athîn. Gîn ögönyö yëcgi ëka ömiö gîni mic më gol, odok na ngwece kur ëka müra. 12 Kinge Obanga öcîkögi i wang lek ni kür ödök gîni cen yo both Erode, gîn ödök i lobogi nakun ewok kî i yoo nökenë. 13 Kinge na dong ëryëkö ödök gîni ökö, malaika ka Rwoth onen both Yocepu i wang lek cë okobo ni, "Yaa malö iter athîn gîn k'aya mërë ëk ilüü unu yo Ejip. Bed unu kunön naka ka an akobo nini më dwogo, piën Erode bino rangö athîn ëk enek ökö." 14 Cë Yocepu öya, ökwanyö athîn gîn k'aya mërë i kiwor ëka öcidhö yo Ejip, 15 kanya ën obedo ië naka Erode öthö. Man ötimërë ëk köp ka Rwoth na ën okobo i dhö adwarpiny ocobere kakarë ni, "An acwodo woda kî i Ejip." 16 i karë n'Erode öniang ni ëryëkö öbwölë, öngö örwök ëka ömiö twërö më neko ëthinö awope kibëc kî i Bethelëm ëka i kabedo kibëc na cwök ködë cakërë kî i mwaka ariö dök ködë piny, na lüberë kî karë na ën öniang ködë kî both ëryëkö. 17 Cë ngö na yam adwarpiny Jeremia okobo ocobere: 18 "Dwön mörö tye ka winyere kî i Rama na

kok ëka kumo rwök, Racel tye ka koko pî ëthinë, ëka ba mîtö nî ekwe cwinye, piën ëthinë öthöö gîni ökö.”

19 Kinge na dong Erobe öthöö, malaika ka Rwoth onen both Yocepu i wang lek ki i Ejip 20 ëka okobo ni, “Yaa malö, iter athin gin k'aya mërë ëka idök unu i lobo më Icarael, piën jö n'onwongo mîtö kwanyö kwö k'athin dong öthöö gîni ökö.” 21 Cë Yocepu öya, ökwanyö athin gin k'aya mërë ëka öcidhö gîni i lobo më Icarael. 22 Entö i karë na Yocepu owinyo nî Arkelau ënë dong löö Yudea nakaka apap mërë Erobe, Yocepu obedo ki lworo më cidhö yo kunön. Cë kinge n'Obanga okobo ninë i wang lek, ën öya öcidhö i lobo më Galilaya. 23 En öcidhö obedo i taun n'ecwodo nî Najaret. Cë köp n'edwarpiny ötwakö ocobere: “En ebino cwodo nî dhanö më Najaret.”

3 I karë nonu Jon Abatica obino nakun titö köp k'Obanga i thim më Yudea 2 ëka kobo ni, “Ngut unu, piën ker më polo onyingo na cwök.” 3 Man ënë ngat n'adwarpiny lcaya ötwakö pîrë: “Dwön dhanö mörö tye ka redo i thim ni, 'Yüb unu yoo pi Rwoth, mii unu yoo ocung atir ninë.’” 4 Jon onwongo ruko böng n'ëyübö ki kom yer kinaga, ëka onwongo tweo wang pyërë ki del. Cem mërë onwongo obedo bonyo ëka möö kic më thim. 5 Jii onwongo yaa ki i Jerucalem, ki i lobo Yudea kibëc ëka ki i lobo kibëc na tye i nget kulo Jordan më cidhö bothe. 6 Gin onwongo tucö balgi ëka Jon baticagi i kulo Jordan. 7 Entö ka ën önönö Eparicayo ëka Ecadukayo tye ka bino kanya ën onwongo tye ka batica jii ië, ën okobo bothgi nî: “Un ëthin ororo! Nga n'okobo niwu nî iiring unu ki i akëmö k'Obanga na tye ka bino?” 8 Tii unu dong gin na nyutho nî ingut unu. 9 Kür dök itham unu më kobo ni, “Wan etye k'Abraam na calö apapwa.” An akobo niwu nî ki kom kite ni Obanga twërö miö ëkwaë k'Abraam donyo ki ië. 10 Kobedini dong etyeko ketho atong i tyën orii yen, ëka yath mörö na ba nyakö nyige na bër ebino tongo ökö piny cë ebolo i mac. 11 “An abaticawu ki pii më nyutho nî ingut unu ökö ki kom balwu, ëntö ngat na bino ki kora tæk na löa ökö, an ba apora më ködö wörë. En bino baticawu ki Tipo Naleng ëka ki mac. 12 Odheru mërë tye i cingë, ëka ën bino yübö larü moo mërë, cë cökö kal mërë ketho i dërö ëka wangö cüngë ki mac na ba thöö.” 13 Cë Yecu öya ki i Galilaya öcidhö yo kulo Jordan, ëk Jon obatica ën. 14 Entö Jon ötëmö kwërö ökö nakun kobo ni, “An amitö nî in ënë ibatica an, ëntö pingö in dök i ibino nî an abatica in?” 15 Yecu ögamö nî, “Wëk ötimërë nî komanön kobedini; piën pore nî ön më cobo gin na kibëc më kite atir.” Cë Jon oyeo. 16 Kinge na dong Yecu ebatica, cë ën odonyo malö ki i

pii. Cücüth i caa nön polo öyabërë, ëka ën önönö Tipo k'Obanga ka bino calö amam, cë opye i kome.

17 Cë dwön mörö owinyere ki i polo na kobo ni, “Man ënë Woda më amara; na iya yom i kome.”

4 Cë Tipo k'Obanga otero Yecu i thim ëk Catan ötëm ën. 2 Cë Yecu orio kec pi ninö pyer angwën kiceng ëka kiwor, kinge kec oneko ën. 3 Cë Catan obino both Yecu më tëmö ën nakun kobo ni, “Ka in ibedo Wod k'Obanga, kob nî kite nî ëk öläkërë ödök cem.” 4 Yecu ögamö ninë nî, “Ecöo i Cöc na Leng nî: ‘Dhanö ba kwö ki cem këkën ëntö kwö ki köp kibëc na donyo ki i dhö Obanga.’” 5 Cë Catan otero Yecu yo Jerucalem i taun na leng ëka ömiö ën ocung malö i wi birübürü më öt k'Obanga. 6 En okobo ni, “Ka in ibedo Wod k'Obanga, podh yo piny. Piën ecöo nî: “Obanga bino cikö emalaika mërë më gwököni, ëka gin bino gamöni ki cing-gi, ëk kür itwom tyeni i kom kidi.” 7 Yecu ögamö ninë nî, “Ecöo thon nî: ‘Kür itëm Rwoth Obangani.’” 8 Catan dök i otero Yecu yo wi kidi na bor malö rwök cë onyutho ninë ker kibëc më wi lobo ëka ki dheogi. 9 Catan okobo ni, “Man kibëc an abino miöni, ka in ibino rumo cong piny ëka iwöra.” 10 Yecu okobo ninë nî, “Catan, nyik ökö ki botha! Piën ecöo nî: ‘Wör Rwoth Obangani ëka itii ninë këkën.’” 11 Cë Catan öwëkö Yecu, ëka emalaika obino gini cë ökönyö ën. 12 I karë na Yecu owinyo nî Jon etweo i buc, ën ödök yo Galilaya. 13 Yecu ba obedo i Najaret, ëntö ën öcidhö obedo i Kaperanaum, pacö na tye i nget nam Galilaya, na tye i lobo Jabulon ëka Naputali— 14 më cobo köp n'adwarpiny lcaya okobo: 15 “Lobo më Jabulon ëka Naputali, yoo na cidhö yo nam, na tye yo löka kulo Jordan, Galilaya n'obedo lobo n'Erok bedo gini ië— 16 jö na bedo gini i piny na cöl, önönö gini dong tar na dit; jö na bedo i tipo lobo më thöö, tar dong öryëny i komgi.” 17 Cakërë i karë nön cidhö ködë anyim, Yecu öcakö titö köp nakun kobo ni, “Ngut unu, piën ker më polo onyingo na cwök.” 18 I ninö mörö acël, na Yecu onwongo tye ka wok i nget Nam më Galilaya, ën önönö utmegeo ariö, Cimon n'ecwodo nî Petero ëka ömin mërë Anderiya. Gin onwongo tye ka bolo böö i nam, piën gin onwongo obedo ëcic réc. 19 Yecu okobo bothgi nî, “Bin, ilüb unu kora ëka an abino miöwu idökö ëmak jii nakaka réc.” 20 Cücüth gin öwëkö böögi ëka ölübö gini kör Yecu. 21 En öcidhö ki kany nön ëka önönö utmegeo ariö nököne, Yakobo gin k'ömin mërë Jon, awope ka Jebedayo. Gin onwongo tye i yeya kanya acël k'apapgi Jebedayo, yübö gini böögi. Cë Yecu ocwodogi, 22 ëka cücüth gin öya öwëkö yeya ëka apapgi cë ölübö gini kör Yecu. 23

Yecu owotho orimo i Galilaya kibéc, nakun pwnyoyi Cinagogagi kibéc, titò kóp mè Emuth na Bèr mè ker k'Obanga, éka cangò koth twoe kibéc k'kom jii. 24 Emuth i kom Yecu òkèth òròmò lobo Ciria kibéc. Jii okelo bothe jò kibéc n'onwongo komgi lith k' twoe na papath, jò na tye k'arem na rac, jò na cen òmakögi, jò na two araka òmakögi, éka jò na komgi okwe, cè èn òcangögi. 25 Lwak na pol n'òya k' i Galilaya, Dekapoli, Jerucalem, Yudea éka lobo na tye yo löka kulo Jordan ölübö gin' i kór Yecu.

5 I karé na Yecu önénò lwak, èn öcìdhò i wi kidi cè obedo piny. Èlúbkórè obino bothe, 2 éka èn öcakò pwnyoyi nakun kobo ni: 3 "Komgi gum jò na ngeo ni gin ebeto ècan i cwiny, pièn ker mè polo bino bedo mëgi. 4 Komgi gum jò na kumo, pièn ebino kweo cwinygi. 5 Komgi gum jò na mwol, pièn gin bino leo lobo bedo mëgi. 6 Komgi gum jò na kec éka öriò nekog' pi bedo jò na kitegi atir, pièn ebino miögi yeng. 7 Komgi gum jò n'obedo èkica, pièn ebino timò kica nig' i. 8 Komgi gum jò na cwinygi leng, pièn gin bino nënò Obanga. 9 Komgi gum jò na kelo kuc, pièn ebino cwodog' ni èthinò k'Obanga. 10 Komgi gum jò n'eyelog' pi bedo jò na kitegi atir, pièn ker mè polo bino bedo mëgi." 11 "Komwu gum ka jii yanyöwu, eyelowu, éka ekobo kwa kóp na reco kibéc mè twodo i komwu pira. 12 Bed unu k' yom cwiny, pièn cül na mewu tye na dit i polo. Man ènè kite na gin oyelo k'edwarpiny n'òcakò bedo niwu." 13 "Un ibedo kadò mè lobo. Èntò ka kadò orwenyo mit mèrè ökö, ètwèrò miö dökò na mit ningö dök' i? Köny mèrè nwongo dong ope, myero èöny ökö jii önyön. 14 "Un ibedo tar mè lobo. Pacò n'ègèrò i wi kidi ba twèrò kanèrè. 15 Ngat mörò ope na cwinyö tara éka ketho i thè agulu. Èntò eketho kanya oten malò éka mënyö jò kibéc na tye i öt. 16 I yoo acèl nön, mi' unu tar na mewu öryény i nyim jii, èk gin önén ticwu na bëcò, éka öpak gin' i Apapwu na tye i polo." 17 "Kür itham unu ni an abino mè jükò C'ik onyo kóp k'edwarpiny; an ba abino mè jükögi èntò mè cobog' i. 18 An akobo niwu kóp adyer ni wang na polo éka lobo othuno i ajiki, nyukuta mörò acèl na tidi onyo tön mörò acèl mè C'ik ba bino rwenyo, naka ka kóp kibéc ocobere. 19 Dong ka ngat mörò ötürò c'ik mörò acèl k' i kom c'ik ni gin' i, nakun pwnyoyi k' jò nökenè mè timò ni kömanön, ebino cwodo èn ni dhanò na tidi i ker mè polo. Èntò ngat na ketho i tic éka pwnyoyi c'ik ni ebino cwodo ni dhanò na dit i ker mè polo. 20 Èntò an akobo niwu ni ka kite atirwu ba ölö mè k'Eparicayo éka mè k'epwonyi c'ik, un ba ibino dönyö i ker mè polo." 21 "Un iwinyo kóp na yam ekobo both jò na

cön ni, 'Kür ineki, éka ka ngat mörò na bino neko dhanò, ebino ngölö-köp ninè.' 22 Èntò an akobo niwu ni ngat mörò n'akëmò makò i kom ömin mèrè ebino ngölö-köp ninè. Ngat mörò na bino yanyö ömin mèrè ni, 'In ibangiri,' ebino tero i nyim athuko mè öd okiko k'edong. Èntò ngat mörò na kobo ni, 'In amingo' ebino bolo i mac mè kapiny. (Geenna g1067) 23 "Pi manön, ka ikelo micni i keno tyèr mè miö both Obanga éka ipo ni omeru tye k' kóp mörò i komi, 24 wèk micni i nyim keno tyèr. Cidh kono both omeru èk irib unu wat na bér i kinwu; cè dong idwogi éka imi' micni. 25 "Tyek kóp piöpö k' ngat n'odothi na pod itye unu i yoo mè cidhò i pido, èk ngat n'odothi kür oter' i nyim angöl-köp, cè angöl-köp bino miöni both acikari, éka ebino tweoni i buc. 26 An akobo niwu kóp adyer ni ba ibino donyo k' i buc naka ka icülö cül kibéc, na wi ciling mörò ba orem." 27 "Un iwinyo kóp na yam ekobo ni, 'Kür idöny i elomi.' 28 Èntò an akobo niwu ni ka ngat mörò önénò dhakò cè öthamò k' i cwinye mè bedo ködè nwongo ödönyö i elomi. 29 Ka wangi mè kucem ènè mi' ipodho i bal, köi iyuu ökö. Bèr nini mè rwenyo dul komi acèl ni löönö bolo komi kibéc i mac mè kapiny. (Geenna g1067) 30 Ka cingi mè kucem ènè mi' ipodho i bal, ngun iyuu ökö. Bèr nini mè rwenyo dul komi acèl ni löönö bolo komi kibéc i mac mè kapiny." (Geenna g1067) 31 "Un iwinyo c'ik na kobo ni, 'Ngat mörò na kwèrò dhakò mèrè myero ömii waraga mè këthò nyom.' 32 Èntò an akobo bothwu ni ka ngat mörò ökwèrò dhakò mèrè, na path k' kóp mè tar wang, nwongo ömiö dhakò nön ödökò jò elomi, éka ngat mörò na nyömö dhakò n'èkwèrò ökö nwongo ödönyö i elomi." 33 "Dök' i, un iwinyo kóp na yam ekobo both jò na cön ni, 'Kür ikwong kwong nono, èntò cob kwong na in ikwong both Rwoth.' 34 Èntò an akobo niwu, kür ikwong unu kwong mörò na twal, kad' k' polo pièn manön obedo then ker k'Obanga; 35 onyo k' nyiny lobo, pièn manön obedo then mè theno tyèné; onyo k' nyiny Jerucalem, pièn manön obedo pacò k'Obanga, Rwoth na Dit. 36 Kür ikwong kwong k' wii, pièn in ba itwèrò miö yer mörò acèl mè bedo na tar onyo na cöl. 37 Mi' unu köpwu obed ni, 'Eyo' obed 'eyo,' onyo 'Pe' obed 'pe.' Kóp mörò na kadhò manön nwongo öya k' both ngat na rac." 38 "Un iwinyo kóp na yam ekobo ni, 'Wang ècülö k' wang, éka lak ècülö k' lak.' 39 Èntò an akobo niwu ni kür icül unu kwor i kom ngat mörò n'ötümö gin na rac i komi. Ka ngat mörò odhongo lemi kucem, lök ninè lemi nökenè thon. 40 Ka ngat mörò miitò pidoni ni èk eter catini, mi' èn thon kotini. 41 Ka ngat mörò odii mè yèö yèc mèrè pi kilomita acèl, woth ködè pi kilomita ariö. 42 Ka dhanò mörò ökwaö gin mörò k' i

bothi, mīi gin nōn bothe. Ka ngat mōrō mītō deno gin mōrō kī bothi, mīi ēn oden.” 43 “Un iwinyo kōp na yam n'onwongo ekobo nī, 'Mar awodhi ēka idag langōni.' 44 Ēntō an akobo niwu: Mar unu langwu ēka ilēg unu pī jō na yelowu, 45 ēk ibed unu calō ēthinō k'Apapwu adyer na tye ī polo. Pīēn ēn mīō ceng mērē ryēny both jō na reco ēka kī jō na bēcō. Ēn mīō kōth both jō na kitegī atīr ēka both jō na kitegī ba tye atīr. 46 Ka imarō unu jō na marōwu, cūl ngō n'Obanga bino cūlōwu kōdē? Naka thon ēcōk ocoro tīmō gīnī nī kōmanōn. 47 Ka imotho unu utmegowu kēkēn, apokapoka ngō na tye ī kinwu kī jō nōkēnē? Naka thon jō na ba ngeo Obanga tīmō nī kōmanōn. 48 Myero ibed unu jō na bal mōrō ope ī komgī, na calō Apapwu na tye ī polo na bal mōrō ope ī kome.”

6 “Gwōkērē unu ēk kūr itii unu 'ticwu mē kite atīr' ī nyim jīi ēk gīn ōnēn. Ka itīmō unu, ba ibino unu nwongo cūl mōrō kī both Apapwu na tye ī polo. 2 “Ka ikōnyō acan, kūr ikūdhi pelu kite n'etwodo tīmō ī Cinagoga gīnī ēka ī yodhi, ēk jīi ōwōrgī. An akobo niwu kōp adyer nī gīn dong onwongo cūlgī ōkō. 3 Ēntō ka ikōnyō acan, kūr imīi cingi mē kucam onge gin na cingi mē kucem tye ka tīmō, 4 ēk kōny na in imīō both acan obed ī mūng. Cē Apapwu, na nēnō gin n'ētīmō ī mūng, bino cūlōni. 5 “Ka in ilēgō, kūr ilēg calō etwodo, pīēn gīn marō lēga nakun nwongo ocung gīnī ī cinagoga gīnī ēka ī nget yodhi ēk jīi ōnēn-gī. An akobo niwu kōp adyer nī gīn dong otyeko nwongo cūlgī ōkō. 6 Ēntō ka in ilēgō, dōny ī odi, lor dholokek ēka ilēg both Apapni na kome ba nen. Cē Apapwu, na nēnō gin n'ētīmō ī mūng, bino cūlōni. 7 Ka in ilēgō, kūr idhur kōp na pol calō jō na ba ngeo Obanga, pīēn gīn thamō nī ebino winyo lēgagī pī kōpgī na pol. 8 Kūr ilēg unu kamē gīn, pīēn Apapwu ngeo gin na mītērē bothwu na bara ipenyo ēn. 9 “Man ēnē kite na myero ilēg unu kōdē: “‘Apapwa na tye ī polo, nyingi myero ēwōr, 10 kerni obin, mitini ētīm ī lobo kite n'ētīmō kōdē ī polo. 11 Mīiwa tin cemwa mē ninō kī ninō. 12 Tīm kīca ī kom balwa, kite na wan thon ētīmō kīca ī kom jō na balō bothwa. 13 Kūr iwēk ēbwōlwa, ēntō larwa kī both ngat na rac.’ 14 Ka un itīmō kīca both jō nōkēnē ka gīn ōbalō ī komwu, Apapwu na tye ī polo thon bino tīmō kīca ī kom balwu. 15 Ēntō ka in ba itīmō kīca both jō nōkēnē pī bal na gīn ōbalō, Apapwu thon ba bino tīmō kīca pī bal na in ībalō. 16 “Ka in irio kec, kūr imīi wangi onen calō wang etwodo, pīēn gīn balō wang-gī ōkō ēk jīi ōnēn nī gīn etye ka rio kec. An akobo niwu kōp adyer, gīn dong otyeko nwongo cūlgī ōkō. 17 Ēntō ka in irio kec, kur wii, ēka ilwōk wangi, 18 ēk kūr jō

nōkēnē ōnēn nī in itye ka rio kec, ēntō both Apapwu kēkēn na ba nen; cē Apapwu na nēnō gin n'ētīmō ī mūng bino cūlōni.” 19 “Kūr ikān lōnyōwu ī wi lobo, kanya nyēnyē ēka nyali balō, ēka kanya ekwoe tūrō cē kwalō gīnī ōkō. 20 Ēntō kan unu lōnyōwu ī polo, kanya nyēnyē ēka nyali ba balō, ēka kanya ekwoe ba tūrō cē kwalō gīnī ōkō. 21 Pīēn kanya lōnyōni tye iē ēnē cwinyi thon tye iē. 22 “Wangi ēnē obedo tara mē komi. Ka wangi tye na bēr, komi kībēc nwongo tye kī tar n'ōrōmō. 23 Ēntō ka wangi ba tye na bēr, komi kībēc nwongo opong kī cōl pīny. Ka tar na tye bothi cōl, cōl pīny nōn nwongo rōm kwene! 24 “Ngat mōrō ope na rōmō tic pī rwodhi arīō; pīēn ēn bino dagō ngat acēl ēka bino marō nōkēnē ca; onyo ēn bino moko ī kom ngat acēl ēka kwērō nōkēnē ca. In ba īrōmō tic pī Obanga ēka pī cīlling thon. 25 “Pī manōn an akobo niwu nī, kūr ibed unu kī par pī kwōwu, nī ngō na un ibino camō onyo madhō; onyo pī komwu, nī ngō na un ibino ruko. Kwōwu pīrē ba tēk lōō cem, ēka kom pīrē ba tēk lōō bōng? 26 Nēn unu wīny na ngwēcō kī malō; gīn ba cwōō kodhi, ba kaō gīnī kac, ba cōkō gīnī cem ī dērō, ēntō Apapwu na tye ī polo pīdhōgī. Un pīrwu ba tēk lōōgī? 27 Nga kī ī kinwu pī bedo kī par na twērō mēdō caa acēl ī kom kwō mērē? 28 “Pīngō ibedo unu kī par na pol pī bōng? Nēn unu kite n'athure mē thim dōngō gīnī kōdē. Gīn ba tio tic mōrō onyo wīō wicu. 29 Ēntō akobo niwu nī kadī bed Colomon onwongo orukere kī dheo mērē kībēc, ēn ba orukere na bēr na cal kī mōrō acēl ī kin-gī. 30 Ka Obanga ruko lum mē thim, na bedo pī nīnō na tin kēkēn ēka diki ebolo ōkō ī mac, ēn ba bino rukowu na lōō, un jō na yeewu nōnōk? 31 Dong kūr ibed unu kī par mē kobo nī, 'Ngō na wan ebino camō?' onyo 'Ngō na wan ebino madhō?' onyo 'Ngō na wan ebino ruko?' 32 Pīēn jami nonu kībēc, jō na ba ngeo gīnī Obanga ēnē yēnyōgī, ēntō Apapwu na tye ī polo ngeo gin na kībēc na mītērē bothwu. 33 Ēntō cak unu kono mē rangō ker mērē ēka kite atīr mērē, cē ēn bino miōwu jami kībēc na un imītō. 34 Pī manōn, kūr ibed unu kī par na pol pī diki, pīēn diki bino bedo kī par mērē. Ninō acēlacēl tye kī can mērē.

7 “Kūr īngōl kōp ī kom jō nōkēnē, cē in thon ba ebino ngōlō kōp ī komi. 2 Pīēn kite na in īngōlō kī kōp ī kom jō nōkēnē, ēnē in thon ebino ngōlō kī kōp ī komi, ēka gin na un ipimo kōdē, ēnē thon ebino pimo niwu kōdē. 3 “Pīngō īnēnō cūng kal kī ī wangi omeru ēka ba īnēnō dul yath na tye ī wangi? 4 In itwērō kobo n'omeru nīngō nī, 'Wēk akwany cūng kal ōkō kī ī wangi,' nakun nwongo caa kībēc dul yath ut ī wangi? 5 In atwodo, cak kono kwanyō dul yath na tye

ĩ wangi ökö, éka dong ĩnèn piny na bër më kwanyö cüng kal na tye ĩ wang omeru. 6 "Kür ĩmĩ gwongi jami n'ēmĩö both Obanga, kür iyuu jamini na bécö na wel mërë tæk both pün. Ka iyuo, gĩn bino nyönyönö ökö kĩ tyèn-gĩ, cë lökërë gĩnĩ më lwëny ĩ komi. 7 "Peny cë ebino mĩöni; rang cë ibino nwongo; dwöng cë ebino yabö nini dholokek. 8 Piën ngat acélacél na penyo ebino mĩö; ngat na rangö bino nwongo; éka ngat na dwöngö ebino yabö ninë dholokek. 9 "Nga kĩ ĩ kinwu, ka athĩn mërë openyo ogati, ěn mĩö kidi? 10 Onyo ka openyo rëc, ěn mĩö thwol? 11 Ka un, dong, na kitewu reco, ingeo unu më mĩö ěthĩnöwu mĩc na bécö, cë dong apapwu na tye ĩ polo bino mĩö mĩc na bécö na röm kwene both jö na penyo ěn! 12 Gin na kibëc na in ĩtĩmö, tĩm both jö nökënë kite na in ĩmĩtö nĩ ětĩm ködë bothi, piën man ěnë tyèn köp më cĩk kibëc éka pwony k'edwarpĩny. 13 "Döny kĩ ĩ dhö wangkac na dĩng. Piën dhö wangkac më kapĩny lac éka yoo më cidhö yo ĩë lübö yot, éka jö na pol wok kĩ ĩë. 14 ěntö dhö wangkac më kwö na bedo naka dĩng éka yoo më cidhö yo ĩë lübö tæk, jö na nönök ěnë wok kĩ ĩë. 15 "Gwökërë unu k'edwarpĩny na twot. Gin bino bothwu n'orukere gĩnĩ calö rom kĩ yökö ěntö kĩ ĩgĩ nwongo ger gĩnĩ kamë orudi. 16 Un ibino ngeogĩ kĩ nyig-gĩ. Jĩ römö püdö nyig ölöc kĩ kom öküdhö, onyo nyig ölam kĩ kom öcöcök? 17 Kömanön thon yath na bër nyakö nyige na bër, ěntö yath na rac nyakö nyige na rac. 18 Yath na bër ba römö nyakö nyige na rac, éka yath na rac ba römö nyakö nyige na bër. 19 Koth yath kibëc na ba nyakö nyige na bër ebino tongo ökö piny éka ebolo ĩ mac. 20 Manön ěnë kite na un ibino ngeogĩ ködë kĩ nyig-gĩ. 21 "Pathĩ ngat acélacél na cwoda nĩ, 'Rwoth, Rwoth,' ěnë bino dönyö ĩ ker më polo, ěntö ngat na tĩmö gin n'Apapna na tye ĩ polo mĩtö. 22 ĩ ninö nön, jö na pol bino kobo nĩna nĩ, 'Rwoth, Rwoth, wan yam ětĩtö köp kĩ nyingi, éka kĩ nyingi wan ěryëmö cene éka etio tango na pol.' 23 Cë an abino kobo nĩgĩ nĩ, 'Anaka yam ba angeowu. Cĩdh unu ökö kĩ botha, un ětĩm tĩm na reco!' 24 "Pĩ manön ngat acélacél na winyo köpna éka ketho ĩ tic bino bedo calö dhanö na ryëk n'ögërö ödë ĩ kom lëla. 25 Ka köth ocwe, kilëlä ömöl, éka yamö okudho obuko öt kĩ tæk, ěntö ba opodho piën nwongo ěgërö ĩ kom lëla. 26 ěntö ngat na winyo köpna nĩ cë ba ketho ĩ tic cal k'amingo n'ögërö ödë ĩ kom kwo. 27 Ka köth ocwe, kilëlä ömöl, éka yamö okudho obuko öt kĩ tæk, cë öt bino rëdhërë na rac." 28 ĩ karë na Yecu dong otyeko twakö köp nonu kibëc, lwak ouro pwony mërë rwök, 29 piën ěn opwonyo calö ngat na ut kĩ twër, pathĩ calö epwonyegĩ më cĩk.

8 ĩ karë na Yecu oidho yo piny kĩ ĩ wi kidi, lwak na pol ölübö köre. 2 ěcwö mörö na tye kĩ two dhöbü obino bothe éka orumo cöngë piny ĩ nyime nakun kobo nĩ, "Rwoth, ka in ĩmĩtö, ĩrömö mĩöna dökö na leng." 3 Yecu öryëö cingë cë ogudo ěn nakun kobo nĩ, "An amĩtö, komi dong obed na leng!" Cë cücũth two dhöbü öcang ökö kĩ ĩ kome. 4 Cë Yecu okobo ninë nĩ, "Kür ikob both ngat mörö. ěntö cidhĩ inyuthiri both alamdhök éka ĩmĩ tyër na Muca yam öcökö, më bedo na calö caden bothgĩ." 5 ĩ karë na Yecu ödönyö ĩ Kaperanau, adit wi acikari më Roma mörö obino cë öbakö dhögë bothe nĩ, 6 "Rwoth, aticna obuto piny ĩ öt, two akwea ömakö éka ödiö ěn rwök." 7 Yecu okobo ninë nĩ, "An abino cidhö éka acangö ěn." 8 Adit wi acikari ögamö nĩ, "Rwoth, an ba apora nĩ in ĩdöny ĩ öda. ěntö kob köp acél kékën cë aticna bino cang. 9 Piën an kikoma thon abedo dhanö n'ëlöö alöa, éka atye k'acikari na an alöögĩ. An akobo both ngat acél nĩ, 'Cidhĩ,' cë cidhö; éka both ngat acél nĩ, 'Bin,' cë bino. Ka an akobo both aticna nĩ, 'Tii ticni,' cë tĩmö. 10 ĩ karë na Yecu owinyo köp nĩ, ěn obedo kĩ ur rwök nakun kobo both jö na tye ka lübö köre nĩ, "An akobo niwu köp adyer, an bara anwongo dhanö mörö ĩ lobo Icarael na tye kĩ yee na tæk calö man. 11 An akobo niwu nĩ jö na pol bino bino gĩnĩ kĩ kukidë éka kuthö, cë bino bedo gĩnĩ piny kanya acél k'Abraam, Icaica, éka Jakob më camö karama ĩ ker më polo. 12 ěntö jö n'onwongo myero obed gĩnĩ ĩ ker më polo ebino bologĩ yökö ĩ cöl piny, kunön bino bedo ĩë koko éka kaö lak." 13 Cë Yecu okobo both adit wi acikari nĩ, "Cidhĩ! Ebino tĩmö kite na in iyee ködë." Atic mërë öcakö cang ökö ĩ caa nön kikokome. 14 ĩ karë na Yecu ödönyö ĩ öt ka Petero, ěn önenö marö ka Petero obuto piny na two lyetho ömakö. 15 ěn ömakö cingë éka two lyetho öya ökö kĩ ĩ kome, cë marö ka Petero öya malö éka öcakö yübö cem ninë. 16 ĩ kothieno më ninö nön, jö na pol n'onwongo tye gĩnĩ kĩ tipo na reco ĩ komgĩ ekelo both Yecu, cë ěn öryëmö tipo na reco ökö kĩ köp na ěn ötwakö éka etwoe kibëc öcang. 17 Man ötĩmërë ök köp na yam adwarpĩny Icaya ötwakö ocobere kakarë nĩ: "ěn ökwanyö görüwa éka öyëö twowa." 18 ĩ karë na Yecu önenö lwak na pol n'ögürö ěn dyere, ěn ömĩö twërö më cidhö yo löka nam tung ca. 19 Cë apwony cĩk obino bothe éka okobo nĩ, "Apwony, an abino lübö kori kanya kibëc na in ibino cidhö ĩë." 20 Yecu ögamö nĩ, "Kwee tye kĩ öd rwo gĩnĩ éka winy na ngwëcö kĩ malö tye kĩ udi, ěntö Wod ka Dhanö ope kĩ kany mörö na ěn pyelo wie ĩë." 21 Alübökörë nökënë döki okobo ninë nĩ, "Rwoth, wëk an kono acĩdh aik apapna." 22 ěntö Yecu okobo ninë nĩ, "Lüb köra, éka wëk jö n'öthöo oik jöögĩ n'öthöö." 23

Cē Yecu ödönyö i yeya ēka ēlūbkörē öcīdhö ködē. 24 Cūcūth yamō na ger öcakō kudho i nam, ēka pii na tingere malō onwongo dong cwök miō yeya mē lūny ökö i nam. Ēntō Yecu onwongo öninō ökö. 25 Ēlūbkörē öcīdhö ēka ocoo gini ēn nakun kobo gini nī, “Rwoth, larwa! Wan ēcwök thōō!” 26 Ēn ögamō nī, “Un jō na yeewu nōnōk, pingō ilwor unu?” Cē ēn öya malō ocoo yamō ēka pii na tingere malō, cē piny okwe moth. 27 Ēlūbkörē ouro gini nakun kobo gini nī, “Koth ēcwō mēnē ene? Naka thon yamō ēka pii na tingere malō winyo ēn!” 28 Ī karē na Yecu othuno i lōka ca i lobo ka jō Gadara, cwō ariō na tye kī cene n’öya gini kī i bur lyene oromo ködē. Gīn onwongo ger rwök na ngat mörō ope na rōmō wok i yoo nōn. 29 Gīn öcakō redo nī, “Wod k’Obanga, ngō na in i’mitō kī bothwa? In ibino mē pwodowa na karē bara örömō?” 30 Onwongo öthīpan pūn na pol tye ka cem na bobor ködgī. 31 Cene ökwāō Yecu nī, “Ka in i’ryēmōwa ökö, ryēmwa i kom öthīpan pūn.” 32 Ēn okobo nīgī nī, “Cīdh unu!” Cē gīn odonyo yökō kī i kom cwō nōn ēka ödönyö gini i kom pūn, öthīpan pūn kibēc öngwēcō kī i nget kidi yo i nam ēka öthōō gini ökö i pii. 33 Ēkwath n’onwongo kwāō pūn öngwēcō gini ökö i taun ēka okobo gini gīn n’ötīmērē kibēc ēka gīn n’ötīmērē i kom cwō na cene ömakōgī. 34 Cē jō na tye i taun kibēc öcīdhö gini yökō mē romo kī Yecu. Ī karē na gīn öñēnō ēn, gīn odweko gini Yecu mē yaa ökö kī i loboģī.

9 Yecu ödönyö i yeya ēka öngölō nam yo lōka tung ca, cē obino i taun mē thurgi. 2 Jō mökö okelo bothe dhanō na kome okwe n’obuto i ökēka. Ī caa na Yecu öñēnō yeegi, ēn okobo both dhanō na kome okwe nī, “Dīi cwinyi, woda; balni gini ētīmō kīca ökö.” 3 Ēntō epwony cik mökö okobo i kin-gī kēn-gī nī, “Dhanō ni tye ka yanyō Obanga!” 4 Ī karē na Yecu ongeō thamagi, cē openyogi nī, “Pingō ibedo unu kī thama na rac i cwinywu? 5 Mēnē na yot: mē kobo nī, ‘Balni gini dong ētīmō kīca ökö,’ onyo mē kobo nī, ‘Yaa malō icak woth?’ 6 Ēntō an abino miōwu ingeo nī Wod ka Dhanō tye kī twēr i wi lobo mē tīmō kīca i kom bal gini.” Cē ēn okobo both dhanō na kome okwe nī, “Ya malō, kwany ökēkani ēka icīdh yo pacō.” 7 Cē dhanō na kome okwe öya malō ēka öcīdhö yo pacō. 8 Ī karē na lwak öñēnō ngō n’ötīmērē, lworo ömakōgī rwök; ēka öpakō gini Obanga, n’ömiō koth twērō nōn both jīi. 9 Ī karē na Yecu öya ökö kī kunōn, ēn öñēnō ēcwō mörō n’obedo acōk ocoro na nyingē Matayo obedo kanya onwongo ēcōkō ocoro iē. Yecu okobo ninē nī, “Lüb kōra,” cē Matayo öya malō ēka ölübö körē. 10 Na Yecu ēka ēlūbkörē tye gini ka cem

i öt ka Matayo, ēcōk ocoro na pol ēka ēbal obino cē ocemo gini ködē. 11 Ī karē n’Eparicayo öñēnō gin na tye ka tīmērē, gīn openyo ēlūbkörē nī, “Pingō apwonywu cemo kanya acēl k’ēcōk ocoro ēka ēbal?” 12 Ī karē na Yecu owinyo köp ni, ēn okobo nī, “Pathī jō na komgī yot ēnē mītō daktar, ēntō jō na two. 13 Ēntō cīdh ipwonyere unu i tyēn köp ni: ‘An amītō kīca, pathī gin mē aryēda.’ Piēn an ba abino mē cwodo jō na kitegī atīr, ēntō ēbal.” 14 Ī ninō mörō acēl ēlūbkör Jon obino both Yecu ēka openyo gini ēn nī, “Pingō wan ēka Eparicayo erio kec, ēntō ēlūbkori ba rio gini kec?” 15 Yecu ögamō nī, “Wele k’anyom twērō kumo ningō ka anyom tye ködgī? Ba twērē! Karē tye ka bino n’ebino kwanyō anyom ökö kī bothgī; cē gīn dong bino rio kec. 16 “Ngat mörō ope na dapō böngū na nyen i kom böngū n’otii, piēn böngū n’ēdapō bino tēlō böngū nōkēnē ca ēka yēc ökö na rac. 17 Dhanō mörō ope na pikō köngō ölöc na nyen i ocwe na cōn gini. Piēn ka gīn öpikō, ocwe bino mwoc ökö, köngō ölöc thon bino öny ökö cē ocwe bino bal gini ökö. Pe, köngō ölöc na nyen epikō i ocwe na nyen gini, ēka gīn kibēc ba bino bal.” 18 Ī karē na Yecu tye ka kobo köp ni, alōc mörō obino bothe cē orumo cōngē piny i nyime ēka okobo ninē nī, “Nyara pod öthōō athōa, ēntō bin ēk iketh cingi i kome, cē bino kwō.” 19 Yecu ēka ēlūbkörē öya ēka öcīdhö ködē. 20 Cē dhakō mörō n’onwongo remo obedo ka cwer kī i kome pī mwaka apar wie ariō obino kī kungee cē ogudo lak böngū ka Yecu. 21 Ēn okobo kī i cwinye kēnē nī, “Ka agudo böngū mērē kēkēn, abino cang ökö.” 22 Yecu ölökerē cē öñēnō ēn, ēka okobo ninē nī, “Dīi cwinyi, nyara, yeeni ocangi.” Cē dhakō nōn öcang ökö i caa nōn cūcūth. 23 Ī karē na Yecu ödönyö i dyekal k’alōc cē öñēnō ewer na wero wer mē kumo ēka lwak na wōō gini kī koko, 24 ēn okobo nī, “Döny unu yökō. Anyaka ni ba öthōō ēntō öninō anīna.” Ēntō gīn önyērō gini ēn. 25 Kinge na lwak dong odonyo ökö yökō, ēn öcīdhö i öt kanya epyelo nyakō iē ēka ömakō cing anyaka nōn cē öya malō. 26 Köp mē emuth ni ökēth örömō lobo nōn kibēc. 27 Kinge na Yecu dong öya ökö kī kany nōn, ēthōō wang ariō ölübö gini körē nakun redo gini nī, “Kīca omaki i komwa, Wod ka Daudi!” 28 Ī karē na ēn dong ödönyö i öt, ēthōō wang ariō obino gini bothe ēka Yecu openyogi nī, “Un iyee unu nī an atwērō miōwu inēnō piny?” Gīn ögamō nī, “Eyo, Rwoth.” 29 Cē ēn ogudo wang-gī ēka okobo nī, “Ēk ötīmērē bothwu kite na yeewu tye ködē.” 30 Cē wang-gī öyabērē. Yecu öcikōgī na tēk nī, “Kūr ikob unu köp ni both ngat mörō.” 31 Ēntō gīn öcīdhö ēka örwēō gini köp i kom Yecu örömō lobo nōn kibēc. 32 Na gīn dong tye ka yaa mē cīdhö, jīi okelo dhanō

mörö both Yecu n'onwongo cen ömakö ëka na ba twak. 33 Kinge na dong Yecu öryëmö cen ökö, dhanö nön n'onwongo ba twak öcakö twak. Lwak ouro nakun kobo giní nĩ, "Anaka yam gin mörö n'obedo kóman bara onen i Icarael." 34 Éntö Eparicayo okobo giní nĩ, "Ën ryëmö cene kĩ twër k'adwong më cene." 35 Yecu öcĩdhö orimo kin peci kibëc na papath nakun pwonyo i cinagogagi giní, titö köp më Emuth na Bër më ker k'Obanga ëka cangö koth twoe kibëc na papath. 36 I karë na ën önenö lwak, kica ömakö i komgi rwök, piën onwongo tye giní kĩ par ëka ëwëkögi ata calö rom n'akwathgi ope. 37 Cë okobo both ëlëbkörë nĩ, "Kac dwong ëntö etic tye na nönök. 38 Pĩ manön, peny unu won pwodho ëk oor etic i kac i pwodho mëre."

10 Yecu ocwodo ëlëbkörë apar wie ariö bothe ëka ömiögi twërö më ryëmö tipo na reco ëka më cangö twoe na papath kibëc. 2 Man ënë nyíng ëkwëna apar wie ariö: më acël, Cimon (n'ecwodo nĩ Petero) ëka ömin mëre Anderiya; Yakobo wod ka Jebedayo, ëka ömin mëre Jon; 3 Pilipo ëka Batulumayo; Tomaci ëka Matayo n'obedo acök ocoro; Yakobo wod k'Alipayo, ëka Tadeo; 4 Cimon na mitö löckën ëka Yuda Ikariot, n'oketho örörö i kom Yecu. 5 Yecu ooro ëkwëna apar wie ariö kĩ cĩk ni: "Kür icĩdh unu both Erok onyo idöny unu i taun ka jö Camaria mörö. 6 Éntö cĩdh unu both jö Icarael, na cal giní kĩ rom n'orwenyo. 7 Ka icĩdhö unu, tit unu köp ni: 'Ker më polo dong cwök.' 8 Cang unu etwoe, cer unu jö n'öthöð, löny unu jö na tye kĩ two dhöbü, ëka i'ryëm unu cene. Émiöwu nono, ëka un thon mĩi unu nono. 9 Kür iwoth unu kĩ gol onyo ryal onyo mola mörö i jëbawu; 10 kür iwoth unu k'ocwe i wothwu, onyo böngü më alöka, onyo wör, onyo lüth më woth; piën atic myero ëmii cem mëre. 11 "Taun onyo pacö mörö këkën na un ibino dönyö ië, rang unu dhanö na kite mëre bër ëka ibed unu i öde naka ka ibino unu yaa. 12 Ka idönyö unu i öt, moth unu jö më öt nön kĩ moth më kuc. 13 Ka jö më öt nön öjölöwu, wëk unu kucwu odong ië; ëntö ka ba öjölöwu giní, cë imii kucwu odwog bothwu. 14 Ka ngat mörö ba bino jölöwu onyo winyo köpwu, täng unu apua më tyënwu ka iya unu kĩ i öt nön onyo taun nön. 15 An akobo niwu köp adyer, i ninö më ngölö-köp, Obanga bino timö kica na thwönë rwök both jö më Codom ëka Gomora na löö jö më taun nön. 16 An aorowu kamë rom i kin orudi. Pĩ manön bed unu na ryëk calö thwol ëka na mwol calö amam. 17 "Éntö gwökëre unu ködgi; piën gin bino miöwu i cing ëlök ëka ebino pwodowu kĩ del i cinagogagi giní. 18 Ebino terowu

i nyim ëlök ëka i nyim rwodhi pira na calö ecaden bothgi ëka both Erok. 19 Éntö ka gin ömaköwu, kür ibed unu kĩ par i kom ngö na un ibino kobo onyo kite na un ibino kobo ködë. I caa nön ebino miöwu ngö na myero ikob unu, 20 piën pathi un ënë ibino twak, ëntö Tipo k'Apapwu ënë bino twak kĩ bothwu. 21 "Omego bino miö ömin mëre më aneka, ëka apap bino miö athin mëre më aneka; ëthinö bino jem i kom enyodogi ëka bino giní miö enekogi. 22 Jö kibëc bino dagöwu pira, ëntö ngat na bino cung na tæk naka i ajiki bino larë. 23 Ka eyelowu kĩ i kabedo mörö acël, lüü unu i kabedo nököne. An akobo niwu köp adyer, ba ibino unu tyeko woth i peci më Icarael kibëc na bara Wod ka Dhanö obino. 24 "Athin kwan ba dit löö apwony mëre, onyo atic ba dit löö adwong mëre. 25 Pore both athin kwan më bedo calö apwony mëre, ëka atic më bedo calö adwong mëre. Ka adit na löö öt ecwodo nĩ Belijebul, ebino cwodo jö më öde kĩ nyíng na rac röm kwene! 26 "Kür ibed unu kĩ lworo pĩrgi. Gin mörö ope n'eumo na ba ebino yabö, onyo gin mörö ope n'opono na ba bino ngere. 27 Köp na an akobo niwu i cöl piny, twak unu ökö na piny lër; ëka köp n'ëmwöngö amwöngö i ithwu, red unu ködë i wi bie. 28 Kür ilwor unu jö na neko kom ëntö ba neko tipo. Éntö lwor unu Obanga na twërö neko tipo ëka kom kanya acël i mac kapiny. (Geenna g1067) 29 Winy na thithinö ariö ba ecadhögi pĩ ciling na nyíng? Éntö mörö ope na twërö podho piny n'Apapwu ba ngeo. 30 Naka thon yer wiwu kibëc ëkwanö ökö. 31 Dong kür ibed unu kĩ lworo; pĩrwu tæk löö winy na pol ca ökö. 32 "Ngat mörö na bino tuo nyínga i nyim jii, an thon abino tuo nyíngë i nyim Apapna na tye i polo. 33 Éntö ngat na bino kwëröna i nyim jii, an thon abino kwërö ën ökö i nyim Apapna na tye i polo. 34 "Kür itham unu nĩ an abino më kelo kuc i lobo. An ba abino më kelo kuc, ëntö pala abadë. 35 An abino më kelo apokapoka i kin "wod ëka apap mëre, nyakö ëka aya mëre, cii wod ëka adha mëre. 36 Langö ka dhanö bino bedo dhanö më öde kikokome." 37 "Ngat mörö na marö apap mëre onyo aya mëre na löa ökö ba opore më bedo mëga; ngat mörö na marö wode onyo nyarë na löa ökö ba opore më bedo mëga; 38 ëka ngat mörö na ba tingo yath ariá mëre cë lübö kĩ köra ba opore më bedo mëga. 39 Ngat mörö na mitö gwökö kwö mëre bino rwenyo ökö, ëka ngat na rwenyo kwö mëre pira bino larö kwö mëre. 40 "Ngat na bino jölöwu, nwongo öjöla, ëka ngat n'öjöla nwongo öjölo ngat n'oora. 41 Ngat mörö na bino jölö adwarpiny piën ën obedo adwarpiny bino nwongo cül n'ëcülö k'adwarpiny, ëka ngat mörö na bino jölö dhanö na kite atir piën ën obedo dhanö na kite atir

bino nwongo cül n'écülö k' dhanö na kite atir. 42 Ëka ka ngat mörö ömïö pii na ngic më amodha both ngat mörö acël k' i kin jö na thinö ni piën ën obedo alübköra, an akobo niwu köp adyer, ën bino nwongo cül mërë."

11 I karë na Yecu otyeko cïkë ëlëbkörë apar wie arïö, ën öya k' kunön më pwony ëka më titö köp i peci më Galilaya. 2 I karë na Jon owinyo k' i buc ngö na Meciya onwongo tye ka timö, ën ooro ëlëbkörë 3 më penyo ën ni, "In ënë ngat n'onwongo myero obin, onyo wan myero ëkür ngat nökënë?" 4 Cë Yecu ögamö nig' ni, "Dök unu cen icidh ikob unu both Jon gin na un iwinyo ëka gin na un inënö: 5 Ëthöö wang wang-gi öyabërë, engwalo owotho, jö n'onwongo tye k' two dhöbü ëlönöyögi, ëthöö ith owinyo piñy, jö n'öthöö ecerog' ökö, ëka köp më Emuth na Bër ëtitö both ëcan. 6 Tye k' gum dhanö na ba lökërë ökö k' kom yee mërë pira." 7 I karë n'ëlëbkör Jon tye ka donyo gin' yökö, Yecu öcakö twak k' lwak köp i kom Jon ni: "Ngö na un icidh më nënö k' i thim? Icidh unu më nënö agada na yamö yengo? 8 Cë ka pe, ngö na un icidh më nënö? Un icidh më nënö dhanö n'oruko böng na bëcö? Pe, jö na ruko böng na bëcö bedo gin' i peci ka rwodhi. 9 Cë ngö na un icidh më nënö? Adwarpiny? Eyo, an akobo bothwu ni un inënö ngat na löö adwarpiny ökö. 10 Man ënë ngat n'ëcö köp i kome: "An abino oro aorna i nyimi, na ënë bino yübö yoo nini." 11 An akobo niwu köp adyer: Dhanö mörö ope k' kin jö na mon önywölögi na pirë tük na löö Jon Abatica, ëntö ngat na tid' rwök i ker më polo ënë dit löö ën. 12 Cakërë i karë ka Jon Abatica më thuno ködë naka tin ker më polo ölimö can rwök, ëka jö na ger tëmö gin' më maö k' tük. 13 Piën edwarpiny kibëc ëka Cik ka Muca odwaro gin' naka othuno ködë i karë ka Jon; 14 ëka ka imitö unu yeo köpgi, Jon ënë Eliya n'onwongo myero obin. 15 Ngat na ithe tye, myero ën owiny. 16 "An abino poro rok më karë ni k' ngö? Cal k'ëthinö na bedo i kabedo më cuk gin' ëka cwodo ewodhg'i: 17 "Wan ëküdhö pelu pirwu, ëka un ba imyël; wan ewero wer lyël, ëntö un ba ikumo." 18 Piën Jon obino na ba cemo onyo madhö gin mörö, ëka gin kobo ni, 'Ën tye k' cen.' 19 Wod ka Dhanö obino na cemo ëka medho, ëka gin kobo ni, 'Ën obedo ngat n'owor ëka amërö, obedo okone k'ëcök ocoro ëka ëbal.' Ëntö ryëkö ënë moko tic mërë na ën tio." 20 Cë kinge Yecu öcakö twak k'akëmö k' jö më peci nön kanya ën onwongo obedo ka tio tango mërë ië, piën jö na tye ië ökwërö gin' ngut ökö. 21 "Ibino nënö can in, Korajin! Ibino nënö can in, Bethsaida! Ka tango

n'onwongo ëtimögi bothwu onwongo ëtimö i Turo ëka Cidon, kono onwongo ongut gin' cön, nakun ruko gin' böngü cöla ëka juko gin' wig' k' buru. 22 Ëntö an akobo niwu ni Obanga bino timö kica na thwönë rwök i ninö më ngölö-köp both jö më Turo ëka Cidon na lööwu. 23 Ëka in, Kaperanaum, ebino tingoni yo malö i polo? Pathi kömanön, ebino dwököni piñy i kabedo ka jö n'öthöö. Ka onwongo tango n'onwongo etio bothi onwongo etio i Codom, onwongo twërö bedo naka i karë ni. (Hadës g86) 24 Ëntö an akobo niwu ni Obanga bino timö kica na thwönë rwök i ninö më ngölö-köp both jö më Codom na lööwu." 25 I karë nön Yecu okobo ni, "An apaki Apap, Rwoth më polo ëka lobo, piën ikanö jami ni ökö k' both jö na ryëk ëka k' both jö na ngeo piñy, ëka inyutho both ëthinö na pod thinö. 26 Eyo, Apap, man ënë kite n'onwongo in imitö ni ötimërë ködë na yomo cwinyi." 27 "Apapna otyeko miö jami kibëc ökö botha. Ngat mörö ope na ngeo Wod kono Apap këkën, ëka ngat mörö ope na ngeo Apap kono Wod këkën ëka both jö na Wod öyërö më nyutho ën." 28 Cë Yecu okobo ni, "Bin unu botha, jö kibëc n'odhero ëka k' jö na yec önuögi, cë an abino miöwu yweo. 29 Ting unu ayokothna ëka inwong unu pwony k' botha, piën an awör ëka amwol i cwinya, ëka ibino unu nwongo yweo pi tipowu. 30 Piën ayokothna yëö yot, ëka yëcna ba pëk."

12 I karë nön Yecu owok i pwothi n'epuro bël ië k'ëlëbkörë i ceng Cabit k'Eyuda. Këc onwongo oneko ëlëbkörë, cë gin öcakö rïdhö with bël ëka omwodo gin'. 2 Ëntö i karë n'Eparicayo önenö, cë okobo gin' both Yecu ni, "Nën, ëlëbkori tye gin' ka timö gin na cik ökwërö ni kür ëtim i ceng Cabit k'Eyuda." 3 Yecu okobo bothgi ni, "Un ba ikwanö gin na Daudi ötimö i karë na kec oneko ën kanya acël k'ewodhe? 4 Ën ödönyö i öt k'Obanga, cë Daudi ëka ewodhe öcamö ogati n'eketho i nyim Obanga—n'onwongo cik ökwërö ni gin kür öcam, ëntö pi ëlamdhök këkën. 5 Onyo un ba ikwanö k' i cik ni ëlamdhök na tye i öt k'Obanga twërö gin' tic i ceng Cabit k'Eyuda ëka nwongo ba öbalö gin? 6 An akobo niwu ni tye gin mörö kany na tin na löö öt k'Obanga. 7 Ka cë onwongo ingeo unu tyën köp ni, 'An amitö kica, pathi lee më atyëra,' onwongo myero kür dök ingöl unu köp i wi jö n'ope k' bal. 8 Piën Wod ka Dhanö ënë obedo Rwoth më Cabit." 9 Cë Yecu öya ökö k' kunön ëka öcidh ödönyö i cinagagagi, 10 kanya onwongo ëcwö mörö na cingë ötal tye ië. Eparicayo onwongo tye ka rangö gin' kite mörö më dotho Yecu, cë openyo gin' ën ni, "Cik yeo ni ëcang dhanö i ceng Cabit?" 11 Yecu okobo bothgi ni, "Ka

ngat mörö ki kinwu tye ki römö acél cê opodho i bur i ceng Cabit, in ba imakö éka iywaö yökö? 12 Dhanö pîrê têk rwök löö römö ökö! Pî manön cik yeo ni êtim gin na bër i ceng Cabit.” 13 Cê ên okobo both êcwö nön ni, “Ryê badi.” Cê êcwö nön ôryêö badê, éka badê ôcang ökö na bër ödökö calö nökenê ca. 14 Êntö Eparicayo odonyo yökö cê öyübö ginî köp kite na myero enek ginî ki Yecu. 15 I karê na Yecu ongeoyüb mē nekonê, öya ökö ki kunön. Lwak na pol ölübö ginî ên, cê Yecu ôcangö jö kibêc n'onwongo two. 16 Ên öcikögi ni kûr okob ginî both jö nökenê köp i kome. 17 Man ôtimêrê êk köp n'onwongo adwarpiny lcaya ötwakö pîrê ocobere: 18 “Man ênê aticna na an ayêrö, ngat na an amarö, na cwinya yom i kome. An abino ketho Tipona i kome, éka ên bino kobo ngölö-köp atir both erok. 19 Ên ba bino dhaa onyo ba bino redo rwök, ngat mörö ope na bino winyo dwönê i yodhi. 20 Ên ba bino türö agada n'ogom, éka ba bino neko wicu tara na tye ka dung, naka ka ên okelo ngölö-köp atir i löc. 21 Lobo kibêc bino bedo ki gen pî nyingê.” 22 Cê ekelo both Yecu êcwö mörö na cen tye i kome n'onwongo wangê öthöö éka ba twak. Yecu ôcangö êcwö nön êk ötwaki éka önên piny. 23 Jö kibêc obedo ginî ki ur rwök i kom gin na Yecu ôtimö éka okobo ginî ni, “Man twêrö bedo Wod ka Daudi?” 24 Êntö i karê n'Eparicayo owinyo ginî köp ni, okobo ginî ni, “Dhanö ni ryêmö cen ki twêrö ka Belijebul, na ênê obedo adit ka cene.” 25 Yecu ongeonö n'onwongo gin tye ka thamö, cê okobo bothgi ni, “Ker kibêc ka opokere iê arîö bino bal ökö, éka taun onyo öt ka opokere iê arîö ba twêrö cung. 26 Ka Catan ryêmö Catan, nwongo ên opokere i dul arîö i kome kênê. Cê dong ker mêrê twêrö cung ningö? 27 Ka an aryêmö cen ki twêrö ka Belijebul, jöwu dong ryêmö ginî cen ki twêrö ka nga? Pî manön, gin ênê dong bino bedo ginî êngöl köpwu. 28 Êntö ka an aryêmö cen ki twêrö ka Tipo k'Obanga, cê ker k'Obanga obino dong ökö bothwu. 29 “Dhanö mörö ope na twêrö dönyö i öt ka ngat na tēk mē yakö jami mēre, thwara ka ên öcakö tweno dhanö na tēk ni ökö éka dong cakö yakö jami ki i ödê. 30 “Ngat n'ope kukura nwongo ên ba mîta, éka ngat mörö na ba kõnya mē cökö kanya acél kôda kēthö akētha. 31 Pî manön akobo niwu, bal kibêc éka ayeny êtwêrö timö kica iê, êntö bal mē yanyö Tipo Naleng ba ebino timö kica iê. 32 Ngat mörö na twakö köp na rac i kom Wod ka Dhanö ebino timö kica nînê, êntö ngat na twakö köp na rac i kom Tipo Naleng ba ebino timö kica nînê, kadî i karê ni onyo i karê na tye ka bino anyim. (aiön g165) 33 “Yath na bër nyakö nyige na bécö, éka yath na rac nyakö nyige na reco, piên yath engeo ki

nyige. 34 Un êthiño ororo, itwêrö unu twakö köp na bër ningö, nakun un jö na reco? Piên köp na tye i cwinye dhanö ênê dhö dhanö twakö. 35 Dhanö na bër kwanyö gin na bër ki kin jami mēre na bécö na ên ökanö i cwinye, éka dhanö na rac kwanyö gin na rac ki kin jami na reco na ên ökanö i cwinye. 36 An akobo niwu ni köp kibêc mē caröcarö na dhanö twakö na ba gwökêrê ginî iê ebino pido pîrê i nînö mē ngölö-köp. 37 Piên ki köp na in itwakö ênê bino miöni ilöököp, éka ki köp na in itwakö ênê bino miö êngölö köp loi.” 38 Cê jö mökö n'obedo Eparicayo éka epwony cik okobo ginî both Yecu ni, “Apwony, wan êmitö nēnō anyuth mē tango na yaa ki bothi.” 39 Êntö Yecu ôgamö ni, “Rok na reco éka jö na yeegi ope i kom Obanga penyo ginî pi anyuth mē tango! Êntö mörö ope n'ebino miö na path k'anyuth k'adwarpiny Yona. 40 Piên kite na calö Yona onwongo obedo iê rēc na thwönê nînö adek, kiceng éka kiwor, kōmanön Wod ka Dhanö bino bedo nînö adek, kiceng éka kiwor, i ngöm. 41 Jö mē Ninebi bino cung ginî ki rok mē karê ni éka bino ngölö ginî köp i kome; piên ongut ginî i karê mē titö köp na Yona onwongo ôtitö, éka kobedini ngat na dit na löö Yona tye kany. 42 Alöc na dhakö na tye yo kukwap lobo bino cung kanya acél ki rok mē karê ni éka ngölö-köp i kome; piên ên öya ki i ajiki lobo mē winyo ryêkö ka Colomon, éka ngat na dit na löö Colomon tye kany. 43 “Ka tipo na rac öya ökö ki i kom dhanö mörö, ên cidhö rimo kabedo na pii ope iê cê rangö ka yweo éka ba nwongo kabedo mörö. 44 Cê ên kobo ni, ‘An abino dök i öt na an aya ki iê.’ Ka othuon, cê nwongo öt tye nono, êyweö na leng éka êyübö ökö na bër. 45 Cê dong cidhö kelo tipo na reco abirö nökenê ginî na löö ên ökö, cê dönyö ginî iê éka bedo kany nön. Kinge dhanö nön bino bedo na rac na löö kite n'onwongo obedo ködê cön. Manön kite na bino bedo ködê i kom rok na rac mē karê ni.” 46 I karê na Yecu onwongo pod tye ka twak ki lwak, aya mēre éka utmego mēre onwongo ocung ginî yökö nakun mîtö ginî twak ködê. 47 Cê dhanö mörö okobo both Yecu ni, “Ayani éka utmegoni ocung ginî yökö mîtö twak kodi.” 48 Yecu ôgamö ni, “Ayana ênê nga éka utmegona ênê ngagi?” 49 Cê Yecu öcimö êlúbkörê, cê okobo ni, “Man ênê ayana éka utmegona. 50 Piên dhanö na tio gin n'Apapna na tye i polo mîtö, manön ênê ömëra, amëra, éka ayana.”

13 i nînö acél nön Yecu öya ökö ki i öt, cê öcidhö obedo i dhö nam. 2 Lwak na pol rwök öcökêrê ginî bothe, ömiö ên ödönyö i yeya cê obedo iê, nakun jö kibêc ocung ginî i dhö nam. 3 Cê okobo bothgi köp na pol i carolok, nakun kobo ni: “Apur öcidhö mē

cwōnō kodhi. 4 Ī karē na ěn tye ka cwōc, kodhi mōkō
 ōkīr ĩ nget yoo, ěka wīnyo obino cē ōcamō gīnī ōkō. 5
 Kodhi nōkēnē ōkīr kanya obedo kitekite, na ngōm
 nōnōk iē. Kodhi ni otuu piōpiō piēn ngōm onwongo
 rēp. 6 Ēntō ĩ karē na ceng ōryēny ōwangōgī rwōk,
 oner gīnī ōkō piēn oriigī ba ōdōnyō na thuth. 7 Kodhi
 nōkēnē ōkīr ĩ kin okudhi, cē okudhi ōdōngō ěka ōdiōgī
 ōkō. 8 Kodhi nōkēnē ōkīr ĩ kom ngōm na bēr, cē
 ōnyakō nyig-gī, mōkō mia acēl, nōkēnē pyer abicēl,
 ěka mōkō pyer adek na kadhō man onwongo ěcwō.
 9 Ngat na tye kī ith mē wīnyo myero owiny.” 10 Cē
 ělūbkōr Yecu obino bothe ěka openyo gīnī nī, “Pingō
 in ĩtwak kī carolok both jī?” 11 Yecu ōgamō nī, “Ngec
 mē mūng mē ker mē polo ěmiō ōkō bothwu, ěntō ba
 ěmiō bothgī. 12 Piēn ngat na tye kī gin mōrō, ebino
 mēdō bothe, ěka bino bedo kōdē na būp. Ngat n’ope
 kī gin mōrō, naka gin na ěn tye kōdē ebino kwanyō
 ōkō kī bothe. 13 Man ěnē ngō n’ōmīō an atwak kī
 carolok both jī: “Kadī bed nēnō gīnī pīny, ba neno
 gīnī; kadī bed wīnyo gīnī, ba wīnyo onyo nīang gīnī.
 14 Kōp k’Obanga na yam adwarpīny lcaya odwaro
 ocobere kakarē ĩ komgī nī: “Un ibino wīnyo, ěntō ba
 ibino nīang iē; un ibino nēnō, ěntō ba ibino unu nīang
 iē. 15 Piēn jō nī cwinygī dong ōdōkō na nwang; ithgī
 ba wīnyo kōp, ěka oumo wang-gī ōkō. Cē wang-gī
 ba twērō nēnō pīny, ěka ithgī ba twērō wīnyo kōp,
 cwinygī ba twērō nīang, ěka ba twērō gīnī lōkērē
 botha, ěk an acang-gī.’ 16 Ēntō wangwu tye kī gum,
 piēn nēnō gīnī pīny, ěka ithwu piēn wīnyo gīnī kōp. 17
 An akobo nīwu kōp adyer nī edwarpīny na pol ěka kī
 jō na kitegī atīr ōparō gīnī mē nēnō ngō na un itye ka
 nēnō, ěntō ba ōnēnō gīnī, ěka mē wīnyo ngō na un
 itye ka wīnyo ěntō ba owīnyo gīnī. 18 “Wīnyo unu dong
 ngō na carolok ĩ kom acwō kodhi gōnyō: 19 Ka dhanō
 mōrō owīnyo kōp mē ker k’Obanga cē ba ōnīang iē,
 ngat na rac na nyingē Catan bino ěka kwanyō kodhi
 n’onwongo ěcwō ĩ cwinye ōkō. Man ěnē kodhi n’ōkīr ĩ
 yoo. 20 Kodhi n’ōkīr kanya obedo kitekite, cung pī
 jō na gamō kōp k’Obanga piōpiō kī yom cwiny ka
 gīn owīnyo. 21 Ēntō kite n’ope k’orii, bedo pī karē
 mōrō na nōnōk. Ka can onyo ayela mōrō obino pī
 kōp k’Obanga, ěn podho ōkō piōpiō. 22 Kodhi n’ōkīr ĩ
 kin okudhi, cung pī jō na wīnyo kōp, ěntō parō kōp
 mē kwō mē lobo nī ěka miti mē lōnyō diō kōp ōkō, cē
 mīō ba nyak gīnī. (aiōn g165) 23 Ēntō kodhi n’ěcwō ōkīr
 ĩ ngōm na bēr, cung pī jō na wīnyo kōp ěka nīang
 gīnī iē. Gīn nyakō nyig-gī, nōkēnē mia acēl, nōkēnē
 pyer abicēl, ěka nōkēnē pyer adek.” 24 Yecu dōkī
 okobo bothgī carolok nōkēnē nī: “Ker mē polo cal kī
 dhanō mōrō n’ōcwō kodhi na bēcō ĩ pwodho mērē. 25
 Ēntō ĩ karē na jō kibēc ōnīnō gīnī ōkō, langō mērē

obino cē ōcwō nyig dōō ĩ kin kal, ěka ōcīdhō ōkō.
 26 Ī karē na kal n’ēpidhō otuu ōdōngō, kal ōngōk,
 cē dōō thon ōcakō nen. 27 “Ētic ka won pwodho
 ōcīdhō gīnī bothe cē openyo gīnī ěn nī, ‘Adwong, in
 onwongo ba ĩcwō kodhi na bēcō ĩ pwodhoni? Kara
 dōō dōkī ōya kī kwene?’ 28 “Won pwodho ōgamō nī,
 ‘Langō ěnē ōtīmō kōmanōn.’ ‘Cē etic openyo ěn nī,
 ‘In ĩmītō nī wan ěcīdh epudh dōō nōn gīnī ōkō?’ 29
 “Ēntō won pwodho ōgamō nī, ‘Pe, piēn ka itye unu ka
 pudho dōō, un ĩtwērō pudho kal ōkō kanya acēl kī
 dōō. 30 Wēk unu dōō kī kal ōdōng gīnī kanya acēl
 naka ĩ karē mē kac. Ī karē nōn an abino kobo both
 ěkac: Cak unu pudho dōō ōkō ěka itwe unu ĩ dul na
 papath mē awanga; cē ĩcōk unu kal ěka iketh unu ĩ
 dērōna.” 31 Ēn dōkī okobo bothgī carolok nōkēnē:
 “Ker mē polo cal kī nyig kodhi karadali, na dhanō
 otero cē ōpidhō ĩ pwodho mērē. 32 Kodhi karadali
 obedo kodhi na tīdī rwōk kī kin kodhi kibēc, ěntō ka
 ōdōngō dōkō na thwōnē kī kin jami na tye ĩ pwodho
 ěka bedo yath, na wīnyo na ngwēcō kī malō bino gērō
 udigī ĩ jangē gīnī.” 33 Ēn dōkī okobo bothgī carolok
 nōkēnē: “Ker mē polo cal kī thōbī na dhakō mōrō
 ōkwanyō cē orubo kī mōkō ogati na thwōnē, naka ka
 mōkō kibēc oyenyo okwot.” 34 Yecu ōtwakō kōp nī
 kibēc kī carolok both lwak; ěn ba okobo gin mōrō
 bothgī na ba otio kī carolok. 35 Man ōtīmērē ěk kōp
 na yam adwarpīny ōtwakō ocobere: “An abino twak
 kodwu kī carolok gīnī, an abino kobo jami n’ōkanērē
 cakērē anaka ĩ acakī cweno lobo.” 36 Cē Yecu ōwēkō
 lwak ěka ōcīdhō ōdōnyō ĩ ōt. ělūbkōrē obino bothe cē
 okobo gīnī nī, “Gōny nīwa carolok ĩ kom dōō na tye ĩ
 pwodho.” 37 Yecu ōgamō nī, “Ngat n’ōcwō kodhi na
 bēcō ěnē Wod ka Dhanō. 38 Pwodho ěnē lobo, ěka
 kodhi na bēcō cung pī jō mē ker k’Obanga. Dōō ěnē
 ěthīnō ka ngat na rac, 39 ěka langō n’ōcwō kodhi
 nōn gīnī ěnē Catan. Kac ěnē ajiki pīny, ěka ěkac
 ěnē emalaika. (aiōn g165) 40 “Kite na calō epudho kī
 dōō gīnī kōdē ěka ěwangō ōkō ĩ mac, bino bedo
 nī kōmanōn thon ĩ ajiki pīny. (aiōn g165) 41 Wod ka
 Dhanō bino oro emalaika mērē, ěka bino cōkō gīnī kī
 ĩ ker mērē gin na kibēc na kelo bal ěka kī jō kibēc na
 tīmō gin na rac. 42 Gin bino bologī ĩ mac na lyeth,
 kanya koko ěka kaō lak tye iē. 43 Cē jō na kitegī atīr
 bino ryēny gīnī calō ceng ĩ ker k’Apagī. Ngat na lthe
 tye, myero ěn owiny. 44 “Ker mē polo cal kī lōnyō
 n’ěkanō ĩ pwodho. Ka dhanō onwongo, cē iko dōkī,
 ěka pī yom cwinye mīō ěn cīdhō cadhō jami kibēc
 n’onwongo ěn tye kōdē, cē wīlō pwodho nōn ōkō.
 45 “Ker mē polo cal dōkī k’acath na rangō jami na
 bēcō na wel mērē tēk. 46 Ka onwongo mōrō acēl na
 bēr rwōk, ěn cīdhō cē cadhō jami kibēc n’onwongo

ën tye ködë ëka wilô gin nôn ôkô. **47** “Ker më polo cal dôki kî böô n’ônwongo êcîkô ï nam n’omakô koth rëc kibëc na papath. **48** Ì karë na böô opong, êcîk rëc ôywaô gîni böô yôkô ï lak kulo. Cë obedo gîni pîny ëka ôyërô gîni rëc na bëcô eketho ï adita, ëntô eyuo man onwongo tye gîni na rac ôkô. **49** Man ënë kite na bino bedo ködë ï karë më ajiki pîny. Emalaika bino bino gîni ëka poko jô na reco ôkô kî kom jô na kitégî atîr, (aîôn g165) **50** ëka bologî ï mac na lyeth, kanya koko ëka kaô lak tye ië.” **51** Yecu openyogî nî, “Un ïniang ï kom kôp ni kibëc?” Gîn ôgamô nî, “Eyo, wan ëniang ië.” **52** Cë Yecu okobo nigî nî, “Pi manôn apwony cik môrô kékën n’epwonyo kî kôp ï kom ker më polo cal kî won ôt, na kwanyô jami na nyen ëka jami na côn kî kanya ën kanô lönyô mërë ië.” **53** Ì karë na Yecu otyeko twakô carolok ni gîni, ën ôya ôkô kî kunôn. **54** Cë ën odwogo ï lobo thurgî ëka ôcakô pwonyo jîi ï cinagogagi. Jîi obedo kî ur rwôk cë okobo gîni nî, “Dhanô ni onwongo ryëkô ëka tékô më tango ni gîni kî kwene? **55** Man ba obedo wod k’apaa bao? Aya mërë pathî Maria, ëka utmego mërë ba gin ënë Yakobo, Yocepu, Cimon ëka Yuda? **56** Amege mërë kibëc ba tye gîni kod onu kany? Cë dhanô ni onwongo kôp ni kibëc kî kwene?” **57** Cë gîn ôkwërô ën ôkô. Ëntô Yecu okobo bothgî nî, “Adwarpîny ëwôrô ï kabedo kibëc na path kî ï lobo thurgî ëka kî ï pacôgi.” **58** Yecu ba otio tango na pol kunôn, piën yeegî onwongo ope.

14 Ì karë nôn Erode n’obedo alôc më Galilaya owinyo kôp na pol ï kom Yecu, 2 ëka ën okobo both etic mërë nî, “Man ënë Jon Abatica, n’ocer ôkô kî ï kin jô n’ôthôô! Manôn ënë ômiô ën tye ka tio koth tango na calô man.” **3** Erode onwongo ômakô Jon ëka otweo ën ï buc pî Kerodia dhakô k’ômîn mërë Pilipo, **4** piën Jon Abatica onwongo obedo ka kobo both Erode nî, “Cîk ba oyeo nî ïlôk dhakô k’omeru obed megî.” **5** Erode onwongo mîtô neko Jon ôkô, ëntô onwongo lworo jîi, piën gîn onwongo yeo nî Jon obedo adwarpîny. **6** Ëntô ï karë më po pî nywôlô Erode, nyaka Kerodia ômyël ï nyim wele cë oyomo cwiny Erode rwôk, 7 n’ômiô ën ôcikërë nakun kwongere both nyakô nôn më miô gin na kibëc na ën bino penyo pirë. **8** Aya mërë okobo ninë kôp na ën myero okobi, cë nyakô nôn ôcidhô okobo nî, “Mîa wi Jon Abatica ï canîa kany.” **9** Cë rwoth Erode okumo rwôk, ëntô pî kwong na ën okwongo ëka pî wele mërë, ômiô ën ôcikô nî myero ëmîi. **10** Cë Erode ooro acikari mërë më cidhô nguno ngut Jon ôkô kî ï buc, **11** ëka oketho gîni wie ï canîa cë ëmiô both nyakô nôn n’otero both aya mërë. **12** Kinge ëlûbkôr

Jon obino gîni otingo kome ëka oiko gîni. Cë gîn ôcidhô okobo both Yecu. **13** Ì caa na Yecu owinyo gin n’ôtimërë ï kom Jon, ën ôya ôkô kî kunôn kî yeya cë ôcidhô yo kanyalik më bedo kënë. Ì karë na jîi owinyo gîni kôp nôn, cë ôlûbô gîni kôrë nakun wotho kî tyën-gî kî ï peci na papath. **14** Ì karë na Yecu idho kî ï yeya, ën ônënô lwak na pol, ëka kîca ômakô ën ï komgî, cë ôcangô jô n’ônwongo two gîni. **15** Ka othuno kothieno, ëlûbkôrë obino bothe cë okobo gîni nî, “Pîny ocido dong ôkô ëka kany obedo kanyalik. Mîi jîi ôcidh gîni ï kin peci êk ôcidh ôwil gîni cem më acamagi.” **16** Yecu ôgamô nî, “Gîn myero kûr ôcidhi ôkô, miwugî gin môrô më acama.” **17** Gîn ôgamô nî, “Wan etye kany k’ogati abic ëka kî rëc ariô kékën.” **18** Yecu okobo nî, “Kel unugî botha kany.” **19** Cë ën okobo both lwak më bedo pîny ï kom lum. Yecu ôkwanyô ogati abic ëka rëc ariô cë ônënô malô ï polo, ën ôlégô gum ëka opoko ï ogati gîni. Cë ômiôgi both ëlûbkôrë, ëka ëlûbkôrë ômiôgi both jîi. **20** Gîn kibëc ocemo oyeng gîni. Ëlûbkôrë ôcôkô gîni ngîny cem n’odong pong aditi apar wie ariô. **21** Jô n’ôcamô gîni cem nôn onwongo rômö gîni cwô elip abic, na ba êkwanô mon ëka êthinô. **22** Cûcûth Yecu ômiô ëlûbkôrë ôdônyô ï yeya më cidhô anyim ninë yo lôka nam tung ca, nakun ën pod odong më miô lwak cidhô ôkô. **23** Kinge na dong Yecu ômiô lwak ôcidhô ôkô, ën ôcidhô ï wi kidi kënë më lëga. Ì karë na dong pîny oyutho, ën onwongo tye kënë kunôn, **24** ëntô yeya onwongo dong ôcidhô ôkô na bor kî ï lak nam, pii na tingere malô onwongo yelo yeya, piën yamô onwongo tye ka kudho bino ï komgî. **25** Ì kin caa abungwën ëka caa apar wie ariô më ruu ka pîny, Yecu obino both ëlûbkôrë na wotho ï wi pii. **26** Ì karë n’ëlûbkôrë ônënô ën wotho ï wi pii, cë tipo komgî ôthôô ôkô. Gîn oredo rwôk pî lworo, nakun kobo gîni nî, “Man obedo jwôk!” **27** Ëntô cûcûth Yecu okobo nigî nî, “Dîi unu cwinywu, an ënôn. Kûr ilwor unu.” **28** Cë Petero ôgamô dhôgë nî, “Rwoth, ka in ënôn, mîa abin bothi nakun awotho ï wi pii.” **29** Yecu okobo ninë nî, “Bin.” Cë Petero oidho ôkô kî ï yeya, owotho ï wi pii më bino both Yecu. **30** Ëntô ka Petero ônënô yamô tye ka kudho rwôk, ën ôcakô bedo na lwor ëka ôcakô lûny ï pii. Cë okok nî, “Rwoth, lara!” **31** Cûcûth Yecu olyao cîngë cë ômakô ën ëka okobo nî, “In itye kî yee na titîdi. Pîngô in ibedo k’akalakala?” **32** Ì karë na gîn dong ôdônyô ï yeya, cë yamô ocung ôkô. **33** Cë ëlûbkôr Yecu n’ônwongo tye gîni ï yeya ôcakô gîni wôrô ën nakun kobo gîni nî, “Adyer, in ibedo Wod k’Obanga.” **34** Kinge na dong gîn ôngôlô nam, othuno gîni ï lobo Genecaret. **35** Ì karë na jô na tye ï kabedo nôn ongeô Yecu, cë ooro gîni kôp ï kabedo kibëc

n'ögürö lobo nön. Jii okelo etwoe kibëc both Yecu. **36** Gin ökwaö ën ëk etwoe ogud gini lak böngü méré kékën, ëka jö kibëc n'ogudo ëcangögi ökö.

15 Kinge karë mörö, Eparicayo mökö ëka epwony cik öya gini ki i Jerucalem obino both Yecu cë openyo gini ni, **2** "Pingö ëlëbkori türö gini cik më thëkwarö ka jö na dito? Gin cemo na ba ölwökö gini cing-gi." **3** Yecu ögamö ni, "Ëka pingö un ba ilübö unu cik k'Obanga pi lübö cik më thëkwaröwu? **4** Piën Obanga okobo ni, 'Wör apapni ëka ayani' ëka 'Ngat na bino yanyö apap méré onyo aya méré myero enek ökö.' **5** Ëntö ikobo unu ni ka dhanö mörö okobo both apap méré onyo aya méré ni, 'Gin n'onwongo myero akonyi ködë amiö dong ökö both Obanga,' **6** ën myero kür 'öwör k'apap méré' ködë. I yoo nön un ikwëwö köp n'Obanga okobo pi lübö cik më thëkwaröwu. **7** Un etwodo! Icaya yam ötwakö köp n'atir i karë na ën odwaro köp i komwu: **8** "Rok ni wöra gini ki del dhögi, ëntö cwinygi bor köda. **9** Gin wöra nono; pwonygi obedo cik na makö kite ka dhanö." **10** Yecu ocwodo lwak bothe, cë okobo niggi ni, "Winy ëka iniang unu. **11** Pathi gin na dönyö ki i dhö dhanö ënë balö dhanö ëntö gin na donyo ki i dhö dhanö ënë balö dhanö." **12** Cë ëlëbkör Yecu obino bothe ëka openyo gini ni, "In ingeo ni Eparicayo cwinygi öwang rwök i karë na gin owinyo köp na in ikobo?" **13** Yecu ögamö ni, "Gin apidha kibëc n'Apapna na tye i polo ba öpidhö ebino pudho ökö k'orri méré gini. **14** Wëk unu obed gini; gin obedo ëthöo wang na pëö ëthöo wang ewodhgí. Ka athöo wang pëö athöo wang awodhe, gin kibëc bino podho i bur." **15** Cë Petero okobo ni, "Göny niwa carolok ni." **16** Yecu openyogi ni, "Un kara thon bara iniang unu? **17** Un ba iniang unu ni gin na kibëc na dönyö i dhö dhanö dönyö i ic ëka donyo yökö ki i komi? **18** Ëntö jami na donyo yökö ki i dhö dhanö yaa ki i cwiny dhanö, ëka jami ni ënë balö dhanö. **19** Piën gin na yaa ki i cwiny dhanö ënë thama na reco, nek, elomi, tim më ölyang, kwalö kwo, caden më twodo, ëka ayeny. **20** Man ënë jami na balö dhanö; ëntö pathi cem ki cing na ba ëlwökö ënë balö dhanö." **21** Kinge na Yecu öya ökö ki kunön ën öcidhö i lobo n'ögürö Turo ëka Cidon. **22** Cë dhakö mörö më Kanaan n'öya ki i lobo nön obino bothe nakun kok ni, "Rwoth, Wod ka Daudi, kica omaki i koma! Cen ömakö nyara na rac rwök!" **23** Ëntö Yecu ba ögamö dhögë. Cë ëlëbkörë obino bothe ëka odweko gini ën ni, "Ryëm dhakö ni öcidhö ökö, piën tye ka mëdërë ki koko i körwa." **24** Cë Yecu ögamö ni, "An onwongo eora both jö Icarael kékën, piën gin tye na calö rom n'orwenyo." **25** Ëntö dhakö

ni obino ëka orumo cöngë i nyim Yecu nakun kobo ni, "Rwoth, konya!" **26** Yecu ögamö ni, "Ba bër më yuo cem k'ëthinö yo both gwongi." **27** Dhakö nön ögamö ni, "Eyo, Rwoth, ëntö naka thon gwongi camö gini nginy cem na podho ki i mëja k'editegi." **28** Cë Yecu ögamö ni, "Dhakö, in itye ki yee na thwönë! Ëk gin na in imitö ötimërë kite na in imitö." Cë nyarë öcang ökö i caa nön kikokome. **29** Yecu öya ökö ki kunön ëka oroko nget Nam më Galilaya. Ën öcidhö yo wi kidi cë obedo piny. **30** Lwak na pol obino both Yecu nakun ekelo engwalö, ëthöo wang, jö na mulo amula, jö na thë lëbgi otwere, ëka etwoe nökenë na pol, cë gin opyelo i nyime; ëka Yecu öcangögi. **31** Jii obedo ki ur rwök i karë na gin önönö jö na thë lëbgi otwere ka twak, jö na mulo amula öryërë, jö n'ongwal ka wotho ëka ëthöo wang nënö piny. Cë lwak öpakö gini Obanga ka jö Icarael. **32** Cë Yecu ocwodo ëlëbkörë bothe ëka okobo ni, "Kica ömaka i kom jö ni; piën obedo gini dong botha kany pi ninö adek ëka ope gini ki gin mörö më acama. An ba amitö ni öcidhö gini na kec onekogi, piën gin twërö wilere gini ki i yoo." **33** Ëlëbkörë ögamö ni, "Onu ëtwërö nwongo cem ki kany n'obedo thim ningö më pidhö lwak ni?" **34** Yecu openyogi ni, "Ogati adi na un itye ködë?" Gin ögamö ni, "Ogati abirö ëka rëc mörö na nönök." **35** Cë Yecu okobo both lwak ëk obed gini piny i ngöm. **36** Cë ën ökwanyö ogati abirö ki rëc, ëka kinge na dong ömiö pwöc both Obanga, ën opokogi ëka ömiögi both ëlëbkörë, cë ömiö gini both lwak. **37** Gin kibëc öcamö ëka oyeng gini. Kinge cem, ëlëbkör Yecu öcökö gini nginyë n'odong aditi abirö n'opong. **38** Wel jö n'ocemo gini onwongo tye elip angwën, na ba ëkwanö mon ëka ëthinö. **39** Kinge na dong Yecu ömiö lwak öcidhö ökö, ën ödönyö i yeya ëka öngölö nam öcidhö i lobo më Magadan.

16 Eparicayo ëka Ecadukayo obino gini both Yecu cë ötëmö gini ën ni onyuth bothgi anyuth n'öya ki i polo. **2** Yecu ögamö ni, "Ka piny oyutho, un ikobo ni, 'Piny bino bedo na bër, piën polo nen na kwar,' **3** ëka i kodiko cön un ikobo ni, 'Tin yamö bino kudho rwök, piën polo nen na kwar ëka ocido na cöl.' Un ingeo poka kin gin na nen i pöl, ëntö ba itwërö unu poka anyuth më karë gini. **4** Rok na reco ëka jö na yeegi ope i kom Obanga penyo gini pi anyuth më tango, ëntö mörö ope n'ebino miö na path k'anyuth k'adwarpiny Yona." Cë Yecu öya ökö ki bothgi ëka öcidhö ökö. **5** I karë n'ëlëbkör Yecu öngölö gini nam yo löka tung ca, wigi owil ökö më makö ogati. **6** Yecu okobo bothgi ni, "Gwökërë unu ki i kom thöbi k'Eparicayo ëka më k'Ecadukayo." **7** Gin ölarö köp

ni i kin-gi kën-gi cê okobo ginî ni, “Ën tye ka kobo piën onu ba êmakô ogati mörö.” 8 Ì karê na Yecu ongeog ngô na gin tye ka larô, ên openyo ni, “Un jô na yeewu nôk, pingô itye unu ka twak i kinwu kenwu ni ba imakô unu ogati mörö? 9 Un pod bara iniang unu? Un ba ipo i ogati abic pi jô elip abic, êka aditi adi na un icökô? 10 Onyo ogati abirô pi jô elip angwên êka aditi adi na un icökô? 11 Pingô ba iniang unu ni an onwongo ba atye ka twakô kôp i kom ogati bothwu? Êntô bed ni gwökêrê unu ki kom thôbi k'Eparicayo êka mē k'Ecadukayo.” 12 Cê kinge gin ôniang ni Yecu onwongo ba tye ka kobo bothgi mē gwökêrê ki kom thôbi n'etio kôdê i ogati, êntô mē gwökêrê ki kom pwony k'Eparicayo êka mē k'Ecadukayo. 13 Ì karê na Yecu othuno i lobo na cwök ki Cecaria Pilipi, cê ên openyo êlûbkôrê ni, “Nga na jîi kobo ni Wod ka Dhanô obedo?” 14 Gin ôgamô ni, “Jô mörô kobo ni in ibedo Jon Abatica; jô nôkênê kobo ni in ibedo Eliya; êka jô nôkênê pod kobo ni in ibedo Jeremia onyo ngat mörô acêl i kin edwarpîny.” 15 Yecu openyogi ni, “Un kono ikobo unu ni an abedo nga?” 16 Cimon Petero ôgamô ni, “In ibedo Meciya, Wod k'Obanga na kwô.” 17 Yecu ôgamô ni, “In itye ki gum, Cimon wod ka Yona, piën ngat mörô ba onyutho nini kôp ni êntô Apapna na tye i polo ênê onyutho nini. 18 Kobedini an akobo nini ni in ibedo Petero, êka i wi kidi ni an abino gërô jô n'oye Kiricito iê, êka têkô mē thôô ba bino lôônô. (Hadēs 986) 19 An abino miôni agôny mē ker mē polo; gin na kibêc na in itweo i wi lobo ebino thon tweo i polo, êka gin mörô na in igônyô i wi lobo ebino thon gônyô i polo.” 20 Cê Yecu ôcikô êlûbkôrê rwök êk kûr okob ginî both ngat mörô ni ên ebedo Meciya. 21 Cakêrê i karê nôn, Yecu ôcakô nyutho both êlûbkôrê ni myero ên êcidh yo Jerucalem êka êlim can na pol rwök i cing edite, êlamdhök na dito êka epwony cik. Ebino nekonê, êntô i ninô mē adek ebino cero ên ôkô. 22 Cê Petero otero Yecu ki cecen êka ôcakô coko nakun kobo ni, “Obanga kûr oye, Rwoth! Man myero kûr ôtimêrê i komil!” 23 Yecu ôlôkêrê both Petero cê okobo ni, “Yaa ôkô ki botha, Catan! In ibedo orii ôkô botha, piën thamani ba obedo mē k'Obanga, êntô mē ka dhanô.” 24 Cê Yecu okobo both êlûbkôrê ni, “Ka ngat mörô mîtô lûbö kôra, myero kono ôkwêrê kênê, êka ôcak tingo yath arîa mērê cê ôlûb kôra. 25 Piën dhanô na mîtô larô kwô mērê bino rwenyo kwô mērê arwenya, êntô dhanô mörô na bino rwenyo kwô mērê pîra bino nwongo kwô mērê. 26 Ngô na in ibino nwongo ka itye ki jami mē lobo ni kibêc cê irwenyo kwôni? Onyo ngô na dhanô twêrô miô mē lôkô ki kwô mērê? 27 Piën Wod ka Dhanô bino dwogo ki dheo k'Apap

mērê kanya acêl k'emalaika mērê, êka bino cûlô ngat acêlacêl na lûbêrê ki tic na ên otio. 28 An akobo niwu kôp adyer, jô mörô n'ocung kany ba bino bilô thôô na bara ônênô ginî Wod ka Dhanô ka tye ka bino i ker mērê.”

17 Kinge ninô abicêl, Yecu otero Petero, Yakobo êka Jon ômin Yakobo, cê ôidhô kôdgi i wi kidi malô kanya gin onwongo tye iê kën-gi. 2 Kî kunôn kome ôlôkêrê na path i nyimgi. Terinyim Yecu ôryênny calô ceng, êka bông mērê ôdôkô na tar na calô tara ceng. 3 Cê athura Muca êka Eliya onen bothgi, nakun tye ka twak ginî ki Yecu. 4 Petero okobo both Yecu ni, “Rwoth, bër mē bedo kany. Ka in imîtô, an abino yûbö othogo adek—acêl na megî, acêl pi Muca êka acêl pi Eliya.” 5 Ì karê na ên pod tye ka twak, pôl na tar oumogî ôkô êka dwôn mörô ôtwak ki i pôl nakun kobo ni, “Man ênê Woda mē amara; na iâ yom i kome. Winy unu ên!” 6 Ì karê n'êlûbkôr Yecu owinyo kôp ni, lworo ômakôgi rwök êka oryebere ginî pîny. 7 Êntô Yecu obino bothgi cê ogudogî nakun kobo ni, “Yaa unu malô, kûr ibed unu ki lworo.” 8 Ì karê na gin otingo wang-gi malô, ba ônênô ginî ngat mörô êntô Yecu kênê. 9 Ì karê na gin tye ka idho yo pîny ki i wi kidi, Yecu ôcikôgi ni, “Kûr ikob unu both ngat mörô gin na un inênô, naka ka Wod ka Dhanô ecero ôkô ki i kin jô n'ôthôô.” 10 Cê êlûbkôrê openyo ginî Yecu ni, “Pingô epwony cik kobo ni Eliya ênê myero ôcak bino?” 11 Yecu ôgamô ni, “Eliya ênê myero ôcak bino adyer, êka bino dwökô jami kibêc kakarê. 12 Êntô an akobo niwu, Eliya otyeko dong bino ôkô, êka gin ba ongeog ên, êntô gin ôtimô jami kibêc na gin mîtô i kome. I yoo acêl nôn, Wod ka Dhanô bino limô can i cing-gi ni kômanôn.” 13 Cê êlûbkôr Yecu ôniang ginî ni ên onwongo tye ka twakô kôp bothgi i kom Jon Abatica. 14 Ì karê na gin obino both lwak, êcwô mörô obino both Yecu cê orumo cöngê i nyime, 15 nakun kobo ni, “Rwoth, kîca ômakî i kom woda piën two araka ômakô êka tye ka limô can rwök. Pol karê two rêdhô ên i mac onyo i pii. 16 An akelo ên both êlûbkôrî, êntô cangô ôlôôgi ôkô.” 17 Yecu ôgamô ni, “Un rok mē karê ni yeewu ope, kitewu thon ôbal ôkô, an abino bedo kodwu pi karê na rom kwene? An abino kwô kodwu pi karê na rom kwene? Kel unu awobi nôn botha kany.” 18 Yecu ocoko cen, cê odonyo yökô ki i kom awobi nôn, êka i caa nôn cûcûth awobi ôcang ôkô. 19 Cê êlûbkôr Yecu obino bothe i müng êka openyo ginî ni, “Pingô wan ba êryêmô cen?” 20 Yecu ôgamô ni, “Piën yeewu onwongo tidî mörô. An akobo niwu kôp adyer, ka un itye ki yee na tidî na calô nyig kodhi karadali, un

itwērō kobo nī kidi nī, 'Mukiri kī kany yo kuca' ēka bino mukere. Gin mōrō ope na bino lōōnōwu." 21 (Koth gin na calō man ba twērō donyo yōkō, kono ka kī lēga ēka rio kec kēkēn.) 22 Ī karē na gīn öcökērē kanya acēl ī Galilaya, Yecu okobo bothgī nī, "Wod ka Dhanō ebino ketho örörō ī kome. 23 Gīn bino neko ēn ökö, ēka ī nīnō mē adek ebino cero ēn." Cē ēlūbkör Yecu obedo gīnī kī cwer cwiny rwōk. 24 Kinge na Yecu ēka ēlūbkörē othuno gīnī ī Kaperanaum, ēcök ocoro mē Öt k'Obanga obino both Petero cē okobo gīnī nī, "Apwonywu ba cülō ocoro mē Öt k'Obanga?" 25 Petero okobo nī, "Cülō." Ī karē na Petero odwogo ī öt, Yecu ēnē öcakō twak kōdē nakun penyo nī, "Ngō na in īthamō Cimon, rwodhi mē lobo nī cökō gīnī ocoro kī both ēthinōgī onyo kī both jō nökēnē?" 26 Cē Petero ögamō nī, "Kī both jō nökēnē." Cē Yecu okobo both Petero nī, "Ka tye nī kōmanōn cē ēthinōgī ba myero öcül. 27 Ēntō kadī bed nī kōmanōn, ēk kūr onu ēbal bothgī, cidh ī dhō nam ēka ibol gōl ī pii. Kwany rēc n'öcakō moko; yab dhögē ēka ibino nwongo cēkēl īē. Kwany cēkēl nōn ēk imiigī pī ocorona ēka megī."

18 Ī karē nōn ēlūbkör Yecu obino bothe cē openyo gīnī nī, "Nga ēnē lōō kī dit kī ī ker mē polo?" 2 Yecu ocwodo athīn na tidi cē ömiō ocung ī kin-gī, 3 ēka okobo nī, "An akobo niwu kōp adyer nī ka ba ilōkērē idōkō unu calō ēthinō, un ba ibino dōnyō ī ker mē polo. 4 Pī manōn, dhanō na mwolere kēnē calō athīn nī ēnē dit ī ker mē polo. 5 "Dhanō mōrō na jölō athīn na calō man ī nyinga, nwongo öjōla. 6 Ēntō ka dhanō mōrō ömiō ngat acēl kī kin ēthinō na thīnō nī n'oye gīnī ī koma mē podho ī bal, onwongo bedo na bēr ka etweo pong rego na thwōnē ī ngute cē ebolo kōdē ī nam na thuth. 7 "Lobo bino nēnō can pī gin na miō jīi podho ī bal. Piēn gin na miō dhanō podho ī bal myero obin, ēntō dhanō na kelo gin na miō dhanō podho ī bal bino nēnō can! 8 Ka cingi onyo tyeni ēnē mii ipodho ī bal, ngun ibol ökö. Bēr nini mē dōnyō ī kwō na cingi kucēl ope onyo nī ngwal, bēr na lōō bedo kī cingi ariō onyo tyeni kibēc cē eboli kōdē ī mac na ba thōō. (aiōnios g166) 9 Ka wangi ēnē mii ipodho ī bal, köl ēka iyuu ökö. Bēr nini mē dōnyō ī kwō kī wangi acēl nī lōōnō mē boloni kī wangi ariō ī mac Kapīny. (Geenna g1067) 10 "Myero īnēn nī ba īcaō unu ngat mōrō acēl kī ī kin jō na thīnō nī. Piēn an akobo niwu nī emalaikagī na tye ī polo tye gīnī ī nyim Apapna ī karē kibēc. 11 (Piēn Wod ka Dhanō obino mē larō jō n'orwenyo.) 12 "Un īthamō nīngō ka dhanō mōrō tye kī rom mia acēl, ēka acēl kī kin-gī orwenyo ökö? Ēn ba bino wēkö pyer abungwēn wie abungwēn ī wi kidi cē cidhō rangō man orwenyo? 13 An akobo

niwu kōp adyer nī ka onwongo, cwinye bedo na yom ī kom rōmō n'orwenyo na lōō pyer abungwēn wie abungwēn na ba orwenyo gīnī. 14 Ī yoo acēl nōn, Apapwu na tye ī polo thon ba mītō nī jō na thīnō nī kūr mōrō orwenyo. 15 "Ka omeru öbalō bothi, cidh bothe ēk inyuth nīnē bal mērē, ī kin in kī ēn. Ka ēn owinyo kōpni, cē nwongo idwongo omeru cen. 16 Ēntō ka ēn ba owinyo kōpni, kwany dhanō acēl onyo jō ariō nökēnē owoth kodi, ēk 'kōp kibēc n'ecaden ariō onyo adek ötwakō omok kōp kibēc.' 17 Ka ēn ökwērō winyo kōpgī, kob both jō n'oye Kiricito; ēka ka ökwērō winyo kōp ka jō n'oye Kiricito, ter ēn na calō ngat na ba ngeo Obanga onyo acök ocoro. 18 "An akobo niwu kōp adyer nī gin mōrō na un itweo ī wi lobo ebino thon tweo ī polo, ēka gin mōrō na un ibino gönyō ī wi lobo ebino thon gönyō ī polo. 19 "An akobo niwu dōkī nī ka jō ariō kī ī kinwu oyere gīnī ī kom gin mōrō kēkēn na gīn openyo pīrē, Apapna na tye ī polo bino tīmō nigī. 20 Piēn kanya jō ariō onyo adek öcökērē gīnī tē ī nyinga, an thon nwongo atye kōdgi kany nōn." 21 Cē Petero obino both Yecu ēka openyo nī, "Rwoth, wang adi na an myero atīm kīca both ömēra ka öbalō botha? Wang abirō?" 22 Yecu ögamō nī, "An ba akobo nini nī wang abirō, ēntō wang pyer abirō tyēn abirō. 23 "Pī manōn, ker mē polo cal kī rwoth n'onwongo mītō yūbō kōp mē benyi k'etic mērē. 24 Ī karē na ēn dong öcakō kwanō wel, ekelo ēcwō mōrō bothe n'onwongo tye kī banya mē ciling na thwōnē rwōk. 25 Na calō onwongo dong ba rōmō cülō banya nōn, cē adwong mērē öcikō nī myero ēcadh atic nōn ī opii, kī dhakō mērē, ēthinō mērē ēka gin na kibēc n'onwongo ēn tye kōdē mē cülō banya. 26 "Cücūth atic nōn urumo cōngē ī nyim adwong mērē nakun kwaō nī, 'Adwong, dīi cwinyi ī koma, cē an abino cülōni jami kibēc.' 27 Cē adwong kīca ömakō ī kom atic mērē, ēka ötimō kīca cē ögōnyō öwēkö öcidhō. 28 "Ēntō ī karē n'atic nōn ödōnyō yōkō, ēn onwongo atic awodhe n'onwongo tye kī banya mērē na rōmō denario mia acēl. Ēn ömakō awodhe na tye kī banya mērē cē ödēō nakun kobo nī, 'Cül banyana!' 29 "Ēntō atic awodhe nī oryebere pīny nakun kwaō nī, 'Dīi cwinyi ī koma, an abino cülō banyani.' 30 "Ēntō ēn ökwērō ökö cē ömiō etweo won banya mērē ī buc naka ka wang öcülō banya. 31 Ī karē n'etic nökēnē ca önēnō ngō n'ötīmērē, cē cwinygī öwang rwōk ēka öcidhō okobo gīnī both adwong-gī gin na kibēc n'ötīmērē. 32 "Cē adwong ocwodo atic n'onwongo ēn ötimō kīca nīnē ēka okobo nī, 'In ibedo atic na rac, an awēkö banyani kibēc piēn in ikwaō nī atīm nini kīca. 33 In onwongo myero kīca omaki ī kom atic awodhi, kite na an thon kīca ömaka ī komi.' 34

Akēmō ōmakō adwong rwōk ōmīō eketho atic nōn ī buc ēk onwong pwod naka ka wang ōcūlō banya mērē kibēc. **35** "Man ēnē kite n'Apapna na tye ī polo bino tīmō kōdē ī komwu, ka ngat acēlācēl ī kinwu ba ōtīmō kica kī ī cwinye both utmegō mērē."

19 Ī karē na Yecu otyeko twakō kōp ni kibēc, ēn ōya ōkō kī ī Gallīaya cē ōcīdhō ī lobo mē Yudea yo lōka kulo Jordan. **2** Lwak na pol ōlūbō kōrē, ēka ōcangōgī kunōn. **3** Eparicayo mōkō obino bothe, cē ōcakō gīnī tēmō Yecu. Gīn openyo nī, "Cīk yeo nī ēcwō twērō kwērō dhakō mērē pī tyēn kōp mōrō kēkēn?" **4** Yecu ōgamō nī, "Un ba ikwanō nī ī acaki Acwec 'ocweo ēcwō ēka dhakō,' **5** ēka okobo nī, 'Pī tyēn kōp nī ēcwō bino wēkō apap mērē ēka aya mērē cē ribērē kī dhakō mērē, ēka jō arīō dōkō kom acēl'?" **6** Kōmanōn gīn ba dōkī tye kom arīō, ēntō kom acēl. Pī manōn gīn n'Obanga ōrībō, dhanō mōrō kūr opok kin-gī." **7** Cē Eparicayo openyo Yecu nī, "Pīngō Muca ōmīō cīk nī ēcwō twērō mīō waraga mē kēthō nyom both dhakō mērē cē ryēmō ōkō?" **8** Yecu ōgamō nī, "Muca oyeo niwu mē ryēmō monwu piēn cwinywu onwongo nwang. Ēntō onwongo ba obedo nī kōmanōn kī ī acaki. **9** An akobo niwu nī ngat mōrō na kwērō dhakō mērē na path kī dōnyō ī elomi, cē ōnyōmō dhakō nōkēnē nwongo ōdōnyō ī elomi." **10** Ēlūbkōr Yecu okobo gīnī bothe nī, "Ka kōp ī kom ēcwō kī dhakō tye nī kōman, cē thwara kūr enyom." **11** Yecu ōgamō nī, "Jō kibēc ba twērō yeo gīnī kōp nī, ēntō both jō n'Obanga ōmīōgī kēkēn. **12** Jō mōkō ba nywōl piēn nwongo ēnywōlōgī nī kōmanōn; jō mōkō tye kite na jō nōkēnē ōtīmō kōdē ī komgī; ēka jō mōkō ōyērō mē bedo abonge nyom pī ker mē polo. Ngat na twērō yeo pwony nī myero oye." **13** Kinge ekelo ēthīnō both Yecu nī ēk oketh cīngē ī komgī ēka ōlēg pīrgī. Ēntō ēlūbkōrē ocoko jō n'okelo ēthīnō both Yecu. **14** Ēntō Yecu okobo bothgī nī, "Wēk unu ēthīnō obin botha, kūr ijukugī, piēn ker mē polo tye pī jō na cal k'ēthīnō nī." **15** Ī karē na dong otyeko ketho cīngē ī komgī, ēn ōya ōkō kī kany nōn. **16** Ī karē mōrō, dhanō mōrō obino both Yecu cē openyo nī, "Apwony, atīm ngō na bēr ēk anwong kwō na ba thum?" (*aiōnios g166*) **17** Yecu ōgamō nī, "Pīngō in itye ka periyona pī gin na bēr? Dhanō na bēr tye acēl kēkēn. Ka in īmītō dōnyō ī kwō na ba thum, cē ilūb cīk." **18** Ēn openyo Yecu nī, "Cīk mēnē?" Yecu ōgamō nīnē nī, "Kūr ineki, kūr idōny ī elomi, kūr ikwal, kūr ibed acaden mē twodo, **19** wōr apapnī ēka ayani, ēka 'Mar awodhi na calō īmarō komi keni.'" **20** Awobi nī ōgamō nī, "Man kibēc an agwōkō, ngō na pod odong na an myero atīm?" **21** Yecu ōgamō nīnē nī, "Ka in

īmītō bedo dhanō na bēr abonge bal, cīdh īcadh jami na in itye kōdē ēk īmīl līm mērē both ēcan, ēka ibino bedo kī lōnyō na thwōnē ī polo. Cē dong ibin ilūb kōra." **22** Ī karē n'awobi nī owinyo kōp nī, ōya ōcīdhō ōkō na cwinye cwer rwōk, piēn ēn onwongo ōlōny rwōk. **23** Cē Yecu okobo both ēlūbkōrē nī, "An akobo niwu kōp adyer, tēk rwōk pī alōnyō mē dōnyō ī ker mē polo. **24** Anwō dōkī akobo bothwu nī yot pī kīnaga mē dōnyō kī ī wang libira nī lōōnō pī alōnyō mē dōnyō ī ker k'Obanga." **25** Ī karē n'ēlūbkōr Yecu owinyo kōp nī, obedo gīnī kī thwōn ur rwōk ēka openyo gīnī Yecu nī, "Cē nga na dong twērō larē?" **26** Ēntō Yecu ōrīpōgī cē okobo nī, "Kī both dhanō man ba twērē, ēntō kī both Obanga jami kibēc twērē." **27** Petero ōgamō dhō Yecu nakun kobo nī, "Wan ēwēkō jami kibēc mē lūbō kori! Ngō na wan ebino nwongo?" **28** Yecu okobo bothgī nī, "An akobo niwu kōp adyer, ī karē n'ebino ketho kī jami na nyen, ka Wod ka Dhanō bino bedo ī then ker mē dheo mērē, un jō na dong ilūbō unu kōra thon ibino bedo unu ī then ker apar wie arīō, nakun īngōlō unu kōp ī kom kaka apar wie arīō mē Icarael. **29** Dhanō acēlācēl n'onwongo ōwēkō gīnī udi onyo utmegogī onyo apap onyo aya onyo ēthīnō onyo pwothi pī nyinga, bino nwongo na kadhō tyēn mia acēl ēka ēn bino nwongo kwō na ba thum. (*aiōnios g166*) **30** Ēntō jō na pol n'ōtēlō anyim bino dong gīnī kī cen, ēka jō na pol n'odong kī cen bino tēlō gīnī anyim."

20 "Ker mē polo cal kī won pwodho ōlōk n'ōya kodiko cōn mē pango etic mē cīdhō tic ī pwodho ōlōk mērē. **2** Ēn oyere kōdgī mē cūlōgī denario mē tic pī nīnō acēl ēka oorogī mē cīdhō tic ī pwodho ōlōk mērē. **3** "Ēn dōkī ōcīdhō ī kin caa adek cē ōnēnō jō mōkō n'ocung ī kabedo mē cuk na ba tīmō gīnī gin mōrō. **4** Ēn okobo nīgī nī, 'Un thon cīdh itīī ī pwodho ōlōkna, cē an abino cūlōwu cūl n'opore.' **5** Cē gīn thon ōcīdhō. "Ēn dōkī ōcīdhō ī kin caa abicēl mē kiceng ēka caa abungwēn yōkō cē ōtīmō kōmanōn thon. **6** Ī kin caa apar wie acēl mē kothyeno ēn dōkī ōcīdhō yōkō cē onwongo jō nōkēnē pod ocung gīnī kany nōn. Ēn openyogī nī, 'Pīngō icung unu acunga kany anaka kodiko naka kothyeno na ba ītīmō unu gin mōrō?' **7** "Gīn ōgamō nī, 'Piēn ngat mōrō ope n'opangowa, 'Cē ēn okobo nīgī nī, 'Un thon cīdh itīī unu ī pwodho ōlōkna.' **8** "Ī karē na dong othuno kothyeno, won pwodho ōlōk okobo both atic mērē na lōō etic nī, 'Cwod etic ēka īmīgī cūlgī, cakērē kī both ngat n'epango kī cen naka both ngat n'ēcakō pango.' **9** "Etic n'epangogī ī kin caa apar wie acēl mē kothyeno obino ēka ōgamō gīnī denario pī tic

mē ninō acēl. 10 Jō n'ēcakō pangogī i pwodho mē acēl ōthamō nī ebino cūlōgī na būp na lōō mē ka jō n'epangogī kī cen, ēntō gīn thon ēmīōgī denario mē tic pī ninō acēl. 11 Ī karē na gīn dong ōgamō cūlōgī, ōcakō gīnī ngūngūta i kom won pwodho ōlōk nakun kobo gīnī nī, 12 Jō n'epangogī i pwodho kī cen otio gīnī pī caa acēl kēkēn, ēka in īcūlōgī na rōm arōma kōdwa nakun wan eyelere kī tic rwōk i ceng na lyeth. 13 "Ēntō ēn ōgamō nī ngat acēl kī i kin-gī nī, 'Okona, an ba ateri na rac. In ba iyeo nī ibino gamō denario mē tic pī ninō acēl? 14 Gam cūlūnī ēk īcīdhī. An amītō cūlō dhanō n'epango kī cen cūl na rōm kī megī. 15 An ba atye kī twērō mē tic kī jamina kite na an amītō? Onyo wangi ocido pī gīn na bēn na an atīmō mē miō kōny?" 16 Cē Yecu ojiko kōp mērē nakun kobo nī, "Jō n'odong cen bino tēlō anyim ēka jō n'ōtēlō anyim bino dong cen." 17 Ī karē na Yecu onwongo tye ka cīdhō yo Jerucalem, ēn ōkwanyō ēlūbkōrē apar wie ariō thenge kēn-gī ēka okobo nīgī nī, 18 "Onu ēcīdhō yo Jerucalem, ēka Wod ka Dhanō ebino miō ōkō both ēlamdhōk na dito ēka both epwony cik. Gīn bino ngōlō ninē kōp mē thōō 19 ēka ebino miō ēn both erok ēk ēngal, epwod kī del ēka egur i kor yath ariā. Ēntō i ninō mē adek ebino cero ēn ōkō!" 20 Cē dhakō ka Jebedayo obino both Yecu k'awope mērē ariō, orumo cōngē pīny i nyime cē ōkwaō ēn pī gīn mōrō. 21 Yecu openyo ēn nī, "Ngō ēnōn na in īmītō?" Ēn ōgamō nī, "Cikiri nī ibino miō awopena ariō nī ēk ngat acēl obed i nget cingī kucem ēka acēl i nget cingī kucam i kerni." 22 Yecu ōgamō nīgī nī, "Ba ingeo unu gīn na un itye ka penyo. Un itwērō madhō ekopo mē can na an abino madhō?" Gīn ōgamō nī, "Wan ētwērō." 23 Cē Yecu okobo nīgī nī, "Adyer un ibino modho k'ekopo mē can na an abino modho kōdē, ēntō mē bedo i nget cingā kucem onyo kucam pathī an ēnē ayērō. Kabedo nōn bino bedo mē jō n'Apapna ōyūbō pīrgī." 24 Ī karē na jō apar nōkēnē ca owinyo gīnī kōp nī, gīn ōngōō i kom omego ariō rwōk. 25 Cē Yecu ocwodogī kanya acēl ēka okobo nīgī nī, "Un ingeo nī ēlōc k'erok lōōgī kī tēk ēka editegi ut kī twērō i komgī. 26 Man myero kūr obed nī kōmanōn i kinwu. Ka ngat na mītō bedo na dit kī i kinwu, myero obed aticwu, 27 ēka ngat na mītō bedo dhanō mē acēl myero obed opiiwu— 28 kite na Wod ka Dhanō ba obino nī ēk etii ninē, ēntō mē tic pī jīi, ēka mē miō kwō mērē mē kōkō jō na pol." 29 Ī karē na Yecu k'ēlūbkōrē onwongo tye ka yaa gīnī kī i Jeriko, lwak na pol ōlūbō kōrē. 30 Ēthōō wang ariō onwongo obedo gīnī i nget yoo, ēka i karē na gīn owinyo nī Yecu onwongo tye ka wok kany nōn, gīn oredo nī, "Rwoth, Wod ka Daudi, kica

omaki i komwa!" 31 Lwak ocokogī nakun kobo gīnī nī ēk ōlīng gīnī ōkō, ēntō gīn ōmēdērē kī redo rwōk nī, "Rwoth, Wod ka Daudi, kica omaki i komwa!" 32 Yecu ocung ēka ocwodogī, cē openyogī nī, "Ngō na un īmītō nī an atīm niwu?" 33 Gīn ōgamō nī, "Rwoth, wan ēmītō nī wangwa ōyabērē." 34 Kīca ōmakō Yecu i komgī ēka ēn ogudo wang-gī. Cē cūcūth wang-gī ōyabērē ēka ōcakō gīnī lūbō kōrē.

21 Ī karē na Yecu k'ēlūbkōrē dong cwōk thuno i Jerucalem, gīn obino i Betepage i kor Kidi mē Jeituni. Cē Yecu ooro ēlūbkōrē ariō, 2 nakun kobo nīgī nī, "Cīdh unu i pacō na tye i nyimwu, cē cūcūth ibino unu nwongo kana n'etweo kanya acēl k'athīn mērē i ngete. Gōny unu ēka ikel unugī botha. 3 Ka dhanō mōrō okobo niwu kōp mōrō, kob unu ninē nī Rwoth ēnē mītōgī, ēka dhanō nōn bino miōwu ikelo piōpiō." 4 Man ōtimērē mē cobo kōp na yam adwarpīny ōtwakō nī: 5 "Kob nī jō mē Cion nī, 'Nēn, rwothwu tye ka bino bothwu, ēn mwol ēka obedo i wi kana i wi athīn kana." 6 Ēlūbkōrē ōcīdhō ēka ōtimō gīnī kite na Yecu ōcīkōgī kōdē. 7 Gīn okelo kana ēka athīn mērē, cē ōpēdhō gīnī bōng-gī i ngeegi ēka Yecu obedo i wie. 8 Lwak na pol ōpēdhō bōng-gī i dye yoo, nakun jō nōkēnē tongo jang yen cē pēdhō gīnī i dye yoo. 9 Lwak n'ōtēlō anyim ēka kī jō n'ōlūbō kōrē onwongo tye ka wōō gīnī nī, "Ocana, Wod ka Daudi!" "Gum obed i kom ngat na tye ka bino kī nyīng Rwoth!" "Ocana na tye malō rwōk!" 10 Ī karē na Yecu ōdōnyō i Jerucalem, jō kībēc kī i taun obedo gīnī k'ethime nakun penyo gīnī nī, "Man ēnē nga?" 11 Lwak ōgamō nī, "Man ēnē Yecu, adwarpīny n'ōya kī i Najaret na tye i Galilaya." 12 Yecu ōdōnyō i dyekal ōt k'Obanga ēka ōryēmō jō kībēc n'onwongo cadhō ēka wīlō gīnī wīl kunōn. Ēn ōlōkō mēja ka jō na lōkō cīlīng atarō ēka thene ka jō na cadhō amame. 13 Ēn okobo nīgī nī, "Ēcōō nī, 'Ōda ebino cwodo nī ōt mē lēga,' ēntō un īlōkō ōdōkō 'ka pono k'ekwoe.'" 14 Ēthōō wang ēka engwalo obino gīnī bothe i dyekal ōt k'Obanga ēka ēn ōcangōgī. 15 Ēntō ēlamdhōk na dito ēka epwony cik ōngōō gīnī rwōk i karē n'ōnēnō gīnī tic mē aura na ēn onwongo tye ka tīmō ēka ēthīnō na wōō i dyekal Ōt k'Obanga nakun kobo gīnī nī, "Ocana Wod ka Daudi." 16 Gīn openyo ēn nī, "In itye ka winyo ngō n'ēthīnō nī tye ka kobo?" Yecu ōgamō nī, "Eyo, un anaka bara īkwanō unu nī, 'Kī i dhō ēthīnō ēka ēthīnō na dōth in ipwonyo ēthīnō mē miōni pak?'" 17 Cē ēn ōya ōwēkōgī ēka ōcīdhō yo Betania cē obuto kunōn. 18 Kodiko cōn na Yecu onwongo tye ka dōk cen yo taun, kec onwongo oneko ēn. 19 Yecu ōnēnō yath ōlam i nget yoo, ēn ōngēl iē ēntō

ba onwongo ölam mörö na path k'oboke kékên. Ën okobo nî yath ölam nî, "Ba dökî ibino nyakö nyigî!" Cê cücüth yath ölam öthwö ökö. (aiön g165) 20 Í karê n'ëlübkörê önenö, ouro ginî ëka openyo ginî nî, "Yath ölam öcakö thwö nîngö piöpö?" 21 Yecu ögamö nî, "An akobo niwu köp adyer nî ka iut unu kî yee na ba itye unu k'alakakala, ba ibino unu timö gin na an atimö í kom yath ölam kékên, ëntö irömö unu thon kobo nî kidi ni nî, 'Mukiri ëka icidh icibiri í nam,' cê bino timêrê. 22 Ka in itye kî yee, gin mörö kékên na in ibino kwaö kî lëga ibino nwongo." 23 Í karê na Yecu odwogo í dyekal öt k'Obanga, na ên tye ka pwony, ëlamdhök na dito ëka edita ka lwak obino ginî bothe cê openyo ginî ên nî, "Twêrö mênê na in itye ka timö kî gin ni ginî? Ëka nga ênê omii twêrö nî?" 24 Yecu ögamö nî, "An thon abino penyowu peny acêl. Ka igamö unu nîna, cê an abino kobo niwu twêrö mênê na an atye ka timö kî gin ni ginî. 25 Batica ka Jon öya kî kwene? Öya kî í polo onyo kî both dhanö?" Gin öcakö larö köp nön í kin-gî kên-gî ëka okobo ginî nî, "Ka onu ekobo nî öya kî í polo, ên bino penyo nî, 'Pingö ba iyee unu í kom Jon?" 26 Ëntö ka onu ekobo nî, "Öya kî both jii"—cê onu elworo lwak, piên jö kibêc yee nî Jon onwongo obedo adwarpiny." 27 Cê gin ögamö nî Yecu nî, "Wan ba engeo." Ëka Yecu okobo nîgî nî, "An thon ba abino kobo niwu twêrö mênê na an atye ka timö kî gin ni ginî. 28 "Ngö na un ithamö? Yam êcwö mörö tye n'onwongo ut k'awope ariö. Ën öcidhó both awobi mē acêl ëka okobo ninê nî, 'Woda, cidh itii í pwodho ölöka tin.' 29 "Ën ögamö nî, 'Ba abino cidhó,' ëntö kinge ên ölökö thama mērē ëka öcidhó. 30 "Cê apap mērē thon öcidhó both awobi nökênê ca ëka okobo kömanön. Awobi ni ögamö nî, 'Eyo, apap, an abino cidhó,' ëntö ên ba obino öcidhó. 31 "Nga kî kin jö ariö ni ênê ötimö gin n'apap mērē mitö?" Gin ögamö nî, "Awobi mē acêl." Cê Yecu okobo nîgî nî, "An akobo niwu köp adyer nî êcök ooro ëka oleye bino cakö dönyö niwu í ker k'Obanga. 32 Piên Jon obino mē nyutho niwu yoo mē kite atir, ëka un ba iyee unu í kome, ëntö êcök ooro ëka oleye oyee í kome. Ëka thon kinge na dong inênö unu gin ni, ba ibino ingut ëka iyee unu í kome. 33 "Winy unu carolok nökênê: Yam onwongo tye won pwodho mörö n'öpídhö ölökö. Ën oketho cêl ögürö, ökünyö bur iê mē biö ölökö ëka öyübö pem mē kür iê. Cê ên ömïö pwodho ölökö both epang pwodho mörö ëka ên öcidhó ökö í lobo nökênê. 34 Na karê mē kac onyingo na cwök, ên ooro etic mērē both epang pwodho mē gamö nyig ölökö na mēgê. 35 "Epang pwodho ömakö etic mērē, epwodo, eneko nökênê, ëka ecelo nökênê kî kite. 36 Cê ên dökî ooro etic

nökênê bothgî, na pol na löö mē acêl ökö ëka epang pwodho oterogî na rac calö mē acêl ca. 37 Mē ajiki mērē ên ooro wode bothgî nakun kobo nî, 'Gin bino wörö woda.' 38 "Ëntö í karê n'epang pwodho önenö wod ka won pwodho, cê ötwak í kin-gî kên-gî nî, 'Man ênê ngat na bino leeno jami. Bin unu, eru enek ên ökö ëka eter jami mē alea mērē.' 39 Cê gin ömakö ên, oyuo ginî yökö kî í pwodho ölökö ëka eneko ökö. 40 "Pí manön, ka won pwodho ölökö obino, ên bino timö ngö í kom epang pwodho?" 41 Gin ögamö ninê nî, "Ën bino neko jö nön na kitegi reco ökö ëka bino miö pwodho ölökö mē apanga both epang pwodho nökênê, na bino miö ên nyig ölökö na mēgê í karê mē kac." 42 Cê Yecu okobo nîgî nî, "Un bara ikwanö unu Cöc na Leng: "Kidi n'egedo ökwêrö ênê ödökö kidi mē gwic öt. Man ênê tic ka Rwoth, ëka obedo gin mē aura both onu.' 43 "Pí manön an akobo niwu nî ker k'Obanga ebino kwanyö ökö kî bothwu ëka ëmiö both jö nökênê na bino nyakö nyige n'opore. 44 Ngat na bino podho í kom kidi ni bino tütüra ngidhêrê na thithinö, ëntö ka kidi nön ördhêrê í kom ngat mörö, bino nginginyö ökö." 45 Í karê n'ëlamdhök na dito ëka Eparicayo owinyo ginî carolok ka Yecu ginî, gin öniang nî ên onwongo tye ka twak í komgî. 46 Cê gin öcakö rangö yoo mē makö ên, ëntö gin onwongo lworo lwak piên lwak onwongo ngeo nî Yecu obedo adwarpiny.

22 Yecu ötwak ködgî dökî kî carolok ginî nakun kobo nî: 2 "Ker mē polo eporo kî rwoth n'öyübö karama mē nyom pí wode. 3 Ën ooro etic mērē mē cidhó cwodo jö n'onwongo ecwodogî í karama mē bino, ëntö gin ökwêrö bino ökö. 4 "Cê ên dökî ooro etic nökênê nakun kobo nî, 'Kob both jö n'onwongo ecwodogî nî an dong ayübö cemna ökö: Thwonina ëka dhok n'öcwê enekogî dong ökö, jami kibêc dong tye kakarê. Bin unu í karama mē nyom.' 5 "Ëntö jö n'ecwodogî í nyom ökwêrö ginî winyo köp nön, cê öcidhó ginî ökö—ngat acêl öcidhó í pwodho mērē ëka ngat nökênê öcidhó í cath mērē. 6 Jö nökênê ömakö etic mērē cê opwodogî rwök ëka onekogî ökö. 7 Akëmö ömakö rwoth cê ooro acikari mērē mē neko enek nonu ëka wangö pacógî ökö. 8 "Cê ên okobo both etic mērê nî, 'Karama mē nyom ëyübö dong ökö, ëntö jö n'onwongo an acwodogî ba opore ginî mē bino. 9 Cidh unu í yodhi êk icwod ngat mörö kékên na un ibino nwongo êk obin í karama mē nyom.' 10 Cê etic öcidhó ëka ocwodo ginî jö kibêc na gin onwongo í yodhi, jö na bécö ëka jö na reco cê öt mē nyom opong kî wele. 11 "Ëntö í karê na rwoth obino mē nönö wele, ên önenö dhanö mörö na ba

oruko böngü na bër më nyom kunön. 12 Cë openyo en nî, 'Okona, idonyo kany nîngö na ba iruko böngü na bër më nyom?' Entö en öling alinga. 13 "Cë rwoth okobo both etic mërë nî, 'Twe unu cingë ëka tyënë ëk ibol unu en yökö, i piny na cöl, kanya koko ëka kaö lak bino bedo ië.' 14 "Piën jö n'ecwodogî pol ëntö jö n'ëyerögi nönök." 15 Cë Eparicayo öcîdhö öyübö gîni köp kite na myero ëmak gîni kî Yecu kî köp mörö na yaa kî i dhögë. 16 Gîn ooro ëlûbkörgî ëka jö na cwakö Erode më penyo Yecu nî, "Apwony, wan engeo nî in ikobo köp adyer ëka ipwonyo köp k'Obanga na lûbërë kî köp adyer. In ba iparö dhanö mörö, piën ba inënö dhanö kî yökö. 17 Kob niwa thamani: Pore më cülö ooro both Cija onyo pe?" 18 Entö Yecu ongeio thamagi ökö cë openyogi nî, "Un etwodo, pîngö un itye ka tëmöna? 19 Nyuth unu nîna ciling mörö na nying n'ëcülö pî ooro." Cë gîn okelo nîne denario acël, 20 ëka en openyogi nî, "Cal ëka cöc n'ëcöb ië obedo më ka nga?" 21 Gîn ögamö nî, "Më ka Cija." Cë en okobo nigî nî, "Mîi unu jami ka Cija both Cija ëka jami k'Obanga both Obanga." 22 I karë na gîn owinyo köp ni, obedo gîni kî ur rwök. Cë öwëkö gîni en ëka öcîdhö gîni ökö. 23 I nîno nön kikokome, Ecadukayo na kobo gîni nî cer ka jö n'öthöo ope obino gîni both Yecu ëka openyo gîni en nî, 24 "Apwony, Muca yam okobo niwa nî ka ëcwö mörö öthöo na ba önywölö ëthinö, ömin mërë myero ölak dhakö mërë ëk önywöl ëthinö nakaka ömin mërë n'öthöo. 25 Yam onwongo tye utmego abirö i kinwa kany. Dhanö më acël obino önyömö dhakö ëka öthöo ökö na ba önywölö ëthinö, cë en öwëkö dhakö mërë both ömin mërë. 26 Ömin mërë më arîö nön thon obino öthöo ëka më adek naka otyeko jö abirö nonu kibëc. 27 I ajiki mërë, dhakö thon obino öthöo. 28 Cë dong i karë më cer, dhakö nön bino bedo më ka nga kî kin jö abirö nonu, nakun dhakö nön onwongo obedo mëgi kibëc?" 29 Yecu ögamö nî, "Un irwenyo ökö piën ba ingeo unu Cöc na Leng onyo tékö k'Obanga. 30 I karë më cer, jîi ba bino nyom onyo ënyömögi; ëntö gîn bino bedo calö emalaika na tye i polo. 31 Entö köp i kom cer ka jö n'öthöo—un i'kwanö ngö n'Obanga okobo niwu nî, 32 'An abedo Obanga k'Abraam, Obanga ka Icaka ëka Obanga ka Jakob' En ba obedo Obanga ka jö n'öthöo ëntö Obanga ka jö na kwö." 33 I karë na lwak owinyo köp ni, obedo gîni kî ur rwök i kom pwony mërë. 34 I karë n'Eparicayo owinyo nî Yecu otweo dhö Ecadukayo ökö, gîn öcakö cökërë kanya acël. 35 Ngat acël kî i kin-gî na ngeo cîk rwök ötëmö en kî peny ni: 36 "Apwony, cîk mëne ënë dit na löö kî i cîk?" 37 Yecu ögamö nî: "Mar Rwoth Obangani kî cwinyi kibëc, ëka kî tiponi kibëc, ëka kî thamani

kibëc.' 38 Man ënë cîk më acël ëka cîk na dit na löö kibëc. 39 Eka cîk më arîö cal ködë: 'Mar awodhi na calö imarö komi keni.' 40 Cîk kibëc ëka pwony k'Edwarpiny ocung gîni i kom cîk arîö ni." 41 I karë n'Eparicayo öcökërë gîni kanya acël, Yecu openyogi nî, 42 "Ngö na un i'ithamö i kom Meciya? En obedo wod ka nga?" Gîn ögamö nî, "Wod ka Daudi." 43 En okobo nigî nî, "Pîngö Tipo Naleng ömîö Daudi ocwodo en nî 'Rwoth'? Piën okobo nî, 44 "Rwoth okobo both Rwodha nî, "Bed i nget cînga më kucem naka ka an aketho langni i thë tyeni." 45 Ka Daudi cwodo en nî 'Rwoth,' en twërö bedo wode nîngö?" 46 Ngat mörö ope n'onwongo twërö gamö köp mërë, ëka cakërë i nîno nön ngat mörö ope dökî n'öthamö më penyo en peny mörö gîni.

23 Cë Yecu okobo both lwak ëka ëlûbkörë nî: 2 "Epwony cîk ëka Eparicayo ënë ëmiögi twërö më gönyö cîk ka Muca. 3 Cë myero i'wör unugi ëka i'tim unu gin na kibëc na gîn kobo niwu. Entö kür i'tim unu ngö na gîn timö, piën gîn ba timö ngö na gîn pwonyo. 4 Gîn tweo yëc na pëk ëka ketho i wi ba jîi, ëntö gîn kikomgi ba twërö könyö më cwarö kî nya cîng-gî. 5 "Gin na kibëc na gîn timö, ëtimö ëk jîi önën: Gîn ketho i ngut cîng-gî ëka i terinyimgi tyeng më Cöc na Leng, ëka thöl tacël na boco i böng-gî; 6 gîn marö bedo i kabedo më wörö i karama më cem ëka i thene na pîrgî ték i cinagoga gîni; 7 gîn marö nî ëk emothgi kî i kabedo më cuk gîni ëka mitö nî ëk ecwodgi nî, 'Apwony.' 8 "Entö un myero kür ecwodwu nî, 'apwony,' piën itye unu k'Apwony acël këkën ëka un kibëc ibedo unu utmego. 9 Eka kür icwod unu ngat mörö kî i wi lobo kany nî, 'apap,' piën itye unu k'Apap acël këkën na tye i polo. 10 Onyo kür ecwodwu nî, 'apwony,' piën itye unu k'Apwony acël këkën na ënë Meciya. 11 Ngat na dit na löö kî kinwu bino bedo aticwu. 12 Piën ngat na tingere malö këne ebino dwökö pîny, ëka ngat na mwolere këne ebino tingo malö. 13 "Ibino nënö unu can, un epwony cîk ëka Eparicayo, un etwodo! Un icego dholokek më ker më polo ökö nî jîi. Un kikomwu ba i'dönyö unu, ëka dök thon i'jükö unu jîi na mitö dönyö ië ökö. 14 (Ibino nënö unu can un epwony cîk ëka Eparicayo, un etwodo! Piën imaö unu udi ka mon na cwögi öthöo, ëka ilëgö unu lëga na boco më nyuthere both Obanga. Pî manön köp n'ebino ngölö i wiwu bino bedo na thwönë rwök.) 15 "Ibino nënö unu can, un epwony cîk ëka Eparicayo, un etwodo! Piën iwotho unu i wi lobo ëka i wi nam pî lökö dhanö acël më dwongo bothwu, ëntö ka dong ölökerë, imîö unu en dökö dhanö na rac rwök, na cîdhö yo kapîny na bal

mërë löö mewu wang kīrīō. (Geenna g1067) 16 "Ibino nēnō unu can, un jō na pēō ēthōō wang! Un ikobo nī, 'Ka ngat mōrō okwongo kwong kī ōt k'Obanga, kwong mērë ba makō ēn; ēntō ka ngat mōrō okwongo kwong kī gol mē ōt k'Obanga, kwong mērë makō ēn.' 17 Un ēthōō wang na mīng! Mēnē ēnē dit na löō: gol onyo Ōt k'Obanga na mīō gol dōkō na leng? 18 Un thon ikobo nī, 'Ka ngat mōrō okwongo kwong kī keno tyēr, kwong mērë ba makō ēn; ēntō ka ngat mōrō okwongo kwong kī mīc na tye ī wi keno tyēr, kwong mērë makō ēn.' 19 Un ēthōō wang! Mēnē ēnē dit na löō: mīc, onyo keno tyēr na mīō mīc dōkō na leng? 20 Pī manōn, ngat na kwongo kwong kī keno tyēr, kwongo kī keno tyēr ēka kī jami kībēc na tye iē. 21 Ēka ngat na kwongo kwong kī ōt k'Obanga, kwongo kī ōt k'Obanga ēka kī ngat na bedo iē. 22 Ngat na kwongo kwong kī polo kwongo kī then ker k'Obanga ēka kī ngat na bedo iē. 23 "Ibino nēnō unu can, un epwony cik ēka Eparicayo, un etwodo! Un īmīō acēl mē apar mē gin na mīō cem bedo na mīt, ēntō kōp na pīrgī tēk rwōk mē cik īwēkō unu ōkō—ngōlō-kōp atīr, tīmō kica, ēka bedo kī gen. Onwongo myero ītīm unu jami nī kībēc nakun ba īwēkō unu nōkēnē ca. 24 Un jō na pēō ēthōō wang! Īlīō unu lwangi ōkō kī gin na un īmadhō ēntō īmwōnyō unu kīnaga. 25 "Ibino nēnō unu can, un epwony cik ēka Eparicayo, un etwodo! Īlwōkō unu nge ekopo ēka nge bakuli mē bedo na leng ēntō īgī opong kī tīm mē woro ēka kī miti mōkō na ba twērō jūkērē. 26 In Aparicayo na wangi ōthōō! Kono īlwōk īī ekopo ēka īī bakuli obed na leng, cē nge thon bino bedo na leng. 27 "Ibino nēnō unu can, un epwony cik ēka Eparicayo, un etwodo! Un īcal kī bur lyene n'epuo na tar, na nen na leng kī yōkō ēntō iē opong kī cogo ka jō n'ōthōō gīnī ēka kī gin na kībēc na ba leng. 28 Un thon itye nī kōmanōn, inen unu kī yōkō both jīī na calō jō na kītegī atīr ēntō īwu opong kī twodo ēka kī tīm na reco. 29 "Ibino nēnō unu can, un epwony cik ēka Eparicayo, un etwodo! Īyūbō unu bur lyene k'edwarpīny ēka idheo unu lyene ka jō na kītegī atīr. 30 Ēka ikobo unu nī, 'Ka onwongo yam wan etye ī karē ka kwerewa, kono wan ba ērībērē kōdgī ī ōnyō remo k'edwarpīny.' 31 Cē un īmīō caden ī komwu kenwu nī un ibedo ēkwaē ka jō na yam oneko edwarpīny. 32 Mēdērē unu anyīm ēk icob unu bal na yam kwerewu ōcakō! 33 "Un thwone! Un ēthīn ororo! Un ibino bwōth nīngō kī ngōlō-kōp mē mac kapīny? (Geenna g1067) 34 Pī manōn an atye ka oro niwu edwarpīny, jō na ryēk ēka epwony cik. Jō mōkō kī kin-gī un ibino neko ēka iguro unu; jō nōkēnē un ibino pwodo kī del ī cinagogawu gīnī ēka īryēmō unugī ōkō kī ī taun mōrō kēkēn. 35 Pī manōn,

remo kībēc n'ope kī bal n'ōnyō ī wi lobo obed ī wiwu, cakērē kī ī remo k'Abel na bal mērë ope thuno kōdē naka ī remo ka Jakaria wod ka Barakia, na un ineko ī kin ōt k'Obanga ēka keno tyēr. 36 An akobo niwu kōp adyer, kōp nī kībēc bino bino ī kom rok mē karē nī. 37 "Jerusalem, Jerusalem, un ineko edwarpīny ēka icelo unu jō n'eoro bothwu kī kite, wang adi na an abedo ka mītō cōkō ēthīnōnī kanya acēl calō mīn gwēnō na gūrō ēthīnē ī thē bwome, ēntō in īkwērō ōkō. 38 Nēn, odi dong ēwēkō nīnī, odong nono. 39 Pīēn an akobo niwu nī ba dōkī ibino nēnōna unu, naka ka ibino unu kobo nī, 'Gum obed ī kom ngat na bino kī nyīng Rwoth.'"

24 Yecu ōya kī ī ōt k'Obanga. Na ēn tye ka woth, ēlūbkōrē obino bothe cē gīn onyutho nīnē gedo mē ōt k'Obanga. 2 Ēn openyogī nī, "Īnēnō unu jami nī kībēc? An akobo niwu kōp adyer nī ba ebino wēkō kīdī mōrō acēl dong n'ododere ī wi awodhe na ba ebino thwaro ōkō pīny." 3 Ī karē na Yecu obedo pīny ī wi Kīdī mē Jeitunī, ēlūbkōrē obino bothe ī mūng cē okobo gīnī nī, "Kob nīwa, man bino tīmērē awene, ēka ngō na bino nyutho dwogoni ēka ajikī pīny?" (aiōn g165) 4 Yecu ōgamō nī: "Gwōkērē unu ēk ngat mōrō kūr ōbwōlwu. 5 Pīēn jō na pol bino bino gīnī kī nyīnga na bino gīnī kobo nī, 'An ēnē Meciya,' ēka bino bwōlō jō na pol. 6 Un ibino winyo kōp ī kom lwēny ēka anīī mē lwēny, ēntō kūr ibed unu kī lworo. Pīēn manōn myero ōtīmērē, ēntō ajikī nwongo podī. 7 Rok bino lwēny ī kom rok nōkēnē, ēka ker bino lwēny ī kom ker nōkēnē. Kec ēka oyeyeng bino bedo ī kabedo na papath. 8 Man kībēc nwongo pod obedo calō acakī rem mē nywōl. 9 "Ī karē nōn ebino makōwu, eketho ayela ī komwu ēka ebino nekowu. Rok kībēc bino dagōwu pīra. 10 Cē ī karē nōn, jō na pol bino lōkērē gīnī ōkō kī kom yee, bino ketho gīnī ōrōrō ēka adagē ī kin-gī kēn-gī. 11 Edwarpīny na twot bino bino na pol ēka bino bwōlō gīnī jō na pol. 12 Tīm na reco bino mēdērē, ēka mar ka jō na pol bino kwe ōkō, 13 ēntō ngat na bino cung na tēk naka ī ajikī bino larē. 14 Ēka kōp mē Emuth na Bēr mē ker k'Obanga ebino tītō ī wi lobo kībēc mē bedo na calō caden both rok kībēc, cē ajikī pīny dong bino. 15 "Un ibino nēnō 'gin mōrō mē kwer na kelo lworo' na yam adwarpīny Daniel okobo. Gin nōn bino cung ī kabedo na leng. (Ēk ngat na kwanō ōnīang iē.) 16 Cē jō na tye ī Yudea myero ōrīng gīnī ōkō ī wi kite. 17 Dhanō na tye ī wi ōdē kūr oidhī pīny mē kwanyō gin mōrō kī ī ōt. 18 Dhanō na tye ī pwodho kūr ōdōk cen mē ōmō bōngū mērē. 19 Mon na yeco ēka mon na dōdhō ēthīnō bino nēnō can ī karē nonu! 20 Lēg unu both Obanga ēk ngwēcwu

kür ötimërë i karë më cwir onyo i ceng Cabit. 21 Piën karë nonu bino bedo karë më can na dwong na anaka yam bara onen i acaki më cweno lobo naka tin ëka ba dökü bino nen. 22 Ka ninö nonu onwongo ba ëjüko na cek, ngat mörö onwongo ope na bwöth. Ëntö pi jö n'ëyërogü ninö nonu ebino jükö na cek. 23 I karë non ka dhanö mörö okobo niwu ni, 'Nën, Meciya ene,' onyo ni, 'Ën ëca,' kür iyee unu. 24 Piën jö na kobo ni gin ebodo Kiricito ëka edwarpiny na twot bino bino ëka bino tio ginü anyuth ëka tango na dito ëk ka twërë ëbwöl ginü naka jö n'ëyërogü. 25 Winy unu, an atyeko dong kobo ökö niwu na karë bara örömö. 26 "Dong ka ngat mörö okobo niwu ni, 'Ën ëca tye i thim,' kür icidh unu, onyo ni, 'Ën tye kany, i öt i thë tyëlö,' kür iyee unu. 27 Piën kite na lüth köth yaa ki kukidë wil dök yo kuthö, bino ka Wod ka Dhanö thon bino bedo ni kömanön. 28 Kanya lyene tye ië, acuth bino cökëre ginü kunön. 29 "Cücüth kinge can na dwong më ninö nonu "ceng bino cido, ëka dwe ba bino miö tara mërë; cër bino podho ki i polo yo piny ëka twër kibëc më polo bino yengere ginü." 30 "I karë non anyuth ka Wod ka Dhanö bino nen i polo, ëka rok kibëc më wi lobo bino ginü kumo. Gin bino nönö Wod ka Dhanö na tye ka bino k'edou më pöl ki tükö ëka dheo na dit. 31 Ën bino oro emalaika mërë ki cwodo më buruji na longo, ëka gin bino cökö jögë n'ëyërogü ki i wi lobo thükül, ki i ajiki polo kucël naka yo ajiki polo tung ca. 32 "Nwong unu pwony ni ki i kom yath ölam: Ka jangë öcakö löth ëka pote odonyo, un ingeo ni oro dong cwök. 33 Kömanön thon ka inënö unu jami ni kibëc, nge unu ni karë dong cwök, tye i dholokek. 34 An akobo niwu köp adyer, rok më karë ni ba bino poth naka ka jami ni kibëc ötimërë. 35 Polo ëka lobo bino bino thum ökö, ëntö köpna ba bino thum. 36 "Ngat mörö ope na ngeo ninö non onyo caa, kadü thon emalaika na tye i polo, onyo Wod, ëntö Apap këkën ënë ngeo. 37 Bino ka Wod ka Dhanö bino bedo calö karë ka Noa. 38 I karë nonu n'onwongo abwal pii bara opong i wi lobo, jii onwongo cemo ëka medho ginü, awope nyomo ëka anyira ënyömögü, naka othuno i ninö na Noa ödönyö i yeya. 39 Gin ba ongeo gin mörö na bino timërë naka abwal pii obino ömöl ködgü ökö kibëc. Bino bedo ni kömanön ka Wod ka Dhanö bino dwogo. 40 I karë non jö ariö bino bedo i pwodho; ebino kwanyö ngat acël ökö cë ngat acël bino dong. 41 Mon ariö bino bedo i rego ki pong rego; ebino kwanyö ngat acël ökö cë ngat acël bino dong. 42 "Pi manön bed unu na wangwu thwolo, piën ba ingeo unu ninö mënë na Rwothwu bino dwogo ködë. 43 Ëntö myero iniang unu köp ni: Ka won öt onwongo ongeo caa na kwo bino bino ië, ën onwongo bedo na

wangë thwolo ëka ba miö ëtürö ödë. 44 Pi manön, un thon myero iyübërë, piën Wod ka Dhanö bino bino i caa na un ba ingeo. 45 "Cë nga dong n'obedo atic na genere ëka na ryëk, n'adwong mërë oketho ën më löönö etic na tye i ödë më miögü cemgi i caa n'opore? 46 Bino bedo na bër both atic nön ka adwong mërë odwogo cë onwongo ën tye ka timö ni kömanön. 47 An akobo niwu köp adyer, ën bino ketho ën më löönö jami mërë kibëc. 48 Ëntö ka atic na rac nön okobo ki i cwinye kënë ni, 'Adwongna bino bedo yökö pi karë na lac,' 49 ëka ën cakö pwodo etic ewodhe, cemo ëka medho ki jö na mër. 50 Adwong k'atic nön bino dwogo i ninö ëka i caa na ën ba ngeo. 51 Cë ën bino pwodo ën rwök ëka ketho ën i kabedo kanya acël k'etwodo, kanya koko ëka kaö lak bino bedo tye ië.

25 "I karë non ker më polo bino bedo calö anyira apar n'obino öcidhö ginü ki taragi më romo k'anom. 2 Jö abic ki kin-gi onwongo ming ëka jö abic onwongo ryëk. 3 Anyira abic na ming otero taragi na ba ömakö ginü möö nökökë. 4 Ëntö anyira na ryëk otero ginü möö i cupagi kanya acël ki taragi. 5 I karë n'anyom pod ögalërë, gin kibëc ninö öcakö makö wang-gi, cë öninö ginü ökö. 6 "I karë na dong othuno dingwor, wöö öcakö winyere rwök: 'Winy unu, anyom othuno ökö! Donyi unu yökö më romo ködë! 7 "Cë anyira apar kibëc ocoo ginü cücüth, ëka öyübö ginü taragi. 8 Anyira na ming okobo ginü both anyira na ryëk ni, 'Miüwa unu mööwu mörö, piën mac tarawa mitö thoö ökö.' 9 "Ëntö anyira na ryëk ögamö ginü ni, 'Möo ope na römö onu kibëc. Apë unu both jö na cadhö möö ëk iwül unu mewu.' 10 "I karë n'anyira na ming öcidhö ginü më wilö möö, cücüth anyom othuno. Anyira n'onwongo öyübërë ödönyö ginü kanya acël ködë i öt karama më nyom. Cë dholokek eloro ökö. 11 "Kinge anyira nökökë ca obino ginü nakun bakö dhögi ni, 'Adwong, adwong, yab niwa dholokek!' 12 "Ëntö anyom ögamö ni, 'An akobo niwu köp adyer ni an ba angeowu.'" 13 Cë Yecu ojiko köp mërë nakun kobo ni, 'Bed unu na wangwu thwolo, piën ba ingeo unu ninö onyo caa." 14 "Ker më polo thon cal ki dhanö mörö na tye ka cidhö i woth kanya bor. Ën ocwodo etic mërë kibëc, cë ömiö jami mërë bothgi ëk ögwök ginü. 15 Ën ömiö both atic mërë acël ciling elip abic na nyige, both dhanö nökökë ömiö ciling elip ariö na nyige, ëka both ngat nökökë ömiö ciling elip acël na nyige, ömiö both dhanö acëlacël na lübërë ki kite na ën twërö tic ködë. Cë öya öcidhö i woth mërë. 16 Dhanö n'onwongo ciling elip abic na nyige öcakö tic ködë ökö piöpiö i cadhö wil mërë, ëka onwongo magoba më ciling elip abic na nyige nökökë. 17

Atic n'onwongo tye kī cīlīng elip ariō na nyige ōtīmō nī kōmanōn thon, cē onwongo magoba mē cīlīng elip ariō na nyige nōkēnē. 18 Ēntō dhanō n'obino ōgamō cīlīng elip acēl na nyige ōcidhō ōkūnyō bur ī ngōm, cē ōkanō cīlīng k'adwong mērē ōkō iē. 19 "Kinge karē na lac, adwong k'etic nonu odwogo, ēka ōcakō kwanō līm kanya acēl kōdgi. 20 Dhanō n'obino ōgamō cīlīng elip abic na nyige obino okelo cīlīng elip abic na nyige nōkēnē. Ēn okobo nī, 'Adwong, in ibino īmīa cīlīng elip abic na nyige. An anwongo cīlīng elip abic na nyige nōkēnē.' 21 "Adwong mērē ōgamō nī, 'In ītīmō na bēr rwōk, in ibedo atic na bēr ēka atic na genere! In ibedo kī gen ī kom jami na nōnōk; an abino kethoni mē lōōnō jami na pol. Bin dong ēk īnywak yom cwiny k'adwongni!' 22 "Cē atic n'onwongo ōgamō cīlīng elip ariō na nyige thon obino. Ēn okobo nī, 'Adwong, in onwongo īmīa cīlīng elip ariō na nyige; nēn, an anwongo cīlīng elip ariō na nyige nōkēnē.' 23 "Adwong mērē ōgamō nī, 'In ītīmō na bēr rwōk, in ibedo atic na bēr ēka atic na genere! In ibedo kī gen ī kom jami na nōnōk; an abino kethoni mē lōōnō jami na pol. Bin dong ēk īnywak yom cwiny k'adwongni!' 24 "Cē atic n'onwongo ōgamō cīlīng elip acēl na nyige thon obino. Ēn okobo nī, 'Adwong, an onwongo angeo nī in ibedo dhanō na kite mērē tēk. Īkaō kī kanya ba īcwō kodhi iē, ēka īcōkō thon kī kanya ba ipuro. 25 Cē ōmīō abedo kī lworo ēka an acidhō akanō cīlīngni ōkō pīny ī ngōm. Gam cīlīngni ene.' 26 "Adwong mērē ōgamō nī, 'In ibedo atic na rac ēka atic na car! In onwongo ingeo nī an akaō kī kanya ba acwō kodhi iē, ēka acōkō thon kī kanya ba apuro? 27 Cē onwongo myero iter cīlīngna both jō mē beng, ēk ka an adwogo, an onwongo atwērō gamō cīlīngna kī magoba iē. 28 "Pī manōn kwany unu cīlīng elip acēl na nyige ōkō kī bothe, ēk īmīi unu both dhanō na tye kī cīlīng elip apar na nyige. 29 Pīen ngat na tye kī gin mōrō, ebino mēdō bothe, ēka bino bedo kōdē na būp. Ngat n'ope kī gin mōrō, naka gin na ēn tye kōdē ebino kwanyō ōkō kī bothe. 30 Yuu unu atic na kōny mērē ope ī cōl pīny, kanya koko ēka kaō lak bino bedo iē.' 31 "I karē na Wod ka Dhanō bino dwogo kī dheo mērē, ēka k'emalaika kibēc kōdē, cē ēn bino bedo ī then ker mērē mē dheo. 32 Rok kibēc bino cōkērē ī nyime, ēka ēn bino poko jīi ī gurup ariō, kite n'akwath poko kī rom kī ī kom dyegi. 33 Ēn bino ketho rom ī cīngē kucem, ēka dyegi ī cīngē kucam. 34 "Cē Rwoth bino kobo both jō na tye ī cīngē kucem nī, 'Bin unu, un jō n'Apapna ōmīōwu gum; lee unu ker n'ēyūbō pīrwu anaka ī acaki cweo lobo. 35 Pīen kec onwongo oneka ēka īmīa unu cem, ōrīō onwongo oneka ēka īmīa unu pii amodho, an onwongo abedo

welo ēka ījōla unu, 36 an onwongo awotho kotula ēka īmīa unu bōngū aruko, an onwongo atwo, cē īgwōka unu, ēka ī karē na an atye ī buc, un ibino mē līmōna.' 37 "Cē jō na kītegi atīr bino gamō nīnē nī, 'Rwoth, wan eneni awene na kec oneki cē wan emii cem, onyo n'ōrīō oneki cē wan emii pii? 38 Wan eneni awene na in ibedo welo cē wan ejoli, onyo na in iwotho kotula cē wan emii bōngū mē aruka? 39 Awene na wan eneni na in itwo onyo na in itye ī buc cē wan elimi?' 40 "Rwoth bino gamō nī, 'An akobo niwu kōp adyer nī gin na un ītīmō both dhanō acēl ī kin utmegona nī, manōn ītīmō unu botha.' 41 "Cē ēn bino kobo both jō na tye gīnī ī cīngē kucam nī, 'Un jō n'ēcēnō, yaa unu ōkō kī nyima, īdōny unu ī mac na ba thoō n'ēyūbō pī Catan k'emalaika mērē. (aiōnios g166) 42 Pīen kec onwongo oneka ēntō ba īmīa unu cem mē acama, ōrīō pii oneka ēntō ba īmīa unu pii mē amodha, 43 an onwongo abedo welo ēntō ba ījōla unu, an onwongo awotho kotula ēntō ba īmīa unu bōngū mē aruka, an onwongo atwo ēka atye ī buc ēntō un ba ibino mē gwōkōna.' 44 "Gin thon bino gamō nī, 'Rwoth, wan eneni awene na kec oneki, onyo n'ōrīō pii oneki, onyo na in ibedo welo, onyo na in iwotho kotula, onyo na in itwo, onyo na in itye ī buc, cē wan ba ekonyi?' 45 "Cē Rwoth bino gamō nigī nī, 'An akobo niwu kōp adyer nī gin mōrō kēkēn na un ba ītīmō both dhanō mōrō acēl na ītītī ī kin jō nī, nwongo ba ītīmō unu botha.' 46 "Cē gin bino cidhō ī can na ba thum, ēntō jō na kītegi atīr bino cidhō gīnī ī kwō na ba thum." (aiōnios g166)

26 I karē na Yecu otyeko twakō kōp nī gīnī kibēc, ēn okobo both ēlūbōkōrē nī, 2 "Un ingeo nī odong ninō ariō mē thūnō ī ninō mē Poth, ēka Wod ka Dhanō ebino mīō ōkō mē agura ī kor yath ariā." 3 Cē ēlamdhōk na dito ēka edite ka lwak ōcōkērē gīnī kanya acēl ī pacō k'Alamdhōk na Dit, na nyingē Kayapa. 4 Gin ōyūbō mē makō Yecu ī mūng ēk enek ēn ōkō. 5 Ēntō gin okobo nī, "Pathī ī ninō mē karama, ēk arubaruba kūr obed ī kin jīi." 6 I karē na Yecu tye ī Betania ī ōt ka Cimon na yam obedo adhōbū, 7 na Yecu onwongo tye ka cem, dhakō mōrō obino bothe n'ōmakō cupa mē mōō na ngwece kur na wel mērē tēk, cē ōnyō ī wie. 8 I karē n'ēlūbōkōrē ōnēnō, gin ōngōō ēka okobo nī, "Pīngō ēbalō mōō nī abala nī kōman? 9 Mōō na kur nī onwongo myero ēcadh acadha ī wel na thwōnē ēk cīlīng mērē ēmīi both ēcan." 10 Ēntō Yecu ongeō kōp nī, cē okobo bothgi nī, "Iyelo unu dhakō nī pīngō? Ēn ōtīmō gin na bēr rwōk ī koma. 11 Pīen un itye kanya acēl k'ēcan karē kibēc, ēntō ba ibino unu bedo kanya acēl kōda karē kibēc.

12 Í karê na dhakô ni ñnyô möö í koma, ên ôtimô mē yûbô koma mē aika. 13 An akobo niwu kôp adyer ni kanya kibêc n'ebino títô kôp mē Emuth na Bêr iê í wi lobo thûkûl, gin na dhakô ni ôtimô thon ebino kobo pirê, êk obed mē po pí ên." 14 Í karê nôn Yuda Ikariot, na ên dhanô acêl í kin êkwêna apar ariô, ôcidhó both êlamdhók na dito, 15 cê openyogí ní, "Un ibino miôna ngô ka an amiô ên í cingwu?" Cê gin ôkwanô ciling pyer adek na nyige êka ômiô giní bothe. 16 Cakêrê í caa nôn cidhó kódê anyim Yuda ôcakô rangô karê na bêr na ên êrômô miô kí Yecu í cing-gí. 17 Í ninô mē acêl mē Karama mē Ogati na Thôbí ope iê, êlûbkôr Yecu obino bothe cê openyo giní ên ní, "In imitô ni wan êyûb nini kabedo kwene êk ícam cem mē Poth iê?" 18 Yecu ôgamô ní, "Cidh unu í taun both dhanô mörô êka ikob unu ninê ní, 'Apwony okobo ní: Karêna dong cwök. An abino kwero ninô mē Poth í odi kanya acêl k'êlûbkôra.'" 19 Cê êlûbkôr Yecu ôtimô kite na ên ôcikôgí kódê, êka ôyûbô giní cem mē Poth kunôn. 20 Í karê na piny dong oyutho, Yecu onwongo obedo piny í dhô cem kanya acêl k'êlûbkôrê apar wie ariô. 21 Í karê na gin tye ka cem, Yecu okobo bothgí ní, "An akobo niwu kôp adyer, ngat acêl kí kinwu bino ketho örörô í koma." 22 Cê êlûbkôrê ôcakô kumo, nakun penyere giní kên-gí ní, "Rwoth, an?" 23 Yecu ôgamô ní, "Dhanô na bino ketho örörô í koma ênê ngat n'olutho ogati mërê í ôd bakuli kôda. 24 Wod ka Dhanô bino thôô kite na calô êcôô kí kôp í kome. Êntô dhanô n'oketho örörô í kom Wod ka Dhanô bino nêñô can! Onwongo twêrô bedo na bêr ka dhanô nôn onwongo ba ênywôlô." 25 Cê Yuda, ngat n'oketho örörô í kom Yecu, okobo ní, "Apwony, adyer pathi an?" Yecu ôgamô ní, "Eyo, in ênôn." 26 Í karê na gin tye ka cem, Yecu ôkwanyô ogati, cê ôlêgô gum í kome, êka ôbarô iê, cê ômiô both êlûbkôrê, nakun kobo ní, "Gam êka ícam unu; man ênê koma." 27 Cê ôkwanyô okopo, ôpwôyô Obanga êka ômiô bothgí, nakun kobo ní, "Madh unu man, un kibêc. 28 Man ênê remona mē cikêrê, n'êönyô pí jô na pol mē tímô kica í kom bal. 29 An akobo niwu ní cakêrê tin, an ba abino madhó nyig pig ôlök ní, naka í ninô nôn ka an abino madhó kodwu í ker k'Apapna." 30 Í karê na gin otyeko wero wer mē lêga, ôya ôcidhó giní í wi Kidi mē Jeituni. 31 Cê Yecu okobo nigí ní, "Í kiwor na tin, un kibêc ibino unu wêkôna, piên êcô ní: "An abino gônô akwath, cê rom bino kêth giní ôkô ata.' 32 Êntô kinge ka an acer ôkô, an abino cidhó anyim niwu yo Gallaya." 33 Petero ôgamô ní, "Kadi jô kibêc bino wêkôni, an ba abino wêkôni." 34 Yecu okobo ninê ní, "An akobo nini kôp adyer ní í kiwor na tin ní, na thwôn gwênô bara okok, in ibino kwêrona

wang adek." 35 Êntô Petero ôgamô ní, "Kadi bed ní myero athôô kanya acêl kodi, an ba abino kwêroni." Cê êlûbkôrê nôkênê kibêc okobo giní ní kômanôn. 36 Cê Yecu ôcidhó k'êlûbkôrê í kabedo mörô na nyingê Gethcemane. Í karê na gin othuno kunôn, ên okobo both êlûbkôrê ní, "Bed unu kany, êk an kono acidh í lêga yo kuca." 37 Cê ên ôkwanyô Petero k'awope ariô ka Jebedayo mē woth kódê, êka cwinye ôcakô podho rwök kí thwôn kumo na dit. 38 Cê Yecu okobo bothgí ní, "Cwinya tye ka cwer rwök, mitô nekona ôkô. Bed unu kany êk ibed unu na wangwu thwolo kôda." 39 Yecu ôcidhó anyim na nônök, cê opodho piny, okulo wie êka ôlêgô ní, "Apapna, ka twêrê, kwany okopo ni ôkô kí koma, êntô kûr obed kite na calô an amitô, êntô obed gin na in imitô ní myero ôtimêrê." 40 Cê ên odwogo both êlûbkôrê êka onwongogí ôninô ôkô. Ên okobo both Petero ní, "Un ba ítwêrô bedo na wangwu thwolo pí caa acêl kôda? 41 Bed na wangwu thwolo êka ílêg unu, êk kûr ídôny unu í atêmatêma. Cwiny mitô, êntô kom görü." 42 Ên dôkí ôdök wang mē ariô êka ôlêgô ní, "Apapna, ka okopo ni ba twêrô kwanyêrê ôkô naka ka an amadhô, êk dong gin na in imitô ôtimêrê." 43 Í karê na ên odwogo, ên dôkí onwongo êlûbkôrê tye ka ninô, piên ninô onwongo ômakô wang-gí rwök. 44 Cê Yecu ôwêkôgí dôkí êka ôcidhó ôlêgô wang mē adek, nakun nwô kôp acêl nôn. 45 Cê ên odwogo both êlûbkôrê êka openyogí ní, "Un pod íninô êka itye ka yweo unu? Nên unu, caa onyingo na cwök, êka Wod ka Dhanô ebino miô ôkô í cing ébal. 46 Yaa unu malô! Eru ecidhu! Nên, dhanô na bino ketho örörô í koma dong cwök!" 47 Í karê na Yecu pod tye ka twak, Yuda n'obedo ngat acêl í kin êkwêna apar wie ariô othuno. Ên obino kí lwak na pol n'ômakô giní pele abadê êka ludhi. Êlamdhók na dito êka edite ka lwak ênê oorogí. 48 Won örörô onwongo otyeko dong yûbô anyuth kôdgí ní: "Ngat na an abino nôdhô leme, ên ênôn, mak unu ên." 49 Cúcûth Yuda obino both Yecu êka okobo ní, "Apwony, itye!" Cê ônôdhô leme. 50 Yecu okobo both Yuda ní, "Okona, tím gin na in ibino mē tímô." Cê gin obino opodho í kom Yecu, êka ômakô giní ên ôkô. 51 Êntô ngat acêl n'onwongo tye giní kí Yecu kanya acêl ôryêô cingê cê ôwôdhô pala abadê mërê, onguno kí ith atic k'Alamdhök na Dit. 52 Cê Yecu okobo bothe ní, "Dwök pala abadêni í kabedo mërê, piên jô kibêc na makô giní pala abadê, bino thôô giní kí pala abadê. 53 Un íthamô ní an ba atwêrô lêgô Apapna êk oor nina emalaika na lôô dul mwony apar wie ariô ôkô í caa ní? 54 Êntô Cóc na Leng na kobo ní myero ôtimêrê ní kôman bino cobere nîngô?" 55 Í caa nôn Yecu okobo both lwak ní, "Un ibino botha kí pala abadê êka ludhi

mê makôna, na calô ibino unu i kom ayak? Ninô kibêc an abedo i dyekal ô t'Obanga mê pwony, êka un ba imaka unu. 56 Êntô man kibêc ôtimêrê êk kôp n'edwarpiny ôcôô ocobere." Cê êlûbkôrê kibêc ôringô ôwêkô gîni ên ôkô. 57 Jô n'onwongo ômakô gîni Yecu otero ên yo both Kayapa, Alamdhôk na Dit, kanya onwongo epwony cîk êka edite ôcôkêrê gîni iê. 58 Êntô Petero obedo ka lûbô kôr Yecu kî cecen, naka othuno i dyekal k'Alamdhôk na Dit. Kinge na Petero ôdônyô i dyekal, ên obedo pîny kanya acêl k'êkûrpîny mê nêñô gin na bino tîmêrê. 59 Êlamdhôk na dito êka athuko mê ôd okiko k'edong kibêc onwongo tye gîni ka rangô caden mê twodo i kom Yecu êk enek gîni ên ôkô. 60 Êntô gin ba onwongo kôp môrô, kadî bed ecaden mê twodo na pol obino anyim. Mê ajiki mêrê jô arîô obino gîni anyim, 61 êka okobo gîni nî, "Dhanô ni okobo nî, 'An atwêrô muko ô t'Obanga êka agêrô ôkô i ninô adek.'" 62 Cê Alamdhôk na Dit ôya malô êka okobo both Yecu nî, "In ba itwêrô gamô kôp môrô? Kit caden mênê ene na jô ni okelo k'adoth kôdê i komi?" 63 Êntô Yecu ôling alînga. Alamdhôk na Dit okobo ninê nî, "An amîtô ikwong kwong kî nyîng Obanga na kwô: Kob niwa ka in ênê Meciya, Wod k'Obanga." 64 Yecu ôgamô ninê nî, "Eyo, kite na in ikobo kôdê. Êntô an akobo niwu nî cakêrê kobedini un ibino nêñô Wod ka Dhanô n'obedo i nget cîng mê kucem ka Won Twêr êka na tye ka bino kî pôl gîni mê polo." 65 Cê Alamdhôk na Dit ôyêcô bông mêrê êka okobo nî, "Ên ôtwakô kôp mê yanyô Obanga! Pîngô onu dôkî êmîtô caden nôkêñê? Kobedini un iwinyo aenyi na ên ôyanyô k'Obanga. 66 Ngô na un ithamô?" Gin ôgamô nî, "Bal mêrê rômô ninê thôô." 67 Cê gin ôngûlô laô dhôgi i wangê êka êgôô ên. Jô môkô odhongo ên 68 nakun kobo gîni nî, "In ibedo Meciya. Tuc niwa nga n'ogoi?" 69 Petero onwongo tye yôkô, obedo pîny i dyekal. Cê atic na nyakô obino bothe êka okobo ninê nî, "In thon onwongo itye kanya acêl kî Yecu mê Galilaya." 70 Êntô Petero ôkwêrô ôkô i nyim jô kibêc. Ên okobo nî, "An ba angeo gin na in itye ka twakô." 71 Cê Petero ôcidhô yôkô i dhô wangkac, atic na nyakô nôkêñê dôkî ôñêñô ên, cê okobo both jô n'onwongo tye gîni kunôn nî, "Dhanô ni onwongo tye kanya acêl kî Yecu mê Najaret." 72 Petero dôkî ôkwêrô ôkô, nakun kwongere nî: "An ba angeo êcwô nôñ!" 73 Kinge caa na nôñôk, jô n'onwongo ocung gîni kany nôñ obino gîni both Petero êka okobo nî, "Adyer, in ibedo ngat acêl i kin-gî, piên kite na in itwak kôdê nyutho ôkô." 74 Cê i caa nôñ, Petero ôcakô kwongere nakun kobo nî, "Ba angeo êcwô nî." Cûcûth thwôn gwênô okok. 75 Cê Petero opo i kôp na Yecu ôtwakô: "Na bara thwôn

gwênô okok, in ibino kwêrôna wang adek." Cê ôcidhô yôkô êka okok kî cwer cwiny rwôk.

27 Kodiko côn na pîny tye ka ruu, êlamdhôk na dito kibêc êka edite ka lwak ôyûbô gîni kôp mê neko Yecu. 2 Gin otweo Yecu, otero gîni êka êmiô ên both Pilato n'obedo alôc mê Roma. 3 I karê na Yuda, n'oketho ôrôrô i kom Yecu, ôñêñô nî êngôlô kôp mê thôô i wie, ên ongut êka ôdwôkô cîling pyer adek na nyige both êlamdhôk na dito êka both edite, 4 nakun kobo nî, "An abalô mê ketho ôrôrô i kom dhanô n'ope kî bal." Gin ôgamô ninê nî, "Manôn obedo kôpwa? Manôn obedo pêkôni." 5 Cê Yuda obolo cîling pîny i ô t'Obanga êka ôdônyô yôkô. Cê ôcidhô ôdêrê ôkô. 6 Êlamdhôk na dito ôkwanyô gîni cîling êka okobo gîni nî, "Cîk ba yeo nî myero eketh cîling ni i canduk lîm mê ô t'Obanga, piên obedo cîling mê remo." 7 Cê gin ôyûbô kôp kanya acêl, êka otio gîni kî cîling mê wilô pwodho k'acwe agulu, êk obed kanya eiko erok iê. 8 Manôn ênê ômiô ecwodo pwodho nôñ ni Pwodho mê Remo thuno kôdê naka tin. 9 Cê kôp n'onwongo adwarpiny Jeremia ôtwakô ocobere: "Gin otero cîling pyer adek na nyige, wel na jô Icarael onwongo ôngôlô i kome, 10 cê gin otio kôdê mê wilô pwodho k'acwe agulu kite na Rwoth ôcîka kôdê." 11 Yecu ocung i nyim alôc mê Roma n'openyo ên nî, "In ênê rwoth k'Eyuda?" Yecu ôgamô nî, "Eyo, kite na in ikobo kôdê." 12 Êntô i karê n'êlamdhôk na dito êka edite odotho gîni Yecu, ên ba ôgamô gin môrô. 13 Cê Pilato openyo Yecu nî, "In ba itye ka winyo adoth na gin odothi kôdê?" 14 Êntô Yecu ba ôgamô kôp môrô, kadî k'adoth môrô acêl—man ômiô alôc ouro rwôk. 15 I karama kibêc mê Poth, alôc onwongo gônnyô amabuc acêl both lwak, ngat môrô kêkên na gin mîtô. 16 I karê nôñ onwongo tye amabuc môrô n'engeo rwôk, na nyîngê Baraba. 17 Cê i karê na lwak ôcôkêrê gîni kanya acêl, Pilato openyogî nî, "Nga na un îmitô nî agônny niwu, Baraba onyo Yecu n'ecwodo nî Meciya?" 18 Pilato onwongo ongeon nî gin ômiô Yecu bothe pî nyeko. 19 I karê na Pilato obedo i wi then mê ngôlô-kôp, dhakô mêrê ooro kôp môrô bothe: "Kûr itim gin môrô i kom dhanô nôñ n'ope kî bal, piên tin i wang lek anêñô can na dit rwôk pîrê." 20 Êntô êlamdhôk na dito êka edite ôcûpô gîni lwak mê penyo pî Baraba, êk enek Yecu ôkô. 21 Alôc dôkî openyogî nî, "Nga kî kin jô arîô ni na un îmitô nî an agônny niwu?" Gin ôgamô nî, "Baraba." 22 Cê Pilato openyogî nî, "Ngô na an myero dong atîm kî Yecu n'ecwodo nî Meciya?" Gin kibêc ôgamô nî, "Gur ên i kor yath arîal" 23 Pilato openyogî nî, "Pîngô? Bal ngô na ên ôtimô?" Êntô lwak ôwôô gîni rwôk nî, "Gur

ën i kor yath ariä!" 24 İ karë na Pilato önënö ni ba döki ërömö timö gin mörö, ëka wöö onwongo tye ka mëdërë amëda, cë ökwanyö pii, ölwökö ki cingë i nyim lwak ëka okobo ni, "Bal më remo ka dhanö ni ba bino bedo i wia, manön bino bedo pëköwu!" 25 Lwak kibëc ögamö ni, "Remo mëre obed i wiwa ëka i wi ëthinöwa!" 26 Cë Pilato ögönyö Baraba niği. Ëntö ën ömiö epwodo Yecu ki del, ëka ömiö ën bothgi ëk egur i kor yath ariä. 27 Cë acikari k'alöc otero ginii Yecu i Praitonion, ëka ögürö ginii ën dyere. 28 Gin ögönyö böngü mëre ëka oketho ginii böngü na kwar i kome. 29 Cë öyübö ginii tok öküdhö, ëka eketho i wie. Gin oketho lüth i cingë më kucem ëka orumo cöng-gi piny i nyime, nakun ëngalö ën ni, "Örëm, rwoth k'Eyuda!" 30 Gin öngülö laö dhögi i kome ëka ökwanyö ginii lüth cë ëgöö ki wie. 31 Kinge na gin dong otyeko ngalö Yecu, cë gin ögönyö böngü na kwar ökö ki i kome, ëka eketho böng mëre i kome. Cë gin otero ën më guro i kor yath ariä. 32 İ karë n'onwongo gin tye ka donyo yökö, oromo ginii k'ëcwö mörö më Cirene na nyingë Cimon, cë ödiö ginii ën tëtëk më tingo yath ariä ka Yecu. 33 Gin othuno i kabedo n'ecwodo ni Golgota (na gönyö ni Kabedo më Cogo Wic). 34 Acikari ömiö Yecu köngö ölok n'erubo ki yath na këc; ëntö kinge na ën öbilö, Yecu ökwërö madhö ökö. 35 Kinge na dong gin oguro Yecu i kor yath ariä, obolo ginii kwir më poko böng mëre. 36 Cë gin obedo piny kunön më kürö ën. 37 Oguro ginii köp më adoth na gin odotho ën ködë malö i ka wie, n'ëcöö ni, "Man ënë Yecu, Rwoth k'Eyuda." 38 Ekwoe ariö onwongo eguro kanya acël ködë, ngat acël yo cingë kucem, ëka ngat acël yo cingë kucam. 39 Jö n'onwongo tye ka wok i ngete obedo ginii ka yanyö ën, yengo wigii, 40 ëka kobo ginii ni, "In ikobo ni ibino muko öt k'Obanga ökö, cë igërö i ninö adek, lari keni ëka idhi piny ki kor yath ariä, ka in ibedo Wod k'Obanga!" 41 Ëlamdhök na dito, epwony cik ëka edite thon önywarö ginii Yecu. 42 Gin okobo ni, "Ën ölarö jö nökenë, ëntö ën ba twërö larë kënë! Ën obedo rwoth më İcarael! Wëk ën obin piny ki i kor yath ariä, cë wan ebino yee ën. 43 Ën geno Obanga ëka kobo ni ën ebeto Wod k'Obanga. Wëk Obanga ölar ën kobedini ka mitö." 44 Ekwoe n'onwongo eguro kanya acël ködë thon öyanyö ginii ën. 45 Cakërë caa abicël më kiceng më thuno ködë naka caa abungwën, piny ocido ökö na cöl i wi lobo kibëc. 46 İ kin caa abungwën më kothyeno Yecu okok ki dwön na longo ni, "Eloi, Eloi, lama cabaktani?"—na gönyö ni, "Obangana, Obangana, pingö iwëka ni köman?" 47 İ karë na jö mökö n'ocung kunön owinyo, gin okobo ni, "Ën tye ka cwodo Eliya." 48 Cücüth dhanö acël öringö ökwanyö amor, cë olutho i köngö

ölok na wac, örwakö i wi lüth, ëka ömiö both Yecu ni ömadhi. 49 Ëntö jö nökenë okobo ni, "Wëk unu ën kënë! Eru enenu ka Eliya twërö bino më larö ën." 50 Yecu okok döki ki dwön na longo, cë öthöð ökö. 51 İ caa nön, böngü katein na tye i öt k'Obanga öyëc opokere ökö i dul ariö cakërë ki malö naka piny. Piny oyengere ëka kite öbarë ginii ökö. 52 Lyene öyabërë ökö ëka kom jö k'Obanga na leng na pol n'onwongo öthöð ocer ginii ökö. 53 Odonyo ginii ökö ki i lyene ëka kinge cer ka Yecu öcüdhö ginii i Jerucalem cë onyuthere ginii both jö na pol. 54 İ karë n'Adit na löö acikari ki jö n'onwongo tye ködë më kürö Yecu önënö ginii oyeyeng ëka gin na kibëc n'ötümërë, obedo ginii ki lworo rwök, cë okobo ginii ni, "Adyer, ën onwongo obedo Wod k'Obanga!" 55 Mon na pol onwongo tye ginii kunön na neno ginii ki cecen. Gin onwongo ölübö kör Yecu ki i Galilaya më könyö ën. 56 İ kin mon nön ginii onwongo tye ië Maria më Magadala, Maria aya ka Yakobo ëka Yocepu, ëka aya k'awope ka Jebedayo. 57 İ karë na piny dong cido, dhanö mörö më Arimataya n'obedo alönyö na nyingë Yocepu obino, ën thon onwongo obedo alübkör Yecu. 58 Ën öcüdhö both Pilato cë ökwaö kom Yecu ëka Pilato öcükö ni ëk ëmii bothe. 59 Yocepu ökwanyö kom Yecu, cë oboo ökö ki böngü na leng, 60 ëka opyelo i bur lyël mëre na nyen, na ën onwongo ogworo i kidi. Ën öläörö kidi na thwönë i dhö lyël, ëka öya öcüdhö ökö. 61 Maria më Magadala ëka Maria nökenë ca onwongo obedo ginii kunön n'opimere ki lyël. 62 Kodiko mëre, na ënë ninö na lübö Ninö më Yübërë, ëlamdhök na dito ëka Eparicayo öcökërë ginii i nyim Pilato. 63 Gin okobo ni, "Adwono, wan epo ni i karë na ën pod kwö, wan ewinyo ka abwöl jö nön kobo ni, 'Kinge ninö adek an abino cer döki.' 64 Cë myero imii cik ëk ëgwök lyël na bër naka i ninö më adek ëk kür ëlübkörë öcüdhö ginii ökwäl kome ökö, cë okob ginii both lwak ni ën ocer ökö ki i kin jö n'öthöð. Bwöl më ajiki ni bino bedo na rac na löö bwöl më acël ökö." 65 Pilato ögamö ni, "Ter unu acikari n'obedo ginii ëkürpiny. Cüdhö igwök unu na bër rwök kite na un itwërö ködë." 66 Cë öcüdhö ginii më kürö dhö lyël na bër nakun mwönö ginii anyuth i kom kidi ëka eketho ëkürpiny.

28 Kinge Cabit k'Eyuda, i kin keko i ninö na lübö cabit k'Eyuda, Maria më Magadala ëka Maria nökenë öcüdhö ginii më nënö lyël. 2 Athura oyeyeng na dit oyengo piny, piën malaika ka Rwoth n'öya ki i polo obino piny cë othwaro kidi ökö ki i dhö lyël ëka obedo i wie. 3 Malaika nön onen na ryëny calö lüth köth, ëka böng mëre onwongo tar calö pëë.

4 Ēkürpiny obedo gini kī lworo rwök i karē na gīn
 ōnēnō malaika ēka komgī ōmyēl cē ōdōkō gini calō
 jō n'ōthōō. 5 Ēntō malaika okobo both mon nī, "Kūr
 ibed unu kī lworo, piēn an angeo nī un itye ka rangō
 Yecu n'onwongo eguro i kor yath ariā. 6 Ēn ba tye
 kany; ēn ocer ōkō, kite na ēn okobo. Bin iñēn unu
 kanya ēn onwongo obuto iē. 7 Cīdh unu pīōpīō ēk
 ikob unu both ēlūbkōrē: 'Ēn ocer ōkō kī kin jō n'ōthōō,
 ēka ēn tye ka cīdhō anyim niwu yo Galilaya. Un ibino
 nēnō ēn kī kunōn.' Po unu i kom ngō na an akobo
 niwu." 8 Cē mon ōbūnyō yaa ōkō pīōpīō kī i wi lyēl kī
 lworo ēka kī yom cwiny na thwōnē, cē ōringō gini
 mē cīdhō kobo both ēlūbkōrē. 9 Athura Yecu oromo
 kōdgī, cē omothogī nī, "Kuc obed kodwu!" Gin obino
 bothe, ōmakō gini tyēnē cē ōwōrō gini ēn. 10 Cē
 Yecu okobo nīgī nī, "Kūr ibed unu kī lworo. Cīdh ikob
 unu both utmegona ēk ōcīdh gini yo Galilaya; cē gīn
 bino nēnōna kī kunōn." 11 Ī karē na mon tye ka woth
 i yoo, ēkürpiny mōkō ōcīdhō i taun ēka ōdwōkō gini
 ripot both ēlamdhök na dito gin na kibēc n'ōtimērē.
 12 Ī karē n'ēlamdhök na dito ōcōkērē gini kanya acēl
 k'edite, cē ōyūbō gini kōp mē mīō cīlīng na thwōnē
 both acikari, 13 nakun kobo gini bothgī nī, "Kob unu
 both lwak nī, 'Ēlūbkōrē obino gini kiwor cē ōkwalō
 gini kome i karē n'onwongo wan ēnīnō ōkō.' 14 Ka
 alōc bino winyo kōp ni, cē wan ebino kobo nīnē, ēk
 can mōrō kūr opodh i komwu." 15 Cē acikari ōgamō
 gini cīlīng, ēka ōtimō gini kite n'ēcīkōgī kōdē. Kōp
 nī obedo kēth i kin Eyuda othuno kōdē naka tin. 16
 Cē ēlūbkōrē apar wie acēl ōcīdhō gini yo Galilaya,
 i wi kidi na Yecu onwongo okobo bothgī mē cīdhō
 iē. 17 Ī karē na gīn ōnēnō Yecu, ōwōrō gini ēn;
 ēntō jō mōkō obedo k'akalakala. 18 Cē Yecu obino
 bothgī ēka okobo nī, "Twēr kibēc na tye i polo ēka i
 wi lobo etyeko dong mīō ōkō botha. 19 Pī manōn
 cīdh unu dong ēk ilōk unu jō mē rok kibēc ōdōk gini
 ēlūbkōra, baticagī unu kī nyīng Apap, ēka Wod ēka
 Tipo Naleng, 20 pwony unugī mē gwōkō gin na kibēc
 na an atyeko cīkōwu kōdē. An atye kodwu karē kibēc,
 naka i ajiki pīny." (aiōn g165)

Marako

1 Man ënë acaki më köp më Emuth na Bër i kom Yecu Kiricito, Wod k'Obanga. **2** Kite n'ëcöö ködë i buk k'adwarpiny l'caya: "Obanga okobo ni, 'An abino oro aoma i nyimi, na bino yübö yoo nini.'" **3** Dwön dhanö mörö tye ka redo i thim ni, 'Yüb unu yoo pi Rwoth, miñ unu yoo ocung atir ninë.'" **4** Aor ni onwongo obedo Jon Abatica. Ën onwongo tye i thim ëka ötütö ni jii myero ebatigagí më nyutho ni gin dong ongut ökö ki i kom balgi ëka ölökerë gini both Obanga ëk ötim nigí kica. **5** Jö na pol më lobo Yudea ëka Jerucalem obino gini both Jon. Gin onwongo tuco balgi ëka Jon baticagí i kulo Jordan. **6** Jon onwongo ruko böng n'ëyübö ki kom yer kinaga, tweo wang pyërë ki del, camö bonyo ëka mör kic më thim. **7** Jon ötütö both jii ni, "Ngat mörö ute na tye ka lübö köra, ën pürë tük löa ökö. An ba apora më gungo piny ëka më gönyö thöl wörë. **8** An abaticawu ki pii, ëntö ën bino baticawu ki Tipo Naleng." **9** I karë nonu Yecu öya ki i Najaret i lobo më Galilaya ëka Jon obatica ën i kulo Jordan. **10** Na Yecu pod donyo malö ki i pii, cücüth ën öñenö polo öyabërë ëka Tipo Naleng opye i kome na cal k'amam. **11** Ëka dwön mörö öya ki i polo na kobo ni, "In ënë Woda më amara, cwinya yom i komi." **12** Cücüth Tipo Naleng otero Yecu i thim, **13** kanya ën obedo ië pi ninö pyer angwën nakun Catan tëmö ën. Leeni na ger onwongo thon ut kunön ëka emalaika obedo gwökö ën. **14** I karë na dong etweo Jon i buc, Yecu obino yo Galilaya nakun titö köp më Emuth na Bër n'öya ki both Obanga. **15** Ën okobo ni, "Karë dong örmö, Ker k'Obanga dong cwök. Ngut unu ëka iyee unu köp më Emuth na Bër!" **16** I ninö mörö acël na Yecu onwongo tye ka woth i nget Nam më Galilaya, ën öñenö ëcic rëc arö, Cimon ëka ömin mërë Anderiya, bolo gini böögí i pii. **17** Yecu okobo bothgi ni, "Bin ilüb unu köra, ëka an abino miöwu idökö ëmak jii nakaka rëc." **18** Cücüth gin öwëkö böögí ëka ölübö gini kór Yecu. **19** I karë na ën öcüdhö anyim na nönök, öñenö Yakobo ëka ömin mërë Jon, ëthiin ka Jebedayo, n'obedo gini i yeya yübö böögí. **20** Ëka cücüth Yecu ocwodogí cë öwëkö gini apapgí Jebedayo i yeya ki jö n'onwongo epangogí apanga ëka ölübö gini ën. **21** Yecu ëka ëlübkörë öcüdhö gini yo Kaperanaum, cücüth i ceng Cabit k'Eyuda ën ödönyö i cinagoga ëka öcakö pwony. **22** Jii obedo ki ur i kom pwony mërë, piën opwonyo na calö ngat n'onwongo ut ki twër, na path ki kite n'epwony cik pwonyo ködë. **23** Cücüth dhanö mörö onwongo tye i cinagogagí ki tipo na rac ëka öcakö redo ni, **24** "Kara

imittö ngö ki bothwa, Yecu më Najaret? In ibino më tyekowa ökö? An angeo ngat na in ibedo—ngat na Leng n'Obanga ooro." **25** Ëntö Yecu ocoko nakun kobo ni, "Ling ökö, ëka donyi ökö ki i kome!" **26** Tipo na rac ömiö ën öryërë ëka oredo rwök cë öya ökö ki i kome. **27** Jö kibëc obedo gini ki ur rwök nakun penyere gini kën-gí ni, "Man ngö? Pwony na nyen na ut ki twër! Ën coko naka thon tipo na reco, ëka winyo gini ën." **28** Emuth i kom Yecu ökëth örmö kabedo n'ögürö lobo më Galilaya kibëc. **29** Cücüth na Yecu dong öya ökö ki i cinagoga, öcüdhö gin ki Yakobo ëka Jon yo pacö ka Cimon ëka Anderiya. **30** Marö ka Cimon onwongo obuto piny, na two lyetho ömakö ëka cücüth gin okobo köp i kome both Yecu. **31** Ën dong öcüdhö bothe, ömakö cingë, ëka otingo malö. Two lyetho öya ökö ki i kome ëka öcakö yübö nigí cem. **32** Kothyeno nön na ceng dong dönyö, jii okelo etwoe kibëc bothe ëka jö na cene ömakögi. **33** Ëka jö kibëc më taun nön ögürë gini i dholokek. **34** Cë Yecu öcangö jö na pol n'onwongo ut gini ki koth twoe na papath, ëka öryëmö cene na pol, ën ba oyeo ni cene më twak piën gin onwongo ngeo nga na ën obedo. **35** Kodiko cön na piny pod cöl, Yecu öya cë öcüdhö yo kanyalik ëka obedo i lëga kunön. **36** Ëntö Cimon ëka ewodhe öcüdhö gini më rangö ën. **37** I karë na gin onwongo Yecu, gin okobo ninë ni, "Jö kibëc tye ka rangöni." **38** Ëntö Yecu okobo nigí ni, "Eru ëcüdhö unu i peci nökenë ëk an thon atit nigí köp. Manön ënë gin n'ömiö an abino." **39** Cë ën owotho i Galilaya kibëc nakun titö köp i cinagogagí ëka ryëmö cene. **40** Ecwö mörö na ut ki two dhöb öbino cë orumo cöngë both Yecu, nakun kwaö ën ni, "Ka imittö, itwërö miöna bedo na leng." **41** Kica ömakö Yecu cë öryëö cingë ogudo ëka okobo ninë ni, "An amittö, komi dong obed na leng!" **42** Cücüth dhöbü orwenyo ökö ki i kome ëka ëmiö ödökö na leng. **43** Cë Yecu ömiö ën öcüdhö nakun cikö na tük ni, **44** "Kür ikob both ngat mörö ngö n'ötimërë. Ëntö cidhi inyuthiri both alamdhök ëka imiñ tyër pi bedoni na leng na lüberë ki cik na yam Muca öcikö pi jö n'ëcangögi ki i two dhöbü. Man bino bedo caden both jö kibëc ni in emii idökö na leng." **45** Ëntö ën öcüdhö ëka örwëö ngö n'ötimërë both jö kibëc. Na calö adwogi ka ngö n'ötimërë, ömiö Yecu ba döki ödönyö i taun na kome nen ëntö obedo yökö kanyalik, cë jii ki i kabedo kibëc ömëdërë gini më bino bothe.

2 Kinge ninö na nönök, Yecu döki odwogo i Kaperanaum, jii owinyo ni ën odwogo pacö. **2** Lwak na pol öcökërë gini kanya acël na kabedo ödökö na d'ing naka i dholokek, ëka ën ötütö köp k'Obanga

bothgi. 3 Cē cwō angwēn obino n'otingo gini dhanō na kome okwe bothe. 4 Gin onwongo ba rōmō tero ēcwō ni both Yecu piēn lwak onwongo opong rwōk. Otucu gini wi ōt ki malō n'opimere ki kanya Yecu onwongo ut iē. Cē gin olwao ēcwō na kome okwe n'obuto i ōkēka piny i nyim Yecu. 5 I karē na Yecu ōnēnō yeegi, okobo n'ēcwō na kome okwe ni, "Woda, balni dong ēwēkō ōkō." 6 Ēntō epwonye mōkō mē cik ka Muca onwongo obedo kany nōn nakun penyere gini ki i cwinygi kēn-gi ni, 7 "Pīngō dhanō ni twak ni kōman? Ēn tye ka yanyō Obanga! Obanga kēkēn ēnē twērō wēkō bal!" 8 Cūcūth Yecu ongeō ki i cwinye ngō n'onwongo gin tye ka thamō, ēka openyogi ni, "Pīngō ithamō unu kōp ni ki i cwinywu? 9 Mēnē na yot, mē kobo both dhanō na kome okwe ni, 'Balni dong ēwēkō ōkō,' onyo ni, 'Yaa malō, ikwany ōkēkani, ēka icak woth?' 10 Ēntō an amitō inge unu ni, Wod ka Dhanō ut ki twēr i wi lobo mē wēkō bal." Cē Yecu okobo both dhanō na kome okwe ni, 11 "An akobo nini, yaa malō, kwany ōkēkani ēka icidh yo pacō." 12 Ēn ōya malō, ōkwanyō ōkēka mērē ēka odonyo yōkō na gin kibēc tye ka nēnō. Jō kibēc ouro ēka ōpakō gini Obanga na kobo gini ni, "Wan anaka yam bara ēnēnō gin mōrō na calō man!" 13 Yecu dōki ōcidhō i dhō Nam mē Galilaya. Lwak na pol obino bothe ēka ēn ōcakō pwonyogi. 14 Na Yecu onwongo tye i woth, ōnēnō Lebi wod k'Alipayo obedo i ōd cōkō ocoro mērē. Yecu okobo ninē ni, "Lūb kōra." Cē Lebi ōya malō ēka ōlūbō kōrē. 15 Na Yecu onwongo ut i cem i ōt ka Lebi, ēcōk ocoro ēka ēbal na pol onwongo tye i cem kanya acēl kōdē ēka ēlūbkōrē. Jō na pol onwongo tye n'ōlūbō gini kōr Yecu. 16 I karē n'epwony cik ka Muca n'obedo Eparicayo ōnēnō gini ēn ka cemo k'ēbal ēka ēcōk ocoro, gin openyo ēlūbkōr Yecu ni, "Pīngō ēn cemo k'ēcōk ocoro ēka ēbal?" 17 I karē na Yecu owinyo kōp ni, ēn okobo nigī ni, "Pathi jō na komgi yot ēnē mītō daktar, ēntō etwoe. An ba abino mē cwodo jō na kitegi atir ēntō ēbal." 18 I karē mōrō n'onwongo ēlūbkōr Jon Abatica ēka Eparicayo ut gini i rio kec, jō mōkō obino gini both Yecu ēka openyo ēn ni, "Pīngō ēlūbkōr Jon Abatica ēka ēlūbkōr Eparicayo rio gini kec, ēntō megī ba rio kec?" 19 Yecu ōgamō ni, "Wele k'anyom twērō rio kec n'anyom tye kōdgi kanya acēl?" Ba twērō gini rio kec n'anyom tye kōdgi kanya acēl. 20 Ēntō karē bino thuno n'ebino kwanyō anyom ōkō ki bothgi, cē gin dong bino rio kec i ninō nōn. 21 "Ngat mōrō ope na dapō bōngū na nyen i kom bōngū n'otii, cē ka ōtīmō, bōngū na nyen bino yēcō bōngū n'otii ōkō cē mīō kanya ōyēc bedo na thwōnē. 22 Ēka ngat mōrō ope na pīkō kōngō ōlōk na nyen i ocwe na cōn. Ka

ōpikō, cē kōngō ōlōk bino yēcō ocwe ōkō, kōngō ōlōk bino ōny ēka ocwe thon bal ōkō. Ēntō kōngō ōlōk na nyen myero ēpiki i ocwe na nyen." 23 I ninō mōrō acēl mē ceng Cabit k'Eyuda, na Yecu onwongo tye ka wok k'ēlūbkōrē i pwodho bēl, ēlūbkōrē ōcakō ridhō with bēl. 24 Eparicayo okobo both Yecu ni, "Nēn, pīngō gin tye ka tūrō cik i ceng Cabit k'Eyuda?" 25 Ēka Yecu okobo nigī ni, "Un ba ikwanō ki i Cōc na Leng ngō na Daudi ōtīmō i karē na kec oneko ēn ēka ewodhe? 26 Ēn ōdōnyō i ōt k'Obanga i karē na Abiathar onwongo obedo Alamdhōk na Dit ēka ōcamō ogati n'ētyērō both Obanga na yam cik ōkwērō ni dhanō mōrō kūr ōcam na path k'ēlamdhōk kēkēn. Ēn thon ōmīō nōkēnē both ewodhe." 27 Cē Yecu okobo nigī ni, "Ceng Cabit onwongo ēyūbō pi dhanō, pathi dhanō pi ceng Cabit. 28 Pi manōn Wod ka Dhanō obedo Rwoth, naka thon mē ceng Cabit."

3 I ninō mōrō acēl mē ceng Cabit k'Eyuda, Yecu dōki ōdōnyō i cinagoga ēka ēcwō na badē okwe onwongo ut kunōn. 2 Jō mōkō onwongo ut gini kunōn mē nēnō ka Yecu twērō cangō ēcwō ni i ceng Cabit ēk enwong gini yoo mē dotho ēn. 3 Yecu okobo both ēcwō na badē okwe ni, "Yaa malō ēk icung i nyim jii." 4 Cē Yecu okobo bothgi ni, "Cik yeo i ceng Cabit ni ētim gin mōrō na bēr onyo na rac, ēlar kwō onyo enek ōkō?" Ēntō gin ōling alinga. 5 Ēn ōnēnōgi k'akēmō ēka cwinye ocwer pi nwang cwinygi. Yecu okobo n'ēcwō ni, "Ryē badi." Ēn ōryēō badē cē ōcang ōkō. 6 Cē Eparicayo odonyo gini yōkō cūcūth mē yūbō kōp ki jō na cwakō Erode kite na myero enek ki Yecu. 7 Yecu k'ēlūbkōrē ōya cē ōcidhō gini yo dhō nam, ēka lwak na pol n'ōya ki i lobo mē Galilaya, Yudea, 8 Jerucalē, Idemea, kukidē mē kulo Jordan, ēka ki i lobo n'ōrikō Turo ki Cidon ōlūbō gini kōrē. I karē na lwak na pol owinyo gini gin na kibēc na ēn obedo ka tīmō, gin obino bothe. 9 Yecu okobo n'ēlūbkōrē ni ōyūb gini yeya ninē, ēk kūr lwak ōdiē. 10 Ēn onwongo ōcangō jō na pol i ninō nōn, cē jō kibēc na two onwongo dirē gini mē gudo ēn. 11 Ka tipo na reco ōnēnō Yecu, podho gini piny i nyime ēka kok gini ni, "In ibedo Wod k'Obanga." 12 Ēntō Yecu ōcikō tipo na reco ni kūr okob gini ni ngat mōrō nga na ēn ebēdo. 13 Kinge manōn Yecu ōcidhō i wi kidi ēka ocwodo jō n'onwongo ēn mītō woth kōdgi ēka obino gini bothe. 14 Ēn ōyērō jō apar arīō ēka ocwodogi ni ēkwēna ēk owoth kōdē kanya acēl, ēka eorgi mē cidhō tītō kōp k'Obanga, 15 ēka mē bedo ki twēr mē ryēmō cene. 16 Man ēnē jō apar arīō na ēn ōyērō: Cimon (na ēn ōcakō nyingē ni Petero), 17 Yakobo ēka ōmīn mērē Jon, awope ka Jebedayo,

(ëntö Yecu ömïögi nyíng ní, Boanergi, na tyén kóp mërè ní, “Jö na mor kamè köth.”) 18 Anderiya, Pilipo, Batulumayo, Matayo, Tomaci, Yakobo wod k’Alipayo, Tadeo, Cimon (dhanö na mítö löckên) 19 ëka Yuda lkariot n’oketho örörö i kom Yecu. 20 Cê Yecu ödönyö i öt ëka lwak na pol obino örikö ën döki. Ën ëka ëlúbkôrë onwongo ba twërö gîni nwongo caa më cem. 21 I karè na wede mërè owinyo ngö n’ötímërë, cê obino gîni më makö Yecu piën gîn öthamö ní, “Ën opo ökö.” 22 Epwony cik ka Muca mökö öya kí i Jerucalem na kobo gîni ní, “Ën ut kí Belijebul, adwong ka cene. Kanya ën nwongo tékö kí ië më ryëmö cene.” 23 Cê Yecu ocwodogí ëka ötwak ködgi kí carolok ní, “Catan twërö ryëmö Catan níngö? 24 Ka ker opokere ië ariö, ker nön ba twërö cung. 25 Ëka ka jö më öt opokere ië ariö, jö më öt nön ba twërö cung. 26 Ëka ka Catan opokere cê ölwényö i kome kënë, ën ba twërö cung, ajiki mërè nwongo dong othuno. 27 Ngat mörö ope na twërö dönyö i öt ka ngat na tæk më yakö jami mërè, thwara ka ën öcakö tweno dhanö na tæk ni ökö ëka dong cakö yakö jami kí i öde. 28 An akobo niwu kóp adyer ní, bal kibéc na dhanö tímö ëka ayeny n’ëyanyö k’Obanga ërömö tímö kica, 29 ëntö ngat mörö na yanyö Tipo Naleng ba ebino tímö niné kica piën nwongo ötimö bal na bedo na twal.” (aiön g165, aiönios g166) 30 Yecu okobo nigí piën gîn onwongo tye ka kobo ní, “Ën ut kí tipo na rac.” 31 Cê aya ka Yecu ëka utmegö mërè obino gîni. Gîn ocung yökö ëka eoro ngat mörö both Yecu i öt, ëk obin yökö ötwak ködgi. 32 Lwak onwongo obedo nakun ögürö gîni Yecu i dyere, cê ekobo niné ní, “Ayani ëka utmegoni ocung yökö tye gîni ka rangöni.” 33 Yecu ögamö nigí ní, “Nga ënë obedo ayana ëka utmegona?” 34 Cê önénö jö n’obedo piny n’ögürö ën dyere ëka okobo ní, “Man ënë ayana ëka utmegona. 35 Ngat mörö na tímö ngö n’Obanga mítö, ënë ömëra, amëra, ëka ayana.”

4 Yecu döki öcakö pwony i dhö Nam më Galilaya. Lwak na pol rwök öcökërë bothe, cê ën öidhö i yeya ëka obedo ië nakun jii kibéc odong i dhö nam. 2 Yecu opwonyogi kí kóp na pol kí carolok ní: 3 “Winy unu! Apur mörö öcidhö më cwöönö kodhi mërè. 4 I karè na ën tye ka cwöönö kodhi, kodhi mökö ökir i dye yoo, ëka winy ödedëpö ökö. 5 Kodhi nökenë ökir kanya obedo kitekite na ngöm nönök ië. Kodhi ni otuu piöpiö piën ngöm onwongo rëp. 6 Ëntö i karè na ceng öryëny öwangögí rwök, oner gîni ökö piën oriigi ba ödönyö na thuth. 7 Kodhi nökenë opodho i kin okudhi. Okudhi ödongö ëka ödiögi cê ba önyakö nyige. 8 Kodhi nökenë opodho i ngöm na bër ödongö

ëka nyige önyak, mökö pyer adek, mökö pyer abicël ëka mökö mia acël.” 9 Cê Yecu okobo ní, “Ngat na tye kí ithe më winyo, myero owiny.” 10 I karè na Yecu onwongo tye kënë k’ëlubkôrë apar ariö ëka jö nökenë, gîn openyo ën tyén carolok. 11 Ëka ën okobo nigí ní, “Müng më ker k’Obanga ëmiöwu. Ëntö both jö nökenë an atwak ködgi kí carolok, 12 ëk, “Ka gîn önénö, önén gîni ëntö ba bino gîni niang. Ka gîn owinyo, owinyo gîni ëntö gîn ba bino niang ië. Piën ka gîn ötimö, gîn bino lökërë both Obanga, ëka ën bino tímö nigí kica.” 13 Cê Yecu openyogi ní, “Un ba iniang i tyén carolok ní? Un ibino niang i carolok nökenë kibéc níngö? 14 Apur cwö kodhi na ënë kóp k’Obanga. 15 Kodhi n’opodho i yoo ocung pí jö na winyo kóp k’Obanga, cê cücüth Catan bino kwanyö kóp na gîn owinyo ökö. 16 Kodhi n’opodho kanya obedo kitekite, ocung pí jö na winyo kóp k’Obanga ëka cücüth gamö gîni kí yom cwiny. 17 Ëntö kit na ba ut gîni k’orii n’ödönyö na thuth, ba bedo gîni ape. Podho gîni ökö cücüth ka tye gîni kí pëkö onyo ka eketho ayela i komgi pí yee kóp k’Obanga. 18 Kodhi nökenë n’opodho i kin okudhi ocung pí jö na winyo kóp k’Obanga, 19 ëntö par më kwö më lobo ní, marö lönyö, ëka miti më jami kibéc bino cê diö kóp k’Obanga ökö ëka ba nyak gîni. (aiön g165) 20 Ëntö kodhi n’opodho i ngöm na bër cung pí jö na winyo ëka gamö kóp k’Obanga. Gîn nyakö nyig-gí pyer adek, mökö pyer abicël onyo mia acël.” 21 Yecu okobo both lwak ní, “Ngat mörö ute na cwinyö tara cê ketho i thé adita onyo i thé étana ëka ba ketho i ka cibo tara? 22 Piën ba tye gin mörö n’ökanërë na ba ebino ngeono, ëka müng mörö ope na ba ebino kelo kanyalër. 23 Ka ngat mörö tye kí ithe më winyo, myero ën owiny.” 24 Yecu thon okobo nigí ní, “Gwökërë unu kí kom gin ní winyo unu. Gin na un ipimo ködë, ënë thon ebino pimo niwu ködë, ëka döki ebino mëdö niwu. 25 Jö na tye kí gin mörö ebino mëdö nigí, ëka jö n’ope kí gin mörö ebino kwanyö naka thon gin mörö na tídi na gîn tye ködë ökö.” 26 Yecu ömëdërë më kobo ní, “Ker k’Obanga cal k’apur n’öcwö kodhi i ngöm. 27 Kiceng ëka kiwor, na ën öninö onyo neno, nyig kodhi tuu ëka döngö, ëntö ën ba niang kit na nwongo ötimërë ködë. 28 Ngöm miö nyig kodhi tuu ëka nyakö nyige kënë, më acël pote cakö donyo, cê wie yübërë, ëka ajiki mërè nyige cëk. 29 I karè na nyige öcëk, apur cakö bino ëka kaö kí pala, piën karè më kac nwongo örömö.” 30 Yecu döki openyo ní, “Ngö na onu ebino poro kí Ker k’Obanga onyo carolok mënë na onu myero etii ködë? 31 Cal kí nyig kodhi karadali na ënë tídi rwök kí kin kodhi n’ëpidhö i ngöm. 32 Ëntö ka ëpidhö, döngö na thwönë rwök na löö kodhi nökenë

kibéc n'èpìdhò ì pwotho. Jangé dǒngò na boco, éka winy na ngwécò kí malò twèrò gèrò udigi cè yweo ì tipo méré." 33 Yecu òtītò kǒp méré both lwak nakun tio kí carolok, okobo nǐgí kite na gín twèrò niang kódè. 34 Èn ba okobo gin mǒrò bothgí na ba otio kí carolok, èntò ka èn ut kènè k'èlùbkǒrè, èn gǒnyò nǐgí jami kibéc. 35 Ì nǐnò nǒn na píny dong cido, Yecu okobo both èlùbkǒrè nǐ, "Eru engolu nam yo lǒka nam tung ca." 36 Cè gín otero Yecu ì yeya éka òcakò gínì wèkò lwak ì ngeegí. Yeya nǒkènè thon onwongo tye kanya acèl kódè. 37 Éka yamò na ger obino ì nam. Pii na tingere malò òcakò dǒnyò ì yeya, éka yeya òcakò pong kí pii. 38 Ì caa nǒn, Yecu onwongo tye ka nǐnò ì ngee yeya n'otheno wie k'athen wic. Èlùbkǒrè ocoo èn èk òya malò, na redo gínì nǐ, "Apwony, in ba ìparò nǐ wan ècwòk lùny òkò ì pii?" 39 Yecu òya malò éka ocoko yamò cè okobo nǐ pii na tingere malò nǐ, "Lǐng òkò! Cung moth!" Cùcùth yamò ocung òkò, éka jami kibéc òlǐng moth. 40 Cè Yecu openyo èlùbkǒrè nǐ, "Píngò un ilwor? Un ba itye kí yee?" 41 Èlùbkǒr Yecu onwongo òdòkò gínì na lwor òkò. Cè òcakò penyere gínì kèn-gí nǐ, "Ècwò nǐ ènè nga, na naka thon yamò éka pii na tingere malò winyo?"

5 Cè Yecu éka èlùbkǒrè òngǒlò Nam mè Galílaya éka othuno gínì yo lǒka nam mè lobo Gereca. 2 Ì karé na Yecu donyo yǒkò kí ì yeya, dhanò mǒrò na tye kí tipo na rac òya kí ì wi lyene mè romo kódè. 3 Dhanò nǐ onwongo bedo ì kin lyene éka ngat mǒrò onwongo ope na twèrò tweno èn kadí kí jègèlè. 4 Pol karé etweo tyèné kí cǐngè èntò caa kibéc èn codo jègèlè éka tǔrò nywenyo òkò kí ì tyèné. Ngat mǒrò onwongo ope na tèk na twèrò lǒnò èn. 5 Karé kibéc kiceng éka kiwor èn bedo ì kin lyene éka ì wi kite nakun kok, éka ngǒngǒlò kome kènè kí kite. 6 Ì karé na èn ònèñò Yecu kí kanya bobor, òrǐngò bothe cè orumo cǒngè ì nyime. 7 Èn òcakò redo rwók nǐ, "Yecu, Wod k'Obanga na Malò Rwók, ngò na in ìmìtò kí botha? Kwongiri ì nyim Obanga nǐ ba ibino pwodona!" 8 Pǐèn Yecu onwongo okobo nǐnè nǐ, "Yaa òkò kí kom ècwò nǐ, in tipo na rac!" 9 Cè Yecu openyo tipo na rac nǐ, "Nyíngi nga?" Èn ògamò nǐ, "Nyíngwa Lejon, pǐèn wan etye na pol ì dhanò nǐ." 10 Tipo na reco dók òkwaò Yecu rwók èk kǔr òryémgí òkò kí ì lobo nǒn. 11 Òthipan pún onwongo tye ka cem ì bad kidi. 12 Cè tipo na reco òkwaò gínì Yecu nǐ, "Or-wa ì pún, èk èdǒny ì ìgi." 13 Cè Yecu oyeo nǐgí, éka tipo na reco odonyo éka òdǒnyò gínì ì pún. Òthipan pún onwongo tye na rǒmò elip ariò. Pún òngwécò gínì kí ì bad kidi yo ì nam cè pii òmwǒnyǒgí òkò. 14 Èkwath n'onwongo kwaò gínì pún òngwécò

gínì òkò éka òrwèò gínì emuth ì taun na cwók éka kí lobo n'ògúrò kany nǒn. Jǐi òbǔnyò cǐdhò mè nènò ngò n'òtímèrè. 15 Ì karé na lwak obino both Yecu, gín ònèñò dhanò n'onwongo tipo na reco opong ì kome, obedo píny kunǒn n'oruko bǒng méré éka wie tye na bér, cè lworo òmakǒgí kibéc. 16 Éka jò n'ònèñò ngò n'òtímèrè, okobo gínì both jò nǒkènè kǒp ì kom dhanò na tipo na reco opong ì kome, éka ì kom pún. 17 Cè lwak òcakò kwaò Yecu èk òya òkò kí ì lobogí. 18 Na Yecu dong tye ka dǒnyò ì yeya, dhanò n'onwongo tipo na reco tye ì kome, òkwaò èn nǐ èk ewoth kódè. 19 Èntò Yecu ba oyeo. Okobo nǐnè nǐ, "Cǐdh yo pacò éka both jò na megí cè ikob nǐgí jami kibéc na Rwoth Obanga òtímò éka kit na èn òtímò nini kǐca kódè." 20 Èn òcǐdhò cè òcakò kobo ngò na Yecu òtímò ì kome ì Dekapoli éka jò kibéc n'owinyo ngò na èn okobo, obedo gínì kí ur rwók. 21 Ì karé na Yecu dǒkí òngǒlò nam kí yeya yo lǒka nam tung ca, lwak na pol òcǒkèrè bothe nakun èn onwongo tye ì nget nam. 22 Cè atèla mǒrò acèl mè cinagoga, na nyíngè Yairo obino. Ì karé na èn ònèñò Yecu, orumo cǒngè píny, 23 éka odweko èn nǐ, "Nyara na tǐdǐ dong tye ka thǒò athǒa. Òma! Bin iketh cingi ì kome, èk òcang cè òkwò." 24 Yecu owotho kanya acèl kí Yairo. Lwak na pol òlùbò èn nakun èdǐò èn. 25 Dhakò mǒrò onwongo tye na remo obedo cwer kí ì kome pí mwaka apar ariò na ba cok. 26 Èn òlímò can na thwǒnè, éka òbalò lǐm méré kibéc n'onwongo èn ut kódè mè cǔlò daktae na pol. Èntò two méré òmèdèrè amèda na ba òcang. 27 Ì karé na èn owinyo kǒp ì kom Yecu, obino kí kungee nakun wok kí kin jǐi éka ogudo bǒngú ka Yecu, 28 pǐèn èn onwongo òthamò pǐrè kènè nǐ, "Ka atwèrò gudo bǒngú méré kèkèn, an abino cang." 29 Cùcùth remo na cwer ocung òkò, éka ongeo kí ì kome nǐ èn ècang òkò kí kom can méré. 30 Ì caa nonu cùcùth, Yecu ongeo nǐ tèkò òya kí ì kome. Èn òlǒkèrè both lwak cè openyo nǐ, "Nga n'ogudo bǒngúna?" 31 Èlùbkǒrè okobo nǐnè nǐ, "In ìnèñò lwak tye ka dǐòni éka dǒkí ipenyo nǐ nga n'ogudi?" 32 Èntò Yecu òlǒkèrè mè nènò nga n'ogude. 33 Cè dhakò ongeo ngò n'òtímèrè ì kome, obino na kome myèl kí lworo éka orumo cǒngè ì nyim Yecu cè èn okobo kǒp n'adyer kibéc bothe. 34 Yecu okobo both dhakò nǐ, "Nyara, yeeni òmǐò ìdòkò na bér. Cǐdh kí kuc éka ìcang òkò kí kom twoni." 35 Na Yecu onwongo pod twak kódè, cwò mǒrò obino kí ì pacò ka Yairo, atèla mè cinagoga. Gín okobo nǐnè nǐ, "Nyari dong òthǒò òkò. Kǔr dǒkí iyel apwony." 36 Èntò Yecu onwongo owinyo ngò na gín tye ka kobo éka okobo both adit mè cinagoga nǐ, "Kǔr ibed kí lworo. Bed kí yee kèkèn." 37 Cè Yecu ba oyeo nǐ ngat mǒrò

mě lübö kōrē na path kī Petero, Yakobo ēka Jon (ōmīn Yakobo). 38 Ī karē na gīn obino ī pacō k'atēla mẽ cinagoga, Yecu ōnēnō jīi na tye ka wōō kī koko. 39 Ēn ōdōnyō ī ōt ēka okobo nīgī nī, "Pīngō īwōō unu kī koko nī kōman? Athīn ba ōthōō, ēntō ōnīnō anīna." 40 Lwak ōnyērō Yecu. Ēntō ēn ōryēmōgī kībēc yōkō ēka ōdōnyō k'apap k'athīn, aya k'athīn ēka ēlūbkōrē adek ī ōt kanya anyaka nōn onwongo obuto iē. 41 Yecu ōmakō cīngē cē okobo nīnē nī, "Talitha kumi," na gōnyō nī, "Athīn anyaka, yaa malō!" 42 Ēka cūcūth anyaka ōya malō ēka ōcakō woth (ēn onwongo tye kī mwaka apar arīō), cē jīi obedo kī thwōn ur rwōk. 43 Yecu ōcīkōgī rwōk nī kūr ōmīō gīnī ngat mōrō onge ngō n'ōtīmērē ēka okobo nīgī mẽ mīō nyakō nōn gīn mōrō ēk ōcam.

6 Yecu ōya ōkō kī kunōn, ōdōk yo lobo thurgī ēka ēlūbkōrē ōlūbō ēn. 2 Ī ceng Cabīt k'Eyuda, ēn ōcakō pwony ī cinagoga. Jō na pol n'owinyo pwony mērē ouro gīnī ēka openyo gīnī nī, "Ēcwō nī onwongo ryēkō nī kībēc kī kwene? Kit ryēkō mēnē n'ēmīō ēn? Ēn tio tango nīngō? 3 Man pathī apaa bao, wod ka Maria ēka ōmīn Yakobo, Yoce, Yuda, ēka Cimon. Amego mērē ba kwō ī kin onu kany?" Cē gīn ōkwērō yee ī kome. 4 Cē Yecu okobo nīgī nī, "Adwarpīny ēwōrō ī kabedo kībēc na path kī ī taun mẽ pacō mērē ēka ī kin wede mērē kī jō mẽ dyekalgī." 5 Yecu onwongo ba twērō tio tango mōrō kunōn, na path kī ketho cīngē ī wi etwoe mōrō na nōnōk ēka ōcangōgī. 6 Ēn obedo kī ur rwōk piēn gīn ope kī yee. Cē Yecu owotho ī pacō kī pacō, nakun pwonyo jīi. 7 Ēn ocwodo ēlūbkōrē apar arīō kanya acēl ēka ōcakō orogī k'arīō arīō nakun mīōgī twēr ī kom tipo na reco. 8 Yecu okobo nīgī nī kūr owoth gīnī kī gīn mōrō ī wothgī na path kī lūth ōgōlē. Kūr ōmak gīnī cem, ocwe ēka cīlīng ī jēba. 9 Ēn oyeo nīgī mẽ ruko wōr, ēntō kūr ōmak gīnī bōngū mẽ alōka. 10 Ēn okobo nīgī nī, "Ka īdōnyō unu ī ōt mōrō, bed unu kany nōn naka ka ibino yaa unu kī kany nōn. 11 Ēntō ka ba ēgamōwu ī kabedo mōrō onyo ewinyowu, ka iya unu, tēng unu apua mẽ tyēnwu ēk obed caden bothgī." 12 Cē ēlūbkōr Yecu ōcakō cīdhō gīnī, nakun tītō gīnī nī jīi myero ongut gīnī kī kom balgī. 13 Gīn ōryēmō cene na pol ēka ewiro etwoe na pol kī mōō cē ēcangōgī. 14 Rwoth Erode owinyo kōp ī kom Yecu piēn jō kībēc onwongo twakō kōp ī kome. Jō mōkō onwongo kobo nī, "Man myero obed Jon Abatica n'ocer kī ī lyēl. Manōn ēnē ōmīō ēn tye ka tio koth tango nī." 15 Jō nōkēnē okobo nī, "Ēn obedo adwarpīny Eliya." Jō nōkēnē kobo nī, "Ēn obedo adwarpīny na cal k'edwarpīny mōrō na cōn." 16 Ēntō ī karē n'Erode

owinyo kōp ī kom Yecu, okobo nī, "Man myero obed Jon! Ēcwō na an anguno ngute ēnē dōkī ocer ōkō." 17 Erode onwongo ooro acikari mẽ makō Jon ēka ketho ēn ī buc pī Kerodia, dhakō k'ōmīn mērē Pilipo, piēn Erode onwongo ōkwanyō Kerodia mẽ bedo dhakō mērē. 18 Jon obedo ka kobo n'Erode nī, "Cīk ka Muca ba yeo nī ikwany dhakō k'omeru ilōk ōdōk megī." 19 Kerodia obedo kī cwer cwiny ī kom Jon ēka ōmītō mẽ neko ēn. Ēntō ba ōtwērō, 20 piēn Erode onwongo lworo Jon ēka ngeo nī ēn onwongo obedo dhanō na kite atīr ēka ēcwō na leng, cē ēn ōgwōkō Jon na bēr. Ēn onwongo marō winyo twak ka Jon kadi bed wie orubere, caa kībēc ēn mītō nī ewiny kōp ka Jon. 21 Kerodia onwongo karē na bēr ī nīnō n'Erode ōyūbō karama mẽ po pī nīnō n'enywōlē kōdē. Ēn ocwodo edite mērē, ētēla wi lwēny ēka edite mẽ Galilaya. 22 Ī karē na nyaka Kerodia obino ēka ōmyēl, ēn oyomo cwiny Erode ēka wele mērē. Erode okobo both nyakō nī, "Penya gīn mōrō kēkēn na in īmītō. An abino mīōnī." 23 Ēka ēn okwongere bothe nī, "An abino mīōnī gīn mōrō kēkēn na in ibino penyo kī botha, naka thon nucu mẽ kernal" 24 Anyaka nī ōcīdhō both aya mērē cē okobo nīnē nī, "Ngō na myero apeny?" Aya mērē okobo nīnē nī, "Peny wi Jon Abatica!" 25 Anyaka nī ōbūnyō woth piōpiō ōdōk cen both Erode ēka okobo nīnē nī, "Amītō īmīa wi Jon Abatica ī canīa kany ī caa nī!" 26 Cē rwoth Erode obedo kī kumo rwōk ēntō pī kwong na ēn okwongo ī nyim wele mērē, ōmīō ēn ba twērō kwērō na nyaka nī. 27 Cūcūth rwoth ooro acikari na kūrō pīny ī buc mẽ cīdhō nguno ngut Jon ēka okel nīnē wie. Acikari ōcīdhō ī buc cē onguno wi Jon 28 oketho ī canīa, ēka okelo ōmīō both nyakō nī. Nyakō nī dong otero both aya mērē. 29 Ī karē n'ēlūbkōr Jon owinyo gīnī ngō n'ōtīmērē, obino gīnī cē ōkwanyō gīnī kome ēka ēcīdhō eiko ī bur lyēl. 30 Ī karē n'ēkwēna odwogo gīnī both Yecu, gīn okobo nīnē gīn na kībēc na gīn ōtīmō ēka opwonyo. 31 Cē Yecu okobo nīgī nī, "Eru ecidhu yo kanya jīi ope iē ēk eywe na nōnōk." Ēn okobo nī kōman piēn jīi onwongo tye na pol na bino ēka cīdhō gīnī. Yecu ēka ēkwēna mērē ba obedo gīnī kī caa mōrō mẽ cem thon. 32 Cē gīn dong ōdōnyō ī yeya ēka ōcīdhō yo kanya jīi ope iē. 33 Ēntō jō na pol n'ōnēnōgī ka cīdhō, ongeogī ēka ōngwēcō gīnī kī tyēn-gī kī kin peci cē ōcakō thuno gīnī anyim nīgī. 34 Ī karē na Yecu donyo yōkō kī ī yeya, ēn ōnēnō lwak jīi na pol ēka kīca ōmakō ēn ī komgī, piēn gīn onwongo cal kī rom n'akwathgī ope. Cē ōcakō pwonyogī kī kōp na pol. 35 Na pīny dong cwōk yutho, ēlūbkōr Yecu obino bothe ēka okobo gīnī nī, "Kany obedo kanyalik, ēka pīny thon tye ka cido. 36 Kob nī lwak ēk ōcīdh

gini kanya jo moko kwö gini ië ëka i kin peci na cwök ëk öwil gini cem mörö më acama." 37 Ëntö Yecu ögamö ni, "Miwugi gin mörö më acama." Gin openyo Yecu ni, "In imitö ni wan ëcidh ëk etii ki denario mia ariö më wilö ogati më pïdhögi?" 38 Cë Yecu openyogi ni, "Ogati adi na un iut ködë? Cidh inën unu." Gin odwogo ëka okobo gini ni, "Wan eut k'ogati abic ëka rëc ariö." 39 Cë Yecu okobo n'ëlübkörë ëk ömii jii obed gini piny i gurup i lum na mar. 40 Jii obedo piny i gurup më mia acëläcël ëka pyer abicabic. 41 Yecu ökwanö ogati abic ëka rëc ariö, önenö malö i polo, ëka ölegö gum. Cë opoko i ogati ëka ömii both ëlülükörë ëk opok gini both jii. Ën thon opoko rëc ariö i kin-gi kibëc. 42 Gin kibëc ocemo ëka oyeng gini. 43 Ëka kinge, ëlülükör Yecu öcökö gini nginy ogati ëka rëc n'odong pong aditi apar ariö. 44 Wel cwö n'öcamö gini ogati onwongo tye elip abic. 45 Cücüth kinge man, Yecu okobo n'ëlülükörë ëk ödöny gini i yeya ëk öcidh gini anyim yo löka Bethecaida, nakun ën kobo both jii ëk ödök gini pacö. 46 Kinge na dong omotho jii, ën öcidhö i lëga i wi kidi. 47 Kothyeno na piny dong ocido, ëlülükör Yecu onwongo ut gini i yeya i dyere nam. Yecu onwongo odong këné i ngöm. 48 Ën önenö ni ëlülükörë onwongo tye gini i thwön can, na yelere gini më miö yeya cidhö anyim piën yamö onwongo tye ka yelogi. Na caa abungwën më kodiko dong römö, Yecu obino bothgi nakun tye ka woth i wi pii. Ën öthëna më poth kalögi, 49 ëntö i karë na gin önenö Yecu nakun tye ka woth i wi pii ki tyënë, gin okok rwök ki lworo n'öthamö gini ni ködë ën obedo jwök. 50 Gin kibëc onwongo komgi öthö ökö i caa na gin önenö Yecu. Ëntö Yecu ötwak ködgi cücüth nakun kobo nigii ni, "Kür ibed unu ki lworo, bed unu na cwinyu tük! An ënön!" 51 Cë Yecu öidhö i yeya bothgi, ëka yamö ocung. Gin kibëc ouro gini rwök, 52 piën gin onwongo bara öniang i kom tango më ogati. Cwinygi onwongo nwang rwök më niang. 53 Kinge na dong öngölö gini nam, Yecu ëka ëlülükörë ocung gini i löka nam i Genecaret ëka öywaö gini yeya i lak nam. 54 I karë na gin odonyo yökö ki i yeya, cücüth jii öcakö ngeno ën, 55 cë öringö gini i kabedo kibëc, na tingo gini jo na two k'ökëka yo kanya gin onwongo owinyo ni Yecu ut ië. 56 Kanya kibëc na ën cidhö yo ië, i kin peci, peci na döngö, onyo i nget lobo, gin okelo etwoe yo cuk. Gin ökwaö ën ëk ömii etwoe ogud lak böngü mërë, ëka jo kibëc n'ogudo ebino ëcangögi ökö.

7 I ninö mörö acël, Eparicayo moko ëka epwony Cik ka Muca n'öya gini ki i Jerucalem, obino ëka öcökörë gini both Yecu. 2 Cë önenö gini ëlülükörë

mökö na ba lübö cik më kwer më lwökö cing jo na bara ecemo. 3 Eparicayo ëka Eyuda kibëc ba cemo na bara ölwökö gini cing-gi kite na cik më thëkwarö k'edite mitö ködë. 4 Ëka ka gin odwogo ki i cuk, ba cemo gini na bara ölwökö cing-gi. Gin thon lübö cik më thëkwarö nököné na pol na calö lwökö ekopo, aguli, ëka k'aguli më mola. 5 Eparicayo ëka epwony cik openyo gini Yecu ni, "Pingö ëlülükori ba lübö gini cik më kwer më thëkwarö k'edite ëntö cemo gini ki cing-gi na ba ëlwökö?" 6 Yecu ögamö ni, "Un etwodo! Adwarpiny lcaya onwongo odwaro köp n'atir i komwu kite n'ëcö ködë ni, "Rok ni wöra gini ki del dhögi, ëntö cwinygi bor köda. 7 Wöra gini nono, pwony na gin pwonyo obedo cik ka dhanö." 8 Un ikwërö lübö cik k'Obanga ëka ilübö unu kite ka dhanö." 9 Cë Yecu okobo bothgi ni, "Itye unu ki yodhi na bër më kwërö cik k'Obanga, ëk ilüb unu kite më thëkwarö na mewu. 10 Muca yam okobo ni, 'Wör apapni ëka ayani,' ëka ni, 'Ka ngat mörö öyanyö apap mërë onyo aya mërë, myero enek ökö.' 11 Ëntö un ikobo ni ka dhanö mörö okobo n'apap mërë onyo aya mërë ni, 'Gin n'onwongo myero akonyi ködë ëné lim më Korban' (na tyën köp mërë ëné ni gin n'ëmiö ökö both Obanga), 12 cë ën kür döki ömii lim mörö më könyö apap mërë onyo aya mërë. 13 I kit yoo ni, un ikwërö köp k'Obanga ëka ilübö unu kite më thëkwaröwu. Ëka itimö unu jami na pol na cal ki manön." 14 Cë Yecu ocwodo lwak bothe döki ëka okobo nigii ni, "Un kibëc winy unu köpna ëka iniang unu ië. 15 Gin mörö ope na yaa ki yökö na dönyö i dhanö na twërö balö ën, ëntö gin na yaa ki i dhanö na donyo yökö ëné balö ën. 16 Ngat na tye ki ithe më winyo myero ën owiny." 17 I karë na Yecu öwëkö lwak ëka ödönyö i öt, ëlülükörë openyo ën tyën köp i kom carolok ni. 18 Cë Yecu openyogi ni, "Un thon bara iniang unu? Ba ingeo unu ni gin na kibëc na dönyö i dhanö nakun öya ki yökö ba twërö balö ën? 19 Piën ba dönyö naka i cwinye, ëntö cidhö i jamië cë donyo yökö." (Na Yecu okobo köp ni, ën onwongo tye ka kobo ni cem kibëc opore më acama.) 20 Yecu ömëdërë më kobo ni, "Gin na yaa ki i dhanö ëné balö ën. 21 Piën gin n'öya ki i dhanö, n'öya ki i cwinye ëné thama na reco, tim më ölyang, kwalö kwo, nek, 22 elomi, woro më jami kibëc, tim mökö na reco, bwölö jii, miti më kom, nyeko, yanyö jii, awaka, ëka mingö. 23 Tim na reco ni kibëc yaa ki i cwinye dhanö, ëka gin ëné balö dhanö." 24 Yecu öya ökö ki kunön ëka öcidhö i lobo Turo. Ën ödönyö i öt mörö ëka ba ömitö ni ngat mörö onge, ëntö ën onwongo ba twërö kanërë. 25 Cë dhakö mörö na nyarë onwongo tye ki tipo na rac i kome, owinyo köp i kom Yecu, cë obino ëka

orumo cöngë i nyime. 26 Dhakö ni onwongo obedo jö Girik n'enywölö i Curopoiniki. Ën ökwaö Yecu më ryëmö tipo na rac ökö ki kom nyarë. 27 Yecu okobo ninë ni, "Ëk kono ëthiñö öcam ngö na gin mitö kibëc, piën ba opore më miö cem k'ëthiñö both gwongi." 28 Dhakö ögamö ni, "Rwoth ikobo adyer, ëntö gwongi thon na tye i thë mëja camö gini nginy cem k'ëthiñö n'opodho piny." 29 Cë Yecu okobo ninë ni, "Pi köp na in ikobo, iromö cïdhö yo pacö, piën tipo na rac dong öya ökö ki kom nyari." 30 Ën öcïdhö yo pacö ëka onwongo nyarë obuto i wi ëtana, ëka tipo na rac onwongo dong öya ökö ki i kome. 31 Cë Yecu öya ökö ki i lobo Turo ëka owok i Cidon yo Nam më Galilaya na tye i lobo Dekapoli. 32 Ëka lwak okelo ëcwö mörö bothe n'onwongo ithe öthöö ëka ba römö twak. Cë ökwaö gini Yecu ëk oketh cingë i kome. 33 Kinge na Yecu otero ën thenge ki kin lwak, oketho nyi cingë i ithe, ëka öngülö laö dhögë i cingë cë ogudo lëbë. 34 Yecu önënö malö i wi polo, öcür ëka okobo ni, "Epata," na tyën köp mërë ni, "Yabiri!" 35 Cücüth ëcwö ni öcakö winyo piny. Thë lëbë thon ögöny ökö ëka öcakö twak na bër. 36 Yecu öcïkö lwak ni, "Kür i'icidh ikob unu both ngat mörö ngö n'ötïmërë." Ëntö kadi bed öcïkögi ni kömanön, gin ömëdërë amëda më titö ngö n'ötïmërë. 37 Lwak obedo ki ur rwök na kobo gini ni, "Gin na kibëc na ën ötïmö bër. Ën thon miö ëthöö ith winyo piny ëka jö na thë lëbgi otwere më twak."

8 I karë nonu, lwak na pol döki ögürë ëka cem onwongo ope nigí. Yecu ocwodo ëlúbkörë bothe ëka okobo nigí ni, 2 "Lwak othona gini rwök piën orio gini koda ninö adek na gin mörö më acama ope. 3 Ka aorogi pacö na ba öcamö gini gin mörö, kec bino miögi wile i yoo piën jö mökö ki kin-gi öya ki kanya bor." 4 Ëka ëlúbkörë ögamö ni, "Kara wan ëtwërö nwongo cem na römö pïdhö lwak jö ni ki kwene na kany obedo thim?" 5 Yecu openyogi ni, "Ogati adi na un itye ködë?" Gin ögamö ni, "Ogati abirö." 6 Cë Yecu okobo ni lwak ëk obed gini piny. Ën ökwanyö ogati abirö, öpwöyö Obanga ëka opokogi, cë ömïö both ëlúbkörë ëk opok gini both lwak. 7 Gin thon onwongo tye gini ki rëc ariö na thithiñö. Yecu öpwöyö Obanga ëka okobo n'ëlúbkörë ëk opokgi. 8 Jö kibëc ocemo naka oyeng gini. Ëka kinge cem, ëlúbkör Yecu öcökö gini nginy cem n'ötütüra pong aditi abirö. 9 Jö n'onwongo tye kunön onwongo römö elip angwën. Cë Yecu okobo ni lwak ëk ödök gini pacö kinge cem. 10 Cücüth, Yecu ödönyö i yeya k'ëlúbkörë ëka öcïdhö yo lobo Dalmanutha. 11 I karë n'Eparicayo mökö owinyo gini ni Yecu othuno, gin obino ëka openyo gini Yecu

anyuth n'öya ki i polo më tëmö ën. 12 I karë na Yecu owinyo köp ni, öcür rwök ki i cwinye ëka okobo ni, "Pingö jö më karë ni mitö gini anyuth më tango? An akobo niwu köp adyer, ba abino nyutho ni jö më karë ni koth anyuth mörö kékën." 13 Cë Yecu öya ökö ki bothgi, ödönyö i yeya, ëka öngölö i nam yo löka tung ca. 14 Ëlúbkör Yecu onwongo wigí owil ökö më makö ogati i wothgi. Gin onwongo ömakö ogati acël kékën i yeya. 15 Cë Yecu öcïkögi ni, "Myero igwökërë unu ki kom thöbi k'Eparicayo ëka më k'Erode." 16 Gin öcakö twak i kin-gi kën-gi ni, "Ën tye ka kobo köp ni piën onu ba ëmakö ogati mörö." 17 Yecu ongeö ngö n'onwongo gin tye ka twakö cë openyogi ni, "Pingö itye unu ka twak ni ba imakö unu ogati mörö? Un pod bara inënö onyo iniang unu? Cwinywu pod nwang?" 18 Itye unu ki wangwu cë ba ineno unu. Itye unu ki ithwu cë ba iwinyo unu piny. Ba itwërö unu po i kom gin mörö kékën? 19 I karë na an apïdhö jö elip abic k'ogati abic, aditi adi më nginyë n'odong na un i'cökö?" Ëlúbkör Yecu ögamö ni, "Apar ariö." 20 "Ëka i karë na an apïdhö jö elip angwën k'ogati abirö, aditi adi më nginyë na un i'cökö?" Cë gin ögamö ni, "Abirö." 21 Ëka Yecu openyogi ni, "Un pod bara iniang?" 22 I karë n'othuno gini i Bethsaida, jö mörö okelo athöö wang both Yecu, cë gin ökwaö ën më gudo athöö wang. 23 Ëka Yecu ömakö cing athöö wang cë öpëö yökö i ngee pacö. Cë öngülö laö dhögë i wangë, oketho cingë i kome ëka openyo ni, "Itye ka nënö gin mörö?" 24 Ëcwö ni önënö malö cë okobo ni, "Eyo, atye ka nënö jii, ëntö gin tye ka nen kamë yen na tye ka woth." 25 Cë Yecu döki ogudo wang ëcwö ni ëka wangë öyabërë cë öcakö nënö jami kibëc na bër. 26 Yecu okobo ninë ëk öcïdhö yo pacö thurgi nakun cïkö ni, "Kür i'icidh ikob ni ngat mörö ki i pacö." 27 Yecu ëka ëlúbkörë öya gini ki i Galilaya ëka öcïdhö gini i peci na cwök ki Cecaria Pilipi. Na gin onwongo tye i woth, ën openyogi ni, "Jii mönö kobo ni an abedo nga?" 28 Gin ögamö ni, "Jö mökö kobo ni in Jon Abatica, mökö kobo ni in Eliya, ëka jö nökenë kobo ni in ibedo ngat acël i kin edwarpiny." 29 Cë Yecu openyogi ni, "Ëntö un kono, ikobo ni an abedo nga?" Petero ögamö ni, "In ibedo Meciya." 30 Ëntö Yecu öcïkögi ni kür okob gini ni ngat mörö köp i kome. 31 Cë Yecu öcakö pwonyogi ni Wod ka Dhanö myero ölim can na pol ëka edite, ëlamdhök na dito, ëka epwony cik bino kwërö ën ökö. Ebino neko ën, ëntö kinge ninö adek ën bino cer ki i lyël. 32 Yecu ötwakö köp ni kanyalër both ëlúbkörë. Ëka Petero ökwanyö ën thenge cë öcakö coco Yecu pi kobo koth köp ni. 33 Ëntö Yecu öwirë ëka önënö ëlúbkörë, cë ocoko Petero na kobo ni, "Dök i ngea, Catan! Piën

thamani ba lübö më k'Obanga ëntö më ka dhanö." 34 Cê Yecu ocwodo lwak ëka ëlûbkörë bothe cê okobo nî, "Ka ngat mörö mîtö bedo alûbköra, myero ën kono ôcak kwërë kënë, oting yath ariä mërë, ëka ôlûb kôra. 35 Ka ngat mörö mîtö larö kwö mërë, bino rwenyo kwö mërë ökö. Ëntö ka ngat na rwenyo kwö mërë pîra ëka pî köp më Emuth na Bër, bino larö kwö mërë. 36 Ëka ngö na in ibino nwongo ka itye kî jami më lobo ni kibêc, ëntö irwenyo tiponi ökö? 37 Onyo ngö na dhanö twërö miö më lökö kî kwö mërë? 38 Ka ngat mörö lewic makö i koma ëka kî köpna i karë ni na ba ëwörö Obanga ië ëka më bal, Wod ka Dhanö thon lewic bino makö i kom dhanö nön i karë na ën bino dwogo ködë kî dheo k'Apap mërë ëka më k'emalaika na leng."

9 Ëka Yecu okobo bothgî nî, "An akobo niwu köp adyer nî tye jö mökö n'ocung kany na ba bino bilö gîni thöô naka ka wang n'önëñö gîni ker k'Obanga ka bino kî tükö." 2 Kinge ninö abicël, Yecu ökwanyö Petero, Yakobo, ëka Jon cê öidhö ködgî i wi kidi na bor, kanya onwongo gin tye ië kën-gî. Na gin tye ka nënë, kom Yecu ölökerë na path i nyimgî, 3 ëka böng mërë ödökö na tar na ryëny rwök na ngat mörö kî wi lobo ba römö lwökö nî kömanön. 4 Cê Eliya ëka Muca onen bothgî ëka ôcakö gîni twak kî Yecu. 5 Petero okobo both Yecu nî, "Apwony, bër nî onu më bedo kany! Ëk egër othogo adek, acël na megî, acël më ka Muca, ëka acël më k'Eliya." 6 Petero onwongo ba ngeo ngö na myero ekobi piën lworo onwongo ömakögî rwök. 7 Cê edou obino oumogî ökö, ëka dwön ötwak kî i edou nî, "Man ënë Woda më amara. Winy unu ën." 8 Athura, i karë na gin önëñö ngetgî, gin ba dökî önëñö ngat mörö na path kî Yecu këkën. 9 Na gin tye ka idho pîny kî wi kidi, Yecu öcikögî nî kür okob gîni nî ngat mörö ngö na gin önëñö, naka wang ka Wod ka Dhanö ocer kî i thöô. 10 Gin ba okobo ngö n'ötîmërë both ngat mörö, ëntö obedo penyere gîni i kin-gî kën-gî nî, "Ngö na 'cer kî i thöô' gönyö?" 11 Cê gin openyo Yecu nî, "Pîngö epwony cik ka Muca kobo gîni nî Eliya myero kono ôcak bino?" 12 Yecu ögamö nigî nî, "Adyer Eliya ënë cakö bino ëka dwökö jami kibêc kakarë. Cê pîngö Cöc na Leng kobo nî Wod ka Dhanö bino limö can rwök ëka ebino kwërö ökö? 13 Ëntö akobo niwu nî, Eliya dong obino ökö ëka jî ötimö gin na kibêc na gin mîtö i kome, kite na Cöc na Leng kobo nî bino timërë ködë." 14 I karë na Yecu k'ëlûbkörë adek odwogo gîni yo kanya ëlûbkörë nökenë onwongo ute gîni ië, gin önëñö lwak na pol n'ögürögî dyere ëka epwony cik ka Muca onwongo tye ka pyem ködgî. 15 Na lwak

kibêc önëñö Yecu, ouro gîni rwök ëka öringö gîni më motho ën. 16 Yecu openyo ëlûbkörë nî, "Ngö na un itye ka pyem ködgî ië?" 17 Dhanö mörö acël kî kin lwak ögamö nî, "Apwony, akelo woda bothi, piën ën ute kî tipo na rac na ba yeo nî ën ötwakî. 18 Ëka ka tipo na rac ömakö, rêdhö ën pîny na kome myël amyëla. Cê bwo yenyo kî i dhögë, kaö lakë na tük ëka kome jîng ökö. Akwaö ëlûbkori më ryëmö tipo na rac, ëntö ryëmö ölöögî ökö." 19 Yecu okobo nigî nî, "Un wang rok na yeewu ope i kom Obanga! Abino bedo kodwu naka awene? Abino diö cwinya i komwu naka awene kara? Kel unu awobi nön botha." 20 Cê gin okelo awobi ni bothe. Ëntö i karë na tipo na rac önëñö Yecu, oyuo awobi ni pîny cüth naka örakërë na lör alöra nakun bwo yenyo kî i dhögë. 21 Yecu openyo apap k'awobi nî, "Otero karë na röm kwene na gin ni obedo ka timërë bothe?" Ën ögamö nî, "Anaka na ën pod tidi. 22 Tipo na rac rêdhö ën karë kî karë i mac onyo i pii, më tëmö neko ën ökö. Ëntö ka itwërö timö gin mörö, kica omaki i komwa ëk ikönywa." 23 Yecu okobo n'apap k'awobi nî, "Ka in itwërö! Jami kibêc twërö timërë both ngat mörö këkën na yee." 24 Cücüth apap k'awobi okok kî redo nî, "An ayee, ëntö kónya ëk abed kî yee na thwönë!" 25 I karë na Yecu önëñö nî lwak tye ka ngwëc bino yo bothe, ën ocoko tipo na rac nî, "In tipo na ba miö awobi ni twak ëka winyo pîny, aciki më donyo yökö kî i kom awobi ni ëka kür dökî idöny i kome!" 26 Cê tipo na rac öcakö koko, ëka oyuo awobi ni pîny naka örakërë ëka odonyo yökö kî i kome. Awobi ni onwongo dong cal kî lyël na jö na pol okobo nî, "Ën öthöô ökö." 27 Ëntö Yecu ömakö cîngë ëka ötingo ën malö cê ocung. 28 Kinge na Yecu onwongo tye kënë i öt k'ëlûbkörë, gin openyo ën nî, "Pîngö wan ba ëryëmö cen?" 29 Yecu ögamö nigî nî, "Koth tipo na rac na calö man, ëtwërö ryëmö kî lëga këkën." 30 Yecu ëka ëlûbkörë öya gîni kî i kabedo nön ëka owok gîni i lobo më Galilaya. Ën onwongo ba mîtö nî ngat mörö onge kanya gin onwongo tye ië, 31 piën onwongo mîtö pwonyo ëlûbkörë. Yecu okobo bothgî nî, "Wod ka Dhanö ebino ketho örörö i kome ëka ebino miö i cîng jö na bino neko ën. Ëntö kinge ninö adek, ën bino cer kî i thöô." 32 Ëntö ëlûbkör Yecu ba öniang gîni i ngö n'onwongo ën tye ka kobo, ëka gin onwongo lwor më penyo ën. 33 Kinge na dong othuno gîni i Kaperanaum, na gin dong tye i öt, Yecu openyo ëlûbkörë nî, "Ngö n'onwongo un itye ka pyem ië i yoo?" 34 Ëntö gin öling alinga, piën gin onwongo tye ka pyem i wanga yoo nî nga ënë löö kî dit kî kin-gî. 35 Yecu obedo pîny, cê ocwodo ëlûbkörë apar ariö bothe, ëka okobo nî, "Ka ngat mörö mîtö bedo

dhanō mē acēl, ēn myero obed dhanō mē ajiki ēka obed atic ka jō kibēc.” 36 Cē Yecu ōkwanyō athīn ēka oketho ī dyeregī. Otingo athīn ī kore, ēka okobo nigī nī, 37 “Dhanō mōrō na bino gamō athīn na tidi na cal kī man kī nyīnga, nwongo ōgama. Ēka dhanō mōrō na gama, nwongo ba ōgama an kēkēn ēntō nwongo ōgamō Apapna n’oora.” 38 Jon okobo both Yecu nī, “Apwony, wan ēnēnō dhanō mōrō ryēmō cene kī nyingī, ēntō wan ējūkö ēn piēn onwongo ēn ba tye kukur onu.” 39 Yecu okobo nigī nī, “Kūr ijuku ēn, piēn dhanō mōrō ope na tio tango kī nyīnga ēka dōkī cakō twakō kōp na rac ī koma. 40 Ngat mōrō kēkēn na ba dag onu, nwongo obedo akukur onu. 41 Ka ngat mōrō ōmiōwu pii mē amodha piēn un ibedo jō ka Kiricito, an akobo niwu kōp adyer, dhanō nōn ebino cūlō. 42 “Ka dhanō mōrō ōmiō ngat acēl kī kin ēthīnō nī n’oye ī koma opodho ī bal, bedo na bēr ka etweo pong rego na thwōnē ī ngute cē ebolo kodē ī nam. 43 Cē ka cingi ēnē mii ītīmō bal, ngun ōkö. Bedo na bēr rwōk mē dōnyō ī kwō kī cingi acēl kēkēn na lōō mē dōnyō ī mac na ba thōō ī kapīny kī cingi ariō. (Geenna g1067) 44 Kunōn, kudi na camōgī ba thōō, ēka mac na wangōgī ba nekere. 45 Ka tyeni ēnē teri ī bal, ngun ōkö. Bedo na bēr rwōk mē dōnyō ī kwō kī tyeni acēl na lōō mē boloni ī mac kapīny kī tyeni ariō. (Geenna g1067) 46 Kanya kudigī ba thōō kī iē ēka mac thon ba nekere. 47 Ēka ka wangi ēnē mii ītīmō bal, kōl ōkö. Bedo na bēr rwōk mē dōnyō ī Ker k’Obanga kī wangi acēl kēkēn na lōō mē bedo kī wangi ariō cē eboli kodē ī mac kapīny. (Geenna g1067) 48 Kanya “kudigī ba thōō kī iē ēka mac thon ba thōō.” 49 Piēn kadō na bino lōnyō ngat acēlacēl ēnē mac. 50 Kadō bēr, ēntō ka orwenyo mīt mērē ōkö, ītwērō mīō dōkō na mīt nīngō dōkī? Un myero ibed unu kī rwōm mē kadō ī kinwu ēka ibed unu kī kuc kī jō nōkēnē.”

10 Cē Yecu ōya ōwēkö Kaperanaum ēka ōcidhō yo kupīny ī lobo Yudea ēka yo lōka kulo Jordan. Lwak jō na pol obino dōkī bothe, ēka na calō kite n’ōnaa tīmō kodē, ēn opwonyogī. 2 Eparicayo mōkö obino bothe ēka ōtēmō gīnī ēn nakun epenyo nī, “Cik yeo nī ēk ēcwō ōkwēr dhakō mērē?” 3 Yecu ōgamō nakun penyogī nī, “Ngō na cik ka Muca kobo?” 4 Gīn ōgamō nī, “Muca ōmiō twēr both ēcwō mē cōōnō waraga mē kwēr ēka ōryēm ēn ōkö.” 5 Yecu okobo nigī nī, “Muca ōmiōwu cik nōn pī nwang cwinyu. 6 Ēntō cakērē ī acaki ketho lobo ‘Obanga ocweo ēcwō ēka dhakō.’ 7 ‘Pī tyēn kōp nī ēcwō bino wēkö apap mērē ēka aya mērē, cē rībērē kī dhakō mērē, 8 ēka gīn ariō bino dōkō kom acēl.’ Cē gīn ba dōk bedo jō ariō, ēntō kom acēl. 9 Pī manōn, gīn n’Obanga ōrībō

kanya acēl, dhanō mōrō kūr opok kin-gī.” 10 Ī karē na gīn onwongo tye ī ōt dōkī, ēlūbkōr Yecu openyo ēn ī kom kōp na ēn okobo. 11 Yecu okobo nigī nī, “Ka dhanō mōrō ōkwērō dhakō mērē, cē ōnyōmō dhakō nōkēnē dōkī, nwongo ēn ōdōnyō ī elomi. 12 Ēka ka dhakō ōkwērō cwōrē cē ōnyōmērē k’ēcwō nōkēnē dōkī, nwongo ēn thon ōdōnyō ī elomi.” 13 Ī ninō mōrō acēl jō mōkö okelo ēthīnō both Yecu ēk ogudgī, ēntō ēlūbkōrē ocokogī. 14 Ī karē na Yecu ōnēnō, ōngōō rwōk. Ēn okobo nigī nī, “Wēk unu ēthīnō obin botha ēka kūr ijukugī piēn ker k’Obanga tye pī jō na calō man. 15 An akobo niwu kōp adyer nī dhanō na ba bino gamō ker k’Obanga na calō athīn, ba bino dōnyō iē.” 16 Cē Yecu otingo ēthīnō ī kore ēka oketho cīngē ī wigī cē ōlēgō gum ī komgī. 17 Ī karē na Yecu ōcakō woth mērē ī yoo, ēcwō mōrō ōrīngō ī kōrē, cē orumo cōngē pīny ī nyīme, ēka openyo nī, “Apwony na bēr, atīm ngō ēk anwong kwō na bedo naka?” (aiōnios g166) 18 Yecu ōgamō ninē nī, “Pīngō in icwoda nī abēr? Ngat mōrō ope na bēr, na path k’Obanga kēkēn. 19 In ingeo cik nī: ‘Kūr ineki, kūr īdōny ī elomi, kūr īkwal, kūr ibed acaden mē twodo, kūr ībūr dhanō mōrō, wōr apapni ēka ayani.” 20 Ēcwō nī ōcakō gamō nī, “Apwony, atyeko gwōkö cik nōn kibēc cakērē ī wang thinona.” 21 Yecu ōnēnō ēcwō nī, cē ōmarō ēn, ēka okobo ninē nī, “Gin mōrō acēl ēnē pod orem kī bothi. Apē ēk īcidh īcadh jamini na in iute kodē kibēc ēka īmīī līm mērē both ēcan, ēka ibino bedo kī lōnyō na thwōnē ī wi polo. Cē ibin, īlūb kōra.” 22 Ī karē n’ēcwō nī owinyo Yecu ka ōtwak nī kōmanōn, wangē ōcakō lōkērē ōkö, cē ōdōk cen kī cwer cwinyo, piēn ēn onwongo tye kī lōnyō na thwōnē rwōk. 23 Yecu ōwīrē cē ōnēnō ēlūbkōrē ēka okobo nigī nī, “Bino bedo na tēk both ēlōnyō mē dōnyō ī ker k’Obanga!” 24 Ēlūbkōr Yecu obedo kī ur rwōk ī kōp mērē. Ēntō Yecu okobo dōkī nī, “Ēthīnōna, bino bedo na tēk nīngō mē dōnyō ī ker k’Obanga! 25 Bedo na yot pī kīnaga mē dōnyō kī wang libira nī lōōnō pī alōnyō mē dōnyō ī ker k’Obanga.” 26 Ēlūbkōr Yecu dōk ouro rwōk ēka ōtwak ī kin-gī kēn-gī nī, “Cē nga na dong twērō larē?” 27 Yecu ōnēnōgī cē okobo nī, “Kī both dhanō, ba twērē, ēntō kī both Obanga, jami kibēc twērē.” 28 Petero okobo both Yecu nī, “Wan ēwēkö jami kibēc mē lūbō kori.” 29 Yecu ōgamō nī, “An akobo niwu kōp adyer nī ngat mōrō ope n’ōwēkö pacō mērē, onyo utmego mērē onyo aya mērē onyo apap mērē onyo ēthīnō mērē onyo pwothi mērē pīra ēka pī kōp mē Emuth na Bēr, 30 na ēn ba bino nwongo jami na kadhō manōn wang mia acēl ī karē nī, udi, utmego, ayagī, ēthīnōgī, ēka jamigī kanya acēl k’ayela. Ī karē mē ajiki dhanō nōn bino nwongo kwō na bedo naka. (aiōn g165, aiōnios

g166) 31 Ēntō jō na pol na kobedini obedo mē acaki bino gini dong cen, ēka jō n'odong cen bino tēlō anyim." 32 Ī karē na gin tye ka cidhō yo Jerucalem, nakun Yecu ēnē ōtēlō anyim, ēlūbkōrē ouro rwōk ēka jō n'onwongo lūbō kōrē obedo gini kī lworo. Ēn dōkī otero ēlūbkōrē apar arīō kī thenge ēka okobo bothgi ngō na bino tīmērē ī kome. 33 Yecu okobo bothgi nī, "Onu ēcidhō naka yo Jerucalem, ēka Wod ka Dhanō ebino ketho ōrōrō ī kome both ēlamdhōk na dito ēka epwony cik ka Muca. Gin bino ngōlō thōō ī wie ēka ebino miō ēn ī cing Erok, 34 na bino gini nywarō ēn ēka ngūlō laō dhōgi ī kome, pwodo kī del ēka eneko ēn ōkō. Kinge nīnō adek, ēn bino cer." 35 Yakobo ēka Jon, awope ka Jebedayo, obino gini both Yecu ēka okobo nīnē nī, "Apwony, wan ēmitō nī itim nīwa gin mōrō kēkēn na wan ebino penyoni." 36 Yecu openyogi nī, "Ngō na un itimō nī an atīm niwu?" 37 Gin ōgamō nī, "Wēk ngat acēl kī kinwa obed ī nget cingi kucem ēka ngat nōkēnē obed ī nget cingi kucam ka in ibino bedo ī then ker mē dheoni." 38 Ēntō Yecu okobo nigī nī, "Un ba ingeo ngō na un ipenyo. Un itwērō modho k'ekopo mē can na an amodho kōdē, onyo itwērō unu batica kī koth batica mē can na an abino batica kōdē?" 39 Gin ōgamō nī, "Wan ētwērō." Yecu okobo nigī nī, "Okopo na an abino modho kōdē, un thon ibino modho kōdē ēka kit batica n'ebino batica an kōdē, un thon ebino baticawu kōdē. 40 Ēntō kōp mē bedo ī nget cinga kucem onyo kucam, pathi an ēnē amīō. Obanga ēnē bino miō kabedo nōn both jō na ēn ōyērō." 41 Ī karē n'ēlūbkōr Yecu apar owinyo kōp nī, cwinygi ōwang ī kom Yakobo ēka Jon. 42 Cē Yecu ocwodo kībēc bothe ēka okobo nigī nī, "Un ingeo unu nī jō n'engeogi kamē ēlōc k'Erok, lōōgi kī twērō ēka editegi na malō thon bedo kī twēr ī komgi. 43 Un kūr ibed unu nī kōmanōn, ēntō ngat na mitō bedo adit kī kinwu, myero obed aticwu. 44 Ēka ngat na mitō bedo dhanō mē acēl, myero obed opii ka jō kībēc. 45 Naka thon Wod ka Dhanō ba obino nī ēk etii nīnē ēntō mē tic pī jīi ēka mē miō kwō mērē mē kōkō jō na pol." 46 Yecu kanya acēl k'ēlūbkōrē obino gini ī Jeriko. Ī caa na gin dong onwongo yaa mē wēkō Jeriko, lwak na pol ōlūbō kōrgi. Ēcwō na wangē ōthōō, na nyingē Batulumayo (wod ka Timayo) onwongo obedo ī nget yoo kwaō kwac. 47 Ī karē na ēn owinyo nī Yecu mē Najaret ēnē tye ka wok, ēn ōcakō redo na kobo nī, "Yecu, Wod ka Daudi, kīca omaki ī koma!" 48 Jō na pol ocoko ēn nī ēk ōling ōkō, ēntō ēn ōmēdērē kī redo rwōk, "Wod ka Daudi kīca omaki ī koma!" 49 Yecu ocung ēka okobo nī, "Cwod unu ēn obin." Cē gin dong ocwodo athōō wang na kobo gini nīnē nī, "Dīi cwinyi! Yaa malō! Ēn tye ka

cwodoni." 50 Athōō wang obolo bōng mērē thenge, opye kī tyēnē ēka obino both Yecu. 51 Yecu openyo ēn nī, "Ngō na in itimō nī atīm nini?" Athōō wang okobo nī, "Apwony, amitō wanga ōnēn piny." 52 Yecu okobo nīnē nī, "Apē cidhī, yeeni ocangi ōkō." Cūcūth wangē ōnēnō piny ēka ōcakō lūbō kōr Yecu.

11 Ī karē na Yecu k'ēlūbkōrē dong cwōk thuno ī Jerucalem, gin obino ī Betepage ēka Betania na cwōk kī tyēn Kidi mē Jeituni. Ēn ooro ēlūbkōrē arīō, 2 ēka okobo nigī nī, "Apē unu ī pacō na tye ī nyimwu, ēka cūcūth na un idōnyō iē, ibino nwongo unu athīn kana n'etweo kunōn, na ngat mōrō bara ōidhō ī wie anaka yam. Gōny unu ēka ikel unu kany. 3 Ka ngat mōrō openyowu nī, "Pīngō igōnyō unu kana nōn?" Kob unu nīnē nī, "Rwoth ēnē mitō ēka ebino dwongo ōkō piōpiō." 4 Ēlūbkōr Yecu arīō nī ōcidhō, ēka onwongo gini athīn kana n'etweo yōkō ī nget yoo ī dhō wangkac, cē ōgōnyō gini. 5 Jō mōkō n'onwongo ocung kunōn openyogi nī, "Ngō na un itye ka timō, nakun igōnyō unu athīn kana nōn?" 6 Gin ōgamō kite na Yecu onwongo okobo nigī kōdē, ēka eyeo nigī mē tero. 7 Cē gin dong okelo athīn kana both Yecu ēka ōpēdhō gini bōng-gī ī dye ngee, ēka ēn obedo iē. 8 Jō na pol ōpēdhō bōng-gī ī dye yoo, nakun jō nōkēnē pēdhō jang yen na gin ōtūrō kī ī pwothi. 9 Jō n'ōtēlō anyim ēka jō n'ōlūbō kōrē oredo gini kī wōō nī, "Ocana!" "Gum obed ī kom ngat na tye ka bino kī nying Rwoth!" 10 "Gum obed ī kom ker ka kwarō onu Daudi na tye ka bino!" "Ocana na tye malō ī wi polo!" 11 Yecu ōdōnyō ī Jerucalem ēka ōcidhō ī dyekal ōt k'Obanga. Ēn ōnēnō jami kībēc, ēntō kite n'onwongo piny dong cwōk cido, ēn ōcidhō ī Betania kanya acēl k'ēlūbkōrē apar arīō. 12 Kodiko mērē na gin tye ka yaa wēkō Betania, kec onwongo oneko Yecu. 13 Ēn ōnēnō yath ōlam kī cecen na pote oluk, Yecu ōcidhō mē nēnō ka ētwērō nwongo nyige mōrō. Ī karē na ēn othuno ī thē yath, ēn ba onwongo gin mōrō ēntō pote kēkēn, piēn karē nōn ba obedo karē n'ōlam nyak iē. 14 Cē Yecu okobo nī yath nī, "Ngat mōrō myero kūr dōkī ōcam nyigi." Ēka ēlūbkōrē owinyo ēn ka kobo. **(aiōn g165)** 15 Ī karē na gin othuno ī Jerucalem, Yecu ōdōnyō ī dyekal ōt k'Obanga ēka ōcakō ryēmō jō n'onwongo tye ka cadhō jami ēka ēwil. Ēn ōlōkō mēja ka jō na lōkō ciling atarō ēka thene ka jō na cadhō amam. 16 Yecu ba oyeo nī ngat mōrō ōngōl dyekal ōt k'Obanga kī jami mōrō mē acadha. 17 Ēn okobo nigī nī, "Cōc na Leng kobo kanya aleng nī, "Ōda ebino cwodo nī ōt mē lēga pī lobo kībēc." Ēntō un ilōkō ōdōkō kabedo n'eyak pono iē." 18 Ī karē n'ēlamdhōk na dito ēka epwony cik ka Muca owinyo gini ngō

na Yecu ötwakö, gín öcakö rangö kit yoo mörö na myero enek ki Yecu ködë. Gín onwongo tye ki lworo i kome, piën lwak onwongo uro pwony mërë. 19 Na piny dong cido, Yecu ëka ëlëbkörë öya gini ökö ki i Jerucalem. 20 Kodiko mërë na gín tye ka wok i nget yath ölam na Yecu ölamö, ëlëbkör Yecu önenö yath ölam na dong ötal ökö anaka ki orii naka malö. 21 Wi Petero opo ëka öcakö kobo ni Yecu ni, "Apwony, nën! Yath ölam na in ilamö ötal ökö!" 22 Yecu ögamö ni, "Bed unu ki yee i kom Obanga. 23 An akobo niwu köp adyer, ka ngat mörö okobo ni kidi ni, 'Mukiri, ëk ipodh i nam,' ëka ka ba obedo k'akalakala i cwinye ëntö yee ni ngö na ën ebino kobo bino timërë, ebino timö ninë. 24 Pi manön akobo niwu, gín mörö këkën na un ibino kwaö ki lëga, bed unu ki yee ni ityeko unu nwongo, ëka bino bedo mewu. 25 Ëntö ka un itye ka lëga, më acël tim kica both ngat mörö këkën na köp mörö tye i kinwu ködë, ëk Apapwu na tye malö i wi polo thon ötim niwu kica i kom balwu." 26 "Ëntö ka ba itimö unu ni dhanö kica, cë Apapwu na tye malö i wi polo thon ba bino timö kica niwu i kom balwu." 27 Yecu ëka ëlëbkörë döki odwogo gini i Jerucalem. Na Yecu onwongo tye ka woth i dyekal öt k'Obanga, ëlamdhök na dito, epwony cik ka Muca, ëka edite obino gini bothe. 28 Gín openyo Yecu ni, "Koth twër mënë n'ömio in itimö jami ni kibëc? Nga n'omii twërö më timögü?" 29 Yecu ögamö nigü ni, "An abino penyowu peny acël. Gam unu nina, ëka an abino kobo niwu koth twërö na an atye ka timö ki jami ni. 30 Twërö ka Jon më batica öya ki i polo onyo ki both dhanö? Gam unu nina!" 31 Gín öcakö larö köp nön i kin-gi kën-gi ëka okobo gini ni, "Ka onu ekobo ni öya ki i polo, ën bino penyo ni, 'Pingö ba iyee unu i kom Jon?' 32 Ëntö ka onu ekobo ni, 'Öya ki both dhanö—'" (Gín onwongo lworo lwak, piën jö kibëc ngeo gini ni Jon adyer onwongo obedo adwarpiny.) 33 Cë gín dong ögamö ni Yecu ni, "Wan ba engeo." Yecu okobo nigü ni, "An thon ba abino kobo niwu koth twër mënë n'ömio an atio jami ni."

12 Cë Yecu ötwak ködgü ki carolok ni, "Yam onwongo tye dhanö mörö n'öpüdhö öläk i pwodho mërë. Ën öcëlö pwodho mërë nön ökö ki cël, ökünyö bur ië më biö pig öläk, ëka ögërö pem më kür ië. Cë ën ömiö pwodho öläk both epang pwodho mörö ëka ën öcüdhö ökö i lobo nökenë. 2 Na karë më püdö öläk dong örmö, ën ooro atic mërë both epang pwodho ëk öcüdhö ööm ninë nyig öläk mörö n'öcëk. 3 Ëntö epang pwodho ömakö atic n'onwongo eoro, cë epwodo ëka ëryëmö ödök cen ki cingë nono. 4 Won pwodho öläk ooro atic mërë nökenë döki, ëntö epang

pwodho opwodo ën i wie ëka etio tic më lewic i kome. 5 Won pwodho öläk ooro atic mërë nökenë döki, ëka manön gín oneko ökö. Ën ooro jö nökenë na pol; mökö ki kin-gi epwodogü, ëka nökenë enekogü. 6 "Won pwodho onwongo pod odong ki ngat acël më aora, wode n'onwongo ën marö. Më ajiki mërë ën ooro wode nakun kobo ni, 'Gín bino wörö woda.' 7 "Ëntö epang pwodho ötwak i kin-gi kën-gi ni, 'Man ënë alak jami. Bin unu, ëk enek ën ökö, ëka jami më alaka bino bedo më onu.' 8 Cë gín dong ökwanyö wod ka won pwodho öläk eneko ökö, ëka ebolo yökö ki i pwodho öläk. 9 "Ngö na dong won pwodho öläk bino timö? Ën bino ëka neko epang pwodho nön ökö kibëc cë miö pwodho öläk nön both jö nökenë. 10 Un ba ikwanö unu ki i Cöc na Leng ni: "Kidi n'egedo ökwërö ënë ödökö kidi më gwic öt. 11 Rwoth ötimö man, ëka obedo gín më aura ki wang onu?" 12 Ëtëla k'Eyuda örangö gini yoo më makö Yecu piën ongeogü gini ni ën onwongo ötwakö carolok i komgi. Ëntö gín onwongo lworo lwak. Cë gín öya öwëkö Yecu ëka öcüdhö gini ökö. 13 Kinge, ëtëla dini ooro gini Eparicayo mökö ëka jö na cwakö Erode both Yecu ëk enwong köp mörö ki i dhögë na miö ëtwërö makö ën. 14 Gín obino bothe ëka okobo gini ni, "Apwony, wan ongeogü ni in ibedo dhanö na kite atir. In ba iwëkö jö nökenë kobo nini ngö na myero itim onyo ikobi. Ëntö in ipwonyo yoo k'Obanga na rwaterë ki köp na tye adyer. Pore më cülö ooro both Cija onyo pe? 15 Wan myero ëcül ooro onyo kür ëcül?" Ëntö Yecu ongeogü ökörägi nön ökö. Ën openyogü ni, "Pingö itye ka tëmöna nyo? Nyuth nina denario ëk anën." 16 Gín okelo acël bothe, ëka Yecu openyogü ni, "Cal ëka cöc na tye ië, obedo më ka nga?" Gín ögamö ni, "Më ka Cija." 17 Cë Yecu okobo nigü ni, "Eyo, miü unu jami ka Cija both Cija, ëka jami k'Obanga both Obanga." Ëka gín obedo ki ur rwök i kom Yecu. 18 Cë Ecadukayo, na kobo gini ni cer ka jö n'öthöo ope, obino gini both Yecu ki peny. 19 Gín okobo ni, "Apwony, Muca yam ömiöwa cik ni ka ëcwö mörö öthöo n'öwëkö dhakö mërë na ba önywölö ëthinö mörö, ömin mërë na kwö myero olak dhakö nonu ëk önywölö ëthinö i wi ömin mërë. 20 Yam onwongo utmego mörö ute gín abirö. Më acël mërë onyomo ëka öthöo na ba önywölö athin. 21 Ömin mërë më ariö öläk dhakö nön, ën thon öthöo ökö na ba önywölö ködë athin mörö. Ëka ötimërë both ömin mërë më adek ni kömanön. 22 Utmego abirö ni kibëc öläk ën ëntö ba önywölö gini ëthinö mörö. Më ajiki mërë, dhakö ni thon öthöo ökö. 23 Dhakö ni dong bino bedo më ka nga i karë më cer? Piën utmego abirö kibëc onwongo öläk ën." 24 Yecu ögamö nigü ni, "Un ba irwenyo unu pi köp ni,

piën ba ingeo unu Cóc na Leng onyo tēkó k'Obanga. 25 Piën ka jō n'ōthōō ocer, gín ba dōk nyomo onyo ēnyōmōgi. Gín bino bedo na calō emalaika na tye i wi polo. 26 "Ēntō kobedini, kōp na makō cer ka jō n'ōthōō, un bara i'kwanō unu kī kom cōc ka Muca, kī kōp na makō bunga na lyēl, kite n'Obanga okobo nī Muca kōdē nī, 'An abedo Obanga k'Abraam, Obanga ka Icaka, ēka Obanga ka Jakob'?" 27 Ēn ba obedo Obanga ka jō n'ōthōō, ēntō Obanga ka jō na kwō. Un irwenyo unu rwōk." 28 Apwony cīk ka Muca mōrō onwongo ocung kunōn winyo ngō n'onwongo etye ka larō. Ēn ōniang nī Yecu ōgamō kōp na bē, cē openyo nī, "Kī kom cīk kībēc, mēnē na pīrē tēk rwōk?" 29 Yecu ōgamō nī, "Cīk na pīrē tēk rwōk ēnē man: 'Winy unu jō Icarael! Rwoth Obangawa ēnē obedo Obanga acēl ēka Rwoth. 30 Ēka myero īmar Rwoth Obangani kī cwinyi kībēc, kī tiponi kībēc, kī thamani kībēc, ēka kī tēkōni kībēc.' 31 Mē arīō mērē pīrē tēk na rōm arōma: 'Mar awodhi na calō īmarō komi keni.' Cīk mōrō nōkēnē ope na pīrē tēk na lōō man." 32 Apwony cīk ka Muca ōgamō nī, "Eyo apwony, in ikobo na bē. In i'wakō kōp n'atīr nakun ikobo nī Obanga tye acēl kēkēn ēka obanga nōkēnē ope. 33 Ēka an angeo nī pīrē tēk mē marō ēn kī cwinyi kībēc ēka kī thamani kībēc ēka kī tēkōni kībēc, ēka mē marō awodhi na calō īmarō komi keni. Man ēnē pīrē tēk na lōō tyēr awanga ēka gín aryēda." 34 Ī karē na Yecu ōniang nī apwony cīk ka Muca ōgamō kī ryēkō, ēn okobo nīnē nī, "In ba ibor kī ker k'Obanga." Ēka cakērē i caa nōn ngat mōrō ba dōk ōthamō mē penyo Yecu kī peny mōrō nōkēnē. 35 Kinge na Yecu onwongo tye ka pwonyo jīi i dyekal ōt k'Obanga, ēn openyogi nī, "Pīngō epwony cīk ka Muca kobo nī Meciya obedo akwar Daudi? 36 Daudi kikome ōtwakō kī tēkō ka Tipo Naleng, na kobo nī, "'Rwoth okobo both Rwodha: Bed i nget cīnga mē kucem naka ka an aketho langni i thē tyeni.' 37 Daudi kikome cwodo ēn nī, 'Rwoth.' Ēn dōk twērō bedo wode nīngō?" Jō na pol owinyo kōp mērē kī yom cwiny. 38 Ī karē na Yecu tye ka pwony, ēn okobo nī, "Gwōkērē unu kī kom epwony cīk ka Muca. Piën gín marō woth rīmo pīny nakun ruko gīni bōng na boco ēka mitō gīni nī jīi omothgi kī thē cuk, 39 ēka marō gīni bedo i kabedo na bēcō mē dheo i ōt Cinagoga ēka kabedo mē wōrō i karama. 40 Gín maō udi ka mon thōō, bedo gīni lēgō lēga na boco mē nyuthere. Koth jō ni ebino pwodogī na rac rwōk." 41 Yecu obedo pīny i nget kanya eketho tyēr iē kī i ōt k'Obanga. Ēn ōnēnō lwak ka bolo tyēr i canduk līm. Ēlōnyō na pol obolo līm na thwōnē. 42 Cē dha thōō n'obedo acan obino ēka obolo cīlīng na nyige gín arīō. 43 Yecu ōcakō cwodo ēlūbkōrē bothe ēka okobo

nī, "An akobo niwu kōp adyer, dha thōō ni n'obedo acan ēnē obolo tyēr i canduk līm na lōō jō nōkēnē kībēc na tye ka miō tyērgī. 44 Piën gín ōmiō tyērgī n'ōgīthō gīni kī kom līmgi na thwōnē, ēntō dha thōō ni n'obedo acan, ōmiō jami kībēc n'onwongo tye bothe na myero ēn ōkwō kōdē."

13 Na Yecu onwongo tye ka yaa kī i ōt k'Obanga, alūbkōrē acēl ōcakō kobo nī, "Apwony, nēn kit na kite ni thwon kōdē ēka kit na gedo mērē bēcō kōdē!" 2 Yecu okobo nīnē nī, "Un i'nēnō gedo na thwon ni? Ba tye kidi mōrō kany n'ebino wēkō i wi wadī na ba ebino bolo ōkō pīny." 3 Kinge, Yecu obedo pīny i wi Kidi mē Jeituni nakun opimere kī ōt k'Obanga, Petero, Yakobo, Jon, ēka Anderiya ōcakō gīni penyo ēn na ut kēnē nī, 4 "Kob niwa, kōp ni bino tīmērē awene? Ēka dōkī anyuth mērē ēnē ngō na bino nyutho nī kōp nōn cwōk cobere?" 5 Yecu ōcakō kobo nīgī nī, "Gwōkērē unu, ēk ngat mōrō kūr ōbwōlwu. 6 Piën jō na pol bino bino gīni kī nyīnga na bino kobo gīni nī, 'An ēnē ēn,' ēka bino miō jō na pol rwenyo ōkō. 7 Ka ibino winyo unu pī lwēny ēka anīi mē lwēny, kūr i'mīi cwinywu opodhi, koth jami ni myero ōtīmērē, ēntō nwongo ajiki pīny podi. 8 Rok bino lwēny i kom rok nōkēnē, ēka ker bino lwēny i kom ker nōkēnē. Oyeyeng bino yengo kabedo na pol ēka kec thon bino podho. Manōn ēnē acaki mē can na bino podho i wi lobo. 9 "Ka jami ni bino tīmērē, myero i'gwōkērē unu. Ebino terowu i nyim okiko both ēlōc ēka ebino pwodowu i cinagoga gīni. Ibino cung unu i nyim ēlōc ēka i nyim rwodhi pīra na calō ecaden bothgi. 10 Mē acēl kōp mē Emuth na Bēr myero ētīt i wi lobo thūkūl n'ajiki bara othuno. 11 Ka ēmakōwu, ēka ekelowu i nyim okiko, kūr ipar unu ngō nī bino kobo ēntō kob unu ngō n'ebino mīōwu i caa nōn, piën pathī un ēnē ibino twak ēntō Tipo Naleng ēnē bino twak. 12 Omega bino miō ōmīn mērē mē aneka, apap bino miō athīn mērē mē aneka. Ēthīnō bino jēm i kom enyodogī ēka miō enekogī. 13 Jō kībēc bino dagōwu pī nyīnga. Ēntō ngat na bino cung na tēk naka i ajiki bino larē. 14 "Ēntō ka i'nēnō unu gín mōrō mē kwer na balō cwiny jō, n'ocung kanya myero kūr ocung iē (ēk dhanō na kwanō ōniang iē), cē jō na tye gīni i Yudea myero ōrīng gīni i wi kite. 15 Dhanō na tye i wi ōdē kūr oidhi pīny, onyo ōdōny i ōt mē kwanyō gín mōrō. 16 Dhanō na tye i pwodho, kūr ōdōk cen mē ōmō bōngū mērē. 17 Mon na yeco ēka mon na dōdhō ēthīnō bino nēnō can i karē nonu. 18 Lēg unu ēk kōp ni kūr ōtīmērē i karē mē cwīr, 19 piën karē nōn bino bedo thwōn can na thwōnē rwōk na naka yam bara ōtīmērē i wi lobo, cakērē i karē

n'Obanga ocweo ki lobo naka othuno kodë tin, ëka ba bino timërë doki. 20 Ka Rwoth onwongo ba öngölö ninö nön na cecek, onwongo ngat mörö acël thon ba bwöth. Ëntö pi jö n'Obanga öyërogï, ënë ömiö ën öngölö wel ninö nonu ödökö na nönök. 21 "I karë nön, ka dhanö mörö okobo niwu ni, 'Nën, Meciya ene,' onyo ni, 'Nën, ën ëca,' kür iyee unu. 22 Piën jö na kobo ni gin ebodo Kiricito ëka edwarpiny na twot bino bino ëka bino tio ginï anyuth ëka tango na dito ëk ka twërë ëbwöl ginï naka jö n'ëyërogï. 23 Gwökërë unu dong, an atyeko dong kobo ökö niwu jami kibëc na bino timërë na karë bara örömo. 24 "Ëntö i karë nonu, kinge can na thwönë nön, "ceng bino cido ökö nicuc, ëka dwe thon ba bino ryëny, 25 cër bino podho ginï ki i wi polo, ëka tükö kibëc më wi polo bino yengere." 26 "I karë nön jö kibëc bino nönö Wod ka Dhanö na tye ka bino ki i pöl ki twër na dit ëka dheo. 27 Ëka ën bino oro emalaika më cökö jö mërë n'ëyërogï ki i thwok lobo angwën më ajiki lobo naka i ajiki më polo. 28 "Nwong unu pwony ni ki i kom yath ölam. Ka jangë öcakö löth, ëka pote odonyo, un ingeo ni oro dong cwök. 29 Kömanön thon, ka inënö unu jami ni tye ka timërë, itwërö unu ngeo ni dwogo mërë dong cwök, tye i dholokek. 30 An akobo niwu köp adyer, rok më karë ni ba bino poth naka ka jami ni kibëc ötimërë. 31 Polo ëka lobo bino bino rwenyo ökö, ëntö köpna ba bino rwenyo. 32 "Ngat mörö ope na ngeo ninö nön onyo caa nön, naka thon emalaika na tye i wi polo, onyo Wod, ëntö Apap kékën ënë ngeo. 33 Gwökërë unu! Bed n'ineno unu! Ba ingeo unu awene na karë nön bino römö köddë. 34 Bino ka Wod ka Dhanö röm aröma ki dhanö na tye ka cidhö ökö kany mörö na bor. Ën ka yaa ki i pacö, miö twërö both etic mërë, ngat acëlacël ki tic na mëgë, nakun cikö ngat na gwökö dhö wangkac ni ëk obed na wangë thwolo. 35 "Un thon, bed unu na wangwu thwolo, piën ba ingeo unu awene na won öt bino dwogo kodë onyo bino dwogo kothyeno onyo dingwor onyo na thwön gwönö kok onyo kodiko. 36 Ka ën bino dwogo athura, kür imiï ën onwongwu ininö. 37 Ngö na an akobo bothwu, an akobo ni jö kibëc: 'Bed na wangwu thwolo!'"

14 Onwongo odong ninö arïö më thuno i Karama më Poth ëka Karama më Ogati na Thöbi ope ië. Ëlamdhök na dito ëka epwony cik ka Muca onwongo tye ka rangö ginï kite na myero ëmak ki Yecu i müng ëka enek ën ökö. 2 Gin okobo ni, "Kür ëmak Yecu i karë më Karama më Poth, ëk kür ömiï jïi okel wö." 3 I karë na Yecu tye ka cem i öt ka Cimon n'onwongo obedo adhóbü i Betania, dhakö mörö obino ki cupa möö narad na ngwece kur na wel mërë

tëk. Ën ötürö dhö cupa ëka önyö möö i wi Yecu. 4 Jö mökö n'onwongo tye ginï kany nön ökëcö ginï rwök ëka ötwak kën-gi ni, "Pïngö ëbalö möö ni na ngwece kur abala? 5 Onwongo myero ëcadh i wel na kadhö denario mia adek ëk ëmiï both ëcan!" Cë gin ocoko dhakö nön ki gero. 6 Ëntö Yecu ögamö nigï ni, "Wëk unu dhakö nön kënë. Pïngö kara icoko unu ën? Ën ötimö gin na bër botha. 7 Ëcan itye unu ködgï ninö kibëc ëka caa mörö kékën itwërö unu könyögi. Ëntö ba ibino unu bedo köda ninö kibëc. 8 Ën ötimö gin na ën römö ëka owiro koma më aika na caa bara örömo. 9 An akobo niwu köp adyer ni kanya kibëc n'ebino titö köp më Emuth na Bër ië i wi lobo thükül, gin na dhakö ni ötimö thon ebino kobo pirë, ëk obed më po pi ën." 10 Cë Yuda Ikariot, na ënë dhanö acël i kin ëlübör Yecu apar arïö, öcidhö both ëlamdhök na dito ëk ëyüb kit na myero ëmiï Yecu bothgi. 11 I karë na gin owinyo ngö na ën onwongo mitö timö nigï, cwinygi obedo na yom, ëka öcikërë ginï më miö Yuda Ikariot ciling. Cë Yuda öcakö rangö karë na bër na ën ërömo miö Yecu bothgi. 12 I ninö më acël më Karama më Ogati na Thöbi ope ië, ninö na yam ëngölö k'athin römö më Poth, ëlübör Yecu openyo ginï ën ni, "Ka kwene na in imitö ni wan ëcidh ëyüb nini cem më Poth ië?" 13 Cë Yecu ooro jö arïö ki kin ëlübörë nakun cikögi ni, "Apë unu naka i Jerucalem, ibino unu romo k'ëcwö mörö n'öyëö agulu pii. Lüb unu körë, 14 ëka kob unu both won öt na ën bino dönyö ië ni, 'Apwony okobo ni öt wele ute kwene ëk ëcam cem më Poth ië k'ëlübörë?'" 15 Ën bino nyutho niwu öt na lac na tye malö, n'eketho jami kibëc ië. Kany nön ënë iyüb unu cem na më onu ië." 16 Ëlübör Yecu arïö öcidhö ginï yo Jerucalem ëka onwongo ginï jami kibëc kite na Yecu okobo nigï köddë. Cë gin dong öcakö yübö cem më Poth kunön. 17 Na dong othuno kothyeno, Yecu obino k'ëlübörë apar arïö. 18 I karë na gin tye ka cem, Yecu öcakö kobo nigï ni, "An akobo niwu köp adyer ni ngat acël ki kinwu bino ketho örörö i koma, ngat acël na tye ka cem köda." 19 Ëlübör Yecu öcakö kumo, nakun ngat acëlacël penyo ën ni, "Ködë an ba?" 20 Yecu öcakö kobo nigï ni, "Dhanö acël ki kinwu jö apar arïö, na tye ka lutho cingë i wal kanya acël köda. 21 Wod ka Dhanö bino cidhö ni kömanön kite n'ëcöö köddë i kome. Ëntö dhanö na bino ketho örörö i kom Wod ka Dhanö bino nönö can! Onwongo bedo na bër ka dhanö nön ba ënywölö." 22 I karë na gin tye ka cem, Yecu ökwanyö ogati, ölëgö gum ië, cë opoko ömiö both ëlübörë ëka okobo nigï ni, "Gam icam unu. Man ënë koma." 23 Ëka ökwanyö ekopo, öpwöyö Obanga, cë ömiögi, ëka gin kibëc ömadhö. 24 Yecu

okobo nigí nĩ, “Man     remona m  c     na nyen, na bino  ny p  j  na pol. 25 An akobo niwu k p adyer n , ba d k abino madh  pig nyig    k, naka   n   n n na an abino madh  na nyen   ker k’Obanga.” 26 Na dong g n otyeko wero wer, c        g n    wi Kidi m  Jeituni. 27 Yecu okobo bothg  n , “Un k   c ibino unu w   na    , pi n yam      n , “Abino neko akwath,  ka rom bino k  h ata.” 28     kinge cer, abino t    nyimwu m  c     yo Galilaya.” 29 Petero  cak  kobo n , “Kadi bed n  j  k   c bino w   ni    ,     an ba abino w   ni.” 30 Yecu  gam  n , “Petero, an akobo nini k p adyer, tin   dyewor na thw n gw    bara okok wang a   , in ibino kw   na wang adek.” 31     Petero ocere k  t k na kobo n , “Kadi bed n  myero ath   kodi, an ba abino kw   ni na twa!”  ka j  k   c okwongere n  k man n. 32 G n         kabedo n’ecwodo n  pwodho m  Gethcemane,  ka Yecu okobo both         n , “Bed unu kany,  k an kono ac  h al   .” 33  n  kwany  Petero, Yakobo  ka Jon c        k    . Cwinye  cak  podho na l  h rw k  ka k  kumo. 34 Yecu  cak  kobo nig  n , “Cwinya cwer rw k na mit  nekona    . Bed unu kany na wangwu thwolo.” 35 Yecu       anyim na n    , c  orumo c     p ny oryebere  ka       n  ka onwongo tw   , kono caa n n opoth     k  bothe. 36 “Aba, Apap, jami k   c tw    k  bothi, kwany ekopo ni     k  botha, k r obed kite na an am   ,     obed kite na in          .” 37 C   n odwogo cen both          ka onwongog           . Yecu okobo both Cimon n , “Petero,          ? Ba       bedo na wangi thwolo p  caa m    obanga? 38 Bed unu na wangwu thwolo, l   unu both Obanga  k k r    ny unu   at mat ma m   . Cwiny mit ,     kom g   .” 39 Yecu  w      d     ka             l  a ac   n n. 40   kar  na  n odwogo,  n d    onwongo         tye ka n   , pi n n    onwongo  mak  wang-g  rw k. G n ba ongeon g  na myero ekob g n  both Yecu. 41 Yecu odwogo wang m  adek m   , c  okobo nig  n , “Un pod        ka iyweo unu? Dong      ! Caa dong      . Wod ka Dhan  dong            c  g     . 42 Yaa unu mal ! Eru ecidhu! N n, dhan  na bino ketho        koma dong cw   !” 43 C    h na Yecu onwongo pod twak, Yuda, ngat ac     kin        Yecu apar a   , othuno k  lwak n’ mak  g n  pele abad   ka k  ludhi, n’ lamdh k na dito, epwony c k ka Muca  ka edite     oorog . 44 Won       onwongo otyeko dong y    anyuth k    n : “Ngat na an abino n     leme,  n     , mak unu  n  ka iter igw k unu na b  .” 45 Yuda  cak  c         c    h both Yecu  ka okobo n , “Apwony!” C        leme. 46 G n dong  cak  podho   kom Yecu,  ka  mak   n.

47     dhan  m    ac   n’onwongo ocung   nget Yecu  cak  w     pala abad  m   , c  otongo k    h atic k’Alamdh k na Dit naka onguno    . 48 Yecu openyog  n , “Ibino unu botha k  pele abad   ka k  ludhi m  mak na cal  an abedo ayak? 49 N    k  n    an abedo kodwu   dyekal    k’Obanga nakun apwonyo, ng  n’ocerowu mak na?     jami ni k   c tye ka t m   m  cobo ng  na C c na Leng kobo   koma.” 50 C         Yecu k   c  w     n  ka  ngw    g n     . 51 Awobi m    n’orwao b     k   n   kome, onwongo tye ka l    k r Yecu.   kar  na lwak      m  mak   n, 52 awobi ni omukere k  ngw c c   w    b     m      c  g-g   ka  ngw    kotula. 53 G n otero Yecu both Alamdh k na Dit,  ka  lamdh k na dito k   c, edite  ka epwony c k ka Muca obino g n  kanya ac  . 54 Petero obedo ka l    k r Yecu k  cecen naka othuno k      dyekal k’Alamdh k na Dit.  n obedo kanya ac   k’      , nakun oo mac. 55  lamdh k na dito,  ka athuko m     okiko k’edong k   c onwongo tye g n  ka rang  caden m    na r    mi    neko Yecu.     ba onwongo g n  gin m   . 56 Ecaden na pol obedo ka twak  k p twodo   kom Yecu     k     ba  rwat   . 57 M  ajiki m   , j  n       a mal  c   twak  g n  caden m  twodo n , 58 “Wan ewinyo  n tye ka kobo n , ‘An abino muko    k’Obanga ni n’ y    k  c  g dhan ,  ka abino g    n     p  n    adek, na ba      k  c  g dhan .” 59 Kadi bed n  k man n, k p m  caden na g n  twak  ba  rwat   . 60 Alamdh k na Dit   a mal  c  ocung   dyereg   ka openyo Yecu n , “Eyo, in ba  tw    gam  k p ni k   c? Ng  na in  tw    kobo   kom gin n’ekobo   komi?” 61     Yecu     g al  ga ba  gam . C  Alamdh k na Dit d    openyo  n n , “In     ibedo Meciya, Wod k’Obanga n’ w   ?” 62 Yecu okobo n , “An      n.  ka ibino n    unu Wod ka Dhan  n’obedo   nget c  g Won Tw   kucem  ka d    tye ka bino k    p   m  polo.” 63 Alamdh k na Dit  y    b  g m     ka okobo n , “P     onu pod d         caden n    ? 64 Un iwinyo unu kite na  n  yany  k’Obanga k   .   am  unu n     t ?” G n k   c       n , “ n opore m  th   !” 65 J  n      cak  ng    la  dh      kome, nakun eumo wang      c      , n’ekobo n    n , “In ibedo adwarp ny, tuc niwa!”  ka         kwany  Yecu c  epwodo. 66   kar  n’onwongo Petero tye p ny   dyekal, atic k’Alamdh k na Dit m    n’obedo nyak  obino. 67   kar  na  n       Petero tye ka oo mac,  n       Petero na cw    ka okobo n , “In thon onwongo itye k  dhan  n n n’  a k    Najaret,  n Yecu.” 68     Petero  kw        na kobo n , “An ba angeon ng  na in itye ka twak ,” c           

yo dhō wangkac, ēka thwōn gwēnō ōcakō kok. **69** I karē na nyakō nōn n'obedo atic ōnēnō Petero ocung kunōn dōki, ēn ōcakō kobo both jō nōkēnē nī, "Ēcwō ni obedo awodhgi acēl!" **70** Ēntō Petero ōkwērō ōkō dōki. Kinge na nōnōk jō mōkō n'onwongo ocung gini i nget Petero ōcakō kobo gini nī, "Adyer in ibedo awodhgi acēl, piēn in ibedo dhanō mē Galilaya." **71** Petero ōcakō alem i kome kēnē nakun kwongere nī, "An ba angeo ēcwō ni na un itye ka twakō kōp i kome" **72** Ēka cūcūth thwōn gwēnō okok wang mē ariō. Cē Petero opo i kōp na Yecu okobo ninē nī, "Na bara thwōn gwēnō okok wang ariō, in ibino kwērōna wang adek." Ēka ōcakō koko rwōk.

15 Keko cōn, ēlamdhōk na dito, mēd k'edong, epwony cīk ka Muca, ēka athuko mē ōd okiko k'edite kibēc ōyūbō gini kōp kanya acēl. Gin otweo Yecu cē etero ōkō ēka ēmīō both Pilato. **2** Pilato ōcakō penyo Yecu nī, "In ēnē rwoth k'Eyuda?" Yecu ōgamō nī, "Eyo, obedo kite na in ikobo kōdē." **3** Ēlamdhōk na dito odotho Yecu kī kwa adoth na pol. **4** Cē Pilato dōki openyo Yecu nī, "In ba itwērō gamō peny? Nēn lwak kōp na pol n'edothi kōdē." **5** Ēntō Yecu ba ōgamō gin mōrō, ēka Pilato obedo kī ur rwōk. **6** I karē mē Karama mē Poth kibēc, Pilato onwongo marō gōnyō amabuc acēl na lwak nwongo ōkwaō. **7** I karē nōn, ēcwō mōrō onwongo tye na nyingē Baraba, na yam etweo i buc i kin jō n'ōjēm n'oneko gini jī i karē mē jēmgi nōn. **8** Lwak ōcakō cīdhō both Pilato mē penyo ēn ēk ōtīm kite na ēn ōnaa tīmō kōdē. **9** Pilato openyogī nī, "Un imitō nī agōny niwu rwoth k'Eyuda?" **10** Pilato okobo nī kōmanōn piēn ēn onwongo ongeō nī ēlamdhōk na dito okelo gini Yecu pī nyeko. **11** Ēntō ēlamdhōk na dito ōcūpō gini lwak ēk ōmīi Pilato ōgōny Baraba nakaka Yecu. **12** Pilato ōcakō penyogī nī, "Ngō na myero an atīm kī ngat na un icwodo nī rwoth k'Eyuda?" **13** Lwak ōwōō gini nī, "Gur ēn i kor yath ariā!" **14** Ēka Pilato dōki openyogī nī, "Pīngō kara, ōtīmō ngō na rac?" Ēntō lwak ōwōō gini kī redo rwōk nī, "Gur unu ēn ōkō i kor yath ariā!" **15** Pilato onwongo mitō yomo cwiny lwak, cē ōgōnyō Baraba nīgi. Ēn ōmīō twērō nī ēk epwod Yecu kī del ēka egur i kor yath ariā. **16** Acikari otero gini Yecu naka i dyekal k'alōc (n'ecwodo nī Praitōrion) ēka ocwodo gini lwak acikari kibēc kanya acēl. **17** Gin ōcakō ruko Yecu kī bōngū na kwar ēka etweo tok ōkūdhō ōthac, cē ērwakō i wie. **18** Cē gin ōcakō motho ēn nī, "Ōrēm ba, rwoth k'Eyuda!" **19** Acikari opwodo gini wi Yecu kī lūth, ōngūlō gini laō dhōgi i kome, ēka orumo gini cōng-gī pīny mē wōrō ēn mē anywar. **20** I karē na gin dong ōnywarō

Yecu, ōkwanyō gini bōngū na kwar ōkō kī i kome ēka ēdwōkō bōng mērē i kome. Cē gin dong otero Yecu yōkō ēk egur i kor yath ariā. **21** Ēcwō mōrō mē Cirene na nyingē Simon apap k'Alegijanda ēka Rupo, onwongo tye ka wok nakun ōya kī kin pacō ēka acikari ōdiō ēn mē tingo yath ariā. **22** Gin otero Yecu i kabedo n'ecwodo nī Golgota, na tyēn kōp mērē nī, "Kabedo mē Cogo Wic." **23** Cē acikari ōcakō mīō Yecu kōngō ōlōk n'erubo kī yath mūra, ēntō Yecu ōkwērō madhō ōkō. **24** Gin oguro Yecu i kor yath ariā ēka opoko gini bōng mērē i kin-gī nakun ebolo kwir ēk ēnēn bōngū na ngat acēlacēl bino tero. **25** Eguro Yecu i kor yath ariā caa adek mē kodiko. **26** Gin n'ēcōō na nyutho kōp n'edotho ēn iē kwanērē nī, "RWOTH K'EYUDA." **27** Eguro Yecu kanya acēl k'ēyak ariō, dhanō acēl kucem ēka acēl kucam. **28** Man ōmīō Cōc na Leng ocobere kakarē nī, "Ēkwanō ēn i kin ēbal." **29** Jō n'onwongo tye ka wok i ngete, obedo gini ka yanyō ēka nywarō Yecu, nakun yengo wigī na kobo gini nī, "Onye, in n'imuko ōt k'Obanga ōkō, cē iğērō pī ninō adek kēkēn, **30** larē keni, idhi pīny kī i kor yath ariā!" **31** I kite acēl nōn, ēlamdhōk na dito ēka epwony cīk ka Muca ōnywarō gini Yecu i kin-gī kēn-gī nakun kobo gini nī, "Ēn ōlarō jō nōkēnē, ēntō ba twērō larē kēnē!" **32** Wēk Kiricito, Rwoth mē Icarael, oidhi pīny kī i kor yath ariā, ēk ēnēn ēka eyee." Jō n'eguro kī Yecu thon ōcakō gini yanyō ēn. **33** I caa abicēl mē kiceng, pīny acido ōkō na cōl nicuc i wi lobo kibēc naka othuno caa abungwēn. **34** Ēka i caa abungwēn, Yecu ōcakō koko kī dwōn na malō nī, "Eloi, Eloi, lama cabaktani?" Na gōnyō nī, "Obangana, Obangana, pīngō iwēka nī kōman?" **35** I karē na jō n'ocung na cwōk owinyo, gin okobo nī, "Winy unu, ēn tye ka cwodo Eliya." **36** Ēcwō mōrō acēl ōcakō ngwēc, ēka ōkwanyō amor, olutho i kōngō ōlōk na wac, cē ōrēpō i wi yath atad ēka ōmīō both Yecu nī ēk ōmadhī. Ēn okobo nī, "Kūr unu, eru ēnēn ka Eliya twērō bino kwanyō ēn ōkō pīny!" **37** Yecu dōki okok kī dwōn na malō cē ōthōō ōkō. **38** Cē bōngū ēcēngē na tye i ōt k'Obanga ōcakō yēc opokere iē ariō, kī malō naka pīny. **39** Adit acikari n'onwongo ocung na cwōk i nyim Yecu, owinyo redo ka Yecu ēka ōnēnō kite n'ōthōō kōdē, cē ēn okobo nī, "Adyer dhanō ni onwongo obedo Wod k'Obanga." **40** Mon mōkō onwongo tye gini kunōn, nakun rīpō gini kī cecen. Kī kin-gī onwongo obedo Maria mē Magadala, Maria (aya ka Yakobo na tīdī ēka Yoce), ēka Calume. **41** Gin obedo ka lūbō kōr Yecu anaka kī i Galilaya, ēka gin obedo ka kōnyō ēn thon. Mon nōkēnē na pol n'onwongo owotho kōdē mē bino i Jerusalem onwongo thon tye kunōn. **42** Onwongo obedo Ninō

mě Yübërë (manön ninö na Cabit k'Eyuda bara örömö.) Na dong piny cwök cido, 43 êcwö na nyingë Yocepu më Arimataya obino, ên onwongo obedo dhanö na dit më öd okiko, êka ên onwongo kürö Ker k'Obanga më bino. Ên öcïdhö both Pilato ki tæk cwiny më kwaö kom Yecu. 44 Pilato obedo ki ur më winyo ni Yecu dong öthöö ökö. Ên ocwodo adit acikari, cë openyo ka Yecu öthöö ökö. 45 Í karë na Pilato öniang ki both adit acikari ni ötimërë ni kōmanön, ên ömïö kom Yecu both Yocepu. 46 Yocepu öwilö böngü na leng. Cë ökwanyö kom Yecu ökö piny ki kor yath aria, oboo i böngü, êka opyelo i bur lyël n'egworo i kidi, cë ölorö kidi i dhö bur lyël êka oloro dhögë ökö. 47 Maria më Magadala êka Maria aya ka Yoce önenö gini kakwene n'onwongo eiko ên ië.

16 Í ninö na lübö Cabit k'Eyuda, Maria më Magadala, Maria aya ka Yakobo, êka Calume öcïdhö gini më wilö möö na ngwece kur êk êcïdh gini më wiro kom Yecu. 2 Kodiko cön i ninö më acël më cabit, kinge na ceng dong odonyo, gin öcïdhö i lyël. 3 Gin öcakö penyere gini kën-gí ki i wanga yoo ni, "Nga na bino thwaro ni onu kidi ki i dhö bur lyël?" 4 Êntö i karë na gin othuno, önenö gini lyël êka önenö gini kidi n'onwongo thwönë, dong ethwaro ökö thenge. 5 Na gin dönyö i lyël, önenö gini awobi mörö n'oruko böngü na tar n'obedo ki kucem, êka obedo gini ki lworo rwök. 6 Êntö ên okobo ni, "Kür ibed unu ki lworo, un itye ka rangö Yecu më Najaret, n'onwongo eguro i kor yath aria. Ên ope kany! Ên ocer ökö ki kin jö n'öthöö! Nën unu, kany ênë onwongo epyelo kome ië. 7 Êntö apë êk ikob unu n'ëlübkörë êka Petero ni, 'Yecu bino tëlö nyimwu më cïdhö yo Galilaya. Ibino nënö unu ên ki kunön, kite na yam ên okobo niwu ködë.'" 8 Cë mon odonyo yökö ki i lyël, öcakö gini ngwéc ki myël kom êka lworo na ba okobo gini gin mörö both ngat mörö kékën, piën lworo onwongo ömakögí rwök. 9 (note: The most reliable and earliest manuscripts do not include Mark 16:9-20.) Í karë na Yecu ocer ki i lyël kodiko cön i ninö më acël më cabit, ên öcakö nen both Maria më Magadala, dhakö na ên onwongo öryëmö cene abirö ki i kome. 10 Ên öcïdhö both ëlübör Yecu n'onwongo tye ka kwero cöla êka kok gini. 11 Êntö i karë na gin owinyo ni Yecu tye na kwö, êka Maria önenö ên, gin ba oyee köp mërë. 12 Kinge, Yecu onen both ëlübörë arïö i kite na path n'onwongo gin tye ka cïdhö yo kin pacö. 13 Gin ödök cen më kobo both ëlübör Yecu nökéñë, êntö ngat mörö ope n'oye köpgí. 14 Kinge, Yecu onen both ëlübörë apar acël i caa n'onwongo gin tye ka cem. Ên ocokogí piën gin onwongo ope ki gen êka

pi nang cwinygi piën gin ökwërö yee köp ka jö n'önenö ên kinge cer mërë ki i kin jö n'öthöö. 15 Yecu okobo n'ëlübörë ni, "Apë unu i wi lobo kibéc êka itit unu köp më Emuth na Bër both dhanö kibéc. 16 Dhanö mörö na bino yee êka ebatika ên, bino larë, êntö dhanö na ba bino yee, ebino ngölö ninë köp. 17 Anyuth ni bino nen ki both jö na yee, gin bino ryëmö cene ki nyinga. Gin bino twak ki lëb na nyen. 18 Gin bino makö thwol ki cing-gí, êka ka gin ömadhö gin mörö na neko dhanö, cë ba bino timögí na rac. Gin bino ketho cing-gí i kom etwoe êka bino cang gini." 19 Kinge na Rwoth Yecu ötwak ködgí, ökwanyö cë etero i wi polo êka ên obedo i nget cing Obanga kucem. 20 Cë ëlübör Yecu öcïdhö êka ötitö gini köp i kom Yecu i kabedo kibéc. Rwoth otio ködgí êka omoko köp mërë k'anyuth n'ölübö körë.

Luka

1 Both adwong Teopilo. Jö na pol dong ötëmö gini cöönö köp i kom Yecu Kiricito kite n'ötümërë ködë i kinwa. **2** Gín öcöo jami ni kite na jö n'önönö gini ki wang-gi anaka ki i acaki okobo niwa ködë ëka onwongo pwonyo gini köp k'Obanga. **3** Pí manön, adwong Teopilo, an angjö köp kibëc cakërë ki i acaki. An thon athamö ni bër acöo bothi, nakun aryëö körë ki körë. **4** An amitö ni ñniang adyer më köp nön na yam epwonyi ködë. **5** I karë n'Erode obedo rwoth më Yudea, onwongo alamdhök mörö ute na nyíngë Jakaria, n'onwongo tye i wang tic k'elamdhök k'Abija. Yam ut ki dhakö mërë na nyíngë Elicabeth n'onwongo thon obedo akwar Aron. **6** Jakaria ëka Elicabeth onwongo kitegi atir i nyim Obanga, na lübö gini cik ka Rwoth abonge bal. **7** Éntö gin onwongo ope k'athin, piën Elicabeth onwongo obedo alür, ëka onwongo otii gini ökö. **8** I ninö mörö acël na Jakaria onwongo ut i tic mërë më alamdhök i nyim Obanga, piën onwongo obedo karë më wang tic mërë, **9** na calö kite k'elamdhök tye ködë, kwir öyëro ën më cidhö wangö odok na kur i öt ka Rwoth. **10** I caa n'onwongo etye ka wangö odok na kur, lwak kibëc öcökërë yökö i légä. **11** Cë malaika ka Rwoth onen bothe n'ocung kucem më nget keno tyër më wangö odok na kur. **12** I karë na Jakaria önönö malaika, cwinye opodho ëka lworö ömakö ën. **13** Éntö malaika okobo ninë ni, "Kür ilwor Jakaria piën Obanga owinyo légani dong ökö. Dhaköni Elicabeth bino nywölö nini athin n'ëcwö, ëka ibino cakö nyíngë Jon. **14** Én bino miöni yom cwiny ëka cwinyi bino bedo na yom, ëka jö na pol bino bedo ki yom cwiny pi nywölö ën, **15** piën ën bino bedo na dit i nyim Rwoth. Én ba bino madhö köngö ölöc, onyo köngö mörö na mërö dhanö. Én bino pong ki Tipo Naleng cakërë ki i aya mërë. **16** Én bino lökö jö na pol më Icarael, ëka bino dwökögí cen both Rwoth Obangagi. **17** Éka ën bino tölö anyim më yübö yoo pi Rwoth ki tükö ëka ki tipo n'Eliya onwongo ute ködë. Én bino lökö cwiny enyodo i kom éthinögi ëka më dwökö jö na ba winyo cik i ryëkö ka jö na kitegi atir, dök më yübö ni Rwoth jö na dong öyübërë." **18** Cë Jakaria openyo malaika ni, "Abino ngeeno níngö? An dong atii ökö ëka dhaköna thon otii." **19** Malaika ögamö ni, "An Gaburiel, acung i nyim Obanga ëka eora më twak kodi ëk akob nini emuth na bër. **20** Éka piën in ba iyee ngö na an atye ka kobo nini, in ibino líng ańga na ba itwak, naka ka ninö nön na köp ni bino timërë ië, na bino cobere ka karë mërë örömö." **21** I caa nonu lwak obedo ka kürö Jakaria, nakun uro

gini pi ruu mërë i öt k'Obanga. **22** I karë na ën odonyo yökö, onwongo dong ba römö twak ködgí, ëka gin ongeö ni ën önönö anyuth mörö ki i öt k'Obanga. Én obedo ka twak ködgí ki cingë ëka obedo na the lëbë otwere. **23** Na karë më tic mërë i öt k'Obanga othum, cë ödök tunge. **24** Kinge karë na nönök, cege Elicabeth öyac ökö, ëka opono ködë pi dwethe abic. **25** Én okobo ni, "Rwoth ötímö köman i koma, i karë n'önëna, ökwanyö lewic ökö ki i koma ki kin dhanö." **26** I dwe më abicël më yac k'Elicabeth, Obanga ooro malaika Gaburiel i taun na nyíngë Najaret n'onwongo ut i lobo më Galilaya, **27** both nyakö n'ecwodo ni Maria na ba ongeö ëcwö. Én onwongo öcükërë më nyömërë ki Yocepu akwar Daudi. **28** Malaika öcidhö bothe cë okobo ninë ni, "Kuc obed kodi! In na kome gum, Rwoth ut kodi." **29** I karë na Maria owinyo köp ni, cwinye opodho ëka obedo ki ur i ngö na köp nön gönyö. **30** Cë malaika okobo ninë ni, "Kür ilwor, Maria, inwongo gum ki both Obanga. **31** In ibino yac ëka inywölö athin awobi, cë ibino cakö nyíngë Yecu. **32** Én bino bedo na dit, n'ebino cwodo ni Wod k'Obanga na Malö Rwök. Rwoth Obanga bino miö ën twër, më then ker kite n'ëmiö both kwarö mërë Daudi. **33** Én bino löönö jö më öt ka Jakob na twal, ëka ker mërë ba bino jik." (aion g165) **34** Maria openyo malaika ni, "Köp ni bino timërë níngö? Nakun ba angeö ëcwö mörö!" **35** Malaika ögamö ninë ni, "Tipo Naleng bino bino bothi ëka tükö k'Obanga na Malö Rwök bino umoni na calö tipo. Pí manön, athin n'ënywölö ni Leng, ëka ebino cwodo ni Wod k'Obanga. **36** Nën wadwu Elicabeth dong öyac i wi tio mërë, bino nywölö athin awobi. Én yam ecwodo ni alür kobedi dong ut ki ic më dwethe abicël. **37** Piën gin mörö ope na löö Obanga." **38** Cë Maria okobo ni, "An atic ka Rwoth ëk obed kite na in ikobo ködë." Cë malaika öya ökö ki bothe. **39** Kinge karë na nönök, Maria öya, piöpiö öcidhö i taun mörö n'otingere i Yudea. **40** Cë ödönyö i öt ka Jakaria, omotho Elicabeth. **41** Ka Elicabeth owinyo moth ka Maria, athin mërë oyengere ki ië. Elicabeth opong ki Tipo Naleng. **42** Én oredo ki dwön na ut malö ni, "lut ki gum i kin mon, ëka athin na in ibino nywölö ni kome gum. **43** Pingö eketho wörö i koma n'aya ka Rwoth twal obino më limöna? **44** Anaka awinyo mothni, athin ki ia oyengere ki yom cwiny. **45** Komi gum in ni yeo köp ka Rwoth piën köp na Rwoth okobo nini bino cobere." **46** Maria okobo ni, "Tipona pakö Rwoth, **47** cwinya yom i kom Obanga Alarna, **48** Piën ën öparö pi atic mërë, kadí bed rwöm mërë ute piny. Cakërë kobedini, jö më karë kibëc bino cwodona ni akome gum. **49** Obanga Won Twër ötímö gin na döngö píra, Én nyíngë leng. **50** Én nyutho kica

mère both jö na winyo ën pī karē kibēc. 51 Badē na ute kī tēkō, otio tic na döngö. Wegi awaka i cwinygi ekēthö ökō. 52 Ën ötürö löc ka rwothi, ëka otingo jö na bwönērē malö. 53 Ën ömïö cem ëka jami na bëcö both jö na kec neko, ëka öryēmö ëlönyö ki cing-gi nono. 54 Obanga ökönyö etic mērē Icarael. Ën opo mē timö kica, 55 both Abraam ëka ëkwaē mērē kibēc, kite na yam öcikerē ködē both kwereua.” (aiön g165) 56 Maria obedo both Elicabeth na römö dwethe adek, cē ödök yo parē. 57 Na karē mē nywöl k'Elicabeth dong örömo, cē önywölö athin awobi. 58 Na dong ewodhe ëka wede owinyo ginii nī Rwoth onyutho kica mērē na dit i kome, cwinygi obedo na yom kanya acēl ködē. 59 I karē n'athin dong örömo nīnō aboro, obino gini i kwer mē lirö athin. Ömitö gini cakö nyingē ki nying apap mērē Jakaria. 60 Ëntö aya mērē ögamö nī, “Pathi kōmanön nyingē bino bedo Jon!” 61 Gin okobo nīnē nī, “Ba ut ngat mörö na nyingē obedo kōmanön i dhogolawu kibēc yo.” 62 Cē ögwölö gini apap k'athin mē penyo nī ën mitö nī ëcak nying athin nga? 63 Ën openyo gin mörö ëk ëcöō iē, cē öcöō nī, “Nyingē Jon.” Ëka jö kibēc ouro. 64 Cücüth, lēb Jakaria öyabērē, cē öcakö twak ëka öpakö Obanga. 65 Lworo ömakö jö kibēc na bedo cwök i ngetgi. Köp ni kibēc ökēē örömo lobo n'otingere i Yudea. 66 Jö kibēc n'owinyo gini köp ni öthamö gini rwök na kobo gini nī, “Athin ni kothe bino bedo nīngö?” Pien tēkō ka Rwoth onwongo ut ködē. 67 Cē apap mērē Jakaria opong ki Tipo Naleng ëka ötwak kamē adwarpiny nī, 68 “Pak obed both Rwoth Obanga ka jö Icarael, pien dong obino mē könyö jögē ëka ökökögi. 69 Ën ömïöwa Alar na tēk ki i öt k'atic mērē Daudi. 70 Na calö yam öcikerē ködē nakun wok ki both edwarpiny mērē na leng cakērē cön. (aiön g165) 71 Ën bino laröwa ki both langwa, ëka bino laröwa ki cing jö kibēc na dagöwa. 72 Obanga obedo ki kica both kwereua, ëka opo ki gicikerē mērē na leng. 73 Man ënē cikērē na ën okwongo both kwaröwa Abraam nī, 74 ën bino laröwa ki both langwa, ëk ewör Obanga abonge lworo, 75 ki leng cwiny ëka kite atir i nyime ka pod onu ëkwö. 76 “In athin-na, ebino cwodonni nī adwarpiny k'Obanga na Malö Rwök, in ibino cidhö anyim mē yübö yoo nī Rwoth, 77 mē kobo nī jögē kite mē nwongo larē i yoo mē timö kica pi balgi. 78 Pi kica k'Obanga na thwönē n'öwēkö piny oruu niwa, tar mērē ki i polo dong cwök ka mēnyö onu, 79 mē mēnyö jö na ut i piny na cöl ëka i tipo mē thöō, ëka mē tölö onu i yoo mē kuc.” 80 Jon ödöngö ëka Tipo Naleng ömïö ën tēkō. Ën obedo i thim naka na dong öcakö tic mērē kanyalēr both jö Icarael.

2 I karē nonu, na dong ënywölö Jon Abatica, Cija Agucito onwongo obedo rwoth mē lobo Roma. Ën ömïö cik nī ëk ëkwan jö kibēc mē lobo na ën löö. 2 Man obedo kwanö jii mē acēl n'ötümērē i karē na Kwirino obedo alöc mē lobo Ciria. 3 Jö kibēc öcidhö ëk ëkwan-gi yo taun ka kweregī. 4 Yocepu mene öya ki i lobo mē Galilaya ki i taun n'ecwodo nī Najaret, öcidhö yo lobo Yudea i taun n'ecwodo nī Bethelēm, kany na yam ënywölö Daudi iē. Ën yam obedo ngat acēl i kin ëkwaē ka Daudi. 5 Öcidhö ëk ëkwanē gin ki Maria, n'onwongo ën öcikerē mē nyömö ëka onwongo dong ute ki iē. 6 Na gin ut i Bethelēm, karē ka Maria mē nywöl örömo. 7 Ën önywölö athin kaö mērē wode ëka oumo kome ki böngü k'athin. Cē opyelo i pwa mē cem ka dhok, pien onwongo kabuto opong ökö niggi i öt apanga pi wele. 8 Kiwor nön, ëkwath onwongo kwö ëka gwökö romgi i thim na cwök ki Bethelēm. 9 Malaika ka Rwoth onen bothgi, ëka tar ka Rwoth öryeny ömēnyögi, cē lworo ömakögi rwök. 10 Ëntö malaika okobo niggi nī, “Kür ibed unu ki lworo, pien akelo niwu emuth na bër mē yom cwiny na dit na bino bedo pi jö kibēc. 11 Tin i taun ka Daudi ënywölö niwu Alar, ënē Meciya Rwoth. 12 Man ënē bino bedo anyuth bothwu. Ibino unu nwongo athin na mar n'eboo ki böngü k'athin, n'epyelo obuto i öd pwa cem ka dhok.” 13 Athura, lwak emalaika mē polo öribērē ki malaika nön, na pakö gini Obanga ëka kobo nī, 14 “Dheo obed both Obanga na ute malö i polo, ëka kuc obed i lobo both jö n'Obanga ömïögi kica mērē!” 15 I karē na dong emalaika öya ökö ki bothgi cē ödök yo polo, ëkwath nön ötwak kën-gi nī, “Eru ecidhu kono yo Bethelēm, ëk ëcidh enenu ngö n'ötümērē na Rwoth pod okobo nī onu.” 16 Gin öcakö cidhö piöpiö, onwongo gini Maria gin ki Yocepu, ëka athin n'obuto i od pwa cem dhok. 17 Na gin dong önenö athin, ëkwath örwö both jö kibēc köp na yam ekobo niggi i kom athin nön. 18 Jö kibēc n'owinyo ouro köp n'ëkwath okobo niggi. 19 Ëka Maria obedo gwökö köp ni kibēc i cwinye ëka obedo thamö i komgi. 20 Ëkwath ödök cen na wörö ëka pakö gini Obanga pi gin na kibēc na gin owinyo ëka önenö, kite na malaika okobo niggi ködē. 21 I nīnō mē aboro ëlirö athin nön cē ëcakö nyingē Yecu. Man ënē nying na yam malaika ömïö na bara ëgamö ën i ic. 22 Na karē mē kwer mē lönyērē na lüberē ki cik ka Muca dong othum, Yocepu ëka Maria otero Yecu yo Jerucalēm co miö ën both Rwoth. 23 (Kite n'ëcöō ködē i cik ka Rwoth, “Ëthinö kaö kibēc na cwö myero ëmii both Rwoth”). 24 Ëka thon kite n'ëcöō i Cik ka Rwoth nī enyodo myero thon ömii tyēr n'obedo, “Amame arïö, onyo ëthin akuce arïö.” 25 I karē nonu, onwongo ëcwö

mörö na nyingê Cimeon ute i Jerucalem, n'onwongo kite atir ëka lworö Obanga. Ën onwongo kürö Kiricito na bino larö jö Icarael. Tipo Naleng onwongo tëlö ën. 26 Yam Tipo Naleng onyutho ninê ni ën ba bino thöô wang na ën önênö Kiricito na yam Rwoth öcikö both jö Icarael. 27 Ki tükö ka Tipo Naleng, ën öcithö yo dyekal öt k'Obanga. I karê n'enyodo okelo athin Yecu êk ëtim ninê kit na cik mitö ködê. 28 Cimeon otingo ën i badê ëka öpakö Obanga, na kobo ni, 29 "Rwoth Obanga Won Twër igwökö kwongni köda, yee dong aticni öcith ki kuc. 30 Piën wanga dong önênö Alar, 31 na in iyerö më larö jö kibêc. 32 Ën bino kelo tar më cwiny both jö na ba obedo Eyuda, ëka pi dheo both jö na megî Icarael." 33 Apap ëka aya k'athin ouro ginî ngö n'ekobo i kom Yecu. 34 Cê Cimeon ölamö gum i komgi ëka okobo n'aya mërê Maria ni, "Athîn ni bino miö jö na pol ki i lobo Icarael podho piny ëka yaa malö, ëka bino bedo anyuth n'ebino twak ië na rac, 35 êk tham më cwiny jö na pol omore yökö. Cwer cwiny bino cöböni calö ëcöbö cwinyi ki pala abadê." 36 Yam adwarpiny na dhakö tye na nyingê Ana, nyaka Panuel më kaka Acer. Ën onwongo dong otii rwök. Kinge nyom mërê, ën ökwö ki cwörê pi mwaka abirö. 37 Cwörê onwongo öthöô ökö, ëka onwongo dong ut ki mwaka pyer aboro wie angwën. Ën ba öwëkö öt k'Obanga ëntö öwörö Obanga kiwor thon kiceng na rio kec ëka lëgö. 38 I caa nön Ana obino bothgi, cê öpwöyö Obanga, ëka ötwak pi athin nön both jö kibêc na yam kürö karê më larö jö Icarael. 39 I karê na Yocepu ëka Maria dong otyeko gin na kibêc na cik ka Rwoth ömitö, gin ödök yo lobo më Galilaya, yo taun-gi më Najaret. 40 Ëka athin nön ödöngö cê ödökö na tük, n'opong ki ryêkö ëka na kica k'Obanga onwongo ute i kome. 41 Mwaka ki mwaka enyodo ka Yecu onwongo cidhö ginî yo Jerucalem pi Karama më Poth. 42 I karê na Yecu dong ute ki mwaka apar ariö, gin öcithö kunön i Karama më Poth na lübêrê ki cik më thëkwarögi. 43 Na Karama më Poth nön dong othum, n'enyodo mërê dök yo pacö, athin Yecu odong ökö cen i Jerucalem, n'enyodo mërê ba ongeö. 44 Na thamö ginî ni ködê ën ute i kin ewodhe, gin owotho pi ninö acêl cê ëcakö rangö ën i kin wede ëka nyikoneigi. 45 I karê n'enyodo ba onwongo ën, gin ödök cen yo Jerucalem më cidhö rangö ën. 46 Kinge ninö adek enyodo mërê onwongo ën i dyekal öt k'Obanga. Yecu onwongo obedo i kin epwonye na winyogi ëka penyogi peny. 47 Jö kibêc n'owinyo Yecu, ouro ginî kit niang ëka ryêkö mërê më gamö peny. 48 N'enyodo mërê önênö ën, gin ouro aura. Aya mërê openyo ën ni, "Athîn-na, pingö itimöwa köman? Nën! An k'apapni ebeto rangöni ki par na dit." 49

Ën ögamö ni, "Irangä unu pingö? Ba ingeo unu ni myero abed i öt k'Apapna?" 50 Ëntö gin ba öniang ngö n'onwongo ën kobo nigî. 51 Cê Yecu olungo ködgi yo Najaret, ëka obedo winyogi. Ëntö aya mërê ögwökö köp kibêc i cwinye. 52 Yecu ödöngö ki ryêkö ëka dit kome, ki pwök k'Obanga ëka më dhanö.

3 Onwongo obedo mwaka më apar abic më löc ka Cija Tiberio i ker më Roma. I karê nön, Pontio Pilato onwongo obedo alöc më Yudea. Erode onwongo obedo alöc më Galilaya, ëka ömîn mërê Pilipo onwongo obedo alöc më Ituria ëka alöc më Taroniti. Ëka Lucania onwongo obedo alöc më lobo Abilene. 2 Anac ëka Kayapa onwongo obedo ginî ëlamdhök na dito. I karê nonu, Jon Abatica wod ka Jakaria, owinyo köp k'Obanga n'onwongo ën ut i thim. 3 Ën owotho i lobe kibêc n'örükö kulo Jordan, nakun titö both jii ni myero ongut ginî ki kom balgi ëka ebaticagi, ëk Obanga ötim nigî kica. 4 Kite n'ëcöô ködê i buk k'adwarpiny Icaya ni, "Dwön dhanö mörö tye ka redo i thim ni, 'Yüb unu yoo pi Rwoth, miî unu yoo ocung atir ninê. 5 Ora kibêc myero epir ökö, kite kibêc myero erwob ödök piny na röm. Yodhi n'ogom mene myero ëmii ocung atir. Yodhi na gwaü bino dökö na pwöth. 6 Cê jö kibêc bino nënö lar k'Obanga.'" 7 Jon Abatica okobo ni lwak n'obino bothe ëk ebaticagi ni, "Un jö na reco calö ëthîn ororo! Nga n'okobo niwu ni iiring unu ökö ki i akëmö k'Obanga na bino ni? 8 Kitewu myero onyuth ni inguto unu dong ökö ki kom balwu. Kür dök icak unu kobo i kinwu kenwu ni, 'Wan ëthinhö më dhogola k'Abraam.' Ëk akob niwu ni ki i kom kite ni, Obanga römö yübö ëthinhö pi Abraam. 9 Ngölö-köp k'Obanga obino ökö, na calö ngat n'ömakö atong më tongo yath. Yath na ba nyakö nyige na bër ebino tongo ökö piny, cê ebolo i mac." 10 Lwak openyo Jon ni, "Ëtim ngö dong?" 11 Jon Abatica ögamö nigî ni, "Ngat na ute ki böng ariö myero opok both ngat n'ope ködê, ëka ngat na ute ki cem myero ötim mene kömanön." 12 Ëcök ocoro mene obino ëk ebaticagi. Gin openyo ën ni, "Apwony, wan myero ëtim ngö?" 13 Ën okobo nigî ni, "Kür icök unu ocoro na kadhö wel n'ëcüköw ködê." 14 Acikari mökö öcakö penyö ën ni, "Cê wan kono ëtim ngö?" Ën okobo nigî ni, "Kür ima unu ciling ki both dhanö mörö tètêk, ëka kür idoth unu dhanö mörö twodo twodo. Ëntö yeng unu ki cülwu." 15 Lwak onwongo kürö ki gen, na gin kibêc onwongo thamö ki i cwinygi ni ködê ba Jon ënê obedo Meciya. 16 Cê Jon Abatica ögamö ni, "An abaticawu ki pii, ëntö ngat mörö na dit na löa tye ka bino, na an ba apora më bedo atic mërê, ëka më

gönyö thöl wörë. Ën bino baticawu ki Tipo Naleng ëka mac. 17 Ën bino poko jö na kitegi atir ki kom jö na reco, na calö dhanö na pyëdhö bël k'odheru, ën cökö bël cë ketho i od dërö. Ëntö ën bino wangö cüngë ki mac na ba bino nekere." 18 Jon Abatica okobo köp na bër n'eoro ën ködë ki köp nökenë na pol. Ën öcükö cwiny lwak më wëkö bal, ëka opwonyogi k'Emuth na Bër k'Obanga. 19 Ëntö Jon dökï öjükö rwoth Erobe pi bedo ki Kerodia dhakö ka Pilipo n'obedo ömin Erobe, ëka pi ngö na reco kibëc na ën obedo timö. 20 Cë rwoth Erobe dök ömëdö bal nökenë dökï na rac më twoe Jon i buc. 21 Na Jon dong obatica jö kibëc, Yecu thon ebatica. I caa na Yecu lëgö, polo öyabërë 22 ëka Tipo Naleng obino ki malö i cal k'amam cë opye i kome. Cë dwön Obanga owinyere ki i polo na kobo ni, "In ënë Woda na an amarö, na cwinya yom i kome." 23 Yecu onwongo dong ute ki mwaka pyer adek i karë na ën cakö tic mërë. Jii onwongo thamö ni ën obedo wod ka Yocepu. Yocepu ni onwongo obedo wod ka Eli. 24 Eli onwongo obedo wod ka Mathat. Mathat onwongo obedo wod ka Lebi. Lebi onwongo obedo wod ka Melki. Melki onwongo obedo wod ka Janai. Janai onwongo obedo wod ka Yocepu. 25 Yocepu wod ka Matathia, Matathia wod k'Amoc, Amoc onwongo obedo wod ka Nakum. Nakum onwongo obedo wod ka Eceli. Eceli onwongo obedo wod ka Nagai. 26 Nagai onwongo obedo wod ka Math, Math onwongo obedo wod ka Matathia Matathia onwongo obedo wod ka Cemein Cemein onwongo obedo wod ka Yocek, Yocek onwongo obedo wod ka Yoda. 27 Yoda onwongo obedo wod ka Joanan. Joanan onwongo obedo wod ka Reca. Reca onwongo obedo wod ka Jerubabel. Jerubabel onwongo obedo wod ka Cealtiel. Cealtiel onwongo obedo wod ka Neri. 28 Neri onwongo obedo wod ka Melki. Melki onwongo obedo wod k'Adi. Adi onwongo obedo wod ka Kocam. Kocam onwongo obedo wod ka Elemadam. Elemadam onwongo obedo wod ka Er. 29 Er onwongo obedo wod ka Yocua. Yocua onwongo obedo wod ka Elieja. Elieja onwongo obedo wod ka Yorim. Yorim onwongo obedo wod ka Mathat. Mathat onwongo obedo wod ka Lebi. 30 Lebi onwongo obedo wod ka Cimeon. Cimeon onwongo obedo wod ka Yuda. Yuda onwongo obedo wod ka Yocepu. Yocepu onwongo obedo wod ka Yonam. Yonam onwongo obedo wod ka Eliakim. 31 Eliakim onwongo obedo wod ka Melea. Melea onwongo obedo wod ka Mena. Mena onwongo obedo wod ka Matatha. Matatha onwongo obedo wod ka Natan. Natan onwongo obedo wod ka Daudi. 32 Daudi onwongo obedo wod ka Jece. Jece onwongo obedo wod k'Obed. Obed

onwongo obedo wod ka Boaj. Boaj onwongo obedo wod ka Calomon. Calomon onwongo obedo wod ka Nacon. 33 Nacon onwongo obedo wod k'Aminadab. Aminadab onwongo obedo wod k'Adimin. Adimin onwongo obedo wod k'Arni. Arni onwongo obedo wod ka Kejeron Kejeron onwongo obedo wod ka Perej. Perej onwongo obedo wod ka Yuda. 34 Yuda onwongo obedo wod ka Jakob. Jakob onwongo obedo wod ka Icaka. Icaka onwongo obedo wod k'Abraam. Abraam onwongo obedo wod ka Tera. Tera onwongo obedo wod ka Nakor. 35 Nakor onwongo obedo wod ka Cerug. Cerug onwongo obedo wod ka Reu. Reu onwongo obedo wod ka Peleg. Peleg onwongo obedo wod ka Eber. Eber onwongo obedo wod ka Cela. 36 Cela onwongo obedo wod ka Kainan. Kainan onwongo obedo wod k'Apacad. Apacad onwongo obedo wod ka Cem. Cem onwongo obedo wod ka Noa. Noa onwongo obedo wod ka Lamek. 37 Lamek onwongo obedo wod ka Methucela. Methucela onwongo obedo wod ka Enok. Enok onwongo obedo wod ka Jared. Jared onwongo obedo wod ka Maalalel. Maalalel onwongo obedo wod ka Kainan. 38 Kainan onwongo obedo wod ka Enoc. Enoc onwongo obedo wod ka Ceth. Ceth onwongo obedo wod k'Adam. Adam onwongo obedo wod k'Obanga.

4 Yecu odwogo ki i kulo Jordan nakun opong ki Tipo Naleng, ëka Tipo Naleng otero ën yo thim pi ninö pyer angwën. I thim kunön Catan onwongo obedo temö ën. Yecu ba öcamö gin mörö pi ninö nonu kibëc, na karë nön dong othum kec oneko ën rwök. 3 Cë Catan obino bothe ëka okobo ni Yecu ni, "Ka adyer in ënë Wod k'Obanga, lök kidi ni ödök ogati ëk icam." 4 Yecu ögamö ninë ni, "Ëcöö i Cöc na Leng ni, 'dhanö ba kwö ki cem këkën.'" 5 Kinge nön, Catan otero Yecu malö, cë pi karë na nönök këkën, onyutho ninë ker kibëc më wi lobo. 6 Catan okobo ni Yecu ni, "Abino miöni twër më lobo ëka jami kibëc na bër na ut ië, piën ëmia twër nön ökö, ëka arömö miö both ngat na an amitö. 7 Pi manön ka iwöra, twër nön kibëc abino miö bothi." 8 Cë Yecu ögamö ni, "Ëcöö i Buk na Leng ni, 'Wör Rwoth Obangani ëka itii ninë këkën.'" 9 Catan öcakö tero Yecu yo Jerucallem ëka ömiö ën ocung i ajiki midimidi malö më wi öt k'Obanga. Cë okobo ninë ni, "Ka adyer in ënë Wod k'Obanga, pye piñy ki kany. 10 Piën ëcöö i Buk na Leng ni, "Ën bino cikö emalaika mërë më gwököni na bër, 11 gin bino tingoni ki cing-gi, ëk kür ipodh iwan tyeni i kidi.'" 12 Yecu ögamö ni, "Ëcöö i Buk Na leng ni, 'Kür itëm Rwoth Obangani.'" 13 Na dong otyeko temö Yecu ki yodhi kibëc na ën twërö, Catan öcidhö ökö ki bothe,

na kūrō karē nōkēnē n'opore mē tēmō ēn dōkī. 14 Cē Yecu ōdōk yo Galilaya kī twēr ka Tipo Naleng. Emuth ī kom Yecu ōkēē ī lobo nōn kibēc. 15 Ēn obedo pwony ī od cinagogagī ēka jō kibēc ōpakō Yecu. 16 Yecu ōcīdhō yo pacō mē Najaret, kanya nene ēn ōdōngō iē. Ī ceng cabīt k'Eyuda, ēn ōcīdhō yo cinagoga, kite n'ōnaa tīmō kōdē. Ōya malō cē ocung mē kwan kī ī Buk na Leng. 17 Ēmīō ēn buk adōla k'adwarpīny lcaya, cē ōyarō buk nōn ēka onwongo kany ēcōō iē nī, 18 "Tipo Naleng ka Rwoth ute ī koma mē kōnyōna, piēn Obanga owira, mē kobo kōp mē Emuth na Bēr both ēcan. Ēn oora mē kobo nī ebino gōnyō emabuc ōkō, ēka mē mīō ēthōō wang nēnō pīny, mē gōnyō jō n'ēdīōgī ī yoo na ba opore, 19 ēn thon oora mē mīō ngec nī, man ēnē karē na Rwoth ōyūbō mē nyutho kīca both jōgē." 20 Yecu ōdōlō buk adōla, ōdwōkō both akōny tic ī od cinagoga, cē obedo pīny. Jō kibēc n'onwongo ute ī od cinagoga ōcīkō wang-gī rwōk ī kome. 21 Cē ōcakō pwonyogī na kobo nīgī nī, "Kōp na an akwanō kī ī Cōc na Leng, ocobere tin." 22 Jō kibēc n'owinyo ēn okobo nī pwony mērē bēr. Gīn ouro kōp na bēr n'ōya kī ī dhōgē, cē openyere gīnī kēn-gī nī, "Pathī man ēnē wod ka Yocepu?" 23 Yecu okobo nīgī nī, "Angeo adyer nī iya unu mē bolo nīna carolok na kobo nī, 'Daktar, cangiri keni! Tim ī pacō thurwu kany koth tango na wan ewinyo nī ibedo tīmō ī Kaperanaum.'" 24 Ēn ōmēdērē nī, "An akobo niwu kōp adyer nī, adwarpīny mōrō ope n'ēmarō kī thurgī. 25 Tye adyer nī, mon thōō onwongo ute na pol ī lobo lcarael ī karē k'adwarpīny Eliya. Ī karē nonu Obanga otweo kōth ōkō pī mwaka adek kī nucu, cē kec ērōn opodho ī lobo lcarael thūkūl. 26 Obanga onwongo ba ooro adwarpīny mērē Eliya bothgī, ēntō ooro ēn both dha thōō mōrō n'onwongo bedo ī pacō Jarepat na cwōk kī Cidon. 27 Ī karē k'adwarpīny Elica ī lobo mē lcarael, onwongo jō na pol ute n'obedo ēdhōbū. Ēntō ngat mōrō ope na ēn ōcangō kī ī kin-gī, Naaman kēkēn n'onwongo obedo dhanō mē lobo Ciria." 28 Jō kibēc n'obedo ī od cinagoga ōkēcō gīnī rwōk ī karē na gīn owinyo ngō na Yecu okobo. 29 Gīn ōya malō cē ōryēmō gīnī Yecu ōkō kī ī taun. Otero gīnī ēn naka yo ajiki malō wi cere n'ēgērō taun mē Najaret iē. Gīn onwongo mītō thwaro Yecu yo pīny ēk ōthōō ōkō. 30 Ēntō ēn owok ī kin-gī cē ōcīdhō ōkō. 31 Cē Yecu ōcīdhō yo Kaperanaum ī taun na dit mē Galilaya. Ī ceng cabīt k'Eyuda ēn ōdōnyō ī cinagoga cē ōcakō pwonyogī. 32 Na ēn obedo pwony, lwak ouro kite na ēn ōtwak kōdē kī twērō. 33 Ēcwō mōrō na cen ōmakō onwongo ute ī od cinagoga kanya Yecu obedo pwony iē. Ēcwō nōn oredo rwōk nī, 34 "Uthukui! Yecu mē Najaret, ngō na in imītō kī bothwa? Ibino mē tyekowa

ōkō? Angeo ngat na in ibedo, ngat Na leng n'Obanga ooro!" 35 Yecu ocoko cen nī, "Ling ōkō, ēka donyi ōkō kī ī kome!" Cē cen ōrēdhō ēcwō nōn ī dye ōt ī nyim lwak kibēc, ēka odonyo yōkō kī ī kome na ba ōwanō ēn. 36 Jō kibēc na ute kany nōn ouro rwōk, cē openyere gīnī kēn-gī nī, "Koth pwony mēnē ene? Ēn ute kī thwōn twēr ēka tēkō, na ka ōcīkō nī tipo na rac nī odonyi yōkō, gīn donyo yōkō!" 37 Emuth ī kom Yecu ōkēē kanya kibēc ī lobo nōn. 38 Kinge na Yecu odonyo yōkō kī ī ōt cinagoga, ēn ōcīdhō ōdōnyō ī ōt ka Cimon. Marō ka Cimon onwongo ute kunōn kī two lyetho n'ōdīō ēn rwōk, cē gīn ōkwaō Yecu nī ēk ōcang ēn. 39 Cē Yecu ocung ī nget atwo, ēka ōcīkō nī two lyetho ōya ōkō. Cūcūth atwo ōcang ōkō, ēka ōya malō cē otedo nīgī cem. 40 Na ceng dong dōnyō adōnya, jīi okelo etwoe n'onwongo ute kī koth two na papath both Yecu. Ēn oketho cīngē ī kom ngat acēlacēl, cē ōcangōgī kibēc. 41 Cene thon ōya ōkō kī ī kom jō na pol, na kok gīnī nī, "In ēnē Wod k'Obanga!" Ēntō Yecu ocokogī ēka ba oyeo nīgī mē twak, piēn onwongo gīn ongeō nī ēnē obedo Meciya. 42 Na pīny dong oru kodiko cōn, Yecu ōya ōkō kī ī pacō mē Kaperanaum cē ōcīdhō yo kanya lik. Lwak jō na pol ōcakō lūbō ēn, ēka othuno gīnī ī kabedo n'onwongo ēn ute iē. Na gīn dong ōnēnō ēn ōtēmō gīnī jūkō ēn, ēk kūr ōwēk kabedo nōn. 43 Ēntō ēn okobo nīgī nī, "An myero acīdh ī peci nōkēnē thon mē kobo kōp mē Emuth na Bēr mē ker k'Obanga, piēn man ēnē gīn ōmīō eora." 44 Cē Yecu ōcīdhō ī peci na pol na ut ī Yudea, kanya ōtītō kōp mē Emuth na Bēr ī cinagoga.

5 Ī nīnō mōrō acēl na Yecu ocung ī dhō nam mē Genecaret, jīi opong na rīdērē gīnī mē winyo kōp k'Obanga. 2 Yecu ōnēnō yeya arīō ī lak kulo n'ēmak rēc ōwēkō kunōn ēka onwongo lwōkō bōōgī. 3 Ēn ōdōnyō ī yeya acēl, man onwongo obedo mē ka Cimon, ēka okobo nīnē mē cwarō yeya ōkō na nōnōk kī lak kulo. Cē Yecu obedo ī yeya ēka opwonyo lwak. 4 Na dong otyeko pwony mērē, ēn okobo nī Cimon nī, "Ter yeyani ī dyere nam kanya thuth ēk ibol unu bōōwu ī pii cē imak unu rēc." 5 Cimon ōgamō nī, "Rwoth, wan etio na tēk wor kia ēka ba ēmakō gīn mōrō. Ēntō kite na in ikobo kōdē, abino bolo bōō rēcna." 6 Na gīn dong ōtīmō kōmanōn, gīn ōmakō rēc na pol naka bōōgī ōcakō yēc. 7 Cē dong gīn ocwodo ewodhgi na ute ī yeya nōkēnē nī ēk obin ōkōnygī. Ī karē n'obino gīnī, opongo gīnī yeya arīō kī rēc ōkō ēka yeya ōcakō lūny. 8 Ī karē na Cimon Petero ōnēnō gīn nōn, orumo cōngē pīny ī tyēn Yecu ēka okobo nī, "Rwoth cīdh ōkō kī botha, piēn an abedo abal!" 9

Petero ëka ewodhe ouro gini lwak rëc na gin ëmakö. 10 Ewodhe, Yakobo ëka Jon, awope ka Jebedayo, ouro gini thon. Ëka Yecu okobo ni Cimon ni, "Kür ibed ki lworu, cakërë i caa ni cidhö ködë anyim, ibino bedo amak jii nakaka makö rëc." 11 Gin öywaö yeyagi i lak kulo, cë gin öjalö jami kibëc ëka ölübö gini kör Yecu. 12 I karë na Yecu onwongo tye i pacö mörö acël, ëcwö mörö obino na ut ki two dhöbù. Na ën önënö Yecu, orumo cöngë piny cë okulo wangë ëka ökwaö Yecu ni, "Rwoth, ka imitö, canga ëk abed na leng." 13 Yecu öryëö cingë ëka ogudo ëcwö nön, cë okobo ni, "An amitö, komi dong obed na leng!" Cücüth two dhöbù öcang ökö. 14 Cë Yecu okobo ninë ni, "Kür ikob ni ngat mörö, ëntö cidh inyuthiri both alamdhök. Cë imiï tyër na Muca öcikö ëk jii ongee ni in dong ecangi ökö." 15 Ëntö emuth na makö kome ökëë örömo lobo, ëka n'ömiö jii na pol rwök obino më winyo köp mërë ëk ëcang-gi ki i kom twoegi. 16 Yecu i karë mökö yaa cidhö ökö yo kanya lik ëka lëgö. 17 I ninö mörö acël Yecu onwongo pwonyo jii. Eparicayo ëka epwony cik mökö onwongo obino gini ki i peci na papath më Galilaya, Yudea ëka Jerucalem, onwongo ute gini kunön. Tëkö ka Rwoth onwongo ut ködë më cangö etwoe. 18 Cwö mökö obino n'otingo gini dhanö na two akwea kom ömakö. Gin ötëmö më tero ën i öt ëk epyel i nyim Yecu. 19 Ba onwongo gini yoo më tero akome okwe i nyim Yecu piën lwak onwongo opong rwök. Cë gin öidhö malö ëka otuco gini wi öt. Gin olwao akome okwe na ut i ökëka piny i kin lwak naka ecibo i nyim Yecu. 20 Na Yecu önënö yeegi, ën okobo n'akome okwe ni, "Okona, dong atimö nini kica i balni." 21 Eparicayo ëka epwony cik ka Muca öcakö penyere gini kën-gi ni, "Ën thamö ni ënë nga na twakö köp më yanyö Obanga? Obanga këkën ënë twërö wëkö bal." 22 Yecu ongeö ngö n'onwongo gin thamö ëka openyogi ni, "Pingö i thamö unu köp ni ki i cwinywu? 23 Mënë ënë yot: Më kobo ni, 'Balni ëtimö kica ökö ië,' onyo më kobo ni, 'Yaa malö i'cidhi'? 24 Ëntö ëk ingee unu ni Wod ka Dhanö ut ki twër i wi lobo më wëkö bal." Cë Yecu okobo both dhanö na kome okwe ni, "An akobo nini, yaa malö, kwany ökëkani ëka icidhi yo pacö." 25 Cücüth öya malö i nyimgi, ökwanyö ökëka n'onwongo ën obuto ië cë ödök yo pacö na pakö Obanga. 26 Lwak kibëc ouro ëka öpakö gini Obanga. Gin opong ki lworu na kobo gini ni, "Ënënö gin më aura tin." 27 Kinge manön, Yecu odonyo yökö cë önënö acök ocoro n'ecwodo ni Lebi obedo i od cökö ocoro mërë. Yecu okobo ninë ni, "Lüb köra." 28 Lebi öya malö, öwëkö jami kibëc, ëka ölübö Yecu. 29 Ëka Lebi öyübö cem na thwönë i parë ni Yecu na calö welo mërë më awöra. I kin wele

onwongo ute ëcök ocoro na pol ki jö nökökë. 30 Man ömiö Eparicayo nökökë ëka epwony cik ka Muca öngüngüta gini i kom ëlübkör Yecu nakun penyogi ni, "Pingö icemo ëka imedho unu k'ëcök ocoro n'obedo ëbal?" 31 Yecu ögamö niggi ni, "Pathi Jö na komgi yot ënë mitö daktar, ëntö etwoe. 32 An ba abino më cwodo jö na kitegi atir, ëntö ëbal ëk ongut gini." 33 Jö nön okobo both Yecu ni, "Ëlübkör Jon ëka më Eparicayo onwongo ut gini ki thëkwarö më rio kec karë ki karë ëka lëgö gini thon. Pingö ëlübkori cemo ëka medho gini ninö kibëc?" 34 Yecu ögamö niggi ni, "Wele k'anyom twërö rio kec n'anyom tye ködgi kanya acël? 35 Ëntö karë bino thuno n'ebino kwanyö anyom ökö ki bothgi cë gin dong bino rio kec i ninö nön." 36 Dök obolo niggi carolok ni, "Ba ut ngat mörö na yëcö opeke böngü na nyen më dapö böngü na cön na ën ruko. Ka ötimö kömanön cë bino yëcö böngü na ën ruko na nyen ökö. Dök opeke ni kom böngü na nyen ba pore ki man otii. 37 Dök ba ut ngat mörö na pikö köngö ölöc na nyen i ocwe na cön, ka öpikö, cë köngö ölöc bino yëcö ocwe ökö, ocwe thon bal ökö. 38 Thwara köngö ölöc na nyen ëpik i ocwe na nyen. 39 Ba tye ngat mörö na ka ömadhö köngö ölöc na cön cë dök mitö man anyen thon, piën bino kobo ni, 'Thwara thwara man na cön.'"

6 I ninö mörö acël më Cabit k'Eyuda, Yecu onwongo wok i pwodho bël. Ëlübkörë öcakö rïdhö with bël ëka önginyö gini i cing-gi, cë omwodo gini. 2 Ëntö Eparicayo mökö openyo ni, "Pingö un i'ridhö with bël na cik ökwërö ni kür etii i ceng Cabit k'Eyuda?" 3 Yecu ögamö niggi ni, "Un ba ikwanö ki i Cöc na Leng ngö na Daudi ötimö i karë na kec oneko ën k'ewodhe? 4 Ën ödönyö i öt k'Obanga, ëka ökwanyö ogati n'ëtyërö both Obanga cë öcamö, na yam cik ökwërö ni dhanö kür öcam kono ka ëlamdhök këkën. Ëka ën thon ömiö both ewodhe." 5 Cë Yecu okobo niggi ni, "Wod ka dhanö ënë Rwoth më Cabit." 6 I Cabit k'Eyuda nökökë Yecu ödönyö i cinagoga ëka onwongo pwonyo. Ëcwö mörö onwongo ute kunön na badë okwe ökö. 7 Eparicayo ëka epwony cik onwongo kürö gini më nënö ka Yecu cangö ëcwö nön i ceng Cabit ëk enwong gini yoo më dotho ën. 8 Ëntö Yecu ongeö ngö n'onwongo gin thamö ëka okobo n'ëcwö na badë okwe ni, "Yaa malö ëka icung i nyim jö kibëc." Ën öya malö ëka ocung. 9 Cë Yecu okobo bothgi ni, "Apenyowu ni, i ceng Cabit cik yee ni ëtim gin mörö na bër onyo gin mörö na rac ië, ëlar kwö onyo enek aneka?" 10 Ën ongongolo wangë i kin-gi kibëc, cë okobo both ëcwö nön ni, "Ryë badi." Ën öryëö badë, ëka badë öcang ökö. 11

Ēntō akēmō ōmakōgi na tēk, cē ōyūbō gīnī kōp ī kin-gī kēn-gī, ngō na myero ētīm ī kom Yecu. 12 Ī karē nonu, Yecu ōcīdhō ī wi kidi mē lēga iē ēka ōlēgō both Obanga wor kia. 13 Na piny dong oru, ocwodo ēlūbkōrē bothe ēka ōyērō jō apar ariō kī kin-gī cē ōmiōgi nyingī nī ēkwēna. Nying-gī ene: 14 Cimon (na ēn ōcakō nyingē nī Petero), ēka ōmīn mērē Anderiya, Yakobo ēka Jon, Pilipo ēka Batulumayo, 15 Matayo ēka Tomaci, Yakobo wod k'Alipayo, Cimon n'ecwodo nī dhanō na mītō lōckēn, 16 Yuda wod ka Yakobo, ēka Yuda lkariot, na yam oketho ōrōrō ī kom Yecu. 17 Yecu obino piny kī ī wi kidi kanya acēl k'ēlūbkōrē. Na dong othuno ī ngōm kany opire cē ocung. Kī kunōn ēlūbkōrē na pol ēka kī jō nōkēnē n'obino gīnī kī ī Yudea, kī ī pacō mē Jerucalem, ēka kī ī dhō nam mē Turo ēka Cidon ōgūrē gīnī kanya acēl. 18 Gīn onwongo obino mē winyo pwony mērē ēk ēcang-gī kī ī kom twoegī, naka thon kī jō na cen na reco oyelōgi, obino gīnī ēka ēcangōgi. 19 Jō nōn kibēc ōtēmō mē gudo ēn, piēn tēkō mē cangō onwongo yaa kī ī kome ēka cangōgi kibēc. 20 Yecu ōlōkērē ōnēnō ēlūbkōrē cē okobo bothgī nī, "Komwu gum un ēcan, piēn Ker k'Obanga obedo mewu. 21 Komwu gum un jō na kec onekowu kobedini, piēn ibino yeng unu. 22 Komwu gum un jō na kok kobedini, piēn ibino nyērō unu. 23 "Lakērē unu ī nīnō nonu, nakun ipye unu kī yom cwiny, piēn cūl n'ebino mīōwu mē pwōc thwōnē ī wi polo. Ēka ipo unu nī kweregī yam ōtīmō edwarpīny kōmanōn. 24 "Ēntō ibino nēnō unu can un ēlōnyō, piēn ityeko unu nwongo gin na kweo cwinywu ōkō. 25 Can ī komwu un jō na yeng kobedini, piēn kec bino nekowu. Ibino nēnō unu can, un nī nyērō kobedini, piēn ibino kumo unu kī koko. 26 Ibino nēnō unu can, ka jō kibēc pwōyōwu, piēn kweregī yam ōpwōyō gīnī edwarpīny n'etwodo kōmanōn. 27 "Ēntō akobo niwu un jō nī winya, nī mar unu langwu, tīm unu gin na bēr both jō na dagōwu. 28 Lam unu gum ī kom jō na lamōwu, lēg unu pī jō na tīmō gin na rac bothwu. 29 Ka ngat mōrō odhongo lemi acēl, lōk nīnē kucēl thon ēk odhong. Ka ngat mōrō mītō catīni, miē thon kotini. 30 Mīi both jō kibēc na kwai gīnī ēka ka ngat mōrō omai jamini, kūr dōk ī peny ēk odwongi nini. 31 Kite na un īmītō nī jīi ōtīm niwu kōdē, un thon tīm unu nīgī kōmanōn. 32 "Ka īmarō unu jō na marōwu, pwōc mēnē nī nwongo unu kī iē? Naka thon ēbal marō jō na marōgi. 33 Ēka ka ītīmō unu gin na bēr both jō na tīmō gin na bēr bothwu, pwōc mēnē nī nwongo unu kī iē? Naka thon ēbal tīmō kōmanōn. 34 Ēka ka īmītō unu banya both jō na dwōkō niwu,

pwōc mēnē nī nwongo unu kī iē? Naka thon ēbal mīō banya both ēbal ewodhgi ēk ēcūlgi na rōm. 35 Ēntō mar unu langwu, tīm unu gin na bēr nīgī ēka mīi unu nīgī den na ba igeno unu nī ebino cūlō niwu dōkī. Cē cūl na mewu bino bedo na thwōnē, ēka ibino bedo unu ēthīn ka Ngat na Malō Rwōk piēn ēn bēr both jō na ba pwōyō ēn, ēka both jō na reco. 36 Bed unu kī kīca na calō Apapwu obedo akīca. 37 "Kūr īngōl unu kōp both jō nōkēnē, ēka un thon ba ebino ngōlō niwu kōp. Kūr īngōl unu kōp ōlōō jō nōkēnē, ēka un thon ba ebino ngōlō kōp lōōwu. Tīm unu kīca both jō nōkēnē, ēka un thon ebino tīmō niwu kīca. 38 Mīi unu both jō nōkēnē ēka un thon ebino mīōwu. Ēka jami n'ebino mīōwu ebino pimo niwu na bēr. Gin n'epimo kōdē na bēr, n'eyengo, ēka ēdīlō na ōny aōnya, ebino mīōni. Gin na un ipimo kōdē, ēnē thon ebino pimo niwu kōdē." 39 Yecu dōk okobo nīgī carolok nī, "Athōō wang twērō pēō athōō wang awodhe? Gīn ariō kibēc ba bino podho ōkō ī bur? 40 Athīn kwan ba bedo na dit lōō apwony mērē, ēntō dhanō kibēc ka dong epwonyo na bēr dōkō na calō apwony mērē. 41 "Pīngō īnēnō cūng kal kī ī wang omeru, ēka ba īnēnō dul yath na tye ī wangi? 42 In ītwērō kobo n'omeru nī, 'Ōmēra, ēk akwany cūng kal ōkō kī ī wangi,' nakun in kikomi ba īnēnō dul yath na ut ī wangi? In atwodo, cak kono kwanyō dul yath na ut ī wangi ōkō, ēka dong īnēn pīny na bēr mē kwanyō cūng kal na ute ī wang omeru. 43 "Yath na bēr ba twērō nyakō nyige na rac ēka yath na rac ba twērō nyakō nyige na bēr. 44 Yath acēlacēl engeo kī nyige. Dhanō ba pūdō ōlam kī kom ōkūdhō acar onyo nyig ōlōk kī kom ōcōcōk. 45 Dhanō na bēr twakō gin na bēr kī kin jami na bēcō na ēn ōkanō ī cwinye. Dhanō na rac twakō gin na rac kī kin jami na reco na ēn ōkanō ī cwinye. Piēn kōp na dhanō kobo yaa kī kom ngō n'opong ī cwinye. 46 "Pīngō icwoda unu nī, 'Rwoth, Rwoth,' ēka ba ītīmō unu gin na an akobo nī ītīm unu? 47 Dhanō acēlacēl na bino botha, cē winyo kōp na mēga, ēka ketho ī tic, abino nyuthiwu ngat na ēn cal kōdē. 48 "Ēn cal kī dhanō n'ōgērō ōt n'ōkūnyō na thuth ēka ocibo thērē ī kom lēla. Ēka ka koth ocwe na thwōnē cē pii opong, kilēlē ōmōl kī tēkō ī kom ōt nonu. Ēntō ba oyengo piēn onwongo ēgērō na bēr. 49 Ēntō ngat na winyo kōpna ēka ba ketho ī tic, rōm arōma kī dhanō n'ōgērō ōt ī kom ngōm abonge acaki thērē. Ka kulo opong cē ōmōl kī tēkō ēka ōcōrō ōt nōn, ōt rēdhērē pīny nī ruthukuny."

7 Na dong Yecu otyeko pwonyo kōp nī kibēc both lwak, ēn ōdōk cen ī Kaperanaum. 2 Ī pacō nonu onwongo ute adit acikari mē Roma. Dhanō nī onwongo

ut k'atic na en marö rwök. Atic ni onwongo two rwök na cwök thö. 3 I karé n'adit acikari owinyo pi Yecu, en ooro edong k'Eyuda mökö më cidhö kwaö en ek obin öcang atic méré. 4 I karé n'edong non obino gini both Yecu, gin ökwaö en ek owoth ködgi cê okobo gini ni, "Ngati opore ek icang atic méré, 5 piên marö Eyuda éka thon enê ögêrö cinagoga niwa." 6 Cê Yecu öcidhö kanya acêl k'edong non. Na dong onyingo cwök ki pacö, adit acikari ooro nyikonei mökö më cidhö kobo ninê ni, "Rwoth, kür dök iloliri më bino i pacöna, piên an ba apora ni ek ibin idöny i öda. 7 An thon ba apora më bino romo kodi. Akwai ek ikob nina köp mörö ki kany iut iê cê aticna bino cang. 8 Piên an thon abedo dhanö n'ëlöö alöa i dhö tic, aut k'acikari thon na an alöögí. Ka akobo both acikarina mörö acêl ni, 'Cidhi,' cê cidhö, onyo ka akobo ni, 'Bin,' cê bino. Éka ka akobo both aticna ni, 'Tim man,' cê timö." 9 I karé na Yecu owinyo köp ni, ouro rwök. Ölökeré both jii na lübö köré cê okobo nigí ni, "Akobo niwu, bara anwongo écwö na ut ki yee na röm ki man i lobo l'caael." 10 Cê jö n'onwongo eorogí ödök cen pacö, éka onwongo gini atic öcang ökö. 11 Cücüth kinge, Yecu k'ëlübköré éka lwak jö na pol öcidhö gini i taun n'ecwodo ni Nain. 12 I karé na en onyingo na cwök ki dhö cêl më taun non, gin önênö jö n'ölabö gini lyêl k'awobi n'öthöö k'etana. Awobi ni onwongo obedo wod ka dha thöö acêl kékên. Jö na pol më pacö non owotho kanya acêl ki dha thöö ni. 13 Na Rwoth önênö aya k'awobi non, kica ömakö i kome, okobo ninê ni, "Kür ikoki." 14 Yecu öcidhö cê ogudo canduk lyêl éka jii n'onwongo ölabö athöö ni ocung gini moth. En okobo ni, "Awobi, akobo nini ni yaa malöl!" 15 Cücüth awobi ni ocer ökö cê öcakö twak. Yecu ömiö en both aya méré. 16 Jö kibéc opong ki lworo éka öcakö gini pakö Obanga ni, "Adwarpiny na dit obino i kinwa, éka Obanga obino më könyö jöge." 17 Emuth i kom ngö na Yecu ötimö ökéë örómö lobo Yudea kibéc éka ki lobo n'öríkö. 18 Èlübör Jon okobo ninê jami kibéc na Yecu ötimö. Cê Jon ocwodo èlüböré ariö 19 éka oorogí both Rwoth më penyo en ni, "In enê Kiricito n'onwongo edwarpiny okobo ni bino, onyo êkür dök ngat nökên?" 20 I karé n'ëlübör Jon öcidhö gini both Yecu okobo gini ninê ni, "Jon Abatica oorowa bothi ek ebin epenyi ni, 'In enê Kiricito n'onwongo edwarpiny okobo ni bino, onyo êkür dök ngat nökên?" 21 I caa non onwongo Yecu öcangö etwoe na ut gini ki twoe na papath éka tipo na reco. En thon ömiö êthöö wang önênö piny. 22 Cê Yecu okobo nigí ni, "Cidh ikob unu both Jon ngö na un inênö éka ngö na un iwinyo. Êthöö wang önênö piny, engwalo owotho, jö na ut

ki two dhöbü öcang, edhing ith owinyo gini köp éka jö n'öthöö ocer. Jö na ut ki can owinyo gini köp më Emuth na Bêr. 23 Tye ki gum dhanö na ba lökêrö ökö ki kom yee méré pira." 24 Kinge na dong èlübör Jon ödök gini, Yecu öcakö twak ki jii i köp i kom Jon ni, "Ngö na un icidhö më nënö ki dye thim? Icidhö unu më nënö agada na yamö yengo? 25 Ka ope, ngö na dong icidhö unu më nënö? Dhanö n'oruko böng na wel méré thwöné? Pe, jö na rukere gini ki böng na leng éka ut gini ki jami na bëcö enê bedo gini i peci ka rwothi. 26 Èntö ngö na un icidhö më nënö? Eyo, an akobo bothwu ni un inênö ngat na löö adwarpiny ökö. 27 Jon enê obedo dhanö na Cöc na Leng cimö na kobo ni, "Nên abino oro akwëna na bino cidhö anyim nini, enê bino yübö yooni na bara ibino." 28 Yecu okobo ni, "Akobo niwu, ki kin jö kibéc na mon önywölö, ngat mörö ope na dit na löö Jon. Èntö naka thon ngat na tidi na löö ki i Ker k'Obanga, dhanö non thwöné na löö en." 29 Jö kibéc naka thon êcök ooro, i karé n'owinyo gini köp ka Yecu, oyee gini ni yoo k'Obanga tye atir, piên Jon onwongo obaticagi. 30 Èntö Eparicayo éka epwony cik ka Muca ökwërö gini miti k'Obanga. Éka ökwërö gini ni kür Jon obaticagi. 31 Yecu dök okobo ni, "Abino poro jö më karé ni ki ngö? Gin cal ki ngö? 32 Gin röm k'ethinö n'obedo i cuk nakun kobo n'ethinö ewodhgi ni, "Wan êküdhö oletu niwu, éka ba imyêlö unu, ewero wer lyêl, éka un ba ikok." 33 Jon Abatica obino na ba camö kwon onyo madhö kõngö ölökö, éka ikobo unu ni, "En ut ki cen i kome." 34 Èntö Wod ka Dhanö obino na cemo éka medho, éka ikobo ni, "En obedo ngat n'owor éka amêrö! En thon obedo okone k'écök ooro éka "ébal." 35 Èntö ryêkö k'Obanga onen adyer both êthiné kibéc na lübö." 36 Ngat acêl ki kin Eparicayo ocwodo Yecu më cidhö cem ködê. En öcidhö i ödê cê obedo piny i dhö cem. 37 Dhakö mörö n'obedo abal onwongo ut i taun non. I karé n'ongeo ni Yecu tye i cem i öt k'Aparicayo, cê okelo cupa möö na ngwece kur. 38 En obino cê ocung i ngee Yecu ki kutyêné na kok naka pii wangé ötön i tyên Yecu éka odunyo ki yer wie. Önödhö tyên Yecu cê owiro ki möö na kur. 39 I karé n'Aparicayo önênö, ötwak ki i cwinye kêné ni, "Kono dhanö ni obedo adwarpiny, onwongo twërö ngeeno dhakö n'ogude—ni obedo abal." 40 Yecu okobo both Aparicayo ni, "Cimon, aut ki gin mörö na mitö kobo nini." Cimon ögamö ni, "Apwony, ngö enön?" 41 Yecu okobo ninê ni, "Yam tye ngat mörö n'ömiö ciling më den both jö ariö. Ngat acêl onwongo ut ki banya më denario mia abic éka awodhe nökêné ute ki pyer abic. 42 I karé na cülö banya ni ölöö jö ariö ni, won ciling öwêkö benyi non ökö cê ötimö nigí

kica. Nga ki kin jo ariö ni na bino marö won ciling na löö?" 43 Cimon ögamö ni, "Athamö ni ngat n'ewëkö banya mërë na thwönë." Yecu okobo ni, "In ingölö kakarë." 44 Cë Yecu öläkërë both dhakö nön ëka openyo Cimon ni, "Inënö dhakö ni? An adönyö i odi ba imia pii më lwökö tyëna. Ëntö ën ötönö pii wangë i tyëna cë odunyo ki yer wie. 45 In ba imotha ëka ba inödhö lema ëntö dhakö ni anaka i caa n'adönyö ködë i odi, ba öwëkö nödhö tyëna. 46 In ba igama ki önyö möö i wia ëntö ën owiro tyëna ki möö na kur. 47 Pi manön akobo nini, bal mërë kibëc ëtimö kica ökö ië piën mar mërë na ën onyutho thwönë. Ëntö ngat n'ëtimö ninë kica pi bal mërë na nönök, nyutho mar mërë thon na nönök." 48 Cë Yecu okobo both dhakö ni, "Balni dong atimö kica ökö ië." 49 Jö n'obedo ködë i dhö cem öcakö twak i kin-gi ni, "Man nga na timö kica thon i kom bal?" 50 Ëntö Yecu okobo both dhakö ni, "In iyee ki i cwinyi ënë ömiö dong ilarë. Ëk Obanga omii kuc."

8 Kinge man, Yecu owotho i kin taun na döngö ëka peci ginii, na titö köp më Emuth na Bër më Ker k'Obanga. Ëlübörë apar ariö onwongo tye ködë kanya acël, 2 ëka thon mon mökö n'onwongo ëcangögi ki kom tipo na reco ëka ki twoe. Mon ni ënë Maria më Magadala, na cen abirö ëryëmö ki i kome, 3 Joana dhakö ka Cuja, adwong na löö öt k'Erode. Onwongo thon dhakö tye na nyingë Cucana ëka mon nökenë na pol. Mon ni onwongo miö jamigi më kënyö Yecu ëka ëlübörë. 4 I ninö mörö acël, lwak na pol öya ki i taun ginii cë ögürë ginii both Yecu. Ën öcakö pwonyogi ki carolok na kobo ni, 5 "Apur mörö öcidhö më cwöönö kodhi mërë. I karë na ën tye ka cwöönö kodhi, kodhi mökö ökir i dye yoo, cë jii önyönö ëka winy na ngwécö ki malö ödödëpö ökö. 6 Ën ökenë ökir i dye lëla cë öcakö tuu, ëntö oner ökö piën pii nönök. 7 Kodhi nökenë opodho i kin okudhi cë otuu, ëntö öküdhö ödiö ökö. 8 Kodhi nökenë ökir i ngöm na bër. Kodhi ni otuu ëka ödöngö cë önyakö nyige na pol na löö ën na yam ëcwö wang mia acël." Yecu otyeko twak ki dwön na malö ni, "Ngat na tye ki ithe më winyo, myero ën owiny!" 9 Ëlübör Yecu openyo ën ni, "Ngö na carolok ni gönyö?" 10 Ën ögamö ni, "Müng më ryëkö më Ker k'Obanga, ëmiö dong ökö bothwu. Ëntö both jö nökenë an atwak ki carolok ëk, "Ka önenö ginii, kür dök önen, dök ka owinyo ginii, ba twërö niang ië." 11 "Carolok ni gönyö ni kóman. Kodhi ënë köp k'Obanga. 12 Kodhi n'ökir i dye yoo ënë jö na winyo, ëka Catan bino cë kwanyö köp k'Obanga ökö ki i cwinyi ëk kür oyee ginii ëka ölarë. 13 Kodhi n'ökir i dye lëla cal ginii ki jö na gamö köp k'Obanga

ki yom winyo ka gin owinyo. Ëntö ope ginii k'oriigi n'ödönyö piny. Gin yeo pi karë na nönök, ëntö ka i karë më tëmögi, podho ginii ökö. 14 Kodhi n'ökir i kin okudhi cal ki jö na winyo köp k'Obanga, ëntö na gin tye i wothgi ëdiögi ki kwö më par, lönyö ëka kwö na yot. Jami ni miögi ba nyakö nyig-gi. 15 Ëntö kodhi n'ökir i ngöm na bër cal ki jö na winyo ginii köp k'Obanga, moko i cwinyi, ëka diö cwinyi cë nyakö nyig-gi. 16 "Ba tye ngat mörö na cwinyö tara cë kanö ökö i adita onyo ketho i thë ëtana. Ëntö eketho tara kany oten, kanya cara mërë twërö nen both jö kibëc na dönyö ginii i öt. 17 Ba tye gin mörö n'ëkanö na ba ebino tuco, ëka ba tye gin mörö n'ebino kanö na ba ebino ngeeno. 18 Pi manön, nën unu na bër kite ni winyo unu ki köp ködë! Jö na bino winyo pwonyana, ebino mëdö niggi më winyo na thwönë. Ëntö pi jö na ba winyo ginii, naka thon ngö na gin thamö ni ëniang ië ebino gamö ökö ki bothgi." 19 Cë aya ka Yecu ëka utmego mërë obino më nënë ën. Ëntö gin onwongo ba römö thuno i ngete piën lwak onwongo pol na dirë ginii. 20 Ngat mörö okobo ninë, "Ayani ëka utmegoni ocung yökö, mitö nënëni." 21 Yecu ögamö ninë ni, "Ayana ëka utmegona ënë jö na winyo köp k'Obanga ëka ketho ginii i tic." 22 I ninö mörö acël Yecu ëka ëlübörë ödönyö ginii i yeya cë okobo niggi ni, "Eru ëngöl nam yo löka tung ca." Cë gin öcakö wothgi yo kunön. 23 Na gin ngölö i nam, Yecu obuto piny cë öninö ökö. Cücüth yamö na ger öcakö kudho na tæk i nam. Pii öcakö pong i od yeya, öwëkö jö ni obedo i thwön pëkö na rac. 24 Cë ëlübör Yecu öcidhö ocoo ën, na redo ginii ni, "Rwoth, Rwoth, wam ëcwök thöä ökö yo!" Ëka Yecu öya malö cë ocoko yamö na ger ëka ki pii ni ëk ocung. Yamö ocung, ëka pii okwe moth. 25 Yecu openyo ëlübörë ni, "Kara yeewu tye kwene?" Gin ouro ëka obedo ki lworo, ëka öcakö twak i kin-gi këkën-gi ni, "Koth dhanö mënë ene? Na coko yamö ëka pii cë winyo dhögë!" 26 Yecu ëka ëlübörë öngölö ginii nam na cwök ki lobo më Galilaya, ëka othuno ginii i löka nam yo lobo ka jö Gereca. 27 I karë na Yecu donyo yökö ki i yeya, ëcwö më taun nön n'onwongo cen ömakö obino më romo ködë. Pi karë na lac dhanö ni onwongo wotho kotula ëka onwongo ba bedo pacö ëntö onwongo kwö i kin lyene. 28 Cücüth tæk nënö Yecu, oredo rwök. Ën opodho i nyim Yecu cë oredo na tæk ni, "Yecu, Wod k'Obanga na ën Na Malö Rwök! Ngö na in imitö ki botha? Akwai, kür ipwoda!" 29 Ën okobo man piën Yecu onwongo öcikö ni tipo na rac odonyi yökö ki i kome. Wang na pol cen dwogo i kome, ömiö ëgwökö agwöka nakun nwongo etweo atwea ki nyör ëka ki nywenyo. Ëntö ën tütürö ngö n'etweo

ködë ökö. Cen ryēmō tero i thim yo kanyalik. 30 Yecu openyo ên, "Nyīngi nga?" Ên ôgamō, "Nyīngi Lejon," piēn cene na pol onwongo opong i kome. 31 Tipo na reco ômedêrê mē kwaō Yecu êk kūr ôryēmgi i bur na thuth, kanya cene epwodogi iê. (Abysos g12) 32 Êthīpan pūn onwongo cemo gīnī i bad kidi. Cene ôkwaō gīnī Yecu êk oye nīgī êdōnyō i kom pūn nōn. Cē ên oyeo nīgī. 33 Na cene odonyo kī kom êcwō ni, ôdōnyō gīnī i kom pūn, cē obino gīnī kī malō kī wi thur êka ôlūny gīnī i nam. 34 I karē n'êkwa pūn ônēnō gīnī ngō n'ôtimêrê, gīn ôngwēcō mē cīdhō rwēēnō emuth ni i kin taun gīnī êka i thwok lobo. 35 Jīi ôcīdhō mē nēnō ngō n'ôtimêrê êka i caa n'othuno gīnī both Yecu, onwongo gīnī ngat na cene ômakō bothe. Cene ôya ôkō kī i kome êka onwongo obedo i nget Yecu. Ên onwongo orukere na leng êka dong niang. Êntō jīi ôdōkō na lwor. 36 Cē jō n'ônēnō ngō n'ôtimêrê okobo gīnī both jīi kite na ngat n'onwongo cen ômakō ôcang kōdê. 37 Jō kibêc n'obedo gīnī i Gereca êka kany ôrikō lobo nōn ôkwaō Yecu nī myero ôya ôkō kī bothgī piēn lworo onwongo ômakōgī rwōk. Yecu ôdōnyō i yeya cē ôdōk cen. 38 Dhanō na cen ôya kī i kome odweko Yecu êk ewoth kōdê. Êntō Yecu ôkwērō ôkō cē okobo nīnē nī, 39 "Dōk pacō êk icīdh ikob ngō na thwōnē n'Obanga ôtimō mē cangōni." Cē êcwō ni owotho i taun kibêc êka ôtītō gin na Yecu ôtimō mē cangōnē. 40 I karē na dong Yecu odwogo, lwak ôgamō kī yom cwiny piēn onwongo gīn kibêc kūrō. 41 Dhanō mōrō obino, na nyīngē Yairo n'onwongo adwong mē cinagoga. Ên orumo cōngē pīny i nyim Yecu êka odweko nī ôcīdh yo parē 42 piēn onwongo nyarē acēl kēkēn na ut kī mwaka apar arīō two na dong cwōk thōō. Na Yecu pod ut i yoo, jō na pol obedo ka dīīnō ên. 43 Dhakō mōrō onwongo ut kunōn n'onwongo remo obedo cwer kī i kome pī mwaka apar arīō na ba cok. Ên ôbalō jami na ên ute kōdê kibêc both êcang jō, êntō ngat mōrō onwongo ope na rōmō cangō ên. 44 Cūcūth ka ên opelo kī kungee Yecu, cē ogudo lak bōngū ka Yecu. Cūcūth remo na cwer ojīk ôkō. 45 Yecu openyo nī, "Nga n'oguda?" Jō kibêc ôkwērō gīnī ôkō, cē Petero okobo nī, "Adwong jīi oriki dyerē êka tye ka thwaroni gīnī kī tung mōrō kēkēn." 46 Êntō Yecu okobo nīgī nī, "Ngat mōrō oguda, piēn awinyo tēkō mē cangō dhanō ka yaa ôkō kī i koma." 47 Dhakō ongeō nī ba êrōmō pono, cē obino na kome myēl êka orumo cōngē pīny i nyim Yecu. Ên okobo both jō kibêc pīngō egudo Yecu êka kī kite n'êcang kōdê cūth. 48 Cē Yecu okobo both dhakō nōn nī, "Piēn dong iyee êka icang ôkō, cīdh giri kī kuc." 49 I karē na Yecu pod twak, ngat mōrō n'eoro obino kī i pacō ka Yairo,

adwong mē cinagoga, cē okobo nī, "Nyari dong ôthōō ôkō, kūr dōk iyel apwony." 50 Na Yecu owinyo kōp nī, okobo nī Yairo nī, "Kūr ipar! Bed kī yee cē nyari bino cang." 51 I karē na Yecu ôdōnyō i ôt ka Yairo, ba oyeo ngat mōrō nī êk ôlūb kōrē, na path kī Petero, Jon, Yakobo êka enyodo ka nyan nōn. 52 Jō kibêc onwongo kok na dhongo korgī pī nyakō nōn. Yecu okobo nī, "Athīn ba ôthōō, êntō ônīnō anīna." 53 Jō kibêc ônyērō Yecu anyēra piēn gīn onwongo ngeo nī nyakō nōn ôthōō ôkō. 54 Êntō Yecu ômakō cīng nyakō nōn cē okobo nīnē nī, "Athīn, yaa malō!" 55 Cūcūth kwō mērē odwogo, êka ôya ôkō malō wang acēl. Yecu okobo nīgī dong nī êk êmīi nyan nōn cem ôcam. 56 Enyodo mērē ouro rwōk. Êntō Yecu ôcīkōgī nī kūr okob gīnī both ngat mōrō ngō n'ôtimêrê.

9 Yecu ocwodo êlūbkōrē apar arīō kanya acēl cē ômīōgī tēkō kī twēr mē ryēmō cene êka kī cangō twoe. 2 Cē oorogī mē cīdhō tītō kōp i kom Ker k'Obanga êka mē cangō etwoe. 3 Ên ôcīkōgī nī, "I wothwu kūr icīdh unu kī gin mōrō. Kūr icīdh unu kī lūth, k'ekapu, onyo cem, cīlīng êka kī bōng arīō. 4 Ôt nī bino dōnyō unu iê, bed unu kunōn naka iya unu kī i taun nōn. 5 Kanya ba êgamōwu iê, ka iya unu kī i taun nōn tēng unu apua mē tyēnwu, êk onyuth nīgī nī êngōlō kōp i komgī pī kwērō kōp mē Emuth na Bēr." 6 Êlūbkōr Yecu ôya êka ôcīdhō gīnī i peci na tītō gīnī kōp mē Emuth na Bēr êka kī cangō etwoe i kabedo kibêc. 7 Erode alōc mē Galilaya owinyo gin na kibêc n'obedo ka tīmêrē cē wie ocung ôkō. Piēn jō nōkēnē onwongo kobo gīnī nī Jon Abatica ênē ocer kī i kin jō n'ôthōō. 8 Jō nōkēnē okobo nī Eliya ênē onen êka jō nōkēnē nī ngat acēl kī kin edwarpīny na cōn ênē ocer. 9 Êntō Erode okobo nī, "Jon yam anguno ngute ôkō yo! Man nga na dōk awinyo kōp i kome ni?" Erode ôparō mē nēnō Yecu. 10 I karē n'êkwēna odwogo gīnī both Yecu, okobo gīnī nīnē ngō na gīn êtīmō kibêc. Cē Yecu owotho kōdgi yo taun n'ecwodo nī Bethsaida, kanya gin twērō bedo iê kēn-gī. 11 Êntō jō na pol ongeō ka kwene na Yecu onwongo cīdhō yo iê k'êkwēna mērē cē ôlūbō gīnī kōrē. Ên ôgamōgī, ôtwak kōdgi i kōp mē Ker k'Obanga êka ôcangō jō kibêc n'onwongo two. 12 Na ceng dong cwōk dōnyō, êlūbkōrē apar arīō obino both Yecu cē okobo gīnī nī, "Kob nī jīi ôcīdh gīnī i kin peci êka kī kanya jīi bedo iê êk onwong gīnī cem mōrō êka ka nīnō. Gin mōrō ope i kabedo ni kany cal kanya lik." 13 Yecu ôgamō nī, "Miwugi gin mōrō mē acama." Êntō gin ôgamō nī, "Wan eut k'ogati na thīthīnō abic êka rēc arīō. Thwara ka wan êcīdhō mē wilō cem pī jō ni kibêc." 14 Onwongo cwō na rōmō elīp abic tye kunōn.

Yecu okobo n'ëlübörë nî, "Kob nî jîi obed pîny i wel mē pyer abic abic." 15 Cē ãlübör Yecu ôtimô kite na ên okobo kôdê êka jô kibêc obedo pîny. 16 Yecu ôkwanyô ogati abic êka rêc ariô. Ônênô malô i polo, êka ôpwôyô Obanga. Cē ôtûrô ogati na thîthinô, ên obedo ka miô ogati kî rêc both ãlübörê êk opok gîni nî jîi. 17 Jô kibêc ocemo naka oyeng gîni. Êka ãlübör Yecu ôcôkô gîny cem n'odong pong aditi apar ariô. 18 I nînô môrô acêl na Yecu onwongo tye i lêga kênê, ãlübörê obino gîni bothe. Cē Yecu openyogî nî, "Jîi kobo nî an abedo nga?" 19 Gîn ôgamô nî, "Jô nôkênê kobo nî in ibedo Jon Abatica. Êka jô nôkênê kobo nî in ibedo Eliya nakun jô nôkênê kobo nî adwarpîny na côn ênê ocer." 20 Cē Yecu openyogî nî, "Êntô un kono ikobo nî An abedo nga?" Petero ôgamô nî, "In ibedo Meciya k'Obanga." 21 Yecu dong ôcîkô ãlübörê êk kûr okob gîni both ngat môrô kôp nôn. 22 Yecu okobo nîgî nî, "Wod ka dhanô myero onwong can na thwônê. Edong k'Eyuda, êlamdhôk na dito êka epwony cîk ka Muca bino kwêronê ôkô. Ebino neko ên, êntô kinge nînô adek bino cer ôkô." 23 Cē Yecu okobo both jô kibêc nî, "Ka ngat môrô mitô bedo alübôra, myero ên kono ôkwêrê kênê, oting yath aria mêrê nînô kî nînô êk ôlûb kî kôra. 24 Ka ngat môrô mitô gwôkô kwô mêrê, ên bino rwenyo gum mē nwongo kwô na bedo naka. Êntô ngat na bino rwenyo kwô mêrê pî tio tîcna, bino nwongo kwô n'adyer. 25 Ngô na dhanô bino nwongo ka ut kî jami mē lobo nî kibêc cē orwenyo gum mē nwongo kwô n'adyer? 26 Ka ngat môrô lewic makô i koma êka kî ngô na an apwonyo cē Wod ka dhanô thon lewic bino makô ên i kome ka ên bino bino kî dheo mêrê êka kî dheo k'Apap mêrê êka mē emalaika na leng. 27 An akobo niwu kôp adyer nî, tye jô mōkô n'ocung kany na ba bino gîni thôô, naka ka wang n'ônênô gîni ker k'Obanga ka bino kî tēkô." 28 Na dong rômô nînô aboro kinge na Yecu okobo kôp nî, ên otero Petero, Jon êka Yakobo kôdê, cē ôidhô kôdgî i wi kidi mē cîdhô lêga. 29 I karê n'onwongo ên tye ka lêga, terinyime ôlôkêrê na path, êka bông mêrê ôdôkô na tar na ryênny aryênny. 30 Cwô ariô onen athura Muca êka Eliya 31 n'onen kî dheo, na twak gîni kî Yecu i kôp i kom yaa mêrê kî i lobo nî n'onwongo myero ên ocob ôkô i Jerucalem. 32 Petero êka ewodhe onwongo nînô ômakô wang-gî na tēk, êntô na gîn dong ocoo, ônênô gîni dheo ka Yecu êka jô ariô n'ocung kôdê kanya acêl. 33 Na cwô ariô nôn dong mitô yaa ôkô kî both Yecu, Petero okobo nî, "Adwong, bēn nî onu mē bedo kany. Êk êgēr othogo adek, acêl megî, acêl mē ka Muca êka acêl mē k'Eliya." Êntô Petero ba ongeogô n'ongwongo ên tye ka twakô. 34

Na Petero pod twak, pôl obino oumogî ôkô cē lworo ômakôgî na pôl oumogî. 35 Dwôn môrô ôtwak kî i pôl na kobo nî, "Man ênê Woda, na dong ayêrô, winye unu." 36 Ka dwôn nî ôtwak ôkô, cē onwongo gîni Yecu odong kênê. ãlübör Yecu adek nî ôling gîni i ngô n'ôtimêrê êka ba okobo gîni nî ngat môrô i caa nôn ngô na gîn ênênô. 37 Kodiko mêrê, na Yecu oidho pîny k'ëlübörê adek kî wi kidi, lwak na pol oromo kôdê. 38 Athura êcwô môrô oredo kî kin lwak nî, "Apwony, abakô dhôga bothi, êk inên woda nî, piên obedo athîn acêl kékên na an atye kôdê. 39 Ka tipo na rac ômakô ên, miô kok ôkô cûth, ryêrê, cē rakêrê, bwo donyo kî i dhôgê. Ba yaa kî i kome piôpiô êka nyônyôgô kome na tēk. 40 Abakô dhôga both ãlübörê êk ôryēm gîni ôkô, êntô ryēmô ôlôogî ôkô." 41 Yecu okobo nîgî nî, "Un jô mē karê nî, ba itye unu kî yee, kitewu dong ôbal ôkô. Abino bedo kodwu naka awene? Abino diô cwinya thon awene? Cē Yecu okobo both êcwô nî kel wodi kany." 42 Na pod awobi nî tye ka bino both Yecu, cen ôrêdhô pîny cē ôrakêrê. Êntô Yecu ocoko tipo na rac cē ôcangô awobi nî ôkô êka ômiô both apap mêrê. 43 Jô kibêc ouro tēkô k'Obanga. Na gîn pod tye ka uro gin na kibêc na ên otio, Yecu okobo both ãlübörê nî, 44 "Winy unu na bēn ngô na an abino kobo niwu, Wod ka Dhanô ebino miô i cîng jô na bino neko ên." 45 Êntô ãlübörê ba ôniang i kôp nî. Onwongo êkanô ôkô kî bothgî êk kûr ôniang gîni iê. Êka onwongo obedo gîni kî lworo mē penyô ên pî kôp nôn. 46 Pyem ôcakêrê i kin ãlübör Yecu nî nga ênê dit. 47 Yecu ongeogô thamagi ôkô, cē ôkwanyô athîn acêl êka ômiô ocung i ngete, 48 cē okobo nîgî nî, "dhanô kibêc gamô athîn nî kî nyinga nwongo ôgama, dhanô kibêc na gama nwongo ôgamô ngat n'ora. Piên ngat na tîdî rwôk kî i kinwu kibêc ênê ngat na dit." 49 Jon okobo nî Yecu nî, "Rwoth, ênênô dhanô na ryēmô cen kî nyingi êka ekobo nînê mē wêkô ôkô, piên ên ba obedo akukurwa." 50 Êntô Yecu okobo nî, "Kûr ijûk unu, piên ngat na ba obedo langôwu, nwongo ute kukurwu." 51 Na karê ka Yecu mē tero ên i polo dong onyingo na cwôk, ên ôcîdhô yo Jerucalem. 52 Ên ooro êkwêna n'ôtlêlô anyim, n'ôcîdhô gîni yo peci ka jô Camaria co yûbô gin na kibêc obed cûth nînê. 53 Êntô jô Camaria ba ôgamô Yecu piên ên onwongo ut i woth mêrê yo Jerucalem. 54 I karê n'ëlübörê, Yakobo êka Jon ônênô, okobo gîni both Yecu nî, "Rwoth imitô ecwod mac êk ôya kî i polo otyekgî ôkô?" 55 Êntô Yecu ôlôkêrê ôjûkôgî. Ên okobo nîgî nî, "Un ba ingeo unu Tipo nî ute unu kôdê, piên Wod ka dhanô ba obino mē neko jîi, êntô mē larôgî." 56 Gîn ôcîdhô gîni i peci nôkênê. 57 Na Yecu êka ãlübörê

onwongo ute i wothgi, ecwo mōrō okobo ni Yecu ni, "Abino lūbōni naka kanya in ibino cidhō yo iē." 58 Ēka Yecu ōgamō ni, "Kwee tye ki ōd rwo gini, ēka winy na ngwēcō ki malō tye ki udi, ēntō Wod ka dhanō ope ki kany mōrō na ēn pyelo wie iē." 59 Yecu dōk okobo ni ngat nōkēnē ni, "Bin ēk ilūba." Ēntō dhanō ni ōgamō ni, "Rwoth ēk kono acidh pacō akūr apapna ka ōthōō cē aiki." 60 Yecu dōk ōgamō ni, "Ēk jō n'ōthōō oik jōōgi n'ōthōō, ēntō in icidh iyar Ker k'Obanga." 61 Ēcwō nōkēnē dōk okobo both Yecu ni, "Rwoth an abino lūbōni. Ēntō mē acēl, yee nina kono acidh amoth jō na para." 62 Yecu dōk ōgamō ni, "dhanō mōrō ope na makō kwēr wanu, ēka nēnō kungee nwongo ba opore mē tic i Ker k'Obanga."

10 Kinge, Yecu ōyērō ēlūbkōrē jō pyer abirō wie ariō. Cē oorogī k'ariō ariō mē cidhō anyim i taun ēka i kabedo nōkēnē na ēn onwongo ebino thuno iē. 2 Yecu okobo bothgi ni, "Kac dwong, ēntō ēkac nōnōk. Lēg unu both Rwoth n'obedo won pwodho ēk oor etic i kac. 3 Cidh unu dong, ēntō po unu ni aorowu na calō ēthin rom i kin orudi. 4 Kūr icidh unu ki fim onyo opiru, kadī wōr, ēka kūr ibal unu caa na pol i motho jii. 5 "Ka idōnyō unu i ōt, mē acēl kob unu ni, 'Obanga ōmiwu kuc.' 6 Cē k'athin mē kuc ute i ōt nōn, cē kucwu bino bedo i kome. Ēntō ka ope cē kucwu dwogo bothwu. 7 Bed unu i ōt nonu, kūr ibed ka kōbērē unu ōt ki ōt. Nakun icamō ēka imadhō unu gin n'ēmīowu, piēn atic myero ēmii cūl mērē. 8 "Ka idōnyō unu i taun mōrō cē ēgamōwu, cam unu ngō n'eketho i nyimwu 9 Cang unu etwoe na ute kunōn ēka ikob unu nigī ni, 'Ker k'Obanga dong cwōk.' 10 Ēntō ka idōnyō unu i taun mōrō, cē ba ēgamōwu, cidh unu i wangayoo mē taun nōn, ēka ikob unu ni, 11 'Naka thon apua mē taunwu n'omoko i tyēnwa, ētēngō i komwu. Kadī bed ni kōmanōn myero ingee unu ni Ker k'Obanga dong cwōk.' 12 Akobo niwu ni i nīnō nōn mē ngōlō-kōp, taun ni bino bedo ki can na lōō pēkō ka jō Codom!" 13 "Ibino nēnō can in, Korajin! Ibino nēnō can in, Bethsaida! Ka tango n'onwongo ētimōgi bothwu onwongo ētimō i Turo ēka Cidon, kono onwongo ongut gini cōn, nakun ruko gini bōngū cōla ēka juko gini wigī ki buru. 14 Canwu i nīnō mē ngōlō-kōp bino bedo na thwōnē na lōō can ka Turo ki Cidon! 15 Ēka un jō mē Kaperanaum imitō wakērē unu kenwu ni ibino cidhō unu i polo? Pathi kōmanōn, ebino dwōkōwu cen i lyēl." (Hades g86) 16 Yecu okobo both ēlūbkōrē ni, "Ngat na bino winyowu, nwongo owinya, ngat na ba bino winyowu, nwongo ōkwēra. Ēka ngat n'ōkwēra nwongo ōkwērō ngat n'ora." 17 Ēlūbkōr Yecu pyer abirō odwogo gini cen ki yom

cwiny, ēka okobo gini ni, "Rwoth, naka cene thon owinyowa ka wan etio ki nyingi!" 18 Yecu ōgamō nigī ni, "Anēnō Catan ka rēdhērē piny na yaa ki i polo na cal ki lūkōth. 19 Winy unu, amīowu twērō mē nyōnō twol ki ith ēka mē lōōnō tēkō ka langwu kibēc. Gin mōrō ope na bino timōwu na rac. 20 Ēntō kūr ibed unu ki yom cwiny kēkēn ni tipo na reco owinyowu, thwara ibed unu na cwinywu yom piēn Obanga ōcōō nyingwu i polo." 21 I karē nōn, Tipo Naleng ōmīō Yecu yom cwiny nakun kobo ni, "An apaki Apap, Rwoth mē polo ēka lobo, piēn ikanō jami ni ōkō ki both jō na ryēk ēka ki both jō na ngeo piny, ēka inyutho both ēthinō na pod thinō. Eyo, Apap, man ēnē kite n'onwongo in imitō ni ōtimērē kodē na yomo cwinyi. 22 "Jami kibēc Obanga otyeko mīō ōkō botha. Ngat mōrō ope na ngeo Wod ni ēnē nga kono k'Apapna kēkēn. Ēka ngat mōrō ope na ngeo Apapna ni ēnē nga kono ka Wod kēkēn, ēntō dhanō na Wod ōyērō mē nyutho both Apap mērē." 23 Cē Yecu ōlōkērē both ēlūbkōrē cē okobo nigī mūng ni, "Tye ki gum ngat n'ōnēnō gin na un inēnō! 24 Akobo niwu ni edwarpiny na pol ēka rwothi yam ōparō gini mē nēnō gin na un inēnō, ēntō ba ōnēnō gini. Ēka ōparō gini mē winyo gin na un iwinyo, ēntō ba owinyo gini thon." 25 I nīnō mōrō acēl, apwony cik ka Muca mōrō ōya malō mē tēmō Yecu na kobo ni, "Apwony, atim ngō ēk anwong kwō na bedo naka?" (aiōnios g166) 26 Yecu ōgamō nīnē ni, "Ngō n'ēcōō i buk mē cik ka Muca? Iniang iē nīngō?" 27 Apwony cik nōn ōgamō nīnē ni, "Mar Rwoth Obangani ki cwinyi kibēc, ki tiponi kibēc, ki tēkōni kibēc, ki thamani kibēc, ēka mar awodhi na calō imarō komi keni." 28 Yecu ōgamō nīnē ni, "Kakarē. Tim kōmanōn cē ibino kwō." 29 Ēntō apwony cik n'onwongo mitō nyutho ni ēn kite atir i nyim Obanga, dōk openyo Yecu ni, "Awodha ēnē nga?" 30 Yecu ōgamō nīnē ki carolok kōman, "Ēcwō mōrō yam ute n'ōya ki i Jerucalem, n'onwongo tye i woth mērē lungu yo kupiny Jeriko. Ocop i kom ēyak, ēmakō, ēgōnyō bōng mērē ōkō, epwodo cē ēwēkō na dong cwōk thōō. 31 Alamdhōk obino na lūbō yoo nōn thon. Ēntō i caa n'ōnēnō ngat n'ēwanō, ēn owok ki theng yoo kucēl cē opoth apotha. 32 Kōmanōn thon Alebi mōrō ōlūbō yoo nonu. Ēn ēnēnō ecwō nōn n'epwodo, cē opoth ōkō. 33 Ēntō dhanō mē Camaria mōrō obino, ōnēnō ngat n'ēwanō, ēka obedo ki kica i kome. 34 Ēn ōcidhō i ngete, orumo cōngē piny, ōlwōkō wang ret mērē ki kōngō ōlōk, odunyo ki mōō cē otweo k'opeke bōngū. Ēn dong otingo ecwō nōn opyelo i ngee kana mērē cē ōcidhō kodē naka i ōt apanga pi wele kany ōgwōkō iē. 35 Kodiko mērē ēn ōkwanyō denario ariō ōmīō both won ōt nōn na kobo

ninē nī, 'Gwōk ēcwō nī na bēr, ēka ka itio kī cīlīng na kadhō wel na an amiō bothi ōkō, abino dwōkō nini ka adwogo.'" 36 Cē Yecu dōk openyo ēn nī, "Nga kī kin jō adek ni ēnē obedo awodh ēcwō n'ēyak opwodo?" 37 Apwony cik ōgamō nī, "Ngat n'obedo kī kīca i kome." Cē Yecu okobo ninē nī, "Adyer! In thon cidh ēka itīm nī kōmanōn." 38 Yecu ēka ēlūbkōrē onwongo ut i wothgī yo Jerucalem, ēka ōdōnyō gīnī i pacō mōrō. Dhakō mōrō na nyingē Martha ōgamōgī i ōdē. 39 Ēn onwongo ut k'amīn mērē n'ecwodo nī Maria n'obedo pīny i nget tyēn Rwoth winyo pwony mērē. 40 Ēntō Martha obedo yelere i tic kibēc mē yūbō cem mē acama. Ēn obino both Yecu cē okobo ninē nī, "Rwoth, in ba iparō nī amēra ōwēka kēna i dhō tic? Kob ninē obin ōkōnya." 41 Rwoth ōgamō ninē nī, "Martha, Martha, in iparō pī tic na pol, 42 ēntō gin acēl kēkēn ēnē mītērē. Maria ōyērō gin na bēr, na ba ebino kwanyō ōkō kī bothe."

11 Ī nīnō mōrō acēl, Yecu onwongo lēgō i kabedo mōrō. Na dong otyeko lēga, alūbkōrē acēl okobo ninē nī, "Rwoth, pwonywa kī lēga kite na Jon Abatica opwonyo k'ēlūbkōrē." 2 Yecu okobo nigī nī, "Ka un i lēgō kob unu kōman: "Apap, ēk nyingi na leng ēwōr, ēk Kerni obin i lobo. 3 Mīlwa cemwa mē nīnō kī nīnō. 4 Tīm nīwa kīca pī balwa, kite na wan ētīmō kīca nī jō kibēc na balō i komwa. Kūr i wēk ēdōny i atēma." 5 Yecu dōk okobo nigī nī, "Ka yam ngat acēl kī i kinwu ōcidhō both okon mērē dingwor cē okobo ninē nī, 'Okona, kōnya kī cem mōrō. 6 Okona na tye i woth mērē obino botha athura, ēntō cem ope na an arōmō miō ēn." 7 "Cē okoni ōgamō kī i ōt nī, 'Kūr ilōla. Dholokek dong eloro ōkō, ēka ēthīnōna thon kī an dong ebuto ōkō. An ba arōmō yaa malō mē miōni gin mōrō.' 8 Akobo niwu nī, kadi bed ēn ba bino yaa malō cē miō cem ninē, piēn ēn obedo okon mērē, ēntō pī adīdē k'ēcwō nī, ēn bino yaa malō cē miō ēn cem na thwōnē i kite na ēn mītō kōdē. 9 "Pī man akobo niwu nī, kwa unu cē ebino miōwu. Rang unu, cē ibino unu nwongo. Dwōng unu dholokek, cē ebino yabō niwu. 10 Ngat acēlacēl na penyo ebino miō; ngat na rangō bino nwongo; ēka ngat na dwōngō ebino yabō ninē dholokek. 11 "Un enyodo, nga kī i kinwu na k'athīn mērē ōkwaō rēc mē acama cē miō thwol? 12 Onyo ka ēn ōkwaō tōng gwēnō mē acama, i rōmō miō ēn ith? 13 Dong ka un ēbal ingeo unu kite mē miō mīc na bēcō both ēthīnōwu, cē dong Apapwu na ut i polo bino miō Tipo Naleng na rōm kanyē both jō na kwaō ēn!" 14 Ī nīnō mōrō acēl, Yecu onwongo tye ka ryēmō cen n'onwongo ba twak kī i kom ēcwō mōrō. Na dong cen ōya ōcidhō ōkō, ēcwō n'onwongo

ba twak nī, ōcakō twak ēka lwak ouro. 15 Ēntō jō mōkō kī i kin-gī okobo nī, "Yecu tye ka ryēmō cen kī twēr ka Belijebul adwong mē cene." 16 Jō nōkēnē ōtēmō Yecu nakun penyo gīnī anyuth n'ōya kī i polo. 17 Ēntō Yecu ongeō thamagī ēka okobo nigī nī, "Ka ker opokere iē arīō, cē ker nōn lobo mērē bal ōkō ēka ka jō mē pacō nōn ka opopokere gīnī, pacō nōn thon kēth ōkō. 18 Ka Catan thon opokere iē arīō, ker mērē twērō cung nīngō? Akobo man piēn un ikobo nī an aryēmō cen kī twēr ka Belijebul. 19 Ka an aryēmō cen kī twēr ka Belijebul, cē ēthīnōwu kono ryēmō gīnī cen kī twēr ka nga? Pī man gin ēnē bino bedo ēngōl-kōpwu. 20 Ēntō ka an aryēmō cen kī tēkō k'Obanga, cē man dong nyutho nī Ker k'Obanga dong othuno bothwu. 21 "Ka dhanō na tēk, n'oruko jami mē lwēny mērē kibēc, tye ka kūrō ōdē, akwo ba rōmō kwalō jami mērē. 22 Ēntō ka dhanō mōrō na tēk na lōō ēn, ōlwēnyō i kome ēka ōlōō ēn ōkō, ēn bino cōkō jami lwēny mērē na yam ēn geno, cē poko kī jō nōkēnē ngō na yam ēn ōyakō. 23 "Ngat n'ope kukura nwongo ēn ba mīta, ēka ngat mōrō na ba kōnya mē cōkō kanya acēl kōda kēthō akētha. 24 "Ka tipo na rac ōya ōkō kī i kom dhanō mōrō, ēn cidhō rimo kabedo na pii ope iē cē rangō ka yweo ēka ba nwongo kabedo mōrō. Cē ēn kobo nī, 'An abino dōk i ōt na an aya kī iē.' 25 Ka othuno, cē nwongo ōt ēyweō na leng ēka ēyūbō na bēr. 26 Ēn dōk cidhō kelo tipo na reco nōkēnē abirō na kitegī reco na lōō ēn ōkō cē dōnyō gīnī i kom dhanō nōn. Ēka dhanō ni bedo na rac na lōō kite n'onwongo tye kōdē cōn." 27 Na Yecu onwongo tye ka twak, dhakō mōrō kī i kin lwak oredo kī dwōn na malō rwōk nī, "Gum obedo i kom dhakō n'onywoli ēka ododhi." 28 Ēntō Yecu ōgamō nī, "Jō na winyo kōp k'Obanga ēka gwōkō, tye gīnī kī gum." 29 Na lwak ōmēdērē na pol, Yecu ōcakō kobo nī, "Un jō mē karē ni ibedo unu jō na reco! Īrangō unu anyuth mē tango ēntō ba ebino miōwu anyuth mōrō, kono k'anyuth ka Yona. 30 Na calō Yona onwongo obedo anyuth both jō mē Ninebi, kōmanōn thon Wod ka dhanō bino dōkō anyuth both jō mē karē nī. 31 "Alōc na dhakō na tye yo kukwap lobo bino cung kanya acēl kī rok mē karē ni ēka ngōlō-kōp i kome; piēn ēn ōya kī i ajiki lobo mē winyo ryēkō ka Colomon, ēka ngat na dit na lōō Colomon tye kany. 32 Jō mē Ninebi bino cung gīnī kī rok mē karē ni ēka bino ngōlō gīnī kōp i kome; piēn ongut gīnī i karē mē tītō kōp na Yona onwongo ōtītō, ēka kobedini ngat na dit na lōō Yona tye kany. 33 "Ngat mōrō ope na ka ōcwīnyō tara cē ketho kany mōrō n'obedo gūl, onyo umo ōkō k'adīta. Ēntō, ketho kany ecibo tara iē, ēk ka jō kibēc na bino i ōt ōnēn gīnī tar mērē. 34 Wangi ēnē tara mē

komi. Ka wangi neno na bër, komi kibëc thon bedo na leng. Ëntö ka wangi ba neno, komi kibëc thon bedo i piny na cöl. 35 Gwökërë ëk tar na ute i i kür ödök na cöl. 36 Dong ka komi kibëc opong ki tar, ëka kany mörö ope na cöl, cë komi kibëc bino bedo na tar, na calö cara ka tara na menyì. 37 Kinge na Yecu otyeko pwony, Aparicayo mörö ögamö ën më cidhö cem ködë. Yecu ödünyö i öt ëka obedo i dhö cem. 38 Ëntö Aparicayo ouro ka önëhö ni Yecu öcakö cem na bara ölwökö cingë i kite më thëkwarögí. 39 Cë Rwoth okobo ninë ni, "Un Eparicayo, iporo unu më bedo jö na leng ölwökö unu ngee okopo ki bakuli, nakun iwu opong ki yak ëka ki tim na reco. 40 Un emingo! Path Obanga ënë otio gin na yökö ënë thon otio gin më ië? 41 Ëntö miñ unu ngö ni ute unu ködë both ëcan, jami kibëc ni bino timö unu, bino yomo cwiny Obanga. 42 "Ëntö ibino nëhö unu can, un Eparicayo! Piën imiö unu acël më apar më apuruku, öbüga, ëka ki kit ngwedo kibëc, nakun iwëkö unu ngölö-köp atir ëka ki marö Obanga. Miñ unu acël më apar ëntö kür iwëk jami na pirgi tæk ökö. 43 "Ibino nëhö unu can un Eparicayo! Piën imarö unu thene më wörö na ut anyim i cinagoga. Imiö unu ni jii thon omothwu ki wörö ki i cuk. 44 "Ibino nëhö unu can piën iröm unu ki wi lyene na ba nen na jii wotho i wigi nakun ba ngeo gini." 45 Apwony cik ka Muca mörö acël ögamö ni, "Apwony ka ikobo kömanön nyutho ni iyanyöwa thon nakun wan ebodo epwonye më cik." 46 Yecu okobo ninë ni, "Ibino nëhö unu can un epwony cik piën imiö unu jii yëö yëc na pëk. Ëka un thon ba igudo unu kadí ki nya cingwu acël. 47 "Ibino nëhö unu can! Piën icanö unu kite i wi lyene k'edwarpiny na yam kwerewu onekogi! 48 Pi timö ni kömanön nyutho ni un ecaden më ngö na kwerewu ötimö. Gin oneko edwarpiny ëka un icanö kite i wi lyenegi! 49 Piën pi ticwu na rac, man ënë gin na ryëkö k'Obanga okobo ni, 'Abino oro bothgi adwarpiny ëka ëkwëna, ëntö jö mökö ebino nekogí ëka jö nököne ebino yelogí.' 50 Jö më karë ni ebino ngölö nigí köp pi önyö remo k'edwarpiny kibëc anaka i acaki piny, 51 cakërë ki kom neko Abel naka othuno ködë i kom neko Jakaria n'öthö, i kin keno tyër më öt k'Obanga ëka kabedo na leng. Eyo akobo niwu ni ebino ngölö-köp mëré i kom rok më karë ni. 52 "Ibino nëhö unu can, un epwony cik! Piën imaö unu agöny më ngeo piny ökö, un kikomwu ba idönyö unu ië. Ëka igëngö unu dhanö na mitö dönyö ië thon." 53 Cë dong Yecu öya ökö ki kunön, Eparicayo ëka epwony cik öcakö gini ñirë na tæk na rökö gini dhögë ki peny na pol, 54 nakun kio gini më nwongo köp mörö na yaa ki i dhögë ëk edothi.

12 I karë nön, pol dhanö elip ki elip ögürë gini kanya acël, nakun nyönërë gini kën-gi. Yecu öcakö twak both ëlückörë na kobo ni, "Gwökërë unu ki kom thöbi k'Eparicayo, na ënë kite më twodo. 2 Gin mörö kibëc n'eumo ökö imüng, Obanga bino elo ökö kanyalër. Ëka gin mörö ope n'eumo na ba ebino ngeeno. 3 Pi manön jö kibëc bino winyo ngö ni twakö unu imüng, ëka ngö ni mwöngö i ith awodhi, jö nököne bino tuco ökö. 4 "Nyikoneina, akobo niwu ni kür ilwor unu jö na neko kom ëka kinge manön, ba dökö römö timö gin mörö nököne. 5 Ëntö abino nyutho bothwu ngat na myero ilwor unu. Lwor unu Obanga na ut ki twër më neko dhanö cë bolo ökö i mac kapiny. Eyo, akobo niwu ni, lwor unu ën. (Geenna g1067) 6 Winy abic ba ëcadhögi i wel më ciling na titidi? Ëntö ba tye mörö n'Obanga wie wil ködë. 7 Kadí bed yer wiwu kibëc ëkwanö ökö, kür ibed unu ki lworo. Un pirwu tæk rwök löö winy na pol." 8 Cë Yecu okobo both ëlückörë ni, "Akobo niwu ni ngat na bino tuco nyinga i nyim jii, Wod ka dhanö thon bino tuco nyingë i nyim emalaika k'Obanga. 9 Ëntö ngat na bino kwëröna i nyim jii, ën thon ebino kwërö ökö i nyim emalaika k'Obanga. 10 Jö kibëc na twakö twak na rac i kom Wod ka dhanö ebino timö nigí kica. Ëntö ngat na bino yanyö Tipo Naleng, ba ebino timö ninë kica. 11 "Ka ekelowu i pido i nyim ëtëla ëka ëlök ki wegí twër më cinagoga, kür ibed unu ki par na pol kite na myero itwak unu ködë. Kür thon ipar unu ngö na un ibino gamö onyo köp mëné na un ibino twakö. 12 Piën Tipo Naleng bino pwonyowu i caa nön i ngö na myero ikob unu." 13 Ngat acël ki kin lwak okobo both Yecu ni, "Apwony, kob n'ömëra ëk wan epok ködë lim k'apapwa na wan eleo." 14 Yecu ögamö ninë ni, "Okona, nga n'oketha më bedo angöl-köp ëka apok jami niwu?" 15 Cë Yecu okobo nigí ni, "Bed unu na wangwu thwolo ëka igwökërë unu ki kom woro më lim. Kwö ka dhanö ba ocung i kom wel lim na thwönë na ën ute ködë." 16 Cë Yecu obolo nigí carolok ni, "Alönyö mörö yam tye na cem mëré öcëk i pwodho na thwönë. 17 Ën openyere ki i cwinye kënë ni, 'Abino timö ngö? Ka ketho cemna ope.' 18 "Cë ën okobo ni, 'Man ënë gin na an abino timö. Abino rworwobo derena ökö ëka agöö dere na thwon cë dong aketho cem ië ëka jamina.' 19 Abino kobo ni cwinya këna ni, 'In dong iut ki cem na thwönë ki jami na bëcö na pol na bino römöni pi mwaka na pol. Ywe giri, cem, medhi ëka ibed ki yom cwiny.'" 20 "Ëntö Obanga okobo ninë ni, 'In amingo! I kiwor na tin ni, kwöni ebino kwanyö ökö ki bothi. Cë nga na bino lunyo jami na in ikanö?" 21 Cë Yecu ojiko na kobo ni, "Bino bedo ni kömanön both jö na kanö jamigi kibëc

piŋgĩ kèn-gĩ èntò nwongo ba ut kĩ lönyö mërè both Obanga.” 22 Cè Yecu okobo both èlùbçokèrè nĩ, “Pĩ manòn akobo niwu nĩ kũr ibed unu kĩ par na pol pĩ kwò na mewu nĩ ibino camò unu ngò onyo pĩ komwu nĩ ibino ruko unu ngò. 23 Kwò pĩrè tèk lőö cem èka kom pĩrè tèk lőö ruk ökö. 24 Par unu mõnò pĩ agak! Ba cwò gĩnĩ kodhi onyo kaò kac, ba ut gĩnĩ kĩ dërò onyo ka ketho jami cithè Obanga pod pĩdhögĩ. Un ba ingeo nĩ pĩrwu tèk both Obanga lőö wĩny ökö? 25 Nga kĩ kinwu na römò mēdō caa acēl mōrō ĩ kom kwō mērē pĩ bedo kĩ par na pol? 26 Kite na ba ĩrōmō unu tĩmō gin na tĩtĩdĩ, pĩngō ibedo unu kĩ par na pol pĩ jami nōkēnē? 27 “Tham unu kite n’athure dōngō kōdē. Ba tio gĩnĩ tic mōrō onyo wiō wicu. Èntō akobo niwu nĩ kadĩ bed Colomon yam orukere kĩ dheo mērē kibēc, èn ba orukere na bër na cal kĩ mōrō acēl ĩ kin-gĩ. 28 Cè ka Obanga ruko lum na ut ĩ thim nĩ kōmanòn, na bedo pĩ nĩnō na tin kēkēn èka diki ebolo ökö ĩ mac, èn bino rukowu na lőö un jō na yeewu nōnōk! 29 “Kũr ibed unu thamō pĩ gin nĩ bino unu camō onyo madhō. Kũr ĩpar unu pĩ jami nĩ. 30 Pĩēn jō na ba ngeo Obanga rangō jami nōn, èka Apapwu ngeo ngō na un ĩmĩtō. 31 Nakaka manòn, keth unu cwinywu ĩ kom Ker k’Obanga, cè jami nōn kibēc ebino mēdō bothwu. 32 “Kũr ilwor unu, un lwak na nōnōk piēn Apapwu ĩē obedo na yom mē mĩō Ker mērē bothwu. 33 Cadhu jami nĩ ut unu kōdē èka mĩi unu both ēcan. Kwō unu ocwe mē ĩim na ba tii, kan unu lōnyōwu na ba thum ĩ polo, kanya akwo mōrō ba rōmō thuno ĩē èka nyēnyē thon ba balō. 34 Piēn kanya lōnyōnĩ tye ĩē ènē cwinyi thon tye ĩē. 35 “Bed nĩ yūbērē unu pĩ tic, nakun tarawu lyei. 36 Bed unu na calō jō na kūrō adwong-gĩ ka dwogo kĩ ĩ yūb mē nyom èk ēyab nĩnē dholokek piōpiō ka èn othuno. 37 Bino bedo mē gum pĩ etic n’adwong-gĩ bino nwongogĩ neno ka èn obino. An akobo niwu kōp adyer, èn bino ruko bōngũ mērē mē tic. Bino mĩōgĩ bedo ĩ mēja mē cem èka poko nigĩ cem 38 Bino bedo na bër pĩ etic n’adwong-gĩ bino nwongogĩ öyūbērē, kadĩ bed nĩ adwong nĩ bino thuno dingwor. 39 “Nĩang unu man nĩ ka kono yam won öt onwongo ngeo caa na kwo bino kōdē, èn onwongo ba yeo nĩ ödōny ĩ ödē. 40 Un thon myero ĩyūbērē, piēn Wod ka dhanō bino bino ĩ caa na un ba ingeo.” 41 Cè Petero openyo Yecu nĩ, “Rwoth, in ibolo carolok nĩ bothwa onyo both jō kibēc?” 42 Rwoth Yecu ögamō nĩ, “Nga n’obedo agwōk öt na genere èka ryēk? Ènē ngat n’adwong mērē bino ketho mē lōönō etic mērē èk ömĩgĩ cemgĩ ĩ caa na mĩtērē. 43 Bino bedo na bër both atic nōn ka adwong mērē odwogo cè onwongo èn tye ka tĩmō nĩ kōmanòn. 44 An akobo niwu kōp adyer, èn bino ketho èn mē lōönō jami mērē kibēc. 45

Èntō k’atic nōn ötwak kēnē kēnē nĩ, ‘Adwong ögalērē mē dwogo,’ cè öcakō pwodo etic ewodhe na cwō kĩ man obedo mon nakun èn cemo èka medho naka mēr. 46 Adwong k’atic nōn bino dwogo ĩ nĩnō èka ĩ caa na èn ba ngeo. Adwong nĩ bino pwodo atic nĩ na rac èka ketho èn ĩ kin jō na ba genere.” 47 “Atic na ba ngeo ngō n’adwong mērē mĩtō èka ba yūbērē ĩē dōk ba lūbō ngō n’adwong mērē mĩtō, ebino pwodo èn rwōk arwōka. 48 Èntō ngat na ba ngeo, cè otio ngō na twērō mĩō epwode, ebino pwodo èn na nōnōk Dhanō n’ēmĩō na thwōnē, ebino mĩtō na thwōnē kĩ bothe èka ngat n’egenō kĩ jami na pol, ebino penyo na pol rwōk.” 49 Cè Yecu okobo nĩ, “An akelo ngölō-kōp èka apokapoka ĩ lobo na an athamō nĩ öcakērē dong ökö. 50 Èntō aut kĩ batica na myero awok ĩē kĩ can èka pēkō naka wang n’othum. 51 Un ĩthamō nĩ an abino mē kelo kuc ĩ lobo? Akobo niwu nĩ pe èntō apokapoka. 52 Cakērē kobedini jō abic bino bedo gĩnĩ ĩ pacō acēl, k’apokapoka ĩ kin-gĩ. Jō adek bino pokere kĩ jō ariō èka jō ariō bino pokere kĩ jō adek. 53 “Apap bino pokere ökö kĩ wode èka athĩn bino pokere k’apap mērē. Aya bino pokere kĩ nyarē èka nyakō bino pokere k’aya mērē. Adha bino pokere kĩ cii wode èka cii wod bino pokere k’adha mērē.” 54 Cè Yecu okobo both lwak nĩ, “Ka ĩnēnō unu edou otingere n’olyero yo kuthō, piōpiō ikobo unu nĩ, ‘Wang na kōth ocwe,’ cè cwe thon. 55 Èka ka yamō kudho na bino kĩ kukwap, un ikobo nĩ, ‘Pĩny bino bedo na lyeth rwōk,’ cè bino tĩmērē kōmanòn. 56 Un etwodo! Ingeo unu poko anyuth na tye ĩ lobo èka ĩ polo ĩ kom kit na nĩnō bino bedo kōdē. Pĩngō dong ba ĩrōmō poko unu anyuth mē karē nĩ? 57 “Pĩngō ba ĩtwērō unu ngölō-kōp n’atĩr pĩrwu kenwu? 58 Ka ĩcidhō both angöl-kōp nakun ĩnywakō unu yoo acēl kĩ ngat n’odothi, tēm kĩ tèk mē yūbō kōp kōdē nakun pod itye unu ĩ wangayoo èk kũr oteri ĩ nyim angöl-kōp. Pĩ manòn, èk kũr ömĩi ĩ cĩng ngat na lőö buc cè oteri ĩ od buc. 59 Akobo niwu nĩ ba ibino donyo kĩ ĩ buc naka ka ĩcölō cül kibēc, na wi cĩfĩng mōrō ba orem.”

13 ĩ koth karē nōn, jō mōkō n’onwongo tye kunōn öniangō Yecu ĩ kom jō Galilaya na Pilato ömĩō twērō mē nekogĩ na gĩn tye ka tyērō tyēr. 2 Cè Yecu ögamō nĩ, “Un ĩthamō nĩ jō Galilaya nōn onwongo obedo ēbal na lőö jō Galilaya nōkēnē? 3 Akobo niwu nĩ pe! Èntō ka ba ingut unu èka idwogo unu both Obanga cè un kibēc ibino thōō unu kōmanòn. 4 Cè dong jō apar aboro na wi öt na bor mē Ciloam obino öredhērē ĩ komgĩ èka öthōō gĩnĩ, ĩthamō unu nĩ gĩn onwongo obedo ēbal na lőö jō nōkēnē na bedo ĩ Jerucalem? 5 Akobo niwu nĩ pe! Ka ba ingut unu

ëka idwogo unu both Obanga, cê un kibêc ibino thôô kômanôn." 6 Cê Yecu obolo carolok nî, "Êcwô mörö yam tye n'onwongo ôpidhō yath ôlam na nyakō nyige i pwodho ôlök mērê. Ên obino ôcidhō nakun rangō ka ônyakō nyige mörö, êntō ba onwongo. 7 Cê êcwô nôn ôcakō kobo both atic n'onwongo gwökō pwodho ôlök nôn, 'Pî mwaka adek abedo bino kany mē rangō nyig yath ôlam ni êntō ba anwongo mörö. Tong ôkō piny! Pingō balō ngôm?" 8 "Êcwô ni ôgamō nî, 'Adwong, kono iwêk obed pî mwaka ni kēkēn dôki, an abino bakō ngôm i thêrê cê aönyō ôwērō dyegi iê. 9 Ka ônyakō nyige i mwaka na bino cê bër rwök, ëka ka ba ônyak cê itong ôkō piny." 10 i ceng Cabit mörö acêl, Yecu onwongo tye i pwony i od cinagoga. 11 Dhakō mörö onwongo ute kunôn na tipo na rac oyelo pî mwaka apar aboro, two ni onwongo ogomo ên ôkō na ba rômō ryêrê malō atir. 12 i karê na Yecu ôñênō dhakō nôn, ocwodo ên anyim cê okobo ninê nî, "Dhakō, agonyi ôkō kî kom gôrûni." 13 Cê Yecu oketho cingê i kome, cücüth dhakō nôn ôryêrê malō, cê ôcakō pakō Obanga. 14 Êntō akēmō ômakō adwong mē cinagoga piên Yecu onwongo ôcangō dhakō i ceng Cabit. Adwong mē cinagoga okobo both lwak na tye i athuko nî, "Ninō tye abicêl mē tic, pî man bin unu êk êcangwu ininō nonu ginî, na path kî ceng Cabit!" 15 Rwoth ôgamō ninê nî, "Un etwodo! Ngat mörö ope na gönyō thwôn onyo kana mērê kî kanya cemo iê cê tero i modho pii i ceng Cabit? 16 Dhakō ni na ên ayê nyaka Abraam, na yam Catan otweo pî mwaka apar aboro. Ba myero êgöny ên ôkō kî kom tweco ni i ceng Cabit?" 17 i karê na Yecu ôtwakō kôp ni, lewic ômakō lang mērê kibêc êntō cwiny jîi obedo na yom pî tic mē aura n'onwongo ên timō. 18 Cê Yecu okobo nî, "Ker k'Obanga cal kî ngō? Abino poro kî ngō? 19 Tye nî kôman. Dhanō mörö ôkwanyō nyig kodhi karadali na titidi rwök, ëka ôpidhō i pwodho mērê. Yath ni ôdôngō ëka ôdökō na thwônê, cê winy na ngwêcō kî malō ôgêrō udigi i jangê." 20 Cê Yecu dôk openyo nî, "Ngō na dôk arômō poro kî Ker k'Obanga? 21 Tye nî kôman. Dhakō mörö ôkwanyō thôbi cê orubo kî mōkō ogati, naka wang na thôbi nôn ôrômō." 22 i karê na Yecu onwongo tye i woth mērê yo Jerucalem, ên opwonyo jîi kî kin peci ëka imiye. 23 Ngat mörö openyo ên nî, "Rwoth, jô na nônök kēkēn ênê bino larê?" Cê Yecu ôgamō nigî nî, 24 "Tim unu tēk mē dönyō kî dholokek na dîng i Ker k'Obanga, piên jô na pol bino tēmō dönyō êntō ba bino twêrō ginî. 25 Won ôt bino yaa malō cê cego dholokek, un ibino cung kî yôökō, iðwôngō unu dholokek nakun ikobo unu nî, 'Adwong, yab niwa dholokek.' Êntō ên bino gamō kôpwu nî, 'An

ba angeowu ëka kwene na un iya kî iê.' 26 Cê un ibino kobo nî, 'Yam wan ecemo ëka emedho kodi kanya acêl, ëka thon ipwonyo jîi i yodhiwa.' 27 Êntō ên bino kobo nî, 'Ba angeowu ëka kwene na un iya kî iê, cidh unu ôkō kî botha, un êtim tim na reco kibêc!' 28 "Kunôn ibino unu koko kî ridō lakwu, ka inênō unu Abraam, Icaka, Jakob ëka edwarpiny kibêc i Ker k'Obanga êntō un ebino kwêrōwu ôkō. 29 Jîi bino bino kî kukidê ëka kuthō, kukuju ëka kukwap mē bedo i kabledogî i Ker k'Obanga. 30 Adyer, tye jô n'odong cen bino tëlō anyim, ëka jô n'ôtêlō anyim bino dong cen. Êntō adyer jô mōkō n'odong cen bino bedo ginî anyim, ëka jô mōkō na tye anyim bino bedo dong ginî cen." 31 i caa nôn, Eparicayo mōkō obino cê okobo both Yecu nî, "Cidh ôkō kî kany piên Erode mitō nekoni." 32 Yecu ôgamō nigî nî, "Cidh ikob unu both kwee na twot nôn nî, 'An abino ryēmō cen dôk abino cangō dhanō tin kî diki, ëka i ninō mē adek mērê abino tyeko ticna.' 33 Kadî bed kômanôn, myero amêdêra kî wothna, tin kî diki, kî diki maca, piên adwarpiny kûr myero ôthôô kany ôkênê na path kî Jerucalem. 34 "Jerucalem, Jerucalem, un ineko edwarpiny ëka icelo unu jô n'eoro bothwu kî kite, wang adi na an abedo ka mitō cökō êthinōni kanya acêl calō min gwênō na gürō êthinê i thê bwome, êntō in iðwêrō ôkō. 35 Nën, odi dong êwêkō nini, odong nono. An akobo niwu nî ba dôki ibino nênōna unu, naka ka ibino unu kobo nî, 'Gum obed i kom ngat na bino kî nyîng Rwoth."

14 i ceng Cabit mörö acêl, Yecu ôcidhō i cem i ôt k'Aparicayo mörö na pirê tēk. Jô n'onwongo ut kunôn obedo ka kino ên kî ryêkō. 2 i nyime kany nôn onwongo ut dhanō na two akwoda kom ômakō. 3 Cê Yecu openyo Eparicayo ëka epwony cik ka Muca nî, "Cik yeo nî êcang dhanō i ninō mē Cabit onyo pe?" 4 Êntō gin ôling alinga. Yecu oketho cingê i kom atwo ni, cê ôcangō ên ëka okobo ninê nî êk ôcidhi. 5 Kinge manôn Yecu openyogi nî, "Cê ka onwongo ngat mörö kî kinwu ut kî wode onyo thwônê ëka ôrêdhêrê i kulo i ninō mē Cabit, in ba irômō ywaônō yökō piöpî?" 6 Gamō kôp ka Yecu ôlôögî dôki. 7 i karê na Yecu ôñênō nî wele mōkō n'ecwodogî onwongo yêrō kabedo na bêcō, ên obolo nigî carolok ni: 8 "Ka ngat mörö ocwodi i cem mē nyom, kûr iðidh iyêr kabedo na pirê tēk. Gwök onyo dhanō mörö na pirê tēk na loi nwongo thon ecwodo. 9 Cê ka kômanôn, ngat n'ocwodowu kibêc bino bothi ëka kobo nini nî, 'Êk dhanō ni obed kanya in ibedo iê.' In dong ibino dôk cidhō bedo i kabedo mē rwôm na piny kî thwôn lewic. 10 "Êntō ka ecwodi, cidh ibed i kabedo mē

rwöm na piny. Ka dhanö n'ocwodi obino, ên bino kobo nini nî, 'Okona, nyik i kabedo na bër. Cê dong ebino wöröni i nyim wele ewodhi kibêc. 11 Piên ngat acêlacêl na kethere kênê nî ên edit, ebino dwökô piny. Ngat na mwolere kênê ebino miö ên dôkö na dit." 12 Cê Yecu okobo both ngat n'ocwodo ên nî, "Ka in icwodo dhanö i cem, kür icwod nyikoneini onyo utmegoni onyo wedeni onyo êlönyö na bedo i ngeti. Ka itimö kômanön, gin thon römö cwodoni êka cülö wang cwodoni ôkö. 13 Êntö ka itedo cem na thwönê, cwod êcan, jô na mulo amula, engwalo, êthöô wang 14 êka ibino bedo kî gum. Jô nön thon ba twërö cülö wang cwodoni. Cülöni bino bedo i karê na jô na kitegi atir bino cer kôdê." 15 I karê na ngat acêl n'obedo kôdê i dhö cem owinyo köp ni, ên okobo nî Yecu nî, "Jô na bino camö cem i Ker k'Obanga bino bedo gini kî gum." 16 Cê Yecu okobo ninê nî, "dhanö mörö yam otedo cem na thwönê cê ocwodo jô na pol iê. 17 Na karê mê cem dong örömo, ên ooro atic mërê mê cidhò kobo both jô n'onwongo ecwodogi nî, 'Cem ôcêk ôkö bie unu dong.' 18 "Êntö gin kibêc ôcakô bakô dhögi. Dhanö mê acêl okobo nî, 'Pod awilö pwodho awila êka myero acidh anên.' 19 Dhanö nökenê dôk okobo nî, 'Pod awilö thwoni pur apar êka atye ka cidhò mê pwonyogi. Akwai nî itim nina kica.' 20 Dhanö nökenê dôk okobo nî, 'Pod anyomo anyoma pî manön ba arömö cidhò.' 21 "Atic ni odwogo cen êka okobo both adwong mërê. Cê akêmö ômakö won ôt, êka okobo both atic mërê nî, 'Cidh piöpiö i wanga yodhi êka i kin taun êk ikel êcan, jô na mulo amula, êthöô wang êka engwalo.' 22 Na tic ni dong odwogo, ên okobo nî, 'Adwong, ngö na in icikö an atimö ôkö êntö kabedo gire pod ute.' 23 Cê adwong okobo n'atic mërê nî, 'Apê cidhi i gudo na döngö gini kî nget yodhi êka itwak kî jîi obin êk ôda opong. 24 Akobo niwu nî, ba tye ngat mörö i kin jô n'onwongo ecwodo na bino camö cem mörö kênê na an ayübö." 25 I ninö mörö acêl, jô na pol onwongo tye i woth kanya acêl kî Yecu. Ên ôwirê bothgi êka okobo nî, 26 "Cê ka ngat mörö mitö bedo alübköra, nakun ba ôkwërö apap mërê êka aya mërê, dhakö mërê êka êthinê, utmego mërê, kadî naka kwö mërê kikokome, ba twërö bedo alübköra. 27 Êka ngat mörö na ba tingo yath aña mërê mê lübö kî kôra, ba twërö bedo alübköra. 28 "Cê ka ngat mörö acêl kî kinwu mitö gërö ôt na bor, ên ba kono cakö bedo piny mê kwanö wel lim na mitêrê êk ênên ka eut kî lim na römö tyeko ôt nön? 29 Ka ocibo acaki thêrê êka ba römö tyeko, jô kibêc na bino nêno, bino cakö ngalö ên. 30 Gin bino kobo nî, 'dhanö ni ôcakö gedo êntö lim othum ôkö na bara otyeko.' 31 "Onyo rwoth mênê, na ka ôya mê cidhò i lwény ki

rwoth nökenê, ba kono bedo piny mê yübö köp, ka cê êrömo tero jîi elip apar mê cidhò lwény ki jô elip pyer arïö? 32 Ka ôthamö nî ba êrömo, ên oro êwangê na langö mërê nwongo pod ut kanya bor êk êtwak köp mê kuc. 33 Pî manön, ngat mörö kî kinwu na mitö bedo alübköra myero ôwêk jami kibêc n'eute kôdê." 34 "Kadö obedo gin mörö na bër, êntö ka orwenyo mit mërê ôkö, êtwërö miö dôkö na mit ningö dôki? 35 Ba dôk bër naka thon mê aketha i pwodho êka êönyö ôkö. Ngat na tye kî ithe mê winyo myero ên owiny."

15 I ninö mörö acêl êcök ocoro êka êbal, obino gini both Yecu mê winyo ka ên pwonyo. 2 Eparicayo êka epwony cik ôngüngüta na kobo gini nî, "dhanö ni obedo okone k'êbal êka cemo kôdgi kanya acêl." 3 Cê Yecu dong okobo nigî carolok nî, 4 "Ka ngat mörö kî kinwu n'onwongo ut kî rom mërê mia acêl êka acêl kî kin-gî orwenyo ôkö, ngö na ên bino timö? Ên bino wêkö pyer abungwên wie abungwên i bar êka cidhò rangö römö n'orwenyo naka nwongo. 5 Êka ka onwongo römö nön, ên ryongo i wi baê kî thwön yom cwiny 6 cê cidhò kôdê yo pacö. Ên dong cwodo nyikonei mërê êka ewodhe nî nget parê êka kobo nigî nî, 'Bed unu kî yom cwiny kôda, piên anwongo römöna n'onwongo orwenyo ni ôkö.' 7 Akobo niwu, i kit yoo acêl nön, yom cwiny bino bedo na thwönê rwök i polo pî abal acêl na bino ngut na löö jô pyer abungwên wie abungwên na thamö gini nî kitegi atir na ba mitö gini ngut." 8 Yecu okobo nigî carolok nökenê nî, "Cê ka dhakö ut kî cilîng apar na nyîng êka orwenyo acêl ôkö, Ngö na ên bino timö? Ên bino cwinyö tara cê ywêö i ôt êka rangö naka nwongo. 9 Êka ka onwongo, ên bino cwodo nyikonei mërê êka ewodhe nî nget parê. Cê kobo nigî nî, 'Bie unu êk ebedu kî yom cwiny piên anwongo cilîngna n'orwenyo ni ôkö.' 10 I yoo acêl nonu, akobo niwu nî yom cwiny bino bedo i nyim emalaika k'Obanga pî abal na bino ngut." 11 Yecu dôk ômêdêrê kî carolok na kobo nî, "Yam dhanö mörö ut, n'onwongo ute k'awope mërê arïö. 12 Awobi na tidî ôcidhò both apap mërê êka okobo ninê nî, 'Apap, mia lim na kukura ôkö.' Cê apapgî opoko jami mërê i kin-gî. 13 "Kinge ninö na nönök, awobi na tidî ni ôcökô jami mërê kibêc êka ôcakö woth mërê mê cidhò i lobo na bor. Ên ôbalö lim mërê kunön i bedo mê carö carö. 14 Na dong ôbalö lim mërê othum ôkö, kec êrön opodho i lobo nonu, awobi nön onwongo ope kî cem mê acama. 15 Cê ên dong ôcidhò both ngat mörö mê lobo nön, êka etero ên i dyelum mê kwaönö pün. 16 Awobi ni kec obino oneko rwök naka ôparö mê camö cem na pün camö. Êntö ngat mörö ba ômiö ên cem mê

acama. 17 “Ēntō ī karē na dong otyeko niang pirē kēnē ōcakō kobo nī, ‘Etic k’apapna tye adi na camō kwon lōōgī ōkō, ēka an athōō kī kec kany!’ 18 Abino wēkō lobo ni cē adōk cen both apapna ēka akobo nīnē nī, apap, an abalō ī nyim Obanga ēka thon bothi. 19 An ba dōk apora ēk icwoda nī awodi, mīa abed na calō etic na in ipangogī.’ 20 Cē dong ōcakō woth mē cīdhō both apap mērē. “Ēntō na ēn pod ut kanya bor, apap mērē ōnēnō ēn ēka obedo kī kīca ī kom wode, cē ōngwēcō yo bothe. Apap mērē ōthūnō kōrē ēka omotho kī yom cwiny. 21 “Wode okobo nīnē nī, ‘Apap, an abalō ī nyim Obanga ēka thon bothi. Ba dōk apora ēk ecwoda nī abedo wodi.’ 22 “Ēntō apap mērē okobo both etic mērē nī, ‘Kel unu jōra bōngū na bēr kī ī ōt pīōpiō ēk īmīi unu oruki. Rēp unu agīth ī nya cīngē ēka mīi unu oruk wōr ī tyēnē. 23 Kel unu thon wod thwōn n’ōcwēē ēk inek unu cē ēcam kanya acēl ēka ebedu kī yom cwiny. 24 Pīēn athīn na ni onwongo yam ōthōō cē kobedini dong ute na kwō. Ēn onwongo orwenyo cē dong enwongo.’ Ōcakō gīnī bedo kī yom cwiny. 25 “ī caa nōn wode na dit onwongo tye ī pwodho. Ī karē na ēn odwogo, na dong cwōk kī ōt, owinyo jīi ka wer ēka myēl gīnī. 26 Cē ēn ocwodo ngat acēl kī kin etic ēka openyo ēn ngō n’onwongo tye ka tīmērē. 27 Atic nōn ōgamō nī, ‘Omeru na tīdī nī dong odwogo, ēka apapni oneko wod thwōn n’ōcwēē pīēn omeru odwogo na kome yot.’ 28 “Akēmō ōmakō ōmīn mērē na dit cē ōkwērō dōnyō ōkō ī ōt. Apap mērē odonyo yōkō ēka ōbakō dhōgē bothe. 29 Ēntō ēn ōgamō na apap mērē nī, ‘Nēn, an atio bothi pī mwaka na pol ēka bara akwērō lūbō cikni. Ēntō ba mīa kadī k’athīn dyēl mōrō ēk acam kī nyikoneina. 30 Ēntō wodi ni n’ōbalō līmni kibēc ī kom mon n’obedo alyanga obino pacō, in ibedo kī yom cwiny cē ineko nīnē wod thwōn n’ōcwēē ōkō!’ 31 “Apap mērē okobo nīnē nī, ‘Woda, in iut kōda pī karē kibēc, ēka jami kibēc na an aute kōdē obedo megī. 32 Ēntō onu myero ecem, ēka ebedu kī yom cwiny pīēn omeru onwongo orwenyo cē kobedini onwongere, onwongo ōthōō ōkō ēka kobedini dong ut na kwō dōkī.”

16 Yecu okobo both ēlūbkōrē nī, “Dhanō mōrō yam tye n’obedo alōnyō n’onwongo tye k’agwōk jami mērē. Alōnyō ekobo nīnē nī agwōk jami mērē tye ka balō jami. 2 Cē alōnyō nōn ocwodo agwōk jami mērē bothe ēka openyo nī, ‘Man kōp ngō na an awinyo ī komi? Mīa ange kite na in imakō kī jamina kōdē pīēn in ba dōk īrōmō bedo agwōk jamina.’ 3 “Agwōk jami nī ōtwak kēnē nī, ‘Abino tīmō ngō? Pīēn adwongna mītō kwanyōna ōkō kī gwōkō jami mērē. An ba atēk

na rōmō pur, lewic thon maka ka akwaō kwac. 4 Abino ngeeno ngō na rōmō tīmō, ēk ka ēryēma ōkō kī ī tic mē gwōkō jami, jīi twērō gamōna ī pecigī.’ 5 “Agwōk jami nī ōcakō cwodo wegī benyi k’adwong mērē nōn ka acēlacēl. Ōcakō kobo both won banya acēl n’ōcakō thuno bothe nī, ‘Wel banya adi na tye bothi n’obedo mē adwongna?’ 6 Ēn ōgamō nī, ‘Aguli mia acēl mē mōō jeituni.’ Cē agwōk jami k’adwong okobo nīnē nī, ‘Kwany waraga mē banyani, ēk ibed pīny kany pīōpiō ēka icōō pyer abic.’ 7 Cē dōk openyo won banya nōkēnē nī, ‘In kono itye kī wel banya adi?’ Ēn ōgamō nī, ‘Aditi mē mōkō ngano mia acēl.’ “Atic n’obedo agwōk jami ōcakō kobo nī, ‘Kwany waraga mē banyani ēka icōō iē nī pyer aboro.’ 8 “Adwong nōn ōpwōyō agwōk jami na ba genere, pīēn otio kī ryēkō. Man nyutho nī jō mē karē nī ryēk gīnī ī tio ticgī k’ewodhgī na lōō jō mē tar. (aiōn g165) 9 Yecu okobo nīgī nī, tii unu kī līm mē lobo nī mē kōnyō jō nōkēnē ēka imak unu okone na pīrwu. Cē ka dong othum ōkō, ebino gamōwu ī kabedo na bedo naka naka. (aiōnios g166) 10 “Ngat na genere ī kom jami na tītīdī mōrō, bino genere ī kom jami na thwōnē. Ngat na ba bino genere ī kom jami na tītīdī mōrō, ba bino genere ī kom jami na thwōnē. 11 Cē ka dong ba igenere unu ī makō lōnyō mē lobo, nga na bino genowu kī lōnyō mē adyer? 12 Ēka ka yam ba igenere unu ī kom jami ka dhanō nōkēnē, nga na bino mīōwu jami n’obedo mewu kikokome? 13 “Ba tye atic mōrō na twērō tic kī rwodhi arīō, pīēn bino kwērō ngat acēl ēka bino marō nōkēnē ca onyo bino moko ī kom ngat acēl ēka kwērō ngat acēl ca ōkō. Ba itwērō tic pī Obanga ēka dōk pī līm thon.” 14 Eparicayo na marō cīlīng ka owinyo kōp nī kibēc, ōcakō gīnī cwīnō Yecu. 15 Ēntō Yecu okobo nīgī nī, “Un inyuthere nī kitewu atir, ēntō Obanga ngeo cwinywu. Jami mōkō na pīrgī tēk kī both dhanō obedo gin mē kwer ī nyim Obanga. 16 “Cik ka Muca ēka cōc k’edwarpīny obedo ka tic naka ī karē ka Jon Abatica. Cakērē ī karē nōn, ekobo kōp mē Emuth na Bēr ī kom Ker K’Obanga, na dhanō kibēc tye ka dōnyō iē kī tēk. 17 Ēntō bedo na yot both polo kī lobo mē thum ōkō nī lōōnō kwanyō nyukuta mōrō acēl mē Cik. 18 “Ngat mōrō kēkēn na bino ryēmō dhakō mērē ēka dōk nyōmō dhakō nōkēnē, nwongo ōdōnyō ī elomi. Ēka ēcwō na bino nyōmō dhakō na cwōrē ōryēmō ōkō, nwongo ōdōnyō ī elomi.” 19 Yecu ōmēdērē kī kobo carolok both ēlūbkōrē nī, ‘Yam tye dhanō mōrō n’obedo alōnyō, na ruko bōng na bēcō nīnō kī nīnō. 20 Acan na nyingē Lajaro onwongo epyelo ī dhō wangkac k’alōnyō. Ēn onwongo ut k’ajeme n’opong kome ōkō. 21 Lajaro ōparō mē camō ngīny cem na

podho ki i wi meja k'alönyö. Naka thon gwongi obino me nangö wang ajeme méré. 22 "i ninö mörö acél, acan öthöö ökö éka emalaika otingo én etero both Abraam. Alönyö thon öthöö éka eiko ökö. 23 i karé n'alönyö ni tye i rem na dit i kabedo ka jö n'öthöö, én otingo wangé malö cé önénö Abraam ki kanya bor éka Lajaro i ngete. (Hadés 986) 24 Alönyö oredo bothe ni, 'Apapna Abraam, tim nina kica! Or Lajaro öcídih oluth nya cingé i pii ek okwe ki léba pién aut ki thwön rem na lith rwök i mac kany.' 25 "Éntö Abraam ögamö ni, 'Woda, po ni i karé me kwóni emii jamini na bécö, nakun Lajaro émiö jami na reco. Éntö kobedini dong ekweo cwinye éka in iute i arem na lith. 26 Dök thon i kom köp nön kibéc, i kinwa ki in eketho ié thwön bur mörö na thuth. Ngat mörö ope na bino ngölö ki bothwa yo bothi éka ki bothi yo bothwa.' 27 "Alönyö ögamö ni, 'Cé akwai, apap Abraam, or Lajaro i öt k'apapna, 28 pién aut ki utmegona abic. Kob niné ek öcídih okob nigí, kür dök obin giní i kabedo ni me arem.' 29 "Abraam ögamö ni, 'Gin tye ki Cik ka Muca éka edwarpiny, ek gin owiny köp nön.' 30 Alönyö ögamö ni, 'Pe, apap Abraam, éntö ka ngat mörö n'öthöö öcídih bothgi, gin bino ngut.' 31 Abraam okobo niné ni, 'Ka gin ba owinyo Cik ka Muca éka cöc k'edwarpiny, cé gin ba bino thamö me yee kadi bed ni ngat mörö ocer ki i thöö.'"

17 i ninö mörö acél Yecu okobo both élübköré ni, "Jami na miö jii podho i bal ba bino jükéré, éntö dhanö na kelo gin na miö jii podho i bal bino nénö can! 2 Thwara thwara n'etweo pong rego i ngute ebolo ködé i nam, nakaka én me miö ngat mörö acél ki kin jö ni na thinö me podho i bal. 3 Pi manön gwökéré kenwu i ngö na un itimö! "Ka omeru öbalö, jük én, éka ka ongut, tim niné kica. 4 Ka öbalö bothi wang abirö i ninö acél, cé odwogo bothi wang abirö nakun kobo ni, 'Dong angut,' myero itim niné kica." 5 Ékwéna okobo giní both Rwoth ni, "Nyuth niwa kite me médö yeewa." 6 Rwoth ögamö ni, "Kono iut unu ki yee na tidi na röm ki nyig kodhi karadali, itwérö unu kobo ni yath ni ni, 'Pudhiri kení, ek ipidhiri i nam,' éka twéro winyowu. 7 "Nga ki i kinwu na twéro kobo na tic méré na pod odwogo adwoga ki i pwodho onyo ki kukwath ni, 'Rai ibin kany, ibed piny, icem'? 8 En ba bino kobo niné ni, 'Yüb niina cem me kothyeno, ruk böngüni me tic éka ikel niina cem naka ka an acemo éka amodho. Cé in dong ibino cem kinge.' 9 En bino pwöyö atic pién ötimö ngö na én öcikö ni ötim? 10 Manön kite na un thon myero itim unu ködé. Ka itimö unu gin na kibéc na myero itim unu, cé ikob unu ni, 'Wan etic na kónywa ope, pién etio gin

na myero etii kékén.'" 11 i woth méré yo Jerucalem, Yecu owok i dyere lobo me Camaria ki Galilaya. 12 Na én onwongo tye ka dönyö i pacö mörö, oromo k'édhobü apar n'ocung giní ki kanya bor. 13 Édhöbü nonu oredo ni, "Öma Adwong, Yecu, tim niwa kica!" 14 Na Yecu önénögi, okobo bothgi ni, "Cidh unu ek inyuth komwu both élamdhök." Na gin pod ut i yoo, komgi ödökö na leng. 15 Ngat acél ki kin-gi, ka önénö ni échang ökö, odwogo cen both Yecu nakun pakö Obanga ki dwön na longo. 16 En oryebere piny i tyén Yecu éka öpwöyö pi ngö na én ötimö. Adhobü ni onwongo obedo dhanö me Camaria. 17 Yecu openyo ni, "Ba onwongo acangö jö apar? Jö abungwén kono ut giní kwene? 18 Ba tye ngat mörö n'odwogo cen me pakö Obanga, éntö kono arok ni kékén?" 19 Cé Yecu okobo niné ni, "Yaa malö, icidh giri, yeeni ocangi." 20 i ninö mörö acél, Eparicayo dök openyo Yecu ni, "Ker k'Obanga bino thuno awene?" Yecu ögamö nigí ni, "Ker k'Obanga ba bino n'énénö ki wang jö. 21 Jii ba bino kobo ni, 'Nén, ut kany!' Onyo ni, 'En écal!' Pién Ker k'Obanga dong ut i kinwu." 22 Cé Yecu okobo both élübköré ni, "Karé tye ka bino na un ibino parö me nénö ninö mörö acél ka Wod ka dhanö dwogo éntö ba ibino nénö unu. 23 Jii bino kobo niwu ni, 'Nén, én écal!' Onyo ni, 'Nén ut kany!' Kür icidh unu ié kür thon ilubugi. 24 Pién na calö lüköth wil carö polo tungcél thuno ködé naka kutung nökené, Wod ka dhanö thon bino bedo ni kómanön i ninö me dwogo méré. 25 Éntö myero kono ölim can na pol nakun jö me karé ni bino kwéro én ökö. 26 "Na calö yam ötiméré i karé ka Noa, bino timéré kómanön i karé ka Wod ka dhanö thon. 27 i karé ka Noa, jii onwongo cemo éka emedho, écadhö cath, awope éka anyira nyöméré giní naka othuno ködé i ninö na Noa ödönyö ködé i yeya. Cé abwal pii opong éka otyekogi kibéc. 28 "Onwongo röm aröma ki karé ka Lot, jii onwongo cemo éka emedho, ewilö jami éka écadhö, epuro éka egedo. 29 Éntö i ninö na Lot öya ködé ökö ki Codom, mac éka gweng calupa ocwe piny nakun yaa ki i polo, cé otyekogi ökö kibéc. 30 "Bino bedo ni kómanön thon i ninö na Wod ka dhanö ebino nyutho ködé. 31 i ninö nonu, dhanö na ut malö i wi ödé nakun jami méré ut i öt, myero kür dök oidhi piny ni ek ebin ékwanygi. Kómanön thon, dhanö na ut i pwodho kür odwogi cen. 32 Po unu i kom ngö n'ötiméré i kom dhakö ka Lot! 33 Ngat na mitö larö kwö méré bino rwenyo kwö méré arwenya. Éntö ngat na rwenyo kwö méré, én bino gwökö. 34 Akobo niwu ni i kiwor nön, jö ariö bino buto i kabuto acél. Ebino kwanyö ngat acél ökö éka ngat acél dong. 35 Mon ariö bino bedo kanya acél i rego. Ngat acél ebino

kwanyō ökö ëka ngat acël dong." 36 [Jö ariō bino bedo i pwotho, ebino kwanyō ngat acël ökö ëka ngat acël dong.] 37 Gín openyo Yecu ni, "Rwoth, man bino timërë kwene?" Ën ögamō nigī ni, "Kanya kom n'öthöo tye ië, acuth thon cökërë kany nön."

18 Yecu obolo carolok n'ëlübkörë më nyutho nigī ni myero gín ölēgī kür edher. 2 Ën okobo ni, "Yam angöl-köp tye i taun mörö, n'onwongo ën ba lworo Obanga kadī thon wörö dhanö. 3 I taun nön onwongo dha thöo mörö tye ië. Ën obedo bino both angöl-köp nön jwijiwi nakun kobo ninë ni, 'Ngöl nina köp atir i kom ngat na an apido ködë.' 4 Wang na pol angöl-köp nön kwërö ökö. Ëntö kinge ötwak kënë ni, 'Kadī bed ba alworo Obanga onyo aparö pi dhanö, 5 cithë dha thöo ni öläla dong rwök. Abino dong ngölö-köp atir ninë i kom ngat na ën pido ködë, ëk bino mërë botha jwijiwi kür omoga.'" 6 Ëka Rwoth Yecu okobo ni, "Winy unu ngö n'angöl-köp na kite mërë ba tye atir okobo. 7 Obanga ba bino ngölö-köp atir both jögë na ën öyërö, na kok bothe kiceng kī kiwor? Ën bino thumere na ba ötimö gin mörö i komgi? 8 Akobo niwu ni ën bino ngölö-köp atir piöpiö më konyögi. Kömanön thon ka Wod ka dhanö bino bino, ën bino nwongo yee tye both jö n'oye ën?" 9 Yecu döc obolo carolok both jö mökö na genere kën-gī ni gín kitegi atir nakun caö gini jö nököënë. 10 "Jö ariō yam öcidhö i lëga i öt k'Obanga. Ngat acël obedo Aparicayo ëka ngat nököënë ca obedo acök ocoro. 11 Aparicayo ocung nakun lëgö gire kënë ni, 'Obanga apwoi piën an ba acal kī jö nököënë n'obedo ëyak, jö na ba genere, ëdöny i elomi ëka thon ba acal k'acök ocoro ni. 12 An ario kec ninö ariō i cabit acël. Amiö thon acël më apar më jamina kibëc na an anwongo.' 13 "Ëntö acök ocoro ocung kī cecen. Ën ba onwongo twërö tingo wangë malö i polo ëntö odhongo köre kī cwer cwiny nakun lëgö both Obanga ni, 'Obanga tim nina kica, an abal.' 14 "Akobo niwu ni, ëcwö nön ödök tunge n'ëkwanö ni ën kite atir i nyim Obanga löö ëcwö nököënë ca ökö. Pī manön, ngat acëlacël na kethere kënë ni etye malö, Obanga bino dwökö ën piny. Ëntö dhanö na mwolere kënë Obanga bino tingo ën malö." 15 Jii onwongo tye ka kelo ëthiñö na thithiñö both Yecu ëk oketh cingë i komgi. I karë n'ëlübkörë önenö ngö n'onwongo tye ka timërë, ocoko gini jii ni kür ekel ëthiñö. 16 Ëntö Yecu ocwodo ëthiñö bothe cë okobo ni, "Wëk unu ëthiñö na thithiñö obin botha, kür ijukugi, piën jö na mwolere kamë ëthiñö, Obanga bino gamögi i ker mërë. 17 An akobo niwu köp adyer ni ngat mörö na ba bino gamö Ker k'Obanga kamë athiñ na titidi, ba bino dönyö ië." 18 Alöc k'Eyuda

mörö openyo Yecu ni, "Apwony na Bër, ngö na myero an atim ëk anwong kwö na bedo naka?" (aiñios g166) 19 Yecu ögamö ninë ni, "P'ingö in icwoda ni abër? Ngat mörö ope na bër, na path k'Obanga këkën. 20 Ingeo Cik k'Obanga ni, 'Kür idöny i elomi, kür ineki, kür ikwal, kür ikob caden n'obedo twodo, wör apapni ëka ayani.'" 21 Ën ögamö ni, "Agwökö cik ni kibëc anaka na pod an onwongo abedo awobi." 22 I karë na Yecu owinyo köp ni, okobo ninë ni, "In pod irem kī gin mörö acël. Apë ëk icadh jamini kibëc na in iut ködë ëka imiï both ëcan ëka ibino bedo kī lönyö i polo. Cë dong ibin ilüb köra." 23 Nyeri ka owinyo köp ni, öcakö bedo kī kumo piën ën onwongo obedo thwön alönyö rwök. 24 Yecu obedo ka nënö ën cë okobo ni, "Tëk ningö n'ëlönyö më dönyö i Ker k'Obanga! 25 Adyer yot pi kīnaga më dönyö kī i wang libira, ni löönö pi alönyö më dönyö i Ker k'Obanga." 26 Jö n'owinyo köp ni, okobo ni, "Cë nga na dong twërö larë?" 27 Yecu ögamö ni, "Gin na ba twërë kī both dhanö, kī both Obanga twërë." 28 Cë Petero okobo both Yecu ni, "Wan ëwëkö gin na kibëc na wan etye ködë më lübö kori." 29 Yecu okobo ni, "An akobo niwu köp adyer ni ngat mörö n'öwëkö parë, onyo cege, onyo utmego mërë, onyo enyodo mërë, onyo ëthiñë, pi Ker k'Obanga, 30 ën bino nwongo jami na kadhö manön wang na pol i karë ni. Ëka döki i karë më anyim ën thon bino nwongo kwö na bedo naka." (aiñ g165, aiñios g166) 31 Yecu otero ëlübkörë apar ariō thenge ëka okobo nigī ni, "Onu ebino cidhö naka yo Jerusalem ëka jami kibëc n'edwarpiñy öcöo i kom Wod ka dhanö, bino cobere. 32 Ebino miö ën both jö na ba obedo gini Eyuda. Gin bino ngalö ën, ebino yanyö, ebino ngülö laö i kome, ebino pwodo kī del ëka eneko ökö. 33 I ninö më adek ën bino cer ökö." 34 Ëlübör Yecu ba öniang i köp ni thon acël. Tyën köp ni onwongo ökanërë ökö kī bothgi. Gín ba ongeö ngö n'onwongo Yecu twakö. 35 Yecu ëka jö n'onwongo ut ködë kanya acël onwongo dong cwök kī Jeriko, athöo wang mörö onwongo obedo i nget yoo na kwaö kwac. 36 Ëcwö ni owinyo ka jii tye ka woth ëka openyo ngö n'onwongo tye ka timërë. 37 Jii okobo ninë ni, "Yecu më Najaret ënë tye ka wok." 38 Cë athöo wang oredo, "Yecu, Wod ka Daudi, kica ömakī i koma!" 39 Jö n'onwongo ötlölö anyim, öjükö ëcwö ni ëk ölling ökö. Ëntö ömëdërë kī redo na tük rwök, "Wod ka Daudi, kica ömakī i koma!" 40 Yecu öcakö cung ëka okobo ni jö mörö më kelo athöo wang nön bothe. I karë na dong athöo wang onwongo tye ka nyingo na cwök, Yecu openyo ën ni, 41 "Ngö na in imitö ni atim nini?" Ën ögamö ni, "Rwoth amitö ni wanga önen piny!" 42 Yecu ögamö ni, "Nën

piny, yeeni olari." 43 Cücüth ëcwö ni önëno piny ëka öcakö lübö kör Yecu nakun pakö Obanga. Na jö kibëc önëno ngö n'ötimëre, öcakö ginî thon pakö Obanga.

19 Yecu ödönyö i Jeriko, na tye ka poth apotha. 2 Ëcwö mörö onwongo tye kunön n'obedo adit cökö ocoro na nyینگ Jakayo. Ën onwongo ölöny. 3 Jakayo onwongo mitö nëno Yecu ni ënë nga ëntö pi bedo ngat na cek, ömiö ën ba ötwëro piën jii opong rwök. 4 Cë ën öringö anyim ëka öidhö i wi yath më nëno Yecu n'onwongo wok ki i yoo nën. 5 I karë na Yecu othuno i tyën yath nën, ötingo wangë malö önëno Jakayo ki i wi yath. Ën ocwodo ni, "Jakayo, Idhi piny piöpiö, piën myero abed i odi tin." 6 Cë Jakayo oidho piny piöpiö ëka otero Yecu yo öde ki thwön yom cwiny na dit. 7 Jö kibëc n'önëno öcakö ngüngüta ginî na cwinyi ba yom ni, "Yecu öcidhö më bedo welo i pacö k'abal!" 8 Jakayo öya malö cë ocung i nyim Rwoth ëka okobo ni, "Rwoth, winy! Abino miö nucu jamina both ëcan ëka k'akwalö ngat mörö, abino cülö wang angwën na kadhö wel." 9 Yecu okobo ninë ni, "Larë obino both jö më öt ni tin, piën ëcwö ni thon obedo akwar Abraam. 10 Piën Wod ka dhanö obino më rangö ëka më larö jö n'orwenyo." 11 Na jii tye ka winyo köp kibëc na Yecu okobo, ën ömëdërë më kobo nigî carolok. Piën onwongo dong cwök ki Jerucalëm, jii öthamö ni köde Ker k'Obanga onwongo cwök bino. 12 Cë Yecu okobo nigî carolok ni, "Yam onwongo won ker mörö ut n'öya më cidhö i lobo na bor më cidhö gamö twër më löc ki ië, ëk dong edwogi cen. 13 Na ën bara öya më cidhö, ocwodo etic mëre apar, ëka ömiö ngat acëlacël ciling na nyینگ. Cë ën okobo nigî ni, 'Keth unu ciling ni i tic, naka adwogi.' 14 Ëntö jö mëre ödagö ën, ëka eoro jö mökö i körë më cidhö kobo ninë ni, 'Wan ba ëmitö ëcwö ni ëk obed rwothwa.' 15 "Ëcwö ni eketho obedo rwoth ëka odwogo. Ocwodo etic mëre n'onwongo ën ömiö ciling ëk engee wel adi n'ömëdërë na gin onwongo ki ië. 16 Atic më acël obino bothe cë okobo ni, 'Adwong, cilingni elip acël ömëdërë döki të ciling elip apar.' 17 Ëka rwoth ögamö ni, 'Itimö na bër! In ibedo atic na bër. In ibedo geniri ki jami na nënök na an agenî köde, ibino bedo ki twër i kom peci apar.' 18 Dhanö më ariö obino cë okobo ni, 'Adwong, cilingni elip acël ömëdërë döki ië ciling elip abic.' 19 Cë rwoth ögamö ni, 'Itimö na bër! Ibino bedo ki twër i kom peci abic.' 20 "Atic nökenë obino cë okelo ciling n'onwongo ëmiö bothe këkën. Ën okobo ni, 'Adwong, akanö cilingni ëka agwökö na bër i opeke böngü. 21 Onwongo alwori piën in ibedo ngat mörö na tic köde tük. Itero gin na ba obedo megî ëka ikaö gin na ba

icwö.' 22 Adwong okobo ninë ni, 'In atic na rac! Abino ngölö-köp nini na lübërë ki twak n'öya ki i dhogi. Cë ka onwongo in ingeo ni abedo ngat mörö na kite tük na kwanyö gin na ba obedo mëga ëka akaö kodhi na ba apuro, 23 ngö n'oceri kanö cilingni i öt kanö lim? Cë k'adwogo, ëk abin akwany k'amëd mëre.' 24 "Ën dong okobo both jö n'ocung i ngete ni, 'Gam unu ciling ki both atic nën, ëk imii unu both won ciling elip apar.' 25 Ëntö gin okobo ninë ni, 'Adwong, ën dong tye ki ciling elip apar!' 26 Cë rwoth nën ögamö ni, 'Eyo, akobo niwu ni ngat acëlacël na mëgë tye, ebino miö. Ëntö ngat na mëgë ope, ebino gamö ngö na ut bothe thon ökö. 27 Ëntö pi langna, na ba oyeo ni an abed rwothgi, kelugi ëk inekugi i nyima kany.'" 28 Kinge na Yecu okobo köp ni, ën ömëdërë ki woth nakun cidhö köde yo Jerucalëm. 29 Na dong onyingo cwök ki Betepage ëka Betania i tyën kidi n'ecwodo ni Kidi më Jeituni, Yecu ooro ëlübörë ariö. 30 Ën okobo nigî ni, "Apë unu i pacö na tye i nyimwu. Na un i dönyö i pacö, ibino unu nënö athin kana n'etweo na ngat mörö anaka yam bara obedo i ngee. Göny unu ëk ikel unu kany. 31 Ëka ka ngat mörö openyowu, 'Ni pingö igönyö unu athin kana nën?' Kob unu ninë ni, 'Rwoth ënë mitö.'" 32 Cë gin öcidhö onwongo athin kana kite na Yecu okobo nigî köde. 33 Na gin tye ka gönyö athin kana, wegî mëre openyogi ni, 'Pingö igönyö unu athin kana nën?' 34 Ëlübör Yecu ögamö ginî ni, "Rwoth ënë mitö." 35 Cë okelo ginî athin kana ni both Yecu, ëka öpëdhö ginî böng-gi i ngee kana ëka ecibo Yecu ië. 36 Na ën dong tye i woth mëre, lwak ömëdërë ki pëdhö böng-gi i dye yoo. 37 I karë na ën dong cwök ki lung më Kidi më Jeituni, ëlübörë kibëc öcakö wöö ginî ki yom cwiny ëka ki wer nakun tye ginî i woth na pakö ginî Obanga pi tic na döngö na Ën ötimö na gin dong önëno. 38 Ëlübör Yecu okobo ni, "Gum obed i kom ngat na bino ki nyینگ Rwoth! Kuc obed malö i polo, ëka dheo obed both Obanga!" 39 Eparicayo mökö na tye i kin lwak okobo ginî ni Yecu ni, "Apwony, jük ëlübörî öling ginî ökö!" 40 Yecu ögamö ni, "Ka gin öling, kite ni bino cakö wöö!" 41 Ëntö na Yecu dong cwök ki Jerucalëm ëka önëno pacö na tye i nyime, ën öcakö koko pirë ni, 42 "Cë ka onwongo ingeo ngö na mitërë më kuc tin! Ëntö kobedini ökanërë ökö ki wangi! 43 Karë bino bino na langwu bino riköwu dyere ki cël, ëka bino ridöwu tungi ki tungi. 44 Ebino rëdhöni piny naka thon ki jö na tye ii. Ba ebino wëkö kidi mörö acël dong i wi awodhe, piën ba ingeo karë n'Obanga obino köde më laröni." 45 Cë Yecu ödönyö i öt k'Obanga ëka öcakö ryëmö jö n'onwongo tye ginî i cath i dyekal öt k'Obanga. 46 Ën okobo nigî ni, "Ëcöb ni, 'Öda obedo

öt më læga,' ëntö ilökö unu ödökö öt k'ekwoe." 47 Yecu obedo ka pwony i öt k'Obanga ninö ki ninö ëntö ëlamdhök na dito ëka epwony cik ka Muca ëka ëtëla ka lwak nökenë öcakö gini yübö kite më neko Yecu. 48 Ëntö ba onwongo gini yoo mörö më neko ën piën lwak kibëc opong n'öcükö ithgi i köp na ën kobo.

20 I ninö mörö acël Yecu onwongo pwonyo i öt k'Obanga nakun kobo köp më Emuth na Bër.

Ëlamdhök na dito ëka epwony Cik ka Muca kanya acël k'edong obino gini both Yecu, 2 cë openyo gini ën ni, "Kob niwa, kit twër mëne n'ömiö itimö koth tic ni," ëka "Nga n'ömiö kit twërö ni?" 3 Yecu ögamö ni, "An thon apenyowu peny acël, ëk ikob niina unu. 4 Twërö n'onwongo Jon batica ki jii ködë, öya ki both Obanga onyo öya ki both dhanö?" 5 Gin öcakö larö köp nön i kin-gi kën-gi ëka okobo gini ni, "Ka onu ekobo ni öya ki i polo, ën bino penyo ni, 'Pingö ba iyee unu i kom Jon?' 6 Ëntö ka onu ekobo ni, 'Öya ki both dhanö,' jö kibëc bino celo onu ki kidi naka i thöö, piën jö kibëc yee ni Jon obedo adwarpiny." 7 Cë dong gin ögamö ni Yecu ni, "Wan ba engeo kanya twër nön öya ki ië." 8 Ëka Yecu okobo bothgi ni, "An thon ba abino kobo niwu kit twërö n'ömiö atio tic ni." 9 Cë Yecu öcakö bolo carolok ni both lwak ni, "Dhanö mörö yam tye n'opuro pwodho öläk mërë, ëka öwëkö i cing epur mökö. Ën öcidhö ökö i lobo nökenë më bedo ië pi karë na lac. 10 Na karë më püdö öläk örömö, ën ooro atic mërë acël both epur ëk ëmië ngö n'öcëk ki i pwodho öläk. Ëntö epur opwodo atic nön ëka ëryëmö ödök ki cingë nono. 11 Ën dök ooro atic mërë nökenë, cë gin opwodo manön thon. Ëtimö tim më lewic i kome ëka ëryëmö ödök ki cingë nono. 12 Cë dök ooro atic mërë më adek. Epur oketho ret i kome ëka ëryëmö ökö ki i pwodho öläk. 13 "Cë won pwodho öläk openyere kënë ni, 'Abino timö ngö kobedini? Abino oro woda na an amarö, karë nökenë gin bino wörö ën.' 14 "Ëntö i karë n'etic önënö wod ka won pwodho, öcakö gini twak i kin-gi ni, 'Man ënë dong ngat na bino leeno jami, eru eneku ökö ëk jami na ën bino leeno obed më onu.' 15 Cë gin dong ökwanyö ën ki i pwodho öläk ëka eneko ökö." Yecu dong openyogi ni, "Ngö na won pwodho öläk bino timö k'epur nön? 16 Ën bino dwogo ëka neko epur nön ökö kibëc cë miö pwodho öläk nön both epur nökenë." I karë na jii owiny köp ni, okobo gini ni, "Adyer pathi kömanöni!" 17 Yecu önëngö cë openyo ni, "Man kono gönyö ningö na yam ëcöö ni, "Kidi n'egedo ökwërö, ënë ödökö kidi më gwic öt?" 18 Jö kibëc na bino podho i kom kidi ni, bino tür ngidhërë ökö, ëka ka kidi ni opodho i kom ngat

mörö, dhanö nonu bino nginginya ökö." 19 Epwony Cik ka Muca ëka ëlamdhök na dito örangö gini yoo më makö Yecu i caa nön cücüth, piën gin öniang ni Yecu okobo carolok ni i komgi. Ëntö olworo gini jii. 20 Epwony Cik ka Muca ëka Ëlamdhök na dito obedo ka kürö karë na bër ëka eoro ërip piny n'oporo gini bedo jö na genere, ëk ëmak köp na yaa ki dhö Yecu ëka dong ëmii i cing alöc na tye ki twër i lobo Roma. 21 Gin openyo Yecu ni, "Apwony, engeo ni itwakö ëka ipwonyo köp na tye adyer ba ipoko kin dhanö, ëntö ipwonyo köp n'adyer i kom Obanga. 22 Cik yeo ni wan myero ëcül ooro both Cija onyo kür ëcül?" 23 Ëntö Yecu öniang i ryëkögi cë openyogi ni, 24 "Nyuth unu niina denario acël. Cal ëka nyiing na tye i kome ni më ka nga?" Gin ögamö ni, "Më ka Cija." 25 Cë dong okobo niggi ni, "Mii unu jami ka Cija both Cija, ëka jami k'Obanga mii unu both Obanga." 26 Ba ötwërö gini makö köp mörö pi ngö na ën okobo kunön i kin lwak, ëntö gin ouro kite na Yecu ögamö ki köp ködë, cë öling gini alinga. 27 Ecadukayo mökö na kobo gini ni cer ka jö n'öthöo ope, obino gini both Yecu ki peny. 28 Gin openyo Yecu ni, "Apwony, Muca yam ömiöwa cik ni, ka ëcwö mörö öthöo n'öwëkö dhakö mërë na ba önywölö ëthinö mörö, ömin mërë na kwö myero olak dhakö nonu ëk önywöl ëthinö i wi ömin mërë. 29 Yam onwongo tye utmego abirö. Ngat na dit onyomo cë öthöo ökö na ba önywölö ëthinö. 30 Ömin mërë më ariö öläkö dha thöo ni cë ën thon öthöo ökö. 31 Më adek dök öläkö dha thöo ni ën thon ba önywölö ködë ëthinö. I yoo acël nonu, utmego abirö ni öläkö dha thöo ni cë öthöo gini kibëc na ba önywölö gini ëthinö. 32 I ajiki mërë, dhakö ni öthöo. 33 Kobedini dong, i ninö na jö n'öthöo bino cer ködë dhakö ni bino bedo më ka nga piën jö abirö ni kibëc obedo ködë?" 34 Yecu okobo niggi ni, "Jö më karë ni nyömërë gini. (aiön g165) 35 Ëntö jö na kitegi bër na bino gini cer ëka bino kwö gini i lobo ca na nyen, ba bino nyömërë gini. (aiön g165) 36 Ëka ba bino gini thöo na twal, piën bino bedo gini kamë emalaika. Gin bino bedo ëthin k'Obanga piën ebino cerogi ki i thöo. 37 Ëka Muca omoko kanyalër ni jö n'öthöo bino cer. I köp na ën öcöö i kom bunga na wang ën okobo ni Rwoth obedo 'Obanga k'Abraam, Obanga k'Ecaka ëka Obanga ka Jakob.' 38 Ën obedo Obanga ka jö na kwö ba obedo më ka jö n'öthöo, piën jö kibëc kwö pi Obanga." 39 Cë epwony Cik ka Muca mökö okobo gini ni, "Apwony itwak na bër!" 40 Cë ngat mörö ope n'öthamö më penyo ën peny nökenë dök. 41 Yecu openyogi ni, "Ekobo ningö i kom Meciya na ën akwar Daudi? 42 Piën Daudi kikome okobo i buk më Jabuli ni, "Rwoth Obanga okobo both Rwodha ni, "Bed i

nget cinga mē kucem, 43 naka ka abino mīō i lōō langni ēka amīōgī bedo na calō gin mē theno tyeni.” 44 Daudi cwodo ēn nī, ‘Rwoth’ ēn twērō bedo wode nīngō?” 45 Na lwak kibēc tye ka winyo ka Yecu twak, ēn okobo both ēlūbkōrē nī, 46 “Gwōkērē unu kī kom epwony Cīk ka Muca na marō gīnī woth kī bōng na boco. Gīn mītō nī jīi obed ka mothogī kī i cuk, marō gīnī thon bedo i then ka jō na dōngō i kabedo mē wōrō i Cinagoga ēka i kabedo mē cem na dōngō. 47 Gīn jō nōn maō jami ka mon thōō ēka dōk marō gīnī lēga na boco mē nyuthere. Obanga bino mīōgī pwod na thwōnē rwōk.”

21 Yecu onwongo tye i ot k’Obanga ēka ōnēnō ēlōnyō ka bolo gīnī tyēgī i adīta mē tyēr. 2 Ēn thon ōnēnō dha thōō mōrō n’obedo acan, obolo abōla ariō i adīta mē tyēr. 3 Yecu okobo nī, “An akobo niwu kōp adyer nī, dha thōō ni n’obedo acan ni, obolo tyēr na thwōnē rwōk na lōō jō kibēc. 4 Piēn jō kibēc ōgīthō līmgi kī kom mana thwōnē ēnē gīn obolo, ēntō dha thōō ni kadī bed onwongo obedo acan, obolo līm kibēc n’onwongo ēn myero ōkwō kōdē.” 5 Ēlūbkōr Yecu mōkō onwongo twak gīnī i kom ot k’Obanga. Kit n’ēgērō kōdē na bēr kī kite na bēcō ēka tyēr n’ētyērō both Obanga. Cē Yecu okobo nī, 6 “Kī kom ngō na un itye ka nēnō nī, karē bino bino, na kidi mōrō acēl ba bino dodere i wi awodhe, kidi acēlacēl ebino thwarō ōkō pīny.” 7 Ēlūbkōr Yecu openyo ēn nī, “Apwony man bino tīmērē awene? Ēka ngō na bino nyutho niwa nī jami ni dong cwōk tīmērē?” 8 Yecu ōgamō nī, “Gwōkērē unu, ngat mōrō kūr ōbwōlwu. Piēn jō na pol bino bino gīnī kī nyīnga, na kobo gīnī nī, ‘An ēnē Kiricito,’ ēka dōk nī, ‘Karē dong onyīngo cwōk.’ Ēntō kūr ilubugī. 9 Ka ibino winyo unu emuth mē lwēny ēka arubaruba, kūr ibed unu kī lworo. Jami ni myero kono ōtīmērē ēntō bara nyutho nī ajiki dong cwōk.” 10 Cē Yecu okobo bothgi nī, “Lobe bino lwēny kī lobe nōkēnē, ēka ker bino lwēny kī ker nōkēnē. 11 Oyeyeng na rac bino yengo lobo, kec ērōn ēka twoe na papath bino podho i lobo. Ēka thon ngō na mīō lworo makō dhanō, ēka anyuth thon bino nen i polo. 12 “Ēntō na bara jami ni kibēc ōtīmērē, ebino makōwu, ēka ebino ketho can i komwu. Gīn bino terowu i pido i Cinagoga, ebino tnewowu i buc ēka ebino kelowu i nyim rwodhi ēka ēlōc pī nyīnga. 13 Man bino mīōwu karē mē kobo caden mē yeewu i koma. 14 Pī manōn, mok unu thamawu nī ba ibino parō unu ngō na un ibino kobo i pido. 15 Piēn An abino mīōwu i twak kī ryēkō na ngat mōrō n’odothowu ba twērō pyem kōdē onyo kwērō ōkō. 16 Enyodowu, utmegowu, wedewu ēka nyikonei bino mīōwu i cīng

langwu. Gīn bino neko jō nōkēnē kī kinwu. 17 Jō kibēc bino dagōwu piēn ibedo unu ēlūbkōra. 18 Ēntō gin mōrō na rac ba bino tīmērē i komwu, kadī naka yer wiwu acēl mōrō ba bino rwenyo. 19 Ka icung unu na tēk, ibino nwongo unu kwō na bedo naka naka. 20 “Ka īnēnō unu mwony ōrīkō Jerucalem, cē ingee unu nī karē mē kēthō dong onyīngo na cwōk. 21 Jō na tye i Yudea myero ōngwēc gīnī i wi kite, jō na tye taun i Jerucalem myero ōya gīnī ōkō, ēka jō na tye yōkō kūr myero ōdōny gīnī i taun. 22 Piēn man ēnē karē n’Obanga bino pwodo kī jō mē Jerucalem mē cobo kōp kibēc na yam ēcōō i Cōc na Leng. 23 Mon na yeco ēka mon na dōdhō ēthīnō bino nēnō can i karē nonu! Piēn can na thwōnē bino podho i lobo nōn ēka akēmō k’Obanga na thwōnē bino podho i kom jō nī. 24 Jō mōkō ebino nekogī kī pala abadē, ēka jō nōkēnē ebino terogī na calō emabuc i lobe kibēc. Jō na ba obedo Eyuda, bino lōōnō Jerucalem naka ka karē mē lōcgī othum. 25 “Anyuth bino nen i kom ceng, i kom dwe ēka i kom cēr. Jō na pol mē wi lobo bino kumo nakun cwinygī podho apodha pī mor ka nam ēka kī papaka mērē. 26 Ka jami ni bino tīmērē, jīi bino rakērē pī lworo, ēka ka gīn bino parō can na bino podho i kom lobo, piēn tēkō kibēc na ut i wi polo bino yengere. 27 i karē nōn gīn bino nēnō Wod ka dhanō, na bino kī i pōl nakun tye kī tēkō ēka dheo na thwōnē. 28 Ka īnēnō unu jami ni ōcakō tīmērē, yaa unu malō, īdīi cwinywu, piēn karē mē larōwu dong onyīngo na cwōk.” 29 Cē Yecu okobo carolok both ēlūbkōrē nī, “Nēn unu yath ōlam ēka kī yen nōkēnē. 30 Ka dong pote ōcakō lōth, īnēnō unu cē ingeo unu kenwu nī cwīr dong cwōk. 31 Kōmanōn thon, ka īnēnō unu jami ni tye ka tīmērē, ngee unu nī Ker k’Obanga onyīngo na cwōk. 32 “An akobo niwu kōp adyer, rok mē karē ni ba bino poth naka ka jami ni kibēc ōtīmērē. 33 Polo ēka lobo bino thum ōkō, ēntō kōpna ba bino thum. 34 “Gwōkērē unu, ēk kūr iketh unu cwinywu i woro mē cem ēka kī mērō mē kōngō, ēka mē parō pī kwō mē lobo ni, ēk nīnō nōn kūr obin oumwu athura kamē akuma. 35 Piēn nīnō nōn bino thuno athura i kom jō kibēc na bedo i wi lobo thūkūl. 36 Bed unu na wangwu thwolo i karē kibēc, nakun i lēgō unu Obanga ēk inwong unu tēkō mē bwōth kī kom jami ni kibēc na bino tīmērē, ēka mē cung i nyim Wod ka dhanō.” 37 Nīnō kibēc Yecu onwongo pwonyo jīi i dyekal ot k’Obanga kiceng. Ēka kiwor ēn cīdhō buto i wi Kidi mē Jeituni. 38 Nīnō kī nīnō kodiko cōn, jō kibēc onwongo bino bothe i dyekal ot k’Obanga mē winyo kōp mērē.

22 Ninö onwongo dong cwök më camö Kwer më Ogati na Thöbi ope ië, na jö Icarael cwodo nî Poth. 2 Êlamdhök na dito ëka epwony cîk ka Muca obedo rangö kit yoo na myero enek ginî kî Yecu. Gîn onwongo mîtö timö kôman î mûng piën onwongo lworo ginî lwak. 3 Catan ödönyö î cwiny Yuda Ikariot, n'onwongo obedo ngat acël î kin ëlûbkör Yecu apar ariö. 4 Cë Yuda Ikariot öcidhö both êlamdhök na dito ëka edite na gwökö öt k'Obanga, ëk ëyüb ködgî na bër kit na myero ën ëcadh kî Yecu bothgî. 5 Man ömîö cwinygî obedo na yom, ëka oyeere ginî më miö ën lîm. 6 Yuda oyeo, cë ôrangö karë n'opore më cadhö Yecu bothgî ëk êmak na lwak ba ngeo. 7 Ninö othuno më Kwer k'ogati na ba etedo kî Thöbi, n'athiin römö më Poth myero ëryëdî. 8 Cë Yecu ooro Petero ëka Jon na cîkögî nî, "Apë ïcidh ïyüb unu kabedo ëka cem ëk ëcam unu cem më Poth." 9 Gîn openyo Yecu nî, "Kwene na in ïmitö nî wan ëcidh ëyüb ië?" 10 Yecu ôgamö nigî nî, "Na un ibino dönyö î pacö Jerucalem, ibino unu romo k'ëcwö mörö n'öyëö agulu pii. Lûb unu körë naka î öt na ën bino dönyö ië. 11 Kob unu both won öt nî, 'Apwony penyo nî od wele tye kwene ëk acam cem më Poth ië kanya acël k'ëlûbköra?' 12 Ên bino nyutho niwu öt na malö na lac, na gibedo kibëc tye ië. Yüb unu kany nön." 13 Êlûbkörë nön öcidhö yo Jerucalem, cë onwongo ginî gin na kibëc kite na Yecu okobo nigî ködë. Êka gîn dong öyübö jami më camö cem më Poth. 14 Na karë më cem örömö, Yecu ëka êkwëna mërë öcidhö cë obedo ginî pîny më cem. 15 Ên okobo nigî nî, "An onwongo cwinya ömîtö rwök më camö cem më Poth nî kodwu na bara alimö can. 16 Akobo niwu nî, ba dök abino camö Karama më Poth wang n'Obanga ôlarö jögë î Ker mërë." 17 Cë Yecu ôkwanyö okopo, öpwöyö Obanga ëka okobo nî, "Gam unu man ëk ïmadh unu kibëc. 18 Akobo niwu kôman piën ba dök abino madhö köngö më nyig ölöc wang na Ker k'Obanga obino." 19 Cë ôkwanyö ogati ëka öpwöyö Obanga pirë, opoko ëka ömîö both ëlûbkörë na kobo nî, "Man ënë koma na an acwök jalö pirwu. Tim unu kôman më po ködë pira." 20 Kinge na dong otyeko ginî cem, Yecu ôkwanyö okopo otingo malö cë okobo kôman, "Ekopo ni ënë cîkërë na nyen î remona n'ebino önyö pirwu." 21 "Ëntö winy unu ba, ngat na bino cadhöna, tye ka cem köda î mëja ni! 22 Wod ka dhanö ebino neko kite na yam Obanga okobo ködë. Ëntö can na thwönë tye î wi ngat na bino cadhöna ökö!" 23 Cë ëlûbkör Yecu öcakö penyere ginî kën-gî nî nga kî î kin-gî na bino timö kômanön. 24 Êlûbkör Yecu öcakö larö köp î kin-gî nî nga ënë dit na löö. 25 Cë Yecu okobo nigî nî, "Rwodhi më lobo löö jöögî kî büra, ëntö jö na tye î löc mîtö nî engeegî calö ëköny lwak. 26 Ëntö, un myero kûr ïtim unu kômanön. Ngat na dit kî î kinwu myero obed calö ngat na tidi, ëka ngat na tye î löc myero obed kamë ngat na tio pî jö nökönnë. 27 Nga ënë löö kî dit, ngat n'obedo î mëja më cem onyo ngat na kelo ninë cem î mëja? Ëntö an abedo î kinwu na calö ngat na tio pî jîi. 28 "Un ënë jö n'ölîmö can köda î karë na an aute î pêkö. 29 Pî man amîöwu twër më löc calö rwodhi, kite n'Apapna thon ömîa twër më bedo rwoth. 30 Atimö kôman ëk ibin icem unu ëka imedh unu köda î Kerna. Êka dökî ibed unu î then ker nakun ïngölö unu köp î wi kaka apar ariö më Icarael." 31 Cë Yecu okobo nî, "Cimon, Cimon! Catan dong openyo twërö kî both Obanga më tëmöwu na calö apur na pyëdhö kal. 32 Ëntö Cimon, dong alëgö Obanga piri ëk yeeni kûr öthöö ökö. Î karë na dong idwogo botha, köny utmegoni ëk ocung ginî na tæk î yee." 33 Petero ôgamö nî, "Rwoth, an ayeo më cidhö kodi î buc ëka thon më thöö." 34 Ëntö Yecu okobo ninë nî, "Petero, akobo nini, tin ni na thwön gwënö bara okok, ibino kwëröna ökö wang adek nî ba ingea." 35 Kinge manön Yecu openyo ëlûbkörë nî, "Î karë na an aorowu abonge lîm, opiru onyo wör, gin mörö obino orem kî bothwu?" Gîn ôgamö nî, "Ope." 36 Cë Yecu okobo nigî nî, "Ëntö kobedini, ka tye unu kî lîm onyo yëc, makugî. Êka ka ipe kî pala abadë, cadh böngüni ëk iwil k'acël! 37 Pî manön, akobo niwu nî Cöc na Leng myero ocobere î koma na kobo nî, 'Etero ën î kin ëbal na calö ngat acël n'ötürö cîk ka Muca.' Adyer ngö n'ekobo î koma dong cwenö cobere." 38 Êlûbkör Yecu okobo nî, "Rwoth, nën, wan eut kî pele ariö." Yecu ôgamö nî, "Kûr ïmedërë unu më twakö köp î kom pele." 39 Yecu öcidhö yo kor Kidi më Jeituni, kite n'onwongo ën marö timö ködë. Êlûbkörë ölübö ën yo kunön. 40 Na dong othuno ginî kunön, Yecu okobo nigî nî, "Lëg unu Obanga öjîng yeewu ëk ka ëtëmöwu kûr ipodh unu î bal." 41 Ên öya ökö kî bothgî, önyikö kicecen, orumo cöngë pîny cë ölëgö Obanga nî, 42 "Apapna, ka obedo mitini, kwany okopo ni më can ökö kî botha. Cithë, ëk kûr obed kit na an amîtö ëntö obed kit na in ïmitö nî ötimërë ködë." 43 [Cë malaika obino kî î polo, onen both Yecu ëka öjîngö cwinye. 44 Ëntö Yecu ömëdërë kî lëga na tæk rwök piën onwongo tye î thwön cwer cwiny. Kwok mërë ocwer calö remo na tön pîny.] 45 Na dong otyeko lëga, ën öya malö cë ödök both ëlûbkörë. Onwongogî öninö, n'odhero ginî kî cwer cwiny. 46 Ên openyogî nî, "Pîngö ïninö unu? Coo unu ökö ëka ilëg unu Obanga öjîng yeewu ëk ka ëtëmöwu kûr ipodh unu î bal." 47 Na Yecu onwongo pod twak, lwak na pol othuno. Êcwö n'ecwodo nî Yuda, n'obedo ngat acël î kin ëlûbkörë apar ariö,

ënë onwongo tëlö wigî. Ēn öcîdhö both Yecu më motho kî nõdhö leme. 48 Ēntö Yecu openyo ěn nî, "Yuda, îcadhö Wod ka dhanö kî nõdhö leme?" 49 Ī karë n'ëlübör Yecu önënö ngö na mitö timërë, openyo ginî ěn nî, "Rwoth, wan ëlwëny ködgi kî pele abadëwa?" 50 Cë ngat acël kî ĩ kin-gî otongo ith atic k'Alamdhök na Dit naka onguno ithe kucem ökö. 51 Ēntö Yecu okobo n'ëlübörë nî, "Wëk unu lwëny ökö." Ēn ogudo ith ëcwö nõn cë ödök kakarë. 52 Cë Yecu dong okobo n'ëlamdhök na dito, edite na gwökö öt k'Obanga ëka edong n'obino më makö ěn nî, "Pîngö ibino unu kî pele ëka ludhi më maköna? İthamö unu nî abedo ayak? 53 Ngö n'ocerowu maköna ĩ karë na an abedo pwonyo lwak ĩ dyekal öt k'Obanga, na un thon itye kunön? Ēntö man ěnë karëwu, na twër ka Catan tye ka tic." 54 Jö nõn opodho ĩ kom Yecu cë ëmakö ëka etero ěn ĩ öt k'Alamdhök na Dit. Petero ölübö körgî kicecen. 55 Ēntö na gin dong omoko mac ĩ dyekal cë obedo ginî pîny kanya acël ĩ dhö mac, Petero obedo ködgi. 56 Atic mörö na nyakö önënö Petero kî cara mac. Nyan nõn öripö ěn kî tæk, cë okobo nî, "Ēcwö nî thon onwongo obedo alübör Yecu!" 57 Ēntö Petero ökwërö ökö nî manön twodo. Ēn okobo nî, "Anyaka, an ba angeo ngat nõn!" 58 Kinge caa na titidî mörö, ngat nõkënë önënö Petero cë okobo nîñë nî, "In thon ibedo alübör Yecu acël!" Ēntö Petero ögamö nîñë nî, "Onye, ba abedo!" 59 Na dong caa acël cwök poth, ngat nõkënë ötwak kî tæk nî, "Adyer, ëcwö nî onwongo tye kî Yecu kanya acël, piën ěn dhanö më Galilaya." 60 Petero okobo nî, "Onye, an ba angeo ngö na ěn İtwakö." Na pod ěn twak, thwön gwënö okok. 61 Rwoth öläkërë cë okemo atir yo both Petero. Cë man opo wi Petero ĩ kom köp na nene Rwoth okobo nîñë nî, "Tin na bara thwön gwënö okok, in ibino kwëröna wang adek nî ba ingea." 62 Cë Petero odonyo yökö cë okok na tæk kî cwer cwiny. 63 Acikari n'onwongo gwökö Yecu öcakö ginî nywarö ëka kî pwodo ěn. 64 Oumo ginî wangë cë ömëdërë ginî kî didipo ěn na penyo ěn nî, "Tuc niwa, nga ěnë odipi?" 65 Gin thon önywarö Yecu k'ayeny nõkënë na reco na pol. 66 Na pîny dong oruu, edong k'Eyuda, ëlamdhök na dito ëka epwony cik ka Muca onwongo ögürë ginî ĩ od okiko. Ēka etero Yecu ĩ nyim athukogî. 67 Gin openyo Yecu nî, "Ka in ibedo Meciya, kob niwa." Yecu ögamö nî, "Kono akob niwu, ba ibino unu yee. 68 Ēka kono apenywu peny, ba ibino unu gamö. 69 Ēntö cakërë ĩ caa nî cidh ködë anyim, Wod ka dhanö, bino bedo ĩ nget cîng Obanga kucem na tye kî twër kibëc, na bino miöna wörö ĩ yoo na thwönë na löö." 70 Gin kibëc openyo Yecu nî, "Kara in ěnë Wod k'Obanga?" Ēn ögamö nî, "Ikobo

unu adyer nî abedo." 71 Cë gin dong öcakö kobo nî, "Wan pod dök ëmitö ecaden nõkënë më ngö? Wan dong ewinyo kî ithwa köp n'odonyo kî ĩ dhögël!"

23 Kinge edong k'Eyuda kibëc öya malö otero ginî Yecu ĩ nyim Pilato. 2 Kunön gin öcakö dotho Yecu na kobo ginî nî, "Wan enwongo ngatî cüpö jîi nî ëk öjem ginî ĩ kom ëlöc. Ēn kobo nî kür wan ëöny ocoo both Cija. Ēn thon kobo nî ebodo Kiricito, rwoth." 3 Pî man Pilato openyo Yecu nî, "In ěnë rwoth k'Eyuda?" Yecu ögamö nî, "Eyo, obedo kite na in ikobo ködë." 4 Pilato okobo n'ëlamdhök na dito ëka lwak nî, "Ba anwongo gin mörö më ngölö-köp ĩ wi ngatî." 5 Ēntö gin ömëdërë më kwërö nakun kobo ginî nî, "Ēn obedo rubo wi jîi kî pwony mërë ĩ lobo Yudea kibëc. Öcakö cüpö jîi kî ĩ Galilaya naka obino ködë yo Jerucalem kany." 6 Ī karë na dong Pilato owinyo köp nî, ěn openyo ka Yecu obedo dhanö më Galilaya. 7 Na dong öniang nî Yecu tye ĩ thë löc ka rwoth Erode Antipa, Pilato ömiö etero ěn yo both Erode n'onwongo tye ĩ Jerucalem ĩ karë nõn. 8 Ī karë n'Erode önënö Yecu, ěn öläkërë rwök, piën pî karë na lac ěn onwongo mitö nënö Yecu. Erode onwongo owinyo nî Yecu obedo tio tango. Ēn dong onwongo geno më nënö Yecu na tio tango. 9 Erode openyo ěn peny na pol, ěntö Yecu ba ögamö. 10 Ēlamdhök na dito ëka epwony cik ka Muca ocung kunön, na dotho ginî Yecu. 11 Cë Erode ëka acikari mërë önywarö ëka öngalö Yecu. Örepö ginî böngü dheo na mîmîla ĩ kome, cë ödwökö ginî cen both Pilato. 12 Cakërë ĩ nîñö nonu, Erode ëka Pilato ödökö ginî okone ěntö onwongo cön gin dîngërë. 13 Kinge Pilato ocwodo ëlamdhök na dito, ëtëla ëka lwak kanya acël. 14 Ēn okobo nigî nî, "Un ikelo dhanö nî botha k'adoth nî ěn obedo tëlö jîi më jëm. Apenyo ěn na un itye kany, ěntö ba anwongo gin mörö na nyutho nî ěn öbalö gin na un idotho ěn ië. 15 Kadî thon Erode ba onwongo bal mërë mörö, piën ěn odwongo Yecu cen both onu. Dong nen kanyalër nî ngatî ba öbalö gin mörö na wëkö angölö thöó ĩ wie. 16 Pî manön abino miö ëk epwod ěn kî del ëka ëgöny ökö." 17 [Onwongo mitërë nî, ĩ karë më Karama më Poth, Pilato myero ögöny ngat acël kî kin jö n'etweo ëk ömîi both Eyuda.] 18 Ēntö lwak oredo awang acël nî, "Nek ěn ökö! Göny niwa Baraba!" 19 Baraba onwongo etweo ĩ buc, piën obedo cüpö lwak më jëmö n'öcakërë kî ĩ Jerucalem, ëka piën ěn oneko dhanö mörö. 20 Pilato onwongo mitö gönyö Yecu ökö, cë dök okobo both lwak nî bal ka Yecu mörö ope. 21 Ēntö lwak oredo kî pol apola nî, "Gur ěn ĩ kor yath ariä! Gur ěn ĩ kor yath ariä!" 22 Ēn ötwak ködgi wang më adek na kobo nî, "Pîngö

kara? Bal ngó na èn òtímò? An gira ba anwongo gin mórò na rac mè ngólò thòò í wie. Pí manòn abino miò epwodo kí del cè ègönyò òkò.” 23 Èntò lwak òmèdèrè gini kí redo rwók arwòka ní myero egur Yecu í kor yath aria. Wògí òlòkò cwiny Pilato. 24 Man òwèkò Pilato òngólò ní èk enek Yecu òkò kite na lwak òmìtò. 25 Èn ègönyò ngat n'onwongo etweo í buc pí cùpò lwak mè jèmò èka pí nek. Ngat nòn ènè Baraba, n'onwongo lwak òmìtò ní èk ègöny. Pilato òcakò dong miò Yecu bothgí kite na gín òmìtò kòdè. 26 Í karè n'acikari tero Yecu mè aneka, gín òmakò ècwò na nyingè Cimon mè pacò Cirene n'onwongo tye ka bino kí í peci na yòkò. Gín òdiò èn ní oryong yath aria òlùb kí kór Yecu. 27 Lwak òlùbò kór Yecu. Jò mòkò kí í kin-gí obedo mon na kumo èka kok pí Yecu. 28 Yecu òwirè cè okobo nigí ní, “Un mon mè Jerucalèm, kúr ikok unu píra. Kok unu pírwu èka pí èthínòwu. 29 Píen karè bino bino ní bino unu kobo ní, ‘Komgí gum mon na ba ònywòl èka na ba òdòdhò èthínò.’ 30 Cè, “Gín bino kobo both kite ní, “Podh unu í komwa!” Èka ní kany otingere, “Umwa!”” 31 “Píen ka jii tíma kòman na balna mórò ope, cè ngat òbalò gín bino tímò na rac kómèné?” 32 Í karè nòn mwony onwongo tye ka tero èbal ariò nòkèné kí Yecu mè cìdhò gurogí í kor yath aria. 33 Í karè na dong othuno gíni kany ecwodo ní Cogo Wic, eguro Yecu í kor yath aria kanya acèl k'èbal ariò, ngat acèl kucem mèrè èka ngat acèl kucam mèrè. 34 Yecu òlègò ní, “Apap, tím nigí kica, pièn gín ba ngeo ngó na gín tye ka tímò.” Cè acikari opoko bòng mèrè kí bolo kwir. 35 Lwak ocung nènò, èka ètèla k'Eyuda òngalò Yecu, na kobo gíni ní, “Èn òlarò jò nòkèné. Èk dong òlarè kènè ka ènè Meciya k'Obanga, Ngat n'èyèrò.” 36 Acikari thon obino cè gín òngalò Yecu. Gín òmiò èn kòngò òlòk na wac mè nywarò èn 37 èka okobo gíni ní, “Ka in ènè rwoth k'Eyuda, lari!” 38 Còc onwongo tye ka wie na kwanèrè ní, “Man Ènè Rwoth k'Eyuda.” 39 Abal acèl n'onwongo eguro kòdè, òyanyò Yecu na kobo k'arath ní, “Ba ibedo Meciya? Lari èka ilarwa thon!” 40 Èntò abal nòkèné ocoko awodhe na kobo ní, “In ba ilworo Obanga kite na in inwongo pwod na ròm kòdwa? 41 Pwod òn opore, pièn onu ètímò gin na rac rwók. Èntò dhanò ní ba òbalò gin mórò.” 42 Cè èn okobo ní, “Yecu, po píra ka ibino dónyò í Kerni.” 43 Yecu ògamò nínè ní, “An akobo nini kòp adyer, tin ibino bedo kòda í paradìc.” 44 Caa nòn onwongo dyere ceng. Píny òdòkò na còl nicuc í lobo nòn naka caa abungwèn. 45 Ceng ojiko ryèny òkò. Ècèngé na tye í òt k'Obanga òyèc opokere iè ariò. 46 Yecu oredo kí dwòn na tèk ní, “Apapna, amiò tipona í cingi.” Na dong okobo kòp ní, èn òthòò òkò. 47 Adit acikari ka jò

Roma ònènò ngó n'òtímèrè cè òpakò Obanga, na kobo í kom Yecu ní, “Kara ngatí onwongo kite atír adyer.” 48 Na jò na pol n'onwongo ògürè gíni mè nènò ngó na tye ka tímèrè, gin odhongo korgí kí cwer cwiny cè òdòk gíni yo pecigí. 49 Èka thon jò kíbèc n'ongeo Yecu, mèd kí mon n'onwongo òlùbò kòrè kí í Galilaya, ocung gíni kicen mè rípò ngó na tye ka tímèrè. 50 Ècwò mórò onwongo yam tye na nyingè Yocepu, n'onwongo yaa kí í taun mè Arimethea mè lobo Yudea. Yocepu onwongo obedo dhanò na bér èka kite atír. Èn onwongo obedo ngat acèl í athuko mè pido k'Eyuda. Èntò èn obino òkwèrò ngó na òt pido omoko èka òtímò mè neko Yecu. Obedo kùrò karè na Ker k'Obanga bino bino iè. 52 Ècwò nòn òcìdhò both Pilato cè òkwaò kom Yecu èk ícìdh eiki. 53 Yocepu òkwanyò kom Yecu píny cè oboò kí bòngü na leng, èka opyelo í òd lyèl n'egworo í òd lore, kanya bara eiko dhanò mórò iè. 54 Nínò nonu onwongo obedo ceng n'Eyuda yùbèrè gíni pí Cabìt, èka caa mè cakèrè mèrè onwongo dong cwók. 55 Mon mòkò n'onwongo òlùbò kór Yecu kí í Galilaya òlùbò gíni kór Yocepu yo ka lyèl. Gín ònènò kite n'epyelo kí kom Yecu í od lyèl. 56 Cè òdòk gíni cen yo pacò co yùbò gín na kur èka mòò mè wiro kome. Èntò gín oyweo í nínò mè Cabìt, kite na cìk ka Muca okobo ní myero òtím gíni kòdè.

24 Í nínò na lùbò Cabìt k'Eyuda, na píny dong lero, mon otero gin na ngwece kur. Gín òyùbò cè òcìdhò gíni kòdè yo ka lyèl. 2 Na gín othuno kunòn, onwongo ethwaro kidi mè dhò lyèl òkò thenge. 3 Cè òdònyò gíni í od lyèl, èntò ba onwongo gíni kom Rwoth Yecu. 4 Na gín pod uro ngó n'òtímèrè, cwò ariò n'oruko bòng na ryèny onen athura cè ocung í ngetgí. 5 Mon ní lworo òmakògí na tèk cè oryebere gíni píny. Cè cwò nòn openyogí ní, “Píngò ìrangò unu dhanò na kwò í kin jò n'òthòò? 6 Èn ope kany. Dong ocer òkò! Po unu í kòp na èn okobo niwu í karè na èn pod tye kodwu í Galilaya 7 ní, ‘Myero èmíí Wod ka dhanò í cing èbal, èk egur í kor yath aria èka ní dòk ocer òkò kinge nínò mè adek.’” 8 Cè wi mon òcakò po ní Yecu yam okobo kòp nòn. 9 Na dong odwongo gíni kí ka lyèl, okobo gíni kòp ní kíbèc both èlùbòr Yecu apar acèl èka both èlùbòr Yecu nòkèné kíbèc. 10 Mon nòn ènè Maria mè Magadala, Joana, Maria aya ka Yakobo, èka kí jò nòkèné n'okobo kòp ní both èkwèna. 11 Èntò èkwèna ba oyeo gíni kòp ka mon nòn pièn owinyo gíni calò kòp na kòrè ope. 12 Èntò, Petero òya malò èka òrìngò yo lyèl. Na dong othuno kunòn, èn ogungo okemo od lyèl cè ònènò bòng lyèl odong kèn-gí. Èn òdòk cen yo pacò, na uro

ngö n'ötümërë. 13 Í ceng nonu, jö arïö kî ï kin ëlúbkôr Yecu onwongo cidhö yo pacö n'ecwodo nî Emau. Pacö nön onwongo cwök röm kî woth më kilomita apar wie acël kî ï Jerucalem. 14 Gin onwongo twak ï kin-gî ï kom ngö n'ötümërë. 15 Na gîn tye ka twak ëka larö ngö n'ötümërë kibëc, Yecu kikome obino bothgî cë owotho ködgî. 16 Ëntö Obanga ömïögî ba ongeo Yecu. 17 Yecu openyogî nî, "Köp ngö na un itwakö ï wothwu nî?" Jö ni ocung gîni ökö, na wang-gî nyutho cwer cwiny. 18 Ngat acël kî ï kin-gî n'ecwodo nî Keleopa, ögamö ninë nî, "In keni ënë ibedo welo ï Jerucalem na ba ngeo ngö n'ötümërë kunön ï karë nî?" 19 Yecu dök openyogî nî, "Ngö n'ötümërë?" Gîn ögamö ninë nî, "Gin ötimërë ï kom Yecu më Najaret." Ën yam obedo adwarpîny n'ëthamö nî otio tango na döngö, ëka obedo apwony na tæk ï nyim Obanga kî lwak kibëc. 20 Ëlamdhök na dito ëka ëlöcwa obino odotho ën, ëngölö thöthö ï wie, ëka eguro ï kor yath aría. 21 Ëntö wan ebledo geno nî ködë Kiricito ënë bino larö jö Icarael. Mëd ï kom manön, tin dong ninö më adek na köp nön ötimërë ködë. 22 "Gin nökenë ënë nî mon mökö kî ï kinwa ömïö wan ebledo kî ur. Gîn ömöl keko cön yo lyël, 23 ëntö ba onwongo gîni kom Yecu ië. Odwogo gîni cen cë okobo niwa nî ënëno gîni emalaika n'onen bothgî na kobo nî ën Yecu kwö. 24 Cë ewodhwa mökö öcidhö gîni yo ka lyël, ëka onwongo nî obedo kit na mon okobo ködë, ëntö ba önëno gîni kom Yecu." 25 Cë Yecu okobo nigî nî, "Kite na un ïming ködë, ëka kite na ba ïniang unu ködë ï yeeno köp na yam edwarpîny okobo! 26 Ba onwongo ëyübö nî myero Meciya ölim can ëk dong onwong dheo mërë?" 27 Cë okobo nigî köp kibëc n'ëcöö ï Cöc na Leng ï buk ka Muca ëka më k'edwarpîny kibëc. 28 Na gîn dong cwök kî pacö n'onwongo gîn cidhö yo ië, Yecu ötimërë calö pod cidhö anyim. 29 Ëntö gîn odweko ën, "Bed bothwa ï kiwor nî, piën pîny dong cwök yutho." Cë Yecu öcidhö ï öt më bedo ködgî. 30 Na dong obedo pîny më cem ködgî, Yecu ökwanyö ogati, öpwöyö Obanga, ötürö ië cë öcakö miögî. 31 Cücüth wang-gî öyabërë ëka ongeo gîni ën. Í caa nön Yecu orwenyo ökö kî ï wang-gî. 32 Cë gîn öcakö twak kën-gî nî, "Cwiny onu anaka wono ba obedo pupuka, ï karë na ën twak kod onu ï wangayoo ëka okobo nî onu gîn ëcöö ï Cöc na Leng!" 33 Gîn öya ï caa nön cücüth cë ödök gîni yo Jerucalem. Onwongo gîni ëlúbkörë apar acël thon kî jö na ut ködgî kanya acël. 34 Gîn okobo both jö arïö nön nî, "Tye adyer! Rwoth dong ocer ëka onen both Cimon." 35 Cë jö arïö nî okobo ngö n'ötümërë ï wangayoo Emau, ëka kit na gîn engeo kî Yecu ï caa na ën ötürö k'ogati. 36 Ëlúbkôr Yecu onwongo pod

tye ka twakö köp nî, Yecu kikome ocung ï kin-gî cë okobo nigî nî, "Kuc obed kodwu!" 37 Gîn obedo na lwor rwök piën öthamö nî ködë ënëno gîni jwök. 38 Cë Yecu okobo nigî nî, "Pingö ilwor unu, ëka pingö ipenyere unu kî ï cwinywu k'adyer dong acer? 39 Nën unu cinga ëka tyëna. Ëk ïnën unu nî an ënönön! Mula unu ëk ïnën unu ka pathî an adyer, piën jwök ba ute kî kome ëka kî cogo kamë an." 40 Ën okobo köp nî, cë onyutho nigî cingë kî tyënë. 41 Gîn ocung kunön na bara oyee gîni nî köp nön adyer. Cë Yecu openyogî nî, "Itye unu kî gîn mörö kany më acama?" 42 Gîn ömïö ën rëc n'etedo, 43 cë ën ögamö ëka öcamö ï nyimgî. 44 Cë ën okobo nigî nî, "Man ënë köp na yam akobo niwu n'onwongo pod atye kodwu. Gin na kibëc na yam ëcöö ï koma ï Cîk ka Muca, ï buke k'edwarpîny ëka ï Jabuli myero ocobere." 45 Cë Yecu öyabö thamagî ëk öniang gîni ï Cöc na Leng. 46 Ën okobo nigî nî, "Man ënë gîn n'ëcöö nî Meciya bino nwongo can, ëka bino cer kî ï kin jö n'öthöö ï ninö më adek. 47 Cë kî nyingë, jîi bino pwonyo ï lobe kibëc nî, 'Ngut unu pî balwu ëk Obanga ötim niwu kica.' Man bino cakërë kî ï Jerucalem. 48 Un ecaden më gîn n'ötümërë kibëc. 49 An abino oro niwu Tipo Naleng na yam Apapna öcikö. Ëntö bed unu kono ï pacö Jerucalem naka wang n'Obanga ömïöwu tækö na yaa kî ï polo." 50 Cë Yecu oterogî yökö kî ï Jerucalem kanya cwök kî pacö Betania. Ën otingo cingë malö cë ölamö gum ï komgî. 51 Na pod lamö gum ï komgî, Yecu öya ökö kî bothgî cë etingo ën malö ï polo. 52 Ëlúbkörë öcakö wörö gîni ën cë ödök gîni yo Jerucalem kî yom cwiny na dit rwök. 53 Gîn onwongo bedo ï öt k'Obanga ninö kî ninö, na pakö gîni Obanga.

Jon

1 Ī acaki, Kōp onwongo dong tye, Kōp onwongo tye kanya acēl k'Obanga, ēka Kōp onwongo obedo Obanga. **2** Kōp onwongo tye kanya acēl k'Obanga ĩ acaki. **3** Obanga ocweo jami kibēc kī Kōp, ba tye gin mōrō n'ecweo abonge ēn. **4** Kwō onwongo tye ĩ ēn, ēka kwō nōn okelo tar both jō kibēc. **5** Tar ryēny ĩ pīny na cōl, ēntō pīny na cōl ba jūkō tar mē ryēny. **6** Ēcwō mōrō onwongo tye n'Obanga ooro na nyīngē Jon. **7** Ēn obino mē bedo caden mē kobo kōp ĩ kom tar nōn, ēk jō kibēc oye gīnī pī kōp mē caden mērē. **8** Ēn kikome onwongo ba obedo tar; ēntō ēn obino na calō acaden mē kobo kōp ĩ kom tar. **9** Tar mē adyer na kelo tar both jō kibēc onwongo tye ka bino ĩ lobo. **10** Kōp onwongo tye ĩ lobo cōn, ēka kadī bed Obanga ocweo lobo kī Kōp ēntō jō mē lobo ba ongeo ēn. **11** Ēn obino both jōgē, ēntō gīn ba ōgamō ēn. **12** Ēntō jō kibēc n'ōgamō ēn nakun oye gīnī ĩ nyīngē, ēn ōmīōgī twēr mē bedo ēthīnō k'Obanga— **13** ēthīnō na ba ēnywōlōgī kī remo onyo kī miti mē kom, onyo kī miti ka dhanō, ēntō pī twēr k'Obanga. **14** Kōp ōdōkō dhanō ēka obedo ĩ kinwa. Wan ēnēnō dheo mērē, na rōm kī dheo ka Wode acēl kēkēn n'ōya kī both Apap, n'obedo akīca ēka twakō kōp adyer. **15** Jon okobo caden ĩ kome. Ēn oredo nī, “Man ēnē dhanō n'onwongo an atwak ĩ kome: ‘Dhanō na tye ka bino kī kōra dit na lōa ōkō piēn ēn ōcakō bedo tye nīna.’” **16** Kī ĩ kom kīca mērē n'opong, ēn ōmīō gum both onu kibēc, kīca ĩ kom kīca. **17** Obanga ōmīō Cik nakun wok kī both Muca; ēntō Yecu Kiricito ēnē okelo kīca ēka kōp adyer. **18** Ngat mōrō ope na naka yam ōnēnō Obanga, ēntō Wode acēl kēkēn, na rōm arōma k'Obanga ēka na cwōk k'Apap, ēnē ōmīō Obanga ongere. **19** Man ēnē kōp mē caden na Jon okobo ĩ karē n'ētēla k'Eyuda mē Jerucalem ooro gīnī ēlamdhōk ēka Alebi mē cidhō penyo Jon nga na ēn ebedo. **20** Ēn ba ōkwērō mē gamō, ēntō otucu kanyalēr na kobo nī, “An ba abedo Meciya.” **21** Gīn openyo Jon dōkī nī, “Cē in ibedo nga? In ibedo Eliya?” Ēn okobo nī, “An ba abedo.” “In ibedo Adwarpīny?” Ēn ōgamō nī, “Pe.” **22** Cē ĩ ajiki gīn openyo Jon nī, “In dong ibedo nga? Mīiwa enge ēk ēdwōk kōp both jō n'oorowa. Ngō na in ĩtwērō kobo ĩ komi?” **23** Jon ōgamō kī kōp k'adwarpīny Icaya nī, “An abedo 'dwōn dhanō na tye ka redo ĩ thim nī, mīi unu yoo ocung atīr nī Rwoth.”” **24** Cē Eparīcayo n'onwongo eorogī **25** openyo gīnī Jon nī, “Pīngō in itye ka batica jīi ka in ba ibedo Meciya, onyo Eliya, onyo Adwarpīny?” **26** Jon ōgamō nī, “An abatica kī

pīi, ēntō dhanō tye n'ocung ĩ kinwu na un ba ingeo. **27** Ēnē ngat na tye ka bino kī kōra, an ba apora mē gōnyō thōl wōrē.” **28** Jami nī kibēc ōtīmērē ĩ Betania yo lōka kulo Jordan, kanya Jon onwongo batica jīi iē. **29** Kodiko mērē Jon ōnēnō Yecu ka tye ka bino yo bothe ēka okobo nī, “Nēn unu, Athīn Rōmō k'Obanga, na kwanyō bal ka jō mē lobo! **30** Man ēnē ngat na an akobo nī, ‘Dhanō na tye ka bino kī kōra dit na lōa ōkō piēn ēn ōcakō bedo tye nīna.’” **31** An kikoma ba angeo ēn, ēntō tyēn kōp n'ōmīō an abatica kī pīi onwongo obedo nī ēk ēn myero ongere both jō Icarael.” **32** Cē Jon ōmīō caden nī: “An anēnō Tipo Naleng ka tye ka bino pīny kī ĩ polo calō amam ēka opye ĩ kome. **33** An kikoma onwongo ba angeo ēn, ēntō Obanga n'ooro mē batica jīi kī pīi okobo nīna, ‘Ngat na in ibino nēnō Tipo Naleng bino pīny ēka pye ĩ kome ēnē ngat na bino batica kī Tipo Naleng.’” **34** An anēnō ēka akobo kōp mē caden nī man ēnē Wod k'Obanga.” **35** Kodiko mērē dōkī, Jon onwongo tye kanya acēl k'ēlūbkōrē arīō. **36** Ī karē na ēn ōnēnō Yecu ka tye ka wok, ēn okobo nī, “Nēn unu Athīn Rōmō k'Obanga!” **37** Ī karē n'ēlūbkōr Jon arīō owinyo ka ēn tye ka kobo kōp nī, gīn ōlūbō kōr Yecu. **38** Yecu ōlōkērē ōnēnōgī ka tye ka lūbō ēn ēka openyo nī, “Ngō na un ĩmītō?” Gīn ōgamō nī, “Rabbi (na tyēn kōp mērē nī Apwony), in ibedo kwene?” **39** Yecu ōgamō nī, “Bin unu, ēka ibino nēnō unu.” Cē obino gīnī ēka ōnēnō gīnī kanya ēn onwongo bedo iē, caa onwongo dong cwōk rōmō apar mē kothyeno cē obedo gīnī bothe ĩ nīnō nōn kibēc. **40** Ngat acēl ĩ kin jō arīō n'onwongo owinyo Jon ka twak cē ōlūbō gīnī Yecu onwongo obedo Anderiya, ōmīn Cimon Petero. **41** Gin na Anderiya ōcakō tīmō cūcūth ēnē mē nwongo ōmīn mērē Cimon ēka okobo nīnē nī, “Wan etyeko nwongo Meciya” (na tyēn kōp mērē ēnē Kiricito). **42** Cē ēn okelo Cimon both Yecu. Yecu ōnēnō Cimon ēka okobo nī, “In ibedo Cimon wod ka Jon. In ebino cwodoni nī Kepa” (na ka ēgōnyō tyēn kōp mērē, gōnyō nī Petero). **43** Kodiko mērē Yecu ōthamō mē cidhō yo Galilaya. Ēn ōrwatērē kī Pilipo cē okobo nīnē nī, “Lūb kōra.” **44** Pilipo onwongo obedo dhanō mē Bethsaida, taun na Anderiya ēka Petero onwongo bedo gīnī iē. **45** Pilipo onwongo Nathanael ēka okobo nīnē nī, “Wan enwongo ngat na Muca ōcōō kōp ĩ kome ĩ Cik, ēka ĩ kom ngat n'edwarpīny thon ōcōō kōp ĩ kome—Yecu mē Najaret, wod ka Yocepu.” **46** Nathanael openyo nī, “Gin mōrō na bēr twērō donyo kī ĩ Najaret?” Pilipo okobo nī, “Bin ĩnēn.” **47** Ī karē na Yecu ōnēnō Nathanael ka tye ka bino yo bothe, ēn ōtwak ĩ kome nī, “Nēn unu dhanō mē Icarael kikome, na gin mōrō mē twodo ope bothe.” **48** Nathanael openyo Yecu nī, “In ingea nīngō?” Yecu

ögamö nî, “An aneni na in pod ibedo i tyên yath ôlam na bara Pilipo ocwodi.” 49 Cê Nathanael ögamö nî, “Apwony, in ibedo Wod k’Obanga; in ibedo rwoth më Icarael.” 50 Yecu okobo nî, “In iye piên an akobo nini na an aneni ibedo i tyên yath ôlam. In ibino nënô jami na döngö na löö manön.” 51 Yecu ömëdêrê më kobo nî, “An akobo niwu köp adyer, un ibino nënô polo ka yabêrê, êka emalaika k’Obanga idho pîny êka idhö giñi malô i kom Wod ka Dhanö.”

2 Kinge ninö ariö, karama më nyom obedo i Kana i Galilaya. Aya ka Yecu onwongo tye kunön, 2 êka Yecu k’ëlübörê thon onwongo ecwodogî i karama më nyom nön. 3 I karê na kõngö öläk othum ökö, aya ka Yecu okobo both Yecu nî, “Kõngö öläk mörö dong ope.” 4 Yecu ögamö n’aya mërê nî, “Aya, pîngö ikobo nîna köp ni? Caana bara örömö.” 5 Aya mërê okobo both etic nî, “Tim unu gin mörö kékên na ên bino kobo niwu.” 6 Aguli më pii abicêl n’ëyübô kî kidi onwongo tye kany nön, n’ecibo pî kite më lönyêrê k’Eyuda, agulu pii acêlacêl onwongo thwönê na römö ketho pii na twêrö thuno lita mia acêl. 7 Yecu okobo both etic nî, “Öny unu pii i aguli.” Cê öönyö giñi pong naka i dhögî. 8 Cê Yecu okobo nigî nî, “Kobedini twöm unu pii mökö, êka iter unu both adwong nyom.” Cê giñ otero. 9 I karê n’adwong nyom öbilö pii n’ëlökö ödökö kõngö öläk, nakun ba ongeö kanya öya kî iê (ëntö etic n’ötwömö pii onwongo ongeö.) Cê ocwodo anyom thenge 10 êka okobo nî, “Gin na jö kibêc timö më acêl ênê më miö kõngö öläk na mit, êka ka jîi ömadhö örömögi, cê ekelo kõngö öläk na ba mit; ëntö in igwökö kõngö öläk na mit naka i caa ni.” 11 Man ênê anyuth më tango mërê më acêl na Yecu ötimö i Kana më Galilaya êka ên onyutho dheo mërê, cê ëlübörê oketho yeegi i kome. 12 Kinge karama më nyom, Yecu öcidhö yo Kaperanaum k’aya mërê, utmegö mërê êka ëlübörê cê obedo giñi kunön pî ninö mörö na nönök. 13 I karê na karama më Poth k’Eyuda onwongo dong cwök, cê Yecu öcidhö yo Jerucalem. 14 Ên onwongo jö na tye ka cadhö dhok, rom, êka amam giñi êka jö nökenê n’obedo i dhö cathgi lökö ciling i dyekal öt k’Obanga. 15 Yecu okedo thöl calö del, cê öryëmö jö kibêc kî i dyekal öt k’Obanga kanya acêl kî rom êka dhok. Öläkö mëjagi atarö êka ökêthö ciling na nyige ka jö na lökö ciling. 16 Yecu okobo both jö n’onwongo cadhö amam giñi nî, “Kwany unu jami ni ökö kî kany! Kür ilök unu öt k’Apapna obed cuk!” 17 Cê ëlübörê opo giñi i cöc n’ecöô nî: “Marna pî odi bino nekona ökö.” 18 Cê Eyuda openyo Yecu nî, “Anyuth më Tango mênê na in itwêrö timö më nyutho niwa më moko twêroni më timö jami ni kibêc?”

19 Yecu ögamö nigî nî, “Kêth unu öt k’Obanga ni ökö, êka an abino gêrö dökî i ninö adek.” 20 Eyuda ögamö nî, “Öt k’Obanga ni otero mwaka pyer angwên wie abicêl më gêrö, êka in ibino gêrö i ninö adek kékên?” 21 Êntö öt k’Obanga n’onwongo Yecu tye ka twak iê onwongo obedo kome. 22 Kinge na dong ecerö ên kî i kin jö n’öthöö, ëlübörê opo i köp na ên onwongo okobo. Cê oye giñi i kom Cöc na Leng êka köp na Yecu onwongo ötwakö. 23 I karê na Yecu onwongo tye i Jerucalem i karama më Poth, jö na pol önenö giñi anyuth më tango na ên onwongo tye ka timö êka oye giñi i kome. 24 Êntö Yecu ba obedo kî gen i komgi, piên ên onwongo ngeo jö kibêc. 25 Ngat mörö onwongo ba mitêrê më kobo ninê kite na dhanö tye ködê, piên ên kikome ngeo gin na tye i cwiny dhanö.

3 Dhanö mörö onwongo tye n’obedo Aparicayo na nyingê Nikodemo. Ên onwongo obedo ngat acêl i kin edong më öd okiko k’Eyuda. 2 Ên öcidhö both Yecu i kiwor cê okobo ninê nî, “Apwony, wan engeo nî in ibedo apwony n’Obanga ooro. Piên ngat mörö ope na twêrö tio anyuth më tango na in itimö ka Obanga onwongo ba tye ködê.” 3 Yecu ögamö ninê nî, “An akobo nini köp adyer nî ngat mörö ope na bino nënô ker k’Obanga ka ba ënywölö ên dökî.” 4 Nikodemo openyo Yecu nî, “Ëtwêrö nywölö dhanö ningö dökî ka dong oti ökö? Adyer ên ba twêrö dönyö i aya mërê êk ënywöl dökî!” 5 Yecu ögamö ninê nî, “An akobo nini köp adyer nî ngat mörö ope na bino dönyö i ker k’Obanga ka ba ënywölö kî pii êka kî Tipo Naleng. 6 Dhanö n’ënywölö kî kom tye kî kwö më kom, ëntö dhanö n’ënywölö kî Tipo Naleng tye kî kwö më cwiny. 7 In myero kür ibed kî ur i kom ngö na an akobo, ‘Un myero ënywölwu dökî.’ 8 Yamö kudho yo kanya ên mitö. Iwinyo ngür mërê, ëntö ba irömö ngeo kanya ên öya kî iê onyo kanya ên tye ka cidhö yo iê. Dhanö acêlacêl n’ënywölö kî Tipo Naleng tye nî kômanön.” 9 Nikodemo openyo Yecu nî, “Man twêrö timêrê ningö?” 10 Yecu ögamö nî, “In ibedo apwony më Icarael, êka in ba itye ka niang i köp ni kibêc? 11 An akobo niwu köp adyer, wan ëtwak i kom gin na wan engeo, êka wan ëmiö caden i kom gin na wan ënenö, ëntö un bara iyeo köp na wan ekobo. 12 Ka an akobo niwu köp i kom jami më lobo êka ba iye unu; cê un itwêrö yee ningö ka an akobo niwu köp i kom jami më polo? 13 Ngat mörö ope na naka yam öcidhö i polo na path kî ngat n’obino kî i polo—na ênê Wod ka Dhanö. 14 Kite na calö Muca otingo thwol malô i kor yath kî i thim, cê Wod ka Dhanö thon myero eting malô, 15 êk dhanö acêlacêl na yee i kome onwong kwö na ba thum. (aiönios g166)

16 "Obanga ômarô jô mê lobo ni rwôk, cê ômiô Wode acêl kékên, êk dhanô acêlacêl na yee i kome kûr ôthôô, êntô onwong kwô na ba thum. (aiônios g166)

17 Adyer, Obanga ba ooro Wode mê ngölô köp ni jô mê lobo, êntô ni jô mê lobo myero ôlarê pirê. 18 Dhanô na yee i kome, ba ebino ngölô köp nîñê, êntô dhanô na ba yee êngölô köp nîñê dong ôkô, piên ba oyee i nying Wod k'Obanga acêl kékên. 19 Ngölô-köp tye ni kôman: Tar obino i lobo, êntô jîi ômarô côi pîny nakaka tar piên ticgi onwongo obedo gin na rac. 20 Jô kibêc na timô gin na rac dag gîni tar, êka ba bino gîni i tar pî lworo ni ticgi bino nen ôkô kanyalêr. 21 Êntô jô na timô gin na tye atîr bino gîni i tar, êk ticgi onen ôkô kanyalêr ni gin na gîni otio obedo gin n'Obanga mitô." 22 Kinge, Yecu k'êlûbkörê ôcîdhô gîni i lobo Yudea, kanya ên obedo iê pî nîñô mörô k'êlûbkörê nakun batica jîi. 23 Jon Abatica thon onwongo tye ka batica jîi i Aion na cwök kî Calim, piên pii onwongo dwong kunôn, êka jîi onwongo tye ka bino bothe êk ebaticagi. 24 (Man ôtimêrê na bara eketho Jon i buc.) 25 Cê pyem ôcakêrê i kin êlûbkör Jon mörô êka Ayuda mörô i kom kite mê lönyêrê. 26 Gîni obino both Jon êka okobo gîni bothe ni, "Apwony, dhanô ca n'onwongo tye kodi yo löka kulo Jordan—na in ikobo köp i kome—nên, ên tye ka batica jîi, êka jô kibêc tye ka cîdhô yo bothe." 27 Jon ôgamô ni, "Dhanô twêrô nwongo gin n'êmiô ên kékên kî i polo. 28 Un kî komwu itwêrô unu moko ni an akobo, 'An ba abedo Meciya êntô an eora anyim nîñê.' 29 Ngat na cung i nget nyakô n'ênymô ênê obedo anyom. Okone k'anyom, na cung i ngete êka winye, bedo na iê opong kî yom cwiny rwök ka owinyo dwôn anyom. Pî manôn, an apong kî yom cwiny rwök. 30 Ên myero ômêdêrê; an myero adök pîny. 31 "Ngat na bino kî malô löô jami kibêc; ngat n'ôya kî i lobo ên obedo dhanô mê lobo, êka twak na calô ngat n'ôya kî i lobo. Ngat n'ôya kî i polo löô jami kibêc. 32 Ên miô caden i kom gin na ên ôñêñô êka owinyo, êntô ngat mörô ope na yeo caden mêrê. 33 Ngat n'oyeo köp mêrê, omoko kanya leng ni Obanga êñê Obanga mê adyer. 34 Ngat n'Obanga ooro twakô köp k'Obanga, piên Obanga miô Tipo Naleng n'opong na ba pimo apima. 35 Apap marô Wod êka oketho jami kibêc i cîngê. 36 Dhanô na yee i kom Wod tye kî kwô na ba thum, êntô ngat na kwêrô Wod ba bino nwongo kwô, piên akêmô k'Obanga bedo i kome." (aiônios g166)

4 Eparicayo owinyo gîni ni Yecu onwongo tye ka lökö jô na pol mê bedo êlûbkörê êka baticagi na löô Jon, 2 adyer Yecu kikome ba obatica ngat mörô, êntô êlûbkörê êñê obatica jîi. 3 I karê na Yecu ongeô

köp ni, ên ôya ôkô kî i lobo Yudea êka ôdök cen i lobo mê Galilaya. 4 Ên myero owok i lobo mê Camaria. 5 Cê ên obino i taun mörô mê Camaria na nyingê Cukar, na cwök kî ngöm na yam Jakob onwongo ômiô wode Yocepu. 6 Kulo ka Jakob onwongo tye kunôn, kite na Yecu onwongo owotho odhero ködê, ên obedo i nget kulo. Caa onwongo dong cwök rômô abicêl mê kiceng. 7 I karê na dhakô mê Camaria obino mê twômô pii, Yecu okobo nîñê ni, "Mia pii mörô amodhi." 8 (Êlûbkörê onwongo ôcîdhô gîni i taun mê wilô cem.) 9 Dhakô mê Camaria okobo nîñê ni, "In ibedo Ayuda êka an abedo dhakô mê Camaria. Pingô in ikwaô pii kî botha mê amodha?" (Piên Eyuda ba ribêrê gîni kî jô Camaria.) 10 Yecu ôgamô nîñê ni, "Ka onwongo ingeo mîc n'Obanga miô êka ngat na tye ka kwaôni pii mê amodha, kono in ikwaô ên cê ên onwongo twêrô miôni pii na miô kwô." 11 Dhakô ôgamô ni, "Adwong, in ipe kî gin mörô mê twômô pii êka kulo thon thuth. In itwêrô nwongo pii na miô kwô ni kî kwene? 12 In idit ilôô kwarôwa Jakob n'ômiôwa kulo ni? Ên kikome omodho pii ni kanya acêl k'êthîñô mêrê êka kî leeni mêrê." 13 Yecu ôgamô ni, "Jô kibêc na bino modho pii ni ôriô bino nekogî dôki, 14 êntô ngat mörô na bino modho pii na an abino miô ôriô ba bino neko dôki. Adyer, pii na an amiô bothe bino bedo wang pii na yenyo i iê naka i kwô na ba thum." (aiôn g165, aiônios g166) 15 Dhakô okobo nîñê ni, "Adwong, mia pii ni êk ôriô kûr oneka êka kûr amêdara mê bino kany mê twômô pii." 16 Yecu okobo nîñê ni, "Apê iêcîdh icwod cwori êka idwogi cen kany." 17 Dhakô ôgamô ni, "An ape k'êcwô." Cê Yecu okobo nîñê ni, "In ikobo atîr ni cwori ope. 18 Köp atîr êñê ni, in onwongo itye kî cwô abic, êka êcwô na in itye ködê kobedini ba obedo cwori. Gin na in ikobo nîna tye atîr." 19 Dhakô okobo ni, "Adwong, an anêñô ni in ibedo adwarpîny. 20 Kwerewa wörô Obanga i wi kidi ni, êntô un Eyuda ikobo unu ni kabedo na jîi myero ôwör Obanga iê tye i Jerucalem." 21 Cê Yecu okobo both dhakô ni, "Yee i koma, dhakô, karê tye ka bino na jîi ba bino wörô Obanga Apap i wi kidi ni onyo i Jerucalem. 22 Un jô Camaria iwörô unu gin na ba ingeo unu; wan êwörô gin na wan engeo, piên larê obino kî both Eyuda. 23 Êntô karê tye ka bino êka othuno dong ôkô na jô na wörô Obanga bino wörô Apap i cwiny êka i adyer, piên gîni obedo koth jô n'Apap rangô. 24 Obanga obedo tipo, êka jô na wörô ên myero ôwör gîni ên i cwiny êka adyer." 25 Dhakô okobo ni, "Adwong, an angeo ni Meciya" (n'ecwodo ni Kiricito) "tye ka bino. Ka obino, ên bino kobo jami kibêc bothwa." 26 Cê Yecu okobo both dhakô ni, "An êñôn na tye ka twak kodi." 27 I caa nôn

cücüth ëlùbkör Yecu odwogo ëka obedo gini ki ur me nwongo Yecu tye ka twak ki dhakö. Ëntö ngat mörö ba openyo ni, "Ngö na in imitö?" onyo "Pingö itye ka twak ködö?" 28 Cë dhakö öwëkö agulu pii mërë, ëka ödök cen i taun cë okobo both jii ni, 29 "Bin, inën unu ëcwö n'okobo niina jami kibëc na yam an atimö. Dhanö ni twëro bedo Meciya?" 30 Jii öya ki i taun ëka öcidhö gini both Yecu. 31 I caa nön, ëlùbkörë öbakö dhögi bothe nakun kobo gini ni, "Apwony, cam gin mörö." 32 Ëntö en okobo bothgi ni, "An atye ki cem më acama na un ba ingeo gin mörö ië." 33 Cë ëlùbkörë ötwak i kin-gi kën-gi ni, "Ngat mörö ba okelo ninë cem?" 34 Yecu okobo ni, "Cemna obedo më tio gin na ngat n'ooro mitö ëka më cobo tic mërë. 35 Un ba ikobo ni, 'Odong dwethe angwën ëka dong ëkaö kac'? An akobo niwu ni yab unu wangwu ëka inën unu pwothi! Cem dong öcëk ökö ëka örömo dong kac. 36 Ngat na kaö nwongo öcara, ëka cökö kodhi më kwö na ba thum, ëk ngat na cwö kodhi ëka ngat na kaö obed gini ki yom cwiny kanya acël. (aiönios g166) 37 Piën carolok kobo adyer ni, 'Ngat acël cwö ëka ngat nökenë kaö.' 38 An aorowu më kaö gin na un ba itio pirë. Jö nökenë ënë otio tic na tæk rwök, ëka un ikaö adwogi më ticgi." 39 Jö Camaria na pol ki i taun nön oye gini i kom Yecu pi köp na dhakö okobo ni, "Ën okobo niina jami kibëc na an abedo timö." 40 I karë na jö Camaria obino bothe, gin ökwaö Yecu më bedo bothgi ëka en obedo ninö ariö. 41 Jö na pol oye gini i kom Yecu pi köp mërë na gin owinyo. 42 Gin okobo both dhakö ni, "Wan dong ba eye pi köp na in ikobo niwa këkën; ëntö wan ewinyo ki ithwa, ëka wan engeo adyer ni dhanö ni obedo Alar më lobo." 43 Kinge ninö ariö en öya öcidhö yo Galilaya. 44 (Yecu kikome onwongo okobo cön ni adwarpiny ba ëwörö ki i lobo mërë.) 45 I karë na Yecu othuno i Galilaya, jö më Galilaya öjölö ën. Gin onwongo önënö jami kibëc na en obedo timö i Jerucalëm i karama më Poth, piën gin thon onwongo tye kunön. 46 Cë en döki odwogo yo Kana i Galilaya, kanya en onwongo ölökö pii ödökö köngö ölökö. Adit mörö onwongo tye i Kaperanaum na wode two. 47 I karë na en owinyo ni Yecu öya ökö ki i Yudea, obino i Galilaya, en öcidhö yo both Yecu ëka ökwaö en më cidhö cangö wode, n'onwongo dong cwök thöö. 48 Yecu okobo ninë ni, "Ka un ba inënö anyuth më tango ëka gin më aura, un ba ibino yee." 49 Adit okobo ninë ni, "Adwong, bin n'athin-na bara öthöö." 50 Yecu ögamö ni, "In itwëro cidhö. Wodi bino kwö." Adit oye i köp ka Yecu cë ödök yo pacö. 51 Na en onwongo pod tye i wanga yoo, atic mërë oromo ködë k'emuth ni wode tye na kwö. 52 Ën openyogi caa na kom athin öcakö bedo

na bër. Gin okobo ni, "Two lyetho öya ki i kome woro caa abirö." 53 Cë apap k'athin öniang ni man ënë caa na Yecu onwongo okobo ni, "Wodi bino kwö." Cë en ki jö më ödë kibëc oye gini i kom Yecu. 54 Man anyuth më tango më ariö na Yecu ötimö, i karë na en öya ki Yudea ëka obino i Galilaya.

5 Kinge karë mörö, Yecu öcidhö yo Jerucalëm i karama k'Eyuda. 2 I Jerucalëm, i nget Dhö Wangkac më Rom, onwongo tye kulo n'ecwodo ni Beteceda i lëb lburu n'onwongo tye ië bölö abic. 3 Jö na two na pol—ëthöo wang, engwalo ëka jö na komgi okwe—onwongo buto gini ië. [Gin onwongo küro ka erubo pii, 4 piën karë mökö malaika ka Rwoth onwongo bino më rubo pii ki i kulo. Ngat n'öcakö dönyö i pii nakun pod erubo aruba, cang ökö ki kom two kibëc n'onwongo tye i kome.] 5 Ëcwö mörö onwongo tye kunön na two oruu i kome pi mwaka pyer adek wie aboro. 6 I karë na Yecu önënö en obuto kunön ëka öniang ni en otwore pi karë na lac, Yecu openyo ëcwö ni, "In imitö ni icang?" 7 Ëcwö na two ögamö ni, "Adwong, an ape ki ngat mörö na lutha i kulo ka pii orubere. Ka an atëmö më dönyö i pii, ngat nökenë cakö yaa pye ökö i nyima." 8 Cë Yecu okobo ninë ni, "Yaa malö! Kwany ökëkani ëka icak woth." 9 Cücüth ëcwö ni öcang ökö, ëka ökwanyö ökëka mërë cë öcakö woth. Ninö na gin ni ötimërë ië onwongo obedo ceng Cabit k'Eyuda, 10 ëka ëtëla k'Eyuda okobo both ëcwö n'onwongo ëcangö ni, "Tin ceng Cabit; cik ba yeo ni in iting ökëkani." 11 Ëntö en ögamö ni, "Ngat n'öcanga okobo niina ni, 'Kwany ökëkani ëka icak woth.'" 12 Gin openyo en ni, "Nga önön n'okobo nini ni, 'Kwany ökëkani ëka icak woth?'" 13 Ëntö ëcwö n'onwongo ëcangö ba ongeo nga önön, piën Yecu onwongo ödönyö ökö i kin jö na pol n'onwongo tye i kabedo nön. 14 Kinge Yecu onwongo ëcwö ni i öt k'Obanga ëka okobo ninë ni, "Nën, in icang dong ökö. Kür döki itim bal, ëk gin na rac na löö manön kür opodh i komi." 15 Cë ëcwö nön öcidhö ëka okobo both ëtëla k'Eyuda ni Yecu ënë öcangë. 16 Ëtëla k'Eyuda öcakö gini yelo Yecu piën en öcangö dhanö i ceng Cabit. 17 Yecu okobo nigii ni, "Apapna tye ka tic i karë kibëc naka tin, ëka an thon atye ka tic." 18 Pi tyën köp ni ëtëla k'Eyuda ötëmö gini yodhi kibëc më neko Yecu; en ba ötürö cik më ceng Cabit këkën, ëntö en onwongo thon kobo ni Obanga obedo Apap mërë, na miö en bedo na röm k'Obanga. 19 Cë Yecu ögamö köpgi ni, "An akobo niwu köp adyer, Wod ba twëro timö gin mörö pirë këkën; en twëro timö gin na en nënö n'Apap mërë timö, piën gin mörö këkën n'Apap timö Wod thon

tímō. 20 Apap marō Wod ēka nyutho ninē jami kibēc na ēn tímō. Ēn bino nyutho ninē thon jami na dōngō mē atīma na lōō man ēka un kibēc ibino uro. 21 Kite na calō Apap cero jō n'ōthōō ēka miōgī kwō, i yoo acēl nōn Wod thon miō kwō both ngat mōrō kēkēn na ēn mītō. 22 Apap thon ba ngōlō kōp i kom ngat mōrō ěntō ōmiō ngōlō-kōp kibēc both Wod, 23 ēk jō kibēc ōwōr Wod kite na calō gīn wōrō k'Apap kōdē. Ngat na ba wōrō Wod nwongo ba wōrō Apap n'ooro ēn. 24 "An akobo niwu kōp adyer, ngat mōrō kēkēn na winyo kōpna ēka yee i kom ngat n'ooro tye kī kwō na ba thum ēka ba ebino ngōlō kōp ninē; ēn ōya ōkō kī i thōō othuno i kwō. (aiōnios g166) 25 An akobo niwu kōp adyer nī karē tye ka bino ēka othuno ōkō na jō n'ōthōō bino winyo dwōn Wod k'Obanga ēka jō na bino winyo bino kwō gīnī. 26 Kite na calō kwō yaa kī both Apap, kōmanōn thon ēn oye nī kwō myero ōya kī both Wod, 27 ēka ōmiō ēn twēr mē ngōlō kōp piēn ēn obedo Wod ka Dhanō. 28 "Kūr ibed unu kī ur i kōp nī, piēn karē tye ka bino na jō kibēc na tye i lyenegī bino winyo gīnī dwōnē 29 ēka donyo gīnī yōkō—jō n'ōtīmō gin na bēr bino cer gīnī i kwō na ba thum, ēka jō n'ōtīmō gin na rac bino cer gīnī ēk ēngōl kōp nigī. 30 An ba atwērō tímō gin mōrō pīra kēna; an angōlō kōp kite na calō an awinyo kōdē, ēka ngōlō-kōpna tye atīr, piēn an ba amītō tímō gin na an amītō ěntō gin na ngat n'ooro mītō. 31 "Ka an akobo kōp mē caden i koma kēna, caden-na ba bedo kōp atīr. 32 Ngat nōkēnē tye na kobo kōp mē caden i koma, ēka an angeo nī caden na ēn kobo i koma obedo kōp adyer. 33 "Un ioro jīi both Jon Abatica ēka ēn okobo kōp mē caden adyer. 34 Pathī nī an ayeo caden ka dhanō; ěntō an akobo kōp nī ēk ilarē unu. 35 Jon onwongo obedo calō tara n'ēcwinyo na lyēl ēka un iyerō mē bedo kī yom cwinyo pī karē na nōnōk i tar mērē. 36 "An atye kī kōp mē caden na pīrē dit na lōō mē ka Jon ōkō. Tic n'Apapna ōmiō botha mē tyeko, ēka na an atye ka tímō, miō caden nī Apap oora. 37 Apap n'ooro thon, ēn kikome okobo kōp mē caden i koma. Un anaka bara iwinyo unu dwōnē onyo nēnō kite na ēn obedo kōdē, 38 ēka kōp mērē ope i iwu, piēn ba iye unu ngat na ēn ooro. 39 Un īrangō Cōc na Leng piēn īthamō unu nī miōwu kwō na ba thum. Man ēnē Cōc na Leng na twakō kōp mē caden i koma, (aiōnios g166) 40 ěntō i'kwērō unu bino botha ēk inwong unu kwō. 41 "An ba arangō pak kī both dhanō, 42 ěntō an angeowu. An angeo nī un ipe kī mar k'Obanga i cwinywu. 43 An abino kī nyīng Apapna, ēka un ba iyea; ěntō ka ngat mōrō na path obino kī nyīngē, un ibino yeo ēn. 44 Un i'twērō yee nīngō ka ngat acēlacēl rangō pak kī both awodhe,

ěntō ba īrangō unu pak na yaa kī both Obanga acēl kēkēn? 45 "Kūr ītham unu nī an abino dothowu both Obanga Apap. Ngat na bino dothowu ēnē Muca na un iketho genwu i kome. 46 Ka onwongo iyeo unu Muca, onwongo myero iyea unu, piēn Muca ōcōō kōp i koma. 47 ěntō kite na un ba iyeo kōp na ēn ōcōō, un i'twērō yee gin na an akobo nīngō?"

6 Kinge karē mōrō Yecu ōcīdhō yo lōka Nam mē Galilaya (n'ecwodo thon nī Nam mē Tiberia), 2 ēka lwak na pol ōlūbō ēn piēn gīn ōnēnō anyuth mē tango n'onwongo ēn ōtīmō mē cangō etwoe. 3 Cē Yecu ōīdhō malō i wi kidi ēka obedo pīny k'ēlūbkōrē. 4 Karē mē karama mē Poth k'Eyuda onwongo dong cwōk. 5 Na Yecu ōnēnō lwak tye ka bino yo bothe, ēn okobo both Pilipo nī, "Kwene na onu ebino wilō cem kī iē mē pīdhō jō nī?" 6 Yecu okobo kōp nī mē tēmō Pilipo, piēn Yecu onwongo dong ngeo gin na ēn ebino tímō. 7 Pilipo ōgamō ninē nī, "Denario mia arīō ba bino rōmō mē wilō ogati ēk ngat acēlacēl ōgam na nōnōkī!" 8 Ngat acēl n'obedo alūbkōrē n'ecwodo nī Anderiya, ōmīn Cimon Petero, okobo ninē nī, 9 "Awobi mōrō tye kany n'ōmakō ogati abic mē cayiri ēka rēc arīō na thīthīnō, ěntō kara man twērō kōnyō ngō both jō na pol nī kōman?" 10 Yecu okobo nī, "Mīi unu jīi obed pīny." Lum onwongo ōlōth rwōk i kabedo nōn, ēka jīi obedo pīny, kī kin jō n'obedo pīny, wel cwō kēkēn onwongo mītō rōmō elip abic. 11 Cē Yecu ōkwanyō ogati abic, ōpwoyō Obanga, ēka ōmiō both ēlūbkōrē cē gīn opoko both jō n'onwongo obedo pīny. Ēn ōtīmō nī kōmanōn thon i kom rēc ēka jō kibēc ōcamō kite na gīn ōmītō kōdē. 12 I karē na gīn kibēc ocemo oyeng, Yecu okobo both ēlūbkōrē nī, "Cōk unu ngīnyē n'odong ēk gin mōrō kūr ōbal." 13 Cē ēlūbkōrē ōcōkō ngīny ogati mē cayiri na jīi ōcamō ēwēkō ōkō ēka ēpīkō pong aditi apar wie arīō. 14 Kinge na jīi ōnēnō anyuth mē tango na Yecu otio, gīn ōcakō kobo nī, "Adyer man ēnē Adwarpīny na myero obin i lobo." 15 I karē na Yecu ōnīang nī gīn onwongo mītō bino mē dīōnē bedo rwoth, cē ēn ōlūū ōkō kēnē yo wi kidi. 16 I karē na pīny ocido, ēlūbkōrē ōcīdhō gīnī i dhō nam, 17 cē ōdōnyō gīnī i ōd yeya ēka ōngōlō i nam mē cīdhō yo Kaperanaum. I caa nōn pīny onwongo dong cōl, ēka Yecu onwongo bara obino bothgī. 18 Yamō na tēk onwongo tye ka kudho ēka onwongo tye ka rubo pii. 19 I karē na gīn ōkwang na rōmō kilomita abic onyo abicēl, gīn ōnēnō Yecu ka tye ka bino yo bothgī na wothe i wi pii, cē lworo ōmakōgī rwōk. 20 ěntō Yecu okobo nigī nī, "An ēnōn; kūr ibed unu kī lworo." 21 Ēlūbkōr Yecu ōmiō ēn ōdōnyō i yeya bothgī. Cūcūth yeya othuno i

lak nam kanya onwongo gin tye ka cidhō yo iē. 22 Kodiko mērē lwak n'onwongo odong ginī yo lōka nam ōniang nī yeya acēl kēkēn ēnē onwongo tye kunōn, ēka Yecu onwongo ba ōdōnyō iē k'ēlūbkōrē, ēntō gin kara onwongo ōcidhō kēn-gī. 23 Cē yeya mōkō n'ōya ginī kī i Tiberia obino ēka ocung ginī na cwōk i kabedo na jīi onwongo ōcamō ogati iē kinge na Rwoth ōpwōyō Obanga. 24 I karē na lwak ōnēnō nī Yecu onyo ēlūbkōrē onwongo ope ginī kunōn, gin ōdōnyō i yeya ēka ōcidhō ginī yo Kaperanaum mē rangō Yecu. 25 I karē na gin onwongo Yecu i lōka nam tung ca, gin openyo ēn nī, "Apwony, in ithuno kany awene?" 26 Yecu ōgamō nī, "Adyer an akobo niwu, un itye ka rangōna piēn an apīdhōwu kī cem ēka iyeng unu, pathī nī piēn un iñēnō anyuth mē tango. 27 Kūr itii unu pī cem na tōp ōkō, ēntō tii unu pī cem na bedo naka i kwō na ba thum, na Wod ka Dhanō bino miōwu. Obanga Apap omoko nakun ketho anyuth mērē i kome." (aiōnios g166) 28 Cē gin openyo Yecu nī, "Ngō na wan myero ētīm ēk ētīm gin n'Obanga mitō?" 29 Yecu ōgamō nī, "Tic k'Obanga ene: mē yee i kom ngat na ēn ooro." 30 Gin openyo Yecu dōkī nī, "Anyuth mē tango mēnē na in ibino miō ēk wan ēnēn ēka eyee kōp na in ikobo? Ngō na in ibino tīmō? 31 Kwerewa ōcamō manna i thim; kite n'ēcōō kōdē: 'Ēn ōmiōgī ogati n'ōya kī i polo ēk ōcam ginī.'" 32 Yecu okobo nīgī nī, "An akobo niwu kōp adyer, pathī Muca ēnē ōmiōwu ogati n'ōya kī i polo, ēntō Apapna ēnē miōwu ogati n'atīr na yaa kī i polo. 33 Ogati k'Obanga n'atīr ēnē ngat na bino kī i polo yo pīny ēka miō kwō both jō mē lobo." 34 Gin okobo nī, "Adwong, cakērē kobedini miōwa ogati nī i karē kibēc." 35 Cē Yecu okobo bothgī nī, "An ēnē ogati na miō kwō. Ngat na bino botha kec ba bino neko, ēka ngat na yee i koma ōriō ba bino neko. 36 Ēntō an akobo niwu nī iñēna unu ōkō ēka pod bara iyee unu. 37 Jō kibēc n'Apapna miō botha bino bino ginī botha, ēka ngat n'obino botha an ba abino ryēmō ōkō. 38 Piēn an abino pīny kī i polo pathī mē cobo mitina kēna ēntō mē cobo miti ka ngat n'oorā. 39 Man ēnē miti ka ngat n'oorā, nī kūr arweny ngat mōrō acēl kī kin jō kibēc na ēn ōmia, ēntō acergī i nīnō mē ajiki. 40 Man ēnē gin n'Apapna mitō, nī dhanō acēlacēl na nēnō Wod ēka yee i kome, myero onwong kwō na ba thum cē an abino cero ēn i nīnō mē ajiki." (aiōnios g166) 41 Cē i caa nōn Eyuda n'onwongo pyem kī Yecu ōcakō ngūngūta i kome piēn ēn okobo nī, "An ēnē ogati n'obino pīny kī i polo." 42 Gin okobo nī, "Man pathī Yecu, wod ka Yocepu, n'apap mērē ēka aya mērē wan engeo? Pīngō ēn kobo nī, 'An abino pīny kī i polo?'" 43 Yecu ōgamō nī, "Kūr i'ngūngūta unu

i kinwu kenwu." 44 Ngat mōrō ope na twērō bino botha thwara k'Apap n'oorā ōmiō ēn mē bino botha, ēka an abino cero ēn i nīnō mē ajiki. 45 Ēcōō i buke k'edwarpīny nī: "Obanga bino pwonyogī kibēc. Ngat acēlacēl na winyo kōp kī both Apap ēka pwonyere kī bothe bino yo botha. 46 Ngat mōrō ope n'ōnēnō Apap na path kī ngat n'ōya kī both Obanga; ēn kēkēn ēnē ōnēnō Apap. 47 An akobo niwu kōp adyer, ngat na yee tye kī kwō na bedo naka naka. (aiōnios g166) 48 An abedo ogati na miō kwō. 49 Kwerewu ōcamō manna i thim, ēka ōthōō ginī kibēc. 50 Ēntō ngat mōrō na bino camō ogati n'obino kī i polo ba bino thōō. 51 An abedo ogati na miō kwō n'obino pīny kī i polo. Ka ngat mōrō ōcamō ogati nī, ēn bino kwō na twal. Ogati nī ēnē koma, na an abino miō ēk jō mē lobo obed kī kwō mē cwiny." (aiōn g165) 52 Cē Eyuda n'onwongo pyem kī Yecu ōcakō ginī pyem na gwaū i kin-gī, "Dhanō nī twērō miōwa kome mē acama nīngō?" 53 Yecu okobo nīgī nī, "An akobo niwu kōp adyer, thwara ka i'camō unu kom Wod ka Dhanō ēka i'madhō unu remo mērē, ba ibino bedo unu kī kwō i komwu. 54 Ngat n'ōcamō koma ēka ōmadhō remona bedo kī kwō na ba thum, ēka an abino cero ēn i nīnō mē ajiki. (aiōnios g166) 55 Piēn koma obedo cem mē adyer, ēka remona obedo gin mē amadha mē adyer. 56 Ngat na camō koma ēka madhō remona bedo i an ēka an abedo i ēn. 57 Kite n'Apap na kwō oorā ēka an akwō pī Apap, kōmanōn thon ngat na camō koma bino kwō pī an. 58 Kwerewu ōcamō manna ēka ōthōō ginī, ēntō ngat na camō ogati n'obino pīny kī i polo bino kwō na twal." (aiōn g165) 59 Yecu okobo kōp nī nakun tye ka pwony i cinagoga i Kaperanaum. 60 I karē n'ēlūbkōr Yecu na pol owinyo kōp mērē, gin okobo nī, "Man obedo pwony na tēk. Nga na twērō yeo kōp nī?" 61 I karē na Yecu ongeō nī ēlūbkōrē onwongo tye ka ngūngūta i kōp nī, ēn okobo nīgī nī, "Kōp nī ōbalō thamawu ōkō? 62 Cē ngō na un ibino thamō ka iñēnō unu Wod ka Dhanō tye ka cidhō yo polo kanya ēn onwongo tye iē cōn? 63 Gin na miō kwō ēnē Tipo Naleng; kom ba kōnyō gin mōrō. Kōp na an atwakō bothwu obedo kōp mē cwiny ēka kwō. 64 Ēntō jō mōkō pod tye i kinwu na ba yee i koma." Piēn cakērē i acaki, Yecu onwongo ongeō jō na ba bino yee ēka kī ngat na bino ketho ōrōrō i kome. 65 Ēn ōmēdērē mē kobo nī, "Man ēnē ōmiō an akobo niwu nī ngat mōrō ope na twērō bino botha thwara k'Apap ōmiō ēn mē bino botha." 66 Cakērē i karē nōn ēlūbkōrē na pol ōwēkō ginī lūbō kōrē ēka ba dōkī ōmēdērē ginī mē lūbō ēn. 67 Yecu openyo ēlūbkōrē apar wie arīō nī, "Un thon i'mitō cidhō ōkō?" 68 Cimon Peterō ōgamō nī, "Rwoth, wan ebino cidhō yo both nga? In

itye kî kôp mē kwô na ba thum. (aiōnios g166) 69 Wan eye ēka engeo nî in ibedo Ngat Naleng k'Obanga." 70 Cē Yecu okobo nigî nî, "An onwongo ba ayērôwu jô apar wie ariô? Ēntô dhanô acêl i kinwu obedo atic ka Catan!" 71 (Ēn onwongo tye ka twak i kom ngat na bino ketho örörô i kome, Yuda wod ka Cimon Ikariot, n'onwongo obedo dhanô acêl i kin êlûbkör Yecu apar wie ariô.)

7 Kinge, Yecu obedo ka woth i Galilaya, ěn onwongo ba mitô cidhō yo Yudea piĕn ětĕla k'Eyuda onwongo mitô neko ěn ôkô. 2 Karē mē karama k'Eyuda n'ecwodo nî Karama mē Bôlô onwongo dong cwôk, 3 cē utmego ka Yecu okobo ninē nî, "In myero iya kî kany icidh yo Yudea, ěk êlûbkori ônen tango na in itio. 4 Ngat mörô ope na mitô tio tic i mûng, ka ěn kikome mitô nî jîi onge. Ka in itio tic nî ginî, nyuthiri keni both lobo." 5 (Naka thon utmego mērē ba oye ginî i kome.) 6 Yecu okobo nigî nî, "Karēna bara örômô; ěntô karēwu tye ninô kibēc. 7 Jô mē lobo ba twērô dagôwu, ěntô daga ginî piĕn an akobo kôp mē caden i komgî nî ticgî obedo gin na rac. 8 Cidh unu i karama. An bara acidhō i karama nî, piĕn karēna bara örômô." 9 I karē na Yecu okobo kôp nî, ěn odong i Galilaya. 10 Kinge na dong utmego mērē ôcidhō ginî i karama, Yecu thon ôcidhō i mûng na ba ěnĕnô. 11 ětĕla k'Eyuda obedo ka rangô Yecu i karama nakun penyo ginî nî, "Ēn tye kwene?" 12 Lwak onwongo tye ka ngûngûta i kome. Jô mōkô onwongo tye ka kobo nî, "Ēn obedo dhanô na bĕr." Jô nôkĕnĕ okobo nî, "Pe, ěn tye ka bwôlô jô abwôla." 13 Ēntô ngat mörô ope n'ôtwakô kôp i kome kanyalĕr piĕn gin onwongo lworô ětĕla k'Eyuda. 14 I karē na karama othuno i dyere, Yecu ôcidhō i dyekal ô t'Obanga ěka ôcakô pwny. 15 ětĕla k'Eyuda obedo kî ur ěka okobo ginî nî, "Dhanô ni onwongo koth pwny ni ningô nakun ba ôkwanô?" 16 Yecu ôgamô nî, "Pwonyina ba obedo mĕga, ěntô ôya kî both ngat n'oora. 17 Ka ngat mörô ôyĕrô mē tio gin n'Obanga mitô, ěn bino ngeo ka pwonyina ôya kî both Obanga onyo ka an atye ka twak pîra kĕna. 18 Ngat na twak pîrĕ kĕnĕ timô mē nwongo wörô na pîrĕ kĕnĕ, ěntô ngat na rangô wörô pî ngat n'oore, ěn obedo dhanô mē adyer; gin mörô mē twodo ope i kome. 19 Muca yam ba ômiôwu cik? Ēntô dhanô mörô ope i kinwu na gwôkô cik. Pingô un iimitô nekona unu?" 20 Lwak ôgamô nî, "In ibedo ngat na cen ômakô. Nga na mitô nekoni?" 21 Yecu okobo bothgî nî, "An atio tango acêl, ěka un kibēc iuro. 22 Muca ômiôwu cik mē lirĕ ěka un ilirô athin awobi i ceng Cabit k'Eyuda. (Adyer kite mē thĕkwarô mē lirĕ ni ôcakĕrĕ kî both kwerewu, na bara Muca ômiô cik.)

23 Kobedini ka ětwērô lirô athin i ceng Cabit ěk cik ka Muca kûr myero ětûr, pingô un ikĕcô i koma pî cangô kom dhanô kibēc i ceng Cabit? 24 Kûr ingôl kôp na lûbĕrĕ kî gin na un inĕnô, ěntô ngôl unu kôp n'atir." 25 Cē jô mōkô mē Jerucalem ôcakô penyo nî, "Pathi dhanô ni ěnĕ gin mitô neko? 26 Nĕn, ěn tye ka twak kanyalĕr, ěka ba tye ka kobo ginî kôp mörô bothe. ělôc omoko dong adyer nî ěn obedo Meciya? 27 Ēntô wan engeo kanya dhanô ni ôya kî iĕ; ka Meciya bino bino, ngat mörô ope na bino ngeo kanya ěn yaa kî iĕ." 28 Cē na Yecu pod tye ka pwny i dyekal ô t'Obanga, ěn oredo rwôk nî, "Adyer un ingea, ěka ingeo unu kanya an aya kî iĕ. An ba atye kany pîra kĕna. Ēntô ngat n'oora tye adyer ěka un ba ingeo ěn." 29 An angeo ěn piĕn an aya kî bothe ěka ěn oora." 30 Cē gin ôtĕmô makô Yecu, ěntô ngat mörô ope n'oketho cingĕ i kome, piĕn caa mērē onwongo bara örômô. 31 Jô na pol kî kin lwak oketho yeegî i kome ěka okobo ginî nî, "I karē na Meciya bino bino, ěn bino tio anyuth mē tango na pol na lôô dhanô ni?" 32 Eparicayo owinyo ka lwak tye ka mwông ginî i kom Yecu, cē ělamdhôk na dito ěka Eparicayo ooro acikari mē ô t'Obanga mē makô Yecu. 33 Yecu okobo nî, "An atye kodwu pî karē mörô na nônôk, cē an abino cidhō yo both ngat n'oora. 34 Un ibino rangôna, ěntô ba ibino unu nwongona; ěka kanya an atye iĕ, un ba itwērô bino iĕ." 35 ětĕla k'Eyuda ôtwak i kin-gî kĕn-gî nî, "Kwene na dhanô ni mitô cidhō yo iĕ na wan ba ětwērô nwongo ěn? Ēn mitô cidhō both jôwa n'ôkĕth ata i kin Erok mē pwnyogi? 36 Tyĕn kôp na ěn okobo nî, 'Un ibino rangôna, ěntô ba ibino unu nwongona,' ěka 'Kanya an atye iĕ, un ba itwērô bino iĕ' gônyô ningô?" 37 I ninô na dit mē ajiki mē karama, Yecu ôya malô ěka oredo kî dwôn na malô nî, "Ka örô oneko ngat mörô, myero ěn obin botha ěka omodhi. 38 Ngat mörô kĕkĕn na yee i koma, kite na Côc na Leng kobo, kulo mē pii mē kwô bino molo nakun yaa kî i cwinye." 39 Yecu ôtwak i kom Tipo Naleng, na jô n'oye i kome bino nwongo ginî. I karē nôn Tipo Naleng onwongo bara ěmiô, piĕn Yecu onwongo bara eketho dheo i kome. 40 I karē na gin owinyo kôp mērē, jô mōkô okobo nî, "Adyer dhanô ni obedo Adwarpiny." 41 Jô nôkĕnĕ okobo nî, "Ēn obedo Meciya." Ēntô jô nôkĕnĕ pod okobo nî, "Meciya twērô yaa kî i Galilaya ningô? 42 Côc na Leng ba kobo nî Meciya bino yaa kî i dhogola ka Daudi ěka kî i Bethelĕm, taun na Daudi obedo iĕ?" 43 Cē jîi ôcakô popoka ginî pî Yecu. 44 Jô mōkô ômitô makô ěn, ěntô ngat mörô ba oketho cingĕ i kome. 45 I karē n'acikari mē ô t'Obanga odwogo, ělamdhôk na dito ěka Eparicayo openyogi nî, "Pingô un ba ikelo

ën?" 46 Acikari më öt k'Obanga ôgamö ni, "Ngat mörö anaka yam bara ötwak kite na dhanö ni twak ködë." 47 Eparicayo ôgamö ni, "Un thon ëbwölöwu ökö?" 48 Ngat mörö tye i kin onu ëlöc onyo Eparicayo n'oye i kome? 49 Ope! Ëntö lwak ni na ba ngeo gini cik—ëlamögi dong ökö." 50 Nikodemo, n'onwongo öcïdhö both Yecu cön ëka n'onwongo obedo ngat acël i kin-gi, openyogi ni, 51 "Cik onu yeo më ngölö köp i kom dhanö na bara ewinyo köp na yaa ki i dhögë, më nïang i kom ngö na ën ötimö?" 52 Gin ôgamö ni, "In thon iya ki i Galilaya? Rang na bër ki i Cöc na Leng ëka ibino nwongo ni adwarpiny mörö ope na yaa ki i Galilaya." 53 [Cë ngat acëlacël öcïdhö yo pacö mëre.

8 Yecu öcïdhö i wi Kidi më Jeituni. 2 Kodiko cön, ën döki odwogo i dyekal öt k'Obanga, jö kibëc obino bothe, cë ën obedo piny më pwonyogi. 3 Cë epwony Cik ëka Eparicayo okelelo gini dhakö mörö n'ëmakö i elomi. Gin ömiö ën ocung i nyimgi 4 ëka okobo gini both Yecu ni, "Apwony, dhakö ni ëmakö i tim më elomi. 5 Ki i Cik, Muca öcïköwa ni myero ecel koth mon ni ki kite. In ikobo ningö ië?" 6 Gin openyo peny ni më tëmö Yecu, ëk enwong ki köp mörö më dotho ën. Ëntö Yecu ogungo piny cë öcakö cöö ngöm ki nya cingë. 7 I karë na gin mëdërë më penyö Yecu, ën öya malö cë okobo niggi ni, "Ka ngat mörö tye i kinwu n'ope ki bal, myero ën öcak celo dhakö ni ki kidi." 8 Ën döki ogungo cë öcöö ngöm. 9 I karë na gin owinyo köp nön, öcakö gini cïdhö k'acëlacël cakërë ki both jö na dito naka Yecu odong kënë ki dhakö na pod ocung kany nön. 10 Cë Yecu öya malö ëka openyo ën ni, "Dhakö, tye gini kwene? Ngat mörö ba öngölö köp i komi?" 11 Ën ôgamö ni, "Adwong, ngat mörö ope." Cë Yecu okobo ninë ni, "An thon ba angölö köp i komi. Cïdhi ëka kür döki itim bal." 12 I karë na Yecu döki ötwak ki jii, ën okobo ni, "An abedo tar më lobo, ngat na lübö köra ba bino woth i cöl piny, ëntö bino bedo ki tar më kwö." 13 Eparicayo ôgamö ni, "Kobedini in iimiö köp më caden i komi keni; caden-ni ba tye atir." 14 Yecu ôgamö ni, "Kadi bed an akob caden i koma këna, caden-na ënë köp na tye atir piën an angeo kanya an aya ki ië ëka kanya an acïdhö yo ië. Ëntö un ba ingeo kanya an aya ki ië ëka kanya an acïdhö yo ië. 15 Un ingölö köp i kite ka dhanö, ëntö an ba angölö köp i kom ngat mörö. 16 Ëntö ka an angölö köp, ngölö-köpna tye atir, piën an ba atye këna i ngölö-köp ëntö Apap n'ora tye köda kanya acël. 17 I Cik na mewu ëcöö ni köp më caden ka jö ariö bedo caden n'atir. 18 An amoko köp më caden i koma këna, ëka Apap n'ora ënë acaden-na nökenë." 19 Cë gin openyo

Yecu ni, "Apapni tye kwene?" Ën ôgamö ni, "Un ba ingea unu onyo Apapna. Ka onwongo ingea unu, onwongo ingeo unu Apapna thon." 20 Ën okobo köp ni gini i karë na ën tye ka pwony i dyekal öt k'Obanga na cwök ki kanya ëkanö mïc ië. Ëntö ngat mörö ba ömakö ën, piën caa mëre onwongo bara örömö. 21 Cë Yecu döki okobo niggi ni, "An acïdhö ökö, ëka un ibino rangöna, ëntö ibino unu thöö i balwu. Kanya an acïdhö yo ië, un ba itwërö bino ië." 22 Man ömiö ëtëla k'Eyuda openyere kën-gi ni, "Ën bino nekere kënë? Man ënë tyën köp n'ömiö ën okobo ni, 'Kanya an acïdhö yo ië un ba itwërö bino ië'?" 23 Yecu ömëdërë nakun kobo ni, "Un iya unu ki i lobo piny; ëntö an aya ki malö. Un ibedo më lobo ni; ëntö an ba abedo më lobo ni. 24 Man ënë ömiö an akobo ni un ibino thöö i balwu gini; ka un ba iyee ni 'An ënë An,' adyer un ibino thöö i balwu gini." 25 Ëtëla k'Eyuda openyo ën ni, "In inga?" Yecu ôgamö ni, "An ënë ngat na an abedo kobo niwu ki i acaki. 26 An atye ki köp na pol na myero akob i komwu na ngölö köp niwu. Ëntö ngat n'ora genere, ëka gin na an awinyo ki bothe, an akobo both jö më lobo." 27 Gin ba öniang ni Yecu onwongo tye ka kobo niggi köp i kom Apap mëre. 28 Cë Yecu okobo ni, "I karë na un ibino tingo Wod ka Dhanö malö, cë un ibino ngeo ni 'An ënë An' ëka ni an ba atimö gin mörö ki twëröna këna, ëntö atwakö ngö n'Apap opwonya ködë. 29 Ngat n'ora tye kanya acël köda; ën ba öwëka këna, piën i karë kibëc an atimö gin na yomo cwinye." 30 Jö na pol n'owinyo Yecu ka twak oye gini i kome. 31 Cë Yecu okobo both Eyuda n'oye i kome ni, "Ka ilübö unu pwonyina, nwongo ibedo unu ëlücköra adyer. 32 Un ibino ngeo köp adyer, ëka köp adyer bino gönyöwu." 33 Gin ôgamö ni, "Wan ebedo ëkwaë k'Abraam ëka wan bara ebedo opii ka ngat mörö. In icakö kobo ni köp adyer bino gönyöwa ningö?" 34 Yecu ôgamö ni, "Akobo niwu köp adyer, ngat acëlacël na timö bal obedo opii ka bal. 35 Opii ba bedo i pacö mörö na twal, ëntö athin më pacö bedo ië na twal. (aiön g165) 36 Kömanön, ka Wod ögönyöwu, adyer nwongo dong ögönyöwu. 37 An angeo ni un ibedo ëkwaë k'Abraam. Ëntö pod iyübërë unu më nekona, piën köpna ba dönyö i cwinywu. 38 An akobo niwu gin na an anëñö ki both Apapna, ëntö un itimö gin na un iwinyo ki both apapwu." 39 Gin ôgamö ni, "Abraam obedo apapwa." Yecu okobo niggi ni, "Ka un onwongo ibedo ëthinö k'Abraam, kono itimö unu gin n'Abraam ötimö. 40 Ëntö kobedini iimiö unu nekona, an dhanö na kobo niwu köp adyer na an awinyo ki both Obanga. Abraam yam ba ötimö kömanön. 41 Un itye ka timö gin n'apapwu kikome timö." Gin ôgamö ni, "Wan ba

ebedo ëthîn lek; wan etye k'Apapwa acël kékên na ënë Obanga kikome." 42 Yecu okobo nigî nî, "Ka onwongo Obanga obedo Apapwu, kono imara unu, piën an aya kî both Obanga ëka kobedini an atye kany. An ba abino kî wia këna; ëntö ënë oora. 43 Pingö ba inïang unu i köp na an akobo? Piën un ba itwëro winyo köp na an akobo. 44 Un iya kî both apapwu Catan, ëka imitö unu cobo miti k'apapwu. Ën onwongo obedo anak cön i acaki, ba kobo köp adyer, piën köp adyer ope bothe. Ka ën kobo köp më twodo nwongo obedo kite mërë, piën ën obedo atwodo ëka apap ka twodo. 45 An akobo niwu köp adyer ëntö un ba iyee! 46 Nga kî i kinwu na twëro nyutho bal mörö i koma? Ka an atwakö köp adyer, pingö ba iyee unu i köp na an akobo? 47 Ngat mörö n'obedo dhanö k'Obanga winyo köp k'Obanga. Gin na miö un ba iwinyo piën un ba iya kî both Obanga." 48 Eyuda n'onwongo pyem kî Yecu openyo ginî nî, "Wan ba ekobo köp atir nî in ibedo dhanö më Camaria ëka cen omaki?" 49 Yecu ögamö nî, "An cen ba ömaka, ëntö awörö Apapna ëka un ba iwöra. 50 An ba arangö dheo pira këna; ëntö ngat na rangö na kakara tye, ëka ënë obedo angöl-köp. 51 Adyer an akobo niwu nî, ka ngat mörö gwökö köpna, ën ba bino thöo na twal." (aiön g165) 52 Eyuda n'onwongo pyem kî Yecu okobo nî, "Kobedini wan dong ëniang nî in cen omaki! Abraam yam öthöo ëka edwarpiny thon, ëntö in ikobo nî, 'Ka ngat mörö gwökö köpna ba bino thöo na twal.' (aiön g165) 53 In idit ilöo apapwa Abraam? Ën yam öthöo, ëka edwarpiny thon. In ithamö nî in ibedo nga?" 54 Yecu ögamö nî, "Ka aketho dheo i koma këna, dheona nön ba kõnyö. Apapna na un icwodo nî Obangawu ënë ketho dheo i koma. 55 Un ba ingeo unu ën, an angeo ën. Ka onwongo an akobo nî ba angeo ën, kono abedo atwodo calö un. Ëntö an angeo ën ëka agwökö köp mërë. 56 Apapwu Abraam obino obedo kî yom cwinye nî ebino nënö ninöna; ën önënö cë cwinye obedo na yom." 57 Ètëla k'Eyuda okobo ninë nî, "In mwakani bara othuno pyer abic ëka in inënö Abraam!" 58 Yecu ögamö nî, "Adyer akobo niwu nî na pod bara ënywölö Abraam, 'An ënë An.'" 59 Cë gin ökwanö kite më celo Yecu, ëntö ën opono ëka öya ökö kî i dyekal öt k'Obanga.

9 I karë na Yecu tye ka woth k'ëlübörë, ën önënö ëcwö mörö n'ënywölö na wangë öthöo. 2 Èlübörë openyo ën nî, "Apwony, nga ënë öbalö, ëcwö ni onyo enyodo mërë, n'ömiö ënywölö ën na wangë öthöo?" 3 Yecu ögamö nî, "Ècwö ni onyo enyodo mërë ba öbalö ginî, ëntö man ötimërë ëk tic k'Obanga onen i kome. 4 Onu myero eti tic ka ngat n'öora na ceng pod

tye. Kiwor tye ka bino na ngat mörö ba twëro tic. 5 Ka an pod atye i lobo, an nwongo abedo tar më lobo." 6 Kinge na Yecu okobo köp nî, ën öngülö laö dhögë piny, önyöbö kî ngöm ëka opuo i wang ëcwö nön. 7 Cë Yecu okobo ninë nî, "Cidhi ilwök wangi i kulo më Ciloam" (na tyën köp mërë gönyö nî n'eoro). Ën öcidhö, ölwökö wangë ëka odwogo na wangë dong neno. 8 Jö na bedo na cwök ködë ëka jö n'onwongo nënö ën ka kwaö kwac openyere ginî nî, "Pathi ëcwö ni ënë onwongo marö bedo cë kwaö kwac?" 9 Jö mökö okobo nî ën önön. Jö nökenë okobo nî, "Pathi ën cal acala ködë." Èntö athöo wang ögamö dhögi nî, "An önön." 10 Gin openyo ën nî, "Wangi öyabërë ningö?" 11 Ën ögamö nî, "Ècwö n'ecwodo nî Yecu önyöbö cwodho cë opuo i wanga, ëka okobo nina nî acidhi alwök wanga i kulo më Ciloam. Cë acidhö alwökö wanga ëka acakö neno." 12 Gin openyo ën nî, "Èn tye kwene?" Athöo wang ögamö nî, "An ba angeo." 13 Gin otero ëcwö n'onwongo wangë öthöo both Eparicayo. 14 Ninö na Yecu önyöbö cwodho cë öcangö kî wang athöo wang onwongo obedo ceng Cabit k'Eyuda. 15 Pi manön Eparicayo openyo athöo wang kite na wangë öyabërë ködë. Ën okobo nigî nî, "Èn opuo cwodho i wanga, ëka alwökö cë acakö neno." 16 Cë Eparicayo mökö öcakö kobo nî, "Dhanö ni ba öya kî both Obanga piën ba gwökö cik më ceng Cabit k'Eyuda." Èntö Eparicayo nökenë openyo nî, "Dhanö n'obedo abal twëro tio anyuth më tango na röm kî man?" Cë ömiö apokapoka obedo na tye i kin-gi. 17 Cë Eparicayo dökî openyo athöo wang nî, "Thamani tye ningö i kom dhanö ni n'öyabö wangi?" Ècwö ögamö nî, "Èn obedo adwarpiny." 18 Ètëla k'Eyuda ba oyee ginî nî ën onwongo wangë öthöo ëka nî öyabö wangë, naka ömiö ecwodo enyodo mërë. 19 Gin openyo enyodo mërë nî, "Man wodwu na un ikobo nî ënywölö na wangë öthöo? Ngö ënë ömiö ën kobedini dong nënö piny?" 20 Enyodo mërë ögamö nî, "Wan engeo nî man obedo wodwa ëka ënywölö ën na wangë öthöo. 21 Èntö kite na kobedini dong nënö kî piny ködë, wan ba engeo ëka ba engeo ngat n'öyabö wangë. Peny unu ën. Ën dong dit; ën römö twak pirë këné." 22 Enyodo mërë okobo kömanön piën onwongo lworo ginî ëtëla k'Eyuda, piën gin onwongo öyübö köp nî ka ngat mörö otuco nî Yecu ënë Meciya, ebino ryëmö ökö kî i cinagoga. 23 Manön ënë ömiö enyodo mërë okobo nî, "Èn dong dit; peny unu ën." 24 Gin dökî ocwodo athöo wang tyën më ariö cë okobo ginî ninë nî, "Mii dheo both Obanga nakun ikobo köp adyer, wan engeo nî dhanö ni n'öyabö wangi obedo abal." 25 Ën ögamö nî, "Ka ën obedo abal, an ba angeo. Gin na an angeo ënë

nĩ: an onwongo wanga òthòò, èntò kobedini an dong aneno!" 26 Cè gĩn openyo èn nĩ, "Ngò na èn òtĩmò ì komi? Èn òyabò wangi nĩngò?" 27 Èn ògamò nĩ, "An dong akobo niwu òkò èka ba iwinyo unu. Pĩngò pod dòkĩ ìmitò unu winyo? Un thon ìmitò bedo èlùb̀kòrè?" 28 Cè gĩn òyanyò èn nakun kobo gĩnĩ nĩ, "In ènè ibedo alùb̀kòrè, èntò wan ebledo èlùb̀kòr Muca! 29 Wan engeo nĩ Obanga yam òtwak kĩ Muca, èntò dhanò nĩ, wan ba engeo kanya èn òya kĩ iè." 30 Ngat na wangé onwongo òthòò ògamò nĩ, "Man obedo kòp mè aura rwòk! Un ba ingeo unu kanya èn òya kĩ iè, èntò èn òyabò wanga. 31 Wan engeo nĩ Obanga ba winyo èbal èntò winyo dhanò na lworò èn èka tĩmò gĩn na èn mĩtò. 32 Anaka yam wan bara ewinyo nĩ ngat mòrò òyabò wang dhanò n'ènywòlò na wangé òthòò. (aĩon g165) 33 Ka dhanò nĩ onwongo ba òya kĩ both Obanga, onwongo ba twèrò tĩmò gĩn mòrò." 34 Gĩn ògamò nĩ, "In onwongo enywoli ì bal—in ìtwèrò pwoyowa nĩngò?" Cè gĩn òryèmò èn yòkò. 35 Ì karè na Yecu owinyo nĩ èryèmò dhanò nòn yòkò, èn onwongo cè openyo èn nĩ, "In iyee ì kom Wod ka Dhanò?" 36 Ècwò ògamò nĩ, "Adwong, nga ènòn? Kob nĩna èk ayee ì kome." 37 Yecu okobo nĩnè nĩ, "In dong ìnènò èn; ì adyer, ènè ngat na tye ka twak kodi." 38 Cè ècwò okobo nĩ, "Rwoth, an ayee," èka òwòrò èn. 39 Yecu okobo nĩnè nĩ, "An abino èk jò mè lobo nĩ èngòl kòp nĩgĩ. Èk èthòò wang ònèn pĩny, èka jò na wang-gĩ neno bino bedo èthòò wang." 40 Eparicayo mòkò n'onwongo tye kanya acèl kòdè owinyo gĩnĩ kòp na èn okobo èka openyo gĩnĩ nĩ, "Wan thon wangwa òthòò?" 41 Yecu ògamò nĩgĩ nĩ, "Ka onwongo wangwu òthòò, kono ba itye unu kĩ bal, èntò un ikobo nĩ, 'Wan ènènò pĩny,' pĩ manòn balwu pod dong bedo.

10 "An akobo niwu kòp adyer, ngat na ba dònyò kĩ ì dhò anok èntò ìdhò ì anok kĩ kany nòkènè, nwongo obedo akwo èka ayak. 2 Èntò ngat na dònyò kĩ ì dhò anok ènè akwath ka rom mèrè. 3 Ngat na gwòkò anok yabò dhò anok n'akwath, èka rom winyo dwòn akwath. Èn cwodo rom mèrè kĩ nying-gĩ èka tèlò wigi yòkò. 4 Ka dong okelo rom mèrè kibèc yòkò, èn tèlò wigi anyim, èka rom mèrè lùbò kòrè pièn gĩn ngeo dwònè. 5 Gĩn ba bino lùbò kòr ngat na path; èntò rĩngò gĩnĩ òkò kĩ bothe pièn gĩn ba ngeo dwònè." 6 Yecu okobo carolok nĩ bothgĩ, èntò gĩn ba òniàng ì tyèn kòp na èn onwongo tye ka kobo bothgĩ. 7 Pĩ manòn Yecu dòkĩ okobo nĩgĩ nĩ, "Adyer an akobo niwu nĩ an ènè dhò anok ka rom. 8 Jò kibèc n'òcakò gĩnĩ bino ì nyima onwongo obedo gĩnĩ ekwoe èka èyak, èntò rom ba owinyogĩ. 9 An ènè dhò anok; ka ngat mòrò òdònyò kĩ botha, èn bino larè. Èn bino

donyo èka dònyò yòkò cè cìdhò nwongo cem. 10 Akwo bino mè kwalò, neko èka tyeke kékèn; an abino èk gĩn onwong kwò, èka obed gĩnĩ kĩ kwò n'opong. 11 "An abedo akwath na bèr. Akwath na bèr jalò kwò mèrè pĩ rom. 12 Ngat n'epango apanga ba obedo akwath èka rom ba obedo mègè kikome. Ka ònènò orudi tye ka bino, wèkò rom èka ngwècò òkò. Orudi makò rom cè kèthògĩ òkò. 13 Èn ngwècò òkò pièn epango èn apanga èka ba parò gĩn mòrò ì kom rom. 14 "An abedo akwath na bèr; an angeo romna èka romna ngea gĩnĩ— 15 kite na calò Apapna ngea èka an angeo Apap, an ajalò kwòna mè thòò pĩ rom. 16 An atye kĩ rom nòkènè na ba obedo gĩnĩ mè anok nĩ. Myero acidh èk akelgĩ thon. Gĩn thon bino winyo dwòna, èka bino bedo gĩnĩ òthippan acèl k'akwath acèl. 17 Man ènè gĩn n'òmiò Apapna mara pièn an ajalò kwòna—èk anwong dòkĩ. 18 Ngat mòrò ope na twèrò kwanyò kwòna òkò kĩ botha, an ajalò òkò kèna. An atye kĩ twèr mè jalò èka an atye kĩ twèr mè nwongo dòkĩ. An anwongo cĩk nĩ kĩ both Apapna." 19 Ì karè na Yecu okobo kòp nĩ kibèc, apokapoka dòkĩ òcakèrè ì kin Eyuda. 20 Jò na pol kĩ ì kin-gĩ okobo nĩ, "Èn obedo ngat na cen òmakò èka obedo apoa. Pĩngò iwinyo unu èn?" 21 Jò nòkènè okobo nĩ, "Kòp nĩ ba obedo mè ka dhanò na cen òmakò. Cen twèrò yabò wang dhanò nĩngò?" 22 Ì karè nòn karama mè Kwero Òt k'Obanga òtĩmèrè ì Jerusalem, èka onwongo obedo ì karè mè cwir. 23 Yecu onwongo tye ka woth ì dyekal òt k'Obanga ì thè òt ka Colomon. 24 Ètèla k'Eyuda òcòkèrè gĩnĩ èka ègùrò èn dyere, cè openyo gĩnĩ èn nĩ, "Ibino miòwa bedo k'akalakala pĩ karè na ròm kwene? Ka in ènè Meciya, kob niwa kanyalèr." 25 Yecu ògamò nĩgĩ nĩ, "An dong atyeko kobo niwu òkò èntò un ba iyee unu. Tic na an atio kĩ nying Apapna ènè obedo caden-na. 26 Èntò un ìkwèrò unu yee pièn ba ibedo unu romna. 27 Romna winyo dwòna; an angeogĩ, èka lùbò gĩnĩ kòra. 28 An amiògĩ kwò na ba thum, èka gĩn ba bino thòò; ngat mòrò ope na twèrò maògĩ òkò kĩ ì cĩnga. (aĩon g165, aĩonios g166) 29 Apapna n'òmiògĩ ì cĩnga dit na lóò jami kibèc. Ngat mòrò ope na twèrò maògĩ òkò kĩ ì cing Apapna. 30 Apapna èka an etye acèl." 31 Ètèla k'Eyuda dòkĩ òkwanyò kite mè celo Yecu, 32 èntò èn okobo nĩgĩ nĩ, "An dong atyeko nyutho niwu tango mè aura na pol n'òya kĩ both Apap. Pĩ tango mènè na un ìmitò celona kĩ kite iè?" 33 Ètèla k'Eyuda ògamò nĩ, "Wan ba ebino celoni kĩ kidi pĩ tango mòrò na bèr èntò pĩ yanyò Obanga. In ibedo dhanò adhana èntò ikobo keni nĩ in ibedo Obanga." 34 Yecu ògamò nĩgĩ nĩ, "Ècòò ì Cĩkwu nĩ Obanga okobo nĩ, 'Un ibedo obanga gĩnĩ.' 35 Un ingeo nĩ Còc na Leng ba bino

lökärë. Ka jö n'ogamö ginî köp k'Obanga ecwodogî nî 'obanga ginî,' 36 pingô dong un ikobo nî an ayanyö Obanga ka an akobo nî, 'An abedo Wod k'Obanga?' Kadi bed nî kômanôn, Apap öyëra ëka oora i wi lobo ni. 37 Ka an ba atio tic k'Apapna, cê myero kür iyee unu an. 38 Ëntö ka an atio tic mërë, kadi bed ba iyee unu an, cê myero iyee unu tango na an atio, ëk inñiang unu nî Apap tye i an, ëka an atye i Apap." 39 Gin dôkî ötëmö më makö ën ëntö ën ölüü ökö ki i kin-gî. 40 Cê Yecu ödök cen i löka kulo Jordan kanya Jon onwongo batica jî ië cön, cê obedo kunön. 41 Jö na pol obino bothe cê okobo ginî nî, "Jon yam ba otio anyuth më tango mörö, ëntö gin na kibëc na Jon okobo i kom dhanö ni onwongo tye atir." 42 Cê jö na pol n'onwongo tye kunön oyee ginî i kom Yecu.

11 Ëcwö na nyingë Lajaro onwongo two. Ën onwongo obedo dhanö më Betania i pacö ka Maria gin k'amîn mërë Martha. 2 Maria ni ënë onwongo obino owiro Rwoth kî möö na ngwece kur ëka odunyo tyën Yecu kî yer wie. Ömin mërë Lajaro ënë onwongo two. 3 Amego mërë ooro köp both Yecu nî, "Rwoth, okoneni na in imarö two." 4 I karë na Yecu owinyo köp ni, ën okobo nî, "Two ni ba obino më neko ën ëntö obino më kelo dheo both Obanga ëk pîrë Wod k'Obanga onwong dheo." 5 Yecu onwongo marö Martha gin k'amîn mërë ëka Lajaro. 6 Ëntö i karë n'owinyo nî Lajaro two, ën ömëdërë më bedo kanya ën onwongo tye ië pi ninö ariö. 7 Kinge, ën okobo both ëlúbkôrë nî, "Eru ödök cen yo Yudea." 8 Ëlúbkôrë ögamö nî, "Apwony, ëtëla k'Eyuda onwongo pod i caa ni mitö celoni kî kidi. In dôkî imitö dôk yo kunön?" 9 Yecu ögamö nî, "Caa më kiceng ba tye apar wie ariö? Dhanö na wotho kiceng ba cwanyërë, piën ën neno kî tar më lobo ni. 10 Ëntö ka ën wotho kiwor, ën cwanyërë piën ën nwongo ope kî tar." 11 Kinge na ën okobo köp ni, ën ömëdërë nakun kobo nigî nî, "Okone onu Lajaro tye ka ninö; ëntö an acidhö kunön më coo ën ökö." 12 Ëlúbkôrë ögamö nî, "Rwoth, ka ën tye ka ninö, ën bino cang." 13 Yecu onwongo tye ka twak pi thöo ka Lajaro, ëntö ëlúbkôrë onwongo thamö ginî nî öninö anina. 14 Cê Yecu okobo nigî kanyalër nî, "Lajaro öthöo dong ökö, 15 ëntö pi un, an cwinya yom piën onwongo ba atye kunön ëk iyee unu. Eru ëcidh yo bothe." 16 Cê Tomaci (n'ecwodo nî Rudi) okobo both ewodhe n'obedo ëlúbkôr Yecu nî, "Eru thon ecidhu, ëk ëthöo kanya acël ködë." 17 I karë na Yecu othuno i Betania, ën onwongo Lajaro dong orii i lyël pi ninö angwën. 18 Betania onwongo cwöcwök kî Jerusalem na bor mërë römö kilomita adek, 19 ëka Eyuda na pol

onwongo obino ginî both Martha ëka Maria më kweo cwingyî pi thöo k'ömin-gi. 20 I karë na Martha owinyo ni Yecu tye ka bino, ën ödönyö yökö më cidhö romo ködë, ëntö Maria onwongo odong i öt. 21 Martha okobo both Yecu nî, "Rwoth, kono onwongo itye kany kono ömëra ba öthöo. 22 Ëntö an angeo nî Obanga bino miöni gin mörö këkën na in ibino penyo kadi kobedini." 23 Yecu ögamö ninë nî, "Omeru bino cer dôkî." 24 Martha ögamö nî, "An angeo nî ën bino cer dôkî i ninö më ajiki n'ebino cero kî jö n'öthöo kibëc." 25 Yecu okobo ninë nî, "An ënë cer ëka kwö. Ngat na yee i koma kadi öthöo, bino kwö. 26 Jö kibëc na kwö ëka yee ginî i koma ba bino thöo. In iyee köp ni?" (aiön g165) 27 Martha ögamö ninë nî, "Eyo, Rwoth, an ayee nî in ënë Meciya, Wod k'Obanga n'onwongo myero obin i lobo." 28 Kinge na ën dong ötwakö köp ni, ën ödök cen i öt, cê ocwodo amîn mërë Maria thenge ëka okobo ninë nî, "Apwony tye kany, ëka tye ka cwodoni." 29 Cücüth na Maria owinyo köp ni, ën öya malö piöpiö ëka öbünyö cidhö yo bothe. 30 Yecu onwongo bara ödönyö i pacö, ëntö onwongo pod tye kanya Martha oromo ködë ië. 31 I karë na jî n'onwongo tye ginî ka kweo cwingy Maria i öt, önenö kite na ën öbünyö yaa malö piöpiö më dönyö yökö, gin ölübü köre nakun thamö ginî nî ën onwongo tye ka cidhö më koko i wi lyël. 32 I karë na Maria othuno kanya Yecu onwongo tye ië, ën oryebere piny i nget tyën Yecu ëka okobo ninë nî, "Rwoth, ka onwongo itye kany kono ömëra ba öthöo." 33 I karë na Yecu önenö ka ën tye ka koko ëka jö n'ölübü köre thon tye ginî ka koko, cwingye opodho ëka ië thon öwang rwök. 34 Cê openyo nî, "Un iketho kome kwene?" Gin ögamö nî, "Rwoth, bin ëk inën." 35 Yecu okok. 36 Cê Eyuda okobo ginî nî, "Nën kite na ën marö kî ën ködë!" 37 Ëntö jö mökö ki i kin-gî okobo ginî nî, "Man ënë ngat n'ömiö athöo wang önenö piny. Ën onwongo ba twërö jükö thöo kî i kom Lajaro?" 38 Yecu ië öwang rwök dôkî, cê obino i dhö bur lyël. Bur lyël nön onwongo obedo rwo n'egworo agwora ëka eloro dhögë kî kidi. 39 Yecu okobo nigî nî, "Thwar unu kidi ökö." Martha amîn athöo ögamö nî, "Rwoth, kobedini dong ngwe, piën dong orii i lyël pi ninö angwën." 40 Cê Yecu okobo ninë nî, "An ba akobo nini nî ka in iyee, in ibino nënö dheo k'Obanga?" 41 Cê gin ökwanyö kidi ökö. Yecu otingo wangë malö cê okobo nî, "Apap, an apwoi nî in iwinya. 42 An angeo nî in iwinya karë kibëc, ëntö an akobo köp ni pi jö n'ocung ginî i ngeta kany, ëk gin oyee nî in ënë i oora." 43 Kinge na Yecu okobo köp ni, ën oredo kî dwön na malö nî, "Lajaro, donyi yökö!" 44 Ngat n'onwongo öthöo öcakö donyo yökö nakun cingë kî

tyēnē eboo kī bōngū, ēka wangē eboo k'atam. Yecu okobo nīgī nī, "Gōny unu bōng mē lyēl ōkō ēka īmīi unu ēn ōcīdhī." 45 Eyuda na pol n'onwongo obino gīnī both Maria ōnēnō ngō na Yecu otio cē oyee gīnī i kome. 46 Ēntō jō mōkō kī i kin-gī ōcīdhō gīnī both Eparicayo cē okobo nīgī ngō na Yecu otio. 47 Cē ēlamdhōk na dito ēka Eparicayo ocwodo gīnī athuko mē ōd Okiko k'Edong ēka okobo gīnī nī, "Ngō na onu ebino tīmō? Dhanō ni tye ka tio anyuth mē tango na pol. 48 Ka onu ēwēkō ēn kī tic mērē nōn, jō kibēc bino yee i kome, cē wēkō jō Roma bino kēthō gīnī kabedo onu na leng ēka lobo onu ōkō." 49 Cē ngat acēl kī i kin-gī na nyingē Kayapa, n'onwongo obedo Alamdhōk na Dit i mwaka nōn, okobo nī, "Un ba ingeo gin mōrō na twal! 50 Un myero inge nī bino bedo na bēr bothwu ka dhanō acēl ōthōō pī jīi ēk kūr etyek rok onu ōkō kibēc." 51 Ēn ba okobo kōp ni pīrē kēnē, ēntō na calō Alamdhōk na Dit i mwaka nōn, ēnē ōmīō ēn odwaro nī Yecu bino thōō pī rok k'Eyuda, 52 ēka pathī pī rok nōn kēkēn ēntō thon mē cōkō ēthinō k'Obanga n'ōkēth gīnī kanya acēl ēka mē mīōgī bedo acēl. 53 Cakērē i nīnō nōn cīdhō kōdē anyim, ētēla k'Eyuda ōcakō gīnī yūbō kōp mē neko Yecu. 54 Pī manōn, Yecu ba dōkī obedo woth kanyalēr i kin Eyuda, ēntō ōya ōkō kī kunōn cē ōcīdhō i kabedo na cwōk kī thim i pacō n'ecwodo nī Epraim, kanya ēn obedo iē k'ēlūbkōrē. 55 Ī karē na karama mē Poth k'Eyuda onwongo dong cwōk, jō na pol ōya gīnī kī i peci na karē mē Poth bara ōrōmō, cē ōcīdhō gīnī yo Jerucalem ēk ēlōnyērē gīnī kēn-gī. 56 Gīn ōmēdērē mē rangō Yecu nakun ēkūrō ēn i dyekal ōt k'Obanga. Gīn openyerē i kin-gī kēn-gī nī, "Un iṭhamō nīngō? Ēn ba twērō bino i karama?" 57 Ēlamdhōk na dito ēka Eparicayo onwongo ōcīkō gīnī nī ka ngat mōrō ngeo kanya Yecu tye iē, myero okob nīgī ēk gīn ēcīdh ēmak ēn.

12 Na nīnō abicēl mē thuno i karama mē Poth bara ōrōmō, Yecu othuno i Betania kanya Lajaro na ēn ocero kī i kin jō n'ōthōō onwongo bedo iē. 2 Cem mē kothyeno onwongo ēyūbō nī Yecu kunōn. Martha ēnē onwongo poko cem, ēka Lajaro onwongo obedo ngat acēl i kin jō n'onwongo obedo i dhō mēja mē cem kanya acēl kī Yecu. 3 Cē Maria ōkwanyō mōō narad na ngwece kur, na wel mērē tēk na rōmō nucu līta cē owiro kī tyēn Yecu ēka odunyo kī yer wie. Ngwece mōō na kur ōrōmō i ōt kibēc. 4 Ēntō Yuda lkariot n'obedo ngat acēl i kin ēlūbkōrē ēka na bino ketho ōrōrō i kom Yecu, openyo nī, 5 "Pīngō ba ēcadh mōō na kur nī i wel mē denario mia adek ēk ēmī both ecan?" 6 Yuda okobo kōmanōn piēn

ēn onwongo ba parō pī ecan, ēntō onwongo obedo akwo; ēnē onwongo gwōkō ocwe mē līm ēka kōnyērē kī i gin n'eketho iē. 7 Yecu ōgamō nī, "Wēk unu ēn kēnē. Ēn ōtīmō man pī yūbō nīnō mē ikona. 8 Un ibedo k'ecan nīnō kibēc, ēntō un ba ibino bedo kōda nīnō kibēc." 9 Ī karē na lwak k'Eyuda ōniāng gīnī nī Yecu onwongo tye kunōn, gīn obino pathī mē nēnō Yecu kēkēn ēntō mē nēnō Lajaro thon, na Yecu ocero kī i kin jō n'ōthōō. 10 Cē ēlamdhōk na dito ēyūbō gīnī kōp mē neko Lajaro thon, 11 piēn Eyuda na pol ōya ōkō kī i kōrgī pīrē ēka oketho gīnī yeegī i kom Yecu. 12 Kodiko mērē, lwak na pol n'onwongo obino gīnī i karama owinyo gīnī nī Yecu tye ka bino yo Jerucalem. 13 Gīn ōjakō jang ōtīt gīnī cē ōcīdhō gīnī kōdē mē romo kī Yecu nakun wōō gīnī nī, "Ocana!" "Gum obed i kom ngat na bino kī nyingē Rwoth!" "Gum obed i kom Rwoth mē lcarael!" 14 Yecu onwongo athīn kana cē obedo i ngee, kite na yam ēcōō kōdē nī, 15 "Kūr ibed unu kī lworo, un jō mē Cion; nēn, Rwothwu tye ka bino, nakun obedo i ngee athīn kana." 16 Ī karē nōn ēlūbkōrē onwongo ba ōniāng gīnī i kōp ni kibēc, ēntō na dong eketho dheo i kome, cē gīn dong opo nī yam ēcōō kōp ni gīnī ēka ōtīmērē i kome. 17 Lwak n'onwongo tye bothe i karē na ēn cwodo Lajaro kī i lyēl ēka ocero ēn kī i kin jō n'ōthōō, ōmēdērē gīnī mē rwēō kōp i kom gin n'ōtīmērē. 18 Jō na pol ōcīdhō gīnī mē romo kōdē piēn gīn owinyo nī ēn otio anyuth mē tango ni. 19 Cē Eparicayo ōtwak i kin-gī kēn-gī nī, "Gin mōrō ope na onu ētwērō tīmō. Nēn unu kite na jō kibēc dong ōlōkērē mē lūbō kōrē!" 20 Ī kin jō n'onwongo ōcīdhō gīnī mē wōrō Obanga i nīnō mē Karama mē Poth, onwongo jō mōkō obedo Erok. 21 Gīn ōcīdhō both Pilipo n'onwongo obedo dhanō mē Bethecaida na tye i Galilaya, cē okobo gīnī nī, "Adwong, wan ēmītō nēnō Yecu." 22 Pilipo ōcīdhō okobo both Anderiya; cē Anderiya ēka Pilipo ōcīdhō okobo gīnī both Yecu. 23 Yecu ōgamō nīgī nī, "Caa ōrōmō dong ōkō pī Wod ka Dhanō mē nwongo dheo. 24 Adyer an akobo niwu nī ka nyig kodhi ba opodho i ngōm cē ōthōō, bino dong kī nyige acēl kēkēn. Ēntō ka ōthōō, cē bino nyakō nyige na pol. 25 Ngat na marō kwō mērē bino rwenyo kwō mērē, ēka ngat na dag kwō mērē i lobo ni bino gwōkō kwō mērē thuno kōdē naka i kwō na ba thum. (aiōnios g166) 26 Ka ngat mōrō tio pīra, ēn myero ōlūb kōra; ēka kanya an abedo iē, aticna thon bino bedo iē. Apapna bino wōrō ngat na tio pīra. 27 "Kobedini cwinya cwer, ngō na an abino kobo? 'Apap, lara kī i caa nī? Pe, man ēnē tyēn kōp n'ōmīō an abino. 28 Apap, keth dheo i nyingi." Cē dwōn ōya kī i polo na kobo nī, "An dong aketho dheo i nyinga, ēka abino ketho dheo iē dōkī."

29 Lwak n'onwongo ocung ginī kany nōn owinyo cē okobo ginī nī kōth ēnē omor; jō nōkēnē nī malaika ōtwak kōdē. 30 Yecu okobo nī, “Dwōn ni ba obino pīra, ēntō pīrwu. 31 Kobedini caa ōrōmō ōkō mē ngōlō kōp i kom lobo ni; ēka alōc mē lobo ni ebino bolo ōkō. 32 I karē n'ebino tingona malō mē yaa kī i lobo ni, an abino mīō jō kibēc bino yo botha.” 33 Ēn okobo kōp ni mē nyutho kit thōō na ēn ebino thōō kōdē. 34 Lwak ōgamō nī, “Wan ewinyo kī i Cīk nī Meciya bino bedo naka naka. Pīngō in ikobo nī, ‘Wod ka Dhanō myero eting malō?’ ‘Wod ka Dhanō’ nī ēnē nga?” (aiōn g165) 35 Cē Yecu okobo nigī nī, “Pod itye unu kī tar pī karē na nōnōk. Woth unu na pod itye unu i tar, na bara cōl pīny oumowu. Ngat na wotho i cōl pīny ba ngeo kanya ēn cidhō yo iē 36 Keth unu yeewu i tar nakun itye unu kōdē, ēk ibed unu ēthīnō mē tar.” Kinge na Yecu okobo kōp nōn, ēn ōya ōcidhō cē opono ōkō nigī. 37 Kadī bed Yecu otio anyuth mē tango na pol bothgī, jō na pol pod ōmēdērē mē kwērō yee i kome. 38 Man ōtīmērē ēk kōp n'adwarpīny lcaya okobo ocobere nī: “Rwoth, nga n'oye kōp na wan ētītō ēka nga na cīng Rwoth mē tēkō onyuthere bothe?” 39 Manōn ēnē ōmīō gin ba tye ka yee piēn lcaya okobo dōkī nī, 40 “Rwoth oneko wang-gī ōkō, ēka ōmīō cwinygī ōdōkō na nwang, ēk kūr onen kī wang-gī onyo ōniang ginī kī cwinygī, onyo mē lōkērē dwogo botha ēk acang-gī.” 41 lcaya okobo kōp ni piēn ēn onwongo ōnēnō dheo ka Yecu ēka ōtwak i kome. 42 Jō na pol kī i kin ēlōc oyee i kome Yecu, ēntō pī lworo Eparicayo, ōmīō gin ba otuco yeegī ēk kūr ēryēmgi ōkō kī i cinagoga. 43 Piēn gin marō pak na dhanō ketho i komgi na lōō pak n'Obanga mīō. 44 Cē Yecu oredo both lwak na kobo nī, “Ka ngat mōrō oyee i koma, nwongo ba oyee i koma kēkēn, ēntō nwongo oyee i kom ngat n'oorā. 45 Ka ngat ōnēna, ēn thon nēnō ngat n'oorā. 46 An abino i wi lobo calō tar, ēk ngat mōrō na yee i koma kūr obed i cōl pīny. 47 “Ka dhanō mōrō winyo kōpna ēka ba lūbōgī, an ba abino ngōlō kōp nīnē. Piēn an ba abino mē ngōlō kōp both jō mē lobo, ēntō mē larō lobo. 48 Ēntō jō kibēc na kwēra ēka ba yeo ginī kōpna; kōp na an atwakō bino ngōlō kōp nigī i nīnō mē ajiki. 49 An ba atwak kī twērōna. Apap n'oorā ōcika ngō na myero an atwakī ēka kite na myero atwak kōdē. 50 Ēka an angeo nī gin n'Apap ōcika mē twakō tero jō i kwō na ba thum. Gin na an akobo, ēnē gin n'Apap okobo nīna nī an akobi.” (aiōnios g166)

13 Na bara nīnō mē kwero karama mē Poth othuno, Yecu onwongo ongeō nī caa mērē ōrōmō dong mē wēkō lobo ni mē cidhō both Apap. Ēn onwongo

ōmarō ēlūbkōrē na tye i lobo, ēka onyutho nigī mar mērē naka i ajiki. 2 I karē na gin tye i dhō cem mē kothieno, Catan onwongo oketho thama i cwinu Yuda, wod ka Cimon Ikariot, mē ketho ōrōrō i kom Yecu. 3 Yecu onwongo ongeō nī Apap otyeko mīō jami kibēc i thē twēr mērē, ēka nī ēn ēya kī both Obanga ēka onwongo etye ka dōk yo both Obanga. 4 Ēn ōya malō kī i dhō cem, ōgōnyō bōngū mērē mē yōkō, ēka otweo taulo i wang pyērē. 5 Kinge, ēn ōōnyō pii i bēcēn. Cē ōcakō lwōkō tyēn ēlūbkōrē, ēka odunyo kī taulo na ēn onwongo otweo i wang pyērē. 6 I karē na Yecu othuno both Cimon Petero, Petero okobo nīnē nī, “Rwoth, in ibino lwōkō tyēna?” 7 Yecu ōgamō nī, “In ba itye ka niang i gin na an atye ka tīmō kobedini, ēntō in ibino niang kinge.” 8 Petero okobo nīnē nī, “Pe, in ba ibino lwōkō tyēna na twal!” Yecu ōgamō nīnē nī, “Ka an ba alwoki, ba ibino bedo alūbkōra.” (aiōn g165) 9 Cē Cimon Petero ōgamō nī, “Rwoth pathī tyēna kēkēn, ēntō cinga ēka wia thon!” 10 Yecu ōgamō nī, “Dhanō na dong otyeko lwōk ōkō, ba dōkī lwōkō kome ēntō tyēnē kēkēn; piēn nwongo kome kibēc dong leng. Un dong ileng, ēntō pathī un kibēc.” 11 Yecu onwongo ngeo ngat na bino ketho ōrōrō i kome, ēnē ōmīō ēn okobo nī, “Pathī un kibēc ēnē ileng unu.” 12 I karē na dong otyeko lwōkō tyēn-gī, ēn oruko bōng mērē ēka ōdōk obedo i kabedo mērē cē openyogī nī, “Inīang unu i ngō na an atīmō i komwu? 13 Un icwoda unu nī ‘Apwony’ ēka ‘Rwoth,’ manōn tye atīr piēn manōn ēnē nga na an abedo. 14 Dong ka an, abedo Rwothwu ēka Apwonywu, alwōkō tyēnwu, un thon myero ilwōk unu tyēn ngat acēlacēl. 15 An anyutho niwu apor mē alūba ēk un thon itīm unu kite na an thon atīmō kōdē i komwu. 16 Adyer an akobo niwu nī opii mōrō ope na dit na lōō adwong mērē, onyo aor mōrō ope na dit na lōō ngat n'ooro ēn. 17 Kobedini na dong ingeo unu kōp ni ginī, ibino unu bedo kī gum ka iketho unu i tic. 18 “An ba atye ka kobo kōp ni i komwu kibēc; an angeo jō na an dong ayērō. Ēntō ēk Cōc na Leng ocobere kakarē nī: ‘Ngat n'ocemo kōda ōlōkērē i koma.’ 19 “An akobo niwu kobedini na bara ōtīmērē, ēk ka bino tīmērē, iyee unu nī ‘An ēnē An.’ 20 Adyer an akobo niwu nī ngat na jōlō dhanō na an aoro, nwongo ōjōla thon; ēka ngat na jōla, nwongo ōjōlō ngat n'oorā.” 21 Kinge na Yecu okobo kōp ni, cwinye ocwer rwōk cē okobo both ēlūbkōrē kanyalēr nī, “Adyer, an akobo niwu nī ngat acēl kī i kinwu bino ketho ōrōrō i koma!” 22 Ēlūbkōrē ōcakō rīpērē ginī kēn-gī, piēn gin ba ōniang nga na ēn tye ka twak i kome. 23 Ngat acēl kī i kin ēlūbkōrē na Yecu onwongo marō rwōk onwongo obedo na cwōk kōdē i dhō cem. 24 Cimon Petero ōgwēlō ēn ēk

openy Yecu nĩ nga na ɛn tye ka twak i kome. 25 Cɛ alũbƙɔr Yecu n'obedo na cwɔk kɔdɛ, openy ɛn nĩ, "Rwoth, nga ɛnɔn?" 26 Yecu ɔgamɔ nĩ, "Obedo ngat na an abino miɔ ogati ni ka an alutho i bakuli." Cɛ Yecu olutho ogati i bakuli ɛka ɔmiɔ both Yuda, wod ka Cimon Ikariot. 27 Cũcũth na Yuda ɔgamɔ ogati, Catan ɔdɔnyɔ i cwinye. Cɛ Yecu okobo nĩnɛ nĩ, "Gin na in imiɔ tĩmɔ, tĩm ɔkɔ piɔpiɔ." 28 I kin jɔ n'onwongo obedo i dhɔ cem, ngat mɔrɔ ope n'ɔniang piŋgɔ Yecu okobo nĩnɛ kɔmanɔ. 29 Kite na Yuda ɛnɛ onwongo gwɔkɔ cĩlĩŋ, jɔ mɔkɔ ɔthamɔ nĩ Yecu onwongo tye ka kobo nĩnɛ mɛ wiɔ gin mɔrɔ na miɔtɛrɛ pi karama, onyo mɛ miɔ gin mɔrɔ both ɛcan. 30 Cũcũth na Yuda ɔgamɔ ogati, ɛn ɔdɔnyɔ yɔkɔ piɔpiɔ. Piny onwongo dong cɔl. 31 I karɛ na Yuda ɔcidhɔ ɔkɔ, Yecu okobo nĩ, "Kobedini dong eketho dheo i kom Wod ka Dhanɔ ɛka piɔrɛ ebino ketho dheo i kom Obanga. 32 Ka eketho dheo i kom Obanga piɔrɛ, Obanga thon bino ketho dheo i kom Wod piɔrɛ kɛnɛ, ɛka bino ketho dheo i kome piɔpiɔ. 33 "Ɛthĩnɔna, an abino bedo kodwu pi karɛ na nɔnɔk. Un ibino rangɔna, ɛka kite na an akobo kɔdɛ both ɛtɛla k'Eyuda, an thon akobo niwu kobedini: Kanya an acĩdhɔ yo iɛ, un ba itwɛrɔ bino iɛ. 34 "Kobedini an amiɔwu cik na nyen: Marɛ unu kenwu. Kite na an amarɔwu kɔdɛ, un myero imarɛ unu kenwu. 35 Manɔn bino miɔ jɔ kibɛc ngeo nĩ un ibedo ɛlũbƙɔra, ka imarɛ unu kenwu." 36 Cimon Petero openy Yecu nĩ, "Rwoth, in itye ka cidhɔ yo kwene?" Yecu ɔgamɔ nĩ, "Kanya an acĩdhɔ yo iɛ, in ba iɔrɔmɔ lũbɔ kɔra kobedini, ɛntɔ ibino lũbɔ kɔra kinge." 37 Petero openy ɛn nĩ, "Rwoth, ngɔ na jũka mɛ lũbɔ kɔri kobedini? An abino jalɔ kwɔna piri." 38 Cɛ Yecu ɔgamɔ nĩ, "In adyer abino jalɔ kwɔni pira? Adyer, an akobo nini nĩ, na thwɔn gwɛnɔ bara okok, in ibino kwɛrɔna wang adek!

14 "Kũr ibed unu ki par i cwinywu. Yee unu i kom Obanga; yee unu i koma thon. 2 I ɔt k'Apapna tye iɛ kabedo na pol; ka onwongo ba obedo nĩ kɔmanɔn, kono an ba akobo niwu. An acĩdhɔ kunɔn mɛ yũbɔ niwu kabedo. 3 Ka an acĩdhɔ mɛ yũbɔ kabedo niwu, cɛ an abino dwogo mɛ ɔmɔwu yo botha, ɛk kanya an abedo iɛ un thon ibed iɛ. 4 Un ingeo yoo mɛ kanya an acĩdhɔ yo iɛ." 5 Tomaci okobo nĩnɛ nĩ, "Rwoth, wan ba engeo kanya in ibino cidhɔ yo iɛ. Wan ɛtwɛrɔ ngeo yoo niŋgɔ?" 6 Yecu ɔgamɔ nĩ, "An ɛnɛ yoo, kɔp adyer ɛka kwɔ. Ngat mɔrɔ ope na twɛrɔ cidhɔ both Apap ka ba owok ki botha. 7 Ka adyer onwongo ingea unu, onwongo itwɛrɔ unu ngeo Apapna thon. Cakɛrɛ kobedini, ingeo unu ɛn ɛka dong inɛnɔ unu ɛn." 8 Pilipo okobo nĩ, "Rwoth, nyuth

niwa Apap; cɛ manɔn nwongo ɔrɔmɔ ki bothwa." 9 Yecu ɔgamɔ nĩ, "Pilipo, an dong arii kodwu pi karɛ na lac. In bara ingea? Ngat mɔrɔ n'ɔnɛna, nwongo dong ɔnɛnɔ Apap. Ngɔ na miɔ in dɔki ikobo nĩ, 'Nyuth niwa Apap'? 10 In bara iyee nĩ an atye i Apap, ɛka nĩ Apap tye i an? Kɔp na an akobo bothwu ba obedo kɔpna kɛna, ɛntɔ Apap na bedo i an ɛnɛ tio tic mɛrɛ. 11 Yee unu ka an akobo nĩ an atye i Apap ɛka Apap tye i an; onyo ka ba iyee unu, cɛ iyee unu pi tango na un inɛnɔ an atio. 12 Adyer an akobo niwu, ngat na yee i koma ɛn thon bino tio tic na an atio. Ɛn bino tio tic na dɔngɔ na lɔɔ man, piɛn an acĩdhɔ yo both Apap. 13 Gin na kibɛc na un ibino kwaɔ ki nyĩnga, an abino tĩmɔ ɛk Wod oketh dheo i kom Apap. 14 Ka ibino unu kwaɔ gin mɔrɔ ki nyĩnga, an abino tĩmɔ. 15 "Ka imara unu, ibino unu gwɔkɔ cikna. 16 An abino kwaɔ Apap, cɛ ɛn bino miɔwu Akɔny nɔkɛnɛ na bino bedo kodwu naka naka— (aiɔn g165) 17 na ɛnɛ Tipo mɛ kɔp adyer. Jɔ mɛ lobo ba twɛrɔ gamɔ, piɛn gin ba twɛrɔ nɛnɔ ɛka ngeo ɛn. Un dong ingeo ɛn piɛn ɛn bedo kodwu ɛka bino bedo i un. 18 An ba abino wɛkɔwu calɔ ɛthĩnɔ kic; an abino dwogo bothwu. 19 Odong karɛ na nɔnɔk, jɔ mɛ lobo ba dɔki bino nɛnɔna, ɛntɔ un ibino nɛnɔna. Piɛn an akwɔ, un thon ibino kwɔ. 20 I niɔn nɔn un ibino ngeo nĩ an atye i Apapna, ɛka un itye i an, kite na calɔ an atye i un. 21 Ngat na tye ki cikna ɛka gwɔkɔgi, ɛnɛ ngat na mara. Ngat na mara, Apapna bino marɔ ɛn. An thon abino marɔ ɛn ɛka abino nyuthara bothe." 22 Cɛ Yuda (pathĩ Yuda Ikariot) openy ɛn nĩ, "Rwoth, piŋgɔ ibino nyuthiri bothwa ɛntɔ pathĩ both jɔ mɛ lobo?" 23 Yecu ɔgamɔ nĩ, "Ka ngat mɔrɔ mara, ɛn bino lũbɔ pwonyina. Apapna bino marɔ ɛn, wan ebino bino bothe ɛka ebino yũbɔ kabedowa kɔdɛ. 24 Ngat na ba mara, ba bino lũbɔ pwonyina. Kɔp ni na un iwinyo ba obedo mɛga, ɛntɔ obedo mɛ k'Apap n'ora. 25 "An atwakɔ kɔp ni kibɛc na an pod atye kodwu. 26 Ɛntɔ Akɔny—na ɛnɛ Tipo Naleng, n'Apap bino oro ki nyĩnga—bino pwonyowu ki kɔp kibɛc ɛka bino po wiwu ki kɔp kibɛc na an akobo niwu. 27 An awɛkɔ niwu kuc; an amiɔwu kucna. An ba amiɔwu kite na jɔ mɛ lobo miɔ kɔdɛ. Kũr ibed unu ki par i cwinywu, ɛka kũr ibed unu ki lworo. 28 "Po unu i kom gin na an akobo niwu nĩ, 'An abino cidhɔ ɔkɔ ɛka abino dwogo bothwu.' Ka adyer imara unu, kono cwinywu yom nĩ an atye ka cidhɔ yo both Apap, piɛn ɛn dit lɔa ɔkɔ. 29 Kobedini an akobo niwu na bara ɔtimɛrɛ, ɛk ka bino tĩmɛrɛ iyee unu. 30 An ba abino twak kodwu pi caa na lac, piɛn alɔc mɛ lobo ni tye ka bino. Ɛn ope ki twɛr i koma, 31 ɛntɔ jɔ mɛ lobo myero onge nĩ an

amarō Apap ēka nī an atīmō gin n'Apap ōcika nī atīm kikome. "Yaa unu malō; ēk ēcīdh unu."

15 Yecu okobo nī, "An abedo ōlōk mē adyer, ēka Apapna obedo apur. 2 Ēn tongo janga kibēc na ba nyakō nyige, ěntō lwērō janga kibēc na nyakō nyige, mīō bedo na leng, ēk ōmīī ōnyak nyige na pol. 3 Un dong etyeko mīōwu bedo na leng pī kōp na an atwakō bothwu. 4 Bed unu ī an, ēka an abino bedo ī un. Jang yath mōrō ope na twērō nyakō nyige kēnē ka ba tye ī kom ōlōk. Kōmanōn thon un ba itwērō nyakō nyig ka ba ibedo unu ī an. 5 "An abedo ōlōk, un ibedo jangē. Ngat na bedo ī an ēka an ī ěn, ěn bino nyakō nyige na pol; piēn ba itwērō unu tīmō gin mōrō abonge an. 6 Ka ngat mōrō ba bedo ī an, ebolo ěn ōkō calō jang yath ēka thwō. Koth jangē ni ēcōkō, ebologī ī mac ēka ēwangō ōkō. 7 Ka ibedo unu ī an ēka kōpna bedo ī un, peny unu gin na kibēc na un īmītō, cē ebino mīōwu. 8 Ka īnyakō unu nyig na pol, un ibedo ēlūbkōra adyer. Man bino ketho dheō ī kom Apapna. 9 "Kite na calō Apap ōmara, an thon amarōwu kōmanōn. Bed unu ī marna. 10 Ka īgwōkō unu cīkna, ibino bedo unu ī marna, kite na calō an agwōkō kī cīk k'Apapna, ēka an abedo ī mar mērē. 11 An akobo kōp ni bothwu ēk yom cwinya obed ī un, ēk yom cwinywu opong. 12 Man ěnē cīkna: Marē unu kenwu, kite na an amarōwu kōdē. 13 Ngat mōrō ope na tye kī mar na dit na lōō man—nī dhanō jalō kwō mērē pī nyikonei mērē. 14 Un ibedo nyikoneina ka itio unu gin na an acīkōwu. 15 An ba dōk acwodowu nī ibedo unu etic, piēn atic ba ngeo gin n'adwong mērē tio. ěntō an acwodowu nī nyikoneina, piēn gin na kibēc na an awinyo kī both Apapna, atyeko dong mīōwu ngeo. 16 Pathī un ěnē iyēra, ěntō an ayērōwu ēka akethowu ēk icīdh īnyak unu nyigwu na bedo naka naka. Cē Apap bino mīōwu gin mōrō kēkēn na un ibino penyō kī nyīnga. 17 Man ěnē cīkna: Marē unu kenwu. 18 "Ka jō mē lobo ōdagōwu, nge unu nī gīn ōcakō dagōna. 19 Ka un ibedo mē lobo, jō mē lobo onwongo twērō marōwu na calō jōgē. Kite na tye kōdē, un ba ibedo mē lobo, ěntō ayērōwu kī ī lobo, pī manōn ěnē ōmīō jō mē lobo dagōwu. 20 Po unu ī kom kōp na an atwakō bothwu nī: 'Atic mōrō ope na lōō adwong mērē.' Ka gīn oyela, un thon ebino yelowu. Ka gīn owinyo pwonyna, gīn thon bino winyo mewu. 21 Gīn bino tīmō ī komwu kōmanōn pī nyīnga, piēn ba ngeo gīnī ngat n'oora. 22 Ka onwongo an ba abino ēka atwak kōdgī, onwongo bal mōrō ope na twērō bedo ī komgī. ěntō kobedini, balgī kibēc tye ī wigī. 23 Ngat na daga, nwongo dagō Apapna thon. 24 Ka onwongo an ba atio ī kin-gī tic na dhanō

mōrō nōkēnē ba ōtīmō, onwongo ba twērō gīnī bedo kī bal. ěntō kobedini, gīn ōnēnō tango nī gīnī ēka pod ōdaga gīnī kanya acēl k'Apapna. 25 ěntō man ōtīmērē ēk kōp n'ēcōō ī Cīkgī ocobere nī: 'Ōdaga gīnī abonge kōp mōrō.' 26 "ěntō an abino oro niwu Akōny, Tipo mē kōp adyer. ěn bino bino bothwu nakun yaa kī both Apap ēka bino mīō caden ī koma. 27 Un thon myero īmīī unu caden ī koma, piēn ibedo unu botha cakērē kī ī acaki.

16 "An atyeko kobo kōp nī kibēc bothwu ēk kūr īwēk unu yeewu ōkō. 2 Gīn bino ryēmōwu ōkō kī ī cinagoga, adyer karē tye ka bino na jō kibēc na nekowu bino thamō gīnī nī etye ka tic pī Obanga. 3 Gīn bino tīmō man ī komwu piēn ba ongeō gīnī Apap, kadī thon an. 4 ěntō an akobo niwu kōp nī gīnī, ēk ka karē bino thuno, un ibino po tē nī an akobo niwu cōn. An ba akobo niwu kōp nī ī acaki piēn an onwongo pod atye kodwu. 5 "Kobedini an atye ka cīdhō yo both ngat n'oora, ēka ngat mōrō acēl kī kinwu ope na penyā nī, 'In itye ka cīdhō yo kwene?' 6 Cwinywu opong kī kumo piēn akobo niwu kōp nī gīnī. 7 ěntō an atye ka kobo niwu kōp adyer: Obedo pī bēn na mewu ka an acīdhō, piēn ka an ba acīdhō, Akōny ba bino bino bothwu; ěntō ka an acīdhō, an abino oro ěn yo bothwu. 8 Ka Akōny obino, ěn bino nyutho both jō mē lobo kōp ī kom bal ēka kōp ī kom kite atīr, ēka kōp ī kom ngōlō-kōp: 9 na lūbērē kī kōp ī kom bal, piēn gīn ba yee gīnī ī koma; 10 na lūbērē kī kōp ī kom kite atīr, piēn an atye ka cīdhō yo both Apap, kanya un ba dōkī ibino nēnōna; 11 na lūbērē kī kōp ī kom ngōlō-kōp, piēn alōc mē lobo nī dong etyeko ngōlō kōp nīnē ōkō. 12 "An pod atye kī kōp na pol na myero akob bothwu, ěntō ba itwērō unu niang tē kobedini. 13 Ka Tipo mē adyer obino, ěn bino tēlōwu ī kōp mē adyer kibēc. ěn ba bino twak pīrē kēnē; ěntō ěn bino twakō gin na kibēc na ěn bino winyo kēkēn. ěn bino kobo niwu gin na bino tīmērē ī karē mē anyim. 14 ěn bino ketho dheō ī koma, piēn bino kwanyō kōp na an akobo, ēka bino kobo niwu. 15 Gīn na kibēc n'Apapna tye kōdē obedo mēga. Man ěnē ōmīō an akobo nī Tipo bino kwanyō kī kom man obedo mēga ēka bino kobo niwu." 16 Yecu ōmēdērē mē kobo nī, "Ōdong karē na nōnōk, ba dōkī ibino unu nēnōna, ēka kinge karē na nōnōk, un ibino nēnōna." 17 Ēlūbkōr Yecu mōkō ōcakō twak ī kin-gī kēn-gī nī, "Ngō na ěn tye ka kobo both onu nī, 'Ōdong karē na nōnōk, ba dōkī ibino unu nēnōna, ēka kinge karē na nōnōk, un ibino nēnōna,' ēka 'Piēn an atye ka cīdhō yo both Apap?'" 18 Gīn ōmēdērē mē penyō nī, "Tyēn kōp ī kom ngō na ěn tye ka kobo nī, 'karē na nōnōk'? Wan ba etye ka

niang i kom gin na en tye ka twak ië." 19 Yecu ongeon n'gin onwongo mitö penyo en i kom köp ni, ömïö en okobo bothgi ni, "Un itye ka penyerer kenwu pi köp na an akobo bothwu ni, 'Odong karë na nönök, ba doki ibino unu nönöna, ëka kinge karë na nönök, un ibino nönöna?" 20 Adyer an akobo niwu ni un ibino kok ëka ikumo unu nakun jö më lobo cwinygi yom. Un ibino bedo ki cwer cwiny, ëntö cwer cwinywu bino lökëré dökö yom cwiny. 21 Ka dhakö mitö nywöl, cakö bedo k'arem, piën caa mëré nwongo dong örömö; ëntö ka dong önywöl ökö, wie wil i kom arem piën cwinye nwongo yom pi nywölö athin i lobo. 22 Kobedini, un itye ki cwer cwiny, ëntö an abino nönöwu doki, cë cwinywu bino bedo na yom, ëka ngat mörö ope na bino kwanyö yom cwinywu ki bothwu. 23 I ninö nön un ba ibino kwaö gin mörö ki botha. Adyer an akobo niwu ni Apapna bino miöwu gin mörö këkën na un ikwaö ki nyinga. 24 Më thuno naka tin un ba ikwaö gin mörö ki nyinga. Kwa unu ëka ibino unu nwongo, cë ibino pong unu ki yom cwiny. 25 "An atwakö köp ni bothwu ki carolok, karë tye ka bino na an ba doki abino twak kodwu ki koth lëb ni, ëntö an abino kobo bothwu kanya leng köp i kom Apapna. 26 I ninö nön ibino unu kwaö ki nyinga. An ba atye ka kobo ni abino kwaö Apap na kakarwu, 27 piën Apap kikome maröwu, piën un thon imara, ëka iyee unu ni an aya ki both Apap. 28 An aya ki both Apap, ëka an abino i lobo; kobedini an dong atye ka wëkö lobo, ëka atye ka dök cen yo both Apap." 29 Cë ëlëbkör Yecu okobo gini ni, "Kobedini in itye ka twak kanya leng, ëka abongee carolok. 30 Kobedini wan engeo ni in ingeo gin na kibëc, ëka ba doki imitö ni ngat mörö openyi ki peny. Man miö wan eyee ni in iya ki both Obanga." 31 Yecu ögamö ni, "Un dong iyee? 32 Karë tye ka bino ëka dong othuno ökö, na un ibino këth ökö, ngat acëlaacë yo pacö mëré. Un kibëc ibino wëköna këna. Ëntö an ba atye këna, piën Apapna tye kanya acël köda. 33 "An akobo köp ni kibëc bothwu, ëk ibed unu ki kuc i an. I lobo ni itye unu ki can. Ëntö dii unu cwinywu! An dong alö lobo ökö."

17 Kinge na Yecu otyeko kobo köp ni, en ötingo wangë malö i polo ëka ölägö ni: "Apap, karë dong örömö. Keth dheo i kom Wodi, ëk Wodi thon oketh dheo i komi, 2 piën in imiö ën twër i kom jö kibëc, ëk en ömii kwö na ba thum both jö kibëc na in imiö bothe. (aiönios g166) 3 Man ënë kwö na ba thum: ëk ongei gini ni in keni ënë ibedo Obanga më adyer, ëka onge gini Yecu Kiricito na in ioro. (aiönios g166) 4 An atyeko ketho dheo i komi i lobo, nakun acobo tic na in imia ni an atim. 5 Ëka kobedini,

Apap, keth dheo i koma i nyimi, kanya acël ki dheo n'onwongo atye ködë i nyimi na bara lobo öcakërë. 6 "An atyeko nyutho nyingi both jö na in imia ki i lobo. Gin onwongo obedo meg; in imiögi botha ëka gin ögwökö köpni. 7 Kobedini gin ngeo ni jami kibëc na in imia öya ki bothi, 8 piën an amioögi köp na in imia, ëka gin ögamö. Gin ongeon na bër ni an aya ki bothi, ëka oyee gini ni in iora. 9 An alëgö pürgi. An ba alëgö pi jö më lobo ëntö pi jö na in imia, piën obedo gini meg. 10 Jö kibëc na an atye ködë obedo meg, ëka jö kibëc na in itye ködë obedo mëga ëka eketho dheo i koma pürgi. 11 An kobedini atye k'aya ki i lobo, ëntö gin pod tye i lobo, ëka an atye ka bino bothi. Apap Naleng, gwökgi ki tükö më nyingi—nyingi na in cön imia, ëk obed gini acël kite na calö ön etye acël. 12 I karë na an atye ködgi kanya acël, an agwokogi na bër ki tükö më nying nön na in imia. Ba tye ngat mörö n'orwenyo ki kin-gi, na path ki ngat na myero orweny, ëk Cöc na Leng ocobere kakarë. 13 "An atye ka bino yo bothi kobedini, ëntö an akobo köp ni gini nakun nwongo pod atye i lobo, ëk obed gini ki yom cwiny na mëga n'opong i cwinygi. 14 An atyeko miögi köp na meg ëntö jö më lobo ödagögi, piën gin ba obedo më lobo ni, na calö an ba abedo më lobo. 15 An ba akwaö ni myero ikwanygi ökö ki i lobo, ëntö ni igwökgi ki i kom ngat na rac. 16 Gin ba obedo më lobo, kite na calö an ba abedo më lobo. 17 Miigi obed na leng ki köp adyer; köpni ënë adyer. 18 Kite na calö in iora i lobo, an thon aorogi i lobo. 19 An abedo na leng pürgi, ëk ëmiigi thon obed na leng i adyer. 20 "An ba alëgö pi jö ni këkën, ëntö alëgö pi jö na bino yee i koma pi köpgi. 21 An alëgö ni gin kibëc obed gini acël, Apap, kite na calö in itye i an ëka an atye i in. An thon alëgö ni gin kibëc obed i ön, ëk jö më lobo oye gini ni in iora. 22 An amioögi dheo na in iketho i koma, ëk gin obed acël na calö ön etye acël: 23 An i gin ëka in i an. Myero obed gini acël adyer, ëk jö më lobo onge ni in ënë iora ëka in imarögi kite na in imara ködë. 24 "Apap, an amitö ni jö na in imiögi botha ëk obed gini kanya an atye ië, ëka önën gini dheona, dheo na in iketho i koma piën in imara na bara ecweo lobo. 25 "Apap na kite atir, kad bed ni jö më lobo ba ngei, ëntö an angei, ëka ëlëbköra ngeo gini ni in ënë iora. 26 An amioögi nyingi ongere bothgi ëka an abino mëdara më miö nyingi ngere ëk mar na in imara ködë obed i gin, ëka an thon abed i gin."

18 I karë na Yecu otyeko lëga, en öya öcidhö kanya acël k'ëlëbkörë ëka öngölö gini ora më Kidron. Pwodho onwongo tye kunön, ëka Yecu k'ëlëbkörë ödönyö gini ië. 2 Yuda, n'oketho örörö i

kome, onwongo ngeo kabedo nön, piën wang na pol, Yecu k'ëlübörë onwongo marö cökëre gini kunön. **3** Ęlamdhök na dito ěka Eparicayo onwongo ömiö gini Yuda lwak acikari ěka acikari më öt k'Obanga më woth ködë. Gin öcidhö kunön nakun ömakö gini tara, mac raa ěka jami lwëny. **4** Yecu, n'onwongo ngeo gin na kibëc na bino timërë i kome, öcidhö bothgi ěka openyogi ni, "Nga na un itye ka rangö?" **5** Gin ögamö ni, "Yecu më Najaret." Yecu ögamö ni, "An ěnë ěn." (Yuda n'oketho örörö i kome, onwongo ocung kanya acël ködgi.) **6** I karë na Yecu okobo nigü ni, "An ěnë ěn," ojer gini ki ngeegi, ěka opodho gini piny. **7** Cë Yecu dökü openyogi ni, "Nga na un itye ka rangö?" Gin ögamö ni, "Yecu më Najaret." **8** Yecu ögamö ni, "An akobo niwu ni, 'An ěnë ěn.' Ka un itye ka rangöna, cë miü unu jö ni öcidhi." **9** Man ötimërë ěk köp na ěn ötwakö ocobere kakarë ni: "An ba arwenyo ngat mörö acël ki kin jö kibëc na in imia." **10** Cë Cimon Petero n'onwongo ömakö pala abadë, öwödhö ěka otongo ki ith opii k'Alamdhök na Dit, onguno ithe më kucem ökö. (Nyüing opii nön onwongo ecwodo ni Maliko.) **11** Yecu okobo both Petero ni, "Dwök pala abadëni i akurarö mërë. In ithamö ni an myero kür amadh ekopo n'Apap ömia?" **12** Cë lwak acikari, aditgi ěka acikari më öt k'Obanga, ömakö gini Yecu, cë otweo gini ěn. **13** Gin öcakö tero Yecu both Anac n'onwongo Kayapa Alamdhök na Dit önyömö nyarë. **14** Kayapa ěnë onwongo obino ömiö thama both ětëla k'Eyuda ni bër ka dhanö mörö acël öthö pü jü. **15** Cimon Petero ěka alübkör Yecu nökenë onwongo tye ka lübö gini kör Yecu. Alübkör Yecu ni onwongo ngere both Alamdhök na Dit, ömiö ěn ödönyö i dyekal k'Alamdhök na Dit kanya acël ki Yecu, **16** ěntö Petero ocung yökö ki dhö wangkac. Cë alübkör Yecu nön n'onwongo ngere both Alamdhök na Dit, ödök cen yökö, ötwak ki nyakö na gwökö dhö wang kac, ěka ěn ömiö Petero ödönyö i dyekal. **17** Nyakö n'onwongo gwökö dhö wang kac openyo Petero ni, "In thon ba ibedo ngat acël n'obedo alübkör dhanö ni?" Petero ögamö ni, "An ba abedo." **18** Etic ěka acikari onwongo omoko gini mac piën piny onwongo ngic, cë ocung gini nakun etye ka oo mac më miö komgi bedo na lyeth. Petero thon onwongo ocung kanya acël ködgi ka oo mac. **19** Alamdhök na Dit openyo Yecu köp i kom ělübörë, ěka pwony mërë. **20** Yecu ögamö ni, "An atwak kanyalër both jö më lobo. An ninö kibëc abedo ka pwony i cinagoga onyo i öt k'Obanga, kanya Eyuda kibëc cökëre gini ië. An ba akobo gin mörö i müng. **21** Pingö in itye ka penyona? Peny jö n'owinyo gini köpna. Gin ngeo ngö na an akobo." **22** I karë na Yecu ötwakö köp ni, ngat acël ki kin acikari

n'ocung i ngete, odhongo lem Yecu, nakun kobo ni, "Man ěnë kite na in igamö ki köp k'Alamdhök na Dit?" **23** Yecu ögamö ni, "Ka an atwakö gin mörö na rac, nyuth caden më gin na rac, ěntö ka an atwakö köp adyer, pingö in idhonga?" **24** Cë Anac ödwökö Yecu na pod etweo yo both Kayapa, Alamdhök na Dit. **25** Cimon Petero onwongo pod ocung kunön oo mac. Gin openyo ěn ni, "In ba ibedo ngat acël i kin ělübörë?" Petero ökwërö ökö, nakun kobo ni, "An ba abedo." **26** Ngat acël i kin opii k'Alamdhök na Dit, wat ka dhanö na Petero onguno ithe, openyo ěn ni, "An ba aneni kanya acël ködë i pwodho?" **27** Petero dökü ökwërö ökö, cë cücüth thwön gwönö öcakö kok. **28** Kodiko cön, Eyuda ökwanyö Yecu ki i öt ka Kayapa, ěka otero gini i pacö k'adit më Roma. Jö n'odotho Yecu ba ödönyö gini ië piën onwongo miögi ěbal ökö, ěka miögi ba ekwero ninö më Poth. **29** Cë Pilato odonyo yökö bothgi, ěka openyogi ni, "Tyën köp mënë na un i dotho ki dhanö ni?" **30** Gin ögamö ni, "Ka onwongo dhanö ni ba ötimö gin na rac, onwongo wan ba ekelo ěn yo bothi." **31** Pilato okobo nigü ni, "Un kikomwu ěnë iter unu ěn, ěka ingöl unu ninë köp na lübö cik na mewu." Ętëla k'Eyuda ögamö ni, "Wan ba etye ki twër më ngölö thöo i wi ngat mörö." **32** Man ötimërë më cobo köp na Yecu onwongo ötwakö na nyutho kit thöo na ěn bino thöo ködë. **33** Cë Pilato ödök cen i Praitorion ěka openyo Yecu ni, "In ěnë ibedo rwoth k'Eyuda?" **34** Yecu ögamö ni, "In itye ka kobo köp ni piri keni, onyo jö nökenë ěnë okobo nini köp i koma?" **35** Pilato ögamö ni, "In ithamö ni an abedo Ayuda? Jö na megü ěka ělamdhök na dito ěnë okeli gini botha. Ngö ěnön na in itimö?" **36** Yecu ögamö ni, "Kerna ba obedo më lobo ni. Ka onwongo kerna obedo më lobo ni, ělübörë onwongo twërö gini lwëny më jükö ětëla k'Eyuda kür ömaka gini. Ęntö kerna ba obedo më lobo ni." **37** Pilato openyo ěn dökü ni, "Cë in ibedo rwoth?" Yecu ögamö ni, "In ikobo ni an abedo rwoth. Pü tyën köp ni ěnë ömiö ěnywöla, ěka pü tyën köp ni ěnë ömiö an abino i lobo më moko caden pü köp adyer. Jö kibëc më adyer winyo gini dwöna." **38** Pilato openyo ěn ni, "Adyer ěnë ngö?" Ka okobo köp ni, cë ödönyö yökö dökü both Eyuda, ěka okobo ni, "An ba anwongo köp mörö i kome. **39** Ęntö obedo kite më thëkwarö bothwu ni myero an agöny niwu amabuc acël i karë më Poth. Un imitö ni an agöny niwu 'rwoth k'Eyuda'?" **40** Gin ögamö ki wöo ni, "Pathi ěn! Miüwa Baraba!" Baraba onwongo obedo ayak.

19 Pilato otero Yecu, ěka ömiö twërö ni ěk epwod ěn ki del. **2** Acikari ocweo gini tok öküdhö ěka

oketho ginĩ ĩ wie. Ğin oketho bõngũ na kwar ĩ kome 3 ěka ȳcidhõ ginĩ bothe nakun kobo ginĩ nĩ, "ȳrẽm, rwoth k'Eyuda!" Odhongo ginĩ Yecu. 4 Pilato dõkĩ ȳcidhõ yõkõ, ěka okobo both ȳtẽla k'Eyuda nĩ, "Nẽn, an atye ka kelo ẽn yõkõ yo bothwu, ȳk inge unu nĩ an ba anwongo kȳp mȳrõ ĩ kome." 5 ĩ karẽ na Yecu odonyo yõkõ bothgĩ n'oruko tok ȳkũdhõ ěka kĩ bõngũ na kwar, Pilato okobo nĩgĩ nĩ, "Nẽn unu, dhanõ ni ene!" 6 ĩ karẽ n'elamdhõk na dito ěka acikari mẽ ȳt k'Obanga ȳnẽnõ ginĩ ẽn, Ğin ȳwõõ nĩ, "Gur ẽn ĩ kor yath! Gur ẽn ĩ kor yath!" ȳntõ Pilato ȳgamõ nĩ, "Un ĩter ěka ĩgur unu ẽn ĩ kȳr yath, piẽn an ba anwongo kȳp mȳrõ ĩ kome." 7 ȳtẽla k'Eyuda ȳgamõ ginĩ nĩ, "Wan etye kĩ cik, ěka na lũbẽrẽ kĩ cik nȳn, ẽn myero ȳthõõ, piẽn ẽn tye ka kobo nĩ ẽn ebeto Wod k'Obanga." 8 ĩ karẽ na Pilato owinyo kȳp ni, ẽn obedo kĩ lworo rwõk, 9 ěka ȳdõk cen ĩ Praitorion. ȳn openyo Yecu nĩ, "In ĩya kĩ kwene?" ȳntõ Yecu ba ȳgamõ dhõgẽ. 10 ȳmĩõ Pilato okobo nĩnẽ nĩ, "In ĩkwẽrõ twak koda? In ba ingeo nĩ an atye kĩ twẽr mẽ gȳnyõnĩ, onyo mẽ guronĩ ĩ kor yath?" 11 Cẽ Yecu ȳgamõ nĩ, "In onwongo ba ĩtwẽrõ bedo kĩ twẽr ĩ koma ka onwongo ba emii kĩ ĩ polo. Pĩ manȳn ngat n'ȳmĩa bothi tye kĩ bal na dit rwõk." 12 Cakẽrẽ ĩ karẽ nȳn, Pilato ȳtẽmõ mẽ gȳnyõ Yecu, ȳntõ ȳtẽla k'Eyuda ȳmẽdẽrẽ mẽ wõõ nĩ, "Ka in ĩgȳnyõ dhanõ ni, cẽ in ba ibino bedo okone ka Cija. Dhanõ mȳrõ na kethere kẽnẽ mẽ bedo rwoth, nwongo pyem kĩ Cija." 13 ĩ karẽ na Pilato owinyo kȳp ni, ẽn okelo Yecu yõkõ, cẽ obedo ĩ wi then mẽ ngȳlõ-kȳp ĩ kabedo n'ȳcanõ kite ĩẽ, (ĩ lẽb lburu ecwodo nĩ Gabbata.) 14 Nĩnõ nȳn onwongo obedo nĩnõ mẽ Yũbẽrẽ mẽ Poth, caa abicẽl onwongo cwõk. Pilato okobo both ȳtẽla k'Eyuda nĩ, "Nẽn unu, rwothwu enene!" 15 Cẽ Ğin ȳwõõ nĩ, "Nek ẽn ȳkõ! Nek ẽn ȳkõ! Gur ẽn ĩ kor yath aĩa!" Pilato openyogĩ nĩ, "An myero agur rwothwu ĩ kor yath aĩa?" ȳn ȳtẽlamdhõk na dito ȳgamõ ginĩ nĩ, "Wan epe kĩ rwoth mȳrõ, na path kĩ Cija kẽkẽn." 16 Cẽ Pilato ȳmĩõ Yecu bothgĩ ȳk ogur ginĩ ẽn ĩ kor yath aĩa. Cẽ Ğin otero Yecu yõkõ, 17 nakun otingo yath aĩa mẽrẽ, ẽn ȳcidhõ yo kabedo n'ecwodo nĩ "Kabedo mẽ Cogo Wic" (ĩ lẽb lburu ecwodo nĩ Golgota.) 18 Kunȳn ẽnẽ Ğin oguro Yecu ĩ kor yath aĩa, kĩ jȳ ariõ nȳkẽnẽ—ngat acẽl ĩ nget Yecu kucẽl, ěka ngat acẽl kucẽl nakun Yecu tye ĩ dyere. 19 Pilato onwongo ȳcõõ kȳp n'eguro ĩ wi yath aĩa na kwanẽrẽ nĩ: "Yecu mẽ Najaret, Rwoth k'Eyuda." 20 Eyuda na pol ȳkwanõ ginĩ kȳp ni, piẽn kabedo n'onwongo eguro Yecu ĩẽ onwongo tye na cwõk kĩ pacõ na dit, ěka kȳp ni onwongo ȳcõõ ĩ lẽb lburu, ĩ lẽb Latin, ěka ĩ lẽb Ğirik. 21 ȳlamdhõk na dito k'Eyuda ȳkwẽrõ ginĩ both Pilato nĩ, "Kũr ĩcõõ

nĩ, 'Rwoth k'Eyuda,' ȳntõ cõõ nĩ, 'Dhanõ ni okobo nĩ, an abedo rwoth k'Eyuda.'" 22 Pilato ȳgamõ nĩ, "Ğin na an acõõ, an acõõ dong ȳkõ." 23 Kinge na dong acikari otyeko ginĩ guro Yecu ĩ kor yath aĩa, ȳkwanyõ ginĩ bõng mẽrẽ, cẽ opoko ginĩ ĩ dul angwẽn, dul acẽl pĩ acikari acẽlacẽl, ěka bõngũ mẽrẽ mẽ ĩẽ odong. Bõngũ ni onwongo ba ȳkwõ akwõa, ȳntõ ecweo acwea cakẽrẽ kĩ malõ naka pĩny. 24 Ğin ȳtwak ĩ kin-ğĩ kẽn-ğĩ nĩ, "Eru kũr eyecu, ȳntõ eru ebol kwir ȳk ẽnẽn nga na bino tero." Man ȳtĩmẽrẽ ȳk Cȳc na Leng ocobere na kobo nĩ, "Ğin opoko bõngna ĩ kin-ğĩ, ěka obolo ginĩ kwir pĩ bõngũna." Cẽ acikari ȳtĩmõ kite na Ğin omoko kȳdẽ. 25 Jȳ n'ocung ĩ nget yath aĩa ka Yecu ene, aya ka Yecu, amin aya ka Yecu, Maria dhakõ ka Kelopa, ěka Maria mẽ Magadala. 26 ĩ karẽ na Yecu ȳnẽnõ aya mẽrẽ k'alũbkȳrẽ na ẽn marõ ocung ginĩ ĩ ngete kany nȳn, okobo both aya mẽrẽ nĩ, "Aya, wodi ene!" 27 Cẽ okobo both alũbkȳrẽ nĩ, "Nẽn, ayani ene." Cakẽrẽ ĩ caa nȳn mẽ cĩdhõ kȳdẽ anyim, alũbkȳr Yecu ni otero ẽn yo pacõ mẽrẽ. 28 Kinge, Yecu ongeõ nĩ jami kĩbẽc dong othum, ěka mẽ mĩõ Cȳc na Leng cobere, Yecu okobo nĩ, "ȳriõ oneka." 29 Agulu kȳngõ ȳlȳk na wac onwongo tye kunȳn, Ğin olutho amor ĩ kȳngõ ȳlȳk na wac ěka ȳrwakõ ĩ wi lũth, cẽ etingo malõ eketho ĩ dhõgẽ. 30 ĩ karẽ na Yecu ȳbĩlõ kȳngõ ȳlȳk na wac, okobo nĩ, "Othum dong ȳkõ." Cẽ okulo wie ěka ȳthõõ. 31 Nĩnõ nȳn onwongo obedo nĩnõ mẽ Yũbẽrẽ, ěka kodiko mẽrẽ onwongo dong bedo nĩnõ na pĩrẽ tẽk mẽ Cabĩt k'Eyuda. Piẽn ȳtẽla k'Eyuda onwongo ba mĩtõ nĩ kom jȳ n'egurogĩ odong ĩ kor yath aĩa ĩ nĩnõ mẽ Cabĩt. Ğin ȳkwaõ Pilato nĩ myero ȳtũr tyẽn jȳ n'egurogĩ, ěka komgĩ ȳkwanyõ ȳk pĩny kĩ ĩ kor yath aĩa. 32 Acikari obino ginĩ, cẽ ȳtũrõ ginĩ tyẽn dhanõ mẽ acẽl n'onwongo eguro kĩ Yecu, ěka tyẽn ngat nȳkẽnẽ. 33 ȳntõ ka obino ginĩ ĩ kom Yecu, onwongo ginĩ nĩ ẽn dong ȳthõõ ȳkõ, cẽ Ğin ba dȳk ȳtũrõ tyẽnẽ ginĩ. 34 ȳntõ ngat acẽl kĩ kin acikari ȳcȳbõ lak nget Yecu kĩ tȳng, cẽ cȳcũth remo kĩ pii omolo. 35 Ngat n'obino ȳnẽnõ Ğin n'ȳtĩmẽrẽ obino ȳmĩõ caden, ěka caden mẽrẽ tye atĩr. ȳn ngeo nĩ ẽn ekobo kȳp adyer, ěka ẽn mĩõ caden ȳk un thon myero iye. 36 Jami ni kĩbẽc ȳtĩmẽrẽ ȳk Cȳc na Leng ocobere nĩ: "Cogo mẽrẽ mȳrõ ba ebino tũrõ," 37 ěka na calõ Cȳc na Leng nȳkẽnẽ kobo nĩ, "Ğin bino nẽnõ ngat na Ğin ȳcȳbõ." 38 Kinge, Yocepu mẽ Arimataya ȳcidhõ cẽ ȳkwaõ Pilato kom Yecu. Yocepu onwongo obedo alũbkȳr Yecu ȳntõ ĩ mũng pĩ lworo ȳtẽla k'Eyuda. Pilato ȳmĩõ ẽn twẽr, cẽ ȳcidhõ ȳkwanyõ kom Yecu ȳkõ pĩny. 39 Yocepu onwongo owotho kanya acẽl kĩ Nikodemo, ȳcwõ n'obino ȳcidhõ both Yecu ĩ kiwor. Nikodemo okelo mũra n'erubo k'athakarak, na pẽk

mère mitō romo kilo pyer adek wie angwēn. **40** Na lūbērē kī kite mē ik ī thēkwārō k'Eyuda, gīn otero kom Yecu ēka eboo kī bōngū na leng, cē oketho gīnī mōō na ngwece kur. **41** Pwodho onwongo tye ī kabedo n'eguro Yecu iē, ēka ī pwodho nōn onwongo tye iē bur lyēl na nyen, na naka yam ngat mōrō bara eiko iē. **42** Kite na nīnō nōn onwongo obedo nīnō mē Yūbērē k'Eyuda, ēka bur lyēl onwongo tye na cwōk, gīn opyelo kom Yecu kunōn.

20 Kodiko cōn ī nīnō mē acēl mē cabīt na pīny onwongo pod cōl, Maria mē Magadala ōcīdhō ī bur lyēl cē ōnēnō nī ēkwanyō kidi ōkō kī ī dhō lyēl. **2** Ēn obino na tye ka ngwēc both Cimon Petero ēka alūbkōr Yecu nōkēnē na Yecu onwongo marō, cē okobo nī, "Ōkwanyō gīnī kom Rwoth ōkō kī ī bur lyēl. Wan ba engeo kanya gīn oketho ēn iē!" **3** Cē Petero ēka alūbkōr Yecu nōkēnē nōn, ōcakō gīnī cīdhō yo bur lyēl. **4** Gīn kībēc onwongo tye ka ngwēc kanya acēl, ēntō alūbkōr Yecu nōkēnē nōn oyomo Petero ōkō ēka ōcakō thuno ī bur lyēl. **5** Ēn ogungo, ēka ōnēnō ī bur lyēl, cē ōnēnō bōngū na leng na gīn oboo ēn kōdē odong kany nōn, ēntō ba ōdōnyō ī iē. **6** Cē Cimon Petero n'onwongo odong cen ī nge, othuno ēka ōdōnyō ī bur lyēl. Ēn ōnēnō bōng na leng n'onwongo eboo ēn kōdē odong kany nōn, **7** nakun atam n'onwongo eumo kī wii Yecu onwongo ēdōlō ōkō ēka ba tye kanya acēl kī bōng na leng nōkēnē. **8** Cē alūbkōr Yecu nōkēnē nōn n'ōcakō thuno ī bur lyēl, ōdōnyō thon ī iē. Ēn ōnēnō ēka oye. **9** (Gīn thon onwongo bara ōniang gīnī kī ī kom Cōc na Leng nī Yecu myero ocer kī ī kin jō n'ōthōō.) **10** Cē ēlūbkōr Yecu ōdōk gīnī cen yo pecigī, **11** ēntō Maria ocung yōkō kī ī bur lyēl nakun kok. Na ēn tye ka koko, ēn ogungo pīny mē nēnō ī bur lyēl, **12** ēka ōnēnō emalaika ariō n'oruko gīnī bōng na tar. Gīn onwongo obedo kanya onwongo epyelo kom Yecu iē, acēl ī kuwie, ēka acēl ī kutyēnē. **13** Gīn openyo ēn nī, "Dhakō, pīngō in itye ka koko?" Cē ēn okobo nī, "Gīn ōkwanyō kom Rwothna ōkō, ēka an ba angeo kanya gīn oketho ēn iē." **14** Kinge na ēn dong ōtwakō kōp nī, cē ōlōkērē ēka ōnēnō Yecu ocung ī nyime, ēntō ēn ba ongeo nī Yecu onwongo ēnōn. **15** Yecu openyo ēn nī, "Dhakō, pīngō in itye ka koko? Nga na in itye ka rangō?" Ēn ōthamō nī gwōk onyo ēn obedo apur, ēn ōcakō kobo nī, "Adwong, ka in ēnē itero ēn ōkō, kob nīna kanya in iketho kome iē, ēk acīdh akwany." **16** Cē Yecu okobo nīnē nī, "Maria." Ēn ōlōkērē yo bothe ēka okok kī lēb lburu nī, "Rabbi!" (na gōnyō nī Apwony.) **17** Yecu okobo nī, "Kūr īmaka, piēn an bara adōk yo both Apap. Ēntō

apē both ēlūbkōra, ēka ikob bothgī nī, 'An atye ka dōk yo both Apapna ēka Apapwu, both Obangana ēka Obangawu.'" **18** Maria mē Magadala ōcīdhō both ēlūbkōr Yecu k'emuth ēka okobo bothgī nī: "An anēnō Rwoth!" Ēka ēn okobo nīgī nī Yecu okobo nīnē jami nī kībēc. **19** Ī kothyeno nōn mē nīnō mē acēl mē cabīt, n'ēlūbkōr Yecu onwongo tye gīnī kanya acēl, na dholokek kībēc eloro ōkō pī lworo ētēla k'Eyuda. Athura, Yecu onen ēka ocung ī dyeregī cē okobo nī, "Kuc obed kodwu!" **20** Kinge na ēn okobo kōp nī, cē onyutho nīgī wang ret kī ī cīngē ēka kī ī lak ngete. Ēlūbkōr Yecu obedo gīnī kī yom cwiny rwōk ī caa na gīn ōnēnō Rwoth. **21** Yecu dōkī okobo nīgī nī, "Kuc obed kodwu! Kite n'Apap oora, an thon aorowu." **22** Ī karē na ēn okobo kōp nī, cē oyweo ī komgī ēka okobo nī, "Gam unu Tipo Naleng. **23** Ka ītīmō unu kīca ī bal ka jīī, nwongo ētīmō nīgī kīca; ēka ka ba ītīmō unu kīca ī balgī, nwongo ba ētīmō kīca nīgī." **24** Ngat acēl kī kin ēlūbkōr Yecu apar wie ariō, Tomaci (n'ecwodo nī Rudi), onwongo ope bothgī ī karē na Yecu onen athura. **25** Ēlūbkōr Yecu nōkēnē obino okobo nīnē nī, "Wan ēnēnō Rwoth!" Ēntō Tomaci okobo nīgī nī, "Thwara ka an anēnō poo mē ēcūmarī kī ī cīngē, ēka aketho nya cīnga ī wang poo mē ēcūmarī, ēka aketho cīnga ī lak ngete, an ba abino yee." **26** Kinge na nīnō aboro opoth, ēlūbkōrē onwongo obedo gīnī ī ōt dōkī, ēka Tomaci thon onwongo tye kanya acēl kōdgī. Kadī bed onwongo eloro dholokek ōkō, athura, Yecu onen ēka ocung ī dyeregī cē okobo nī, "Kuc obed kodwu!" **27** Cē okobo both Tomaci nī, "Keth nya cīngi kany; nēn cīngi gīnī. Ryē cīngi ēka iketh ī ret mē lak ngeta. Wēk bedo k'akalakala ēka iyee." **28** Tomaci okobo both Yecu nī, "In ibedo Rwothna ēka Obangana!" **29** Cē Yecu okobo nīnē nī, "Piēn in īnēna, ēnē ōmīō in iye; tye gīnī kī gum jō na ba ōnēna ēka pod oyee gīnī." **30** Yecu otio anyuth mē tango na pol ī nyim ēlūbkōrē, na ba ēcōōgī ī buk nī. **31** Ēntō man ēcōōgī ēk iyee unu nī Yecu ēnē Meciya, Wod k'Obanga, ēka pī yeewu ī kome, ibino unu nwongo kwō ī nyīngē.

21 Kinge nīnō na nōnōk, Yecu dōkī onen both ēlūbkōrē ī dhō nam mē Tiberia. Ēn onen bothgī nī kōman: **2** Cimon Petero, Tomaci (n'ecwodo nī Rudi), Nathanael mē Kana mē Galilaya, ēthinō ka Jebedayo, ēka ēlūbkōr Yecu ariō nōkēnē onwongo tye gīnī kanya acēl. **3** Cimon Petero okobo nīgī nī, "An acīdhō ka makō rēc." Gīn ōgamō nī, "Wan ebino cīdhō kodi." Cē ōcīdhō gīnī ēka ōdōnyō gīnī ī yeya, ēntō ī kiwor nōn gīn ba ōmakō gin mōrō. **4** Kodiko cōn na pīny dong oruu, Yecu onwongo ocung ī lak kulo, ēntō ēlūbkōrē ba ongeo gīnī nī Yecu onwongo ēnōn.

5 Ēn openyogī nī, “Ēthinō, ĭmakō unu rēc mōrō?” ěn obed na kwō naka ka an adwogo, manōn ěnē ngō ġin ōgamō nī, “Wan ba ěmakō.” 6 Yecu okobo nīgī kī bothi? In myero ĭlūb kōra.” 23 Pī tyēn kōp nī, ōmīō nī, “Bol unu bōōwu ĭ cīngwu kucem mē yeya, cē anīī ōkēth ĭ kin utmego nī alūbkōr Yecu nī ba bino ibino unu nwongo ġin mōrō.” ĭ karē na ġin ōtīmō, thōō. Ēntō Yecu ba okobo nī ěn ba bino thōō; ěntō ywaō bōō ōlōōgī ōkō piēn rēc onwongo pol rwōk. 7 Yecu okobo nī, “Ka an amītō nī ěn obed na kwō naka Cē alūbkōr Yecu na ěn onwongo marō okobo both ka an adwogo, manōn ěnē ngō kī bothi?” 24 Man ěnē Petero nī, “Manōn Rwoth!” Cūcūth na Cimon Petero alūbkōr Yecu n'okobo caden ĭ kom kōp nī, ěka n'ōcōō owinyo ka ěn kobo nī, “Manōn Rwoth,” ōcakō ruko kōp nī ġinī pīny. Wan engeo nī caden mērē na ěn bōng mērē, (piēn onwongo ōgōnyōgī ōkō) ěka opye ĭ okobo tye atīr. 25 Jami nōkēnē tye na pol na Yecu pii. 8 Ēlūbkōrē nōkēnē obino ġinī ĭ yeya nakun ywaō otio. Ka onwongo ěcōōgī pīny k'acēlacēl, athamō nī ġinī bōō n'opong kī rēc, piēn ġin onwongo ba bor kadī wī lobo thūkūl ba tye kī kabedo na rōmō buke kī lak kulo, na mītō rōmō mita pyer abungwēn. 9 ĭ n'ebino cōōgī. karē na ġin dong othuno ĭ lak nam, ōnēnō ġinī mac makaa kunōn na lyēl, n'eketho rēc ĭ wie, ěka ogati. 10 Yecu okobo nīgī nī, “Kel unu rēc mōrō na un pod ĭmakō unu amaka.” 11 Cē Cimon Petero ōcakō dōk cen ěka ōidhō ĭ yeya, ōywaō bōō, okelo ĭ lak kulo. Rēc onwongo opong ĭē na pol, 153, ěntō kadī bed onwongo rēc pol rwōk, bōō ba ōyēc. 12 Yecu okobo nīgī nī, “Bin unu ĭ cem.” Ēntō ba tye ngat mōrō kī kin ělūbkōrē n'ōdīō cwinye mē penyo ěn nī, “In ěnē nga?” Piēn ġin ongeo nī manōn ěnē Rwoth. 13 Yecu obino, ěka ōkwanyō ogati, cē ōmīō bothgī, ěka ōtīmō nī kōmanōn thon kī rēc. 14 Man onwongo dong wang mē adek na Yecu onen kōdē both ělūbkōrē, kinge n'ecero ěn kī ĭ kin jō n'ōthōō. 15 Kinge na ġin dong otyeko cēn, Yecu openyo Cimon Petero nī, “Cimon wod ka Jon, in adyer ĭmara na lōō jō nī?” Ēn ōgamō nī, “Eyo, Rwoth, in ingeo nī an amari.” Yecu okobo nī, “Kwa ěthinō romna.” 16 Yecu openyo Petero dōkī wang mē arīō nī, “Cimon wod ka Jon, in adyer ĭmara?” Ēn ōgamō nī, “Eyo, Rwoth, in ingeo nī an amari.” Yecu okobo nī, “Gwōk romna.” 17 Yecu openyo Petero wang mē adek nī, “Cimon wod ka Jon, in ĭmara?” Petero ĭē ōwang piēn Yecu openyo ěn wang mē adek nī, “Cimon wod ka Jon, in ĭmara?” Cimon okobo nīnē nī, “Rwoth, in ingeo jami kībēc; in ingeo nī an amari.” Yecu okobo nī, “Kwa romna. 18 Adyer, akobo nini nī ĭ karē na in pod ibedo athīn, itweo bōngūni keni, ĭcīdhō yo kanya in ĭmītō; ěntō ka dong itii, in ibino ryēō cīngi ġinī, cē ngat mōrō nōkēnē bino tweo nini bōngūni, ěka bino teronī yo kanya in ba ĭmītō.” 19 (Yecu okobo kōp nī mē nyutho kit thōō n'ebino ketho ĭ kome na Petero bino mīō dheo ĭ kom Obanga.) Cē okobo nīnē nī, “Lūb kōra!” 20 Petero ōlōkērē, ěka ōnēnō alūbkōr Yecu nōn na ěn onwongo marō tye ka lūbō kōrgī. (Man obedo ngat acēl n'onwongo obedo na cwōk kī Yecu ĭ dhō cem mē kothyeno ěka onwongo okobo nī, “Rwoth, nga na bino ketho ōrōrō ĭ komi?”) 21 ĭ karē na Petero ōnēnō ěn, cē openyo Yecu nī, “Rwoth, cē dhanō nī kono?” 22 Yecu ōgamō nī, “Ka an amītō nī

Tic k'Ēkwēna

1 Adwong Teopilo, i bukna na cōn, acōō iē kōp kibēc na yam Yecu ōcakō tio ēka pwonyo, 2 naka othuno i nīnō n'etero ēn kōdē i polo, kinge mīō cīk kī tēkō ka Tipo Naleng both ēkwēna mērē na yam ōyērō. 3 Kinge can mērē, Yecu obedo ka nyuthere bothgi wang na pol mē moko nī ēn eut na kwō. Ēn obedo ka nen bothgi pī nīnō pyer angwēn nakun twakō kōp i kom ker k'Obanga. 4 I karē mōrō acēl, na ēn onwongo tye ka cem kōdgi, ēn ōcīkōgi nī, "Kūr iya unu kī i Jerucalem, ēntō kūr unu pī mīc n'Apapna ōcīkērē mē mīō, na un iwinyo unu an abedo ka twakō. 5 Jon yam obatica kī pii, ēntō odong nīnō na nōnōk na un ebino baticawu kī Tipo Naleng." 6 I karē n'ēkwēna ōrwaterē gīnī kanya acēl, openyo gīnī Yecu nī, "Rwoth, i karē nī ēnē in ibino dwōkō kī lōc both jō mē lcarael?" 7 Yecu okobo bothgi nī, "Ba obedo nī un myero inge karē onyo nīnō n'Apap ōyūbō kī twēr mērē. 8 Ēntō ibino unu nwongo tēkō, ka Tipo Naleng obino i komwu, ēka un ibino bedo ecaden-na i Jerucalem, i Yudea kibēc, i Camaria, ēka i ajiki mē lobo." 9 Kinge na dong okobo kōp ni, etingo Yecu malō na gīn thon nēnō, ēka pōl ōkanō ēn ōkō kī i wang-gī. 10 Ēkwēna ka Yecu onwongo ōcīkō wang-gī malō i pōl na ēn tye ka cīdhō, athura cwō arīō ocung i ngetgi n'oruko gīnī bōng na tar. 11 Gīn okobo nī, "Un jō mē Galilaya, pīngō icung unu nakun itye ka nēnō unu malō i pōl? Yecu nī, n'etingo ōkō malō i wi polo kī bothwu, bino dwogo dōkī i yore nōn acēl na un iñēnō ēn tye ka cīdhō kōdē i wi polo." 12 Cē gīn dong ōcakō dōk yo Jerucalem kī i wi kidi n'ecwodo nī Kidi mē Jeituni, na cwōcwōk kī Jerucalem, bor mērē rōm kī woth mē nīnō acēl mē Cabīt k'Eyuda. 13 I karē na gīn othuno, ōcakō i dhō gīnī i ōt na malō kanya gīn onwongo bedo gīnī iē cōn. Jō n'onwongo ute gīnī kany nōn ēnē Petero, Jon, Yakobo ēka Anderiya, Pilipo ēka Tomaci, Batulumayo ēka Matayo, Yakobo wod k'Alipayo, Cimon na yam obedo i kin jō na mītō lōckēn, ēka Yuda wod ka Yakobo. 14 Gīn kibēc rībērē kanya acēl jwījwi kī mon i lēga ēka Maria aya ka Yecu, ēka kī utmego mērē. 15 I karē nōn Petero ōya ocung i kin jō n'oye i kom Yecu Kiricito (na welgi rōmō mia acēl kī pyer arīō) 16 ēka okobo nī, "Utmegona, Cōc na Leng myero ocobere kakarē na yam cōn Tipo Naleng ōtwakō pīrē kī i dhō Daudi i kom Yuda, n'obino ōtēlō jō n'ōmakō Yecu. 17 Yuda onwongo obedo dhanō acēl i kinwa ēka ōnywakō kōdwa tic nī." 18 Yuda obino ōwīlō pwodho kī cīling na ēn onwongo kī kom tīm mērē na rac, kanya ēn opodho acelawic

cē iē ōbarē ōkō ēka jamiē oukere yōkō kibēc. 19 Kōp ni owinyere both jō kibēc na bedo gīnī i Jerucalem, ēka pwodho nōn ecwodo kī lēbgī nī Akeldama, na tyēn kōp mērē nī, "Pwodho mē Remo." 20 Petero ōmēdērē nakun kobo nī, "Kōp ni ēcōō i buk mē Jabuli, "Wēk unu pacō mērē ōdōk wi obur, ngat mōrō kūr obed iē." Ēka dōkī nī, "Ngat nōkēnē oleē tic mērē mē tēla." 21 Dong pī manōn bēr ēyēr kī kin jō nī dhanō n'obedo kī onu i karē kibēc na Rwoth Yecu obedo ka wīrē i kin onu, 22 cakērē kī i batica ka Jon naka i nīnō n'etero kī Yecu malō kī kin onu. Ngat mōrō n'ebino yērō bino rībērē kōdwa mē bedo acaden mē cer ka Yecu." 23 Ēka dong gīn otuco nying jō arīō: Yocepu n'ecwodo nī Barcaba (n'ecwodo thon nī Yucito) ēka Matiya. 24 Cē gīn dong ōcakō lēga nī, "Rwoth, in ingeo cwiny ngat acēlacēl. Nyuth nīwa kī kin jō arīō ni ngat na in i yērō 25 mē bedo akwēna ēk oleē tic ni na Yuda ōwēkō ēka ōcīdhō ōdōk cen i kabedo mērē." 26 Cē gīn dong ōcakō bolo kwir, ēka kwir opodho i kom Matiya, ēmēdō ēn dong i kom ēkwēna apar acēl.

2 I karē na nīnō mē Pentekot ōrōmō, ēlūbkōr Kiricito kibēc onwongo ōgūrē gīnī kanya acēl. 2 Athura wōō owinyere nakun ōya kī i polo na calō yamō na kudho na ger ēka opong i ōt ōkō kibēc kany onwongo gīn obedo iē. 3 Cē gīn mōrō onen bothgi na cal kī lēb mac n'opokere ēka opye i wi ngat acēlacēl i kin-gī. 4 Gīn kibēc opong kī Tipo Naleng ēka ōcakō gīnī dhūmō lēb nōkēnē na papath kite na Tipo Naleng ōmīōgi mē twakō. 5 I caa nōn, onwongo Eyuda na bedo gīnī i Jerucalem, jō n'onwongo wōrō gīnī Obanga n'ōya kī i rok kibēc na tye i wi lobo thūkūl. 6 I karē na gīn owinyo wōō nōn, lwak kibēc ōgūrē na wigī ocung ōkō, piēn ngat acēlacēl onwongo winyogi ka twakō gīnī lēb thurgi kikome. 7 Cē ouro gīnī rwōk nakun kobo gīnī nī, "Jō ni kibēc na tye ka twak gīnī ba obedo jō mē Galilaya? 8 Cē pīngō onu kibēc etye ka winyogi nakun ngat acēlacēl tye ka twak kī lēb thurgi kikome? 9 Wan jō mē Parithia, jō mē Media, jō mē Elam, kī jō na bedo i Mecopotamia, Yudea kī Kapadokia, Ponto ēka Acia, 10 Perugia kī Pampulia, Ejip kī lobo Libia na cwōk kī Cirene, kī wele n'ōya gīnī kī i Roma 11 na gīn Eyuda kī jō nōkēnē n'ōlōkērē gīnī i diniwa, Kurete kī jō Arab, wan ewinyogi ka tuco gīnī pī tic na dōngō mē twērō k'Obanga i lēb onu kikome." 12 Gīn kibēc ouro na ba twērō gīnī niang. Gīn openyere kēn-gī nī, "Man kōrē nīngō?" 13 Ēntō jō nōkēnē okobo kōp mē anywar i komgi nakun kobo gīnī nī, "Jō ni ōmēr amēra kī kōngō." 14 Cē Petero ocung kanya acēl k'ēkwēna apar acēl, ōtwak kī dwōn na malō nakun kobo bothgi

nĩ, “Un Eyuda ewodha, ěka un kibęc nĩ bedo unu i Jerucalem, bę̃r inge unu kęp nĩ, dķk ićik ithwu mę̃ winyo twak na mę̃ga. 15 Jķ ni ba ķmę̃r kite na un ićhamķ kķdę̃, pię̃n caa pod adek kę̃kę̃n mę̃ kodiko. 16 Ĕntķ man kęp na yam adwarpiny Joel ķtwakķ pirę̃ nakun kobo nĩ, 17 “Obanga okobo nĩ, i karę̃ mę̃ ajiki, abino ķnyķ Tipona i kom jķ kibęc. Ĕthiņķ awopewu ěka anyirawu bino dwaro adwar, awopewu na thiņķ bino nę̃nķ gini gin anyutha, jķwu n’otii bino gini leko lek. 18 Naka thon eticna, na cwķ ěka mon, an abino ķnyķ Tipona i komgi i karę̃ nķn, ěka gin bino dwaro adwar. 19 An abino nyutho gin mę̃ aura i wi polo malķ ěka anyuth na papath piny i wi lobo, remo, mac, ěka iro na dung. 20 Ceng bino cido ķķķ na cķl cuc, ěka dwe bino lķķrę̃ dķķķ na kwar calķ remo, na bara niņķ na dit ěka niņķ mę̃ dheo ka Rwoth obino. 21 Ĕka jķ kibęc na bino cwodo nyiņg Rwoth bino larę̃.” 22 Petero ķmę̃dę̃rę̃ anyim nakun kobo nĩ, “Un jķ mę̃ Icarael, winy unu kęp ni: Yecu mę̃ Najaret onwongo obedo dhanķ n’Obanga onyutho bothwu ki tio tango, gin mę̃ aura, ěka anyuth n’Obanga otio kanya acę̃l kķdę̃ i kin onu, na calķ un kikomwu ingeo.” 23 Yecu ni ķmiķ bothwu kite na yam Obanga onwongo ķyķbķ nakun ngeo gin na bino timę̃rę̃ i anyim, ěka un iguro ěn i kom yath ariā, ineko unu ki cing jķ na ba ngeo cik k’Obanga. 24 Ĕntķ Obanga ocero ěn ķķķ ki i kin jķ n’ķthķķ nakun gķnyķ ěn ķķķ ki kom arem mę̃ thķķ, pię̃n thķķ onwongo ba twę̃rķ moko i kome. 25 Daudi okobo kęp i kome: “I karę̃ kibęc an anę̃nķ nĩ Rwoth tye kķda. Pię̃n ěn tye i cinga kucem, an ba abino yengara. 26 Pi manķ cwinya yom ěka thon lę̃ba twak ki yom cwiny, koma thon bino bedo ki gen, 27 pię̃n in ba ibino wę̃kķna i kin jķ n’ķthķķ, onyo ba ibino wę̃kķ Dhanķni Naleng tķp. (Hadę̃s g86) 28 In inyutho niņa yoo na tera i kwķ, in ibino miķna abedo ki yom cwiny i nyimi.” 29 Petero ķmę̃dę̃rę̃ anyim nakun kobo nĩ, “Utmegona, myero akob bothwu kęp i kom kwarķ onu Daudi atir nĩ yam ěn ķthķķ ķķķ ěka eiko kome, ěka etye ki lyę̃nę̃ both onu kany naka tin. 30 Ĕntķ ěn yam onwongo obedo adwarpiny, dķķ ongeo ni Obanga yam okwongo kwong bothe nĩ ebino ketho dhanķ mķrķ na tye i kin ķkwaę̃ mę̃rę̃ mę̃ bedo i then mę̃ lķc mę̃rę̃. 31 Ĕn yam ķnę̃nķ gin na bino timę̃rę̃ i karę̃ mę̃ anyim, ěka ķtwakķ kęp i kom cer ka Meciya, ni ěn onwongo ba ěwķķ i kin jķ n’ķthķķ, kome thon ba ķtķp. (Hadę̃s g86) 32 Man ěnę̃ Yecu n’Obanga ocero ķķķ, onu kibęc ebedo ecaden i kom kęp nķn. 33 Ĕtingo ěn malķ i nget cing Obanga kucem, ķgamķ Tipo Naleng na yam ěcikķ ki both Apap ěka ķķnyķ i komwa gin na dong un itye ka nę̃nķ ki wangwu ěka thon iwinyo unu ki ithwu. 34 Pię̃n Daudi yam ba

ķķdķhķ i polo, ķntķ ěn okobo nĩ, “Rwoth Obanga okobo both Rwodha: “Bed i cinga kucem 35 naka ka abino miķ langni dķķķ gin mę̃ theno tyeni.” 36 “Pi manķn myero jķ mę̃ Icarael kibęc onge gini rwķķ nĩ Obanga otyeko ketho Yecu ni, na un iguro i kor yath ariā, mę̃ bedo Rwoth ěka Kiricito.” 37 i karę̃ na jii owinyo kęp nĩ, ķķķnyķ i cwingi rwķķ, cę̃ openyo gini Petero ěka ķkwę̃na nķķnę̃ nĩ, “Utmegowa, ngķ na myero wan ķtim?” 38 Petero ķgamķ nĩ, “Ngut unu ěk ebaticawu, ngat acę̃lacę̃l ki kinwu, i nyiņg Yecu Kiricito ěk ķtim kica i kom bal na mewu. Ĕka ibino unu gamķ mic ka Tipo Naleng. 39 Pię̃n cikę̃rę̃ ni ěcikķ pirwu k’ķthiņķwu ěka pi jķ kibęc na tye gini kanya bor, na Rwoth Obanga onu bino cwodogi.” 40 Cę̃ Petero ķmę̃dę̃rę̃ ki titķ kęp nķķnę̃ na pol nakun dwekogi nĩ, “Larę̃ unu kenwu iya unu ķķķ ki kom wang rok n’ķbal ni.” 41 Ĕka jķ n’oyeo kęp na ěn okobo bothgi, ebaticagi ěka ķmę̃dę̃rę̃ i niņķ nķn jķ na rķmķ elip adek. 42 Jķ n’oye kibęc ķmiriķ kę̃n-gi mę̃ winyo pwony k’ķkwę̃na, guri kanya acę̃l, poko i ogati, ěka lę̃ga. 43 Ĕkwę̃na obedo tino tango ěka anyuth na pol, naka jķ kibęc lworķ ķmakķgi. 44 Jķ n’oye onwongo cķķrę̃ gini kanya acę̃l, nakun nywakķ gini jami kibęc kanya acę̃l. 45 Gin ķcadķ lķnyķgi ěka jamigi, cę̃ gin opoko both jķ kibęc ki i kin-gi kite na miti ka ngat acę̃lacę̃l tye kķdę̃. 46 Gin ķmę̃dę̃rę̃ mę̃ guri kanya acę̃l niņķ kibęc i dyekal ķt k’Obanga nakun poko gini i ogati ki i pecigi, n’ę̃camķ ki yom cwiny ěka ki cwiny na bę̃r, 47 n’ę̃pakķ Obanga, na dhanķ kibęc pwķyķgi, ěka Rwoth obedo ka mę̃dķ bothgi jķ n’ķlarę̃ niņķ ki niņķ.

3 i niņķ mķrķ acę̃l, Petero ěka Jon ķķdķhķ gini i ķt k’Obanga i caa mę̃ lę̃ga, caa abungwę̃n mę̃ kothyeno. 2 Onwongo tye dhanķ mķrķ n’ongwal cakę̃rę̃ i karę̃ n’ę̃nywķlķ ěn kķdę̃, n’etingo atinga i wangkac mę̃ Ĕt k’Obanga n’ecwodo ni Wangkac na Bę̃r, ěk ķkwa kķny niņķ ki niņķ ki both jķ na dķnyķ i Ĕt k’Obanga. 3 i karę̃ na ěn ķnę̃nķ Petero ěka Jon tye ka dķnyķ gini, angwalo ķkwaķgi ciling. 4 Petero ěka Jon ķcikķ wang-gi i kome. Cę̃ Petero okobo niņę̃ nĩ, “Nę̃nwa!” 5 Angwalo oketho cwinye mę̃ nę̃nķgi, nakun geno ni ebino miķnę̃ gin mķrķ. 6 Ĕntķ Petero okobo nĩ, “An ba atye ki lim mķrķ, ķntķ an amii ngķ na an aute kķdę̃. i nyiņg Yecu Kiricito mę̃ Najaret, yaa malķ ićak woth.” 7 Cę̃ Petero ķmakķ cing angwalo mę̃ kucem ěka otingo ěn malķ, cę̃ cūcūth odon tyę̃nę̃ ķķķķ na tę̃k. 8 Angwalo opye ki tyę̃nę̃ ěka ķcakķ woth. Cę̃ ķķķnyķ kķdgi i Ĕt k’Obanga nakun wotho, pye, ěka pakķ Obanga. 9 i karę̃ na jii kibęc ķnę̃nķ angwalo ka wotho ěka pakķ Obanga, 10 gin ķniņang

nī ēnē dhanō na yam kwaō kōny kī ī wangkac mē Ōt k'Obanga n'ecwodo nī Wangkac na Bēr. Gīn obedo kī ur rōwō ī kom ngō n'ōtīmērē ī kome. 11 Gīn kibēc ōngwēcō kanya acēl kī ur ī tyēn ōt ka Colomon, kanya angwalo onwongo omoko ī kom Petero ēka Jon. 12 Ī karē na Petero ōnēnō kōp nī, ēn okobo bothgī nī, "Un jō mē Icarael, ngō na miōwu iuro unu ngō n'ōtīmērē? Pingō un itye ka rīpōwa kōmanōn calō wan ēnē ētīmō kī tēkōwa onyo kite na wan elworo k'Obanga kōdē ēnē ōmīō angwalo nī owotho? 13 Obanga k'Abraam, Icaka ēka Jakob, Obanga ka kwerewa, oketho dheo mērē ī kom atic mērē Yecu. Un īmīō ī cīng Pilato ēk enek ēn nakun īkwērō unu ōkō ī karē na Pilato mitō gōnyō ēn. 14 Un īkwērō Ngat na Leng ēka na kite Atīr, cē īkwaō unu nī ēk ēgōny niwu dhanō n'obedo anek. 15 Un ineko ngat na miō kwō, ēntō Obanga ocero ēn kī ī thōō. Ēka wan ēnē ebodo ecaden mē kōp nī. 16 Pī yee ī nying Yecu, ēnē ōmīō ēcwō nī onwongo tēkō kite na un īnēnō ēka ingeo. Obedo nying Yecu ēka yee ī kome ēnē ōmīō ēn ōcang ī nyimwu kite na un kibēc itye ka nēnō kōdē. 17 "Kobedini dong utmegona, an angeo nī yam ītīmō unu kōp nī ī karē mē kwia pīny, kamē ētēlawu. 18 Ēntō kite na yam Obanga ōtwak kī ī dhō edwarpīny kibēc nī Kiricito mērē myero ōlim can, ēka dong ocobere kakarē nī kōmanōn. 19 Ngut unu dong, ēka ilōkērē unu both Obanga, ēk balwu ējwa ōkō, 20 ēk karē mē yweo na yaa kī both Rwoth obin bothwu, ēka ēn bino oro Yecu, na ēnē Meciya n'ēyērō niwu. 21 Ēn myero obed ī polo naka ka karē ōrōmō n'Obanga bino dwōkō jami kibēc kakarē, kite na yam ēn ōcīkērē kōdē k'edwarpīny mērē na leng. (aīōn g165) 22 Muca yam okobo nī, 'Rwoth Obangani bino oro adwarpīny mōrō niwu, na bino yaa kī ī kin utmegowu kite na ēn oora kōdē. Un ibino winyo unu ēn ī kōp kibēc na ēn bino kobo niwu. 23 Ngat mōrō na ba bino winyo ēn, ebino rwenyo wangē ōkō kī kin jō thurgī.' 24 "Cakērē kī ī kom adwarpīny Camuel, edwarpīny kibēc ōtwakō kōp ī kom ngō na tye ka tīmērē ī kom karē nī. 25 Un ibedo ēkwaē k'edwarpīny nōn, ēka un ēnē ekethowu ī cikērē k'Obanga both kwerewu. Piēn Obanga okobo both Abraam nī, 'Rok kibēc mē wī lobo bino nwongo gum kī both ēkwaēnī.' 26 Ī karē na dong Obanga oketho atic mērē, ēn ōcakō oro bothwu ēk ōmīiwu gum na miō ngat acēlacēl lōkērē wēkō tīmō bal."

4 Ī karē na Petero ēka Jon onwongo tye ka twak gīnī kī jīī, ēlamdhōk ēka adit acikari mē ōt k'Obanga ēka Ecadukayo obino gīnī bothgī. 2 Ētēla nī onwongo ōngō gīnī nī Petero ēka Jon onwongo tye ka pwonyo jīī nī, kī twēr mē nying Yecu, jō n'ōthōō bino cer gīnī

ōkō. 3 Gīn ōmakō Petero ēka Jon cē ekethogī ī buc naka othuno kodiko, piēn pīny onwongo ocido ōkō. 4 Ēntō jō na pol n'owinyo kōpgī oyee, ēka wel jō n'oye Yecu n'obedo gīnī cwō ōmēdērē othuno elip abic. 5 Kodiko mērē na pīny dong oru, ēlōc ēka edong, k'epwony cik ōcōkērē gīnī ī Jerucalem. 6 Anac Alamdhōk na Dit onwongo tye kany nōn, ēka Kayapa, Jon, Alegijanda, ēka jō kibēc na tye gīnī ī dholokek k'Alamdhōk na Dit. 7 Gīn okelo Petero ēka Jon ī nyimgī nakun penyogī nī, "Koth tēkō mēnē na un itye ka tic kōdē onyo kī nying nga?" 8 Cē Petero, opong kī Tipo Naleng ēka okobo bothgī nī, "Un ēlōc ēka edong ka lwak! 9 Ka tin ipenyowa unu kōp ī kom tic na bēr n'ōtīmērē ī kom angwalo ēka kite na ēn ōcang kōdē, 10 cē dong un kibēc ēka jō mē Icarael myero inge unu nī, pī nying Yecu Kiricito mē Najaret na un iguro ī kom yath ariā, n'Obanga ocero ōkō kī ī kin jō n'ōthōō, ēnē ēcwō nī ocung ī nyimwu n'ōcang ōkō. 11 Ēnē obedo "kidi na un egedo īkwērō unu ōkō, n'ōlōkērē ōdōkō kidi na pīrē tēk mē gwīc ōt." 12 Larē ope both ngat mōrō nōkēnē, piēn Obanga ba ōmīō nying mōrō nōkēnē ī lobo kany both dhanō na myero onu ēlarē kōdē." 13 Ī karē na jō na tye ī ōd athuko ōnēnō gīnī tēk cwiny Petero ēka Jon cē ōniang gīnī nī gīn onwongo obedo jō na ba ōkwanō ēka ba ngeo gīnī gin mōrō. Obedo gīnī kī ur ēka ōniang gīnī nī cwō nī yam obedo kanya acēl kī Yecu. 14 Ēntō ka gīn ōnēnō ēcwō n'ōcang ocung ī ngetgī, kōp mōrō na gīn myero okobi ōlōgī ōkō. 15 Ēka ēcīkōgī mē dōnyō yōkō kī ī athuko mē ōd okiko k'edong, cē ōcakō gīnī yūbō kōp kēn-gī, 16 nakun kobo gīnī nī, "Ebino tīmō jō nī nīngō? Jō kibēc na bedo gīnī ī Jerucalem otyeko ngeeno nī gīn otio anyuth na kome nen, na onu ba ētwērō kwērō. 17 Ēntō mē jūkō ēk kūr ōkēth ōrōm kin jīī, bēr ēcīkōgī ēk kūr ōmēdērē gīnī mē kobo nying nī both ngat mōrō kēkēn." 18 Cē ecwodogī mē dwogo cen, ēka ēcīkōgī nī kūr ōtwak onyo opwony gīnī kōp mōrō kī nying Yecu. 19 Ēntō Petero ēka Jon ōgamō gīnī nī, "Un īngōl kōp kenwu ka cē nen na bēr ī wang Obanga mē winyowu na lōō winyo Obanga, 20 piēn wan ba ētwērō wēkō kobo gin na yam wan ēnēnō ēka ewinyo." 21 Kīngē būrōgī, cē gīn ōwēkōgī ōcīdhō, gīn ba onwongo yoo mē ketho pwod ī komgī, piēn jīī kibēc onwongo pakō gīnī Obanga pī ngō n'ōtīmērē. 22 Dhanō na tango mē cangō ōtīmērē ī kome, onwongo mwaka mērē kadhō pyer angwēn ōkō. 23 Cūcūth n'ēgōnyōgī, Petero ēka Jon ōdōk gīnī both jō n'oye nōkēnē ēka okobo nīgī ngō n'ēlamdhōk na dito ēka edong okobo gīnī. 24 Ī karē na gīn owinyo kōp nī, jō n'oye kibēc okok gīnī kanya acēl kī dwōn na malō mē lēga both Obanga na kobo gīnī nī, "Rwoth

Obanga won twër, in iketho polo ki lobo ëka nam ki jami kibëc na tye ië, 25 cön itwak ki dhö kwaröwa Daudi n'obedo aticni ki tükö ka Tipo Naleng n'okobo ni, "Pingö erok wöo gini kanya acël, ëka pingö rok na pol yübö köp na köny mërë ope? 26 Rwodhi më lobo yübërë gini pi lwëny, ëka ëlôc cökërë kanya acël i kom Rwoth ëka i kom Ngat n'ewiro." 27 Adyer Erobe ëka Pontio Pilato k'Erok ëka jö më Icarael ögürë gini kanya acël i pacö ni i kom aticni Yecu na leng na in iwiro. 28 Gin ötimö ngö na tüköni ëka mitini omoko ni bino timërë. 29 Ëka kobedini Rwoth Obanga, winy büragi ëka imiüwa eticni, ëk ëtit köpni ki tük cwiny. 30 Ryë cingi më cangö jii, ëk anyuth më tango ëka gin më aura na pol ötimërë ki nying aticni Yecu na leng." 31 Kinge na dong ölgö gini, kabedo na gin ögürë ië oyengere. Ëka gin kibëc opong ki Tipo Naleng, cë ötitö gini köp k'Obanga ki tük cwiny abonge lworo mörö. 32 Jö n'oye kibëc onwongo nöthërë gini kanya acël i cwiny ëka i thama. Ngat mörö ope na kobo ni gin na ën etye ködë onwongo obedo mëgë, ëntö gin önywakö jami kibëc na gin onwongo tye ködë. 33 Ëkwëna ömëdërë gini më miö caden më cer ka Rwoth Yecu ki tükö rwök, ëka gum na thwönë opodho i komgi kibëc. 34 Onwongo ngat mörö ope na gin mörö orem bothe, piën jö n'onwongo tye ki pwothigi onyo udigi öcadhö gini ökö, ëka okelo gini lim n'öya ki ië, 35 cë ömiö gini both ëkwëna ëka më poko both ngat acëlacël kite na mitërë ködë. 36 Kömanön Yocepu n'obedo Alebi më Cairpac, n'ëkwëna cwodo ni Baranaba (na thërë ni, "Wod k'ajing cwiny jö"). 37 Ën öcadhö pwodho mërë na ën onwongo tye ködë ëka okelo ciling both ëkwëna.

5 Ëntö ëcwö mörö onwongo tye na nyingë Anania n'öcadhö pwodho gin ki dhakö mërë Capira. 2 Ën okelo nget lim mörö both ëkwëna ëka ökanö lim nökëne nakun dhakö mërë thon ngeo. 3 Cë Petero okobo bothe ni, "Anania, pingö Catan opong i cwiny, ömiö itëmö bwölö Tipo Naleng nakun ikanö nget lim mökö n'öya ki i pwodhoni? 4 Pwodho nön onwongo ba obedo megi n'onwongo bara icadhö? Ëka kinge na dong icadhö ökö, onwongo ciling nön ba tye i twëroni? Ngö n'omii ithamö më timö koth gin-ni? In ba ibwölö dhanö ëntö ibwölö Obanga." 5 i karë n'Anania owinyo köp ni, ën opodho piny ëka öthöo ökö cüth. Cë thwön lworo ömakö jö kibëc n'owinyo ngö n'ötimërë. 6 Cë ëthinö awope obino gini anyim, eboo kome ki böngü, ëlabö yökö ëka eiko. 7 Kinge caa adek, dhakö mërë obino i öt, nakun ba ngeo ngö n'ötimërë. 8 Petero openyo ën ni, "Kob niina, man ënë wel na un k'Anania inwongo unu ki cadhö

pwodhowu?" Ën ögamö ni, "Eyo, wel mërë ënön." 9 Petero okobo ninë ni, "Un itwërö ribërë kanya acël më bwölö Tipo ka Rwoth ningö? Nën, kö tyën jö n'oiko cworu tye i dholokek, in thon ebino laböni yökö." 10 i caa nön cücuth ën opodho i ka tyën Petero cë öthöo ökö. Cë ëthinö awope nön obino ödönyö i öt ëka önönö gini ni ën öthöo ökö, gin otingo ëka ëlabö eiko i nget cwörë. 11 Thwön lworo ömakö jö n'oye Kiricito kibëc ëka jö kibëc n'owinyo ngö n'ötimërë. 12 Ëkwëna otio gini anyuth më tango ëka gin më aura na pol i kin jii. Ëka jö n'oye Yecu kibëc onwongo marö gini ribërë kanya acël i tyën öt ka Colomon. 13 Ëntö ngat mörö ope n'öparö më ribërë ködgi, kadri bed ni jii onwongo wörögi rwök. 14 Cë jö n'oye Rwoth welgi ömëdërë, cwö ëka mon. 15 Na calö adwogi më tic k'ëkwëna, jii okelo etwoe i wanga yoo cë epyelögi i wi ëtana ëka i kom ökëka gini, ëk ka Petero wok i ngetgi, tipo mërë owok i kom jö mökö ki kin-gi. 16 Lwak thon öcökërë gini ki i peci n'ögürö Jerucalem nakun kelo gini etwoe ëka jö na tipo na reco yelögi, cë gin kibëc öcang ökö. 17 Cë Alamdhök na Dit ëka jö na ën tio ködë n'onwongo obedo gini dul k'Ecadukayo, nyeko ömakögi rwök. 18 Cë gin dong ömakö ëkwëna ëka ekethögi i buc. 19 Ëntö malaika ka Rwoth obino kiwor, öyabö dholokek më buc, ëka okelo ëkwëna yökö cë okobo niggi ni, 20 "Apë icung unu i dyekal öt k'Obanga ëk ikob unu ni jii köp më kwö na nyen ni." 21 i karë na gin owinyo köp ni cë ödönyö gini i dyekal öt k'Obanga na piny dong ruu ëka öcakö gini pwonyo jii. i karë n'Alamdhök na Dit ëka jö na tio ködë othuno, gin ocwodo athuko më öd okiko k'edong k'Eyuda kibëc, n'ömëdërë k'ëtëla ka jö Icarael. Cë gin ooro jö mökö i buc më kelo ëkwëna. 22 Ëntö i karë na jö n'eorogi othuno i buc, onwongo gini ëkwëna ope. Gin ödök cen ëka okobo ni, 23 "Wan enwongo dholokek më buc ocegere, n'acikari ocung gini yökö, ëntö i caa na wan ëyabö dholokek, enwongo ngat mörö ope ië." 24 i karë na dit acikari më öt k'Obanga ëka ëlamdhök na dito owinyo köp ni, thamagi ocung ökö nakun uro gini kite na köp ni kibëc bino thum ködë. 25 Cë ngat mörö othuno ëka okobo ni, "Cwö na un iketho i buc ocung gini i dyekal öt k'Obanga, tye ka pwonyo gini jii." 26 i caa nön, adit acikari më öt k'Obanga ëka jö na ën tio ködë öcidhö gini ëka ekelo ëkwëna. Gin ba otio ki tükö piën gin onwongo lworo ni jii twërö celögi ki kite. 27 i karë n'ekelo ëkwëna i nyim athuko më öd okiko k'edong, ëk Alamdhök na Dit openygi. 28 Ën okobo niggi ni, "Wan ëmiöwu cik na tük ëk kür ipwony unu ki nying ni. Nën ngö na dong un itimö! Ibodo unu ka pwony i Jerucalem kibëc, ëka itye unu ka moko më miö remo

ka ngat ni bedo i wiwa." 29 Ēntō Petero ēka ēkwēna nōkēnē ōgamō gīnī nī, "Wan myero ewinyo Obanga na lōō winyo dhanō. 30 Obanga ka kwerewa ocerō Yecu na un ineko nakun ingabō unu ēn i kor yath ariā. 31 Obanga otingo ēn malō i nget cingē kucem i kabedo mē dheo na calō Atēla ēka Alar, ēk jō mē Icarael onwong gīnī karē mē ngut, cē ēn ōtīm nīgī kīca i kom balgī. 32 Wan ebledo ecaden mē jami nī ēka Tipo Naleng thon n'Obanga ōmiō both jō na winyo ēn." 33 Ī karē n'edong mē ōd okiko owinyo kōp nī, akēmō ōmakōgī rwōk, cē ōthamō gīnī mē neko ēkwēna. 34 Ēntō Aparicayo n'ecwodo nī Gamaliel, n'onwongo obedo apwony cik, na jīi kibēc onwongo wōrō, ōya malō i nyim athuko mē ōd okiko k'edong ēka ōmiō twērō nī ēk eter ēkwēna yōkō pī caa mōrō na nōnōk. 35 Cē ēn ōcakō twak kōdgi nī, "Jō mē Icarael, bēr īgwōkērē unu i ngō na un īmītō tīmō i kom jō nī. 36 Ī karē mōrō n'opoth anged, onwongo dhanō mōrō tye na nyingē Teyuda, n'oporo mē bedo ngat mōrō na pīrē tēk. Jō na rōmō mia angwēn obino ōrībērē kōdē, ēntō ebino eneko ēn ōkō, ēka ēlūbkōrē kibēc obino ōkēth gīnī ōkō cē manōn obedo ajiki ka jami kibēc. 37 Kinge manōn, Yuda mē Galilaya thon obino i karē mē kwanō jīi. Ēn onwongo ēlūbkōrē, ēntō ebino eneko ēn ōkō, ēka ēlūbkōrē kibēc obino ōkēth ōkō. 38 Dong pī kōp na tye kobedini, amīōwu thama nī, wēk unu jō nī ōcīdh gīnī, piēn ka yūb nī onyo tic nī obedo mē ka dhanō, cē bino jik. 39 Ēntō ka ōya kī both Obanga, cē un ba īrōmō unu jūkō jō nī, un thon ibino nwongo nī itye ka lwēny unu k'Obanga." Gīn ōgamō thama ka Gamaliel 40 ēka ecwodo ēkwēna i ōt ēk epwodgi nakun ēcīkōgī nī kūr dōkī ōtwak gīnī kī nying Yecu. Cē ēwēkōgī ōcīdhō. 41 Ēkwēna ōya kī i nyim athuko mē ōd okiko k'edong na cwinygi yom piēn Obanga ōkwanōgi nī opore gīnī mē nwongo lewic pī nying Yecu. 42 Nīnō kibēc gīn onwongo ba kengo pwonyo ēka tītō kōp mē Emuth na Bēr i dyekal ōt k'Obanga ēka ōt kī ōt nī Yecu ēnē Meciya.

6 Ī karē nōn na wel ēlūbkōr Yecu onwongo tye ka mēdērē, Eyuda n'oyeo Yecu na twakō gīnī lēb Girik ōcakō gīnī ngūngūta i kom Eyuda na twakō lēb lburu, piēn nīnō kibēc ka epoko cem mon thōō na mēgi ba ēparō pīrgī. 2 Cē ēkwēna apar ariō ocwodo gīnī ēlūbkōr Yecu kibēc ēka okobo gīnī nī, "Wan ēkwēna myero ebled i tic mē tītō kōp k'Obanga ēk kūr ebled i tic mē poko cem. 3 Pī manōn utmegona, yēr unu jō abirō kī kinwu n'ēwōrōgi, n'opong gīnī kī Tipo Naleng ēka tye gīnī kī ryēkō. Wan ebino miōgi tic nī. 4 Ēntō wan ebino mīrē mē lēga ēka tītō kōp k'Obanga." 5 Ngō na gīn okobo oyomo cwiny jīi kibēc, ēka gīn

ōyērō Citipwano, dhanō n'opong kī yee ēka kī Tipo Naleng, ēyērō thon Pilipo, Porokuro, Nikanori, Timon, Paramena, ēka Nikolac n'obedo dhanō mē Antiokia n'ōlōkērē i dini k'Eyuda. 6 Ekelo jō abirō nī i nyim ēkwēna, n'ōlēgō nakun ketho gīnī cing-gī i wigī. 7 Cē kōp k'Obanga ōmēdērē mē nya. Wel ēlūbkōr Yecu ōmēdērē rwōk i Jerucalem, ēka ēlamdhōk k'Eyuda na pol oyee gīnī thon. 8 Citipwano, n'Obanga ōmiō gum ēka kī tēkō, obedo ka tio gin mē aura ēka anyuth mē tango i kin jīi. 9 Ēntō i nīnō mōrō acēl, jō mōrō mē cinagoga ka jō n'ēgōnyōgi kī i opii, kanya acēl kī jō mōkō mē Cirene ēka mē Alegijandaria ēka jō n'ōya kī i lobo mē Cilicia ēka Acia, jō nī obedo ka pyem kī Citipwano, 10 ēntō gīn onwongo ba twērō pyem kī ryēkō ka Citipwano ēka kī Tipo Naleng n'onwongo ēn twak kōdē. 11 Cē gīn ōcakō cūpō jīi i mūng ēk okob gīnī nī, "Wan ewinyo Citipwano twak nakun kobo kōp mē ayeny i kom Muca ēka Obanga." 12 Cē gīn othuro jīi, edong ēka epwony cik mē dini. Ēka ēmakō Citipwano cē ekelo ēn i nyim athuko mē ōd okiko k'edong. 13 Gīn okelo ecaden n'obedo gīnī etwodo n'okobo nī, "Karē kibēc ēcwō nī twakō kōp na rac i kom kabedo na leng ēka i kom cik ka Muca. 14 Wan ewinyo ēn ka kobo nī Yecu nī mē Najaret bino balō kabedo nī ōkō ēka bino lōkō kit mē kwō na yam Muca ōmiōwa." 15 Jō kibēc n'onwongo obedo gīnī i athuko mē ōd okiko k'edong ōcīkō wang-gī i kom Citipwano, ēka ōnēnō gīnī terinyime na calō terinyim malaika.

7 Cē Alamdthōk na Dit openyo Citipwano ka ngō n'ekobo i kome tye atīr. 2 Citipwano ōgamō nī, "Utmegona kī jō ka bebena, winya unu! Obanga mē dheo onen both kwarō onu Abraam n'onwongo ēn pod tye i lobo Mecopotamia, na ēn bara obedo i lobo mē Aran. 3 Obanga okobo nīnē nī, 'Yaa īwēk loboni ēka kakani, ēk īcīdh i lobo na an abino nyutho nini.' 4 "Cē Abraam ōya ōwēkō lobo ka jō Kaladea ēka ōcīdhō obedo i lobo Aran. Kinge na dong apap mērē ōthōō, Obanga ooro Abraam i lobo nī kanya kobedini īkwō unu tē. 5 Ēntō Obanga ba ōmiō ēn obedo kī gin mōrō mē alea kadī kī ngōm mōrō na tītīdī. Ēn ōcīkērē kōdē nī lobo bino bedo mēgē ēka ēkwaē mērē kadī bed ēthīnō mērē pod ope. 6 Obanga thon ōtwak k'Abraam nī, 'Ēkwaēni bino bedo wele i lobo na ba obedo mēgi, ēka gīn bino bedo opii n'ebino yelogī pī mwaka mia angwēn.' 7 Ēntō Obanga okobo nī, 'Abino ketho pwod i lobo na gīn bino tic tē kamē opii, ēka i ajiki mērē gīn bino donyo yōkō kī i lobo nōn ēka wōra gīnī i kabedo nī.' 8 Cē Obanga ōmiō cikērē mē līrē. Ēka Abraam ōdōkō apap ka lcaka, ēn ōlīrō lcaka i nīnō mē aboro kinge nywōlō ēn. Kinge lcaka ōdōkō

apap ka Jakob, éka Jakob ödökó apap ka jö apar ariö me kaka jö Icarael. 9 "Adinga obino ömakö éthinö ka Jakob i kom ömín-gi Yocepu, éka öcadhö giní ën na calö opii both jö me Ejip. Éntö Obanga onwongo tye ki Yocepu 10 éka ölarö ën ki kom can kibéc. Obanga ömiö Yocepu gum éka ryékö i nyim Parao rwoth me Ejip. Parao thon ömiö Yocepu obedo alöc me Ejip éka pacö méré. 11 "Cé kec obino opodho i lobo Ejip kibéc éka lobo Kanaan, n'okelo thwön can, éka kwere onu onwongo ba twörö n'wongo cem mörö. 12 I karé na Jakob owinyo ní cem tye i lobo Ejip, ën ooro awope méré n'obedo kwere onu i woth na mëgi me acél. 13 I woth na mëgi me ariö, Yocepu okobo both utmego méré nga na ën ebedo, éka Parao ongeö köp i kom wede ka Yocepu. 14 Kinge man, Yocepu okobo ni ëk ekel apap méré Jakob éka jö me pacö méré kibéc, jö pyer abirö wie abic. 15 Cé Jakob öcidhö yo kupiny i lobo Ejip, kanya ën éka kwere onu öthöó ië. 16 Kom lyenegi ebino edwongo cen i Cekem éka epyelo i bur lyél n'Abraam onwongo öwölö ki wel ciling mörö ki both éthinö k'Amor ki i Cekem. 17 "Na calö karé onyingo na cwök n'Obanga myero ocob cikéré méré both Abraam, wel jö onu ki i lobo me Ejip ömédéré rwök. 18 Cé rwoth nökéñ, n'onwongo ba ngeo gin mörö i kom Yocepu, obino ödökö alöc me Ejip. 19 Ën ötimö tim na rac i kom jö onu, cé ömiö kwere onu ölimö can na thwöné rwök nakun diögi me bolo éthinö na pod énywölö anywöla ëk kür ökwö giní. 20 "I karé nön ëné énywölö ki Muca, ën onwongo obedo athin na leng both Obanga. Égwökö ën pi dwethe adek i öt k'apap méré. 21 I karé n'ebolo Muca, nyaka Parao ökwanyö ën éka ögwökö na calö athin méré. 22 Epwonyo Muca ki ryékö ka jö me Ejip kibéc éka ën onwongo tük i twak éka i tic méré. 23 "I karé na dong Muca othuno mwaka pyer angwën, ën öcakö bedo giní me cidhö limö utmego méré n'obedo éthinö me Icarael. 24 Ën önénö dhanö me Ejip acél ka tye ka makö dhanö me Icarael na rac, cé Muca öcidhö me könyö dhanö me Icarael nakun cülö kwor ki neko dhanö me Ejip. 25 Muca öthamö ni utmego méré twörö ngeo giní ni Obanga onwongo tye ka tic köde me larögi, éntö gin ba dök öniang. 26 I ninö na lübö manön, Muca obino onwongo jö me Icarael ariö tye ka lwëny. Ën ötëmö me thekogí nakun kobo ni, 'Ngö ni mütö unu wanéré ië nakun ibedo unu utmego?' 27 "Éntö ngat n'onwongo ömakö awodhe na rac othwaro Muca thenge éka okobo niné ni, 'Nga n'omii ni ibed alöc éka angöl-köpwa?' 28 In imütö nekona kite na woro ineko ki dhanö me Ejip köde?' 29 I karé na Muca owinyo köp ni, cé öngwécö ökö i lobo me Midian, kanya ën obedo ië na calö arok éka önywölö éthinö

awope ariö. 30 "Kinge na dong mwaka pyer angwën opoth ökö, Muca onwongo tye i thim n'onwongo cwök ki Kidi Cinai, cé Obanga onen bothe na cal ki malaika i bunga na lyél. 31 I karé na Muca önénö gin nön, obedo ki thwön ur rwök éka öcidhö na cwök i ngete, cé owinyo dwön Rwoth Obanga na kobo ni, 32 'An abedo Obanga ka kwereni, Obanga k'Abraam, Icaca éka Jakob,' cé kom Muca ömyél, l'woro ömakö éka ba dök ödiö cwinye me nönö. 33 "Cé Rwoth Obanga okobo both Muca ni, 'Göny wör ökö ki i tyeni, kabedo na in icung ië ni obedo ngöm na leng. 34 An dong anénö kite na jöga tye ka limö can köde i Ejip, atyeko winyo kokogi, éka atye ka bino dong piny me larögi. Bin dong ëk aori idök cen yo Ejip.' 35 "Man ëné Muca na gin obino ökwörö nakun kobo giní ni, 'Nga n'ömiö ni in ibed alöc éka angöl-köp?' Obanga ooro Muca me bedo alöc éka alar nakun owok ki both malaika n'onen bothe ki i bunga. 36 Muca ökwanyögi ki i lobo me Ejip nakun timö gin me aura éka anyuth me tango i lobo Ejip, i Nam na Kwar éka pi mwaka pyer angwën i thim. 37 "Man ëné Muca n'okobo both jö me Icarael ni, 'Obanga bino oro niwu adwarpiny na cal köda ki kin jö na mewu.' 38 Muca ëné onwongo tye kanya acél ki jö me Icarael i thim ki malaika n'ötwak köde ki i wi Kidi Cinai, éka ki kwere onu, cé ki kany nön Muca ögamö köp me kwö me köbö both onu. 39 "Éntö kwere onu ökwörö giní winyo ën. Gin ökwörö Muca éka ölökeré giní me dök cen i lobo me Ejip ki i cwinygí. 40 Gin okobo both Aron ni, 'Yüb niwa obanga na bino tölö nyimwa, piën Muca mörö ni, n'ötölö onu me yaa ki i lobo me Ejip, ba engeo ngö n'ötíméré bothe! 41 Manön ëné karé na gin öyübö ki cal jwök n'obedo calö athin thwön me awöra. Gin okelo tyérgi both athin thwön ni éka öcakö bedo giní ki yom cwiny i kom ngö na gin öyübö ki cing-gí. 42 Éntö Obanga ölökeré ökö cé ömiögi karé me wörö cér me polo na calö obangagi, kite na yam écöö köde i buk k'edwarpiny ni, "Un jö me öt Icarael, yam ityéro unu gin aryëda mörö me lee botha éka mic pi mwaka pyer angwën na un itye i thim? 43 Pathi ni kömanön, un itingo këma k'obanga Molek éka cér k'obangawu Repan, cal jwogi na un iyübö me awöra. Pi manön an abino terowu i opii naka i ngee Babilon.' 44 "Kwere onu yam tye ki këma me caden i thim me nyutho ni Obanga tye i kin-gí. Gin öyübö i kite n'Obanga onwongo onyutho ni Muca, na lüberé ki kite na ën önénö köde. 45 Kinge, kwere onu ögamö këma éka obino giní ki Yocua i karé na gin ömaö lobo ki both rok n'Obanga öryëmögi ökö ki i nyimgi. Këma obedo i lobo nön naka i karé ka Daudi. 46 Daudi onwongo gum ki both Obanga éka ökwaö ni ëk ëmïë egër öt

n'Obanga ka Jakob bedo ië. 47 Ëntö Colomon ënë ögërö öt n'Obanga. 48 "Kadi bed ni kōmanōn, Obanga na Malö Rwök ba bedo i öt n'ëgërö ki cing jö, kite na yam adwarpiny okobo ni, 49 "Polo ënë kabedo më löcna, ëka lobo ënë ka theno tyëna. Rwoth okobo ni, Koth öt mënë na un ibino gërö nina? Onyo ka yweona bino bedo kwene? 50 Pathi cinga ënë öyübö jami ni kibëc?" 51 "Un jö na ngutwu nwang, ical unu ki jö n'ökwërö Obanga ëka un ba ibino miö cwinywu më winyo köp k'Obanga. Un ical ki kwerewu: Un i karë kibëc ikwërö unu Tipo Naleng! 52 Adwarpiny mënë na kwerewu ba oyelo? Gin thon oneko jö na yam okobo köp cōn më bino ka Ngat na Kite Atir, na un iketho örörö i kome ëka ineko unu ökö. 53 Un jö n'ëmiöwu cik k'Obanga na yam emalaika okelo gini, cë ba ilübö unu." 54 I karë n'ëtëla k'Eyuda owinyo gini ngö na Citipwano okobo, akëmö ömakögi nakun kaö lakgi i kome. 55 Ëntö Citipwano opong ki Tipo Naleng, cë önëno malö i wi polo ëka önëno dheo k'Obanga na ryëny rwök, ëka Yecu n'ocung i nget cing Obanga kucem. 56 Cë Citipwano okobo ni, "Nën unu, anëno polo öyabërë ëka Wod ka Dhanö n'ocung i nget cing Obanga kucem." 57 Jö kibëc oumo ithgi ëka ëcakö wöö ki dwön na malö cë gin kibëc omukere i kome, 58 ëywaö Citipwano yökö i ngee pacö ëka ëcakö celo ën ki kite. Ecaden opyelo böng-gi i ka tyën awobi mörö na nyingë Caulo. 59 I karë n'etye ka celo Citipwano ki kite, ën ölëgö ni, "Rwoth Yecu gam tipona." 60 Cë Citipwano orumo cōngë piny ëka okok ni, "Rwoth kür iketh bal ni i komgi." I karë na ën okobo köp ni, cë öthöö.

8 Ëka Caulo onwongo tye kunön më miö caden i kom thöo ka Citipwano. I ninö nōn ayela na dit opodho i kom jö n'oye Kiricito na bedo gini i Jerucalem, ëka gin kibëc ökëth gini ökö ata i lobo më Yudea ëka Camaria cë ëkwëna kékën ënë odong. 2 Jö na wörö Obanga ënë oiko gini Citipwano, nakun kumo gini pirë rwök. 3 Ëntö Caulo onwongo mitö ni etyek jö n'oye Kiricito ökö, nakun wotho i öt ki öt na ywaö cwö thon ki mon më twenog i buc. 4 Jö n'oye n'onwongo ökëth gini i kabedo kibëc, ötitö gini köp k'Obanga. 5 Pilipo öcidhö yo kupiny i pacö mörö më lobo Camaria ëka ötitö nigä köp i kom Meciya kunön. 6 I karë na lwak na pol owinyo köp ka Pilipo ëka önëno gini anyuth më tango na ën otio, gin kibëc oketho cwinygi më winyo ngö na ën obedo kobo. 7 Tipo na reco odonyo gini yökö ki kom jö na pol nakun redo gini ki koko rwök, cë jö na pol na two akwea ömakögi ëka engwalo na mulo amula öcang gini ökö. 8 Cë yom cwiny na thwönë obedo i pacö

nōn. 9 Ëntö i pacö nōn onwongo tye ëcwö mörö na nyingë Cimon n'onwongo tio tic më jwöjwök, na jö Camaria onwongo uro ën rwök. Ën obedo ka wakërë ni ën ebeto ngat mörö na dit. 10 Jö kibëc më rwöm na malö ëka rwöm na piny oketho gini cwinygi i köp na ën kobo nakun kobo gini ni, "Ëcwö ni obedo tükö k'Obanga n'ecwodo ni 'Tükö na Dit.'" 11 Gin obedo ka ketho cwinygi më winyo köp mëre piën pi karë na lac ën obedo miögi uro tic mëre më tango më jwöjwök. 12 Ëntö i karë na gin oye köp më Emuth na Bër na Pilipo ötitö i kom ker k'Obanga ëka nyiny Yecu Kiricito, cë cwö naka thon ki mon ebaticagi. 13 Cimon thon oye, ëka ebatica ën. Ën öcakö lübö kör Pilipo i kabedo kibëc na cidhö yo ië nakun bedo ki ur na dit i kom anyuth ëka tango na dito na ën önëno. 14 I karë n'ëkwëna na tye i Jerucalem owinyo ni jö Camaria oye köp k'Obanga, gin ooro Petero ëka Jon bothgi. 15 I karë na gin othuno, öcakö gini lëga pirgi ëk gin onwong Tipo Naleng, 16 piën Tipo Naleng onwongo bara obino i kom ngat mörö ki kin-gi, ëntö yam ebino ebaticagi i nyiny Rwoth Yecu. 17 Cë Petero ëka Jon oketho cing-gi i komgi, ëka onwongo gini Tipo Naleng. 18 I karë na Cimon önëno ni Tipo Naleng ëmiö ka ëkwëna ketho cing-gi i kom jii, ën ömitö miögi ciling ëka okobo ni, 19 "Mia unu thon tükö ni, ëk ngat mörö na an abino ketho cinga i kome, onwong Tipo Naleng." 20 Ëntö Petero ögamö ni, "Ëk cilingni orweny ökö kanya acël kodi, piën in ithamö ni itwërö wilö mic k'Obanga ki ciling! 21 In ipe ki gin mörö n'epoko nini i kom köp ni, piën cwinyi ba tye n'atir i nyim Obanga. 22 Ngut ökö ki kom bal ni ëka ilëg both Rwoth, ëk ka twërë ën bino timö nini kica pi bedo ki koth thama ni i cwinyi. 23 Piën anëno cwinyi opong ki këc cwiny rwök, ëka idökö amabuc më bal." 24 Cë Cimon ögamö ni, "Lëg unu pira both Rwoth ëk gin mörö na un ikobo kür opodhi i koma." 25 I karë na dong otyeko kobo gini köp më caden ëka ki titö köp ka Rwoth, Petero ëka Jon ödök gini yo Jerucalem, nakun titö köp më Emuth na Bër i kin peci na pol ka jö Camaria. 26 Malaika ka Rwoth okobo both Pilipo ni, "Yaa malö icidhö yo kukwap i gudo thim na yaa ki i Jerucalem lungo piny yo Gaja." 27 Cë ën öcakö woth ëka oromo k'ëcwö më Ethiopia n'epudho, adit na pirë tük na löö lim ka Kandake kibëc, alöc na dhakö më lobo Ethiopia. Ëcwö ni onwongo öcidhö yo Jerucalem më wörö Obanga. 28 I karë na ën tye ka dök cen yo pacö, ën onwongo obedo i gadigadi nakun kwanö buk k'adwarpiny Icaya. 29 Cë Tipo Naleng okobo both Pilipo ni, "Apë na cwök, iwoth ki gadigadi nōn." 30 Ëka Pilipo öringö yo gadigadi, cë owinyo ka ën tye ka kwanö buk k'adwarpiny Icaya, ëka Pilipo

openyo ni, "In iniani ngö ni tye ka kwanö?" 31 En ögamö ni, "An atwëro niang ië ningö, ka ngat möro ope na gönyö nina?" Eka ocwodo Pilipo ek obed kanya acël ködë. 32 Dul na en onwongo tye ka kwanö ki i Cöc na Leng tye ni köman: "Epëö calö römö n'etero më angöla, eka na calö athin römö n'öliling i nyim anyar yer, cë en ba oelo dhögë. 33 Pi twëro mërë n'ëtürö ökö, ba engölö ninë köp atir. Nga na twëro twak pi ëkwaë mërë? Piën kwö mërë onwongo ëkwanyö ökö ki wi lobo." 34 Eëwö n'epudho openyo Pilipo ni, "Öma, kob nina, nga n'adwarpiny tye ka twak i kome, tye ka twak i kome kënë onyo i kom ngat nökenë?" 35 Cë Pilipo öcakö ki dul më Cöc na Leng nön eka okobo ninë Emuth na Bër i kom Yecu. 36 Na gin tye ka woth i gudo, othuno ginï kanya pii tye ië cë ëcwö n'epudho okobo ni, "Nën, pii ene! Ngö na gënga nwongo batica?" 37 Eka Pilipo okobo ninë ni, "Ka iyee ki cwinyi kibëc cë itwëro." En ögamö ni, "An ayee ni Yecu Kiricito ënë obedo Wod k'Obanga." 38 Eka en ömïö twëro ni ëk gadigadi ocung. Cë gin kibëc ödönyö ginï i pii, eka Pilipo obatica en. 39 I karë na gin donyo malö ki i pii, cë Tipo ka Rwoth otero Pilipo ökö athura, eka ëcwö n'epudho ba dök önënö Pilipo, ëntö en ömëdërë ki woth mërë ki yom cwinyi. 40 Eëntö Pilipo onwongo ni etye i Ajota nakun wowotha më titö köp më Emuth na Bër i kin peci kibëc naka othuno i Cecaria.

9 Eëntö, Caulo onwongo pod büro ëlübör Rwoth nakun mitö nekogï. En öcidhö both alamdhök na dit 2 eka openyo pi waraga më cidhö ködë i cinagoga kibëc na tye i Damaciko, ek ka ebino nwongo jö na lübö yoo ka Rwoth kunön cwö onyo mon, ekelgi na calö emabuc yo Jerucalem. 3 I karë na en tye ka woth, na dong cwök ki Damaciko, cë tar obino ki i polo athura eka öryëny öcarö kome. 4 En opodho i ngöm eka owinyo dwön na kobo ninë ni, "Caulo, Caulo, pingö itye ka yelona?" 5 Caulo openyo ni, "In inga Rwoth?" Cë Rwoth ögamö ni, "An Yecu na in itye ka yelo. 6 Kobedini yaa malö, idöny i pacö, cë ebino kobo nini gin na myero itim." 7 Jö n'onwongo tye i woth ködë ocung ginï aliling, gin owinyo dwön nön, ëntö ba önënö ginï ngat möro. 8 Caulo öya malö ki piny, ëntö i karë na en öyabö wangë, onwongo ba römö nënö gin möro. Cë gin öpëö en apëa ki cingë më tero i Damaciko. 9 Pi ninö adek en onwongo ba römö neno, ba cemo onyo ba madhö gin möro. 10 I Damaciko onwongo tye alübör Yecu na nyینگë Anania. Rwoth ötwak ködë i anyuth nakun cwodo ni, "Anania!" En ögamö ni, "Eyo Rwoth." 11 Rwoth okobo ninë ni, "Cidh i öt ka Yuda na tye i Yoo n'Ocung Atir,

eka ipeny pi ëcwö na nyینگë Caulo më Taruco, en kobedini tye i lëga. 12 I anyuth en önënö ëcwö möro na nyینگë Anania ka dönyö bothe më ketho cingë i kome ek wangë öyabërë." 13 Anania ögamö ni, "Rwoth, awinyo köp na pol i kom dhanö ni eka ki gin na reco na en obedo ka timö i kom jö k'Obanga na leng na tye i Jerucalem. 14 Eka en obino kany ki twër n'öya ki both ëlamdhök na dito më makö jö kibëc na cwodo ginï nyingi." 15 Eëntö Rwoth okobo both Anania ni, "Cidhi! Caulo obedo ngat na an ayëro më tero nyinga both Erok ki rwodhigi eka both jö më Icarael. 16 An abino nyutho ninë can na thwönë na myero en ödang pi nyinga." 17 Cë Anania öcidhö ödönyö i öt na Caulo tye ië, oketho cingë i kome eka okobo ninë ni, "Ömëra Caulo, Rwoth Yecu n'onnyuthere bothi i wanga yoo n'onwongo in itye ka bino yo kany, oora bothi ni ëk wangi öyabërë inën piny dökï, eka ipong ki Tipo Naleng." 18 Cücüth gin möro na cal ki pök réc opodho ki i wang Caulo cë öcakö neno. En öya malö eka ebatica. 19 Kinge camö cem möro cë tükö mërë odwogo. Caulo obedo kanya acël k'ëlübör Yecu i Damaciko pi ninö na nönök. 20 Cë cücüth öcakö titö i cinagoga kibëc ni Yecu obedo Wod k'Obanga. 21 Jö kibëc n'owinyo köp mërë ouro ginï eka openyo ginï ni, "Pathi ëcwö ni ënë yam okelo ayela i Jerucalem i kin jö na cwodo nying Yecu? Eka en ba obino kany më terogï both ëlamdhök na dito na calö emabuc?" 22 Titö köp ka Caulo ömëdërë amëda më bedo na tük, naka Eyuda na bedo i Damaciko wigï ocung ökö, piën en onyutho atir ni Yecu ënë Meciya. 23 Kinge na ninö na pol opoth, Eyuda mökö öyübërë ginï më neko en. 24 Eëntö Caulo onwongo öniang i kom yüb na mëgi. Kiceng eka kiwor gin obedo ka kürö dhö wangkac më neko en. 25 Eëntö i kiwor, ëlübörë otingo en eka elwao piny k'adita ki kany möro na thwolo ki i kom cël. 26 I karë na Caulo othuno i Jerucalem, en ötëmö më rïbërë k'ëlübör Yecu, ëntö gin kibëc onwongo lworo en nakun ba yee ginï ni en dong obedo alübör Yecu. 27 Cë Baranaba okelo en both ëkwëna eka okobo nigï kite na Caulo önënö ki Rwoth ködë i wanga yoo më Damaciko. Baranaba okobo nigï thon ngö na Rwoth okobo ni Caulo eka kite na en opwonyo ködë abonge lworo ki nying Yecu i Damaciko. 28 Cë en dong obedo ködgi kanya acël nakun wowotha eka twakö nying Rwoth abonge lworo i Jerucalem. 29 En ötwak eka opyem k'Eyuda mökö na twakö lëb Girik, ëntö gin ötëmö më neko en. 30 I karë na utmeogo ongeog ginï köp ni, gin otero Caulo i Cecaria, eka eoro en yo Taruco. 31 Cë jö n'oye Kiricito kibëc na tye i lobo Yudea, i Galilaya, eka i Camaria obedo ginï ki kuc. Ömëdërë ginï ki

dongö na welgi thon medêrê nakun lûbö ginî yoo mê lworo Rwoth, êka Tipo Naleng obedo jingö cwinygi. 32 ĩ karê nön, Petero owotho ĩ kabedo kibêc, êka ĩ woth mêrê nön ên örwaterê kĭ jô k'Obanga na leng na bedo ginî ĩ Lida. 33 Kĭ kunön ên onwongo êcwö mörö na nyingê Ainea, n'onwongo tye kĭ two akwea êka obedo ka buto abuta ĩ wi êtana pĭ mwaka aboro. 34 Petero okobo ninê nĭ, "Ainea, Yecu Kiricito ôcangö twoni ôkö, yaa malö, 'iddöl kabutoni." Cücüth, ên ôya malö. 35 Jô kibêc n'onwongo bedo ginî ĩ Lida êka Caron ôñênö ginî ên cê ôlökêrê ginî both Rwoth. 36 ĩ Jopa onwongo tye alûbkör Yecu na dhakö na nyingê Tabica (na ka êgönyö ĩ lëb Girik tyênê nĭ Dokac). Ên onwongo obedo ka tio tic na bêcö êka kõnyö êcan. 37 ĩ karê nön, two ômakö cê ôthöô ôkö. Êka êlwökö kome, cê epyelo ĩ ôt na malö. 38 ĩ karê n'êlûbkör Yecu owinyo ginî nĭ Petero onwongo tye ĩ Lida na cwök kĭ Jopa, cê ooro ginî jô ariö bothe mê cĭdhö kwaö ên nĭ, "Tim bër, ibin bothwa piöpiö." 39 Cê Petero ôya malö êka ôcĭdhö ködgi. ĩ karê na ên othuno, etero ên ĩ ôt na malö. Ôt onwongo opong kĭ mon thöô n'onwongo tye ka kok êka nyutho ginî böng-gĭ na Dokac obedo ka yûbö nigĭ. 40 Êntö Petero okobo nĭ jô kibêc mê dönyö yökö, cê ên orumo cöngê piny êka ôlêgö. Ên ôlökêrê both athöô cê okobo ninê nĭ, "Tabica, yaa malö." Êka Tabica ôyabö wangê! ĩ karê na ên ôñênö Petero, ôya malö cê obedo abeda! 41 Petero ômakö cĭngê cê otingo ên malö. Ên ocwodo mon thöô êka jô k'Obanga na leng kibêc cê onyutho ên na kwö bothgi. 42 Emuth nĭ ôkêth ôrômö lobo Jopa kibêc êka jô na pol oyee ginî ĩ kom Rwoth. 43 Petero obedo ĩ Jopa pĭ ninö na pol ĩ pacö k'anyöng löö na nyingê Cimon.

10 Yam onwongo êcwö mörö tye ĩ Cecaria na nyingê Korineliö, adit mê dul acikari n'ecwodo nĭ mê Itali. 2 Ên onwongo ôdyêrê êka lworo Obanga kĭ jô mê ôdê kibêc. Ên onwongo thon miö jami na pol mê kõnyö êcan, êka lëgö both Obanga jwiwi. 3 ĩ ninö mörö acêl ĩ kin caa abungwên mê kothyeno, ên ôñênö malaika k'Obanga ĩ anyuth n'obino bothe êka okobo nĭ, "Korinelio!" 4 Korineliö ôcikö wangê bothe kĭ lworo, cê okobo both malaika nĭ, "Adwong, kob nĭna ngö nĭ miö." Malaika ôgamö nĭ, "Lëgani kĭ mic mê kõnyö êcan othuno malö both Obanga, ômiö ên opo piri. 5 Kobedi dong or cwö mörö yo Jopa êk ôcĭdh okel ginî êcwö na nyingê Cimon n'ecwodo nĭ Petero. 6 Ên bedo ĩ pacö ka Cimon anyöng löö, na ôdê tye ĩ dhö nam." 7 ĩ karê na malaika n'ôtwak ködê ôcĭdhö ôkö, Korineliö ocwodo etic mêrê ariö êka acikari acêl n'ôdyêrê kĭ kin jô na gwökö ên. 8 Ên okobo nigĭ köp kibêc n'ôtimêrê êka oorogĭ yo Jopa.

9 Kodiko mêrê na caa abicêl dong cwök, n'êkwêna ka Korineliö tye ĩ wothgi na dong cwök dönyö ginî ĩ pacö, Petero ôidhō ĩ wi ôt malö mê cĭdhö ĩ lëga. 10 Kec ôcakö neko ên, nakun mitö nĭ êcam gin mörö, êntö onwongo pod êyübö cem ayüba cê ôcakö nêñö anyuth. 11 Ôñênö polo ôyabêrê êka gin mörö na cal kĭ cûka na thwönê obino piny nakun tye kĭ thwoke angwên. 12 ĩ cûka nön onwongo tye tē kwa leeni na tyên-gĭ angwên, leeni na wotho ĩ ngöm kĭ korgĭ, êka kĭ winy na ngwêcö kĭ malö. 13 Cê dwön mörö obino bothe nakun kobo ninê nĭ, "Petero yaa malö, inek, êka icam." 14 Êntö Petero ôgamö nĭ, "Rwoth pathĭ nĭ kômanön, piën an anaka yam bara acamö gin mörö n'obedo mê kwer onyo na ba leng." 15 Dwön dôki ôtwak ködê wang mê ariö, "Kür icwod gin mörö nĭ ba leng n'Obanga ômiö ôdökö na leng." 16 Man ôtimêrê wang adek, cê cücüth gin nön êdwökö ôkö ĩ wi polo. 17 ĩ karê na Petero onwongo pod tye ka uro tyên köp mê anyuth na ên ôñênö, cwö na Korineliö oorogĭ onwongo ginî ôt na Petero tye tē, cê ocung ginî ĩ dhö wangkac. 18 Gin ôcakö cwodo, nakun penyo ginî ka Cimon n'ecwodo nĭ Petero bedo kany nön. 19 ĩ karê na Petero pod tye ka thamö ĩ kom anyuth na ên ôñênö, Tipo Naleng okobo ninê nĭ, "Petero, cwö adek tye ka rangöni. 20 Yaa malö, icĭdh piny iwoth ködgi. Kür ikwêr mê woth ködgi, piën an aorogĭ." 21 Petero ôcakö cĭdhö piny êka okobo both cwö nön nĭ, "An ênê ngat na un itye ka rangö. Tyên köp ngö n'ômiö un ibino?" 22 Gin ôgamö nĭ, "Wan êya kĭ both Korineliö n'obedo adit acikari mê Roma. Ên obedo dhanö na kite atĭr êka lworo Obanga, na jô kibêc n'obedo Eyuda wörö. Malaika na leng okobo ninê nĭ êk ocwodi icĭdh ĩ ôdê, êk ên owiny ngö na in ĩrômö kobo." 23 Cê Petero ocwodogĭ êka oterogĭ ĩ ôt mê bedo wele mêrê. Kodiko mêrê Petero ôcakö woth ködgi, êka utmegö mökö kĭ ĩ Jopa owotho ködgi. 24 ĩ ninö na lûbö manön gin othuno ĩ Cecaria. Korineliö onwongo tye ka kürögĭ êka onwongo ocwodo wede êka nyikonei mêrê kibêc na cwök ködê. 25 ĩ karê na Petero tye ka dönyö ĩ ôt, Korineliö oromo ködê êka opodho oryebere piny ĩ tyênê mê wörö ên. 26 Êntö Petero otingo ên malö nakun kobo nĭ, "Yaa malö icung, an thon abedo dhanö adhana kamê in." 27 Petero obedo ka twak kĭ Korineliö êka ôdönyö ĩ ôt cê onwongo jô na pol n'ôcökêrê ginî. 28 Ên ôcakö kobo nigĭ nĭ, "Un kibêc ingeo nĭ cik ba yeo nĭ êk Ayuda mörö ôribêrê k'Arok mörö, kadĭ thon thuno bothe, êntö Obanga dong otyeko nyutho nĭna nĭ kür acwod dhanö mörö nĭ ba opore onyo nĭ ba leng. 29 ĩ karê n'ecwoda, an abino na ba akwêrö. An apenyi, kob nĭna pingö icwoda?" 30 Êka Korineliö ôgamö nĭ, "Ninö

angwën n'opoth ancec, an onwongo atye i lëga i öda i koth caa ni, caa abungwën më kothyeno. Athura êcwö mörö n'oruko böng na ryëny ocung i nyima 31 êka okobo ni, 'Korinelio, Obanga otyeko winyo lëgani êka opo pi micni na in imiö both êcan. 32 Kobedi dong or jö mörö yo Jopa both Cimon n'ecwodo ni Petero. Ên obedo welo i pacö ka Cimon n'obedo anyöng löö na bedo i dhö nam.' 33 Cë aoro jii ökö cücüth, êka in thon itimö bër më bino. Kobedini wan kibëc etye kany i nyim Obanga më winyo köp kibëc na Rwoth öcikä bothi më kobo niwa." 34 Cë Petero öcakö twak na kobo ni, "An dong aniang adyer ni Obanga kara ba poka kin dhanö 35 êntö yeo jö kibëc më rok na papath na lworo ên êka tio gin na tye atir. 36 Un ingeo köp na yam Obanga ooro both jö më lcarael, nakun titö nigü Emuth na Bër më kuc na bino pi Yecu Kiricito na ên Rwoth ka jö kibëc. 37 Un ingeo ngö n'ötümërë i Yudea kibëc, cakërë kî i Galilaya kinge batica na Jon ötitö 38 kite n'Obanga owiro Yecu më Najaret kî Tipo Naleng êka tükö. Cë Yecu owotho i kabedo kibëc na tio tic na bëcö êka cangö jö kibëc n'onwongo Catan yelögi, piën Obanga onwongo tye ködë. 39 "Êka wan êkwëna ebodo ecaden më jami kibëc na ên ötimö i lobo k'Eyuda êka i Jerucalem. Gin oneko ên n'eguro agura i kor yath aria, 40 êntö Obanga ocero ên kî kin jö n'öthöö i ninö më adek êka ömiö ên onen, 41 jö kibëc ba önënö ên, êntö onen bothwa wan jö n'Obanga onwongo öyëro cön më bedo ecaden mërë. Wan ênë jö n'ocemo êka emedho ködë i karë na ên ocer kî kin jö n'öthöö. 42 Êka öcüköwa më cidhö titö köp i kabedo kibëc êka më miö caden ni Yecu ênë ngat n'Obanga öyëro më bedo angöl-köp ka jii kibëc, jö na kwö kî jö n'öthöö. 43 Edwarpiny kibëc miö caden i kome ni ngat acélacél na yee i kome ebino timö kica i balgi kî nyiing Yecu." 44 Na Petero pod tye ka twakö köp ni, Tipo Naleng opye i kom jö kibëc n'onwongo tye ka winyo köp mërë. 45 Eyuda n'oye n'ëlirogü n'owotho ginü kî Petero obedo kî ur ni mic më Tipo Naleng ëmiö thon both Erok. 46 Piën gin owinyogü ka twakö lëb na papath êka pakö ginü Obanga. Cë Petero okobo ni, 47 "Ngat mörö tye na römö jükö ni kür ebatica jö ni kî pii? Gin dong otyeko nwongo Tipo Naleng kite na onu thon enwongo ködë." 48 Cë ên ömiö twërö ni gin myero ebaticagü kî nyiing Yecu Kiricito. Cë gin ökwaö Petero më bedo bothgi pi ninö mörö na nönök.

11 I karë nön êkwëna êka utmego na tye ginü i Yudea owinyo ginü ni Erok thon oyeo köp k'Obanga. 2 Êntö i karë na Petero öcidhö naka i Jerucalem, dul ka jö n'ëlirogü n'oye Yecu öcakö kobo

ni ên ötimö gin na rac 3 nakun kobo ginü ni, "In icidhö both jö na ba ëlirogü êka icemo ködgi." 4 Cë Petero öcakö kobo nigü ngö n'ötümërë körë kî körë. 5 "I karë n'onwongo atye i lëga i Jopa, anënö gin anyutha. An anënö gin mörö n'obino piny kî wi polo na cal kî cüka na thwönë i wang lek, nakun bino piny na tye kî thwoke angwën, cë obino naka piny i nyima. 6 I karë na an aripö kom cüka, anënö leeni na tyën-gü angwën, leeni më thim, leeni na wotho i ngóm kî korgü êka winy na ngwëcö kî malö. 7 Cë awinyo dwön mörö na kobo ni, 'Petero, yaa malö, inek êka icam.' 8 "Êntö an agamö ni, 'Rwoth pathi ni kōmanōn, piën gin mörö më kwer onyo na ba leng anaka yam bara ödönyö i dhöga.' 9 "Dwön öcakö twak kî i polo wang më arü ni, 'Kür icwod gin mörö n'Obanga ömiö ödökö na leng ni ba leng.' 10 Man ötimërë wang adek cë jami nön kibëc ëdwökö ökö yo wi polo. 11 "I caa nön cücüth, ênë jö adek n'eorogü kî i Cecaria othuno ginü ködë i öt n'onwongo an abedo ië. 12 Tipo Naleng öcakö kobo ni awoth ködgi kür akwër. Utmego abicél thon owotho ginü köda êka wan ëdönyö i öt k'ëcwö nön. 13 Ên okobo niwa kite na ên önënö kî malaika ka bino bothe i ödë êka okobo ni, 'Or jö mörö yo Jopa êk öcidh ocwod ginü Cimon n'ecwodo ni Petero. 14 Ên bino kelo nini köp na in êka kî jö kibëc më pari bino larë.' 15 "I karë na an acakö twak, Tipo Naleng opye i komgi kite na cön öcakö pye ködë i komwa i acaki. 16 "Cë apo i kom ngö na Rwoth okobo cön ni, 'Jon yam batica jii kî pii, êntö un ebino baticawu kî Tipo Naleng.' 17 Ka cë Obanga ömiögü mic na röm kî man ömiö onu jö n'eyee i kom Rwoth Yecu Kiricito, cë an döki abedo nga na myero apyem k'Obanga?" 18 I karë n'owinyo ginü köp ni, gin dong ölling alinga êka öcakö ginü pakö Obanga nakun kobo ginü ni, "Wan ênënö ni Obanga oyeo n'Erok thon më ngut kî kom balgi êka më nwongo kwö." 19 Jö na yam ökëth i karë më ayela n'obino öcakërë kinge thöä ka Citipwano, obino öcidhö ginü naka i Poiniki, Caiprac êka Antiokia, nakun pwonyo ginü köp k'Obanga both Eyuda këkën. 20 Êntö jö mökö kî kin-gü, n'öya kî i Caiprac êka Cirene obino öcidhö ginü yo Antiokia cë öcakö ginü twak kî jö Girik nakun titö nigü Emuth na Bër i kom Rwoth Yecu. 21 Tëkö ka Rwoth Obanga onwongo tye ködgi êka wel Erok na pol oye cë ölökerë ginü both Rwoth. 22 Emuth ni owinyere both jö n'oye Kiricito na tye ginü i Jerucalem êka gin ooro Baranaba yo Antiokia. 23 I karë n'othuno êka önënö tic më kica k'Obanga, ên obedo kî yom cwiny cë öcükö cwinygü më cung na tük i kom Rwoth kî cwinygü kibëc. 24 Baranaba onwongo obedo dhanö na bër n'opong kî Tipo Naleng êka yee cë ömiö wel

jō na pol obino gīnī both Rwoth. 25 Cē Baranaba ōcīdhō yo Taruco mē rangō Caulo. 26 Ī karē na ēn onwongo, ōcakō kelo ēn yo Antiokia. Baranaba kī Caulo obedo kanya acēl kī jō n'oye Kiricito pī mwaka acēl kŭlŭ nakun pwonyo gīnī jō na pol. Nyīng ēlŭbkōr Yecu ēcakō cwodo nī Ekiricito kī ĩ Antiokia. 27 Ī karē nōn edwarpīny mōkō ōya kī ĩ Jerusalem obino gīnī yo Antiokia. 28 Ngat acēl kī kin-gī na nyīngē Agabu ocung cē okobo kōp na Tipo Naleng onyutho nīnē nī wang mōrō kec bino podho ĩ wī lobo thŭkŭl. (Man ōtīmērē ĩ karē mē lōc ka Kalaudio.) 29 Ēlŭbkōr Yecu ōcakō moko thamagī nī myero eter kōny both utmego na bedo gīnī ĩ Yudea, nakun ngat acēlacēl mīō na lŭbērē kī tēkō mērē. 30 Gīn ōtīmō nī kōmanōn, ēka ooro gīnī Caulo gīn kī Baranaba mē tero mīcgi both edong ka jō n'oye Kiricito na tye ĩ Jerusalem.

12 Ī karē nōn rwoth Erode ōcakō makō jō mōkō kī kin jō n'oye Kiricito. 2 Ēn oneko Yakobo ōmīn Jon kī pala abadē. 3 Ī karē na ēn dong ōnēnō nī oyomo cwiny Eyuda, ēn ōmēdērē kī makō Petero thon. Man ōtīmērē ĩ karē mē Kwer mē Ogati na Thōbī ope iē. 4 Kīngē makō Petero, oketho ēn ĩ buc, ēka ēmīō ēn ĩ cīng ēkŭrpīny na tye gīnī jō angwēnangwēn ĩ dul angwēn. Erode ōthēna mē kelo Petero ĩ nyim lwak ēk ētēm pido kōp ĩ kome kīngē nīnō mē Poth. 5 Ēntō ĩ karē na Petero tye ĩ buc, jō n'oye Kiricito obedo ka mēdērē gīnī kī lēga both Obanga pīrē. 6 Ī kīwor mērē na dong myero Erode okel ēn ĩ nyim okiko mē atēma, Petero onwongo obuto pīny n'ōnīnō ĩ kin acikari arīō, nakun etweo ēn kī jēgēlē arīō, ēka jō na kūrō pīny thon onwongo tye ka kūrō dholokek mē buc. 7 Athura, malaika ka Rwoth onen ēka tar ōryēny ōcarō ĩ buc. Ēn odhongo lak nget Petero ēka ocoo ēn ōkō, nakun kobo nīnē nī, "Yaa malō pīōpīō!" Cē jēgēlē opodho ōkō kī ngut cīngē. 8 Cē malaika okobo nīnē nī, "Ruk bōngŭni ēka wori." Ēka Petero ōtīmō nī kōmanōn. Malaika dōk okobo nīnē nī, "Kac cŭkani ĩ komi ēka ĩlŭb kōra." 9 Ēka Petero ōcakō lŭbō kōrē yo yōkō kī ĩ buc, ēntō ēn onwongo ope kī thama mōrō kēkēn nī gīn na malaika tye ka tīmō onwongo tye ka tīmērē adyer, ēn onwongo thamō nī etye ka nēnō gīn anyutha ĩ wang lek. 10 Gīn ōkadhō ēkŭrpīny mē acēl ēka mē arīō cē obino gīnī naka ĩ dholokek nywenyo na wok cīdhō yo pacō. Dholokek ōcakō yabērē kēnē nigī, ēka owok gīnī kī ĩ iē. Ī karē na gīn dong owotho othuno ĩ gudo, malaika ōcakō wēkō Petero ōkō athura. 11 Ēka Petero ōcakō nīang kēnē nakun kobo nī, "Kobedi dong anīang atīr nī Rwoth ooro malaika mērē mē larōna kī ĩ cīng Erode, ēka kī kom gīn na kībēc n'Eyuda ōnēnō gīnī nī bino tīmērē ĩ

koma." 12 Ī karē na ēn dong ōnīang na bēr, ōcakō cīdhō ĩ ōt ka Maria aya ka Jon n'ecwodo thon nī Marako, kanya jō na pol onwongo ōcōkērē gīnī iē, ēka tye gīnī ĩ lēga. 13 Petero ōdwōngō dholokek mē wangkac na dōnyō ĩ pacō, ēka atic mē pacō nōn na nyīngē Roda obino yo bothe mē yabō dholokek. 14 Ī karē na ēn ōnīang ĩ dwōn Petero, cwinye obedo na yom rwōk, ōcakō ngwēc ōdōk cen na ba ōyabō dholokek ēka okobo nigī nī, "Petero tye ocung ĩ dholokek yōkō!" 15 Gīn okobo nīnē nī, "In wii ba tio." Ēntō ĩ karē na ēn ōkwērō nī tye atīr, gīn ōcakō gamō nīnē nī, "Manōn twērō bedo malaika mērē." 16 Ēntō Petero ōmēdērē kī dwōngō dholokek, ēka na gīn ōyabō dholokek ōnēnō gīnī ēn, cē gīn obedo kī ur rwōk. 17 Ēka Petero ōcakō jŭkōgī kī cīngē nī ēk ōlīng gīnī ōkō, cē ōcakō kobo nigī kite na Rwoth ōkwanyō ēn kōdē yōkō kī ĩ buc, ēka dōk okobo nigī nī, "Kob unu nī Yakobo ēka utmego nōkēnē ngō n'ōtīmērē." Cē ōcakō yaa ōcīdhō yo kany ōkēnē. 18 Kodiko na pīny oru, arubaruba obedo tye ĩ kin acikari na rac, pī gīn n'ōtīmērē ĩ kom Petero. 19 Kīngē n'Erode ōmīō twērō mē rangō Petero kī tēk cē ba onwongo, ōcakō penyo ēkŭrpīny ēka ōmīō twērō nī ēk enekgi ōkō. Cē Erode ōya kī ĩ Yudea ōcīdhō ĩ Cecaria ēka obedo kunōn pī karē mōrō na nōnōk. 20 Erode obedo ka dhaa kī jō mē Turo ēka Cidon cē ōcōkērē gīnī kanya acēl mē bino twak kōdē. Ka gīn onwongo twērō kī both Blacito, atic ka rwoth n'egeno, gīn openyo Erode nī ēmīō gīnī kuc, piēn lobogī jengere ĩ kom lobo ka rwothgī pī cem n'ekelo nigī. 21 Ī nīnō n'emoko, Erode onwongo oruko ruk mē ker mērē, cē ōcīdhō obedo ĩ wī then ker mērē ēka ōcakō twak kī lwak. 22 Lwak ōcakō redo kī wōō rwōk nī, "Man ēnē dwōn obanga, pathī mē dhanō." 23 Cŭcŭth, malaika ka Rwoth ōmīō ēn otwore piēn ba ōmīō dheo both Obanga ēka kudi ōcakō camō kome cē ōthōō ōkō. 24 Ēntō kōp k'Obanga ōmēdērē amēda mē nya. 25 Ī karē na Baranaba gīn kī Caulo otyeko gīnī tic n'eorogī iē, cē ōdōk gīnī ĩ Jerusalem, nakun wotho gīnī kanya acēl kī Jon n'ecwodo nī Marako.

13 Jō n'oye Kiricito na tye gīnī ĩ Antiokia onwongo tye k'edwarpīny ēka epwonye na nyīng-gī: Baranaba, Cimeon n'ecwodo nī Niga, Lucio mē Cirene, Manaen (n'ōdōngō kanya acēl k'Erode n'obedo alōc) ēka Caulo. 2 Ī karē na gīn tye ĩ lēga mē wōrō Rwoth ēka kī rio kec, Tipo Naleng okobo nigī nī, "Yēr nīna unu Baranaba gīn kī Caulo pī tic na an acwodogī iē." 3 Kīngē na gīn dong otyeko lēga ēka kī rio kec, oketho gīnī cīng-gī ĩ komgī ēka eorogī mē cīdhō tio tic k'Obanga. 4 Ī karē na Tipo Naleng oterogī, gīn ōcīdhō yo dhō nam ĩ Celecia. Gīn ōya kī kunōn, ōkwang gīnī

naka i cula nam me Caiprac. 5 I karé na gin othuno i ni én ötim.' 23 "Ki kom ékwaé ka Daudi, Obanga Calamic, öttö giní kóp k'Obanga i cinagoga k'Eyuda kibéc. Gin owotho ki Jon Marako me kõnyögi. 6 ködë. 24 Na bara Yecu obino, Jon Abatica öttö kóp me ngut éka batica both jö me Icarael kibéc. 25 I karé na Jon dong cwök tyeko tic méré, én okobo ni, 'Un ithamö ni an anga? An ba abedo ngat na un itye ka kürö piré, éntö én tye ka bino ki kóra, na an ba apora me gönyö wör tyéné.' 26 "Utmegona, un ékwaé k'Abraam, éka un Erok na Iworo Obanga, kóp me laré ni eoro dong ökö both onu! 27 Éntö jö na yam bedo giní i Jerucalem k'etëlagi onwongo ba öniang giní i kom Yecu, ba öniang giní thon i kóp n'edwarpiny okobo, éka n'ekwanö i ceng Cabit k'Eyuda kibéc. Gin ocobo kóp k'edwarpiny nakun ngölö giní ni kóp ölöö Yecu. 28 Kadí ba onwongo giní bal mörö me ngölö n'éné thöö, gin openyo Pilato ek oyee me neko én ökö. 29 I karé na dong otyeko giní cobo kóp na yam écöö i kome, gin ökwanyö én ökö ki kor yath, cé epyelo kome i bur lyél. 30 Éntö Obanga ocero én ökö ki kin jö n'öthöö. 31 Cé én obedo nen pi ninö na pol both jö na yam én owotho ködgi ki i Galilaya obino yo Jerucalem. Kobedini dong gin éné ecaden méré both jö onu. 32 "Éka wan éttö niwu emuth na bér ni gin na yam Obanga öciko both kwere onu, 33 én dong ömiö ocobere pi onu, ékwaégi, ki cero Yecu. Kite n'écöö ködë i Jabuli me ariö ni, "In ibedo woda, tin dong adökö apapni.' 34 Éka man éné gin n'Obanga okobo i kom cero én ki kin jö n'öthöö ni ba bino töp i lyél, ekobo i kóp ni: "Abino miöwu gum na leng na genere na yam acikö both Daudi.' 35 Dök ekobo i Jabuli nökené ni: "Ba ibino wékö kom Dhanöni Naleng töp.' 36 "I karé na Daudi otyeko tic na lübére ki yüb k'Obanga i karé méré, cé én öthöö, éka eiko kome kanya eiko kwere méré ié cé kome ötöp. 37 Éntö ngat n'Obanga obino ocero ki i thöö, kome ba obino ötöp. 38 "Pi manön utmegona, an amitö ni inge unu ni pi Yecu éné ömiö wan éttö niwu kóp me timö kica i kom bal. 39 Dhanö acélacél n'oye Yecu ebino kwanö ni én kite atir i nyim Obanga, gin mörö na cik ka Muca ba twérö timö. 40 Gwökéré unu dong ek kóp na yam edwarpiny okobo kür ötiméré i komwu: 41 "Nén, un wegí angal, ur unu éka irweny unu ökö, pién an abino timö gin mörö i karéwu, na un ba ibino yee, kadí ngat mörö kob niwu." 42 Na Paulo éka Baranaba yaa dong ki i cinagoga, jii ökwaégi ni myero gin dök odwog cen ek okob nigí kóp na thuth i ceng Cabit k'Eyuda na lübö manön. 43 I karé n'ekéthö lwak, pol Eyuda éka jö n'ölökéré giní i dini k'Eyuda n'ömiré giní both Obanga ölübö giní kör Paulo gin ki Baranaba cé gin obedo twak ki lwak na cükö cwingyi ni myero ömédéré giní me bedo

ĩ kica k'Obanga. 44 Ī ceng Cabit k'Eyuda na lübö manön, pol lwak k'ĩ pacö öcökëré gini kanya acël më winyo köp ka Rwoth. 45 Ēntö ĩ karë n'Eyuda mökö öñenö gini lwak, nyeko ömakögi ökö, ëka öcakö gini twakö köp më ayeny ĩ kom ngö na Paulo onwongo tye ka kobo. 46 Cë Paulo gin k'ĩ Baranaba ötwak gini k'ĩ tæk cwiny abonge lworo na kobo gini nĩ, "Wan onwongo myero ëcak twakö köp k'Obanga bothwu, ëntö na calö dong ikwërö unu ökö ëka ba iparö unu nĩ ipore unu pĩ kwö na ba thum, wan dong ëwëköwu cë ëlökëré both Erok. (aiōnios g166) 47 Man ënë gin na yam Rwoth öciköwa na kobo nĩ: "An akethi më bedo tar both Erok, ëk imĩ larë othun naka ĩ ajiki piny kibëc." 48 Ī karë n'Erok owinyo gini köp nĩ, cwinygi obedo na yom, ëka öcakö gini wörö köp ka Rwoth, cë jö kibëc n'onwongo ëyërogĩ pĩ kwö na ba thum oyee gini. (aiōnios g166) 49 Köp ka Rwoth ökëth öromö lobo nön ökö kibëc. 50 Ēntö Eyuda orubo gini cwiny mon na lworo gini Obanga, na tye gini k'ĩ rwöm më dito na malö kanya acël k'ëtëla më pacö nön. Cë öcakö gini yelo Paulo gin k'ĩ Baranaba ëka ëryëmögi ökö k'ĩ ĩ lobogi. 51 Ēntö Paulo ëka Baranaba ötëngö gini apua k'ĩ ĩ tyën-gĩ më nyutho nĩ gin ökwërogĩ, cë öcüdö gini yo Ikonio. 52 Cë ëlübör Yecu opong ki yom cwiny ëka k'ĩ Tipo Naleng.

14 Na gin dong tye ĩ pacö më Ikonio, ödönyö gini ĩ cinagoga k'Eyuda. Kĩ kunön gin obedo ka twak k'ĩ tæk n'ömiö wel k'Eyuda na pol ëka Erok oyee gini. 2 Ēntö Eyuda n'ökwërö yee orubo gini cwiny Erok nakun miö gini thama na reco ĩ kom utmego. 3 Paulo gin k'ĩ Baranaba obedo gini kunön pĩ karë mörö na lac nakun twakö gini pĩ Rwoth k'ĩ tæk cwiny abonge lworo mörö. Rwoth thon omoko caden më kica mërë nakun miögi tækö më tio anyuth më tango ëka gin më aura. 4 Ēntö lwak më pacö onwongo opokere gini ökö, dul nökenë both Eyuda ëka nökenë both ëkwëna. 5 Cë Erok ëka Eyuda, kanya acël k'ëtëlagi omoko thamagi më timö gin na rac ĩ komgi ëka k'ĩ celogi k'ĩ kidi. 6 Ī karë n'ëkwëna öniang gini ĩ kom köp nön, öcakö lüü gini ökö naka yo Licitra ëka Derube ĩ peci na tye ĩ lobo Likaonia ëka k'ĩ lobo n'ögürögi, 7 kanya gin ömëdërë më titö Emuth na Bër. 8 Ī karë na gin tye ĩ Licitra, onwongo gini ëcwö mörö na bedo abeda na ba twërö woth. Ēn onwongo ongwäl ökö cön k'ĩ ĩ aya mërë ëka ba ötëmö woth. 9 Ēn obedo winyo ka Paulo twak, cë Paulo öcikö wangë ĩ kome ëka öñenö nĩ ën tye k'ĩ yee na römö miö ën cang. 10 Cë Paulo oredo k'ĩ dwön na malö nĩ, "Yaa malö, icung atir!" Ēka ëcwö nön öcakö pye malö cë öcakö woth. 11 Ī karë na lwak öñenö gini ngö na Paulo ötimö, öcakö

wöö gini k'ĩ lëb Likaonia nakun kobo gini nĩ, "Obanga obino gini piny both onu ĩ thë cal ka dhanö!" 12 Cë öcakö cwodo gini Baranaba nĩ "Jeuc," ëka Paulo nĩ, "Ermec," piën ën onwongo obedo adwong na löö twak. 13 Cë alamdhök ka Jeuc, na öt wörö jwökgi tye ĩ ngee pacö, okelo thwoni ëka athure ĩ dhö wangkac më pacö piën ën ëka lwak onwongo mitö miö gini tyër both ëkwëna. 14 Ēntö ĩ karë n'ëkwëna Baranaba gin k'ĩ Paulo owinyo gini pĩ köp nön, öcakö yëcö gini böng-gi k'ĩ komgi nakun mwömërë gini yökö k'ĩ kin lwak na redo gini nĩ, 15 "Pingo itimö unu gin nĩ? Wan thon ebodo dhanö adhana calö un. Wan ëtitö niwu Emuth na Bër ëk ilökëré unu ökö k'ĩ kom gin na köny mërë ope yo both Obanga na kwö n'ocweo polo k'ĩ lobo ëka nam k'ĩ jami kibëc na tye ië. 16 Ī karë na cön ën oyee nĩ rok kibëc owoth gini ĩ yoo na igi ömitö. 17 Kadĩ bed nĩ kömanön, ën yam ba öwëkö dhanö abonge caden mërë ëka k'ĩ gin na bër na ën timö. Ēn miö köth cwe niwu k'ĩ ĩ polo, ën miöwu cem na büp ëka miöwu ibedo unu k'ĩ yom cwiny." 18 Ēntö naka thon k'ĩ köp nĩ Paulo ëka Baranaba ba obedo na yot nigĩ më jükö lwak më tyërö tyër bothgi. 19 Cë Eyuda mökö n'obino gini k'ĩ ĩ Antiokia ëka ĩ Ikonio öcüpö gini lwak më dök kukurgi. Gin ocelo Paulo k'ĩ kidi ëka öcakö ywanö gini ën yökö ĩ ngee pacö, nakun thamö gini nĩ ën dong öthöö ökö. 20 Ēntö kinge n'ëlübör Yecu öcökëré gini bothe, ën öya malö ëka ödök cen ĩ pacö. Kodiko na piny oru, owotho gini kanya acël k'ĩ Baranaba naka ĩ Derube. 21 Kinge na gin ötitö Emuth na Bër ĩ pacö nön, gin ölökö jö na pol më bedo ëlübör Yecu. Cë gin ödök cen ĩ Licitra, Ikonio ëka Antiokia, 22 nakun jingö gini cwiny ëlübör Yecu ëka cükö cwinygi më cung ĩ yee atir nakun kobo gini nĩ, "Onu myero enwong can na pol më dönyö ĩ ker k'Obanga." 23 Ī karë na Paulo gin k'ĩ Baranaba öyëro gini edong pĩ jö n'oye Kiricito k'ĩ ĩ kabedo acëlacël, gin öcakö miö jö nön ĩ cing Rwoth na gin yee ĩ kome nakun öcakö gini k'ĩ lëga both Obanga ëka k'ĩ rio kec. 24 Kinge na gin owok ĩ Picia, obino gini naka ĩ Pampulia, 25 ëka ĩ karë na gin otyeko titö köp k'Obanga ĩ Perga, cë öcüdö gini yo Atalia. 26 Kĩ kany nön, gin ökwang k'ĩ mel yo Antiokia, kanya yam ëmiögi tē ĩ thë kica k'Obanga pĩ tic na gin onwongo dong otyeko. 27 Ī karë n'othuno gini kunön, öcökö gini jö n'oye Kiricito kanya acël, cë okobo gini gin na kibëc n'Obanga otio nakun wok k'ĩ bothgi ëka kite n'Obanga öyabö k'ĩ dholokek më yee both Erok. 28 Ēka obedo gini kunön k'ëlübör Yecu pĩ karë na lac.

15 Jö mökö öya k'ĩ ĩ Yudea obino gini yo Antiokia nakun pwnonyo gini utmego nĩ, "Ka ba ëliröwu

kite na pwony ka Muca mītō kōdē, un ba itwērō larē." 2 Man ōmīō Paulo ēka Baranaba obedo ka larō kōp kī pyem kōdgi na tēk. Cē ēyērō Paulo ēka Baranaba kī jō nōkēnē n'oye ginī, mē cidhō naka yo Jerucalem both ēkwēna ēka edong pī kōp nī. 3 Lwak jō n'oye Kiricito oorogī ēka na gin tye ka woth ngōlō ī Poiniki ēka lobo Camaria, gin okobo kite n'Erok ōlōkērē ginī kōdē. Emuth nī ōmīō utmego kibēc obedo kī yom cwiny. 4 Ī karē n'obino ginī yo Jerucalem, jō n'oye Kiricito ēka ēkwēna, k'edong obino ōjōlōgi. Baranaba ēka Paulo okobo bothgi gin na kibēc n'Obanga otio kōdgi. 5 Cē jō n'oye na tye ginī ī dul k'Eparicayo ōya ginī malō ēka okobo ginī nī, "Erok myero ēlirgi, ēk ēcikgi mē lūbō cik ka Muca." 6 Ēkwēna ēka edong ōcōkērē ginī mē larō kōp nī. 7 Kinge larō kōp pī caa na lac, Petero ōya malō cē ōtwak kōdgi: "Utmegona, un ingeo nī ī karē mōrō n'opoth aneg Obanga obino ōyēra kī ī kinwu, ēk amīī Erok owiny kōp mē Emuth na Bēr na yaa kī ī dhōga ēka oyee ginī. 8 Obanga, na ngeo cwiny dhanō, onyutho nī ēn oyeogī nakun mīōgi Tipo Naleng, kite n'ōtīmō kōdē ī kom onu. 9 Ēn ba oketho apokapoka mōrō ī kin onu ēka gin, ēntō ēn ōmīō cwinygi obedo na leng kī yee. 10 Cē kobedini dong, pīngō itye ka tēmō unu Obanga nakun iketho unu ayokoth ī ngut ēlūbkōr Yecu na wan onyo kwere onu ba twērō ginī tingo? 11 Pathī nī kōmanōn piēn wan eyee nī onu kibēc ēlarē ī yoo acēl nōn pī kīca ka Rwothwa Yecu ī kite na gin tye kōdē nōn." 12 Jō kibēc n'ōcōkērē ōlīng ginī alīnga nakun etye ka winyo Baranaba ēka Paulo ka tye ka kobo ginī kōp ī kom anyuth mē tango ēka gin mē aura n'Obanga ōtīmō ī kin Erok nakun tio kōdgi. 13 Ī karē na gin otyeko twak, Yakobo ōgamō nī, "Utmegona, winya unu. 14 Cimon okobo both onu kite n'Obanga ōcakō nyutho par mērē ī kom Erok nakun kwanyō jīī kī kin-gi ēk obed mēgē. 15 Kōp k'edwarpīny ōrwaterē kī kōp na yam ēcōō nī, 16 "Kinge man an abino dwogo ēka agērō ōt ka Daudi na yam ōrēdhērē. An abino gērō kanya yam ōbal ōkō, ēka abino rōcō na bēr. 17 Ēk jō n'odong ōrang ginī Rwoth, ēka Erok kibēc n'ecwodogi kī nyinga, man kōp ka Rwoth Obanga, na tio jami nī" 18 n'ōmīō ongere anaka yam cōn. (aiōn g165) 19 "Pī manōn thamana dong tye nī onu kūr ēmīī obed na tēk pī Erok na tye ka lōkērē ginī both Obanga. 20 Nakaka manōn, onu myero ēcōō waraga bothgi ēka ekob nīgi nī myero kūr ōcam ginī cem mōrō n'ētyērō both cal jwogi, kūr obed ginī jō ōlyang, kūr ōcam ginī ringo leeni n'ēdēō adēa, ēka kūr ōcam ginī remo. 21 Piēn cik ka Muca ebeto ka tītō ī peci kibēc cakērē cōn ēka ēkwanō ī cinagoga ī ceng Cabīt k'Eyuda kibēc." 22 Cē ēkwēna ēka edong,

kī jō kibēc n'oye Kiricito, omoko ginī mē yērō cwō mōrō n'obedo mēgi ēk eorgi owoth ginī kī Paulo ēka Baranaba yo Antiokia. Gin ōyērō Yuda (n'ecwodo nī Barcaba) ēka Cila, cwō ariō n'onwongo obedo ginī ētēla ī kin utmego. 23 Man waraga n'eorogi kōdē: Both utmegowa n'obedo Erok n'oye Kiricito na tye ī Antiokia, Ciria ēka Cilicia, wan ēkwēna ēka edong n'ebeto utmegowu, emothowu. 24 Wan ewinyo nī jō mōkō ōya kī bothwa kany abonge twērōwa, na tye ginī ka yelowu kī kōp mōkō na rubo thamawu kī ngō na gin tye ka kobo. 25 Manōn ōmīō wan emoko kī cwinywa acēl mē yērō cwō mōrō ēk eorgi bothwu nakun wotho ginī kanya acēl kī nyikoneiwa mē amara Baranaba ēka Paulo, 26 cwō na dong otyeko jalō kwōgi pī nying Rwoth Yecu Kiricito. 27 Pī manōn wan eoro Yuda ēka Cila mē bino kobo niwu kī dhōgi ngō na wan etye ka cōōnō. 28 Nen calō bēr both Tipo Naleng ēka wan ēk kūr eketh yēc mōrō na pēk rwōk ī komwu na kadhō kōp na pīrgi tēk na wan ēcō pīny kany: 29 Kūr īcam unu cem n'ētyērō both cal jwogi, kūr īcam unu remo, kūr īcam unu ringo leeni n'ēdēōgi adēa ēka kūr ītīm unu tīm mē ōlyang. Ka īgwōkērē unu kī kom jami nī, cē ibino unu tīmō na bēr. Bed unu dong na bēr. 30 Ī karē n'eorogi, gin ōcakō cidhō yo Antiokia, kanya gin ōgūrō jō n'oye Kiricito kanya acēl ēka ēmīōgi waraga. 31 Ī karē na gin ōkwanō waraga, obedo ginī kī yom cwiny pī kōp mē cūkō cwinygi. 32 Cē Yuda ēka Cila n'onwongo obedo ginī edwarpīny, ōtwakō ginī kōp na pol mē cūkō cwinygi ēka mē jīngō yeegi. 33 Kinge na dong otyeko ginī karē mōrō na nōnōk, cē jō n'oye ōmīōgi ōdōk cen kī gum mē kuc both jō n'oorogi. 34 Ēntō Cila ōthamō nī bēr ēn ebed kunōn. 35 Cē Paulo ēka Baranaba odong ginī ī Antiokia, kanya gin kī lwak na pol opwonyo ēka ōtītō ginī kōp ka Rwoth. 36 Kinge karē mōrō na nōnōk, Paulo okobo both Baranaba nī, "Ērō ēdōk cen ēk ēcidh ēlīm utmego kī ī peci kibēc na onu ebeto ka tītō kōp ka Rwoth iē ēk ēnēn kite na gin tye kōdē." 37 Baranaba onwongo mītō nī ewoth ginī kī Jon na nyingē nōkēnē ecwodo nī Marako, 38 ēntō Paulo ba dōk ōthamō na bēr mē woth kōdē piēn obino ōwēkōgi ōkō ī Pampulia ēka ba obino ōmēdērē kōdgi ī tic. 39 Gin obedo ka larō kōp na gwaū, naka othuno nīgi pokere ōkō. Baranaba owotho kī Marako cē ōkwang ginī yo Cairprac, 40 ēntō Paulo ōyērō Cila cē ōya ginī ēka utmego ōmīōgi ī cīng Rwoth ēk pī kīca mērē ōgwōkgi. 41 Ēn owok ī Ciria ēka ī Cilicia nakun jīngō cwiny jō n'oye Kiricito.

16 Paulo dōkī othuno naka yo Derube ēka Licitra, kunōn onwongo tye iē alūbkōr Yecu na nyingē

Timoteo, n'aya méré onwongo obedo Ayuda éka dhanó n'oye Yecu, éntò n'apap méré obedo dhanó mè Girik. 2 Utmego na tye gini i Licitra éka lkonio ótwakó gini kóp na bér i kom Timoteo. 3 Paulo ómitò ní ewoth kódé i woth méré, cè én ólirò Timoteo pí Eyuda na tye gini kunón pién gin kibéc onwongo ngeo ní apap méré onwongo obedo dhanó mè Girik. 4 Kite na gin obedo wowotha i peci na papath, gin ómíò jò n'oye Kiricito cík na yam ékwéna éka edong omoko gini i Jerucalem ní ék ólúb gini. 5 Kómanón jò n'oye Kiricito ójing na ték i kom yeegí éka welgi obedo ka mēdērē na pol ninó kī ninó. 6 Paulo éka ewodhe owotho gini i lobo Perugia éka Galatia, pién Tipo Naleng ógēngógi ní kūr ótít gini kóp k'Obanga i lobo Acia. 7 I karé na gin othuno i wang lobo mē Micia, gin ótēmō cidhō yo Bitinia, éntò Tipo ka Yecu ba oyeo ní gin ócidh kunón. 8 Gin dong ócakó wok i Micia, éka ócidhō gini yo Teroa. 9 I kiwor Paulo ónēnō écwō mōrō mē Macedonia i gin anyutha, n'ocung nakun kwaó én ní, "Kwang nam ibin i Macedonia ék ikónywa." 10 Kinge na Paulo dong ónēnō gin anyutha, wan éyúbērē piópió mē yaa cidhō yo Macedonia, pién onwongo éniang na bér ní Obanga éné ocwodowa mē cidhō titó kóp mē Emuth na Bér bothgi. 11 Wan écakó kwang kī yeya kī i Teroa atir naka i Camoturake éka kodiko méré ethuno i Neapoli. 12 Kī kunón wan écidhō yo Pilipi i pacó na jò Roma lóó, na éné pacó na dit na lóó kī i lobo Macedonia. Wan ebodo kunón pí ninó na pol. 13 I ceng Cabit k'Eyuda wan écidhō yókó i nge wangkac yo lak kulo, kanya wan éthamó ní étwērō nwongo kany mōrō mē légā. Wan ebodo píny mē twak kī mon n'owongo ógūrē gini kany nón. 14 Ngat acél n'obedo winyo twakwa éné dhakó na nyingé Lidia, n'oya kī i pacó n'ecwodo ní Tuatira. Én onwongo obedo dhakó na cadhō böng na kwar na bécó mē wel éka na wōrō Obanga. Rwoth óyabō cwinye éka obedo ketho cwinye i kóp na Paulo kobo. 15 I karé na én éka kī jò mē ódē ebaticagi, én ójölöwa yo pacó méré nakun kobo ní, "Ka un iyeo ní an dong abedo ngat n'oye Rwoth, cè ibin ebed unu i pacóna." Én ódiöwa rwök naka ómíö wan eyeo mē woth kódé. 16 I ninó mōrō acél na wan onwongo etye ka cidhō i légā, wan érwatērē kī nyakó mōrō n'obedo opii. Én onwongo tye kī tipo mōrō na mió én kobo gin mōrō mē karé mē anyim. Én onwongo kelo lím na thwōné both rwodhi méré kī kóp na én kobo. 17 Nyakó ni obedo lúbō kór Paulo éka wan kibéc na redo ní, "Cwō ni obedo gini etic k'Obanga na Maló Rwök na gin tye ka kobo niwu kit yoo na myero ilaré unu kódé." 18 Én obedo ka tímó ní kómanón pí ninó na pol. Mē ajiki méré akémō ómakó Paulo cè ólókērē okobo ní

iwök ní, "Aciki i nying Yecu Kiricito, donyi ókó kī i kome!" I caa nón cücúth tipo na rac óya cè ówékó én. 19 Éntò i karé na rwodhi méré ónēnō ní gen mē nwongo lím óya ókó, ómakó gini Paulo éka Cila cè éywaógi eterogi yo cuk i nyim éloc. 20 Gin okelogi i nyim éngöl-kóp cè okobo gini ní, "Jò ni obedo Eyuda éka tye gini ka rubo pacówa 21 nakun pwonyo gini kite mókó na cikwa ba yeo ní wan égam onyo élúbgi, pién wan ebodo jò Roma." 22 Cè lwak óróbērē gini mē lwényi kom Paulo éka Cila. Éngöl-kóp ócikó ní égöny böng kī komgi éka epwodgi kī lúth. 23 Kinge na dong etyeko pwodogi rwök, cè eterogi i buc nakun écikó ngat na gwökó buc ní ék ógwókgi na bér. 24 Ngat na gwökó buc okethogi i ód buc na tye té éka etweo tyén-gi i kom yen na pēk. 25 Na dong cwók rómō dingwor Paulo éka Cila onwongo tye gini i légā na wero gini wer both Obanga, n'emabuc nókēné thon onwongo tye ka winyogi. 26 Athura thwón oyeyeng mōrō oyengo píny rwök naka thē ót mē buc thon oyengere. Cücúth dholokek kibéc mē ót buc óyabērē ókó, éka jégélé kibéc n'etweo k'emabuc ógöny gini ókó. 27 I karé na ngat na gwökó buc ocoo cè ónēnō dholokek kibéc mē ót buc thwolo, én ówódhō pala abadé méré éka onwongo mitó cōbērē kēné pién ongeó ní emabuc ólúú ókó. 28 Éntò Paulo oredo ní, "Kūr iwaniri keni! Wan kibéc eute kany!" 29 Ngat na gwökó buc ocwodo mac, ómwómērē i ót, cè ócidhō orumo cōngé píny na kome myél amyéla i nyim Paulo éka Cila. 30 Cè én dong okelogi yókó éka openyo ní, "Editena, ngó na myero atim ék alaré?" 31 Gin ócakó gamó ní, "Yee i kom Rwoth Yecu éka ibino laré, in kī jò mē odi kibéc." 32 Cè ótwakó gini kóp ka Rwoth bothe éka kī jò kibéc na bedo gini i ódē. 33 I caa nón mē kiwor ngat na gwökó buc oterogi éka ócidhō ólwökó wang retgi, cè cücúth én éka jò mē ódē kibéc ebaticagi. 34 Ngat na gwökó buc okelogi i ódē éka ómíögi cem. Én onwongo opongi kī yom cwinyi pién én kī jò mē ódē kibéc oyee gini i kom Obanga. 35 I karé na dong píny oru kodiko, éngöl-kóp ooro acikarigi both ngat na gwökó buc kī twērō nakun kobo ní, "Göny unu jò nón ócidh gini." 36 Ngat na gwökó buc okobo both Paulo ní, "Éngöl-kóp ócikó ní, un kī Cila myero égönywu ókó. Kobedini dong itwērō unu cidhō. Apé unu kī kuc." 37 Éntò Paulo okobo both acikari ní, "Gin opwodowa i kin lwak na bara éngöló niwa kóp, kadí bed ní wan ebodo jò mē Roma éka okethowa gini i buc. Cè kobedini gin mitó gönyöwa i müng? Pathí ní kómanón! Mitó gin kī komgi obin ék ógönywa gini." 38 Acikari ódwökó gini kóp nón both éngöl-kóp éka i karé n'owinyo gini ní Paulo éka Cila onwongo obedo gini jò mē Roma, gin

obedo ki lworo. 39 Cē gīn obino óbakō dhōgī bothgi ēka ōkwanyōgi ōkō, na kwaōgi mē wēkō pacō nōn. 40 Kinge na Paulo ēka Cila odonyo gīnī yōkō ki i buc, ēka ōcīdhō gīnī i ōt ka Lidia, kanya gīn ōrwatērē ki utmego ēka ōcūkō cwinygi. Cē gīn ōcakō cīdhō.

17 I karē na gīn owok ki Ampipoli ēka Apolonia, obino gīnī i Tecalonika, kany onwongo cinagoga k'Eyuda tye iē. 2 Paulo ōdōnyō i cinagoga kit n'onwongo ēn marō timō kōdē, ēka pī ceng Cabīt k'Eyuda adek ēn obedo larō kōp kōdgi i kom kōp na yaa ki i Cōc na Leng. 3 Ēn obedo gōnyō kōp kōrē ki kōrē nakun nyutho nī Meciya myero ōlīm can ēka ocer ki kin jō n'ōthōō. Paulo okobo nī, "Yecu ni na an atye ka tītō kōp i kome bothwu ēnē Meciya." 4 Eyuda mōkō n'owinyo oyee cē ōribērē gīnī ki Paulo ēka Cila. Pol jō Girik na lworo Obanga ēka ki mon na dōngō thon oyee gīnī. 5 Ēntō Eyuda mōkō onwongo tye gīnī ki nyeko ēka ōcakō gīnī cōkō jō mōkō na kitegi reco ki thē cuk, ōgūrē gīnī kanya acēl ēka ōcakō gīnī kelo wōō na rac i pacō. Gīn ōcīdhō i ōt ka Jacōn mē rangō Paulo gīn ki Cila, ēk ekelgi yōkō both lwak. 6 Ēntō i karē na gīn ba onwongōgi, ōywaō gīnī Jacōn ēka utmego mōkō nōkēnē i nyim ēlōc mē pacō ki wōō nī, "Jō ni n'obedo gīnī kelo ayela i wi lobo thūkūl, obino gīnī kōdē naka kany, 7 ēka Jacōn ōgamōgi parē. Gīn tye gīnī ka tūrō cīk ka Cija nakun kobo gīnī nī rwoth nōkēnē tye n'ecwodo nī Yecu." 8 I karē na gīn owinyo kōp ni, lwak ēka ēlōc mē pacō obedo gīnī ki podho cwiny. 9 Cē ōcakō gīnī gamō cīlīng ki both Jacōn ēka ki jō mōkō cē dong ēwēkōgi ōcīdhō. 10 Cūcūth kiwor nōn, jō n'oye ooro gīnī Paulo gīn ki Cila ōkō yo Berea. I karē na gīn othuno kunōn, ōcīdhō gīnī i cinagoga k'Eyuda. 11 Eyuda mē Berea onwongo kitegi bēcō lōō Eyuda mē Tecalonika, piēn ōgamō gīnī kōp n'etero nīgi ki yom cwiny na bēr, ēka nīnō ki nīnō gīn onwongo rīpō Cōc na Leng mē nēnō ka kōp na Paulo tye ka pwonyo tye atīr. 12 Eyuda na pol oyee, ēka cwō na pol ki mon na pīrgi tēk n'engeogi n'obedo jō Girik thon oyee gīnī. 13 I karē n'Eyuda na bedo i Tecalonika ōniang gīnī nī Paulo tye ka tītō kōp k'Obanga i Berea, gīn thon ōcīdhō kunōn mē rubo jīi ēka ki cūpōgi. 14 Cē cūcūth jō n'oye otero gīnī Paulo ōkō i dhō nam, ēntō Cila ēka Timoteo odong gīnī i Berea. 15 Jō n'otero Paulo okelo gīnī ēn naka i Atene. Ki kunōn gīn odwogo cen ki kōp na Paulo ōcīkōgi kōdē yo both Cila ēka Timoteo nī myero gīn ōcīdh bothe pīōpīō ka twērē. 16 Na Paulo onwongo pod tye ka kūrō Timoteo ēka Cila i Atene, cwinye ocwer rwōk mē nēnō nī pacō nōn opong ki cal jwogi. 17 Pī manōn, ēn obedo larō kōp k'Eyuda ēka jō Girik na

lworo Obanga i cinagoga, ēka ki jō mōkō na ēn obedo nwonogōgi i thē cuk nīnō ki nīnō. 18 Ēryēkō mōkō mē dul k'Epikurea ēka Citoik ōcakō gīnī larō kōp kōdē. Jō nōkēnē openyo gīnī nī, "Ngō na ngat ni na twak atata mītō kobo kany?" Jō nōkēnē ōgamō nī, "Nen calō ēn mītō twakō kōp i kom obanga mōrō na path." Gīn okobo kōmanōn piēn Paulo onwongo tye ka tītō Emuth na Bēr i kom Yecu ēka cer ka jō n'ōthōō. 19 Cē gīn otero ēn i nyim athuko mē Areopago, nakun kobo gīnī nīnē nī, "Wan ēmītō ngeeno kit pwony na nyen na in itye ka pwonyo. 20 In itye ka kelo kit pwony mōkō na papath i ithwa, ēka wan ēmītō niang i tyēnē." 21 I karē nōn jō mē Atene ki wele na bedo kunōn onwongo balō karēgi mē twakō ēka winyo kōp mōrō na nyen. 22 Paulo ōya malō cē ocung i nyim athuko mē Areopago ēka okobo nī, "Un jō mē Atene, an anēnō nī i yodhi kibēc ibedo unu edini rwōk. 23 Piēn ka an atye ka wowotha nakun arīpō gin na un i'wōrō, anwongo keno tyēr n'ēcōō nī, 'Both obanga na ba ngere.' Dong gin na un i'wōrō na ba ingeo unu ēnē an abino mē tītō niwu. 24 "Obanga n'ocweo wi lobo ki jami kibēc na tye iē, ēnē Rwoth mē polo ki lobo ēka ēn ba bedo i udi n'ēgērō ki cīng jō. 25 Ēka ēn ba mītō nī etii nīnē gin mōrō n'ēyūbō ayūba ki cīng dhanō, calō ēn onwongo mītō gin mōrō, piēn ēn kikome ēnē miō kwō, yweo, ēka gin na kibēc. 26 Ēn ocweo rok kibēc mē wi lobo ki kom dhanō acēl, ēk obed gīnī i wi lobo thūkūl. Ēn ōyūbō karē ēka kabedo na myero gīn ōkwō iē. 27 Obanga ōtimō kōmanōn ēk dhanō ōrangē, ēka onwong ēn, othun bothe kadī bed nī ēn ba bor ki both ngat acēlacēl ki kin onu. 28 Pī ēn, wan ēkwō i ēn, ewotho i ēn, ebledo i ēn, kite na jō mōkō thon ōcōō gīnī ki kin ēcōcwu nī, 'Wan thon ebledo ēthīnē.' 29 "Pī manōn, kite na onu ebledo ēthīn k'Obanga, onu kūr dōk ētham nī Obanga cal ki gol onyo ryal onyo kidi onyo cal mōrō n'ēyūbō ki dīrū ēka ki thama ka dhanō. 30 Obanga yam ba ōparō pī dhanō i karē mē kwia pīny, ēntō kobedini ēn dong ōcīkō nī jō mē kabedo kibēc myero ongut gīnī pī balgi, 31 piēn ēn dong oketho nīnō n'ebino ngōlō ki kōp both jō kibēc mē wi lobo ki kōp atīr nakun dong ōyērō ngat na myero ōngōl kōp. Ēn thon omoko caden both jō kibēc, ki cero Yecu ki kin jō n'ōthōō." 32 I karē na gīn owinyo kōp i kom cer ka jō n'ōthōō, jō mōkō ōcakō nywarō ēn, ēntō jō nōkēnē okobo gīnī nī, "Wan ēmītō winyo kōp ni dōkī i ceng nōkēnē." 33 Ēka Paulo ōya cē ōwēkō athuko. 34 Jō mōkō na nōnōk ōribērē kōdē ēka ōdōkō gīnī jō n'oye. I kin-gī onwongo tye iē Dionicio dhanō mē Areopago ēka dhakō mōrō na nīngē Damaric, ki jō nōkēnē na pol.

18 Kinge manõn Paulo òya kî ì Atene òka òcìdhò yo Korinti. 2 Òka òn onwongo Ayuda mòrò na nyingè Akwila, n'ènywölò ì lobo Ponto, na pod onwongo odwogo kî ì lobo Itali gín kî dhakò méré Piricila. Pièn Kalaudio òmiò twèrò nî Eyuda òya gínì òkò kî ì Roma. Cè Paulo òcìdhò mè ìimògí 3 òka obedo bothgí. Òn onwongo obedo atic kèma calò gín òka otio kanya acèl kòdgí. 4 Ì ceng Cabìt k'Eyuda kibèc òn obedo larò kòp ì cinagoga mè tèmò lókò thama k'Eyuda òka jò Girik. 5 Ì karè na Cila òka Timoteo obino gínì kî ì Macedonia, Paulo òmiò karè mèrè kibèc mè tìtò kòp k'Obanga nakun miò caden both Eyuda nî Yecu ènè onwongo obedo Meciya. 6 Òntò ì karè n'Eyuda opyem gínì kî Paulo òka òcakò yanyò èn, cè èn òcakò têngò bòng kome nakun kobo bothgí nî, "Remowu obed ì wiwu! An gira balna mòrò ope. Cakèrè tin cìdh kòdè anyim, an abino cìdhò both Erok." 7 Cè Paulo òya òcìdhò yo pacò k'ècwò mòrò na nyingè Tito Yucito, Arok na wörò Obanga na òdè cwòcwòk kî cinagoga. 8 Kiricipac, atèla na lóò cinagoga òka kî jò mè òdè kibèc oyee gínì Rwoth, cè jò na pol mè Korinti n'owinyo gínì èn, oyee òka ebaticagí. 9 Ì ninò mòrò acèl ì kiwor, Rwoth òtwak kî Paulo ì anyuth òka okobo ninè nî, "Kür ibed kî lworo, èntò bed ka twak, kür ìiling. 10 Pièn an atye kanya acèl kodi, òka ngat mòrò ope na bino tìimò gin mòrò na rac ì komi, pièn an atye kî jò na pol ì pacò nî." 11 Cè Paulo obedo kunòn mwaka acèl kî dwethe abicèl, nakun pwonyogí kî kòp k'Obanga. 12 Ì karè na Galio obedo alóc mè lobo Akaya, Eyuda mòkò òcòkèrè gínì kanya acèl cè òmakò gínì Paulo, òka etero èn ì nyim angòl-kòp mè apida. 13 Gin okobo nî, "Ècwò ni tye ka neeno jii mè wörò Obanga ì yoo na ba rwatèrè kî cikwa." 14 Òntò ì caa n'onwongo Paulo dong cwòk twak, Galio okobo both Eyuda nî, "Winy unu Eyuda, ka onwongo koko ni ocung ì kom tìim mòrò na rac onyo bal mòrò na rac, onwongo bedo na bér an mè winyo kokowu. 15 Òntò kit na calò obedo peny na makò kòp onyo nying mòkò na dòk ì kom cik na mewu, un kikomwu ìnèn unu kit mè cobo. An ba abino bedo angòl-kòp ì kom kòp na calò koth manòn." 16 Cè èn òryèmògí òkò kî ì nyim pido. 17 Òka gín kibèc òlòkèrè ì kom Cocitene, atèla mè cinagoga, cè òcakò gínì pwodo èn ì nyim pido. Òntò Galio ba oketho cwinye iè. 18 Òka kinge Paulo obedo ì Korinti pì karè mòrò na nònòk, cè òwèkò utmego òka òkwang kî mel mè cìdhò ì lobo Ciria. Òn ònywakò gínì yoo kanya acèl kî Piricila òka Akwila. Na pod bara òcakò woth, Paulo òlyèlò wie kî ì Cenikeria, pièn onwongo okwongo kwong. 19 Ì karè na gín othuno ì Epeco, Paulo òwèkò Piricila òka Akwila kunòn,

èntò èn òcìdhò ì cinagoga mè larò kòp kanya acèl k'Eyuda. 20 Ì karè na gín openyo èn nì obed bothgí pì karè mòrò, èntò èn obino òkwèrò òkò. 21 Òntò ì caa na èn tye ka yaa òcìkèrè nî, "An abino dwogo cen bothwu ka Obanga òmitò." Cè òcakò kwang kî mel nakun yaa kî ì Epeco. 22 Ì karè na mel othuno ì Cecaria, Paulo òcìdhò yo Jerucalem mè motho jò n'oye Kiricito òka òcakò dòk cen yo Antiokia. 23 Kinge tero karè mòrò ì Antiokia, Paulo òdòk cen nakun wok kî ì Galatia òka Perugia nakun jìngò cwiny èlùbkor Yecu. 24 Ì karè nòn Ayuda mòrò na nyingè Apolo, n'obedo dhanò mè Alegjandaria obino yo Epeco. Òn onwongo obedo ècwò n'òkwanò rwòk, na tye kî ngeg na thuth ì kom Còc na Leng. 25 Òn onwongo epwonyo ì yoo ka Rwoth, cè obedo twak kî tèkò òka opwonyo kòp ì kom Yecu atir kadì bed nî èn onwongo ngeo kòp ì kom batica ka Jon kékèn. 26 Òn òcakò twak kî tèk cwiny ì cinagoga. Ì karè na Piricila òka Akwila owinyo gínì kòp na èn twakò, gín ocwodo èn yo pacògí cè òmiò èn òniàng ì yoo k'Obanga na bér rwòk. 27 Ì karè n'Apolo onwongo mitò cìdhò yo lobo Akaya, utmego òdòrò cwinye òka òcòò gínì waraga both èlùbkor Yecu èk òjòl gínì èn. Ì karè na èn othuno kunòn, èn obino obedo mè kòny na thwònè both jò n'onwongo oye gínì pì kica k'Obanga. 28 Òn obino òlòò thama k'Eyuda atir ì nyim lwak nakun nyutho kî ì kom Còc na Leng nî Yecu onwongo obedo Meciya.

19 Ì karè n'Apolo onwongo tye ì Korinti, Paulo owok ì yoo na tye ì dyere lobo òka othuno ì Epeco. Òn onwongo èlùbkor Yecu mòkò kunòn 2 òka openyogí nî, "Un yam inwongo unu Tipo Naleng ì karè na un iyee Kiricito?" Gín ògamò nî, "Pe, wan bara ewinyo nî Tipo Naleng thon tye." 3 Cè Paulo openyogí nî, "Koth batica mènè na un inwongo?" Gín ògamò nî, "Batica ka Jon." 4 Paulo ògamò nî, "Batica ka Jon onwongo obedo batica mè ngut. Òn okobo both jii mè yee ì kom ngat na tye ka bino kî kòrè, na manòn ènè Yecu." 5 Ì karè na gín owinyo kòp ni, cè ebaticagí ì nying Rwoth Yecu. 6 Ì karè na Paulo oketho cingè ì komgí, Tipo Naleng obino ì komgí cè gín òcakò twakò lèb na papath òka dwaropiny. 7 Wel cwò kibèc onwongo ròmò apar arìò. 8 Paulo òdònyò ì cinagoga òka obedo twak kî tèk cwiny pì dwethe adek, nakun larò kòp òka ywaò thamagí ì kom ker k'Obanga. 9 Òntò jò mòkò na ba yee n'odhing òcakò gínì twakò kòp na reco ì kom yoo ka Kiricito ì nyim lwak, cè Paulo òwèkògí òka òcìdhò k'èlùbkor Yecu. Òn obedo ka larò kòp kòdgí ninò kî ninò ì òt kwan ka Tairana. 10 Man obedo tìimèrè pì mwaka arìò, èk Eyuda òka jò Girik kibèc na bedo gínì ì lobo Acia

owiny gini kóp ka Rwoth. 11 Obanga otio tango na döngö ki i cing Paulo, 12 naka thon atame cing onyo böng n'ogudo en, onwongo etero both etwoe cê twogi cang ökö ëka tipo na reco thon yaa wëkögi. 13 Eyuda mökö n'onwongo rimo piny nakun ryëmö gini tipo na reco ki i kom jii, ötëmö gini tic ki nying Yecu më ryëmö cen ki kom jö na cen ömakögi nakun kobo gini ni, "An aciköwu i nying Rwoth Yecu, na Paulo pwonyo pirë, më donyo yökö ki i kome!" 14 Awope ka Cekewa abirö, n'onwongo obedo alamdhök na dit k'Eyuda, onwongo thon timö gini ni komanön. 15 Entö i ninö mörö acël tipu na rac ögamö nigü ni, "An angeo Yecu, ëka thon an angeo Paulo, ëntö un ibedo unu jö mëné?" 16 Cê ëcwö n'onwongo tipo na rac tye i kome opye i komgi ëka ölögi ökö. En ölwënyö ködgi ëka ömiögi öngwëcö yökö ki i öt kotula nakun remo cwer ki i komgi. 17 I karë na köp ni owinyere both Eyuda ëka jö Girik na bedo gini i Epeco, lworo öcakö makögi rwök ëka nying Rwoth Yecu ëwörö i rwöm na malö. 18 Jö na pol n'oye obino gini nakun tuco kanyalër tim mökö na rac na gin obedo ka timö. 19 Jö na popol n'onwongo obedo gini ejwogi okelo gini bukegi më thyeth kanya acël ëka ëwangögi i nyim lwak. I karë na gin öribö wel më buke, cê enwongo römö wel ciling na nying elip pyer abic. 20 I kit yoo ni, köp ka Rwoth ömëdërë ëka ödöngö ki tükö. 21 Kinge na köp ni kibëc ötimërë ökö, Paulo omoko thama mërë më cidhö yo Jerusalem nakun wok ki i Macedonia ëka Akaya. En okobo ni, "Kinge na an abedo kunön, an thon myero alim Roma." 22 En ooro Timoteo ëka Eracito, cwö arö n'onwongo könyö en më tio tic ka Rwoth yo Macedonia, nakun en dong më bedo i lobo Acia pi karë mörö na nönök. 23 I karë nön ayela na thwönë öcakërë i kom Yoo ka Kiricito. 24 Eëcwö mörö na nyingë Demeterio athedh ryal, en thedho ryal yübö ki cal jwök na dhakö na nyingë Atemi cê kelo ki lim na thwönë both ëdirü tic cing. 25 En ocwodogi kanya acël ki jö nököne na tio koth tic acël nön cê okobo bothgi ni, "Un cwö, ingeo unu ni lönyöwa yaa ki kom tic ni. 26 Kobedi dong un inénö ëka iwinyo unu ni Paulo mörö ni tye ka neeno jii ëka tye ka miö jö na pol rwenyo ökö ki i Epeco kany ëka rwök mërë i lobo më Acia thükül. En tye ka kobo ni obanga na dhanö öyübö ayüba ba obedo obanga kikokome. 27 Pathi döki cath këkën ëné tye na rac, ëntö naka thon öt wörö obanga na pirë tük më Atemi bino bedo gin mörö na köny mërë ope, ëka obanga na dhakö n'ëwörö i lobo Acia ëka i wi lobo thükül ebino kwanyö dheo mërë ökö." 28 I karë na gin owinyo köp ni, akëmö ömakögi ëka öcakö gini redo ni, "Atemi ka jö Epeco dit rwök!" 29 Cê

arubaruba na thwönë örömö i pacö ökö. Jii ömakö Gayo ëka Aricitako më Macedonia na yam wotho gini ki Paulo kanya acël, ëka gin kibëc ömwömërë ki cwiny acël i öt tuko. 30 Paulo ömitö dönyö i kin lwak ëntö ëlückör Yecu öjükö en ökö. 31 Edite mökö thon më lobo Acia, nyikonei ka Paulo, ooro gini köp ni kür ötëm më dönyö i öt tuko. 32 Athuko obedo k'arubaruba, jö mökö onwongo wöö gini i kom gin acël, jö mökö i kom gin nököne. Pol jii ba ongeö gini thon ngö n'onwongo gin tye ië kany nön. 33 Eyuda mökö othwaro gini Alegijanda anyim ëka jö mökö ki kin lwak oredo gini nakun ekobo ni en okob ngö na tye ka timërë. Alegijanda öjükögi ki cingë nakun mitö pido mërë i nyim jii. 34 Entö i karë na gin öniang ni en onwongo obedo Ayuda, lwak kibëc oredo ki dwön acël pi caa na römö arö ni, "Atemi ka jö Epeco dit rwök!" 35 Kinge, karan më pacö öjükö lwak ëk öling gini cê okobo ni, "Un jö më Epeco, nga na ba ngeo ki wi lobo ni pacö më Epeco ëné gwökö öt wörö Atemi na dit rwök, ëka ki cal mërë na yam opodho ki wi polo? 36 Pi manön, kite na pyem mörö ope i köp ni, un dong myero ibed unu moth, kür itim unu gin mörö k'abünyë. 37 Un ikelo cwö ni kany, ba öyakö gini gin mörö ki öt wörö jwök onyo yanyö obanga onu na dhakö. 38 Ka cê Demeterio ëka ëdirü tic cing ewodhe tye gini ki köp më adoth i kom ngat mörö, öt pido tye n'öyabërë ëka ëlöc thon tye. Myero gin oter i pido. 39 Ka tye köp nököne na un imitö kelo, manön myero etyeki i athuko më cik. 40 Kit na tye ködë, pëkö twërö podho i kom onu pi arubaruba n'ötümërë tin. Pi köp nön onu ba ëtwërö nyutho tyën köp mörö më wöö n'ötümërë." 41 Kinge na dong ötwakö köp ni, en ökëthö athuko ökö.

20 28i karë na dong wöö othum, Paulo ocwodo ëlückör Yecu bothe, kinge cükö cwinygi ëka mothogi, cê öcidhö yo Macedonia. 2 En obedo ka woth i lobo nön nakun cükö cwiny jii ki köp na pol, ëka kinge obino othuno i lobo Grecia 3 kanya en obedo ië pi dwethe adek. En onwongo tye ka yübërë më kwang ki mel më cidhö yo Ciria. I karë na en ongeö ni Eyuda öyübö gini köp i kome, cê Paulo ölökö thama mërë më dök cen nakun wok ki i Macedonia. 4 En owotho kanya acël ki Copater wod ka Piro më Berea, Aricitako ëka Cekondo më Tecalonika, Gayo më Derube ëka Timoteo, kanya acël ki Tukiko ëka Tropimo më lobo Acia. 5 Jö ni öcidhö anyim ëka öküröwa gini i Teroa. 6 Entö wan ëkwang ki i Pilipi kinge Kwer më Ogati na Thöbi ope ië ëka kinge ninö abic ethuno bothgi i Teroa, kanya wan ebedo ië pi ninö abirö. 7 I ninö më acël më cabit, wan ëcökërë

kanya acél më poko i ogati. Paulo obedo twak ki jii, piën onwongo dong mitö cidihö ökö kodiko mërë, cë ën obedo twak naka dingwor. 8 Tara na pol onwongo tye ka lyël i öt na malö na wan ëcökërë ië. 9 Na Paulo onwongo mëdërë amëda ki twak, athin awobi na nyingë Yutiko onwongo obedo i derica cë ninö ömakö wangë rwök ëka opodho piny ki i derica më öt më adek na malö, cë etingo ën na dong öthö. 10 Ëntö Paulo oidho piny cë oryebere i kom awobi nön, ëka öthünö cë öcakö kobo ni, "Kür ipar unu, ën pod kwö." 11 Cë Paulo öidhö ödök i öt na malö, opoko i ogati ëka öcamö gini kanya acél. Paulo ömëdërë ki twak naka piny oru cë öcakö cidihö. 12 Jii otero awobi nön na kwö yo pacö ëka na cwinygi yom rwök. 13 Wan ëcidihö anyim ki mel cë ëkwang naka i Acco, kanya onwongo wan ebino më kwanyö Paulo ki ië. Ën onwongo öyübërë më woth ki tyënë yo kunön. 14 I karë na ën oromo ködwa i Acco, ëkwanyö ën ki mel cë wan ëcidihö ködë kanya acél naka yo Mitilene. 15 Wan ëcakö kwang ki kunön ëka kodiko mërë ethuno kany mörö n'opimere ki Kioc. Kinge ninö nön wan ëngölö naka yo cula nam më Camoc ëka kinge ninö acél wan ethuno i Mileto. 16 Paulo onwongo omoko thama mërë më kwang kalö Epeco akala, ëk kür ëbal caa i lobo Acia, piën onwongo mitö cidihö piöpiö ëk ka twërë ebed i Jerucalëm i ninö më Pentekot. 17 Ëntö i karë na wan ethuno i Mileto, Paulo ooro köp yo Epeco më cwodo edong ka jö n'oye Kiricito ëk obin gini bothe. 18 I karë na gin othuno, ën okobo nigí ni, "Un ingeo unu kite na an akwö ködë i kinwu, cakërë i ninö më acél na an abino ködë i lobo Acia. 19 An atio both Rwoth ki mwolo na dit rwök ëka ki pii wanga, kadí bed onwongo atye i atëmatëma na rac n'Eyuda öyübö gini i koma. 20 Un ingeo ni an ba abedo ki lworö më titö niwu köp mörö na twërö könyöwu, ëntö an apwonyowu i kin lwak ëka i öt ki öt. 21 An abedo kobo köp n'atir both Eyuda ëka both jö Girik ni myero ongut gini ki kom bal cë ölökerë gini both Obanga ëka obed gini ki yee i kom Rwothwa Yecu. 22 "Kobedini dong an atye ka cidihö yo Jerucalëm nakun abedo amabuc ka Tipo Naleng, na ba angeo ngö na bino timërë i koma ki kunön. 23 Gin na an angeo këkën ënë ni Tipo Naleng öcika ni i pacö kibëc, buc ëka pëkö tye ka kemo koma. 24 Ëntö kwöna anëno calö gin mörö na köny mërë ope ki botha, thwara ka atio ködë më tyeko tic na Rwoth Yecu ömia—tic më miö caden më Emuth na Bër më kica k'Obanga. 25 "Kobedini dong an angeo ni ngat mörö ope ki kin jö na an abedo titö köp më Ker k'Obanga bothgi na dök bino nënöna. 26 Pi manön, an akobo bothwu tin ni, ka kwö ka ngat mörö ki i

kinwu bino rwenyo, remo mërë ope i wia. 27 Piën ba abedo ki lworö më titö niwu gin na kibëc n'Obanga mitö ni inge unu. 28 Gwökërë unu kenwu ëka ki jö kibëc na Tipo Naleng okethowu më gwökögi. Bed unu ëkwath ka jö k'Obanga n'oye Kiricito na ën öwilo ki remo ka Kiricito kikome. 29 Angeo ni, ka dong ayaa ökö, orudi na ger bino bino i kinwu ëka ba bino wëkö rom. 30 Naka thon jö mökö ki kinwu bino gini yaa më lökö köp n'atir ökö ëk öywa ëlúbkör Yecu i körgi. 31 Pi manön gwökërë unu! Po unu ni onwongo abedo coko ngat acélacél ki i kinwu na ba aling pi mwaka adek kiwor ëka kiceng, nakun akok ki pii wanga. 32 "Kobedini dong an amiöwu i cing Obanga ëka ki köp më kica mërë na twërö miö idöngö unu, ëka bino miöwu inwongo gin na ën öyübö më miö both jö kibëc na ën ölönyögi. 33 An ba abedo ki miti i kom ryal, gol onyo böngü ka ngat mörö. 34 Un ki komwu ingeo unu ni an anwongo gin na kibëc na mitërë botha ëka both jö na an atio ködgi ki tic më cinga. 35 I kom tic kibëc na an dong atio, anyutho niwu ni, ki tic na tæk myero ëköny jö na görü, nakun epo i kom köp na Rwoth Yecu ki kome okobo ni: 'Gum na thwönë tye i miö na löö gamö.'" 36 I karë na dong otyeko kobo köp nön, ën orumo cöngë piny ködgi kibëc ëka ölëgö. 37 Gin kibëc okok ki pii wang-gi, nakun thünö gini ngut Paulo ëka emotho ën ki moth më mar. 38 Gin n'ocwero cwinygi rwök ënë köp na ën okobo ni gin ba dök bino nënö wangë. Cë ökwangö gini ën i mel.

21 Kinge na dong epokere ködgi, wan ëcakö kwang ki mel atir më cidihö naka i Koc. Kodiko mërë wan ëcidihö naka i Rodec, ëka ëya ki kunön ëcidihö naka i Patara. 2 I karë na wan enwongo mel na cidihö yo Poiniki, ëcakö dönyö ië ëka ëmëdërë ki wothwa. 3 I karë na wan ënëno cula nam më Cairpac ewok ki kukwap mërë, ëka ëkwang naka i lobo Ciria. Wan ethuno i Turo, kanya myero ëkwany yec ökö ki i mel. 4 I karë na wan etye kunön enwongo ëlúbkör Yecu, ebedo bothgi pi ninö abirö. Tipo Naleng ömöggi öjükö Paulo ni kür öcidihö yo Jerucalëm. 5 Ëntö i karë na ninöwa örömö më yaa, wan edwogo i mel. Ëlúbkör Yecu kibëc mëd ki mon ëka ëthinö owotho ködwa më yaa ki i pacö më cidihö i dhö nam ëka ki kunön erumo cöngwa më lëga. 6 Kinge mothogi, wan ëcakö dönyö i mel, ëka gin ödök cen yo pacö. 7 Wan ëmëdërë ki wothwa më yaa ki i Turo, cë ethuno i Potolemai ëka emotho utmego cë ebedo ködgi pi ninö acél. 8 Kodiko mërë na wan eyaa, ëcidihö ethuno i Cecaria ëka ebedo i öt ka Pilipo atir Emuth na Bër na yam ën ngat acél i kin jö abirö. 9 Ën onwongo tye k'anyira mërë angwën na bara ënyömögi na gin obedo edwarpiny.

10 Ī karē na wan ebeto kunōn pī nīnō mōrō na popol, adwarpīny na nyingē Agabu obino n'ōya kī Ī Yudea. 11 Ēn obino yo bothwa, cē ōkwanyō del mē wang pyēr Paulo, otweo kī cīngē ēka tyēnē cē okobo nī, "Tīpo Naleng okobo nī, 'Man ēnē kite n'Eyuda na tye Ī Jerucalem bino tweno won del nī ēka ebino mīō ēn ĩ cīng Erok.'" 12 Ī karē na wan ewinyo kōp nī, wan kanya acēl kī jō na kunōn ēkwaō Paulo nī, "Kūr ōcīdh yo Jerucalem." 13 Cē Paulo ōgamō nī, "Pīngō ikok ēka ĩbalō unu cwinya? An ayūbara pathī pī tweco kēkēn ēntō naka thon mē thōō Ī Jerucalem pī nying Rwoth Yecu." 14 Ī karē na ēn ba oyeo thamawa, wan ēcakō wēkō ēn nakun ekobo nī, "Ēk gin na Rwoth mītō ocoberē." 15 Kinge nīnō nōn gīnī, wan ēcakō yūbērē mē cīdhō yo Jerucalem. 16 Ēlūbkōr Yecu mōkō n'ōya gīnī kī Ī Cecaria owotho kōdwa naka ĩ pacō ka Munacon, kanya myero wan ebeto iē. Ēn onwongo obeto dhanō mē Caiprac na yam cōn ōcakō bēdo alūbkōr Yecu. 17 Ī karē na wan ethuno ĩ Jerucalem, utmego ōjōlōwa gīnī kī yom cwiny. 18 Kodiko mērē Paulo ōcīdhō kōdwa both Yakobo, ēka edong kībēc onwongo tye gīnī. 19 Kinge mothogī, cē ēn okobo bothgī kōrē kī kōrē tic n'Obanga otio na pol ĩ dhō tic mērē ĩ kin Erok. 20 Ī karē na gīn owinyo kōp nī, gīn ōpakō Obanga. Cē okobo gīnī both Paulo nī, "Ōmīnwa, in ĩnēn, Eyuda elip adi na dong oye gīnī, ēka gīn kībēc lūbō cīk ka Muca rwōk. 21 Ēnīangōgī nī in ipwonyo Eyuda kībēc na bēdo gīnī ĩ kin Erok nī ēk ōwēk gīnī lūbō cīk ka Muca ōkō, nakun ikobo nīgī nī kūr ōlīr ēthīnōgī onyo ōlūb gīnī cīkwa. 22 Ngō na myero wan ētīm? Gīn bino winyo nī in ebino. 23 Cē dong tīm gin na wan ekobo nīnī. Wan etye kī cwō angwēn kany na dong okwongere gīnī ōkō. 24 Woth kī jō nōn ēka ilonyiri kanya acēl kōdgī, cē ĩcūl līm na mītērē, ēk ōlyēl gīnī wigī ōkō. Cē jō kībēc bino ngeeno nī kōp n'onwongo ebeto ka twakō ĩ komi obeto twodo, ēntō in kīkomi itye ka gwōkō cīk. 25 Ēntō pī Erok n'oye, wan etyeko cōnō waraga bothgī kī kōp na wan emoko nī, kūr ōcam gīnī cem n'ētyērō both cal jwogi, kūr ōcam gīnī remo, kūr ōcam gīnī ringo leeni n'ēdēō adēa ēka ōkwēr gīnī tīm ōlyang ōkō." 26 Kodiko mērē Paulo otero jō nōn ēka ōlōnyērē kanya acēl kōdgī. Cē ōcīdhō gīnī ĩ ōt k'Obanga mē mītō negē ĩ kom nīnō dwe na nīnō mē lōnyērē bino jik iē ēka mīc ebino mītō pī ngat acēlacēl. 27 Ī karē na nīnō abīrō mē lōnyērēgī dong cwōk thum, Eyuda mōkō n'ōya gīnī kī ĩ lobo Acia ōnēnō gīnī Paulo kī ĩ ōt k'Obanga. Gīn orubo lwak kībēc ēka ōmakō gīnī ēn, 28 nakun redo gīnī na tēk nī, "Un jō mē Icarael, kōnywa unu! Man ēnē ēcwō na tye ka pwonyo jī na rac ĩ kabedo kībēc, ĩ kom jō na mēwa, cīk na mēwa,

naka kabedo nī. Ēka na dong lōō kībēc ēn okelo jō Girik ĩ ōt k'Obanga, cē ōpyēdō kabedo na leng nī." 29 Gīn okobo nī kōman piēn gīn onwongo ōnēnō Tropimo n'obeto dhanō mē Epeco na tye kanya acēl kī Paulo ĩ pacō, ēka ōthamō nī onyo Paulo ēnē okelo ēn ĩ ōt k'Obanga. 30 Ī pacō kībēc orubere ēka jī obino gīnī kī ngwēc kanya acēl ēka ēmakō Paulo cē ōywaō gīnī ēn kī ĩ ōt k'Obanga, cūcūth olozo gīnī dholokek ōkō. 31 Na gīn dong onwongo mītō neko ēn, kōp othuno both adit acikari nī pacō mē Jerucalem kībēc onwongo tye ka rubere. 32 Ēn ōcakō kwanyō edite cūcūth ēka acikari cē ōngwēcō kōdgī yo both lwak. Ī karē na lwak ōnēnō gīnī adit ēka acikari mērē, gīn ōwēkō pwodo Paulo ōkō. 33 Adit acikari obino ēka ōmakō ēn, cē ōmītō twērō nī etwe ēn kī jēgēlē arīō. Cē openyo lwak nī, "Nga ēnōn, ēka ōbalō ngō?" 34 Jō mōkō kī kin lwak oredo gīnī nakun kōpgī ba rwatērē, jō nōkēnē kobo man ēka jō nōkēnē kobo gin na path. Kinge n'adit acikari ba ōnīang ĩ kom kōp kīkome pī wōō n'obeto na thwōnē, ōmītō twērō nī ēk eter Paulo ĩ laī. 35 Ī karē na Paulo othuno mē ĩdhō malō, gero ka lwak ōmēdērē rwōk naka acikari otingo ēn atinga ĩ wi baagi. 36 Lwak n'obeto ka lūbōgī ōmēdērē gīnī kī wōō nakun redo gīnī nī, "Nek ēn ōkō!" 37 Ī karē n'onwongo acikari dong cwōk dōnyō kī Paulo ĩ laī, Paulo openyo adit acikari nī, "Atwērō twak kodi?" Ēn ōgamō nī, "In ingeo lēb Girik? 38 Pathī in ēnē dhanō mē Eijp na yam ōcakō jēm ēka otero enek elip angwēn yōkō ĩ thīm?" 39 Paulo ōgamō nī, "An abeto Ayuda, dhanō mē Taruco ĩ lobo Cilicia, anywōlī mē pacō na pīrē tēk rwōk. Ōma! Akwai ĩmīa atwak kī lwak." 40 Adit acikari oyeo ēka Paulo ōcakō cung malō cē ōjūkō lwak kī cīngē. Ī karē na gīn kībēc dong ōlīng, ēn ōcakō twak kōdgī ĩ lēb lburu.

22 "Utmegona ēka jō ka bebena, winy unu pido na an akelo bothwu." 2 Ī karē na gīn owinyo ka ēn tye ka twak kōdgī ĩ lēb lburu, gīn ōcakō līng moth. Cē Paulo okobo nī, 3 "An abeto Ayuda, ēnywōla ĩ Taruco na tye ĩ Cilicia, ēntō adōngō ĩ pacō nī, apwonyina obeto Gamaliel. An epwonya rwōk ĩ kom cīk ka kwarōwa. An abeto kī cwiny mē wōrō Obanga kite na un thon itye unu kōdē tīn. 4 An abeto yelo ēlūbkōr Yoo nī naka inekogī, ēka tweo cwō kī mon ĩ buc. 5 Alamdhōk na Dit ēka jō kībēc na bēdo ĩ ōd okiko obeto gīnī cadēn-na. An thon agamō waraga kī bothgī mē cīdhō yo both utmegogī na tye ĩ Damaciko, ēka acīdhō yo kunōn mē kelo jō nī na calō emabuc yo Jerucalem ēk ēmīīgī pwod. 6 "Ī karē na an atye ka woth, na dong acwōk kī Damaciko na caa abicēl mē kīceng dong cwōk rōmō, tar na ryēny rwōk ōya

kí wi polo athura éka ömënya ögúra dyere. 7 An apodho piny i ngöm éka awinyo dwön mörö na kobo ni, 'Caulo! Caulo! Pingö itye ka yelona?' 8 "An agamö ni, 'In inga, Rwoth?' "En ögamö ni, 'An Yecu më Najaret, na in itye ka yelo.' 9 Ewodha önëñö gini tar ëntö ba öniang gini dwön ngat n'onwongo tye ka twak köda. 10 "Cë an agamö ni, 'Rwoth ngö na myero atim?' "Rwoth okobo ni, 'Yaa malö éka icidh yo Damaciko. Ebino kobo nini gin na kibëc n'ëmiö ni ëk itim ki kunön.' 11 Ewodha öpëa ki cinga yo Damaciko piën ryëny ka tar onwongo oneko wanga ökö. 12 "Ecwö mörö na nyingë Anania obino më nënöna. En onwongo obedo dhanö na wörö Obanga nakun lübö cik ka Muca kibëc éka dhanö n'Eyuda kibëc na bedo kunön wörö. 13 En obino ocung i ngeta éka okobo ni, 'Ömëra Caulo, ëk wangi öyabërë!' Éka i caa nön cücüth wanga öyabërë cë anëñö ën. 14 "Cë ën okobo ni, 'Obanga ka kwere onu oyeri ëk inge ngö na ën mitö, inën Ngat na Kite Atir éka iwiny köp na ën twakö. 15 In ibino bedo acaden mëre both jö kibëc i kom ngö na in inëñö éka iwinyo. 16 Kobedi dong ngö na in itye ka kürö? Yaa malö, ëk ebatica in éka ëlwök balni nakun icwodo nying Rwoth.' 17 "i karë na an adök yo Jerucalem éka onwongo atye i lëga i öt k'Obanga, acakö nëñö anyuth 18 éka anëñö Rwoth ka tye ka twak na kobo niina ni, 'Yaa ökö piöpiö iwëk Jerucalem, piën gin ba bino yeo köp më caden-ni na in itye ka kobo i koma.' 19 "An agamö ni, 'Rwoth, jö ni ngeo gini ni an abedo ka woth i cinagoga kibëc më pwodo jö n'oye i komi éka më terogi i buc. 20 Éka i karë n'eneke acaden-ni Citiupwano, an onwongo acung kunön nakun acwakö ngö n'ötümërë éka agwökö naka thon böng ka jö n'onwongo tye ka neko ën.' 21 "Cë Rwoth okobo nina ni, 'Apë, an abino oroni yo kanya bor both Erok.'" 22 Lwak obedo ka winyo Paulo naka ën okobo köp ni. Cë gin öcakö redo ki dwön na malö ni, "Nek unu ën ökö! En ba opore më bedo na kwö i lobo!" 23 Na gin onwongo tye ka wöo nakun bolo böng-gi éka ëkirö apua malö, 24 adit acikari ömiö twërö ni ëk eter Paulo i lai. En öcikö ni ëk epwod ki del éka epeny ën pingö jii onwongo tye ka wöo i kome ni kömanön. 25 i karë na gin otweo Paulo ëk epwod ki del, ën okobo both adit acikari n'ocung kany nön ni, "Cik yeo ni epwod ngat mörö n'obedo dhanö më Roma na bara ëngölö köp ölöö ën?" 26 i karë n'adit acikari owinyo köp ni, ën öcidhö okobo both adit acikari nököñë. En openyo ni, "Ngö na in ibino timö? Ecwö ni obedo dhanö më Roma." 27 Adit acikari öcidhö both Paulo éka openyo ni, "Kob niina, in ibedo dhanö më Roma?" En ögamö ni, "Eyo, an abedo." 28 Cë adit acikari okobo ni, "An

acülö wel na thwönë rwök më bedo dhanö më Roma." En tö Paulo ögamö ni, "An ënywöla anywöla ië." 29 Jö n'onwongo öyübërë më penyo ën ojer gini cen cücüth. Adit acikari thon obedo ki lworo i karë na ën öniang ni Paulo na ën etweo obedo dhanö më Roma. 30 Kodiko mëre, kite n'adit acikari onwongo mitö niang i tyën köp kikokome n'ömiö Eyuda odotho gini Paulo, ën ögönyö Paulo cë öcikö ni ëk editë ëlamdhök éka athuko më öd okiko k'edong kibëc ögürë gini. Cë ën okelo Paulo éka ömiö ocung i nyimgi.

23 Paulo öcikö wangë i kom athuko më öd okiko k'edong n'öcökërë gini cë okobo ni, "Utmegona, an abedo kwö na cwinyo bër i nyim Obanga naka tin." 2 Alamdhök na dit na nyingë Anania ömiö twërö both jö n'ocung i nget Paulo ëk odhong gini dhögë. 3 Cë Paulo okobo ninë ni, "Obanga thon bino dhongoni, in kor öt n'epuo na tar! In ibedo kany nön më ngölö köp niina na lübërë ki cik, nakun in kikomi itürö cik më miö twërö ni myero edhongal!" 4 Jö n'onwongo ocung gini i nget Paulo okobo ni, "In ba iparö më yanyö Alamdhök na Dit k'Obanga?" 5 Paulo ögamö ni, "Utmegona, an ba angeo ni ën obedo Alamdhök na Dit, piën ëcöo ni, 'Kür itwak gin mörö na rac i kom alóc na löö jö na meg.'" 6 En tö ka Paulo öniang ni jö mökö ki kin-gi obedo Ecadukayo éka jö nököñë obedo gini Eparicayo, cë ën oredo ki i athuko më öd okiko k'edong ni, "Utmegona, an abedo Aparicayo, wod k'Aparicayo. An acung kany më tëmöna ki pido piën atye ki gen i kom cer ka jö n'öthöo." 7 i karë na ën okobo köp ni, apokapoka öcakërë i kin Eparicayo k'Ecadukayo éka athuko opokere ökö. 8 Piën Ecadukayo kobo gini ni cer mörö ope éka emalaika onyo tipo gini thon ope ëntö Eparicayo yee gini i komgi kibëc. 9 Cë wöo obedo na thwönë rwök éka epwonye mökö më cik n'onwongo obedo gini Eparicayo öya malö cë opyem gini na kobo ni, "Wan ba enwongo gin mörö na rac i kom dhanö ni, cë ka tipo onyo malaika ëñë ötwak ködë?" 10 Pyem ömëdërë rwök naka adit acikari onwongo dong lwor ni gin römö yëyëcö Paulo na thithinö. En ömiö twërö both acikari më cidhö yo piny bothgi ëk ökwany gini Paulo ökö ki bothgi ki tükö éka ekel ën i lai. 11 Kodiko mëre i kiwor, Rwoth ocung i nget Paulo cë okobo ni, "Dii cwinyi! Kite na in imiö caden i koma i Jerucalem, cë myero in thon imiö caden i Roma." 12 Na dong piny oru, Eyuda mökö öyübö gini köp kanya acël nakun kwongere gini ni gin ba ebino cem onyo madhö gin mörö naka ka wang eneko gini Paulo. 13 Jö n'öyübö gini köp ni welgi onwongo kadhö pyer angwën. 14 Gin öcidhö okobo both ëlamdhök na

dito ëka edong nĩ, "Wan etyeko kwongere na tẽk nĩ ba ebino camõ onyo madhõ gin mörõ naka ka wan eneko Paulo. 15 Pĩ manõn un kanya acẽl k'athuko mẽ õd okiko k'edong myero iter unu kõp both adit acikari ëk okel ẽn ÿ nyimwu na calõ pod ibino unu mẽdẽrẽ mẽ rangõ kõp mẽrẽ na bẽr. Wan ẽyübẽrẽ õkõ mẽ neko ẽn na bara ẽn othuno na cwõk kany." 16 Ẽntõ ÿ karẽ n'okeo ka Paulo owinyo kõp n'ẽyübõ ni, ẽn õcĩdhõ ÿ laĩ cẽ okobo nĩ Paulo. 17 Cẽ Paulo ocwodo adit acikari acẽl ëka okobo ninẽ nĩ, "Ter athĩn awobi ni both adit acikari na lõõwu, ẽn tye kĩ kõp mörõ na ẽn mitõ kobo ninẽ." 18 Ẽka ẽn otero awobi ni both adit acikari na lõõgĩ. Adit acikari okobo nĩ, "Paulo n'obedo amabuc ocwoda cẽ õkwa nĩ ëk akel awobi ni bothi piẽn ẽn tye kĩ kõp mörõ na ẽn mitõ kobo nini." 19 Adit acikari na lõõgĩ õmakõ cĩng athĩn awobi ni cẽ otero ẽn thenge ëka openyo nĩ, "Ngõ na in imitõ kobo nĩna?" 20 Ẽn okobo nĩ, "Eyuda mõkõ oyere gĩnĩ dong mẽ penyonĩ ëk ikel Paulo diki ÿ nyim athuko mẽ õd okiko k'edong, na calõ gĩn pod ebino mẽdẽrẽ mẽ rangõ kõp mẽrẽ na bẽr. 21 Ẽntõ in kũr iyee nigĩ piẽn tye jõ na kadhõ pyer angwẽn kĩ kin-gĩ na tye ka kũrõ ẽn ÿ yoo. Gĩn okwongere õkõ nĩ ba ebino camõ onyo madhõ gin mörõ naka ka wang n'eneko gĩnĩ Paulo. Gĩn dong õyübẽrẽ õkõ kobedini, tye gĩnĩ ka kũrõ ngõ na in ibino kobo ÿ kwacgĩ." 22 Adit acikari na lõõgĩ õmiõ athĩn awobi ni õcĩdhõ nakun cĩkõ ẽn nĩ, "Kũr ikob both ngat mörõ nĩ in ikobo kõp ni botha." 23 Cẽ adit acikari na lõõgĩ ocwodo edite wi acikari arĩõ ëka okobo nigĩ nĩ, "Yũb unu acikari mia arĩõ, wegĩ angole pyer abirõ ëka wegĩ tĩng mia arĩõ ëk õcĩdh gĩnĩ yo Cecaria caa adek mẽ kiwor. 24 Yũb unu thon angole nĩ Paulo õngwęc kõdẽ ëk ethun kõdẽ na bẽr both adit Pilice." 25 Cẽ adit acikari na lõõgĩ õcõõ waraga kõman: 26 An Kalaudio Liciac amothi in adit Pilice. 27 Ẽcwõ ni Eyuda ẽnẽ õmakõ ëka onwongo dong cwõk neko gĩnĩ, ẽntõ an acĩdhõ bothgĩ k'acikarina cẽ alarõ ẽn kĩ ÿ cĩng-gĩ, piẽn onwongo anĩang nĩ ẽn obedo dhanõ mẽ Roma. 28 An onwongo amitõ ngeno ngõ na gĩn odotho ẽn iẽ, cẽ akelo ẽn ÿ nyim athuko mẽ õd okiko k'edong-gĩ. 29 An anwongo nĩ edotho ẽn k'adoth na makõ cikgĩ, ẽntõ kõp mörõ onwongo ope na rõmõ miõ ẽngõlõ ninẽ thõõ onyo tweno ẽn ÿ buc. 30 ÿ karẽ n'ẽnianga nĩ gĩn õyübõ kõp mẽ neko ẽcwõ ni, an abũnyõ oro ẽn õkõ bothi cücũth. An thon acikõ jõ n'odotho ẽn mẽ miõni adothgĩ na gĩn odotho kĩ ẽn kõdẽ. 31 Cẽ acikari owotho gĩnĩ kĩ Paulo ÿ kiwor naka etero ẽn yo Antipatiric kite n'ẽcĩkõgĩ kõdẽ. 32 Kodiko na pĩny dong oru, gĩn õcakõ dõk yo laĩ ëka ẽwẽkõ wegĩ angole mẽ woth kõdẽ. 33 ÿ karẽ na wegĩ angole othuno gĩnĩ ÿ Cecaria, gĩn õmiõ waraga both adit

Pilice ëka õmiõ gĩnĩ Paulo thon bothe. 34 Adit Pilice õkwanõ waraga cẽ openyo Paulo lobo na ẽn õya kĩ iẽ. ÿ karẽ na ẽn õniang nĩ Paulo õya kĩ ÿ Cilicia, 35 cẽ ẽn okobo nĩ, "An abino winyo pidoni ka jõ n'odothi obino gĩnĩ kany." Ẽka ẽn dong õmiõ twẽrõ nĩ myero ẽgwõk Paulo ÿ laĩ na yam Erode õgẽrõ.

24 Kinge nĩnõ abic alamdhõk na dit na nyingẽ Anania obino k'edong k'Eyuda ëka apid-kõp mörõ na nyingẽ Terutulo, mẽ miõ adothgĩ ÿ kom Paulo ÿ nyim adit Pilice. 2 ÿ karẽ n'ecwodo Paulo, Terutulo õcakõ dotho ẽn ÿ nyim Pilice nakun kobo nĩ, "Wan ebeto kĩ kuc pĩ karẽ na lac ÿ thẽ lõc na megĩ ëka neno na megĩ okelo niwa alõkalõka na pol ÿ lobo ni. 3 ÿ kabedo kibẽc ëka kĩ kit yodhi na papath, adwong Pilice, wan iwa yom ÿ komi rwõk. 4 Ẽntõ na bara aterõ na bor rwõk, akwai ëk ibed kĩ kica mẽ winyo kõpwa na cecek. 5 "Wan enwongo nĩ dhanõ ni obedo ngat na kelo ayela. Ẽn obedo kelo arubaruba ÿ kin Eyuda na tye ÿ lobo thũkũl. Ẽn thon obedo atẽla wi dul jõ mẽ Najaret, 6 ëka ẽn thon õtẽmõ pyẽdõ naka õt k'Obanga, cẽ wan ẽmakõ ẽn õkõ. 7 Ẽntõ adit acikari na nyingẽ Liciac obino bothwa kĩ gero na thwõnẽ rwõk cẽ õkwanyõ ẽn õkõ kĩ ÿ cĩngwa. 8 In itwẽrõ nwongo kõp na tĩr mẽ adothwa ka in kikomi ipenyo ẽn." 9 Eyuda õribẽrẽ gĩnĩ ÿ kom adoth nõn ëka omoko gĩnĩ nĩ kõp ni kibẽc tye atĩr. 10 ÿ karẽ n'adit Pilice õcimõ Paulo nĩ ëk õtwakĩ, ẽn õdõk iẽ nĩ, "Adwong, angeo nĩ ibeto angõl-kõp mẽ rok ni pĩ mwaka na pol cẽ an cwinya yom mẽ pido ÿ nyimi. 11 In itwẽrõ nwongo piõpiõ nĩ an pod athuno ÿ Jerucalem na nĩnõ apar arĩõ bara opoth mẽ cĩdhõ wörõ Obanga. 12 Jõ n'odotha ba onwongo gĩnĩ nĩ an atye ka pyem kĩ ngat mörõ ÿ õt k'Obanga onyo rubo lwak ÿ cinagoga kibẽc onyo kany mörõ nõkẽnẽ kĩ ÿ pacõ. 13 Ẽka gĩn ba twẽrõ moko bothi kõp mẽ adoth na gĩn kobedini tye ka kobo ÿ koma. 14 Ẽntõ an aye nĩ an awörõ Obanga ka kwere onu na calõ alũb kõr Yoo, na gĩn cwodo nĩ obeto dul mörõ. An aye ÿ kom gin na kibẽc n'ẽcõõ ÿ cik ka Muca ëka mẽ k'edwarpiĩny, 15 ëka an thon atye kĩ gen ÿ kom Obanga, na gĩn kikomgĩ thon yeo gĩnĩ nĩ cer ka jõ na kitegĩ atĩr ëka kĩ jõ na kitegĩ ba tye atĩr bino bedo tye. 16 Pĩ manõn õmiõ an ÿ karẽ kibẽc atẽmõ mẽ bedo na cwinya leng ÿ nyim Obanga ëka dhanõ. 17 "Kinge mwaka na pol, an abino acĩdhõ yo Jerucalem mẽ tero mĩc both jõ na mẽga n'obeto gĩnĩ ẽcan ëka mẽ miõ tyẽr both Obanga. 18 ÿ karẽ na an atio tic ni, gĩn onwonga ÿ dyekal õt k'Obanga na dong atyeko lõnyẽrẽ. Lwak onwongo ope ÿ ngeta ëka ayela mörõ thon ope. 19 Ẽntõ Eyuda mõkõ n'õya gĩnĩ kĩ ÿ lobo Acia, n'onwongo myero obed gĩnĩ ÿ nyimi

kany ēka okel gini adoth, ka gin tye ki kōp mōrō i koma. 20 Onyo jō ni na dong tye gini kany ōcak kobo gini bal na rac na gin onwongo i koma i karē na an acung i nyim athuko mē ōd okiko k'edong, 21 kono ka kōp acēl ni kēkēn, na an akok iē i karē na an acung i nyimgi, kōp na makō cer ka jō n'ōthōō ēnē ōmīō an tin acung i nyimi mē ngōlō kōp i koma." 22 Cē Pilice n'onwongo tye ki ngec n'ōrōmō i kom Yoo ka Rwoth, ōjūkō pido mē mēdērē anyim ēka okobo nī, "An abino ngōlō kōpni ka Liciac adit acikari obino." 23 Ēn ōmīō twērō both adit acikari mē gwōkō Paulo i buc ēntō mē miō ēn bedo abonge ayela mōrō ēka oyeo nī nyikonei mērē mē miō kōny na mitērē bothe. 24 Kinge karē mōrō n'opoth, Pilice obino ki dhakō mērē Drucila n'onwongo obedo Ayuda. Ēn ocwodo Paulo ēka obedo ka winyo ka ēn twak i kom yee i Kiricito Yecu. 25 Ī karē na Paulo tye ka twakō kōp i kom kite atir, gwōkērē kēn ēka ngōlō-kōp na tye ka bino, lworō ōcakō makō Pilice ēka okobo nī, "Manōn ōrōmō pī caa ni! In itwērō cīdhō. Ka dōk anwongo karē cē abino cwodoni." 26 Ī caa nōn thon ēn obedo ki gen nī Paulo twērō miō ēn līm mōrō, pī manōn ēn obedo ka cwodo Paulo jwiwi ēka twak kōdē. 27 Kinge na mwaka ariō opoth, Poricio Pecito oleo ka tyēn Pilice. Ēntō Pilice ōwēkō Paulo i buc piēn ēn onwongo mitō nī Eyuda ōpwō ēn.

25 Ī karē na Pecito obino i lobo n'ēmīō nī ēn ōlōō, kinge nīnō adek ēn ōya ki i Cecaria ōcīdhō yo Jerucalem. 2 Cē ēlamdhōk na dito ēka ētēla k'Eyuda ōcīdhō gini bothe ēka okelo gini adothgi i kom Paulo. 3 Gin ōkwaō Pecito nī ēk ōtīm nīgi bēr ēk ēkōb Paulo ōkō piōpiō yo Jerucalem, piēn gin onwongo ōyūbērē mē kūrō ēn i wanga yoo ēk enek ōkō. 4 Pecito ōgamō nī, "Etye ka gwōkō Paulo i Cecaria, ēka an kikoma thon acwōk cīdhō yo kunōn. 5 Ēk jō mōkō ki i kin ētēlawu obin owoth gini kōda ēk oketh adothgi i kome ki kunōn ka ēn ōtīmō gin mōrō na rac." 6 Kinge tyeko nīnō aboro onyo apar kōdgi, ēn ōdōk cen yo Cecaria, kodiko mērē ēn obedo pīny i ōt pido ēka ōmīō twērō nī ēk ekel Paulo i nyime. 7 Ī karē na Paulo othuno, Eyuda n'ōya gini ki i Jerucalem ocung n'ōgūrō gini ēn dyere k'adoth na pol i kome, na gin ba rōmō moko nī adoth nōn tye atir. 8 Cē Paulo ōcakō pido mērē nī, "An ba abalō gin mōrō i kom cīk k'Eyuda, onyo i kom ōt k'Obanga, onyo i kom Cija." 9 Ēntō Pecito onwongo mitō yomo cwiny Eyuda cē openyo Paulo nī, "In i rōmō cīdhō yo Jerucalem ēk acīdh angōl kōp i kom adoth ni ki kunōn?" 10 Paulo ōgamō nī, "An dong acung ōkō i nyim pido ka Cija, kanya myero ēngōl kōpna iē. An ba abalō gin mōrō i kom Eyuda,

kite na in kikomi thon ingeo na bēr. 11 Ka an abalō bal mōrō na rōmō ngōlō nīna thōō, an ba akwērō mē thōō. Ēntō ka adoth n'Eyuda ni oketho gini i koma obedo kōp twodo, ngat mōrō ope ki twērō mē miōna i cing-gī. Adwōkō kokona both Cija!" 12 Kinge na dong Pecito otyeko larō kōp kanya acēl k'ēmīi thama mērē, ēn ōgamō nī, "In ikok mē pido i nyim Cija, ibino cīdhō yo both Cija!" 13 Kinge nīnō na nōnōk, rwoth Agiripa ēka Berinice othuno gini i Cecaria mē jōlō Pecito. 14 Kite n'onwongo gin bino tero nīnō na pol kunōn, Pecito ōnywakō kōp ka Paulo gin ki rwoth nakun kobo nī, "Ēcwō mōrō tye kany na Pilice obino ōwēkō na calō amabuc. 15 Ī karē na an acīdhō yo Jerucalem, ēlamdhōk na dito ēka edong k'Eyuda okelo gini adoth i kome, ēka openya gini mē ngōlō nīnē thōō." 16 An akobo nīgi nī, "Ba obedo cīk ka jō mē Roma mē miō ngat mōrō i cing jō n'odotho ēn, na bara ēmīō ēn karē mē cung kōdgi i pido, ēk ēn opid pido mērē kōdgi pī gin n'edotho ēn iē. 17 Ī karē na gin obino kōda kany, an ba agalara k'adoth, ēntō kodiko mērē abedo pīny i ōt pido cē amīō twērō nī ēk ekel ēn. 18 Ēntō i karē na jō n'odotho ēn ōya malō mē twak, gin ba odotho ēn i kom bal mōrō n'onwongo an atye ka thamō. 19 Ēntō obedo gini larō kōp i kom dinigi ēka i kom ngat mōrō na nyīngē Yecu na yam ōthōō na Paulo kobo nī kwō. 20 Rangō kōr kōp nōn ōlōa ōkō, ōmīō apenyo ka ēn rōmō cīdhō yo Jerucalem ēk ēcīdh ēngōl kōp mē adoth ni ki kunōn. 21 Ēntō i karē na Paulo okok nī ēk Alōc na Dit ēnē obin ōngōl kōp mērē, cē amīō twērō nī myero ēgwōk ēn i buc naka ebin eter yo both Cija." 22 Cē Agiripa okobo both Pecito nī, "An kikoma amītō winyo kōp ka dhanō nī." Pecito ōgamō nī, "Diki kodiko ibino winyo." 23 Kodiko mērē Agiripa gin ki Berinice obino gini ki thwōn dheo ēka ōdōnyō gini i ōt mē ngōlō-kōp kanya acēl k'edite acikari mē rwōm na malō ēka ētēla mē kin pacō. Ki twērō ka Pecito, ekelo Paulo. 24 Cē Pecito okobo nī, "Rwoth Agiripa ēka ki jō kibēc na tye kōdwa kany, nēn unu dhanō ni! Eyuda kibēc ōbakō gini dhōgi botha i Jerucalem ēka i Cecaria kany, na wōō gini nī ēn ba opore mē kwō. 25 An ba anwongo nī ōtīmō gin mōrō na rōmō ngōlō nīnē thōō, ēntō kite na ēn okok pī Alōc na Dit, an thon amoko mē tero ēn yo Roma. 26 Ēntō an ape ki gin mōrō na myero acōō i kome both Alōc na Dit mē Roma. Pī manōn akelo ēn i nyimwu kibēc, cē rwōk mērē i nyimi in rwoth Agiripa ēk ka onu epenyo ēn, anwong gin mōrō mē acōa. 27 Piēn anēnō nī kōny mērē ope mē tero amabuc mōrō ka ba enyutho kōp mōrō mē adoth i kome."

26 Cê Agiripa okobo both Paulo nĩ, "In itye kĩ twērō mē twak piri keni." Cê Paulo otingo cingē ēka ōcakō pido mērē nakun kobo nĩ, **2** "Rwoth Agiripa, an tin atye kĩ gum mē cung ĩ nyimi mē gamō adoth kibēc n'Eyuda odotha gini ĩē, **3** piēn an angeo nĩ in ingeo na bēr kite mē thēkwarō k'Eyuda ēka kĩ kōp mōkō na gĩn larō ĩ kin-gĩ. Pĩ manōn, an dong akwai ēk idīi cwinyi iwiny kōpna. **4** "Eyuda kibēc ngeo gini kite na an akwō kōdē cakērē ĩ karē na pod abedo athin, anaka ĩ acaki mē kwōna ĩ lobona kikome ēka thon ĩ Jerucalem. **5** Gĩn ōcakō ngenona pĩ karē na lac ēka gĩn twērō moko caden ka mītō gini, gĩn ngeo nĩ an onwongo abedo Aparicayo, nakun alūbō dul mē diniwa na cik mērē tēk rwōk. **6** Ēka kobedi dong pi gen-na ĩ kom gĩn n'Obanga ōcikō both jō ka kwere onu, ēnē ōmīō etye ka pidona tin. **7** Man ēnē cikērē na kaka onu apar ariō tye gini kĩ gen mē nēnō nĩ ocobere kite na gĩn bino tic n'Obanga kĩ cwinigi kibēc kiceng ēka kiwor. Rwoth Agiripa, obedo pĩ gen ni ēnē ōmīō Eyuda tye ka dothona. **8** Pingō jō mōkō kĩ kinwu ba yee nĩ Obanga twērō cero jō n'ōthōō? **9** "An kikoma athamō nĩ myero atim gin na kibēc n'onwongo twērē mē jēm ĩ kom nyīng Yecu mē Najaret. **10** Man ēnē ngō na an abino atimō ĩ Jerucalem. An atweo jō k'Obanga na leng na pol ĩ buc nakun atio kĩ twērō na an anwongo kĩ both ēlamdhōk na dito ēka ĩ karē n'enekogĩ, an abolo kwir nĩ myero ēngöl nigi thōō. **11** Pĩ karē na pol an amīō epwodogĩ ĩ cinagoga kibēc nakun adiōgi mē yanyō nyīng Yecu. An onwongo ager ĩ komgi ēka thon acidhō ĩ peci k'erok mē yelogĩ. **12** "Ī nīnō mōrō an onwongo atye ka cidhō yo Damaciko kĩ twērō ēka kĩ or k'ēlamdhōk na dito. **13** Na dong caa abicēl cwōk rōmō, Adwong, ĩ caa n'onwongo an atye ĩ wanga yoo, an anēnō tar n'ōya kĩ ĩ polo, n'aryēny lōō ceng ōkō, ōryēny ōcarō komwa kanya acēl kĩ jō na an awotho kōdgĩ. **14** Wan kibēc epodho piny, ēka awinyo dwōn mōrō na kobo nīna ĩ lēb lburu nĩ, 'Caulo, Caulo, pingō itye ka yelona? Bedo na tēk nini mē gwēēnō lēb dīnō.' **15** "Cē an apenyō nĩ, 'In ĩnga Rwoth?' "Ēn ōgamō nĩ, 'An Yecu na in itye ka yelo. **16** Kobedi yaa malō ēka icung. An anen bothi mē yērōni mē bedo aticna ēka mē bedo acaden ĩ kom gin na in ĩnēnō kĩ botha ēka gin na an abino nyutho bothi ĩ karē mē anyim. **17** An abino larōni kĩ both jōwu ēka kĩ both Erok. An aori yo bothgi **18** mē yabō wang-gĩ ēka lōkōgi kĩ ĩ cōl piny yo tar, ēka kĩ kom tēkō ka Catan yo both Obanga, ēk obin onwong gini kica ĩ kom bal ēka onwong gini kabedo ĩ kin jō n'Obanga ōlōnyōgi pĩ yee ĩ koma.' **19** "Cē dong rwoth Agiripa, an ba abino akwērō gin anyutha n'ōya kĩ ĩ polo. **20** An atitō kōp mē acaki both jō na tye ĩ Damaciko ēka

thon both jō na tye ĩ Jerucalem naka kĩ jō kibēc na tye ĩ Yudea ēka thon both Erok nĩ jō kibēc myero ongut gini kĩ kom balgi ēka ōlōkērē gini both Obanga ēk onyuth gini atir nĩ gĩn dong ēlōkērē kĩ timō tic na bēcō na gĩn tio. **21** Pĩ kōp ni ēnē ōmīō Eyuda mōkō obino ōmaka gini kĩ ĩ ōt k'Obanga ēka ōtēmō gini mē nekona. **22** Ēntō Obanga ōgwōka naka tin, ēka an acung kany mē mīō caden cakērē kĩ both jō na thīnō naka both jō na dito. An ba apwonyo gin mōrō na path kĩ kōp n'edwarpiny ēka Muca okobo nĩ bino timērē— **23** Meciya myero ōlim can ēka ēn bino cakō cer kĩ kin jō n'ōthōō, ēn bino kelo tar k'Obanga both Eyuda ēka both Erok." **24** Ī karē na Paulo tye ka mēdērē kĩ pido mērē, Pecito oredo kĩ dwōn na malō nĩ, "Paulo, in ipo, kwan rwōk ōmīō idōkō apoa." **25** Ēntō Paulo ōgamō nĩ, "Adwong Pecito an ba apo, gin na an atwakō tye atir ēka obedo mē niang. **26** Ēka rwoth Agiripa ngeo kōp ni kibēc. An atwak abonge lworo piēn angeo nĩ kōp ni kibēc ēn tye kĩ ngec ĩē. Ba tye kōp mōrō n'ōtimērē ĩ mung. **27** Rwoth Agiripa, in iye kōp k'edwarpiny? An angeo nĩ iye." **28** Cē Agiripa okobo both Paulo nĩ, "In ĩthamō nĩ ĩ kom caa na nōnōk ĩtwērō lōkōna mē bedo Akiricito?" **29** Paulo ōgamō nĩ, "Kadi bed pĩ caa na nōnōk onyo na lac, an alēgō both Obanga nĩ pathi in kēkēn ēntō naka jō kibēc na tye gini ka winyo kōpna tin ēk obed gini calō an, na path kĩ jēgēlē ni." **30** Cē rwoth Agiripa, adit Pecito, Berinice ēka kĩ jō kibēc ōya malō ēka ōcidhō gini. **31** Na gĩn tye ka cidhō yōkō, ōtwak kēngi ēka oyere gini nĩ, "Ēcwō ni ba ōtimō gin mōrō na rac na rōmō ngōlō nīnē thōō, onyo cidhō ĩ buc." **32** Ēka Agiripa okobo both Pecito nĩ, "Dhanō nĩ onwongo myero ēgōny ōkō ka onwongo ēn ba okok mē pido ĩ nyim Cija."

27 Ī karē na dong emoko nĩ myero wan ēkwang mē cidhō yo Itali, Paulo ēka emabuc nōkēnē ēmīōgi ĩ cing adit acikari na nyīngē Juliac, na lōō nget dul mia acēl kĩ kin dul acikari n'ecwodo nĩ Augucito. **2** Wan ēdōnyō ĩ mel n'ōya kĩ Adramitio n'onwongo cwōk kwang mē cidhō ĩ dhō nam mē lobo Acia, ēka wan ēcidhō ĩ dhō nam, wan k'Aricitako dhanō mē lobo Macedonia na tye ĩ Tecalonika. **3** Kodiko mērē wan ethuno ĩ Cidon, ēka Juliac kĩ cwinye na bēr ĩ kom Paulo, ōwēkō ēn mē cidhō both nyikonei mērē ēk ōmīi gini ēn gin na ēn mītō. **4** Kĩ kunōn, wan dōk ēya mē kwang cē ewok ĩ nget cula nam mē Caiprac piēn yamō onwongo yelowa. **5** Ī karē na dong ēkwang ēngölō dye nam na lac n'opimere kĩ dhō nam mē Cilicia ēka Pampulia, wan ethuno ĩ Mira na tye ĩ Licia. **6** Kĩ kunōn adit acikari onwongo

mel n'öya ki i Alegijandaria na tye ka cïdhö yo Itali, cê ömiöwa ëdönyö ië. 7 Wan ëkwang momoth pi nïnö na pol, ëka ethuno ki tøk i nget lobo Kuniduc. I karë na yamö öjükwöwa ökö më mëdërë atir, wan ëkwang eroko nget cula nam më Kurete n'opimere ki Calamone. 8 Wan eroko nget cula nam më Kurete ki tøk cê ethuno i kabedo n'ecwodo ni Kabedo na Bër na mel cung ië, na cwök ki pacö më Lacea. 9 Wan onwongo ëbalö caa na pol ëka kwang thon onwongo ödökö na rac, piën nïnö na dit më Rio Kec onwongo opoth ökö. Cê Paulo ötwak K'editë më mel ni, 10 "An anënö ni wothwa ni bino bedo na rac, ëka bino rwenyo jami na pol ki i mel, pathi yêc këkën ëntö kwö onu thon." 11 Ëntö adit acikari nakaka winyo ngö na Paulo okobo, ën öliübö thama k'adwö mel ëka më ka won mel. 12 Kite na kanya mel cung ië nön onwongo ba bër i karë më ngicö, jö na pol öthamö ni myero ëkwang ëcïdh gïni anyim, ki gen më thuno i Poinike ëk etyek karë më ngicö kunön. Man onwongo obedo ka cungo ka mel na tye i Kurete, na nyime okemo kukwap kuthö ëka kukuju kuthö. 13 I karë na yamö n'öya ki kukwap öcakö kudho momoth, gin öthamö ni man dong örwatërë ki ngö n'onwongo gin mitö. Cê öcakö gïni ywanö gin na jükö mel ökö ki i pii, ëka öcakö gïni kwang nakun roko gïni nget cula nam më Kurete. 14 Na bara önyikö na bor, yamö na ger n'ecwodo ni, "Yamö më kukuju kukidë" öcakö kudho ki tøk n'öya ki i cula nam. 15 Yamö ömakö mel ëka opango wie na ba dök twërö kemo kukur yamö cê ëwëkö mel më cïdhö kanya yamö mitö terowa ië. 16 Na dong wan eroko nget cula nam na tïdi n'ecwodo ni Kauda, wan ëtëmö ki tøk më larö yeya. 17 I karë n'etic më mel öywaö yeya, otingo gïni ki i pii cê ekelo i mel, gin öcakö miö thöl owok ki i thë mel cê etweo ködë kanya acël. Gin onwongo tye ki lworo ni onyo ërömö dönyö gïni i kwoö më Ciritic i dhö nam më Libia, cê gin öcakö lyano gin na jükö mel piny ëk ömii mel owoth momoth nakun yamö ënë kölö. 18 Kodiko mërë na yamö na ger ömëdërë ki kudho rwök, cê etic më mel öcakö gïni yuno jami ökö ki i mel i öd pii. 19 I nïnö më adek, öcakö gïni yuno jami kom mel mökö i öd pii ki cing-gi. 20 Wan ebedo pi nïnö na pol na ba ënënö wang ceng onyo cër, ëka yamö ömëdërë ki kudho na rac. I ajiki mërë wan ëjalö gen kibëc më larö kwöwa. 21 Kinge na jö n'onwongo tye i mel obedo gïni pi nïnö na pol na ba camö gïni gin mörö, Paulo öya malö ocung i nyimgi cê okobo ni, "Un onwongo myero iwinya unu ëk kür ëya ki i Kurete, kono ba epodho i can ni ëka ki rwenyo jami. 22 Ëntö kobedini akwaöwu ni i'dii unu cwinyuwu, piën kwö ka ngat mörö ki i kinwu ba bino rwenyo, ëntö mel ënë bino bal ökö.

23 Wono kiwor malaika k'Obanga na an abedo dhanö mërë ëka na an atio pirë, obino ëka ocung i ngeta 24 cê okobo ni, 'Paulo, kür ibed ki lworo. In myero icung i nyim Cija, ëka Obanga otyeko miö kwö ka jö na in iwotho ködgi kibëc bothi.' 25 Dong bed unu na cwinyuwu tøk, piën atye ki yee i kom Obanga ni gin na kibëc bino timërë kite na ën okobo nina ködë. 26 Ëntö wang na mel otwomere ki cula nam mörö." 27 I kiwor më nïnö më apar angwën, yamö onwongo pod terowa arii i dyere nam më Adria, cê na dong cwök römö dingwor, etic më mel opimo ni ëcwök thuno gini i ngöm. 28 I karë na gin opimo thuth më i nam cê onwongo gini ni römö tyëlö mia acël ki pyer ariö. Kinge na gin dök önyinyikö na nönök, opimo gini cê onwongo ni thuth mërë römö tyëlö pyer abungwën. 29 Gin onwongo lworo ni mel twërö twomo kidi ki öd nam cê öcakö gini bolo gin na jükö mel angwën ki kungee, ëka öcakö gini lëga ni ëk piny oru. 30 I karë n'etic i mel onwongo tye gini ka rangö yoo më lüü ökö ki i mel, gin otero yeya i nam na calö mitö gini bolo gin na jükö mel ki kunyime. 31 Cê Paulo okobo n'adit acikari ëka acikari gini ni, "Ka etic më mel ba obedo gini i mel onu ba ebino kwö." 32 Cê acikari öcakö gini ngölö thöl na makö yeya ëka ëwëkö opodho i öd pii. 33 I karë na piny dong mitö ruu, Paulo öcükö cwinygï kibëc më cem. Ën okobo ni, "Pi nïnö apar angwën n'opoth, un ibedo ki thwön par na dit ëka ba icamö unu gin mörö. 34 Kobedini akwaöwu icam unu cem mörö pi bedo na kwö. Ngat mörö ope ki kinwa na bino rwenyo yer wie mörö acël." 35 Kinge na dong okobo köp ni, ökwanyö ogati, öpwöyö Obanga i nyimgi ëka opoko ië cê öcakö camö. 36 Gin kibëc cwinygï öjing ëka öcakö gini cem. 37 Jö kibëc na tye i mel onwongo tye 276. 38 I karë na dong ocemo gini oyeng, oyuo gini ngano kibëc i öd nam ëk mel obed na yot. 39 Na piny dong oru, gin ba ongeo lobo nön, ëntö önenö gini dhö nam n'opong ki kwoö, kanya gin omoko thamagi më tero mel ië ka twërë. 40 Öngölö gini gin na jükö mel, cê ëwëkö ölüny ökö i nam, i caa nön thon ögönyö gini thöl na makö gin n'ëdwö ki mel. Cê öngabö gini böngü na tïdi ki kunyime ëk yamö ömaki, ëka ëwëkö mel öcïdhö na kemo dhö nam. 41 Ëntö i karë na gin othuno kanya pii më nam romo ië, cê nyim mel otwomere ki kwoö na tye i thë pii ëka mel omoko ökö na tøk, thërë thon ötür na thithinö ki tøkö ka pii. 42 Acikari öcakö gini yübö köp më neko emabuc ëk mörö kür ökwang ölü ökö. 43 Ëntö adit acikari onwongo mitö larö kwö ka Paulo, cê öjükögi ki yübgï nön. Ën ömiö twërö ni jö na ngeo kwang öcak gini pye i pii më cïdhö i lak nam. 44 Jö nökenë

ölüb körgi i wi bao onyo i wi nginy mel n'ötütüra. Cé öwëkö gin kibëc othuno yo dhö nam na bër.

28 I karë na wan dong ethuno na bër i dhö nam, enwongo ni cula nam nön ecwodo ni Malta. 2 Jö na bedo i cula nam nön obedo gini ki cwiny më kica i komwa, ëka öjölöwa gini na bër. Oobo gini mac piën köth onwongo öcakö cwe ëka piny thon onwongo ngic. 3 Paulo öcökö ridö yen cë obolo i mac, ëka thwol onwomo pi lyetho ka mac cë öddölëre i cingë. 4 I karë na jö na bedo i cula nam nön önëno gini thwol n'öddölëre i ngut cing Paulo, cë öcakö gini twak kën-gi ni, "Adyer ëcwö ni myero obed anek. Kadi bed öbüc ki i nam, Angöl-köp atir ba bino yeo ni ninë më bedo na kwö." 5 Entö Paulo ötëngö thwol obolo i mac na ba ötimö ën ki gin mörö na rac. 6 Ji obedo ka kürö nakun thamö gini ni badë cakö kwot onyo miö ën thöo athura. Entö gin ökürö pi karë na lac ëka önëno gini ni gin mörö na rac ba ötimërë i kome ëka öcakö lökö thamagi ökö cë okobo gini ni ën obedo obanga. 7 I nget nam kany nön onwongo tye pwothi ka Pubilia adit na löö cula nam. Ën öjölöwa ëka ögwököwa na bër pi ninö adek. 8 I karë nön apap ka Pubilia onwongo kome lith, obuto piny na two lyetho ömakö ëka cadö remo. Paulo öcidhö bothe më nënö ën, kinge lëga oketho cingë i kome, ëka öcangö ën. 9 Kinge na man dong ötimërë, etwoe nökenë kibëc na tye gini i cula nam obino gini bothe ëka öcang gini. 10 Gin ömiöwa wöro ki mic na pol ëka i karë na wan ëcakö woth, gin döki okelo jami na mitërë më könyöwa i wothwa. 11 Kinge dwethe adek, wan ëmëdërë ki wothwa ki mel mörö na dit n'öya ki i Alegijandaria n'obedo i cula nam nön i karë më ngicö na tye ki cal wi rudi k'obanga. 12 Wan ethuno i Cirakuca ëka ebodo kunön pi ninö adek. 13 Ëka ki kunön wan ëya ethuno i Regio. Kinge ninö acël yamö na yaa ki kukwap okudho cë i ninö më arö wan ethuno i Puteoli. 14 Ki kunön wan enwongo utmego mökö n'öjölöwa gini më bedo bothgi pi cabit acël. Kinge wan ëya ëka ethuno i Roma. 15 Utmego na tye kunön owinyo gini ni wan etye ka bino, gin obino naka i cuk k'Appioc, ëka kabedo n'ecwodo ni Öt Wele Adek më rwatërë ködwa. I caa na Paulo önëno gi, öpwöyö Obanga ëka cwinye ödökö na tëk. 16 I karë na wan ethuno i Roma, gin oyeo ni Paulo obed i öde kënë ëka k'acikari na gwökö ën. 17 Kinge ninö adek, Paulo ocwodo étëla k'Eyuda kanya acël. I karë na gin öcökërë, ën okobo bothgi ni, "Utmegona, kadi bed ba atimö gin mörö na rac i kom jö onu onyo i kom cik ka kwere onu, an onwongo ëmaka ki i Jerucalem ëka ëmia i cing jö më Roma. 18 Jö më Roma ötëmö gini

ripö köp i koma ëka onwongo mitö gini gönyöna, piën ba onwongo gini bal mörö i koma na römö ngölö nina thöo. 19 Entö i karë n'Eyuda ökwërö gini ökö, ömiö an atero kokona më pido both Cija, kadi bed onwongo ape ki miti më ketho adoth i kom jö na mëga kikome. 20 Pi tyën köp ni, ën ömiö an akwaö më nënö ëka më twak kodwu ëk akob niwu köre ki köre ni an etwea ki jëgëlë piën an ayee ni gen ka jö lcarael otyeko bino dong ökö." 21 Gin ögamö ni, "Wan ba enwongo waraga mörö n'öya ki Yudea na makö köp i komi, ëka ngat mörö ope ki kin utmego n'ömiö ngec onyo n'okobo köp mörö na rac i komi. 22 Entö wan ëmitö winyo kite na thamani tye ködë, piën wan engeo ni jö na tye gini i kabedo kibëc twak gini na rac i kom dul ni." 23 Gin öyübö më rwatërë ki Paulo i ninö nökenë, ëka jö na pol obino gini bothe i öt kanya onwongo ën bedo ië. Cakërë kodiko naka kothyeno ën obedo moko caden ëka ki gönyö tyën köp më ker k'Obanga ëka ötëmö më lökö thamagi i kom Yecu ki cik ka Muca ëka ki cöc k'edwarpiny. 24 Jö nökenë oyeo gini köp na ën ötwakö, ëntö jö nökenë ba obino oyeo. 25 Gin ba oyeo i kin-gi kën-gi ëka öcakö gini këth kinge köp na Paulo ötwakö ni, "Tipo Naleng yam okobo köp n'atir both kwerewu nakun wok ki dhö adwarpiny lcaya ni, 26 "Apë both jö ni ëka ikob niggi ni, "Un ibino winyo ëntö ba ibino niang unu ië. Un ibino nënö ëntö ba ibino unu ngeno." 27 Piën cwiny jö ni ödökö na nwang, ithgi odhing ba winyo piny, ëka ömiö wang-gi ökö. Cé dong wang-gi ba nënö piny, ëka ithgi ba winyo, ëka cwinygi thon ba niang ëka ba römö lökërë gini botha ëk acang-gi.' 28 "Pi manön amitö ni inge unu ni larë ni na yaa ki both Obanga dong ëmiö ökö both Erok, ëka gin bino winyo." 29 I karë na ën okobo köp ni, Eyuda öya öcidhö gini ökö nakun pyem gini rwök i kin-gi kën-gi. 30 Pi mwaka arö Paulo obedo kunön i öde na ën opango ëka obedo jölö jö kibëc na bino gini bothe. 31 Ën obedo ka titö köp më ker k'Obanga ëka pwoy i kom Rwoth Yecu Kiricito. Ëka ngat mörö ba ötëmö më jükö ën.

Roma

1 Waraga ni öya ki both Paulo, atic ka Kiricito Yecu, n'Obanga öyëro më bedo akwëna ëka eoro më titö köp më Emuth na Bër k'Obanga. **2** Obanga öcikö köp më Emuth na Bër ni cön, nakun wok ki both edwarpiny mëre ki i Cöc na Leng ginii. **3** Köp më Emuth na Bër ëcöö i kom Wode. I kite më kwö mëre më kom, ën onwongo obedo akwar Daudi, **4** ëka na lübërë ki tükö ka Tipo Naleng na lönyö onu, enyutho ën më bedo Wod k'Obanga i karë n'ecero ën ki i kin jö n'öthö: Ën Yecu Kiricito Rwoth onu. **5** Pirë ömïö onu enwongo kica k'Obanga ëka twër më bedo ëkwëna ëk ëmii jö më rok kibëc oye ëka obed ginii ki winy i kome. **6** Un thon itye i kin jö n'ecwodogi më bedo jö ka Yecu Kiricito. **7** Both un jö kibëc na tye i Roma n'Obanga marö ëka ocwodowu më bedo jögë na leng: Obanga Apap onu ëka Rwoth Yecu Kiricito ömiiwu gum ëka kuc. **8** Më acël, an apwöyö Obangana i Yecu Kiricito pi un kibëc, piën yeewu dong ëtitö i wi lobo thükül. **9** Obanga na an awörö ki cwinya kibëc nakun thon an atitö köp më Emuth na Bër i kom Wode, ënë obedo caden-na na ngeo kite na an apo ködë i komwu i karë kibëc na ba adhero **10** i lëgana i karë kibëc; ëka kobedini an alëgö ni ka Obanga oye, myero an anwong yoo mörö më bino yo bothwu. **11** An atye ka parö më nënöwu ëk amiiwu mic ka Tipo Naleng mökö më jingöwu— **12** gin na an atye ka twakö ënë ni un kanya acël köda ebino könyërë; ënë ni yeena bino könyöwu, ëka yeewu thon bino könyöna. **13** Utmegona, an amitö inge unu ni wang na pol an ayübö ni abin yo bothwu ëk ömïa anwong adwogi më mic më cwiny ki kinwu, kite na an anwongo ködë ki kin Erok nököenë ca, ëntö manön ba ötwërë kadï naka tin thon pod ëjuka ökö. **14** An atye ki banya both jö Girik ëka both jö na ba obedo jö Girik, both ëryëkö ëka both jö na ba ryëk. **15** Manön ënë ömïö an atye ki miti më titö köp më Emuth na Bër bothwu thon un jö na tye i Roma. **16** An lewic ba maka pi köp më Emuth na Bër, na ënë obedo tükö k'Obanga më larö jö na tye ki yee, më acël Eyuda ëka thon Erok. **17** Köp më Emuth na Bër ni nyutho kite n'Obanga miö dhanö bedo na kite atir ködë, na man timërë pi yee këkën, cakërë ki i acaki naka thon i ajiki mëre. Na calö Cöc na Leng kobo ni, “Jö na kitegi atir bino kwö pi yee.” **18** Akëmö k'Obanga enyutho dong ökö ki i polo i kom bal ëka tim na reco ka dhanö na jükö köp adyer kür ongere, pi timgi na reco. **19** Gin na dhanö twërö ngeo ki kom Obanga onen dong ökö kanya leng bothgi,

piën Obanga onyutho dong ökö bothgi. **20** Cakërë i karë n'ecweo ki lobo, kite k'Obanga n'onwongo ba nen dong onen ökö nakun engeo ën ki kom jami kibëc n'Obanga ocweo. Ënë tükö mëre na ba jik ëka kite n'Obanga cal ködë. Manön ömïö dhanö ba tye ki köp mörö na myero ën ögam. (aiidios g126) **21** Kadï bed onwongo ngeo ginii Obanga, ëntö ba wörö ginii na calö Obanga ëka thon ba pwöyö ginii, ëntö thamagi ödwökögi i gin na ba könyö, kit thama na tye i cwinygi më mingomingo ocido dong ökö. **22** Gin kobo kën-gi ni gin ëryëkö, ëntö lökërë ginii dökö emingo. **23** Cë lökö ginii dheo k'Obanga na ba thöö ökö, nakun poro ginii ki cal dhanö na thöö, onyo ki cal ka winy onyo cal ka leeni onyo cal ka leeni na wotho i ngöm ki korgi. **24** Cë Obanga öwëkögi më timö gin mörö këkën na rac na cwinygi mitö ëka timö ginii tim mökö më lewic i kin-gi kën-gi. **25** Gin lökö köp adyer i kom Obanga ki twodo, gin wörö ëka etio pi jami n'Obanga ocweo nakaka wörö Acwec, n'opore më apaka naka naka! Amën. (aiön g165) **26** Pi tyën köp ni, ömïö Obanga öwëkögi i thamagi n'ogom na gin thamö na kelo lewic. Kadï naka mon-gi thon öwëkö ginii bedo ki cwö i kite n'ënywölögi ni obed ginii ködë, ëntö döki öcakö ginii bedo i kite na ba ënywölögi ködë. **27** Cwö thon ni kömanön öwëkö ginii bedo ki mon ökö i kite n'ënywölögi ni myero obed ginii ködë. Mitigi döki öcakö wangö komgi calö mac, nakun mitö ginii ni ebed k'ewodhgï. Cwö onwongo bedo ki cwö ewodhgï, na manön obedo tim më lewic rwök, ëka gin nwongo can na lith i komgi pi balgi nön. **28** Dong kite na calö gin ba nënö gin mörö na könyögi i ngeo Obanga, Obanga öwëkögi ökö i thamagi na köny mëre ope, ëk ötim ginii dong gin n'onwongo myero kür ötim ginii. **29** Gin opong ki koth bal kibëc, tim na reco, woro, ëka cwiny na rac. Gin onwongo opong ginii ki cwiny më nyeko, nek, dhaa, twodo, ëka cwiny na cöl. Gin thon obedo jö na boko nyiny jö, **30** ëyany jö, jö na dag Obanga, wegï angal, jö na wigi tük, jö na wakërë, jö na röthö kite më timö gin na reco, jö na ba winyo enyodogi; **31** jö na ba ngeo piny, jö na ba genere, ba tye ginii ki mar i cwinygi, kica thon ba makögi i kom dhanö. **32** Kadï bed gin ngeo cik i kom Obanga ni jö na timö koth gin na calö manön bino thöö ginii, gin ba timö koth jami na calö manön këkën, ëntö gin thon pwöyö jö na tye ka timö.

2 Ka in ithamö ni itwërö ngölö köp i kom jö nököenë, thamani nwongo rac. Ka in ingölö köp nigï, in nwongo ingölö köp i komi keni, piën in ngat ni ngölö köp thon itimö jami na gin timö. **2** Wan engeo ni Obanga ngölö köp atir i kom jö na timö gin na reco.

3 In ñngölö köp i kom jö na timö gin na reco, ëntö un kikomwu thon itimö unu gin na reco nön. In ithamö nĩ itwërö unu bwöth kĩ ngölö-köp k'Obanga? 4 In icaö kica kĩ diö cwinye, më küröni ëk ilokiri, ëntö in ba ithamö gin mörö i kom kica mërë. In ba itye ka niang nĩ Obanga obedo akica i komi ëk ingut ökö? 5 Ëntö pĩ nwang cwinyi ëka cwinyi na ba imitö ngut ködë, in onwongo itye ka miö akëmö k'Obanga bedo i komi rwök më kürö ninö më akëmö mërë, i karë na ngölö-köp k'Obanga n'atir bino nen. 6 Obanga "bino cülö ngat acélacél na lübërë kĩ gin na ën ötimö." 7 Ën bino miö kwö na ba thum both jö na diö cwinygi më tio tic na bër pĩ nwongo dheo, wörö ëka kwö na bedo naka. (aiönios g166) 8 Ëntö pĩ jö na parö pirgi kën-gĩ ëka na kwërö gini köp k'Obanga më adyer cë lübö gini gin na rac, akëmö ëka pwod k'Obanga bino podho i komgi. 9 Can ëka arem bino podho i kom jö kibëc na timö gin na reco: më acél Eyuda, cë dong Erok; 10 ëntö jö kibëc na timö gin na bër bino nwongo dheo, wörö ëka kuc: më acél Eyuda, cë dong Erok. 11 Obanga ngölö köp na ba poko kin dhanö. 12 Jö kibëc na timö bal na ba ngeo gini Cik ka Muca, bino thöo gini kadĩ bed gini ba ongeo Cik, ëka jö kibëc na balö i thë Cik k'Eyuda, ebino ngölö köp nigi na lübërë kĩ Cik. 13 Pathĩ jö na winyo köp më Cik awinya ënë jö na kitegi atir i nyim Obanga, ëntö jö na tio gin na Cik mitö ënë ebino kwanögi nĩ gini jö na kitegi atir. 14 Ka Erok na ba tye gini kĩ Cik ötimö gini gin na Cik mitö pĩ kitegi më anywöli, manön nwongo gini onyutho nĩ gini ngeo gin na myero ëtim onyo kür ëtim gini, kadĩ bed Cik ka Muca ope bothgi. 15 Gini nyutho nĩ gin na Cik mitö ëcöo dong ökö i cwinygi, ngec na gini tye ködë na nyutho nigĩ bal ënë bedo caden, ëka thamagi n'orubere bino ngölö köp nigi onyo cwakögi. 16 Man bino timërë i ninö n'Obanga bino ngölö köp i kom jii pĩ gin na gini ötimö i mung, na Yecu Kiricito ënë ngölö. Man lübërë kĩ köp më Emuth na Bër na an atye ka titö. 17 Un jö nĩ cwodere nĩ Eyuda icung unu i Cik, ëka iwakërë unu i kom watwu na pirë tük i kom Obanga. 18 Un ingeo gin na ën mitö, ingeo unu gin na tye atir piën epwonyowu kĩ Cik. 19 Un ingeo nĩ ipëo unu ëthöo wang, ibedo unu tar pĩ jö na tye gini i cöl piny, 20 apwony ka jö na ming, apwony k'ëthinö, piën in itye kĩ ngec ëka adyer i kom Cik. 21 In dong apwony nĩ pwonyo jö nökenë, ëntö in ba ipwonyiri keni? In ipwonyo nĩ kür ikwal, ëntö in ba ikwalö kwo? 22 In ikobo both jö nökenë nĩ kür idöny i elomi, ëntö in ba idönyö i elomi? In ba imitö wörö cal jwogi, ëntö in ba ikwalö gin na tye i öt wörö cal jwök? 23 In iwakiri rwök pĩ ngeo Cik, ëntö in ikwërö wörö Obanga kĩ türö Cik. 24 Kite n'ëcöo ködë

i Cöc na Leng nĩ: "Erok yanyö nyíng Obanga pirwu." 25 Lirë könyö ka ilübö Cik, ëntö ka itürö Cik, in ibedo na calö dhanö na ba ëlirö. 26 Pĩ manön, ka Erok na ba ëlirögi ögwökö Cik na mitërë, ba ebino kwanö jö nön na calö jö n'ëlirö? 27 Cë jö na ba ëlirö komgi ëka pod gwökö gini Cik bino ngölö köp niwu, piën itürö unu Cik kadĩ bed itye unu kĩ Cik n'ëcöo dong acöa ëka ëliröwu. 28 Dhanö na nen kĩ yökö këkën na calö Ayuda nwongo ba obedo Ayuda kikome, ëka lirë më adyer ba obedo lirë na nen kĩ yökö këkën. 29 Dhanö bedo Ayuda këkën ka ën obedo Ayuda kĩ i cwinye; ëka thon lirë më adyer ënë lirë na dhanö bedo ködë i cwinye, na ënë tic ka Tipo Naleng, pathĩ cik n'ëcöo acöa. Ngat n'obedo nĩ kömanön nwongo pak na yaa kĩ both Obanga, pathĩ kĩ both dhanö.

3 Pĩ manön, köny mënë na tye më bedo Ayuda, onyo magoba ngö n'enwongo kĩ lirë? 2 Adyer köny tye na pol. Më acél mërë, Eyuda onwongo ëmiögi köp k'Obanga nakun egeno nĩ bino gwökö gini. 3 Adyer, jö mökö kĩ kin-gi onwongo obedo jö na ba genere; ëntö kite na gin ba genere, manön twërö miö Obanga bedo ngat na ba genere? 4 Pathĩ nĩ kömanön! Kadĩ bed nĩ jö kibëc obedo etwodo, Obanga obedo adyer na ba twot. Kite na calö ëcöo ködë i Cöc na Leng: "Ëk gin na in itwakö onyuth nĩ in kiteni atir ëka ilöo köp ka ëngölö köp i komi." 5 Ëntö ka kite atir onu na rac nyutho kite atir k'Obanga kanya leng, köp mënë na onu ëtwërö kobo? Onu ebino kobo nĩ Obanga kite mërë ba tye atir pĩ miö akëmö mërë podho i kom onu? (An atye ka twak i kite ka dhanö.) 6 Pathĩ nĩ kömanön! Ka onwongo tye nĩ kömanön, Obanga onwongo twërö ngölö köp i wi lobo niingö? 7 Ëntö ka twodona ni miö adyer i kom Obanga mëdërë amëda nakun kelo dheo bothe, cë pingö pod döki ëngölö köp i koma calö an abedo abal? 8 Pingö ba ekob nĩ, "Eru ëtim gin na rac ëk gin na bër öya kĩ ië"? Piën tye jö mökö na cökö köp më dhöwa kĩ köp më twodo na kobo gini nĩ wan ëtwak nĩ kömanön. Ka ëngölö-köp ölöo jö n'obedo nĩ kömanön, nwongo ëngölö köp nigĩ kakarë. 9 Ngö na onu döki ekobo? Wan Eyuda etye na bër na löo jö nökenë ökö? Ba tye nĩ kömanön, piën an dong anyutho köpna ökö më adoth nĩ bal dong ölöo Eyuda ëka Erok ökö kibëc. 10 Kite n'ëcöo ködë nĩ: "Ngat mörö ope na kite atir, kadĩ thon acél; 11 ngat mörö ope na niang, ngat mörö ope na rangö Obanga. 12 Jö kibëc ölökerë gini, gini kibëc ödökö jö na reco; ngat mörö ope na timö gin na bër, kadĩ thon acél." 13 "Dwön-gi obedo bur lyene na wigi thwolo; bwölö gini jö kĩ lëbgi." "Kwir ororo tye i thë lëbgi." 14 "Dhögi këc ëka opong kĩ köp më alem." 15

"Tyèn-gi yot më cìdhö önyö remo; 16 kanya kibéc na gin cìdhö yo ië, balö giní piny éka miö jĩ limö pëkö, 17 éka ba ngeo giní yoo më kuc." 18 "Lworo Obanga ope i kom kwögi." 19 Kobedini onu engeo ni gin mörö kékén na cik kobo, kobo both jö na tye i the cik, èk jö kibéc öling ökö kür ongam dhögi më twak éka wi lobo thükül obed i the ngölö-köp k'Obanga. 20 Pí manön ba ebino kwanö dhanö mörö ni kite atir i nyim Obanga pí lübö cik; gin na cik timö ènè më miö onu ngeo ni ébalö. 21 Èntö kobedini kite n'Obanga kwanö k' dhanö ni kite atir na ba obedo pí lübö cik, enyutho dong ökö kanya leng. Cik ka Muca éka cöc k'edwarpiny ömiö caden pírë. 22 Man ènè kite n'Obanga kwanö k' dhanö ni kite atir pi yee mërë i kom Yecu Kiricito éka pi jö kibéc na yee èn. Apokapoka mörö ope, 23 piën jö kibéc öbalö éka ba twërö giní nwongo dheo k'Obanga. 24 Èntö Obanga kwanögi ni kitegi atir nono, miögi na calö mïc pi kica mërë, pi kite na Kiricito Yecu ökökögí ködë. 25 Obanga oketho èn më bedo gin më tyër më kwanyö bal k' remo mërë, pi jö na yee i kome, èk enyuth ki kite atir mërë, piën Obanga yam ödörö cwinye éka ba opwodo jö n'öbalö cön— 26 èn ötimö më nyutho kite atir mërë i karë ni, ni èn kikome kite atir, éka èn miö ékwanö dhanö ni kite atir pi yee i kom Yecu. 27 Awaka onu dong tye kwene? Ejükö dong ökö. Pi cik mènë? Pi lübö Cik? Pathi ni komanön, èntö pi yee. 28 Adyer onu emoko thama ni dhanö ékwanö ni kite atir pi yee mërë, èntö pathi pi tic më lübö Cik. 29 Onyo Obanga obedo më k'Eyuda kékén? Èn ba obedo Obanga k'Erok thon? Eyo, obedo më k'Erok thon. 30 Obanga tye acël kékén, na èn bino kwanö jö n'ëlrögi ni kitegi atir pi yeegi, éka thon bino kwanö jö na ba ëlrögi ni kitegi atir pi yeegi. 31 Pi manön, onu etye ka kwërö Cik ka Muca pi yee ni? Pathi komanön, onu ëcwakö Cik.

4 Onu ebino kobo ngö i kom Abraam, na ènë kwarö onu? Ngö na èn obino ongeo i kom yee? 2 Ka adyer Abraam onwongo ékwanö ni kite atir pi tic, onwongo twërö bedo ki gin mörö na èn wakërë ködë—èntö pathi i nyim Obanga. 3 Ngö na Cöc na Leng kobo? Cöc na Leng kobo ni, "Abraam onwongo oye i kom Obanga, éka ömiö ékwanö èn ni dhanö na kite atir." 4 Dhanö na tio tic, ba émiö öcara na calö mïc, èntö émiö èn na calö gin mörö na èn otio pírë. 5 Èntö dhanö na ba tio, éka yee i kom ngat na kwanö jö na ba lworo giní Obanga ni kitegi atir, koth dhanö na calö manön ékwanö ni kite atir pi yee mërë. 6 Daudi thon ötwakö köp acël nön i kom gum na dhanö tye ködë ka Obanga ökwanö èn ni

dhanö na kite atir abonge tic mörö na èn otio: 7 "Gum obed i kom jö na balgi ètimö kica ökö ië, jö na balgi ékwanyö ökö. 8 Gum obed i kom dhanö na Rwoth ba bino kwanö bal mörö i wie." 9 Cë gum ni tye pi jö n'ëlrögi kékén onyo tye thon pi jö na ba ëlrögi? Onu ekobo ni pi yee ömiö ékwanö Abraam ni kite atir. 10 I karë mènë na gin ni ötimërë ködë? Ötimërë na bara ëlrö Abraam onyo n'onwongo dong ëlrö ökö? Ötimërë na bara ëlrö èn, pathi na dong ëlrö. 11 Lirë onwongo obedo anyuth ni Abraam onwongo dong tye ki yee éka ni Obanga ökwanö èn ni kite atir pi yee mërë n'onwongo bara ëlrö èn. Manön miö Abraam bedo kwarö ka jö kibéc na yee giní na bara ëlrögi, èk gin thon ékwan-gi ni kitegi atir. 12 Man thon miö Abraam bedo kwarö ka jö kibéc na yee giní na bara ëlrögi, pathi pi jö n'ëlrögi kékén, èntö pi jö n'ëlrögi na lübö giní thon yee na yam kwarö onu Abraam tye ködë n'onwongo bara ëlrö èn. 13 I karë n'Obanga öcikö Abraam k'ëkwaë mërë ni wi lobo thükül bino bedo mëgi, pathi ni Abraam onwongo ölübö Cik, èntö piën ékwanö èn ni kite atir pi yee mërë. 14 Ka cikërë k'Obanga tye pi jö na lübö Cik, cë yee pírë ba ték éka cikërë köny mërë ope, 15 piën Cik miö akëmö makö Obanga i kom dhanö. Èntö kanya cik ope ië, türö cik thon ope. 16 Pí manön, cikërë bino pi yee, èk obed pi kica éka döki më moko cikërë mërë both ékwaë k'Abraam kibéc. Pathi both jö na lübö Cik kékén, èntö thon both jö na tye giní ki yee na calö Abraam. Èn obedo kwarö onu kibéc. 17 Kite n'ëcöö ködë i Cöc na Leng ni: "An dong akethi èk ibed kwarö ka rok na pol." Cikërë ni emoko i nyim Obanga n'Abraam oye—Obanga na miö kwö both jö n'öthöö éka na cwodo gin mökö na komgi ope bedo na tye. 18 Abraam onwongo ope ki gen ni ebino nwongo ëthinö. Èntö Abraam oye i kom Obanga éka ömëdërë bedo ki gen. Ömiö èn ödökö kwarö ka rok na pol kite na calö ëcöö ni, "Ékwaëni bino bedo ni komanön." 19 Èn ba obedo na görü i yee mërë i karë n'obedo parö pi kome kënë, n'onwongo röm aröma ki gin n'öthöö, piën mwaka më dit mërë onwongo dong cwök römö mia acël külü. Mëdö i kom manön, dhakö mërë thon onwongo obedo alür. 20 Yee mërë ba ödök cen, ba obedo ka cacapa i thama mërë i kom cikërë k'Obanga, èntö yee mërë ömëdërë amëda ödökö na ték rwök nakun èn miö dheo both Obanga. 21 Èn onwongo omoko thama mërë ni Obanga tye ki twër më timö gin na èn öcikö. 22 Manön ènë ömiö "ékwanö Abraam ni kite atir pi yee." 23 Köp ni "ékwanö èn" onwongo ba ëcöö pi èn kékén, 24 èntö ëcöö thon pi onu, both jö n'Obanga bino kwanögi ni kitegi atir—pi onu n'eyee i kom ngat

n'ocero Rwoth onu Yecu kɪ ɪ kin jō n'ōthōō. 25 Yecu n'onwongo eneko pɪ bal onu, cē Obanga ocero ɛn ōkō ɛk ɛkwan onu nɪ kite onu atɪr.

5 Pɪ manōn, kite na calō ɛkwanō onu nɪ kite onu atɪr pɪ yee, eru dong ebed kɪ kuc ɪ nyim Obanga pɪ Rwoth onu Yecu Kiricito, 2 Pɪrē ōmiō ɛyabō both onu yoo mē nwongo kɪca na onu enwongo pɪ yee ni. Eru ebed kɪ yom cwiny pɪ gen na onu etye kōdē mē nywakō dheo k'Obanga. 3 Eru thon ebed kɪ yom cwiny pɪ can na podho ɪ kom onu, piēn onu engeo nɪ can kelo diō cwiny mē dangō can; 4 diō cwiny mē dangō can miō ɛpwōyō kite onu, ɛka pwōyō kite onu miō onu ebedo kɪ gen. 5 Gen nɪ ba bino kelo cwer cwiny, piēn Tipo Naleng ōmiō ɛōnyō mar k'Obanga ɪ cwiny onu.

6 ɪ karē na onu onwongo pod etye kɪ gōrū, Kiricito obino ōthōō pɪ jō na ba lworō gɪnɪ Obanga. 7 Kadɪ pɪ ngat mōrō na kite atɪr, bedo na tēk rwōk both dhanō mōrō mē thōō pɪrē. Twērō bedo thon nɪ dhanō na kite atɪr, ngat mōrō twērō diō cwinye mē thōō pɪrē. 8 ɛntō Obanga onyutho mar mērē both onu kɪ oro Kiricito mē bino thōō pɪ onu nakun onu onwongo pod ebedo ɛbal. 9 Pɪ manōn, kite na calō ɛkwanō onu nɪ jō na kitegɪ atɪr pɪ remo mērē, rwōk mērē onu ebino larē pɪrē kɪ ɪ kom akēmō k'Obanga! 10 ɪ karē na onu pod ebedo lang k'Obanga, ɛn ōdwōkō onu bothe pɪ thōō ka Wode, ka kōmanōn na dong ɛdwōkō onu bothe, rwōk mērē onu ebino larē pɪ kwō ka Wode! 11 Pathɪ manōn kēkēn, ɛntō onu ebino bedo kɪ yom cwiny ɪ Obanga pɪ Rwoth onu Yecu Kiricito, piēn ɛnē ōmiō ɛdwōkō onu both Obanga mē rɪbērē kōdē. 12 Pɪ manōn, kite na calō bal obino ɪ lobo nakun wok kɪ both dhanō acēl, ɛka thōō obino pɪ bal, ɪ yoo nōn thōō obino ɪ kom jɪɪ kɪbēc, piēn jō kɪbēc ōbalō. 13 Bal onwongo tye ɪ lobo cōn na bara ɛmiō cik, ɛntō kanya cik ope iē, bal thon ba ɛkwanō ɪ wi ngat mōrō. 14 ɛntō thōō ōcakō lōc kɪ ɪ kom Adam naka othuno kōdē ɪ kom Muca cē ōlōō jō n'onwongo ba ōtimō gɪnɪ bal kite n'Adam ōbalō kōdē, n'ōtūrō cik n'onwongo ɛmiō bothe. Adam ɛnē ebedo anyuth na cɪmō ngat na myero obin. 15 ɛntō mɪc n'Obanga miō ba rōm kɪ bal k'Adam. Kadɪ bed jō na pol onwongo ōthōō gɪnɪ pɪ bal ka ngat acēl ca, Adam, ɛntō kɪca k'Obanga kɪ mɪc mē nono n'obino pɪ kɪca ka dhanō acēl nɪ, Yecu Kiricito, obedo na thwōnē rwōk na lōō, ōnya ōrōmō jō kɪbēc. 16 ɛka dōkɪ mɪc k'Obanga ba rōm kɪ bal ka dhanō acēl ca, piēn pɪ bal ka ngat acēl ca ōmiō ba ɛkwanō jɪɪ nɪ kitegɪ atɪr, ɛntō tic mē kɪca n'ōlūbō bal na pol ōmiō ɛkwanō jɪɪ nɪ kitegɪ atɪr. 17 Ka cē pɪ bal ka dhanō acēl ōmiō thōō obedo ka lōc pɪ dhanō acēl ca ɛn, Adam, rwōk mērē jō n'onwongo gɪnɪ kɪca

na thwōnē ɛka kɪ mɪc n'ōmiō ɛkwanōgɪ nɪ kitegɪ atɪr, gɪn bino bedo na kwō nakun nwongo tye gɪnɪ ka lōc pɪ dhanō acēl nōn thon, ɛn Yecu Kiricito. 18 Dong kite na calō bal ka ngat acēl ōmiō kōp ōlōō jō kɪbēc, kōmanōn thon tic na miō dhanō bedo ngat na kite atɪr okelo lōōnō kōp kɪ kwō pɪ jō kɪbēc. 19 Pɪēn na calō pɪ dhanō acēl na ba obedo kɪ winy ōmiō jō na pol ōdōkō ɛbal, kōmanōn thon pɪ winy ka dhanō acēl jō na pol ebino kwanōgɪ nɪ kitegɪ atɪr. 20 Cik onwongo ɛmiō ɛk bal ōnya. ɛntō kanya bal ōnya iē, kɪca nya na lōō, 21 kite na calō bal obino ōlōō lōc ɪ thōō, kɪca thon myero ōlōō lōc pɪ kwanō jō nɪ kitegɪ atɪr, ɛk ōmiōgɪ onwong kwō na ba thum, pɪ Rwoth onu Yecu Kiricito. (aiōnios g166)

6 Ngō na onu ebino kobo? Onu myero ɛmēdērē mē tɪmō bal ɛk kɪca ōnya? 2 Pathɪ nɪ kōmanōn! Onu na yam ɛthōō kɪ kuboth bal; onu dōkɪ ɛtwērō mēdērē mē kwō ɪ bal nɪngō? 3 Onyo un ba ingeo nɪ onu kɪbēc n'onwongo ebatica onu ɪ Kiricito Yecu onwongo ebatica onu ɪ thōō mērē? 4 Pɪ manōn, onwongo eiko onu kanya acēl kɪ Kiricito ɪ thōō mērē ɪ batica na onu enwongo, ɛk onu ebed calō ɛn. Kite na calō Kiricito onwongo ecero kɪ ɪ kin jō n'ōthōō kɪ tēkō mē dheo k'Apap mērē, ɛk onu thon ebed kɪ kwō na nyen. 5 Ka onwongo onu ɛrɪbērē kōdē ɪ thōō mōrō na cal kɪ thōō mērē, kōmanōn thon onu ebino rɪbērē kōdē ɪ cer mōrō na cal kɪ cer n'ecero ɛn kōdē. 6 Onu engeo nɪ kwō onu na cōn onwongo eguro ōkō ɪ kor yath arɪa kanya acēl kōdē ɛk kwō mē bal n'onwongo onu etye kōdē ōthōō ōkō ɛk onu kūr dōkɪ ɛmēdērē mē bedo opii ka bal— 7 piēn ngat mōrō n'ōthōō ōkō ɛgōnyō dong ōkō kɪ ɪ bal. 8 Kite na calō onu ɛthōō kanya acēl kɪ Kiricito, onu thon eyee nɪ ebino kwō kanya acēl kōdē. 9 Onu engeo nɪ Kiricito ecero kɪ ɪ kin jō n'ōthōō, ɛn ba dōkɪ bino thōō; thōō ba dōkɪ tye kɪ lōc mōrō ɪ kome. 10 Thōō na ɛn ōthōō kōdē, ɛn ōthōō ɪ bal wang acēl na ba bino thōō dōkɪ; ɛntō kwō na ɛn kwō kōdē, ɛn kwō pɪ dheo k'Obanga. 11 ɪ yoo acēl nōn, un thon myero ɪtham unu ɪ komwu kenwu nɪ un dong ɪthōō unu ōkō kɪ kuboth bal ɛntō itye unu na kwō kɪ kuboth Obanga ɪ Kiricito Yecu. 12 Pɪ manōn kūr ɪmiɪ unu bal ōlōō kite na un ɪkwō kōdē ɛka ōmiwu mē lūbō miti mērē na rac. 13 Kūr ɪmiɪ unu dul komwu obed mē tɪmō bal, na calō jami mē tic mē tio gin na rac, ɛntō thwara ɪmiɪ unu komwu both Obanga calō jō n'ōya ōkō kɪ ɪ thōō obino gɪnɪ ɪ kwō; ɛka ɪmiɪ unu dul komwu both Obanga na calō jami mē tic mē kite atɪr. 14 Kūr ɪmiɪ unu bal ōlōō kwōwu, piēn un ba itye ɪ thē lōc mē cik, ɛntō ɪ thē lōc mē kɪca k'Obanga. 15 Cē onu myero ɛtɪm ngō dong?

Onu myero ëtīm bal piēn onu ba etye ī thē cīk ëntō ī thē kīca k'Obanga? Pathī nī kōmanōn! **16** Un ba ingeo nī ka dong īmīrē unu both ngat mōrō na calō opii mē winyo gin na ēn kobo, cē ītwērō unu bedo opii ka dhanō nōn na un iwinyo kōp mērē? Un ītwērō bedo opii mē bal na tero jō ī thōō, onyo ibedo unu opii mē bedo kī winy ī kom Obanga na tero jō ī kite atīr. **17** Pwōc myero obed both Obanga piēn onu onwongo ebledo opii mē bal, ëntō kobedini un itye ka lūbō koth pwony n'epwonyowu kōdē nī īlūb unu kī cwinywū kibēc. **18** Ēgōnyōwu dong ōkō kī ī opii mē bal ēka īdōkō unu opii mē kite atīr. **19** An atye ka twak ī kite ka dhanō, piēn man kōp na tēk na un ba ītwērō niang iē. Kite na calō un onwongo īmīō dul komwu kibēc mē bedo opii mē tīm carō, ōmīō īdōkō unu ëtīm gin mōkō na reco. Kobedini dong mīī unu dul komwu kibēc obed opii mē kite atīr, ēk īdōk unu jō na leng. **20** Ī karē na un ibedo opii mē bal, un onwongo ba itye ī thē lōc mē kite atīr. **21** Ngō na un inwongo ī karē nōn kī ī jami na kobedini mīō lewic makōwu? Adwogi ka jami nōn kibēc obedo thōō! **22** Ēntō kobedini, ēgōnyōwu dong ōkō kī ī opii mē bal ēka īdōkō unu opii both Obanga. Gin na un inwongo ēnē nī īdōkō unu jō na leng, ēka adwogi mērē ēnē kwō na ba thum. (aiōnios g166) **23** Piēn ōcara mē bal ēnē thōō, ëntō mīc k'Obanga mē nono ēnē kwō na ba thum ī Kiricito Yecu Rwoth onu. (aiōnios g166)

7 Utmegona, un ba ingeo nī an atye ka twak kī jō na ngeo cīk—nī cīk tye kī twēr ī kom dhanō ka pod kwō kēkēn? **2** Apor mērē, dhakō n'ēnyōmō, cīk tweo ī kom cwōrē ka cwōrē pod kwō, ëntō ka cwōrē ōthōō ōkō, ēn gōny ōkō kī ī cīk mē nyom. **3** Ēnē ōmīō ka cwōrē pod tye na kwō, cē dhakō nōn ōnyōmērē k'ēcwō nōkēnē, ekobo nī ōdōnyō ī elomi. Ēntō ka cwōrē ōthōō ōkō, ēn nwongo ōgōny ōkō kī ī cīk nōn, cē ka ēn ōnyōmērē dōkī k'ēcwō nōkēnē, nwongo ba ōdōnyō ī elomi. **4** Kōmanōn thon utmegona, un thon īthōō unu kī kukur cīk pī Kiricito na un īribērē ī kome, ēk īdōk unu both ngat nōkēnē, na ēnē ngat n'ecero kī ī kin jō n'ōthōō, ēk ēnyak nyig onu both Obanga. **5** Piēn ī karē na onu pod etye ī kite mē kwō mē anywōlī, miti mē kwō mē anywōlī na cīk ōkwērō ōkō onwongo tye ka tic ī dul kom onu na papath mē nyakō nyig mē thōō. **6** Ēntō kobedini dong ēgōnyō onu ōkō kī ī kom cīk, piēn onu dong ēthōō ōkō kī both gin na cōn n'onwongo ōmakō onu. Ōmīō onu dong etye ka tic ī yoo na nyen mē Tipo Naleng, pathī dōkī ī yoo na cōn ca mē lūbō cīk n'ēcōō acōa. **7** Wan ebino kobo nīngō? Cīk obedo bal? Pathī kōmanōn! Ēntō kono cīk ope, onwongo bal thon ope.

Ka Cīk onwongo ba okobo nī, “Kūr īnīr jami ka ngat nōkēnē,” onwongo thon ba ēnīrō jami ka jīī. **8** Ēntō bal onwongo karē cē ōdōnyō ī cīk ēka ōcakō kelo miti mē nīrō gin na kibēc ī cwinya. Piēn ka cīk onwongo ope, bal thon onwongo bedo n'ope. **9** Yam onwongo an akwō abonge cīk, ëntō ī karē na cīk obino, bal ōcakō bedo na kwō ēka an athōō. **10** An anwongo nī cīk nōn kikome n'onwongo myero okel kwō ēnē dōkī okelo thōō. **11** Piēn bal onwongo karē mē dōnyō ī cīk cē ōbwōla ēka dong oneka ōkō. **12** Pī manōn, cīk leng ēka gin n'ēcīkō thon leng, tye atīr ēka bēr. **13** Gin na bēr ēnē dōkī okelo thōō ī koma? Pe, bal ēnē okelo thōō nakun tīo kī gin na bēr ēk ōmīī onen kanyalēr nī bal ēnōn. Kōmanōn, gin n'ēcīkō ōmīō bal ōdōkō na rac rwōk. **14** Wan engeo nī cīk obedo jami mē tipo; ëntō an abedo mē kom n'ēcadhō na calō opii both bal. **15** An ba anīang ī gin na an atīmō, piēn gin na an amītō tīmō ba atīmō, ëntō gin na an ba amītō tīmō ēnē an atīmō. **16** Dong ka an atīmō gin na an ba amītō tīmō, man nyutho nī an ayee nī cīk bēr. **17** Kite na tye kōdē, pathī an kikoma ēnē atīmō, ëntō bal na bedo ī koma ēnē tīmō. **18** An angeo nī gin mōrō na bēr ope na bedo ī koma, na ēnē koma mē anywōlī. Piēn an abedo kī miti mē tīmō gin na bēr, ëntō ba atwērō tīmō. **19** Piēn an ba atīmō gin na bēr na an amītō tīmō, ëntō atīmō gin na rac na an ba amītō tīmō. **20** Cē ka an atīmō gin na an ba amītō tīmō, manōn nwongo dong pathī an ēnē atīmō, ëntō bal na tye ī iya ēnē tīmō. **21** An anwongo cīk nī tye ka tic: Ka an amītō tīmō gin na bēr, gin na rac ēnē an atīmō. **22** An amarō cīk k'Obanga kī cwinya kibēc; **23** ëntō dōkī an atye ka nēnō cīk nōkēnē tye ka tic ī dul koma, nakun tye ka lwēny ī cīk mē thamana ēka mīa adōkō opii ka cīk mē bal na tye ka tic ī dul koma gīnī. **24** An koma kēc, nga ēnē bino larōna kī ī kom nī na thōō ōkō? **25** An apwōyō Obanga pī Yecu Kiricito Rwoth onu! Pī manōn, an kikoma ī thamana abedo opii mē cīk k'Obanga, ëntō ī kwōna mē anywōlī abedo opii mē cīk mē bal.

8 Pī manōn, kobedini ba dōkī ebino ngōlō kōp mē lōō jō na tye ī Kiricito Yecu, **2** piēn cīk ka Tipo Naleng na mīō onu kwō mē rībērē kī Kiricito Yecu ōgōnya dong ōkō kī ī thē cīk mē bal ēka thōō. **3** Gin na Cīk onwongo ba twērō tīmō, piēn kwō onu mē anywōlī onwongo ōlōkērē ōdōkō na gōrū, Obanga ōtīmō kī oro Wode mē bino ī kit kom na cal kī mē onu na bal obuō ōkō, na calō gin mē atyēra n'ētyērō both Obanga pī bal. Kobedini ēn dong ōngōlō kōp ōlōō bal na tye ī kom onu n'ēnywōlō onu kōdē. **4** Ēk kite atīr na cīk mītō ocoberē ī kom onu, onu jō n'ēlūbō kite

mê kom n'enywölö onu ködê, êntö êlübö kite ka Tipo Naleng. 5 Jô na kwô i kite mê kwô mê anywölî oketho thamagi i kom gin na miti mê kwô mê anywölî mîtö; êntö jô na kwô nakun lübö ginî kite ka Tipo Naleng, ketho thamagi i kom gin na Tipo Naleng mîtö. 6 Thama na lübö kite mê kwô mê anywölî kelo thöô, êntö thama na lübö kite ka Tipo Naleng kelo kwô êka kuc. 7 Piên kite mê kwô mê anywölî obedo langö both Obanga, piên ba winyo cik k'Obanga êka ba twêrö winyo. 8 Jô na kwô nakun lübö kite mê kwô mê anywölî ba twêrö ginî yomo cwiny Obanga. 9 Un ba itye i kite mê kwô mê anywölî, êntö itye unu i cwiny, ka Tipo k'Obanga tye i iwu. Ka ngat mörö n'ope ki Tipo ka Kiricito, nwongo ba obedo mê ka Kiricito. 10 Êntö ka Kiricito tye iwu, komwu nwongo thöô pi bal, êntö tipowu bino bedo na kwô piên êkwanöwu dong nî kitewu atir. 11 Ka Tipo ka ngat n'ocero Yecu ki i kin jô n'öthöô bedo iwu, ên ngat n'ocero Kiricito ki i kin jô n'öthöô thon bino miö kwô i komwu na thöô pi Tipo méré na bedo iwu. 12 Pi manön utmegona, onu etye ki banya—êntö pathî mê kwô i kite mê kwô mê anywölî. 13 Piên ka un ikwô nakun lübö unu kite mê kwô mê anywölî, un ibino thöô êntö ka pi Tipo Naleng un iwêkö tic mê kwô mê anywölî ökô, cê ibino unu kwô 14 piên jô kibéc na Tipo k'Obanga tëlögî obedo ginî êthiñö k'Obanga. 15 Onu ba êgamö cwiny mê bedo opii êk êdök cen i lworo, êntö êgamö Cwiny mê dôkö êthiñö k'Obanga, ênê ömiö onu ekok nî, “Aba, Apap.” 16 Tipo Naleng kikome ribêrê ki cwiny onu nakun miö caden nî onu ebodo êthiñö k'Obanga. 17 Kite na onu ebodo êthiñö k'Obanga, onu ebino nwongo gum na ên ôkanö pi jögê êka onu ebino nywakö kanya acêl ki Kiricito gin n'Obanga ôkanö ninê. Êntö ka onu myero ênywak dheo méré, cê onu thon myero ênywak can méré. 18 An athamö nî can mê karê ni ba ebino poro ki dheo n'ebino nyutho both onu. 19 Adyer gin n'ecweo kibéc tye ka kûrö nyutho êthiñö k'Obanga ki miti na thwönê rwök. 20 Gin acwea kibéc onwongo ekethogî i thê twêrö mê gin na thêrê ope. Pathî pi mitigî kên-gî êntö pi miti k'Obanga na ênê okethogî i thê twêrö nön. Êntö gen tye nî 21 ceng mörö ebino gönyö gin acwea ökô ki i opii mê bedo gin na töp êk onwong ginî kuc êka dheo n'ebino miö both êthiñö k'Obanga. 22 Wan engeo ni jami kibéc n'ecweogî acwea tye ginî ka cûr acûra k'arem calö arem mê nywöl naka i karê ni. 23 Pathî gin kékên êntö onu thon n'êmiö Tipo Naleng na calö mic mê acêl na nyutho gin n'ebino miö onu i karê mê anyim, onu thon etye ka cûr acûra ki i ii onu nakun êkürö karê mê lökö onu êk êdök êthiñö k'Obanga na ênê mê kôkö kom onu. 24 Piên ên ôlarö onu mê

bedo ki gen nön. Êntö gen na kome nen nwongo ba obedo gen. Nga na geno gin na ên nêñö? 25 Êntö ka onu etye ki gen mê nêñö gin na onu ba ênêñö, cê onu êkürö nêñö nakun nwongo êdiö cwiny onu. 26 I yoo acêl nön, Tipo Naleng kõnyö onu kanya onu êgörü ki iê. Onu ba engeo lëga both Obanga kite na myero onu êlëg ködê, êntö Tipo Naleng kikome ênê bakö dhögê pi onu nakun nwongo cûr alingaling ki i cwiny onu. 27 Ngat na ngiö cwiny onu ngeo thama ka Tipo Naleng, piên Tipo Naleng bakö dhögê pi jô k'Obanga na leng nakun lübö gin n'Obanga mîtö. 28 Onu engeo ni Obanga timö gin na kibéc mê kelo gin na bër both jô na marö ên, jô na ên ocwodogî kite na ên öyübö. 29 Jô na ên onwongo ngeogî na ên omoko ni myero önywak ginî cal ka Wode, êk Yecu obed athiñ kaö mê acêl ki i kin utmego na pol. 30 Jô na ên omoko thama méré i komgî, ên thon ocwodogî; jô na ên ocwodogî, ên thon ôkwanögî nî kitegî atir; jô na ên ôkwanögî nî kitegî atir, ên thon ömiö dheo bothgî. 31 Onu dong ebino kobo ngö i kom köp ni? Ka Obanga tye kukur onu, nga ênê bino bedo langö onu? 32 Ên ba öwêkö Wode kikome êntö ömiö ên pi onu kibéc—ên ba bino miö onu jami kibéc kanya acêl ködê? 33 Nga na bino pido ki jô n'Obanga dong öyêrö? Obanga ênê ôkwanögî nî kitegî atir. 34 Nga ênön na twêrö ngölö köp löönö onu? Ngat mörö ope. Kiricito Yecu ênê öthöô êka ecero ên i kwô—ên obedo i nget cing Obanga kucem êka ên thon tye ka bakö dhögê pi onu. 35 Nga na bino poko onu ki i mar ka Kiricito? Nêñö can onyo arem, onyo ayela, onyo kec, onyo bedo kotula onyo gin mörö kékên na rac onyo pala abadê? 36 Kite na calö êcöô nî: “Ebino nekowa kiceng jwî piri; ebino kwanöwa calö rom mê aneka.” 37 Onu etye ka löönö jami nî kibéc pi ngat n'onwongo ômarö onu. 38 An angeo adyer nî kadî thöô onyo kwô, kadî emalaika onyo tipo na reco, kadî gin na tye i karê ni onyo gin na mîtö bino, kadî tükö mörö, 39 kadî gin na tye malö, kadî gin na tye piny, kadî gin mörö kékên ki i kin gin acwea kibéc, ba bino poko onu ki i kom mar k'Obanga na tye i Kiricito Yecu Rwoth onu.

9 An atye ka twakö köp adyer i Kiricito—an ba atye ka twakö köp mê twodo, thama mê cwinya na nyutho bal thon obedo caden kôda pi Tipo Naleng— 2 an atye ki cwer cwiny rwök êka arem na ba jik. 3 Pi mitina kênä, onwongo athamö nî mîtö êlama ökô êk êkwanya ökô ki both Kiricito pi utmegona n'obedo ginî rokna, 4 na gin ênê jô lcarael. Jô n'Obanga ölökögî ödökö êthiñö méré, ömiögî dheo êka cikêrê méré kibéc. Ömiögî Cik êka kite na myero êwör ên

ködë ëka cìkèrè mèrè. **5** Kwere onu kibëc yam obedo mëgì, ëka Meciya thon ënywölö i kin-gì i kite ka dhanö. Onu myero ëpwö Obanga na löö jami kibëc naka naka! Amen. (aion g165) **6** Kür itham unu ni köp k'Obanga ba ötimö gin mörö, piën jö n'ënywölögi i kin jö Icarael onwongo ba obedo gin i jö k'Obanga adyer, 7 ëka thon gin kibëc ba obedo ëthiñö k'Abraam adyer piën onwongo ëcöo ni, "Ëthiñö ka Icaca ënë ebino cwodo ni ëkwaëwu" **8** Man nyutho ni pathi ëthiñö n'ënywölögi i kite ka dhanö ënë ebino cwodogì ni ëthiñö k'Obanga, ëntö ëthiñö n'ënywölögi pi cìkèrè k'Obanga ënë ebino cwodogì ni ëkwaë k'Abraam adyer. **9** Man ënë gin na cìkèrè okobo ni, "An abino dwogo i koth karë ni nwongo dong Cara önywölö wode." **10** Pathi manön këkën, ëntö ëthiñö ka Rebeka onwongo tye gin i k'apapgi acël, na ënë kwarö onu Icaca. **11** Kadì i karë na bara ënywölögi ëka na bara ötimö gin i gin mörö na bër onyo na rac—ëk ömii yüb k'Obanga më yër ömédërë: **12** pathi pi tic ëntö pi cwodo mèrè. Ekobo both Rebeka ni, "Athiñ na dit bino tic pi athiñ na tidi." **13** Kite na calö ëcöo ni, "An amarö Jakob, ëntö ba amarö Ecau." **14** Cë ngö na onu ebino kobo? Onu ebino kobo ni Obanga ba ngölö köp atir ëka kakarë? Pathi ni kömanön! **15** Piën ën okobo both Muca ni, "An abino timö kica both dhanö na an atimö kica ninë, ëka an abino nyutho bërna both dhanö na an abino nyutho bërna ninë." **16** Manön ba cung i kom gin na dhanö mitö onyo i kom tic mèrè na ën oyelere ködë ëntö cung i kom kica k'Obanga. **17** Piën Cöc na Leng kobo ni Obanga okobo both Parao ni: "An akethi më bedo rwoth pi köp ni, ëk ömii anyuth tüköna i komi ëk nyinga ëtit pìrë i wi lobo kibëc." **18** Pi manön, Obanga timö kica both dhanö na ën mitö timö ninë kica, ëka lökö cwiny dhanö na ën mitö më bedo na nwang. **19** Ngat mörö twëro penyo ni, "Pìngö Obanga pod kobo ni onu ebodo ëbal? Nga na twëro gëngö miti mèrë?" **20** Ëntö in dhanö adhana, ibedo nga na in igamö dhö Obanga? Gin n'ecweo acwea twëro penyo ngat n'ocweo ën ni, "Pìngö icwea ni köman?" **21** Acwe agulu ope ki twëro i kom lobo më cweno agulu acël na pìrë tèk ëka nökenë na pìrë ba tèk nakun tio ki i kom lobo agulu acël nön? **22** i yoo acël nön, kadì bed ni Obanga tye ki twër më nyutho akëmö ëka tèkö mèrë, ën obedo ngat na diö cwinye i kom jö n'akëmö mèrë podho i komgi—jö n'ëyübögi më apwoda. **23** Ën ötimö koman ëk ömii lönyö më dheo mèrë ongere both jö na ën ötimö kica niggi, jö n'onwongo ën öyübö cön pi dheo mèrë— **24** naka thon onu, jö na ën ocwodo, pathi ki i kin Eyuda këkën ëntö thon ki i kin Erok. **25** Kite na calö ën okobo ködë i buk ka Kocea ni, "An abino

cwodo jö n'onwongo ba obedo gin i jöga ni, 'Jöga,' ëka dhakö n'onwongo an ba amarö ni, 'Ngat na an amarö,'" **26** ëka, "Bino timërë i kabedo n'onwongo ekobo niggi ni, 'Un ba ibedo jöga,' ebino cwodogì ni, 'ëthiñö k'Obanga na kwö.'" **27** Icaya oredo ki dwön na malö ni, "Kadì bed wel jö Icarael bed na calö kwo më dhö nam, jö n'odong ki i kin-gì ënë Obanga bino larö. **28** Piën Rwoth bino ngölö-köp mèrë i kom lobo ëka bino tyeko ökö pïöpïö." **29** Icaya thon okobo ni: "Ka onwongo Rwoth Won Twër ba öwëkö ëkwaë onu mökö, onu onwongo ebodo calö Codom, ëka onu onwongo ebodo calö Gomora." **30** Cë ngö na onu ebino kobo? Onu ebino kobo ni Erok na ba oyelere gin i më dökö jö na kitegi atir, ebino kwanögi ni kitegi atir, kite atir n'onwongo gin i pi yee; **31** ëntö jö Icarael n'ötëmö gin i ki tèk më cobo cik ëk ebod gin i jö na kitegi atir, ba ocobo gin i cik nön. **32** Pìngö? Piën gin ba obedo rangö i yoo më yee ëntö obedo gin i rangö calö gin na cung i kom tic. Otwomere gin i ki kidi na miö jii twomere. **33** Kite na calö ëcöo ni: "Nën, an aketho kidi i Cion na miö jii twomere ëka lëla na miögi podho, ëka ngat na bino ketho yee mèrë i kome ba ebino miö ën lewic."

10 Utmegona, gin na an amitö ki i cwinya kibëc ëka alëgö Obanga pìrë ënë ni jö Icarael myero ölarë gin i. **2** An amio caden i komgi nakun angeo ni gin omoko na tèk i kom Obanga, ëntö kadì bed omoko gin i, ba ocung gin i na tèk i ngeg kikome. **3** Gin onwongo ba ngeo kite n'Obanga kwanö ki dhanö ni kite atir, ëntö obedo gin i rangö kitegi kën-gi më kwanö dhanö ni kite atir. Gin ba ömire i kite atir n'Obanga miö. **4** Cik dong ojik ökö i Kiricito, ëk ömii jö kibëc na yee ëkwan-gi ni kitegi atir. **5** Muca öcöo na lübërë ki kite atir na yaa ki i kom Cik ni, "Dhanö na bino gwökö jami ni bino kwö pìrgi." **6** Ëntö kite atir n'enwongo pi yee kobo ni: "Kür ikob ki i cwinyi ni, 'Nga na bino idhö malö i polo?'" (manön ënë, më kelo Kiricito yoo piny) **7** "onyo 'Nga na bino dönyö yoo piny i the bur na thuth?'" (manön ënë, më kelo Kiricito malö ki i kin jö n'öthöö). (Abyssos g12) **8** Ëntö köp ni kobo nìngö? "Köp ni tye na cwök bothi; tye i dhogi ëka i cwinyi," manön ënë, köp i kom yee na wan ëtitö pìrë: **9** Ka in ituco ki dhogi ni Yecu ënë Rwoth nakun iyee ki i cwinyi ni Obanga ocero ën ökö ki i kin jö n'öthöö, cë ibino lari. **10** Piën dhanö yee ki i cwinye ënë miö ëkwanö ën ni kite mèrë atir, ëka tuco thon ki dhögë cë miö Obanga larö ën. **11** Kite na Cöc na Leng kobo ni, "Ngat mörö na bino ketho yee mèrë i kome ba ebino miö ën lewic." **12** Apokapoka mörö ope i kin Eyuda ëka Erok—gin kibëc tye ki Rwoth acël nön na poko

lönyö më gum both jö kibéc na cwodo nying Rwoth, 13 piën, "Jö kibéc na bino cwodo nying Rwoth bino larë." 14 Gin twërö cwodo nying ngat na gin ba oyee i kome ningö? Gin twërö yee ningö ka ba owinyo ginî köp n'ëtütö i kome? Gin twërö winyo köp i kome ningö ka ngat mörö ba ötütö nigî? 15 Gin twërö titö köp ningö ka ba eorogî? Kite n'ëcöô ködë nî, "Tyën jö na kelo köp më emuth na bër bino bedo më gum ningö!" 16 Ëntö pathî jö Icarael kibéc ënë oyee köp më Emuth na Bër, piën Icaya okobo nî, "Rwoth, nga n'oye köp na wan ëtütö?" 17 Adyer, yee bino pî winyo köp n'ëtütö, ëka köp n'ewinyo yaa kî i köp n'ëtütö i kom Kiricito. 18 Ëntö an amîtö penyo: Gin onwongo ba owinyo? Adyer owinyo ginî: "Dwön-gî owinyere i wi lobo kibéc, köp na gin twakö owinyere naka i ajiki lobo." 19 An apenyo dôki: Jö Icarael onwongo ba öniang ginî? Më acël, Muca okobo nî, "An abino miö nyeko maköwu i kom jö na ba obedo rok kikokome; an abino miö akëmö maköwu i kom rok na ba niang." 20 Icaya dôki okobo kî tæk cwiny nî, "Jö n'onwonga ginî ënë jö n'onwongo ba ranga ginî; an anyuthara both jö n'onwongo ba penya ginî." 21 Ëntö i kom jö Icarael ën okobo nî, "Kiceng kibéc an atingo cinga më jölö jö na ba winyo dhöga, ëka jö na pyem ginî köda."

11 An dong apenyo: Obanga obino ökwërö jögë? Ba ökwërö! An kikoma abedo dhanö më Icarael, akwar Abraam, n'öya kî i kaka ka Benjamin. 2 Obanga ba ökwërö jögë, na ën ongeogî cön. Un ingeo gin na Cöc na Leng kobo i kom Eliya—kite na ën ökwaö Obanga ëk opwod jö Icarael: 3 "Rwoth, oneko ginî edwarpiynyî ëka öredhö ginî keno tyëni ginî ökö; an këna ënë adong, ëka mitö ginî nekona!" 4 Cë Obanga ögamö ninë ningö? Ën ögamö nî, "An agwökö jö na mëga elip abirö n'odong na ba orumo cöng-gî piny më wörö Baal." 5 I kit yoo acël nön, tye jö mökö n'odong i karë nî n'Obanga öyërogî pî kica mërë. 6 Ëka ka pî kica, cë ba dôki bedo pî tic; ka onwongo ba obedo pî kica, cë kica onwongo ba dôki mëdërë më bedo kica. 7 Cë ngö dôki? Jö Icarael ba onwongo ginî gin na gin obedo rangö, ëntö jö n'ëyëro këkën ënë onwongo. Jö nökökë cwinygî ödökö na nwang, 8 kite na calö ëcöô ködë nî: "Obanga ömiögî cwiny n'odhil, ömiö wang-gi ba neno, ëka ithgi ëk kür owiny ginî köp, naka tin." 9 Daudi okobo nî, "Mii mëjagi më cem obed owico ëka pawaka na makögi, ëk obed gin na miögî twomere më cülö wang balgi. 10 Mii wang-gi öthöô ökö ëk kür önën ginî piny, ëka imii wang pyërgi ogom ökö na twal." 11 An dôki apenyo: Jö Icarael otwomere ëk opodh ginî piny na ba twërö yaa

ginî malö? Pathî kömanön! Ëntö pî balgi ënë ömiö larë obino naka both Erok ëk ömiö nyeko ömak jö Icarael. 12 Ka balgi dong okelo gum both lobo ëka thon gin na gin orwenyo kelo gum both Erok, bër mërë dong bino bedo na röm kwene ka gin odwogo kibéc ökö! 13 An atye ka twak kodwu un Erok. Dong kite na calö an abedo akwëna both Erok, an abino wakara pî ticna. 14 An atye kî gen nî abino miö nyeko makö jö më rokna ëk ömiö alar jö mökö kî i kin-gî. 15 I karë n'ëkwërö jö Icarael ökö, Obanga ödwökö lobo kibéc yo bothe më rîbërë ködë. Bino bedo ningö ka ëgamögi? Bino bedo na calö kwö n'öya kî i kin jö n'öthöô. 16 Ka mökö na nönök n'ëtyëro both Obanga calö wi cem ëmiö obedo na leng, cë mökö kibéc nwongo bedo na leng. Ka orii yath leng, cë jangë kibéc thon bedo na leng. 17 Ëntö ka jangë mökö ëtürö ökö kî i kom yath jeituni na bër, ëka ëtürö jang jeituni mörö më thim cë ëcömö i kom yath jeituni na bër ca, cë dong cakö nywakö pig yath na bër më jeituni ca. Un Erok ïcal unu kî jang yath jeituni n'ëjakö kî i thim. 18 Kür iwakiri i kom jang yath nökökë ginî ca. Ka in iwakiri, po nî in ba itingo orii yath malö, ëntö orii yath ënë ötingi malö. 19 In ibino kobo nî, "Jang yath ginî onwongo ëtürö ökö ëk ömiö ëcöma i kom yath." 20 Adyer, ëtürögi ökö piën gin ba oyee i kom Obanga, in pod icung piën yeeni tye. Kür ibed k'awaka ëntö bed kî lworo. 21 Ka Obanga ba öwëkö jang yath kikome, cë in thon ba ebino wëköni piën in ba iyee. 22 Nën kica k'Obanga ëka gero mërë: ën ger i kom jö na podho, ëntö nyutho kica mërë bothi, ka imediri nakun icung i kica mërë. Ka pe, cë in thon ebino tongoni ökö. 23 Ka Eyuda obedo ginî kî yee dôki, cë ebino dwökögi cen i kom yath, piën Obanga tye kî twërö më dwökögi kunön dôki. 24 Piën ka kömanön un ibedo Erok ëka iröm unu kî yath jeituni më thim n'etongo ökö cë ëcömö i kom yath jeituni na bër ca, na nwongo ba otuu kî kom jeituni n'ëpidhö apidha. Bino bedo na yot both Obanga më cömö jang yath jeituni nökökë nön i kom yath n'ëtürö ën kî ië. 25 Utmegona, tye müng mörö na an amîtö nî inge unu, ëk ömiö kür itham unu kenwu nî ïryëk unu: Jö Icarael cwinygî bino bedo na nwang pî karë mörö na nönök naka ka wel Erok më bino both Obanga örömö. 26 Kinge, Obanga bino larö jö Icarael kibéc kite n'ëcöô nî: "Alar bino bino nakun yaa kî i Cion; ën bino kwanyö tim na reco ökö kî both ëkwaë ka Jakob. 27 Man ënë cîkërena na an aketho ködgi i karë na an abino kwanyö balgi ökö." 28 Kite na gin ökwërö köp më Emuth na bër, Eyuda dong obedo ginî lang k'Obanga pîrwu un Erok. Ëntö pî yër k'Obanga, gin dong ödökö jö n'Obanga marögi pî kweregî. 29 Piën

Obanga ba twërö lökö thama mërë i kom ngat na ên öyërö ëka na miö gum. **30** Na calö un Erok, un ba iwörö unu Obanga i karë n'opoth ca; ëntö kobedini un dong inwongo kica k'Obanga piën Eyuda ba obedo gini ki winy i kom Obanga. **31** I yoo acël nön, pi kica na un inwongo, Eyuda kobedini ba döki winyo gini Obanga, ëk gin thon onwong kica na calö adwogi më kica k'Obanga bothgi. **32** Piën Obanga oketho jö kibëc i buc më kwërö bedo ki winy i kome ëk enyuth kica mërë bothgi kibëc. (eleëse g1653) **33** Lönyö k'Obanga thwönë wökö! Ryëkö mërë ëka negc mërë thuth wökö! Köp na ên ngölö, niang i körë ték, ëka niang i kite na ên tio ködë ték! **34** "Nga n'ongeo thama ka Rwoth? Onyo nga n'obedo amii thama mërë?" **35** "Nga na yam ömiö Obanga gin mörö, n'Obanga myero öcül ên?" **36** Piën jami kibëc ënë ocweo, ëka jami kibëc obedo na tye pirë ëka obedo mëgë. Dheo obed both Obanga naka naka! Amen. (aiön g165)

12 Pi manön, utmegona abakö dhöga bothwu pi kica k'Obanga ni imirë unu kenwu na calö tyër na kwö n'etyërö both Obanga, gin na leng na yomo cwiny Obanga—na ênë wörö më cwinywu. **2** Kür ilüb unu thama më lobo ni, ëntö miï unu Obanga ölöc thamawu ödök na nyen, ëk ömiï iniang unu i gin n'Obanga mitö—gin na bër, na yomo cwinye, na bal mörö ope ië. (aiön g165) **3** Pi mic më kica k'Obanga n'ëmiö botha, an akobo bothwu kibëc ni: Dhanö acëläcël kür myero ötham pi dit mërë na löö karë, ëntö obed gini jö na gwökërë kën-gi ki thama na tye atir, nakun ngat acëläcël lübö yee n'Obanga dong opimo cë ömiö bothe. **4** Onu etye ki dul kom na pol i kom acël, dul kom ni thon ba tio gini tic acël këkën. **5** Kömanön thon, kadï bed onu thon etye na pol, onu ebedo kom acël i Kiricito, na dhanö acëläcël bedo calö dul kom awodhe. **6** Onu etye ki mic na papath na lübö gum n'Obanga ömiö both onu. Ka cë ömiö both ngat mörö mic më titö köp k'Obanga, myero ên ötit kite na calö yee mërë tye ködë. **7** Ka cë ömiö mic më tic pi jii, myero ên oti tic bothgi. Ngat n'obedo apwony myero opwony dhanö. **8** Ngat na cükö cwiny jii myero öcük cwinygi, ngat na poko jami mërë, myero opok ki cwinye kibëc, ngat na tëlö jö myero ötël jö ki mör kom, ngat na könyö écan, myero ökönygi ki yom cwiny. **9** Miï unu mar na un itye ködë obed mar më adyer. Kwër unu gin na rac; mok unu na ték i kom gin na bër. **10** Marë unu kenwu ki cwinywu kibëc na calö utmego, nakun ngat acëläcël miö wörö both awodhe. **11** Komwu obed na mör abonge wac kom, bed unu na lyeth naka i cwinywu, nakun itio unu both Rwoth na calö etic mërë. **12** Cwinywu obed na

yom pi gin na un igeno, diï unu cwinywu i can, ëka imirë unu kenwu i lëgö Obanga ki cwinywu kibëc. **13** Pok unu jamiwu both jö k'Obanga na leng n'ope gini ki gin mörö, keth unu cwinywu thon më gwökö wele. **14** Lëg unu gum i kom jö na yelowu, lam unu gum i komgi, ëntö kür icën-gi acëna. **15** Bed unu ki yom cwiny kanya acël ki jö na tye ki yom cwiny; kum unu kanya acël ki jö na kumo. **16** Bed unu ki niang n'atir i kinwu kenwu, kür ibed unu k'awaka, ëntö ribërë unu ki jö na tye i rwöm na piny. Kür i kethere kenwu ni iryëk unu. **17** Kür icül unu gin na rac ki gin na rac i kom dhanö mörö, ëntö tëm unu më timö gin na kibëc na dhanö thamö ni bër. **18** Ka cë twërë, na lübërë ki kubothwu, myero ibed unu ki kuc ki jö kibëc. **19** Nyikoneina më amara, kür icül unu kwor, ëntö miï unu karë n'akëmö k'Obanga, piën ëcöö ni, "Obedo ticna më cülö kwor; an abino cülö," man Rwoth ënë okobo. **20** Ëntö naka thon: "Ka kec oneko langöni, miï ocem; ka öriö pii oneko ên, miï ên pii omodhi. Ka itimö ni kömanön, ibino miögi bedo ki lewic i wigï." **21** Kür imii unu gin na rac ölööwu, ëntö un ënë myero ilöö gin na rac ki timö gin na bër.

13 Dhanö acëläcël myero öwör ëlöc na löö ên, piën ba tye alöc mörö na ba öya ki both Obanga, ëlöc na tye gini Obanga ënë okethogi. **2** Pi manön ngat na pyem k'ëlöc nwongo pyem ki ngat n'Obanga öyërö, ebino ngölö köp i kom jö na pyem k'ëlöc. **3** Piën jö na tio gin na bër ba bedo gini ki lworo mörö i kom ëlöc, ëntö jö na tio gin na rac ënë bedo gini ki lworo. In imitö ni kür ibed ki lworo i kom dhanö na tye ka löc? Tim gin na bër, cë alöc bino pwöyöni, **4** piën ên obedo atic k'Obanga na tio tic mërë pi könyöni. Ëntö ka in itimö gin na rac, cë myero ibed ki lworo i kome, piën twërö më pwodo dhanö ömiö ên ökö. Ën obedo atic k'Obanga na kelo pwod k'Obanga i kom jö na timö gin na rac. **5** Pi manön, ënë ömiö ni myero onu öwör ëlöc, pathi pi lworo pwod k'Obanga këkën, ëntö më miö thama më cwinywu na nyutho bal ëk obed na leng. **6** Man thon ënë tyën köp n'ömiö icülö unu ocoro, piën ëlöc gin obedo etic k'Obanga, na tio gini ticgi. **7** Cül unu gin na myero both ngat acëläcël: Cül unu ocoro both wegï ocoro ëka ajwok both wegï ajwok, lwor unu jö na myero më alwora, wör unu jö na myero më awöra. **8** Kür ibed unu ki banya ka ngat mörö i komwu. Ëntö bed unu ki banya më marö awodhi i kinwu kenwu, piën jö na marö ewodhgi nwongo dong ocobo gini Cik. **9** Piën Cik kobo ni, "Kür idöny i elomi, kür ineki, kür ikwal, kür inir jami ka ngat nökenë," ëka ki kwa cik mökö nökenë thon önöthërë gini kanya acël ki köp ni, "Mar

awodhi na calö imarö komi keni.” 10 Ngat na marö dhanö ba timö gin na rac both dhanö awodhe, pi manön mar ëné gin na cobo cık. 11 Myero itii unu man, nakun ingeo unu karé na un itye unu ië, ni karé dong örömö na myero icoo unu ökö ki i wang ninö. Piën laré onu dong onyingo na cwök rwök, löö karé na onu onwongo pod etye ki yee i kom Rwoth. 12 Kiwor dong cwök thum, piny dong mitö ruu. Eru dong ebol tic mé piny na cöl ökö, éka eruk jami lwény mé kiceng. 13 Myero onu élüb kite na myero mé kiceng, abonge woro éka mörö, abonge tim mé ölyang ki tim mökö mé tarwang, abonge dhaa ki nyeko. 14 Ruk unu Rwoth Yecu Kiricito calö iruko unu böngü, éka thon kür itham unu kite mé kwöwu mé anywölí éka mé cobo miti méré.

14 Jöl unu jö na yeegi görü, éka kür ipyem ködgi i kom thama mökö na gin thamö. 2 Dhanö twérö bedo ki yee mé camö gin mörö kékén, éntö ngat na yee méré görü camö ngwedo kékén. 3 Dhanö na camö gin na kibéc myero kür ócaa ngat na ba camö, éka dhanö na ba camö gin na kibéc kür öngöl köp i kom ngat na camö gin na kibéc, piën Obanga dong öjölö én. 4 In inga mé ngölö köp i kom atic ka ngat nökéne? Manön köp ka ngat na löö én mé ngölö köp i kome, ka cung onyo ka podho. Éntö én bino cung, piën Rwoth tye ki twérö mé miö én cung. 5 Dhanö acél thamö pi ninö acél na löö ninö nökéne, nakun nwongo dhanö nökéne thamö pi ninö kibéc ni röm. Dhanö acélacél myero omok thama méré piré kéné. 6 Dhanö na thamö pi ninö mörö ni piré ték, thamö pi Rwoth. Ngat na camö gin mörö kékén camö pi Rwoth, piën miö pwöc both Obanga, éka dhanö na kwérö cem mökö thon kwérö pi Rwoth, éka pwöyö Obanga. 7 Piën dhanö mörö ope ki i kin onu na kwö piré kéné, éka thon dhanö mörö ope na thöö piré kéné. 8 Ka onu ékwö, onu ékwö pi Rwoth, éka ka onu éthöö, onu ebodo jö ka Rwoth. 9 Pi tyén köp ni, Kiricito öthöö éka döki obodo na kwö ék én obed Rwoth ka jö n’öthöö éka ki jö na kwö. 10 Pingö in ingölö köp i kom omeru? Onyo in, pingö icaö omeru? Onu kibéc ebino cung i nyim then ker k’Obanga ék öngöl köp ni onu. 11 Piën écöö ni: “Rwoth okobo ni, ‘Na calö an atye na kwö,’ ‘jö kibéc bino rumo cöng-gi i nyima; éka jö kibéc bino pakö Obanga.’” 12 Cé dong, ngat acélacél i kin onu bino döki i köp na tye i kome piré kéné both Obanga. 13 Pi manön, onu myero kür éngöl köp i kom ewodh onu, éntö gin na myero onu éjuk ökö éné mé tio gin mörö na bino miö ömin onu twomo tyéné onyo podho i bal. 14 An

angeo éka aniang na bér i Rwoth Yecu, ba tye gin mörö n’obedo mé kwer piré kéné, éntö bedo mé kwer both ngat na thamö ni obedo mé kwer. 15 Ka cé imiö utmegoni bedo ki cwer cwiny pi gin na in icamö, nwongo dong ba itye ka lübö yoo mé mar. Kür iwék gin na in icamö öbal kwö ka dhanö na Kiricito öthöö piré. 16 Kür imiü unu dhanö obed ka twak i kom gin mörö na bér ki kubothwu ni obedo gin na rac. 17 Piën ker k’Obanga ba obedo mé cem ki math, éntö obedo mé kite atir, kuc, éka yom cwiny na Tipo Naleng miö. 18 Dhanö na tio tic ka Kiricito ni kömanön éné yomo cwiny Obanga éka jii pwöyö. 19 Eru dong ebed ka thamö pi gin na kelo kuc, éka ki gin na jingö yee onu i kin onu. 20 Kür ibal tic k’Obanga pi köp mé cem kékén. Cem kibéc leng, éntö bedo na rac ka dhanö mörö camö gin na miö awodhe podho i bal. 21 Bedo na bér rwök ka ba icamö ringo, onyo kadí mé madhö köngö, onyo tio gin mörö na bino miö omeru podho. 22 Yee na in itye ködö myero ibed ködö i kin in k’Obanga kékén. Tye ki gum dhanö na ba ngölö köp i kome kéné i kom gin na én pwöyö. 23 Éntö dhanö na tye k’akalakala i cwinye, köp löö én ka cé ócamö, piën gin na én camö ba öya ki i yee; éka gin na kibéc na ba öya ki i yee obedo bal.

15 Onu jö na ték myero éköny jö na görü i kom gin na löögí, éntö kür onu étham mé yomo cwiny onu kékén. 2 Ngat acélacél i kin onu myero oyom cwiny awodhe, mé könyö én, ék ödöng i yee méré. 3 Piën Kiricito ba oyomo cwinye kéné, éntö obedo ki kite na calö écöö ni, “Ayeny ka jö n’obedo ka yanyöni opodho i koma.” 4 Gin na kibéc n’écöö i karé na cön ca onwongo écöö mé pwonyo onu, ék onu ebed ki gen mé dangö can éka cükö cwiny na yaa ki i Cöc na Leng. 5 Dangö can ki cükö cwiny yaa ki both Obanga, myero én ömiüwu ibed unu ki niang na bér i kinwu kekenwu, nakun ilübö unu kite ka Kiricito Yecu, 6 ék iribéré unu ka pakö Obanga Apap ka Rwoth onu Yecu Kiricito ki dwön acél. 7 Pi manön, jöl unu ngat acélacél, kite na calö Kiricito dong öjölöwu ködö, pi dheo k’Obanga. 8 An akobo bothwu ni Kiricito ölökeré ödökö atic na könyö Eyuda, pi nyutho ni Obanga twakö köp adyer, nakun thon cobo gin n’Obanga öcikéré ië both kweregí, 9 ék Erok obed giní ka pakö Obanga pi kica méré, kite n’écöö ködö ni: “Pi manön an abino paköni i kin Erok; an abino wero wer mé pakö nyingi.” 10 Okobo döki ni, “Un Erok, bed unu ki yom cwiny kanya acél ki jögé.” 11 Éka döki ni, “Pak unu Rwoth, un Erok kibéc, éka un jö mé lobo kibéc wer unu wer mé pakö én.” 12 Éka döki Icaya okobo ni, “Akwar Jece bino bino, én ngat na bino mé löönö

Erok, Erok bino ketho gen-gi i kome." 13 Obanga na miö jö kibéc bedo ki gen, myero ömii yom cwiny kibéc ki kuc opong i iwu pi yeewu i kome, ek genwu obed ka mëdërë amëda pi tēkö më Tipo Naleng. 14 Utmegona, an kikoma angeo atir ni un ibedo jö na bëcö rwök, itye unu ki ngec n'örömö, ëka itwërö unu pwonyere kenwu. 15 Ëntö an dong atyeko cöo bothwu köp mökö ki tēk cwiny na dit, kobedini an amitö po wiwu ië. An atimö kömanön pi mic n'Obanga ömía, 16 më bedo atic ka Kiricito Yecu both Erok. An atye ka tic calö alamdhök k'Obanga nakun atitö köp më Emuth na Bër n'öya ki both Obanga, ek ömii Erok obed gini calö tyër n'Obanga pwöyö, na Tipo Naleng ölönyö ökö ödökö na leng. 17 Pi manön, an atye ki tyën köp na miö awakara i Kiricito Yecu, pi ticna na an atye ka tio pi Obanga. 18 An ba abino twakö köp mörö nökenë, na path ki gin na Kiricito otio pi kelo Erok më bedo ki winy i kom Obanga, nakun tio kanya acël köda i köp ëka i tic— 19 ki tēkö n'onen i kom anyuth ki tango mökö, pi tēkö ka Tipo Naleng. Man ömii an atyeko titö köp më Emuth na Bër i kom Kiricito, cakërë ki i Jerusalem më thuno ködë naka i Illiriko. 20 An onwongo aketho cwinya më titö köp më Emuth na Bër kanya yam dhanö bara owinyo gini nyiing Kiricito, ek ömii kür agër i acaki thë öt na yam dong ngat nökenë öcakö gërö mëgë ië, 21 ëntö ek obed kite na calö ëcöo ni, "Jö n'onwongo bara ekobo bothgi köp i kome bino gini nënö ën, ëka jö na bara owinyo gini pirë bino gini niang i kome." 22 Man ënë gin n'obedo ka jüköna tyën na pol më bino bothwu. 23 Ëntö kobedini dong an ba atye ki kabedo mörö më tic i lobo ni gini, ëka kite na an abedo parö pi mwaka na pol më bino yo bothwu. 24 An ageno ni an abino nënöwu ka awok ki kunön na nwongo apoth më cidhö yo Cipein. An ageno thon ni ibino unu könyöna i wothna më cidhö yo kunön, kinge na dong atyeko bedo bothwu na bër pi karë mörö na nënök. 25 Ëntö kobedini an pod atye ka cidhö yo Jerusalem më tero jami më köny both jö k'Obanga na leng na tye kunön. 26 Piën jö k'Obanga na tye gini i Macedonia ëka Akaya omoko gini dong thamagi më jwoko lim më könyö ëcan na tye gini i kin jö k'Obanga na leng na tye i Jerusalem. 27 Gin obedo ki yom cwiny më timö ni kömanön, ëntö gin thon tye ki banya both jö më Jerusalem, piën ka Erok nywakö gini gamö mic më cwiny kanya acël k'Eyuda, myero gin thon ököny Eyuda ki jami mökö më kom. 28 Ka manön othum dong ökö, nakun nwongo atyeko miö bothgi gin n'ejwoko pirgi, cë dong an abino wok ki bothwu ëka apoth acidhö yo Cipein. 29 An angeo ni ka dong athuno bothwu nwongo abino ki gum na dit n'öya ki

both Kiricito. 30 An abakö dhöga bothwu utmegona, i nyiing Rwoth onu Yecu Kiricito ëka pi mar ka Tipo Naleng, më ribërë köda i lëga both Obanga pira, 31 lëg unu ek abwöth ökö ki both jö na ba oyeo gini Kiricito na tye gini i Yudea, ëka ek ömii jö k'Obanga na leng na tye gini i Jerusalem öpwö gini tic na an acidhö më timö yo kunön. 32 Pi manön ka Obanga oye ek an abin bothwu ki yom cwiny na thwönë, cë aywe kanya acël kodwu. 33 Obanga won kuc obed kodwu. Amën.

16 An anyutho bothwu amin onu Poibe, n'obedo aköny tic ka jö n'oye Kiricito na tye i Cenikeria. 2 An akwaöwu më jölö ën i Rwoth i kite n'opore na calö jö k'Obanga na leng myero öjöl ködë dhanö, ëka myero iköny unu ën i gin na kibéc na ën bino mitö ki bothwu, piën ën obedo ka miö köny both jö na pol, naka thon an. 3 Moth unu Piricila ëka Akwila, n'obedo gini etic ewodha i Kiricito Yecu. 4 Gin öjalö kwögi pi larö kwöna. Pathi an këna ëntö jö n'oye Kiricito kibéc na tye i kin Erok pwöyögi. 5 Moth unu thon jö n'oye gini Kiricito na cökërë gini i ödgi. Moth unu okonena më amara Epäenato, na ën öcakö bedo dhanö më acël më yeo Kiricito i Acia. 6 Moth unu Maria, n'otio tic rwök pirwu. 7 Moth unu Anduroniko ëka Yunia, na gin obedo wat n'etweogi kanya acël köda i buc. Obedo gini jö na pirgi tēk rwök i kin ëkwëna, ëka gin ënë öcakö gini bedo i Kiricito na an podi. 8 Moth unu Ampuliato, okonena më amara i Rwoth. 9 Moth unu Urbano, atic awodh onu i Kiricito, ëka Citakic okonena më amara. 10 Moth unu Apelle, na ën obedo dhanö n'ëtëmö ëka ëpwö i Kiricito. Moth unu jö më öt ka Aricitobulo. 11 Moth unu Kerodion, n'obedo wat na mëga. Moth unu jö më öt ka Narocico na tye gini i Rwoth. 12 Moth unu Terapaina ëka Terpoca, jö n'otio gini tic rwök i Rwoth. Moth okonena më amara Perici, dhakö nökenë n'obedo ka tic rwök i Rwoth. 13 Moth unu Rupo, n'ëyërö i Rwoth, gin k'aya mëre, na an acwodo ni ayana thon. 14 Moth unu Acinkerito, Pelegon, Keremec, Patroba, Keremac ëka utmego na tye gini kanya acël ködgi. 15 Moth unu Pilologo, Julia, Nerea ëka amin mëre, Olimpa ëka ki jö k'Obanga na leng kibéc na tye gini kanya acël ködgi. 16 Mothere unu kekenwu ki moth më mar. Jö n'oye Kiricito kibéc na tye gini i kabedo na papath omothowu. 17 An abakö dhöga bothwu, utmegona, ni inën unu na bër jö na kelo apokapoka ëka na miö dhanö podho i bal, na ba rwatërë ki pwony na yam epwonyowu ködë. Kür iribërë unu ki jö na calö manön. 18 Jö na calö manön ba obedo gini etic ka Rwoth onu Kiricito, ëka rwothgi na gin marö ënë igi. Bwölö gini

thama ka jö n'ope kî thama na rac, nakun nwongo twakö gini köp na bër na winyo mit rwök. **19** Winy na un ibedo ködë both Obanga dong owinyere both jö kibëc, manön ënë ömiö i yomo unu cwinya. Dong an amitö nî ibed unu kî ryëkö i kom gin na bër kibëc, nakun ibedo unu abonge gin na rac. **20** Obanga, won kuc, bino nyönö Catan ökö piöpiö piny i the tyënwu. Kica ka Rwoth onu Yecu obed kodwu. **21** Timoteo n'obedo atic awodha omothowu, ëka Lucio, Jaco ëka Cocipater, na gin obedo wedena. **22** An, Tertio, ënë acöo waraga ni, amothowu i Rwoth. **23** Gayo na ën ngat na an abuto i ödë thon omothowu, ëka obedo ngat n'obedo ka gwökö jö n'oye Kiricito kibëc. Eracito na ën obedo akan lim më taun ni, ëka ömin onu Kwarto thon ooro mothgi bothwu. **24** Kica ka Rwoth onu Yecu Kiricito obed kodwu. Amën. **25** Onu myero ëmii pwöc both Obanga na miö onu tükö më cung na tük, ëka kî kite na an abedo ka pwonyowu ködë i köp më Emuth na Bër na an abedo ka titö, kî köp n'ëtütö i kom Yecu Kiricito. Müng ni Obanga ökanö öling ködë ökö moth pi karë n'opoth, kinge ën öyabö ökö kanya leng. (aiönios g166) **26** Kobedini dong öyabö ökö kanya leng i köp k'edwarpiny n'ecöo n'ömiö Erok kibëc onge gini kite na calö Obanga na ba thöo yam öcikö, ëk ëmii Erok kibëc oye ëka obed gini kî winy i kome. (aiönios g166) **27** Dheo obed both Obanga naka naka, na ën këkën ënë won ryëkö, pi Yecu Kiricito! Amën. (aiön g165)

1 Korinti

1 Waraga ni öya ki both Paulo n'ëyërö ki miti k'Obanga më bedo akwëna ka Kiricito Yecu, ëka ki both ömîn onu Coctene. **2** Wan etye ka cöönö both jö k'Obanga n'oye Kiricito na tye i Korinti, bothwu jö n'Obanga otyeko lönyöwu i Kiricito Yecu, ëka ocwodowu më bedo jögë na leng, kanya acël ki jö na tye i kabedo kibëc na cwodo nying Rwoth onu Yecu Kiricito n'obedo Rwothgi ëka më onu. **3** Ëk Obanga Apap onu ëka Rwoth Yecu Kiricito ömiiwu gum ëka kuc. **4** Karë kibëc an amïö pwöc both Obangana pi kica mërë na ën ömïöwu i Kiricito Yecu. **5** Pi bedowu i Kiricito idökö unu ëlönyö dong i yodhi kibëc. Itye unu dong ki ngec ëka kite më twak kibëc na bër, **6** piën köp na wan epwonyo i kom Kiricito ödönyö na thuth i cwinywu. **7** Kobedi dong un itye ki mic kibëc më Tipo na un imitö na calö itye ka kürö unu karë më nyutho Rwoth onu Yecu Kiricito. **8** Ën bino miöwu icung na tæk naka i ajiki ëk gin mörö obed n'ope n'edothowu ködë i ninö na Rwothwa Yecu Kiricito bino dwogo. **9** Obanga, n'ocwodowu më güre më ribërë kanya acël ki Wode Yecu Kiricito Rwoth onu, obedo Obanga na genere. **10** Abakö dhöga bothwu utmegona, ki nying Rwoth onu Yecu Kiricito, ni un kibëc myero iyere unu kenwu i köp acël ëk kür imii unu apokapoka obed tye i kinwu ëntö nöthërë unu i cwiny ëka thama acël. **11** Utmegona, jö mökö n'öya ki i pacö ka Koloe okobo ginii botha ni dha tye i kinwu. **12** Gin na an atye ka kobo ene: Jö mökö ki kinwu tye ka kobo ni, "An abedo dhanö ka Paulo." Jö nököënë kobo ni, "An abedo dhanö k'Apolo," onyo ni, "An abedo dhanö ka Kepa," onyo ni, "An abedo dhanö ka Kiricito." **13** Kiricito opokere? Onwongo Paulo eguro i kor yath ariä piñwu? Ngat mörö tye i kinwu n'ebatica ki nying Paulo? **14** An apwöyö Obanga piën yam an ba abatica ngat mörö ki kinwu na path ki Kiricipac ëka Gayo, **15** ëk ngat mörö kür okob ni ebatica ën ki nyinga. **16** (Eyo, an thon abatica jö më pacö ka Citipwanu, ëntö an ba apo ni abatica ngat mörö nököënë.) **17** Piën Kiricito ba oora më batica jii, ëntö më titö köp më Emuth na Bër, ëka pathi ki ryëkö ka dhanö, ëk kür ömii thöö ka Kiricito i kor yath ariä obed gin na köny mërë ope. **18** Köp i kom yath ariä obed köp më mingo both jö na tye ka rwenyo, ëntö ki both onu jö n'Obanga tye ka larö, obedo tækö k'Obanga. **19** Ëcöo yam ni, "Abino balö ryëkö ka jö na ryëk, ëka abino këthö ngec ka jö na ngeo piny ökö." **20** Cë dong ëryëkö kara ut gini kwené? Epwony Cïk ka Muca ut gini kwené? Jö na pyem më karë ni

ut gini kwené? Obanga ba ölökö ryëkö më lobo ni ödökö më mingo? (aiön g165) **21** Pi ryëkö k'Obanga ömïö jii ba ongeo ën ki ryëkögi, ëntö Obanga otio ki köp më mingo na wan ëtitö më larö jö na yee. **22** Eyuda penyo gini pi anyuth më tango, ëka jö Grecia rangö gini ryëkö. **23** Ëntö ka wan ëtitö ni Kiricito onwongo eguro i kor yath ariä, nwongo obedo gin mörö na rac ki both Eyuda, ëka ki both Erok, nwongo obedo köp më mingo. **24** Ëntö both Eyuda ëka Erok n'Obanga ocwodogi më bedo jögë, Kiricito obedo tækö k'Obanga ëka ryëkö k'Obanga. **25** Gin n'ëthamö ni obedo mingo k'Obanga, ryëk löö ryëkö ka dhanö, ëka gin n'ëthamö ni obedo görü k'Obanga, tæk löö tækö ka dhanö. **26** Utmegona, tham unu i kom kite n'onwongo itye unu ködë i karë n'ecwodowu. Jö na pol ki kinwu onwongo ba ryëk gini i kite më lobo ni, polwu onwongo ba obedo wegü twër ëka polwu ba obedo wegü dheo. **27** Ëntö Obanga öyërö jö na jii kobo ni ming gini, më miö lewic both jö na thamö ni gin ëryëk. Obanga öyërö jö na görü më miö lewic both jö na tæk. **28** Obanga öyërö jö mökö më rwöm na piny na jii caö ni könygi ope, naka thon jami mökö n'ope, ëk etii ködgi më dwökö piny jami na jii kobo ni piñgi tæk, **29** ëk ngat mörö kür öwakërë i nyim Obanga. **30** Obanga ënë ömïöwu ikwö unu i Kiricito Yecu, n'ödökö ryëkö onu n'öya ki both Obanga. Pi Kiricito, ömïö Obanga ökwanö onu ni kite onu atir, ömïö onu ebeto jö na leng ëka ögönyö onu ki kom bal. **31** Pi manön, kite n'ëcöo ködë i Cöc na Leng ni, "Ngat mörö na mitö wakërë, myero öwakërë i Rwoth."

2 i karë na an abino bothwu, utmegona, an ba abino ki ryëkö onyo twak mörö na malö më kobo niwu müng i kom Obanga. **2** Piën an onwongo ba amitö ngeeno gin mörö i karë na an atye i kinwu, na path ki Yecu Kiricito këkën ëka thöo mërë i kor yath ariä. **3** An abino bothwu na an atye ki görü, ki lworo ëka ki myël kom rwök. **4** Twakna ëka titö köpna onwongo ba obedo më ryëkö ëka köp na ywaö thama, ëntö më nyutho tækö më Tipo, **5** ëk yeewu kür ocung i kom ryëkö ka dhanö, ëntö i kom tækö k'Obanga. **6** Wan ëtwakö köp më ryëkö i kin jö n'otengo i cwinygi, ëntö pathi ryëkö më karë ni onyo ryëkö k'ëlöc më karë ni, na gin kikomgi dong tye ka rwenyo ökö. (aiön g165) **7** Ëntö wan ëtwakö ryëkö k'Obanga më müng, ryëkö n'onwongo ëkanö ökö ëka ryëkö n'Obanga öyübö më kelo ni onu dheo na bara wi lobo öcakërë. (aiön g165) **8** Ba tye ëlöc mörö më karë ni n'öniang ië, kono yam gin öniang, kono ba oguro gini Rwoth won dheo i kor yath ariä. (aiön g165) **9** Ëntö kite n'ëcöo ködë ni, "Gin

na wang ba ònénò, ith ba owinyo, thama ka dhanò ba ògamò gin n'Obanga òyùbò pí jò na marò èn." 10 Èntò Obanga òmíò Tipo Naleng otuco both onu. Tipo Naleng rangò jami kibéc, naka thon mùng k'Obanga na thuth. 11 Nga na ngeo thama ka dhanò nòkèné, na path kí cwiny na tye í dhanò nòn kékèné? Í yoo acèl nòn, dhanò mòrò ope na ngeo thama k'Obanga, na path kí Tipo k'Obanga kékèné. 12 Onu ba ègamò cwiny mè lobo, èntò ègamò Tipo Naleng n'òya kí both Obanga, èk èniàng í kom míc n'Obanga òmíò onu nono. 13 Man èné ngò na wan ètwakò, wan ba ètwakò kóp n'epwonyo kí ryèkò ka dhanò, èntò kóp na Tipo Naleng opwonyowa kòdè, nakun pwonyo kóp mè Tipo n'atír both jò na tye kí Tipo. 14 Dhanò na ba oye Kiricito, ba twèrò gamò ngò na Tipo k'Obanga miò, pièn kí bothe obedo gin mòrò mè mingò, èka èn ba twèrò niàng tē pièn koth gin nòn èniàng tē kí Tipo. 15 Dhanò na tye kí Tipo niàng jami kibéc, èntò èn kikome, ngat mòrò ope na twèrò niàng í kome. 16 Kite na Còc na Leng kobo ní, "Nga n'ongeo thama ka Rwoth èk opwonyo èn?" Èntò onu etye kí thama ka Kiricito.

3 Utmegona, í karè na an atye bothwu ba atwak kodwu na calò jò na dong tye kí Tipo, èntò atwak kodwu na calò jò na tye kí kit kwò mè lobo, na calò èthinò na tòcò í Kiricito. 2 Yam apìdhòwu kí cak, pathí kí cem na tètèk, pièn onwongo ba ítwèrò unu cem, kadí thon kobedini pod bara íròmò unu camò cem na tètèk, 3 un pod itye kí kit kwò mè lobo. Pièn un pod itye k'adìnga í kinwu èka ídhaa unu kenwu, manòn ba nyutho ní un pod itye unu kí kit kwò mè lobo? Ba pod itye unu ka lùbò kite ka dhanò? 4 Ka jò mòkò kí kinwu kobo ní, "An abedo dhanò ka Paulo," èka jò nòkèné ní, "An abedo dhanò k'Apolo," ba nwongo un pod ibedo unu dhanò adhana? 5 Kara Apolo èné nga? Paulo èné nga? Wan èné etic n'òmiò iyee unu kóp mè Emuth na Bèr, kite na Rwoth opoko kí tic both ngat acèlacèl. 6 An apìdhò kodhi, Apolo òònyò pii tē, èntò Obanga òmíò òdòngò. 7 Dong kadí ngat n'òpìdhò onyo ngat n'òònyò pii, gín kibéc ba obedo gin mòrò èntò Obanga kékèné èné miò jami dòngò. 8 Dhanò n'òpìdhò èka dhanò n'òònyò pii, gín kibéc tio pí gin acèl. Ngat acèlacèl bino nwongo òcara mèrè na ròm aròma kí tic na èn otio. 9 Pièn wan ebeto etic kanya acèl k'Obanga, un ibedo unu pwodho k'Obanga, èka thon ibedo unu gedo k'Obanga. 10 Pí gum k'Obanga n'èmià, òmíò yam an acakò thè òt calò agedo n'obedo adírù, dhanò mòrò nòkèné tye ka gedo í wie. Èntò dhanò acèlacèl myero ògwòkèrè í kite na èn gedo kòdè. 11 Pièn ngat mòrò ope na

twèrò cakò thè òt nòkèné na path kí man na dong ècakò, na èné Yecu Kiricito. 12 Èntò ka ngat mòrò ogedo í wi acaki thè òt nòn kí gol onyo kí ryal, onyo kí kite mè wel, onyo yen, onyo lum agada, onyo lum òcici, 13 tic ka ngat acèlacèl bino nen òkò kanyalèr, pièn niòn mè ngòlò kóp bino nen kí mac, na bino tèmò tic ka dhanò acèlacèl kite na tye kòdè. 14 Ka gedo ka ngat mòrò odong n'ègèrò í kom acaki thè òt nòn, dhanò nòn bino nwongo míc mè pwòc. 15 Èntò ka ngat na tic mèrè òwang òkò, èn ba bino nwongo míc mòrò mè pwòc, èn kikome bino bwòth, na calò dhanò n'owok í mac awoka cè opoth. 16 Un ba ingeo ní ibedo unu òt k'Obanga èka Tipo k'Obanga thon bedo í iwu? 17 Dong ka ngat mòrò òbalò òt k'Obanga, Obanga thon bino balò èn, pièn òt k'Obanga leng, un kikomwu ibedo unu òt k'Obanga nòn. 18 Kùr íbwòlèrè unu kenwu. Ka dhanò mòrò kí kinwu thamò ní èn èryèk kí rwòm mè lobo mè karè ní, myero èn òdòk ngat na mǐng, èk èn òdòk na ryèk. (aiòn g165) 19 Pièn ryèkò mè lobo ní kí í nyim Obanga obedo gin mè mingò. Kite n'ècòò ní, "Èn makò jò na ryèk í òkòragí mè bwòlgí kèn-gí." 20 Èka dòkí ní, "Rwoth ngeo ní thama k'èryèkò kòny mèrè ope." 21 Dong, ngat mòrò myero kùr òwakèrè í kom dhanò, pièn jami kibéc obedo mewu, 22 kadí Paulo, onyo Apolo, onyo Kepa, onyo lobo ní, onyo kwò, onyo thòò, onyo gin mòrò na tye, onyo gin mòrò na bino bedo í anyim. Manòn kibéc obedo mewu, 23 un thon ibedo mè ka Kiricito, èka Kiricito obedo mè k'Obanga.

4 Myero ínènwà unu na calò etic ka Kiricito, èka na calò jò n'ekethogí mè gwòkò mùng k'Obanga. 2 Gin na mìtèrè kí both ègwòk jami èné ní gín myero obed jò na genere. 3 Kí kubotha man kóp na tídí mòrò ka íngòlò unu kóp í koma, onyo okiko mòrò mè ka dhanò. An thon ba angòlò kóp í koma kèna. 4 Pièn kí kubotha an angeo ní cwinya lèr, èntò man ba mǐa alòò kóp. Rwoth èné ngòlò kópna. 5 Pí manòn, kùr íngòl unu kóp mòrò na karè bara òròmò, na bara Rwoth odwogo. Èn bino mènnyò gin n'opono í piny na còl, dòk bino nyutho tham na tye í cwiny jò kanyalèr. Í karè nòn Obanga bino pwòyò ngat acèlacèl í kite na mìtèrè. 6 Utmegona, kóp ní bino dwogo í koma kèna èka í kom Apolo pí un, "Èk ipwonyere unu í komwa í thè kóp n'ekobo ní, "Kùr íkadhi unu ngò n'ècòò," èk ngat mòrò kí kinwu kùr òwakèrè, nakun pakò dhanò acèl èka caò ngat nòkèné. 7 Nga n'òmiò in ibedo ngat na path kí jò nòkèné? Ngò na in itye kòdè na ba emii amia? Cè ka emii amia, píngò iwakiri kòdè na calò ba emii amia? 8 Dong ityeko unu yeng òkò! Ídòkò unu dong èlònyò! Ídòkò unu rwodhi abonge

wan! Ka onwongo amitö adyer ni idök unu rwothi, ek wan thon ebed rwothi kanya acël kodwu! 9 Piën ki kubothisa nen calö, Obanga onyuthowa wan êkwëna i nyim lwak ki cen na calö jö n'ëngölö niggi köp më thöö, piën wan dong êdökö gin më anëna both wi lobo thükül, both emalaika êka both jii. 10 Wan êdökö emingo piën eyee i kom Kiricito, êntö un i'ryëk unu i Kiricito! Wan êgörü, êntö un itëk unu! Eketho wörö i komwu, êka wan êcaöwa! 11 Naka i caa ni kec k'orio nekowa, wan eruko opeki, jii pwodowa, êka pacöwa thon ope. 12 Wan etio tic na tük ki cingwa. Ka jii lamöwa, wan êlamö niggi gum. Ka eyelowa, wan êdangö adanga. 13 Ka êbalö nyiingwa, wan êgamö ki mwolo. Wan dong êcal ki yugi më wi lobo, wan ebedo cilo më jami kibëc naka tin. 14 An ba atye ka cöönö köp ni më miöwu lewic, êntö më pwonyowu na calö êthinöna na an amarö. 15 Piën kadî bed ni itye unu ki jö elip apar na tëlöwu i yoo ka Kiricito, un ba itye ki bebe na pol. An yam adökö apapwu i Kiricito Yecu pi köp më Emuth na Bër. 16 Pi manön an akwaöwu, më poro kitenä. 17 Man ênë ngö n'ömiö aoro Timoteo bothwu. Ên obedo athin na mëga i Rwoth na an amarö, êka genere. Ên bino po wivu i yoo na an alübö i Kiricito Yecu, na an apwonyo ki lwak jö n'oye Kiricito na tye i kabedo kibëc. 18 Jö mökö ki kinwu tye ka thamö ni an ba abino bothwu, êka ömiö gin tye ka wakërë. 19 Êntö ka Rwoth oyeo, an abino thuno bothwu piöpiö, cë abino niang i tükö ka jö na wakërë nön, êntö pathi köp na gin twakö atwaka. 20 Ker k'Obanga ba obedo twak atwaka êntö më tükö. 21 Ngö na un i'imitö? Myero abin bothwu ki lüth, onyo abin ki mar êka ki cwiny më mwolo?

5 Köp owinyere botha adyer ni tim më ölyang tye i kinwu. Tim më ölyang nön ba timërë naka thon i kin jö na ba ngeo Obanga. Dhanö mörö tye n'ömaö apap mërë dhakö. 2 Êka pod iwakërë unu! Ba itwërö unu thon kumo êk ngat n'ötümö koth tim nön ëryëm ökö ki kinwu? 3 An ki kubothisa, kadî koma ope kunön, an atye kodwu i cwiny. An na calö ngat na tye kunön atyeko ngölö köp ökö i kom dhanö n'ötümö tim na rac nön. 4 Ka igürë unu i nyiing Rwothwa Yecu, êka an atye kodwu i cwiny êka tükö ka Rwothwa Yecu ute, 5 mii unu dhanö ni both Catan, êk onek miti më kwö më anywölî ökö, êka tipo mërë ölarë i ninö ka Rwoth. 6 Awakawu ba bër. Un ba ingeo ni thöbî na tidî mörö miö mökö ogati yenyo? 7 Kwany unu thöbî na cön ökö, êk ibed unu ogati na nyen na thöbî ope ië na calö itye unu. Piën athin römö onu më Poth na ênë Kiricito, ëtyërö dong ökö. 8 Pi manön dong, onu myero kür ekwer karama ki thöbî na cön, na ênë

thöbî më rac cwiny êka tim mökö na reco, êntö eru ekwer k'ogati na thöbî ope ië, na ênë lër êc êka ki köp adyer. 9 Yam acöö niwu i waragana ni kür iribërë unu ki jö na timö tim më ölyang. 10 An onwongo ba akobo jö na timö tim më ölyang më lobo ni, onyo eworo më jami êka ëyak, onyo ëwör cal jwogi. I köp nön un myero iya unu ökö ki i lobo ni. 11 Êntö kobedini an acöö bothwu ni kür iribërë unu ki dhanö mörö na cwodere ni ngat n'oye, ka ên ötimö tim më ölyang onyo ên obedo aworo më jami, onyo awör cal jwök onyo anyany jö, amërö, onyo ayak. Kür thon icem unu ki koth dhanö nön. 12 Manön ba obedo ticna më ngölö köp both jö na ba ngeo gini Yecu. Pathi un ênë myero ingöl unu köp both jö na tye i kinwu? 13 Obanga ênë bino ngölö köp both jö na ba ngeo gini Yecu. "Ryëm unu dhanö na rac ökö ki kinwu."

6 Ka dhanö mörö ki kinwu tye ki köp mörö i kom awodhe, piingö lewic ba makö ên më pido dhanö nön i nyim jö na kitegi ba tye atir nakaka pido dhanö nön i nyim jö k'Obanga na leng? 2 Un ba ingeo unu ni jö k'Obanga na leng bino ngölö köp both jö më lobo? Êka ka un ibino ngölö köp both jö më lobo, un ba irömö ngölö köp mökö na thithinö? 3 Un ba ingeo ni onu ebino ngölö köp n'emalaika? Köp na makö kwö na onu etye ië ni kono? 4 Kara ka dong itye unu ki köp më alara, piingö itero unu i nyim jö na piiggi ba tük both jö n'oye Kiricito? 5 Akobo man êk lewic ömakwu. Ngat mörö na ryëk ope i kinwu na twërö tyeko köp na tye i kin jö n'oye? 6 Êntö nakaka timö ni kömanön, ngat mörö n'oye dök pidere k'ömin mërë i nyim jö na ba oye Kiricito. 7 Pidere i kinwu kenwu nyutho ni köp ölööwu ökö. Thwara idang unu gin na rac. Thwara iwëk unu jii obuwu. 8 Nakaka timö ni kömanön, un ki komwu ibuo unu jö êka itimö unu gin na rac, naka i kom utmegowu kikome. 9 Un ba ingeo unu ni jö na kitegi ba tye atir, ker k'Obanga ba bino bedo mëgi? Kür imii ëbwölwu, kadî jö na timö tim më ölyang, onyo ëwör cal jwogi, onyo jö na dönyö gini i elomi, onyo cwö n'obedo gini jö ölyang, onyo cwö na buto ki cwö ewodhgi, 10 onyo ekwoe, onyo eworo më jami, onyo ëmërö, onyo jö na yanyö jii, onyo ëyak—ker k'Obanga ba bino bedo mëgi. 11 Jö mökö ki kinwu yam obedo gini koth jö nön. Êntö un dong etyeko lwököwu ökö, etyeko lönyöwu më bedo jö na leng, etyeko kwanöwu ni un jö na kitewu atir i nyiing Rwoth Yecu Kiricito êka ki Tipo k'Obanga onu. 12 "An atwërö timö jami kibëc," êntö ba nyutho ni jami kibëc könyö. "An atwërö timö jami kibëc," êntö ba abino yeo gin mörö më lököna më bedo opii mërë. 13 "Cem tye pi ië, êka ië tye pi cem." Êntö gin ariö nön kibëc

Obanga bino tyekogi ökö. Kom ba obedo më tím më ölyang, ëntö tye pî Rwoth, ëka Rwoth tye pî kom. **14** Obanga yam ocerö Rwoth ki kin jö n'öthö, bino cero onu thon ki tükö mërë. **15** Un ba ingeo unu nî komwu obedo dul kom Kiricito? Myero dong akwany dul kom Kiricito alök ödök dul kom ölaya? Ba twërë! **16** Onyo ba ingeo unu nî dhanö na rîbërë kî dhanö n'obedo ölaya dökö kom acël ködë? Pîen yam ëcö nî, "Gin ariö bino dökö kom acël." **17** Ëntö dhanö n'öriberë kî Rwoth dökö cwiny acël ködë. **18** Rîng unu ökö kî kom tím më ölyang. Bal nökenë kibëc na dhanö tímö ba gudo kome, ëntö dhanö na tímö tím më ölyang balö kome kënë. **19** Un ba ingeo unu nî komwu ënë obedo öt ka Típo Naleng na bedo i'iwu, n'Obanga ömiöwu? Un ba ibedo unu mewu kenwu. **20** Un ëwilöwu awila kî wel. Pî manön, tii unu kî komwu më ketho dheo i kom Obanga.

7 Kobedini më dök i köp na un 'icö waraga ië: Bër ka ëcwö mörö ba obedo kî dhakö. **2** Ëntö pî tím më ölyang, ëcwö acëlacël myero obed kî dhakö mërë ëka dhakö acëlacël obed kî cwörë. **3** Ëcwö myero ocob miti ka dhakö mërë, dhakö thon myero ocob miti ka cwörë. **4** Dhakö ba tye kî twër i kome kënë, ëntö cwörë ënë tye kî twër i kome, kömanön thon ëcwö ba tye kî twër i kome kënë, ëntö dhakö mërë ënë tye kî twër i kome. **5** Kür itwon awodhi komi, kono pî karë mörö na nöök këkën na nwongo iyübö unu ayüba, ëk inwong unu karë më lëga both Obanga. Kinge rîbërë unu dökî kanya acël, ëk kür Catan ötëmwu, pî mitiwu na ba jükërë. **6** An akobo man nakun ayeo ayea, ëntö ba amiö na calö cik. **7** Kono twërë, onwongo amitö nî jî kibëc obed calö an. Ëntö dhanö acëlacël tye kî mïc mërë na pîrë tük n'Obanga ömiö, dhanö ni tye kî mïc ni, dhanö nökenë tye kî maca. **8** Both jö na bara onyomo ëka mon na cwögi öthö, akobo nî köman, bër ka gin obedo na ba onyomo, kite na an atye ködë. **9** Ëntö ka gin ba twërö gwökërë kën-gî, gin myero onyom, pîen nyom bër löö n'ëcwö onyo dhakö më dangö miti më kom. **10** Both jö na dong onyomo, acikögi nî dhakö kür opokere kî cwörë, (ëntö pathi an ënë acikö, Rwoth ënë öcikö). **11** Ëntö ka dhakö opokere kî cwörë, ën myero obed kür önyömërë, onyo odwog cen both cwörë. Ëka ëcwö myero kür opokere kî dhakö mërë. **12** Both jö nökenë kibëc (an ënë akobo, pathi Rwoth), ka omego mörö n'oye Kiricito tye kî dhakö mërë na ba oye Kiricito ëka dhakö nön yeo më bedo ködë, ën myero kür ökwër dhakö mërë. **13** Ëka ka dhakö mörö tye kî cwörë na ba oye Kiricito ëka ëcwö nön yeo më bedo ködë, ën myero kür ökwër cwörë. **14** Pîen ëcwö

na ba oye Kiricito dökö na leng pî dhakö mërë, ëka dhakö na ba oye Kiricito dökö na leng pî cwörë. Ka onwongo ba obedo nî kömanön ëthinöwu ba bedo na leng, ëntö kite na tye ködë, gin dong leng. **15** Ëntö ka dhanö na ba oye Kiricito mitö pokere k'awodhe, ën twërö pokere. Ëcwö onyo dhakö n'oye Kiricito ope kî dïc ië, pîen Obanga ocwodo onu më bedo kî kuc. **16** In itwërö ngeo nîngö, in dhakö, ka ibino larö cwoi? Onyo in ingeo nîngö, in ëcwö, ka ibino larö dhaköni? **17** Dong dhanö acëlacël myero ölüb kit kwö na Rwoth ömiö ën, ëka kwö n'Obanga ocwodo ën ië. Man ënë ngö na an acikö both jö kibëc n'oye Kiricito. **18** Tye ngat mörö n'onwongo ëlirö i karë n'ecwodo ën? Ën kür dök örang yoo më dwökö kome ëk obed calö dhanö na ba ëlirö. Tye ngat mörö n'onwongo ba ëlirö i karë n'ecwodo ën? Ën myero kür ölirë. **19** Bedo dhanö n'ölirë onyo na ba ölirë obedo gin mörö na köny mërë ope. Gwökö cik k'Obanga ënë ngö na pîrë tük. **20** Dhanö acëlacël myero obed kite n'Obanga onwongo ën i karë n'ecwodo ën ködë. **21** In onwongo ibedo opii i karë n'ecwodi? Kür ibed kî par, ëntö ka itwërö nwongo yoo mörö më yaa ökö kî i opii, tii ködë. **22** Pî ngat n'onwongo obedo opii i karë na Rwoth ocwodo ën, ënë dhanö na Rwoth ögönyö ökö kî i opii. Kömanön thon, dhanö n'onwongo löörë kënë i karë n'ecwodo ën, obedo opii ka Kiricito. **23** Un onwongo ëwilöwu kî wel na malö, kür ibed unu opii ka dhanö mörö. **24** Utmegona, dhanö acëlacël myero obed i nyim Obanga i kite na yam ecwodo ën ködë. **25** Köp na makö jö na bara onyomo, ba atye kî cik mörö n'öya kî both Rwoth, ëntö an amiö thamana ië na calö dhanö n'Obanga ötimö nîné kica ëka ömiö obedo dhanö na genere. **26** Pî can na kobedini ödiöwa, an athamö ni bër ka dhanö mörö obedo kite na ën tye ködë. **27** Ka ibedo dhanö n'onyomo, kür irang yoo më pokere. Ëka ka ba inyomo kür irang dhakö më anyöma. **28** Ëntö ka inyomo, nwongo ba itimö bal, ëka ka nyakö mörö na bara ongeo ëcwö önyömërë, nwongo ba ötimö bal. Ëntö jö na nyomo bino nwongo ginî pëkö na pol i kwö ni. An amitö nî akwany pëkö ni ökö kî komwu. **29** Utmegona, ngö na an atye ka twakö ënë nî karë dong cwök. Cakërë kobedini cidh ködë anyim, jö na tye kî mon myero obed ginî na calö jö n'ope kî mon. **30** Jö na kumo, myero obed ginî na calö jö na ba tye ka kumo. Jö na cwinygi yom myero obed ginî na calö jö na igi ba yom. Jö na wilö jami myero obed ginî na calö jö n'ope kî gin mörö. **31** Jö na tio kî jami më lobo ni myero obed ginî na calö jö na ba tye ka tic ködë, pîen lobo kite na tye ködë, bino thum ökö. **32** An amitö nî ibed unu abonge par. Dhanö na bara onyomo, cwinye parö köp ka

Rwoth, kite na myero eyom kɛ cwiny Rwoth kōdē. 33 Ēntō dhanō na dong onyomo ōkō, parō pɛ jami mē lobo ni, kite na myero eyom kɛ cwiny dhakō mērē, 34 ēka thama mērē popoka. Dhakō na bara ēnyōmō onyo nyakō na bara ongeo ēcwō mōrō, parō kōp ka Rwoth ēk ebed na leng i kome ēka i cwinye. Ēntō dhakō na dong ēnyōmō parō pɛ kōp mē lobo ni, kite na myero eyom kɛ cwiny cwōrē kōdē. 35 An akobo kōp ni pɛ kōnyōwu, pathi mē jūkōwu, ěntō mē miō jami kibēc owoth kakarē, cwinywu thon obed i kom Rwoth na gin mōrō ope na lōkō thamawu thenge. 36 Ka ngat mōrō thamō ni kite mē bedo mērē kɛ nyakō na ěn ěcikērē kōdē mē nyōmō ba tye na bēr, ēka mwaka ka nyakō nōn tye ka bedo na thwōnē, ēka ěn thamō nɛ myero ēnyōm, ěn myero ōtīm kite na ěn mītō kōdē. ěn nwongo ba tye ka tīmō bal. Gɛn myero onyom. 37 Ēntō ka dhanō mōrō cwinye tēk na gin mōrō ope na diō ěn, na dong otyeko thon yeo mē wēkō nyakō nōn na bara ēnyōmō, ěn nwongo ōtīmō gin na bēr. 38 Kōmanōn thon, dhanō n'ōnyōmō nyakō na ěn ōcikērē kōdē nwongo ōtīmō bēr, ěntō dhanō na ba ōnyōmō nyakō na ěn ōcikērē kōdē nwongo ōtīmō bēr rwōk. 39 Cɛk gēngō dhakō mē pokere kɛ cwōrē ka pod kwō, ěntō ka cwōrē ōthōō ōkō, ěn dong twērō nyōmērē k'ēcwō mōrō kēkēn na ěn mītō, ěntō ěcwō nōn myero obed dhanō na tye i Rwoth. 40 Ēntō kɛ thamana ěn bino bedo kɛ yom cwiny ka obedo kēnē, ēka an athamō nɛ atye ka miō ngō na yaa kɛ i Tipo k'Obanga ka atye ka kobo kōp ni.

8 Kōp na makō cem n'ētyērō both cal jwogi, eyo onu engeo nɛ “onu kibēc etye kɛ ngec.” Koth ngec nōn miō onu ebedo k'awaka ěntō mar ěnē miō onu ecung na tēk. 2 Ka dhanō mōrō thamō nɛ engeo gin mōrō, nwongo ba ngeo gin mōrō kite n'onwongo myero ěn onge kōdē. 3 Ēntō ka ngat mōrō marō Obanga, Obanga thon ngeo ěn. 4 Cē dong kōp i kom camō cem n'ētyērō both cal jwogi, onu engeo nɛ cal jwōk ba obedo gin mōrō na tye i lobo, ēka dōkɛ nɛ obanga nōkēnē ope na path k'Obanga acēl kēkēn. 5 Kadɛ bed nɛ gin mōkō tye n'ecwodo nɛ obanga i wi polo onyo i wi lobo, tye “obanga” na pol ēka “rwodhi” na pol, 6 ěntō onu etye k'Obanga acēl, na ěnē Apap, na jami kibēc yaa kɛ bothe, na onu ěkwō pɛ ěn, ēka Rwoth tye acēl, Yecu Kiricito, na jami kibēc ōya kɛ bothe ēka onu ěkwō pɛ ěn. 7 Kadɛ bed nɛ kōmanōn, jō kibēc ba tye kɛ ngec nōn. Jō nōkēnē tye na dong ōnaa ōkō kɛ cal jwogi naka tin, gɛn cemo nakun nwongo pod thamō gɛnɛ nɛ man cem n'ētyērō both cal jwogi, ēka miō thama na gōrū na tye i cwinygɛ na nyuthigɛ balgɛ bal ōkō. 8 Ēntō cem ba bino miō onu bedo na cwōk

k'Obanga. Onu ba ebino bedo na rac ka ba ecemo, ēka thon ba ebino bedo na bēr ka ecemo. 9 Gwōkērē unu, ěk twērō nɛ ut unu kōdē kūr ōdōk gin mōrō na miō jō na gōrū podho gɛnɛ i bal. 10 Piēn ka dhanō mōrō na tye kɛ thama na gōrū i cwinye oneni ka in itye ka cem i ōt cal jwōk nakun in itye kɛ ngec, ba bino mēdō nɛnē tēk cwiny mē camō cem n'ētyērō both cal jwogi? 11 Ēka dong omeru ni na gōrū na yam Kiricito ōthōō pɛrē, ěn bino thōō pɛ ngec na megɛ. 12 Ka ěbalō unu both utmegowu na yeegɛ gōrū, ēka ěwanō unu thama mē cwinygɛ na pod gōrū, nwongo ěbalō unu i kom Kiricito. 13 Pɛ manōn ka cem miō ōmēra podho ōkō i bal, cē ba abino camō ringo dōkɛ ěk kūr amɛ ōmēra opodh i bal. (aiōn g165)

9 An ba alōōra kēna? An ba abedo akwēna? An yam ba anēnō Rwoth onu Yecu? Un ba ibedo unu adwogi mē ticna i Rwoth? 2 Ka jō mōkō ba yeo nɛ an abedo akwēna, ěntō kɛ kubothwu an abedo akwēna, piēn un kikomwu ibedo unu anyuth nɛ an abedo akwēna ka Rwoth. 3 Man ěnē pidona both jō na ngōlō kōp i koma. 4 Wan ba etye kɛ twēr mē cem ēka math? 5 Wan ba etye kɛ twēr mē miō dhakō n'oye woth kōdwa, kamē ěkwēna nōkēnē ēka utmego ka Rwoth, ēka Kepa? 6 Onyo an ēka Baranaba kēkēn ěnē myero etie pɛ kwō? 7 Nga na tio kamē acikari, cē cakō cūlō ōcara mērē kēnē? Nga na pidhō ōlōk i pwodho mērē, na ba camō nyig ōlōk n'ōcēk kɛ iē? Nga na kwaō kwath na ba madhō cak n'ōya kɛ kom rom na ěn kwaō? 8 An atye ka twakō kōp ni i kite ka dhanō kēkēn? Cɛk kono ba kobo nɛ kōmanōn? 9 Piēn i Cɛk ka Muca ěcōō nɛ, “Kūr itwe dhō thwōn ka tye ka nyōnō kal.” Obanga onwongo mōnō thama mērē ut i kom thwoni? 10 ěn ba okobo kōp nōn both onu? i adyer, kōp mērē yam ěcōō pɛ onu, piēn apur myero opur nakun tye kɛ gen, ngat na pwodo bēl thon myero opwod nakun tye kɛ gen mē nwongo gin mōrō kɛ iē. 11 Ka wan ěcwō kodhi mē tipo i kinwu, manōn twērō bedo thwōn kōp mōrō na thwōnē ka wan ēkaō jami mōkō mē kom kɛ bothwu? 12 Ka jō nōkēnē tye kɛ twērō mē kōny nōn kɛ bothwu, cē wan ba ělōōgɛ ōkō kɛ twērō nōn? Ēntō kadɛ bed nɛ twērō nōn tye bothwa, wan ba etio kōdē, wan ědiō cwinywa i kōp kibēc ěk kūr ěketh orii mōrō na gēngō kobo kōp mē Emuth na Bēr i kom Kiricito. 13 Un ba ingeo nɛ jō na tio i ōt k'Obanga gɛn nwongo cemgɛ kɛ i ōt k'Obanga, ēka jō na tio gɛnɛ i kom keno tyēr epoko nigɛ tyēr n'ētyērō? 14 Rwoth yam thon ōcikō i kit yoo acēl nōn nɛ jō na tītō kōp mē Emuth na Bēr myero onwong gɛnɛ gin mōrō na gin kwō kōdē pɛ tītō kōp mē Emuth na Bēr. 15 Ēntō an ba atio kɛ twērō ni mōrō. Ēka an ba acōō

köp ni ëk itim unu i koma ni kömanön. Bedo na bër ka athöo löö na dhanö mörö lökö wakërëna dökö gin mörö na ka cungo mërë ope. **16** Ka an atitö köp më Emuth na Bër, myero kür awakara ködë, piën ëdia adia ië. Ka ba atitö köp më Emuth na Bër, cë an abino nënön can. **17** Ka atimö man ki cwinya këna, abino nwongo cül, ëntö ka atimö nakun ba amitö, nwongo atye ka cobo tic n'ëmia. **18** An abino nwongo koth cül mëne? Cül na mëga ënë yom cwiny na an anwongo ki kom titö köp më Emuth na Bër, na ba angölö cül mörö ië both jö na winyo ginï, nakun thon ba atio ki twërö na an aute ködë ëk anwong kõny mörö ki both jö na an atitö nigï köp më Emuth na Bër. **19** Kadï bed ni alööra këna i nyim jö kibëc, ëntö dong atyeko mira më bedo opii ka jö kibëc, ëk anwong-gi na pol. **20** Ka atye both Eyuda, abedo calö Ayuda ëk anwong Eyuda mökö. Both jö na tye i the cik ka Muca an abedo thon na calö dhanö na tye i the cik, (kadï bed an ba atye i the cik), ëk anwong jö na tye i the cik. **21** Both Erok n'ope i the cik ka Muca an abedo na calö dhanö n'ope i the cik, (nakun nwongo ba atye abonge cik k'Obanga, ëntö abedo i the cik ka Kiricito), ëk anwong jö na ba tye i the cik. **22** Both jö na görü ginï i yeegi, an abedo na calö dhanö na görü thon, ëk anwong jö na görü. An alübö kite kibëc na dhanö tye ködë, ëk ömia alar jö mökö i yoo kibëc. **23** Manön kibëc atio pi köp më Emuth na Bër, ëk an thon anywak gum mörö na yaa ki ië. **24** Un ba ingeo unu ni jö na pyem ki ngwëc kibëc ngwëcö ginï, ëntö dhanö acël këkën ënë nwongo mïc më pwöc? Un thon ngwëc unu kömanön ëk inwong unu mïc më pwöc. **25** Dhanö acëlacël na pyem i tuko myero ögwökërë këne i yodhi kibëc. Gin timö manön ëk enwong ginï tok më dheo na ba rii, ëntö onu ëtimö pi nwongo tok më dheo na ba rii naka naka. **26** An gira angwëcö atir na ba acacapa, ba adhongo piny ata kamë ngat mörö na dhongo yamö nono. **27** Ayelo koma, ëka amiö bedo opiina ëk ka dong atyeko titö köp both jö nököne, kür abed dhanö na ba ebino miö mïc.

10 Utmegona, amitö ni inge unu ni kwere onu kibëc yam obedo ginï i the pöl, ëka gin kibëc yam owok i dye nam. **2** Gin kibëc yam ebatigagï i pöl ëka i nam, ëk obed ginï jö ka Muca. **3** Gin kibëc yam öcamö cem acël nön më tipo, **4** gin kibëc omodho pii acël nön n'öya ki i lëla më tipo n'owotho ködgï, ëka lëla nön onwongo obedo Kiricito. **5** Kadï bed ni kömanön, Obanga onwongo cwinye ba yom i kom jö mökö ëka dong komgi n'öthöo onwongo ökëth ata i thim. **6** Jami ni ötimërë na calö apor both onu, cikö

onu ni kür dökö ebed parö gin na reco, na calö yam gin öparö. **7** Kür ibed unu jö na wörö cal jwogi kite na jö mökö ki kin-gi ötimö ködë. Kite n'ëcöo ködë i Cöc na Leng ni, "Lwak obedo piny i cem ki math, cë öya ginï malö më myël." **8** Onu myero kür ëdöny i timö tim më ölyang, na calö jö mökö ki kin-gi yam ötimö ködë, ëka jö elip pyer ariö wie adek öthöo ginï ökö i ninö acël. **9** Onu kür ëtëm Kiricito, na calö jö mökö yam ötimö ëka thwone onekogï. **10** Eka kür ingüngüta unu na calö jö mökö ki kin-gi yam öngüngüta ginï ködë, ëka malaika më thöo otyekogï ökö. **11** Jami ni ötimërë bothgi na calö apor both onu. Eëcöo jami ni kibëc i Cöc na Leng më pwonyo onu jö n'ëkwö i karë ni më ajiiki. (aiön gl65) **12** Pi manön ëk ngat mörö na thamö ni ecung na tæk, ögwökërë ëk kür opodhi. **13** Atëmatëma mörö ope na maköwu na ba makö jö kibëc. Obanga genere, ëka ën ba bino yeo ni ëtëmwu rwök na löö ngö na un itwërö dangö. Ka ëtëmwu, Obanga bino miöwu yoo më bwöth ökö, ëk ibed unu ki tükö më dangö. **14** Pi manön, ewodha më amara, wëk unu wörö cal jwogi ökö. **15** An atwak kodwu na calö jö na ryëk, tham unu kenwu i köp na an atwakö. **16** Ekopo më gum na onu ëlëgö gum ië, ba obedo më güre më riberë i remo ka Kiricito? Ogati na onu epoko ië, ba obedo riberë i kom Kiricito? **17** Piën ogati tye acël, onu n'epol obedo kom acël, piën onu kibëc ënywakö camö ogati acël nön. **18** Tham unu pi jö Icarael, jö na camö gin n'ëtyërö both Obanga ba riberë ginï më tic i keno tyër? **19** Ngö na an atye ka kobo? An atye ka kobo ni cem n'ëtyërö both cal jwogi obedo gin mörö, onyo ni cal jwök obedo gin mörö? **20** Pe, ngö na an atye ka kobo ënë ni gin aryëda na jö na ba ngeo Obanga ryëdö ginï, gin tyërö both cene, ëntö ba tyërö ginï both Obanga. An ba amitö ni iriberë unu ki cene. **21** Ba itwërö unu madhö ekopo ka Rwoth ëka më cene. Ba itwërö unu cem i mëja ka Rwoth ëka döki i mëja ka cene. **22** Onu ëmitö ni nyeko ömak cwiny Rwoth? Un ithamö ni onu ëtëk ëlöö ën? **23** "An atwërö timö jami kibëc," ëntö manön ba nyutho ni jami kibëc kõnyö. "An atwërö timö jami kibëc," ëntö manön ba nyutho ni jami kibëc döngö yee ka dhanö. **24** Ngat mörö kür örang gin na kõnyö ën këkën, ëntö myero ölüb gin na kõnyö awodhe. **25** Cam unu gin mörö këkën n'ëcadhö i cuk më ringo, abonge penyo gin mörö pi lworo thema më cwinywu. **26** Piën "lobo ëka jami kibëc na tye ië obedo më ka Rwoth." **27** Ka cë dhanö mörö na ba oye Kiricito ocwodowu icem, ëka imitö unu cidhö cem, cam unu gin mörö këkën n'eketho i nyimwu abonge penyo gin mörö pi lworo thema më cwinywu. **28** Eëntö ka ngat mörö okobo niwu ni, "Man ngö na dong ëtyërö ökö

both cal jwök," cê kûr 'cam unu, pî parô ngat na dong okobo kôp nôn mê po wiwu, êka pî thama mê cwinye na nyutho bal. 29 Manôn an akobo pî thama na tye i cwiny dhanô nökênê ca, pathî pî thama na ute i cwinyi. Pîngô ëgëngô twërôna na an atye kôdê mê timô gin mörô ni ôkô, pî thama na tye i cwiny dhanô nökênê? 30 Ka an acemo nakun apwöyô Obanga, pîngô ëyanya pî gin na dong atyeko pwöyô Obanga ôkô pîrê? 31 Dong ka 'camô unu cem onyo 'imadhô unu math, onyo jami kibêc na un itio, tim unu kibêc mê miô dheo both Obanga. 32 Kûr 'ibal unu cwiny Eyuda, kadî thon jô Grecia, onyo jô k'Obanga n'oye Kiricito, 33 kit na calô an atêmô yomo cwiny ngat acêlacêl i gin na an atio kibêc. An ba arangô ngô na kõnya këna, êntô arangô gin na kõnyô jô na pol, êk ôlarê gîni.

11 Lûb unu kitena, na calô an thon alübô kite ka Kiricito. 2 Apwöyôwu piên i kôp kibêc ipo unu pîra, nakun ilübô unu pwonyina na yam amiô bothwu. 3 Êntô amitô inge unu nî Kiricito ênê obedo wi êcwô acêlacêl, êcwô ênê obedo wi dhakô mërê, êka Obanga ênê obedo wi Kiricito. 4 Êcwô mörô na légô, onyo na titô kôp k'Obanga, nakun oumo wie, manôn nwongo okelo lewic i wie. 5 Êntô dhakô na légô, onyo na titô kôp k'Obanga nakun ba oumo wie, nwongo okelo lewic i wie, piên ba tye apokapoka mörô i kin ên kî dhakô n'ölyëlô wie. 6 Ka dhakô mörô ba umo wie, myero ölyël yer wie ôkô, êka ka obedo mê lewic nî dhakô ka ölyëlô wie, onyo önyarô yer wie anyara, ên myero dong oum wie. 7 Êcwô kûr myero oum wie, piên ên obedo cal k'Obanga êka dheo k'Obanga. Êntô dhakô ênê dheo k'êcwô. 8 Piên êcwô ba öya kî kom dhakô, êntô dhakô ênê öya kî kom êcwô. 9 Êcwô onwongo ba ecweo pî dhakô, êntô dhakô ênê ecweo pî êcwô. 10 Pî tyên kôp ni, êka piên pî emalaika, dhakô myero oruk gin mörô mê umo wie mê nyutho nî etye i thê twêr ka cwörê. 11 Êntô i kin jô ka Rwoth, dhakô ba twêrô cung kênê abonge êcwô, êka êcwô ba twêrô cung kênê abonge dhakô. 12 Piên na calô dhakô öya kî kom êcwô, i yoo acêl nôn, êcwô thon dhakô ênê önywölô. Êntô jami kibêc öya kî both Obanga. 13 Ngöl unu kôp ni kenwu: Pore nî dhakô mê légä both Obanga na ba oumo wie? 14 Kite n'ënywölô onu kôdê thon ba pwonyo onu nî ka êcwô ömiô yer wie ölöth na boco ba miô ên lewic? 15 Êntô ka dhakô tye kî yer wie n'ölöth na boco manôn obedo mê dheo mërê, piên ömiô ên yer na boco nôn êk oumere kôdê. 16 Êntô ka ngat mörô mitô kelo pyem iê, wan epe kî kit na calô manôn, ope thon i kin jô k'Obanga n'oye Kiricito.

17 An acikôwu nakun thon atye kî kôp mökô na an ba abino pwöyôwu iê, piên cökêrêwu gin mörô ope iê na bër, êntô kelo bal kékên. 18 Kôp mê acêl na an atyeko winyo ênê nî ka un 'icökêrê kanya acêl na calô jô n'oye Kiricito, apokapoka bedo tye i kinwu êka an thon aye kôp nôn, 19 piên apokapoka myero obed tye i kinwu, êk jô na genere onen gîni ôkô kanya leng. 20 Ka 'icökêrê unu kanya acêl, nwongo ba obedo cem ka Rwoth ênê un 'camô adyer, 21 piên ngat acêlacêl cakô camô cem mërê ôkô, nakun jô mökô kec nekogi, êka jô mökô mër ôkô. 22 Un ba itye unu kî peciwu, kanya un 'itwêrô cem kî math iê? Onyo 'icaô unu jô k'Obanga n'oye Kiricito, nakun iketho unu lewic i kom jô na ba tye kî gin mörô? Ngô na myero akob bothwu? 'Imitô unu nî apwöwu? Ba abino pwöyôwu pî kôp ni. 23 Piên pwony na yam apwonyowu kôdê, Rwoth ênê ömiä, nî, i kiwor nôn n'eketho örörô i kome, Rwoth Yecu ökwanyô ogati, 24 êka i karê na dong öpwöyô, opoko iê, êka okobo nî, "Man ênê koma na tye pîrwu, tim unu nî kôman mê po kôdê pîra." 25 Kômanôn ka öcamô gîni cem mê kothyeno othum, ökwanyô ekopo êka okobo nî, "Ekopo ni ênê cikêrê na nyen i remona. Tim unu nî kôman i karê kibêc na un 'imadhô, mê po kôdê pîra." 26 Pî karê kibêc na un 'camô ogati ni, êka thon ka 'imadhô unu kî i ekopo ni, nwongo itye unu ka titô kôp mê thöô ka Rwoth, naka ka ên bino dwogo. 27 Pî manôn, ka dhanô mörô öcamô ogati ni, onyo ömadhô kî i ekopo ka Rwoth ni, nakun kite mërê ba opore, nwongo ên ödökô abal mê pyêdô kom kî remo ka Rwoth. 28 Dhanô acêlacêl myero kono öngirê kênê, na bara öcakô camô ogati êka madhô ngô na ute i ekopo nôn. 29 Piên ngat na camô onyo madhô nakun ba öniang na bër i kom ngô n'ecwodo nî kom Rwoth, nwongo ên tye ka kelo ngölô kôp i kome kênê ka cê öcamô onyo ömadhô. 30 Manôn ênê ömiô jô na pol kî kinwu görü êka two gîni, jô mökô thon öthöô gîni ôkô. 31 Êntô ka onu êtwêrô ngölô kôp i kom onu kî kôp n'atir, onwongo ba ëngölô kôp i kom onu. 32 Dong ka Rwoth ênê ngölô kôp i kom onu, ên pwodo onu mê pwonyo onu, êk kûr ëngöl kôp ölöô onu kanya acêl kî jô mê lobo. 33 Pî manôn dong, utmegona, ka un 'icökêrê kanya acêl mê camô cem ka Rwoth onu, ngat acêlacêl myero ökür awodhe. 34 Ka dhanô mörô kec oneko, myero ên kono ocem kî i pacô mërê, êk kôp kûr ölöôwu ka 'icökêrê unu kanya acêl. Kôp nökênê n'odong an abino yübô ka an athuno bothwu.

12 Kobedi dong utmegona, kôp i kom mic na Tipo Naleng miô, amitô nî inge unu na bër. 2 Ingeo unu nî, i karê na un onwongo pod ibedo unu jô na ba

ngeo Obanga, onwongo irwenyo unu ökö më wörö cal jwogi na ba twak. 3 Pī manön an amitö iniang unu nī ngat mörö ope na Tipo k'Obanga miö ën kobo nī, "Yecu ëlamö," ëka ngat mörö ope na twërö kobo nī, "Yecu ënë Rwoth," na path ka Tipo Naleng ënë miö ën kobo. 4 Mīc tye na kothgī papath, ëntö Tipo acël nön ënë poko. 5 Tic tye na kothgī papath n'etio pī Rwoth, ëntö etio pī Rwoth acël nön. 6 Yodhi më tic tye na papath, ëntö Obanga acël nön ënë tio kī jī i yodhi kibëc. 7 Dhanö acëlacël ëmiö mīc më Tipo më kõnyö jö nökënë. 8 Tipo Naleng miö dhanö acël kōp më ryëkö, Tipo Naleng nön miö dhanö nökënë kōp më ngec. 9 Tipo Naleng nön miö yee both dhanö nökënë, both dhanö nökënë, Tipo Naleng nön miö mīc më cangö jīi, 10 both dhanö nökënë ën miö mīc më tio tango, both dhanö nökënë më twakö kōp na calö adwarpīny, both dhanö nökënë poko kin cwiny na papath, both dhanö nökënë dhümö lëb na papath, ëka both dhanö nökënë më gōnyö lëb na papath. 11 Ëntö Tipo Naleng nön ënë tio tic kī mīc nī kibëc, ën poko mīc na papath both dhanö acëlacël kite na ën mitö ködë. 12 Kom dhanö tye kī dul na pol na papath, ëntö dul na papath nön bedo dul kom acël. Ënë kom Kiricito. 13 Piën onu kibëc, Eyuda ëka jö Grecia, opii ëka jö na löörë kën-gī, onu ebatika ëka ëdökö kom acël i Tipo acël nön, onu kibëc ënywakö Tipo acël nön. 14 Piën kom dhanö ba tye ië dul acël kékën, ëntö tye ië dul na pol. 15 Ka onwongo tyën jö kob nī, "An ba abedo dul kom piën an ba abedo cing," manön ba miö ën kwërö më bedo dul kom. 16 Ka onwongo ith kob nī, "An ba abedo dul kom piën an ba abedo wang," manön ba miö ën kwërö më bedo dul kom. 17 Ka onwongo kom kibëc obedo wang jö, onwongo ëtwërö winyo kōp ningö? Ka onwongo kom kibëc obedo ith jö, onwongo ëtwërö ngweno piny ningö? 18 Ëntö kite na tye ködë, Obanga oketho dul na papath i kom, dul acëlacël kite na ën mitö ködë. 19 Ka onwongo gin kibëc obedo dul kom acël kékën, kom onwongo ba twërö bedo tye. 20 Na calö tye ködë, dul kom tye na papath, ëntö kom tye acël. 21 Wang jö ba twërö kobo nī cing jö nī, "An ba amiti!" Wic thon ba twërö kobo nī tyën jö nī, "An ba amiti!" 22 Nakaka manön, dul më kom mökö n'ëthamö nī görü ënë dökī nwongo mītërë rwök, 23 ëka dul kom mökö n'ëthamö nī dheogī ope ënë onu ëmiö wörö na pirë tēk, ëka dul kom na ba nen na bër ënë eruko kī ruk na bër, 24 nakun dul kom onu na nen na bër ba dök mitö gin mörö. Obanga öribö dul më kom nakun miö dheo na thwönë na löö both dul na dheogī nök, 25 ëk apokapoka kür obed tye i kom, ëntö ëk dul acëlacël öpar pī dul kom awodhe. 26 Ka dul kom mörö acël tye

ka rem, dul kom nökënë thon rem kanya acël ködë. Ka ëwörö dul kom acël, dul kom na papath kibëc bedo kī yom cwiny ködë. 27 Dong un kibëc ibedo unu kom Kiricito, ëka dhanö acëlacël kī kinwu obedo dul kom Kiricito. 28 Obanga oketho jö nī i kin lwak jö n'oye Kiricito, më acël ëkwëna, më ariö edwarpīny, më adek epwonye, ëka jö na tio tango, ëka thon jö na tye kī mīc më cangö jīi, jö na twërö kõnyö jö nökënë, jö na tye kī mīc më tēla ëka jö na dhümö ginī lëb na papath. 29 Jö kibëc obedo ginī ëkwëna? Jö kibëc obedo ginī edwarpīny? Jö kibëc obedo epwonye? Jö kibëc tio tango? 30 Jö kibëc tye kī mīc më cangö jīi? Jö kibëc dhüm kī lëb na papath? Jö kibëc gōnyö ginī lëb? 31 Keth unu cwinywu më nwongo mīc na pirgī tēk. Ëka dong an abino nyutho niwu yoo na bër na löö.

13 Ka an adhüm kī lëb jö nökënë ëka më k'emalaika, nakun ba atye kī mar an abedo calö ölang na kok rwök onyo agece. 2 Ka an atye kī mīc më twakö kōp na calö adwarpīny nakun aniang müng, ëka atye kī ngec kibëc, ëka ka an atye kī yee kibëc, na an arömö kōbö kidi na thwönë kany ökënë, nakun ba atye kī mar, an nwongo ba abedo gin mörö. 3 Ka an amiö jami kibëc na an atye ködë both ëcan, ëka ajalö thon koma më awanga kī mac, nakun ba atye kī mar, ba bino kõnyöna kī gin mörö. 4 Mar diö cwinye, obedo thon nyakica, mar ba nyek, ba wakërë, 5 ba ger, ba rangö gin na makö kome kënë, ba ngöö piöpiö, ba kanö gin na rac n'ëtīmö i kome. 6 Cwinye ba bedo na yom i tim na ba tye atir, ëntö cwinye yom i kōp na tye adyer. 7 Mar diö cwinye i jami kibëc, yee kōp kibëc, tye kī gen i karë kibëc, dangö kōp kibëc. 8 Mar ba jik. Dwaropīny bino thum ökö, naka thon dhümö lëb bino jik ökö, ëka ngec bino jik thon ökö. 9 Piën onu engeo dul mökö na nönök kékën, ëka edwaro thon dul na nönök, 10 ëntö ka gin n'opong obino, gin n'obedo dudul bino jik ökö. 11 I karë na an abedo athiñ, atwak kamë athiñ, athamö thama kamë athiñ ëka apyem kamë athiñ. Kobedini na dong atengo, awëkö kite më thino ökö. 12 Gin na onu ënëno i caa nī, obedo calö cal na nen ribiribi kī i kiyo, ëntö i karë na bino anyim ca onu ebino nënëre wang kī wang. Kobedini an angeo dul mörö kékën, ëntö i ninö na bino anyim ca an abino bedo kī ngec kibëc, kadī bed engea na bër. 13 Dong tye gin adek na bino bedo naka naka: yee, gen, ëka mar. Ëntö gin na pirë tēk na löögī kibëc ënë mar.

14 Yelere unu më nwongo mar, keth unu cwinywu thon më nwongo mīc më Tipo, na löö kibëc mīc më twakö kōp na calö adwarpīny. 2 Piën dhanö na

dhümü lëb na papath ba twak kī jīi ëntö nwongo ën tye ka twak k'Obanga. Ngat na niang i köp mërë ope, nwongo ën tye ka kobo müng më Tipo Naleng. 3 Ëntö dhanö na twakö köp na calö adwarpiny, twak kī jīi nakun döngö yeegi, cükö cwinygi, ëka kweo cwinygi. 4 Dhanö na dhümü lëb na papath döngö yee mërë kënë, ëntö dhanö na twakö köp na calö adwarpiny nwongo tye ka döngö jö n'oye Kiricito. 5 An amitö nī iðhüm unu lëb na papath, ëntö na löö kibëc an amitö nī itit unu köp k'Obanga. Dhanö na twakö köp na calö adwarpiny pīrë tək löö ngat na dhümü lëb na papath, thwara ka ngat mörö ögönyö both jīi gin na ën kobo, ëk ököny jö n'oye Kiricito më döngö. 6 Utmegona, ka an abino bothwu nakun adhümü lëb na papath, köny ngö na an abino bedo ködë bothwu, ka ba an akelo niwu köp mörö n'Obanga onyutho nīna, onyo negec mörö, onyo köp mörö na calö më k'adwarpiny, onyo pwony mörö? 7 Naka thon gin n'ope kī kwö, na kok na calö pelu onyo adungu, ka dwönë ba winyere na bër, jīi bino niang ningö i wer n'etye ka küdhö onyo n'etye ka göönö? 8 Ëka buruji, ka ba ëküdhö kī dwön më cwodo, nga na bino yübërë më cidhö i lwëny? 9 i kite acël nön, nga na bino niang i gin na un ikobo ka itye unu ka dhümü lëb na papath, nakun ikobo unu köp na ba ëniang ië? Köpwu bino këth i wi yamö ata. 10 Tye koth lëb na pol i wi lobo na gin kibëc papath, ëntö ba tye mörö na tyën köp mërë ope. 11 Ka an ba angeo lëb dhanö mörö na tye ka twakö, an abedo na calö arok bothe, ëka ën thon bedo na calö arok botha. 12 Dong kömanön, on thon na calö iketho unu cwinywu më nwongo mic më Tipo, tëm unu më löönö mic na möi jö n'oye Kiricito döngö. 13 Pī manön, dhanö na tye ka dhümü lëb na papath ën myero öleg both Obanga ëk ömii ën mic më gönyö ngö na ën etye ka kobo. 14 Piën ka an alëgö nakun adhümü lëb, cwinya lëgö, ëntö nwongo thamana ba timö gin mörö ië. 15 An atim ngö kobedini? An abino lëgö both Obanga kī cwinya nakun alëgö kī thamana thon. An abino wero wer kī cwinya nakun abino wero kī thamana thon. 16 Ka in iðwöyö Obanga kī cwinyi këkën, dhanö nökökën n'obino i gürewu twërö kobo "Amën" ningö i pwöcni i kite mënë nakun ba öniang i kom ngö na in ikobo? 17 Kadī onwongo imiö pwöc na bër, ba bino könyö dhanö nökökën ca më döngö kadī kicël mörö. 18 An apwöyö Obanga piën an adhümü lëb na papath na lööwu kibëc, 19 ëntö i güre ka jö n'oye Kiricito an amitö kobo köp mörö abic këkën kī thamana më pwonyo kī jö nökökën, nakaka kobo köp elip apar nakun adhümü kī lëb na ba ngere. 20 Utmegona, kür ibed unu kamë ëthinö i thamawu. Bed unu ëthinö i timö gin mörö na rac, ëntö i thamawu

bed unu jö n'otengo. 21 Yam ëcöö i Cík nī, "An abino twak kī jö më rok ni kī lëb na jīi dhüm ködë na papath ëka kī dhö Erok. An abino twak both jö nī, ëntö kadī bed nī gin ba bino winyona," man köp ka Rwoth. 22 Manön nyutho nī dhümü lëb na papath ëmiö ëk obed anyuth both jö na ba oye Kiricito, pathi both jö n'oye, ëntö twakö köp na calö adwarpiny tye pī jö n'oye, pathi pī jö na ba oye. 23 Dong ka jö kibëc n'oye Kiricito ögürë kanya acël nakun jö kibëc dhümü lëb na papath, ëka jö nökökën na ba niang, onyo jö na ba oye Kiricito obino ië, gin ba bino kobo nī un ipo? 24 Ëntö ka jö kibëc tye ka twakö köp na calö adwarpiny, ëka dhanö mörö na ba oye Kiricito, onyo dhanö na ba niang obino i cökërë, ën bino niang i kom bal mërë pī gin na ën owinyo kī both jö kibëc. Köp na jīi kibëc okobo bino ngölö ninë köp. 25 Müng na tye i cwinye ebino kelo kanyalër, ëka bino ryebere piny, wörö Obanga nakun tuco nī, "Adyer, Obanga tye i kinwu." 26 Utmegona, ka igürë unu, dhanö acëlacël tye kī wer, ngat nökökën pwonyo, ngat nökökën kobo ngö n'Obanga onyutho ninë, ngat acël bino dhümü lëb na papath, ëka ngat nökökën bino gönyö ngö n'ekobo. Ëntö jami nī kibëc myero ötimërë i yoo na könyö döngö ka jö n'oye Kiricito. 27 Ka dhanö mörö dhümü lëb na papath, myero gin obed jö arïö onyo jö adek, kür ökal wel nön, nakun eleo alea, ëka ngat mörö myero ögöny ngö na gin kobo. 28 Ëntö ka ngat mörö ope na gönyö, myero ngat na mitö twak kī lëb na papath nön öling alinga i ka güre ka jö n'oye Kiricito, myero ötwak ën këné ëka both Obanga. 29 Edwarpiny myero obed jö arïö onyo jö adek, ëka jö nökökën pimo köp na gin tye ka kobo. 30 Ka cë Obanga onyutho köp mörö both ngat mörö nökökën n'obedo piny i kinwu, dhanö n'onwongo tye ka twak myero öling ökö. 31 Piën n kibëc itwërö twakö köp na calö adwarpiny nakun ileo unu alea, ëk jö kibëc opwonyere ëka dök thon öcük cwinygi. 32 Ngat na tye ka twakö köp na calö adwarpiny myero ölöö mic mërë më twak, 33 piën Obanga ba obedo won arubaruba, ën obedo won kuc. Na calö jö k'Obanga na leng kibëc n'oye Kiricito, 34 mon myero öling alinga ka tye gin i kin jö n'oye Kiricito. Ba eyeo niggi më twak, ëntö gin myero ömirë i thë löc kite na Cík kobo ködë. 35 Ka cë gin mitö ngeno köp mörö, myero gin openy cwögi kī pacö. Obedo lewic rwök both dhakö më twak i ka güre ka jö n'oye Kiricito. 36 Onyo ithamö unu nī köp k'Obanga yam öcakërë kī bothwu, ëka dök obino bothwu këkën? 37 Ka ngat mörö thamö nī ën ebeto adwarpiny onyo etye kī mic mökö më Tipo, myero ën ongee nī köp na an acöö bothwu ëné cık n'öya kī both Rwoth. 38 Ëntö ka ngat mörö ba oketho köp nī

ĩ thama, ěn thon ba ebino ketho thama ĩ kome. 39 Dong utmegona, keth unu cwinywu mē twakō kōp na calō adwarpĩny, ěntō dhūmō lēb na papath thon kūr ijūk unu. 40 ěntō gin mōrō kibēc myero ětīm ĩ kite na bēr, kōrē kī kōrē.

15 Kobedi dong utmegona, an amītō poono wiwu ĩ kom kōp mē Emuth na Bēr na yam atītō bothwu, na un dong ĩgamō ōkō, ěka thon icung unu ĩē. 2 Pĩ kōp mē Emuth na Bēr ni ěnē ōmiō ĩlarē unu, ka dong ĩmakō unu na tēk kōp na yam atītō bothwu, kono onwongo ba iyee unu nono. 3 Pĩ kōp na an amīōwu na pīrē dīt mē acēl, na an thon agamō kobo nī—Kiricito yam ōthōō pī bal onu, nakun lūbō Cōc na Leng na yam ěcōō. 4 Eiko ěn, ěka ecero ěn ōkō ĩ ninō mē adek, nakun lūbō Cōc na Leng na yam ěcōō. 5 ěn onen both Kepa, cē onen both ěkwēna apar arīō. 6 Kinge manōn onen both utmego na lōō mia abic wang acēl, pol jō mōkō kī kom jō nōn pod tye gīnī na kwō, kadī bed nī jō mōkō ōthōō gīnī dong ōkō. 7 Cē ěn onen dōkī both Yakobo, ěka both ěkwēna kibēc, 8 cē ĩ ajiki mērē kibēc onen botha thon, kadī bed nī an abedo calō ngat mōrō n'ēnywōlō ĩ karē na ba opore. 9 Piēn an atīdī rwōk kī kin ěkwēna kibēc, n'onwongo ba apora nī ěk ecwoda nī akwēna, piēn yam ayelo jō k'Obanga n'oye Kiricito. 10 ěntō pī kīca k'Obanga n'ōmīa, ěnē ōmiō an atye kite na an aute kōdē, ěka kīca mērē na ěn ōmīa onwongo ba obedo mē nono. An atio tic na tēk rwōk na lōō jō nōn kibēc, kadī bed nī pathī an, ěntō kīca k'Obanga ěnē otio kōda. 11 Adyer kadī bed onwongo nī an onyo gīn, kōp na wan dong ětītō, ěnē kōp na un iyee. 12 Kobedi dong ka ětītō nī ecero Kiricito kī kin jō n'ōthōō, pingō jō mōkō kī kinwu kobo nī cer ka jō n'ōthōō ope? 13 ěntō ka cer ka jō n'ōthōō ope, cē Kiricito thon ba ecero. 14 ěka ka Kiricito ba ecero, cē tītō kōpwa bedo na kōny mērē ope, naka thon yeewu kōny mērē ope. 15 Mēd ĩ kom manōn, onu thon ebeto ecaden mē twodo ĩ kom Obanga, piēn onu ětwakō kōp ĩ kom Obanga nī ěnē ōmiō Kiricito ocer kī ĩ thōō. ěntō ka tye adyer nī jō n'ōthōō ba ecerogī, cē Obanga ba ocerō Kiricito. 16 Ka cero jō n'ōthōō ope, cē nwongo Kiricito thon yam ba ecero. 17 Ka Kiricito yam ba ecero, cē yeewu kōny mērē ope thon, nwongo pod itye unu ĩ thē bal. 18 Cē jō na dong ōthōō gīnī na yee ĩ Kiricito nwongo orwenyo gīnī ōkō. 19 Ka genwa ĩ Kiricito kōnyōwa ĩ kwō mē karē nī kēkēn, cē nwongo ěnēnō onu kī kīca rwōk na lōō jō kibēc. 20 ěntō ĩ adyer mērē, Kiricito ecero dong ōkō kī ĩ kin jō n'ōthōō, ěn tye na calō wi kac ka jō n'ōthōō. 21 Piēn dhanō ěnē okelo thōō, dōk thon cer ka jō n'ōthōō dhanō ěnē okelo. 22 Kite na jō

kibēc thōō kōdē ĩ Adam, kōmanōn thon jō kibēc ebino mīōgī kwō ĩ Kiricito. 23 ěntō ngat acēlacēl kī kakarē, mē acēl Kiricito, na ěnē wi kac, ěka kinge jō ka Kiricito ĩ karē mē dwogo mērē. 24 Cē ajiki pīny dong bino thuno, na Kiricito bino mīō ker ĩ cing Obanga Apap, na nwongo dong otyeko tūrō kit lōc kibēc, twērō kibēc ěka tēkō. 25 Piēn Kiricito myero obed ĩ lōc naka wang n'Obanga oketho lang mērē kibēc ĩ thē tyēnē. 26 Langō n'ebino tyeko mē ajiki ěnē thōō. 27 Piēn yam ěcōō nī, “Obanga oketho jami kibēc ĩ thē tyēnē.” ěntō ka ekobo nī oketho “jami kibēc” ĩ thē lōc mērē, cē nen kanyalēr nī ba ěkwanō ěn Obanga kīkome n'oketho jami kibēc ĩ thē lōc ka Kiricito. 28 Ka dong etyeko ketho jami kibēc ĩ thē lōc mērē, ěn Wod kīkome thon ebino ketho ĩ thē lōc k'Obanga ěk Obanga ōcōk jami kibēc ĩ thē lōc mērē. 29 Kobedi dong, ka cer ka jō n'ōthōō ope, jō na dong ebaticagī pī jō n'ōthōō bino gīnī tīmō ngō? Ka cer ka jō n'ōthōō ope kadī thon kīcēl, pingō dong ebatica dhanō na kakargī? 30 Pingō onu dong ebeto kanya rac caa kibēc? 31 An athōō ninō kibēc, utmegona, manōn akobo bothwu atīr, pī wakērē na an atye kōdē ĩ Kiricito Yecu Rwoth onu. 32 Kadī bed yam alwēnyō kī leeni na ger ĩ Epeco, kite na dhanō kobo nī, kit kōny mēnē n'anwongo ĩē? Dong ka cer ka jō n'ōthōō ope, “Eru ecemu ěka emedhu, piēn diki onu ebino thōō ōkō.” 33 Kūr ĩmīī ěbwōlwu: “Woth kī jō na reco balō kite na bēcō.” 34 Dwog unu cen ĩ tham n'atīr ěka ĩkwēr unu bal ōkō. Piēn jō mōkō ba tye gīnī kī negc nōn ĩ kom Obanga. Akobo man ěk lewic ōmakwu. 35 Gwōk onyo ngat mōrō bino penyo nī, “Jō n'ōthōō ebino ceroģī ningō? Kit kom mēnē na gin bino bedo kōdē?” 36 ĩn ĩmīng! Kodhi na in ĩcwō ĩ ngōm, ba twērō nwongo kwō wang n'ōthōō kono. 37 ěka gin na in ĩcwō ěnē kodhi nono, onyo kodhi kal onyo koth kodhi na path na ba obedo kom gin na donyo. 38 ěntō Obanga mīō kom ĩ kodhi nōn kite na yam ěn ōyērō kōdē, kodhi acēlacēl kī kit kothē. 39 Ringo kom gin na kwō kibēc ba rōm: Ringo dhanō path, ringo leeni path, ringo wīny path ěka mē rēc thon path. 40 Dōk thon kom mē polo ěka mē lobo tye, ěntō kom mē polo tye kī dheo mērē na path, ěka kom mē lobo thon tye kī dheo mērē na path. 41 Ceng tye kī koth dheo mērē acēl, dwe thon tye kī dheo mērē na path, cēr thon tye gīnī kī dheogī na path, ěka cēr thon kiteģī papath kī dheo na gīn mīō. 42 Obedo thon nī kōmanōn ĩ kom cer ka jō n'ōthōō. Gin ěcwō obedo gin na thōō, ěntō ka ecero ba dōk thōō. 43 ěcwō na nwongo ope kī dheo mērē, ěntō ecero na nwongo dheo mērē dong tye, ěcwō na nwongo pod gōrū, ěntō ecero na nwongo tye kī tēkō. 44 ěcwō na nwongo obedo kom mē lobo nī, ěka ecero ěn na

nwongo obedo kom më cwiny. Ka kom më lobo ni ute, cê nyutho nĩ kom më cwiny thon ute. 45 Cóc na Leng kobo nĩ onu nĩ, “Dhanö më acêl obedo Adam n’ödökö dhanö na kwö.” Êntö Adam më ajiki ödökö tipo na miö kwö. 46 Êntö kom më tipo ba öcakö bino êntö kom më lobo ni ênê öcakö bino, cê dong kom më tipo bino kĩ körê. 47 Dhanö më acêl ecweo kĩ kom apua më lobo, êntö dhanö më arĩö na ênê Kiricito öya kĩ i polo. 48 Jö më lobo cal gĩnĩ kĩ dhanö n’ecweo kĩ kom ngöm më lobo, ëka jö më polo cal gĩnĩ kĩ dhanö n’öya kĩ i polo. 49 Dong kite na yam onu eruko cal ka dhanö n’ecweo kĩ ngöm më lobo ni, kómanön thon onu ebino ruko cal ka dhanö n’öya kĩ i polo. 50 Man ênê ngö na an akobo bothwu, utmegona, nĩ gin na tye kĩ ringo kom ëka remo ba twëro leeno ker k’Obanga. Ëka gin na töp ökö thon ba twëro leeno gin mörö na ba töp. 51 Winy unu müng nĩ: Pathĩ nĩ onu kibéc ebino thöö, êntö ebino lökö onu kibéc ökö— 52 pĩöpiö pĩ karê na nönök mörö kékên, na calö wang na ryapi ëka ka buruji më ajiki bino kok, piën buruji bino kok, ëka dong ebino cero jö n’öthöökö na ba dök bino gĩnĩ thöö, cê ebino lökö onu thon. 53 Pĩ kom na töp myero orukere kĩ gin na ba töp, ëka gin na thöö myero orukere kĩ gin na ba thöö. 54 Dong ka gin na töp orukere kĩ gin na ba töp, ëka gin na thöö thon orukere kĩ gin na ba thöö, cê bino nyutho köp na yam êcöö nĩ bino cobere kakarê nĩ, “Thöö dong êmwönyö ökö i löc.” 55 “In, thöö, löcni tye kwene? In, thöö, kwirni tye kwene?” (Hadës g86) 56 Kwir ka thöö ênê bal, ëka tékö më bal ênê cik. 57 Êntö pwóc myero obed both Obanga na miö onu löc pĩ Rwoth onu Yecu Kiricito. 58 Pĩ manön, utmegona më amara, cung unu na ték abonge gin mörö na yengowu, mëdêrê unu thon kĩ tic ka Rwoth ninö kibéc, nakun iniang unu nĩ i Rwoth onu, yelerewu pathĩ më nono.

16 Dong na makö köp më jwoko lim më könyö jö k’Obanga na leng, kite na calö acikö jö n’oye Kiricito na tye i Galatia, un thon myero itim unu nĩ kómanön. 2 I ninö më acêl kibéc më cabit, dhanö acêlacêl kĩ kinwu myero opok lim mökö oketh path, nakun lübö kite na ên onwongo ködê. Kür dök iküra unu naka ka an athuno kunön ëka icak unu ajwok. 3 Ëka ka an athuno bothwu, an abino miö waraga më nyuthere both jö na un iyëro ëka më orogi kĩ mic na mewu yo Jerucalem. 4 Ëka ka pore nina më cidhö, cê gĩn twëro woth köda. 5 An abino limöwu kinge wok kĩ Macedonia, piën an atye ka yübö më wok kĩ i Macedonia. 6 I karê mökö gwök onyo an abino bedo bothwu pĩ karê mörö onyo an abino bedo kunön pĩ karê më cwir, ëk ikönya unu i wothna kanya an

abino cidhö ië. 7 An ba amitö nĩ anënwu kobedini, ageno nĩ an abino bedo bothwu pĩ karê mörö, ka Rwoth oyeo. 8 Êntö an abino bedo i Epeco naka i ninö më Pentekot. 9 Dholokek na lac më tic etyeko yabö ökö nina, kadĩ bed nĩ jö na pol tye ka pyem köda. 10 Ka Timoteo obino, nèn unu nĩ ba obedo kĩ lworo mörö i karê na ên tye i kinwu. Piën ên tye ka tio tic ka Rwoth, kite na an atye ka tic ködê. 11 Ngat mörö kür ökwër ên, êntö köny unu ên, ëk owoth kĩ kuc ka ên tye ka dwogo botha. An atye ka kürö ên më dwogo botha kanya acêl kĩ utmego. 12 Kobedi dong köp i kom ömin onu Apolo, an akwaö ên më bino limöwu kanya acêl kĩ utmego nökökênê, êntö ên onwongo ba mitö bino i karê nön, cê bino bino ka karê na bër onwongere. 13 Bed unu na wangwu thwolo, cung unu na ték i kom yeewu, bed unu cwö na cwinigi ték, cung na ték. 14 Tim unu jami kibéc kĩ mar. 15 Ingeo unu nĩ Citipwanu ëka jö më ödê ênê öcakö gĩnĩ dökö jö n’oye më acêl i lobo Akaya, dök thon öjalêrê gĩnĩ kên-gĩ më tic pĩ jö k’Obanga na leng. Dong akwaöwu utmegona, 16 më bedo kĩ winy bothgi ëka kĩ jö nökökênê kibéc na yelere gĩnĩ më tic kanya acêl ködgi. 17 Cwinya onwongo yom i karê na Citipwanu, Porotunatic ëka Akaika othuno gĩnĩ, piën gin obedo ka miö köny n’onwongo un ipe kany më miö. 18 Gĩn dong okweo cwinya ëka cwinyuwun thon. Myero imii unu pwóc both koth jö na calö man. 19 Jö n’oye Kiricito na tye gĩnĩ i lobo Acia omothowu. Akwila ëka Piricila omothowu gĩnĩ kĩ cwinigi kibéc i Rwoth, kanya acêl kĩ jö n’oye Kiricito na cökêrê gĩnĩ i ödgi. 20 Utmego kibéc omothowu. Mothere unu kĩ moth më mar. 21 An, Paulo, acöö moth nĩ kĩ cinga kikokome. 22 Ka ngat mörö ba marö Rwoth, cen myero ömakĩ. Rwothwa, bin! 23 Kica ka Rwothwa Yecu obed kodwu. 24 Mar na mëga obed bothwu kibéc i Kiricito Yecu. Amën.

2 Korinti

1 Waraga ni öya ki both Paulo, n'ëyë Rö ki miti k'Obanga më bedo akwëna ka Kiricito Yecu ëka ki both ömîn onu Timoteo. Both jö k'Obanga n'oye Kiricito na tye i Korinti, kanya acël ki jö k'Obanga na leng kibëc na tye i Akaya kibëc: **2** Ëk Obanga Apap onu ëka Rwoth Yecu Kiricito ömîwû gum ëka kuc. **3** Pwöc obed both Obanga Apap ka Rwoth onu Yecu Kiricito, Apap n'obedo akîca ëka Obanga na kweo cwiny jö kibëc. **4** Ën kweo cwinywa ki i canwa kibëc, ëk wan thon ekwe cwiny jö na tye ki can na papath ki kweo cwiny na wan kikomwa enwongo ki both Obanga. **5** Pî kite na can na Kiricito ödangö opodho i komwa na thwönë, kômanön thon pî Kiricito wan thon ekweo cwinywa rwök. **6** Ka wan ëdangö can, manön miö ekweo cwinywu ëka inwongo unu larë. Ka ekweo cwinywa, manön thon miö ekweo cwinywu, miö un i cakö nwongo tükö më dangö kit can na wan thon ëdangö. **7** Wan etye ki gen na tük pi un, piën wan engeo ni ka un i nywakö unu ködwa can na wan ëdangö, un thon ebino kweo cwinywu kite n'ekweo ki cwinywa. **8** Utmegowa, wan ëmitö ni inge unu can na wan ëdangö i lobo Acia. Pëkö ödïowa rwök na wan ba dök ërömö dangö, ömiö wan ba dök ebodo ki gen mörö më kwö. **9** Adyer, wan onwongo engeo ki i cwinywa ni dong etyeko ngölö niwa köp më thöo. Ëntö man ötimërë ëk kür eketh gen i komwa kënwä ëntö both Obanga na cero jö n'öthöo. **10** Ën ölaröwa ki i can na rac më thöo, ëka ën dökî bino laröwa. Wan dong eketho genwa i kome ni ën bino laröwa dökî. **11** Myero iribërë unu ködwa i lëga, ëk ömîi jö na pol öpwö Obanga pîrwa pî gin na bër n'ëtîmö i komwa pî lëga ka jö na pol. **12** Gin na wan ëwakërë pîrë ën ene, wan engeo ki i cwinywa adyer ni wan ëkwö na bër i lobo ni, ëka rwök mërë wan ëkwö kanya acël kodwu abonge bal mörö na cwinywa leng kit n'Obanga ömitö ködë. Pathî pî ryëkö ka dhanö ëntö pî kîca k'Obanga. **13** Wan ba ëcöb bothwu gin mörö na un ba i'römö kwanö onyo niang ië. Ageno ni ibino unu niang na bër, **14** kite na calö dong i'niang unu na nönök ni i ninö na Rwothwa Yecu bino dwogo, un ibino wakërë unu pîrwa kite na wan thon ebino wakërë pîrwu. **15** Piën an onwongo aniang na bër, ömiö ayübö ni myero acak limöwu ëk inwong unu gum wang kirîö. **16** An ayübö më wok limöwu ka acîdhö yo Macedonia ëka dökî ka adwogo ki Macedonia, ëk ikönya unu i wothna yo Yudea. **17** i karë na an ayübö kômanön, onwongo ba abedo lölökö köpna. Ba ayübö calö dhanö mörö na

kobo ni, "Eyo" onyo "Pe" awang acël. **18** Ëntö kite n'Obanga obedo ngat na genere, köp n'onwongo wan ekobo bothwu ba obedo "Eyo" ëka "Pe." **19** Piën Yecu Kiricito, Wod k'Obanga, n'onwongo wan ki Cilibwano ëka Timoteo ëtîö bothwu ni ba obedo ngat na kobo ni, "Eyo" ëka "Pe," ëntö i ën, wan enwongo "Eyo" këkën. **20** Piën gin n'Obanga öcîkö ni ëtîmö kibëc ocobere i kome, pî manön wan ekobo ni, "Amën" i Yecu Kiricito pî miö dheo both Obanga. **21** Obanga ënë ömiö wan ecung na tük kanya acël kodwu i Kiricito, ëka ën owirowa. **22** Ën dong ömwönö anyuth mërë i komwa, ëka oketho Tipo mërë i cwinywa më moko ni ën ebino miö gin na kibëc na ën öcîkö. **23** An acwodo Obanga më bedo caden-na nakun akobo ki cwinywa kibëc ni an ba abino adwogo i Korinti, piën onwongo amîtö timö niwu kîca. **24** Pathî ni wan etye ki twërö i kom yeewu, ëntö wan etio kodwu kanya acël ëk un ibed ki yom cwiny, piën un icung na tük i kom yee.

2 Ëntö ki kubotha onwongo athamö ni dwogona myero kür okel niwu cwer cwiny nökënë. **2** Ka acwero cwinywu, cë nga na dökî bino yomo cwiny? Pathî dhanö na an acwero cwinye? **3** Manön ënë ömiö an acöb waraga nön bothwu, ëk ka abino, jö na myero oyom cwinywa kür ömîa ginî cwer cwiny, piën onwongo ageno ni yom cwinywa ënë yom cwiny na mewu. **4** An onwongo acöb niwu waraga ki thwön kumo ëka ki cwer cwiny na pii wanga cwer, pathî pî cwerö cwinywu ëntö ëk ömîi inge unu mar na thwönë na an aute ködë i komwu. **5** Ka ngat mörö okelo cwer cwiny, nwongo ba ocwero cwinywa an këna, ëntö nwongo ocwero cwinywu kibëc. Akobo ni kômanön piën ba amîtö ni adîi ën rwök. **6** Koth dhanö n'obedo ni kômanön, pwod na jö na pol oketho i kome nwongo örömö ën. **7** Kobedini, myero itîm unu kîca ninë ëka ikwee unu cwinye, ëk ömîi cwer cwiny na dit kür obuu ën ökö. **8** Pî manön akwaöwu ni myero inyuth unu mar na un itye ködë i kome. **9** Man ënë gin n'ömiö acöb waraga më tëmöwu ëk anën ka iwinywa unu i yodhi kibëc. **10** Ka ngat mörö na un dong itîmö kîca ninë, an thon atîmö kîca ninë, ëka gin mörö na an dong atîmö kîca ië, ka mörö tye, nwongo atîmö kîca i nyim Kiricito pîrwu, **11** ëk Catan kür ölöowa ki ryëkö mërë. Piën wan dong engeo thama mërë. **12** i karë na an athuno i Teroa më titö köp më Emuth na Bër ka Kiricito, anwongo ni Rwoth dong öyabö yoo nîna. **13** Ëntö cwinywa ba obedo na yom piën ba anwongo ömëra Tito kunön. Cë amotho jö n'oye na tye kunön ëka apoth yo Macedonia. **14** Ëntö pwöc obed both Obanga, na karë kibëc tëlöwa i dore më nyutho löc ka

Kiricito, dókí tio kódwa êk Kiricito ongere na calô gin na kur na ngwece dung i kabedo kibêc. 15 Piên wan ebeto gin na ngwece kur ka Kiricito both Obanga, na dung na mit both jô na tye ka larê êka both jô na tye ka rwenyo. 16 Both jô na tye ka rwenyo ngwecewa obeto gin n'ôthôô na kelo thôô, êntô kî both jô na tye ka larê ngwecewa obeto gin na kwô na kelo kwô. Êka nga na twêrô tic ni? 17 Wan ba êcal kî jô na pol nôkênê na rubo ginî kôp k'Obanga mê nwongo magoba. Êntô i Kiricito, wan êtwak na cwinywa leng i nyim Obanga na calô jô n'Obanga ooro.

3 Wan dókí êcakô mê pakêrê kênwa? Onyo un imitô nî wan ebin kî waraga mê nyuthere bothwu calô jô nôkênê onyo waraga na un icôô? 2 Un kikomwu ícal kî waragawa mê nyuthere n'êcôô i cwinywa, na ngere êka jô kibêc kwanô. 3 Un dong inyutho nî ibeto unu waraga n'ôya kî both Kiricito, na wan ekelo. Waraga ni ba êcôô kî kalam êka ingki, êntô êcôô kî Tipo k'Obanga na kwô, ba êcôô i kidi êntô êcôô i cwiny dhanô. 4 Gin n'ômiô akobo kômanôn piên wan ecung na têk i nyim Obanga i Kiricito. 5 Wan kî komwa ba êrômô kobo nî gin môrô ôya kî bothwa, êntô tékôwa kibêc ôya kî both Obanga. 6 Ên ômiôwa êrômô bedo etic mê cikêrê na nyen, pathi mê cik n'êcôô acôa êntô mê Tipo, piên cik n'êcôô acôa kelo thôô, êntô Tipo kelo kwô. 7 Cik na yam êcôô kî nyukuta i kom kidi n'apada na tic méré kelo thôô, onwongo obino kî dheo. Ômiô nêñô wang Muca obino ôlôô jô Icarael ôkô pî ryêný ka terinyime, na dheo na ryêný nôn obino orwenyo ôkô. 8 Cê dong tic ka Tipo ba bino bedo kî dheo na lôô? 9 Cê ka tic na miô kôp lôô dhanô tye kî dheo, kara tic na kelo kwanô dhanô nî kite atir dheo méré ba bino lôônô manôn ôkô? 10 Adyer gin na yam tye kî dheo dong ôdôkô gin na dheo méré ope, pî dheo nôkênê ca na dong lôô ên rwôk. 11 Êka ka gin n'onwongo orwenyo ôkô obino kî dheo, cê gin na ruu myero obed kî dheo na lôô! 12 Pî manôn, wan etye kî koth gen ni, ênê ômiô wan êtwak kî ték cwiny. 13 Wan ba êcal kî Muca na yam oumo terinyime kî bôngû êk jô Icarael kûr ôñên ginî kit na tar na ryêný rwenyo kódê kî i terinyime. 14 Êntô thamagî onwongo oumere ôkô, naka thon tin thamagî pod oumere ka êkwanô cikêrê na côn. Gin mê um nôn bara êkwanyô, piên twêrô kwanyêrê ôkô pî yee i Kiricito kékên. 15 Naka tin ka êkwanô cik ka Muca, gin mê um nôn pod umo thamagî. 16 Êntô ka dhanô môrô ôlôkêrê both Rwoth, gin mê um nôn êkwanyô ôkô. 17 Kobedini, Rwoth ênê Tipo, êka kanya Tipo ka Rwoth tye iê, kuc thon tye iê. 18 Êka wan kibêc na dong êkwanyô gin mê um ôkô kî i

terinyimwa, dong etye na calô dheo ka Rwoth, na miô êlôkêrê êdôkô calô ên, nakun dheo méré méré amêda, na bino kî both Rwoth, na ênê Tipo.

4 Pî manôn, wan na dong êmiôwa tic ni pî kica k'Obanga, cwinywa ba bino dôk cen. 2 Êntô wan dong êkwêrô kit na reco kibêc n'êkanô êka mê lewic. Êka dókí êkwêrô tic mê bwôl ôkô êka kî dwanyô kôp k'Obanga, êntô wan êtwakô kôp adyer i nyim Obanga, êka jô kibêc na genere ngeo. 3 Ka cê kôp mê Emuth na Bêr na wan ekelo oumere ôkô, nwongo oumere kî both jô na tye ka rwenyo kékên. 4 Gin jô na ba yee nonu, obanga mê lobo ni dong oumo thamagî ôkô êk kûr ôñên ginî tar mê kôp mê Emuth na Bêr i kom dheo ka Kiricito, na ênê cal k'Obanga kikome. (aiôn g165) 5 Wan ba êtitô kôp i komwa kênwa, êntô i kom Yecu Kiricito n'obeto Rwoth, êka wan kikomwa ebeto eticwu pî Yecu. 6 Piên Obanga yam okobo nî, "Wêk tar ôryêný nakun yaa kî i côi pîny," man ênê Obanga acêl nôn n'ômiô tar méré ôryêný i cwinywa mê miôwa tar mê ngec i kom dheo k'Obanga na ryêný i wang Kiricito. 7 Êntô wan etye kî lônýô ni na tye i tabô n'ecweo kî lobo, mê nyutho nî tékô na thwônê yaa kî both Obanga, êntô ba yaa kî bothwa. 8 Êdiôwa i yodhi kibêc, êntô ba êridôwa rwôk. Thamawa ocung ôkô, êntô genwa ba ôbal. 9 Eyelowa, êntô Obanga ba ôwêkôwa ata, êtêôwa pîny, êntô ba êthôô. 10 Karê kibêc wan êyêô thôô ka Yecu i komwa, êk kwô ka Yecu thon onen i komwa. 11 Piên karê kibêc wan n'êkwô êmirê mê thôô pî Yecu, êk kwô méré onen i komwa na thôô ôkô. 12 Man dong nyutho nî thôô tye ka tic i komwa, êntô kwô tye ka tic i komwu. 13 Wan etye kî koth tipo nôn êk yee na yam êcôô nî, "An aye, ênê ômiô atwak." Wan thon eyee, ênê ômiô wan êtwak. 14 Wan engeo nî ngat n'ocero Rwoth Yecu bino cerowa thon kite n'ocero kî Yecu, êka ên bino kelowa i nyime kanya acêl kodwu. 15 Jami ni kibêc ôtimêrê pîrwu, êk kica k'Obanga ômêdêrê both jô na pol, êk gin thon ômêdêrê kî pwôc rwôk mê miô Obanga dheo. 16 Pî manôn, cwinywa ba tye ka dôk cen, kadî del komwa ni tye ka bal, êntô kwô mê iwa tye ka rôc ninô kî ninô. 17 Piên kan n'eyelowa kódê yot, tye pî karê môrô na nônôk, êka tye ka yûbô niwa dheo na thwônê na ba thum êka thwônê na lôô. (aiônios g166) 18 Wan ba êcikô wangwa mê nêñô gin na nen, êntô mê nêñô gin na ba nen. Gin na nen bedo pî karê na nônôk kékên, êntô gin na ba nen bedo naka naka. (aiônios g166)

5 Kobedini onu engeo nî ka kom onu mê lobo ni n'ebeto iê êbalô ôkô, etye kî gedo n'ôya kî both Obanga na ba êgêrô kî cîng, ôt na bedo na twal i wi

polo. (aiōnios g166) 2 Adyer onu ěcūr acūra i kom onu mē lobo ni piēn onu etye ki miti ni ěk eruk onu ki kom mē polo, 3 piēn ka eruko onu, ba ebino nwongo onu etye kotula. 4 Piēn ka wan pod etye i kom mē lobo ni, ěcūr acūra ki cwer cwiny n'ōnūōwa, pathi ni wan ba ěmitō ni ebed na ba erukowa, ěntō wan ěmitō ni erukwa ki kom na nyen, ěk gin na kwō ōmwōny gin n'ōthōō ōkō. 5 Ngat n'ōyūbōwa pī kōp ni ěnē Obanga, ěka thon ōmiōwa Tipo mērē na calō gin na moko ni ěn ebino cobo gin n'ěcīkō. 6 Pī manōn i karē kibēc wan ecung na tēk ěka thon engeo ni ka wan ěkwō i komwa ni nwongo ebedo na bor ki both Rwoth, 7 piēn kwōwa cung i kom yee, pathi gin n'ěnēnō ki wang. 8 Wan ecung na tēk, nakun ěthamō ni thwara ěwēk komwa ōkō, ěk ebed i pacō kanya acēl ki Rwoth. 9 Dong kadī bed etye i kom kany onyo kunōn, wan eketho cwinywa mē bedo jō na yomo cwiny Rwoth. 10 Piēn onu kibēc myero ecung i nyim then mē ngōlō-kōp ka Kiricito ěk ngat acēlacēl onwong gin n'opore na ěn ōtīmō i karē n'onwongo ěn pod tye i kom, ka bēr onyo rac. 11 Pī manōn, wan kibēc engeo ni Rwoth myero elwor, wan ětēmō mē ywanō thama ka jō nōkēnē. ěntō kitewa ngere both Obanga, ěka thon ageno ni ngere i ngec na tye i cwinywu na nyutho niwu bal. 12 Wan ba dōki etye ka pakērē kēnwa bothwu, ěntō etye ka miōwu karē mē wakērē i komwa, ěk ōmiīwu igam unu kōp ka jō na wakērē i kom gin na nen ki yōkō, ěka pathi pī gin na tye i cwiny jō. 13 Ka wan ědōkō jō n'opo, nwongo wan epo pi Obanga, ěntō ka wiwa tye ka tic na bēr, manōn obedo mē kōnyōwu. 14 Piēn mar ka Kiricito tye ka lōōnō kwōwa, piēn wan dong ěngōlō kōp kōman ni ngat acēl ōthōō pī jō kibēc, manōn dong ōmiō jō kibēc ōthōō gini. 15 ěn yam ōthōō pī jō kibēc, ěk jō na kwō kūr dōki obed na kwō piṛgi kēn-gī, ěntō obed gini ki kwō pī ngat na yam ōthōō ěka ocer piṛgi. 16 Dong cakērē tin mē cidhō kōdē anyim wan ba dōki ěnēnō dhanō mōrō i kite mē lobo, kadī bed yam wan engeo Kiricito i kite mē lobo, wan ba dōki engeo ěn i kite nōn. 17 Pī manōn ka ngat mōrō tye i Kiricito, ěn dōkō cwec na nyen, gin na cōn nwongo orwenyo ōkō, gin na nyen ěnē dong oleo kakarē. 18 Man kibēc obedo tic n'ōya ki both Obanga, n'ōdwōkōwa bothe pī Kiricito ěka ōmiōwa tic mē dwōkō jīi bothe mē rībērē kōdē, 19 Obanga onwongo tye ka dwōkō jō na tye i lobo yo bothe mē rībērē kōdē i Kiricito nakun ba ōkwanō balgi i komgi. ěka ěn ōmiōwa kōp mē dwōkō jīi bothe mē rībērē kōdē. 20 Pī manōn, wan dong ědōkō ěwang Kiricito, Obanga kwaōwu ki dwōnwa. Wan thon ěbakō dhōwa bothwu nakaka Kiricito ni ěmīi unu Obanga ōdwōkwu bothe. 21 Obanga ōmīō

ngat n'onwongo ba obedo abal ōdōkō abal pi onu, ěk i Kiricito onu ěnywak kite atīr k'Obanga.

6 i ticwa kanya acēl k'Obanga, wan ěkwaōwu ni kūr ěwēk unu kīca mērē ōbal nono. 2 Piēn ěn okobo ni, “Yam awinyi i karē mē tīmō dhanō na bēr, ěka i karē mē larē abino akonyi.” Winy unu, tin ěnē caa mē tīmō dhanō na bēr. Tin ěnē nīnō mē larē. 3 Wan ba eketho orii i yoo ka ngat mōrō, ěk kūr enwong bal mōrō i ticwa. 4 ěntō na calō etic k'Obanga, wan enyutho bērwa kēnwa i kite na papath: ki dangō pēkō na tēk, i ayela na pol, i can, ěka ki kwō na tēk n'ōdiōwa, 5 epwodowa, etweowa i buc, ěcūpō lwak i komwa, etio tic na tēk, ebedo abonge nīnō ěka cem oremowa. 6 Wan enyutho ni wan etic k'Obanga pī kitewa na leng, pī ngec na wan etye kōdē, pī dīnō cwinywa ěka kīcawa, pī Tipo Naleng, ěka pī mar na wan etye kōdē na twodo ope tē, 7 i twakwa n'atīr, ěka pī tēkō k'Obanga, wan ěmakō jami lwēny mē kite atīr i cīngwa kucem ěka kucam. 8 Gin ōwōrōwa, ěka ba ōwōrōwa gini thon, ěyanyōwa ěka ěpakōwa. Eterowa na calō etwodo, nakun wan ětwakō kōp adyer, 9 eterowa na calō jō na ba engeo, ěntō engeowa na bēr, na calō jō n'ōthōō ěntō ěkwō, na calō jō n'epwodogi ěntō ba enekowa, 10 na calō jō na kumo ěntō cwinywa nwongo pod tye na yom, na calō ěcan ěntō ěmīō jō na pol ōdōkō ělōnyō, na calō jō n'ope ki gin mōrō ěntō etye ki jami kibēc. 11 Un jō Korinti, wan dong ětwak kodwu kanyalēr, ěka ěyabō cwinywa na lac bothwu. 12 Wan ba eumo cwinywa ki bothwu, ěntō un ěnē iumo unu cwinywu ki bothwa. 13 An atwak kodwu na calō un ěthīnōna, yab unu thon cwinywu na lac. 14 Kūr ěrībērē unu ki jō na ba oyee. Kite atīr twērō rībērē kanya acēl ki kite na ba tye atīr nīngō? Onyo tar twērō rībērē ki cōl piny kanya acēl nīngō? 15 Thama ka Kiricito twērō rwatērē ki mē ka Belial nīngō? Onyo ngō na dhanō n'oye Kiricito twērō nywakō ki dhanō na ba oye Kiricito? 16 Ōt k'Obanga twērō rībērē ki cal jwogi nīngō? Piēn wan ěnē ebedo ōt k'Obanga na kwō, na calō Obanga okobo ni, “An abino bedo kōdgi, ěka abino woth i kin-gī, abino bedo Obangagi, ěka gin thon bino bedo jōga.” 17 “Pī manōn dong yaa unu ōkō ki bothgi, ěka ipokere unu, man kōp na Rwoth okobo. Kūr igud unu gin na ba leng, ěka abino gamōwu.” 18 “An abino bedo apapwu, ěka un ibino bedo awopena ěka anyirana, man kōp na Rwoth Won Twēr Kibēc okobo.”

7 Nyikoneina mē amara, kite na wan dong etye ki cīkērē ni, myero onu dong ělōnyērē ōkō ki kom gin na kibēc na lino kom onyo tipo, nakun elworo Obanga, ěk ebed jō na leng kikokome. 2 Yab unu

cwinywu bothwa. Wan ba ëtimö gin mörö na rac both ngat mörö, wan ba ëbwölö ngat mörö ëka wan thon ba ebuo ngat mörö. **3** An ba akobo köp ni ëk köp ölöwu, piën akobo bothwu cön ni un pïrwu tæk bothwa rwök, më kwö kanya acël onyo më thöä kanya acël kodwu. **4** Atye ki gen rwök i komwu, awakara thon pïrwu. Cwinya okwe na bë, ëka apong ki yom cwiny i canwa kibëc. **5** I karë na wan ethuno i Macedonia wan ba enwongo karë më yweo, can onwongo ögüröwa tungi ki tungi, lwëny i kin dhanö ëka lworö n'onwongo tye i cwinywa. **6** Ëntö Obanga, na kweo cwiny jö na cwinygi ötür, okweo cwinywa pi bino ka Tito. **7** Pathi pi bino mëré këkën, ëntö thon pi kite na un icükö unu ki cwinye. Ën okobo bothwa miti na un itye ködë më nënöna, cwer cwiny na un itye ködë, kit cwiny na un ibedo ködë i koma, ëk yom cwinya ömëdërë amëda. **8** Kad'i bed waragana ocwero cwinywu, an ba angut më cöönö, kad'i bed ni angut aniang ni waraga nön ocwero cwinywu pi karë mörö na nönök. **9** Kobedi dong an cwinya yom, pathi ni acwero cwinywu, ëntö piën cwer cwinywu ömiö un ingut. Cwer cwinywu nön onwongo öya ki both Obanga, ëk ömüwu kür inwong unu can mörö pïrwa. **10** Piën cwer cwiny n'Obanga miö kelo ngut na tero dhanö i larë, abonge kobo ni kono angeo, ëntö cwer cwiny më lobo kelo thöä. **11** Nën unu kite n'Obanga otio ki cwer cwinywu ködë! Nën kite na dong iketho unu ki cwinywu më nyutho ni ipe unu ki bal, i akëmöwu, i lworo, mitiwu më nënöna, i kite na un ilara unu ködë, ëka kite na un iyübërë ködë më miö pwod i kom gin na rac! Un dong ityeko nyuthere kenwu i yoo kibëc ni ba ingeo unu gin mörö i kom köp nön. **12** Kad'i bed acöo waraga bothwu, na acöo pi ngat mörö n'onwongo ötimö gin na rac, onyo pi ngat mörö n'ëtimö gin na rac i kome, ëntö acöo ëk ömü kite na un idyërë ködë pïrwa onen ökö bothwu i nyim Obanga. **13** I kom köp ni kibëc ekweo cwinywa. Mëd i kom kweo cwinywa, wan ebëdo ki yom cwiny më nënö kite na Tito onwongo tye ki yom cwiny ködë, piën un kibëc ikweo unu cwinye. **14** An onwongo awakara bothe pïrwu, ëka ba imia unu lewic. Ëntö kite na gin na kibëc na wan ekobo bothwu onwongo tye atir, cë dong wakërëwa pïrwu i nyim Tito tye atir. **15** Ëka mar mëré pïrwu ödökö na tæk, ka ën opo kite na un ibëdo ki winy i kome, kite na un igamö unu ën ködë ki lworo ëka ki myël kom. **16** An cwinya yom, piën atye ki gen i komwu.

8 Kobedini, utmegowa, wan ëmitö ni ibed unu ki ngec i kom kica n'Obanga ömiö both jö n'oye Kiricito na tye i Macedonia. **2** Gin owok i atëmatëma na ger, ëka ki yom cwiny na gin obëdo gini ködë i

can na thwönë rwök n'ödiögi, ënë lönyö na dit më cwiny n'obëdo gini ködë më miö mïc. **3** Piën gin ömiö gin na gin römö miö, ëka thon na kadhö. Gin ötimö na ba ëdiögi adia. **4** Gin ökwaöwa nakun bakö dhögi ni ëk enwong gini karë më ribërë ködwa më könyö jö k'Obanga na leng. **5** Gin otio tic n'ölöä genwa ökö, piën gin öcakö mirë këngi both Rwoth ëka dong ki miti k'Obanga gin öcakö mirë gini bothwa thon. **6** Pi manön wan dong ëcükö cwiny Tito ni kite na calö ën dong öcakö tic më kica i kinwu, myero ën dong ocob ökö. **7** Ëntö kite na calö un ilöä dhanö i yodhi kibëc—i kom yee, i twakö köp, i ngec, i ketho cwinywu, ëka mar na un itye ködë i komwa—bër ilöä unu dhanö thon i tic më kica më miö mïc. **8** Gin na an atwakö ba obëdo cik na an ënë amiö, ëntö amitö nyutho bothwu kite na jö nököë oketho gini cwinygi, ëk atëm mar na un itye ködë ka obëdo mar n'atir. **9** Piën un ingeo cwiny më kica na Rwoth Yecu Kiricito obëdo ködë, kad'i bed ën obëdo alönyö, ëntö pïrwu ölökerë ödökö acan, ëk i can mëré ibed unu ëlönyö. **10** Ëka man ënë thama na an amiö i kom köp ni, twërö bedo na bë ka icobo unu gin na yam icakö i mwaka n'opoth ca. Yam un ënë ibëdo unu jö n'onwongo tye anyim, pathi tic këkën, ëntö naka thon më ketho cwinywu i miö mïc. **11** Kobedi dong amitö ni imëdërë unu ki ticwu anyim, ëk icob unu ökö. Bed unu ki miti më tyeko na röm aröma ki maca na yam icakö unu ködë nakun ikwanyö unu gin na mitërë ki i kom gin na tye bothwu. **12** Obanga gamö mïc na dhanö tye ködë ka cë ën tye ki miti më miö, na ba parö pi gin na ën ope ködë. **13** Wan ba etye ka kobo ni ëk jö nököë obed gini na bër nakun ëdiöwu, ëntö ni ëk jö kibëc obed gini na röm aröma. **14** Kite na calö kobedini un itye ki jami na büp, miü unu gin na gin mitö, ëk wang mörö ka gin thon bino bedo gini ki jami na büp, gin thon bino miöwu gin n'orem ki bothwu, ëka dong bino miö un ibëdo na röm aröma, **15** na calö ëcöä ni, "Ngat n'öcökö na büp, ba tye ködë na pol, ëka ngat n'öcökö na nönök ba tye ködë na nönök." **16** An apwöyö Obanga n'oketho i cwiny Tito miti na thwönë na röm ki mëga më könyöwu. **17** Ën ba ögamö kwacwa këkën, ëntö oketho cwinye ië rwök, n'ömiö ën tye ka bino bothwu pi miti mëré këkën. **18** Wan eoro ën kanya acël k'öminwa n'ëpakö rwök both jö n'oye Kiricito kibëc pi kite na ën titö ködë köp më Emuth na Bër. **19** Pathi manön këkën, ëntö jö n'oye Kiricito öyërö gini ën më woth kanya acël ködwa i tic më miö mïc më kica na wan etye ka tio pi miö dheo both Rwoth, ëka pi mitiwa më miö köny both dhanö. **20** Wan etye n'ëgwökërë rwök ëk ngat mörö kür onwong bal mörö i kit na wan etye ka tic ki

míc na бүр ni kódě. **21** Pí manón thamawa tye mě tio gin na бёр, pathí i nyim Obanga kékén, éntö naka thon i nyim dhanö. **22** Wan thon etye ka orogí kanya acél k'öminwa nökéně na wan ebodo ka tēmō kite i yodhi kibéc, éka wan enwongo nī ěn obedo dhanö na ketho cwinye i kom tic na pol, éntö i karé ni dong tye ka ketho cwinye na ték rwók na löö tic na yam cón, pí gen na thwóně na ěn tye kódě i komwu. **23** Éntö pí Tito, ěn obedo atic kanya acél kōda éka awodha i kinwu, éka pí utmegowa, gín obedo eor na cung pí jö n'oye Kiricito, éka gín ěně jö na kelo dheo both Kiricito. **24** Pí manón, nyuth unu mar na un itye kódě both jö n'oye Kiricito, ěk gín öněn wakérěwa na wan etye kódě i komwu.

9 Kobedi dong ba mītērě an mě cōönö bothwu kōp i kom míc n'ēmīö pí jö k'Obanga na leng. **2** Piěn an angeo miti na un itye kódě mě miö kōny, éka an abedo ka wakara pírwu rwók both jö mě Macedonia, nakun akobo bothgí nī un jö na tye i Akaya onwongo iyübērě unu ökö cōn mě miö míc anaka i mwaka n'opoth. Ketho cwinywu ömīö jö na pol thon oketho cwinygí i miö míc. **3** Éntö an atye ka oro utmego onu bothwu ěk wakérěwa pírwu i kōp nī kür ojik i kōp kékén, ěk ibed unu nī yübērě i kite na an akobo bothgí kódě. **4** Ka cě jö mökö mě Macedonia owotho kōda éka onwongo nī un ba iyübērě, wan ebino bedo ki lewic pí gen n'onwongo wan eketho i komwu. **5** Pí manón an athamö nī bér aor utmego ni anyim ěk otyek gíní yüb mě míc na un ičikérě mě miö, ěk obed n'öyübērě na calö míc na un i miö kī cwinywu kenwu na ba édiöwu adía. **6** Kōp tye nī kōman, dhanö mörö na cwöö kodhi na nōnök, bino kaö thon na nōnök, éka dhanö mörö na cwöö kodhi na бүр, bino kaö thon na бүр. **7** Dhanö acélacél myero ömīö kite na cwinye omoko mě miö, abonge cwer cwiny onyo díc mörö, piěn Obanga marö ngat na miö kī yom cwiny. **8** Éka Obanga twērö miöwu gum mě jami na pol, ěk i jami kibéc éka i karé kibéc ibed unu kī jami na römöwu na bér, na miö un thon i twērö miö kōny na thwóně mě kōnyö tic kibéc na bécö. **9** Kite n'écöö kódě i Cóc na Leng: "Ömīö jami mērě na pol both écan, kite atír mērě bedo naka naka." (aiön g165) **10** Ngat na miö kodhi both acwö kodhi éka cem mě acama, bino thon miöwu kodhi éka mēdö dērö mě kodhiwu cě bino nyanö kac mě kite atírwu mě miö míc. **11** Ěn bino miöwu ibedo ělönyö i kit yodhi kibéc ěk ibed unu jö na römö bedo kī cwiny mě miö míc i karé kibéc, éka ka wan etero mícwu both jö na mītö, gín bino pwöyö Obanga. **12** Tic mě kōny ni na un itye ka timö bino kelo gin na mītērě both jö k'Obanga na

leng, éntö pathí manón kékén, bino kelo thon pwóc na thwóně rwók both Obanga. **13** Piěn gin na bér na ticwu kelo bino miö jö na pol mě miö dheo both Obanga, piěn nyutho winy na bér na un itye kódě i kōp mě Emuth na Bér i kom Kiricito éka pí cwiny na bér na un i nywakö kī i mīwu kōdgí éka kī jö kibéc. **14** Éka i lëgagí pírwu cwinygí bino parö pírwu, piěn pí kica k'Obanga na thwóně n'ökadhö karé na dong onen bothwu. **15** Pwóc obed both Obanga pí míc mērě na bér na ba kobere!

10 An, Paulo, akok bothwu nakun abakö dhöga, an n'ekobo nī amwol éka dōkí awór thon ka atye kanya acél kodwu, éntö an abedo na ger ka atye thenge. Pí mwolo éka dōkí pí kica ka Kiricito, **2** an akwaöwu nī ka an abino bothwu, kür imia unu abed kī gero éka kī ték cwiny na an ageno nī atwērö bedo kódě i kom jö mökö na thamö gíní nī wan ěllobö kite mě lobo ni. **3** Kadí bed nī wan etye i lobo, wan ba ělwényö kī jami lwény mě lobo ni. **4** Jami lwény na onu ělwényö kódě ba obedo jami lwény mě lobo, éntö obedo gíní jami lwény mě tēkö k'Obanga, na türö cěl ka lang onu. **5** Wan étürö thama na ba tye atír, éka awaka kibéc na tingere malö na miö jii ba ngeo Obanga. Wan émakö thamagi mě jēm éka ěmīö bedo kī winy i kom Kiricito. **6** Éka kinge na dong i dōkö unu jö na tye kī winy n'örömö, cě wan ebino pwodo ngat acélacél na ba bino bedo kī winy. **7** Něn unu gin na tye i nyimwu. Ka dhanö mörö tye kī ték cwiny nī ěn ebodo dhanö ka Kiricito, myero ěn öněn dōkí nī onu ebodo jö ka Kiricito kite na ěn obedo kódě. **8** Piěn kadí bed awakara rwók pí twērö na Rwoth ömīö bothwa, an ba abino bedo kī lewic mě tic kī twēröna. Twērö nōn ěn ömīö bothwa mě kōnyöwu, éka mě dōngöwu éntö pathí mě dwököwu piny. **9** An ba amitö nī abed calö ngat mörö na tye ka miö lworö bothwu kī waraga na an acöögí. **10** Piěn jö mökö kobo nī, "Waraga mērě pěk éka ték, éntö ka ěn othuno bothwu kome bedo na görü, éka thon gin mörö ope i kōp mērě na ěn twakö." **11** Jö n'obedo nī kōmanön myero öniang gíní nī kite na wan étwak kódě i waragawa ka wan epe, wan ebino timö nī kōmanön thon ka etye bothwu. **12** Wan ba éparö mě kethere kēnwa onyo mě pore kī jö mökö na pakérě gíní kēn-gí. Éntö ka gin opimere kēn-gí éka opore gíní kēn-gí, nwongo gin ba ryék. **13** Wan ba ebino wakérě n'ökadhö wangě n'ēmīö, éntö wan ebino wakérě kanya Obanga opoko niwa mě tic, mě thuno naka thon bothwu. **14** Wan ba ebino kadhö kanya myero ejik iě calö yam ba ethuno bothwu, piěn wan ěně écakö thuno bothwu mě titö kōp mě Emuth na Bér i kom Kiricito. **15** Wan

ba ewakërë n'òkadhò wangë n'ëmiöwa i kom tic na jò nòkënë ënë oyelere ië, ëntò wan etye ki gen ni ka yeewu ömëdërë, ticwa thon bino mëdërë rwök i kinwu, nakun lübö kanya yam epoko niwa. 16 Cë wan ëtwërö titö köp më Emuth na Bër i lobo na tye kanya bor. Piën wan ba ëmitö wakërë ki tic na dong ngat nòkënë ötimö i kakar tic ka dhanö nòkënë. 17 Ëntö ngat na wakërë myero öwakërë i Rwoth. 18 Piën pathi ngat na pakërë kënë ënë Obanga pwöyö, ëntö dhanö na Rwoth pakö.

11 Athamö ni i'dii unu cwinywu na nönök i koma pi mingona. Dii unu cwinywu koda. 2 An abedo ki nyeko i komwu ki koth nyeko n'Obanga tye ködë. Piën an acikara më miöwu both ëcwö acël na ënë Kiricito ëk amiïwu bothe na calö nyakö na leng na bara ongeö ëcwö. 3 Ëntö an atye ki lworö ni kite na calö thwol yam öbwölö Eba k'ököra mërë, un thon jii bino balö thamawu ökö, ëka bino miöwu ba ibino marö unu Kiricito ki cwinywu kibëc na leng. 4 Piën ka ngat mörö obino bothwu cë ötitö Yecu nòkënë na path ki Yecu na wan ëtitö, onyo ka igamö unu tipo na path ki kom maca na un igamö, onyo köp më Emuth na Bër na path ki kom maca na un iyeo, manön un iyeo më tic ködë. 5 Ëntö an ba athamö ni an atidi both "ëkwëna na dito." 6 Kadï bed ni an ba aryëk i twak, ëntö an atye ki ngec. Wan enyutho bothwu köp ni kanyalër i yodhi kibëc. 7 Onyo an onwongo atimö bal i karë na an amwolara ëk etingwu malö, piën an atitö bothwu köp më Emuth na Bër k'Obanga abonge cül mörö? 8 An ayakö jö n'oye Kiricito nòkënë nakun agamö cül ki bothgi ëk atii niwu tic. 9 Ëka i karë na an onwongo atye kodwu na mitö gin mörö, an onwongo ba abedo pëkö both ngat mörö, piën utmego n'obino gini ki i Macedonia ömiö ngö n'onwongo an amitö. An agwökara kür abed pëkö bothwu i yoo mörö kékën, ëka abino mëdara më timö ni komanön. 10 Na calö köp n'adyer ka Kiricito tye i cwinya, ngat mörö ope na bino jükö awakana ki i lobo Akaya. 11 Pingö? Piën an ba amaröwu? Obanga ngeo ni an amaröwu! 12 Ëka an abino mëdara më timö ngö na an atye ka timö, ëk kür amiï jö na mitö nwongo karë më miögi bedo na röm aröma ködwa i tic na gin wakërë ië. 13 Piën koth jö nön obedo gini ëkwëna na twot, etic na bwölö jii, na lökërë gini calö ëkwëna ka Kiricito. 14 Ngat mörö myero kür obed ki ur i köp ni, piën kadï Catan kikome thon lökërë na calö malaika na mënyö piny. 15 Pi manön man ba obedo gin mörö më aura ka cë etic ka Catan lökërë gini calö etic na kitegi atir. Ajikigi bino bedo na röm aröma ki tic na gin otio. 16 An akobo dökï ni ngat mörö kür ötham ni an abedo

aming. Ëntö ka ithamö unu ni komanön, cë ijöla unu na calö dhanö na ming, ëk ömia thon awakara na nönök. 17 Gin na an atye ka kobo k'awaka ba obedo gin na Rwoth ömia ni akob bothwu ëntö an atwak calö aming. 18 Kite na jö na pol wakërë i kite na lobo wakërë ködë, an thon abino wakara. 19 Un idiö cwinywu ki yom cwiny ki jö na ming, nakun un ibedo jö na ryëk! 20 Adyer un idiö cwinywu kadï ngat mörö tye ka lököwu më bedo opii mërë, onyo tye ka camö limwu, onyo buowu, onyo na bwönöwu, onyo bapö lemmu. 21 Ki lewic na mëga an ayeo ni wan onwongo ëgörü rwök pi köp nön! Ëntö gin mörö na dhanö diö cwinye ië më wakërë pirë, an atye ka twak na calö aming, an thon adiö cwinya më wakara i kom gin nön. 22 Gin obedo jö lburu? Cë an thon abedo. Gin obedo jö lcarael? Cë an thon abedo. Gin obedo ëkwaë k'Abraam? Cë an thon abedo. 23 Gin obedo etic ka Kiricito? (An atwak na calö ngat n'opo.) An alöögï, atio tic na thwönë rwök, abedo i buc wang na pol, epwoda ki wel lüth na ba kwanërë, ëka abüc ki i thöo wang na pol. 24 Eyuda opwoda gini wang abic ki del wang pyer adek wie abungwën. 25 Opwoda gini wang adek ki lüth, ecela ki kite wang acël, mel ötür köda wang adek, abuto i nam kiwor ëka kiceng. 26 An abedo ka woth pi karë na pol. Anwongo can n'öya ki i kulo na möl ëka can n'öya ki both ëyak. Anwongo can n'öya ki both jö më thurwa kikokome ëka can n'öya ki both Erok. Anwongo can n'öya ki i pacö na dit, can n'öya ki i thim, can n'öya ki i nam. Anwongo can n'öya ki both utmego n'obedo etwodo. 27 An atio tic na tek rwök pi karë na lac na ba aninö kiwor. An ario kec k'örö pii, na ba acamö gin mörö. Adangö thon piny na ngic abonge gin mörö më aruka. 28 Mëd i kom gin nòkënë kibëc, tye gin acël na kelo pëkö botha karë ki karë, ënë par na an atye ködë pi jö n'oye Kiricito kibëc na tye i kabedo na papath. 29 Nga na tye ki görü ëka an ba awinyo görü? Nga n'ëmiö opodho i bal na ia ba öwang ië? 30 Ka onwongo myero awakara, an abino wakara pi gin na nyutho görüna. 31 Obanga ëka Apap ka Rwoth Yecu, na myero ëpak naka naka, ngeo ni an ba atwot. (aiön g165) 32 I karë na an atye i Damaciko, gabuna na tye i thë löc ka rwoth Areta onwongo obedo ka kürö pacö ka jö Damaciko ni ëk ëmaka, 33 ëntö ëmia adönyö yökö n'elwa piny k'adita nakun awok ki i wang derica na tye i kom cël, ëka alüü ökö ki i cingë.

12 An myero amëdara më wakara. Kadï bed ni gin mörö ope n'enwongo ki ië. An abino mëdara më twak i kom gin na an anëñö i wang lek ëka gin na Rwoth onyutho botha. 2 An angeo dhanö na tye i

Kiricito na dong okadhō mwaka apar wie angwēn na yam etingo etero okō malō ī wi polo mē adek. Kadi bed nī onwongo tye ī kom onyo ba tye ī kom, an ba angeo ēntō Obanga ēnē ngeo. 3 Ēka an angeo nī dhanō nī kadi bed tye ī kom onyo ba tye ī kom, an ba angeo ēntō Obanga ēnē ngeo, 4 onwongo etingo etero malō ī polo. Ēn onwongo owinyo kōp na ba rōmō atwaka, na ba eyeo dhanō mē kobo. 5 An abino wakara pī koth dhanō na cal kī manōn, ēntō ba abino wakara pīra kēna, na path kī gōrūna. 6 Kadi bed an amītō yērō mē wakara, an ba abino bedo aming, piēn nwongo an abino twakō kōp n'atīr. Ēntō an ba abino wakara ēk dhanō mōrō kūr obed kī thama ī koma na lōō gin na ēn ōnēnō onyo kōp na ēn owinyo awinya kī botha. 7 Mē gwōkōna ēk kūr atingara malō kēna pī jami mē aura na pol na yam Obanga onyutho botha, yam eketho okūdhō ī ringo koma, aor ka Catan, ēk oketh can ī koma ēk kūr atingara malō kēna. 8 Wang adek an akwaō Rwoth ēk okwany okō kī botha. 9 Ēntō ēn okobo nīna nī, "Kicana tye na romi, piēn tēkōna bedo na tēk rwōk kanya gōrū tye iē." Pī manōn an abino wakara rwōk kī yom cwiny ī kom gōrūna, ēk tēkō ka Kiricito obed ī koma. 10 Pī Kiricito ōmīō cwiny yom pī gōrū na papath na an atye kōdē, ayeny, can, pēkō mōkō n'eyela kōdē, pēkō na dīa rwōk, piēn kanya an agōrū kī iē, ēnē kanya an atēk kī iē. 11 An onwongo abedo aming! Īdīa unu iē, piēn un onwongo myero īpaka unu. An ba atīdī both "Ēkwēna na dito" kadi bed an ba abedo gin mōrō. 12 Gin na kibēc na nyutho nī an abedo akwēna kikome ōtīmērē yam ī kinwu kī dīō cwiny na thwōnē, anyuth mōkō, gin mē aura, ēka tango. 13 Gin acēl kēkēn na an ba atīmō, na an atīmō both jō n'oye Kiricito nōkēnē, an kikoma onwongo ba abedo pēkō bothwu. Tīm nīna unu kīca ī bal nī. 14 Kobedini dong an ayūbara mē bino bothwu wang mē adek, ēka an ba abino bedo pēkō bothwu, piēn gin na an amītō ba obedo jamiwu ēntō un. Ka obedo nī kōmanōn, ēthīnō kūr myero ōkan jami pī enyodogī ēntō enyodo ēnē myero ōkan jami pī ēthīnōgī. 15 An abino bedo kī yom cwiny rwōk mē tic kī jami kibēc na an atye kōdē, kadi tēkōna kibēc pī kōnyō kwō mē tipowu. Ka an amarōwu rwōk, un ibino marōna na nōnōk? 16 Ēntō kadi bed nī kōmanōn, an ba abedo pēkō bothwu. Cē kite na an onwongo abedo okōra, an abino amakōwu kī bwōl. 17 Tye ngat mōrō kī ī kin jō n'onwongo an aorogī bothwu n'obuo gin mōrō kī bothwu pīra? 18 An akwaō Tito nī myero obin bothwu ēka aoro ōmīn onu mē woth kōdē kanya acēl. Tito obino obuowu? Pe! Onu yam ba etio tic kī cwiny acēl ēka ēlūbō yoo acēl kēkēn? 19 Un ibedo thamō pī karē

kibēc nī wan ebledo ka pido pīrwa kēnwa ī nyimwu? Wan ebledo twak ī nyim Obanga na calō jō na tye ī Kiricito, ēka jami kibēc na wan ētīmō, utmegona mē amara, obedo mē jīngōwu. 20 Piēn an atye kī lworo nī caa nōkēnē ka an athuno atwērō nwongowu īpath kī kite na an amītō nī ibed unu kōdē, ēka un thon dōkī ibino nwongo unu nī an apath kī kite na un īmītō nī an abed kōdē. An atye kī lworo nī gwōk onyo itye unu kī dha, aḍinga, akēmō, woro, ayeny, anīi, awaka ēka arubaruba. 21 An atye kī lworo nī ka adwogo bothwu dōkī, Obangana bino mīōna amwolara ī nyimwu, ēka an abino kok pī jō na pol n'ōbalō cōn cē ba ongut gīnī kī ī kom tīmgi na ba bēr, tīm mē ōlyang ēka miti mē kom na gin ōtīmō.

13 Man ēnē wang mē adek na an atye ka bino kōdē yo bothwu. "Caden na rōmō arīō onyo adek ēnē myero omok gīnī kōp kibēc n'ekelo mē alara." 2 An onwongo dong akobo niwu okō cōn ī karē na an onwongo atye bothwu ī limona mē arīō. Kobedi dong anwō na an ape bothwu nī ka adwogo dōkī, ba abino tīmō kīca both jō n'ōbalō cōn, 3 kite na un īmītō moko nī Kiricito twak nakun wok kī botha. Ēn ba obedo ngat na gōrū mē tic kodwu ēntō ēn tēk ī kinwu. 4 Ēn onwongo eguro ī kor yath arīa piēn ēn onwongo ope kī tēkō, ēntō kobedini ēn tye na kwō pī tēkō k'Obanga. Kadi onu thon ēgōrū ī ēn, ēntō ī ticwa kodwu onu ebino kwō kanya acēl kī Kiricito pī tēkō k'Obanga. 5 Ngirē unu kenwu, ēk īnēn unu ka cē icung unu na tēk ī yeewu. Tēmērē unu kenwu. Un ba itye ka nīang nī Yecu Kiricito tye ī iwu? Thwara ka ibedo unu jō n'Obanga ba pwōyō. 6 An ageno nī un ibino nīang na bēr nī wan ba ebledo jō na ba ēpwōyōgī. 7 Wan ēlēgō Obanga pīrwa ēk kūr ītīm unu gin mōrō na rac. Pathī mē nyutho nī wan jō n'Obanga pwōyō, ēntō wan ēmītō nī un ītīm gin na bēr, kadi bed nī wan enen calō jō na ēn ba ēpwōyō. 8 Piēn wan ba ētwērō tio gin mōrō na ba rwatērē kī kōp na tye atīr, ēntō ētwērō tio gin na rwatērē kī gin na tye atīr kēkēn. 9 Cwinywa yom ka wan ēgōrū, nwongo un ītēk, dōkī wan ēlēgō nī īdōk unu jō n'otengo. 10 Man ēnē gin n'ōmīō an acōō kōp nī na an pod atye kanya abor kodwu, ēk kūr abed na ger ī komwu ka an abino nakun atio kī twērō na yam Rwoth ōmīa ēk akōnywu mē dōngō, ēntō pathī mē dwōkōwu pīny. 11 Mē ajiki, utmegona, bed unu dong. Yūb unu dong kitewu na bēr, ēka dōkī myero iwiny unu kokona pī gin na an akwaōwu pīrē. Bed unu kī thama acēl, bed unu kī kuc, ēka Obanga na won mar kī kuc bino bedo kodwu. 12 Motherē unu kenwu kī moth mē mar. 13 Jō k'Obanga na leng kibēc omothowu. 14 Kīca ka

Rwothwa Yecu Kiricito, mar k'Obanga, ěka kī rībĕrĕ
ka Tipo Naleng obed kodwu.

Galatia

1 Waraga ni öya ki both Paulo n'obedo akwëna. Pathi jö mörö ënë oora, ëntö Yecu Kiricito ëka Obanga Apap n'ocero Yecu ki i kin jö n'öthöö. **2** Utmegeo kibëc na tye gini kanya acël kôda kany ömïö mothgi. Both jö n'oye Kiricito kibëc na tye i Galatia. **3** Obanga Apap onu ëka Rwoth Yecu Kiricito ömïwu gum ëka kuc. **4** Kiricito ömïö kwö mërë pi bal onu, kite n'Obanga Apap onu onwongo öyübö ködë, ëk ëlar onu ökö ki kom gin na rac më karë ni. (aiön g165) **5** Dheo obed both Obanga naka naka. Amën. (aiön g165) **6** An auro kite na un ilökërë unu ködë pïöpiö, ikwërö unu ngat na yam ocwodowu i kica ka Kiricito, ëka itye ka lökërë unu i emuth na bër nökökënë na path k'Emuth na Bër. **7** Adyer köp më Emuth na Bër nökökënë ope, ëntö tye jö mökö na tye ka balö thamawu ökö nakun mitö gini lökö köp më Emuth na Bër i kom Kiricito dökö gin na path. **8** Ëntö kadï bed wan onyo emalaika mörö n'öya ki i polo ötitö niwu emuth na bër nökökënë na path k'Emuth na Bër na yam wan ëtitö niwu ca, myero ëcën dhanö nön ökö. **9** Na calö wan ekobo niwu cön, pod anwö kobo döki: Ka ngat mörö tye ka titö niwu emuth na bër nökökënë na path k'Emuth na Bër na yam igamö unu, myero ëcën dhanö nön ökö! **10** An kobedini atye ka rangö cwak ka dhanö, onyo cwak k'Obanga? Onyo an atye ka tëmö yomo cwiny jö? Ka onwongo an pod ayomo cwiny jö, kono an ba abedo atic ka Kiricito. **11** Utmegona, an amitö inge unu ni köp më Emuth na Bër na an atitö ba obedo gin mörö na dhanö ënë öcakö. **12** An ba agamö ki both ngat mörö, onyo epwonya ködë apwonya; ëntö an anwongo ki both Yecu Kiricito n'onyutho botha. **13** Un ityeko winyo kite na kwöna na cön onwongo tye ködë i lübö dini k'Eyuda, ëka kite na an onwongo aketho ki can i kom jö k'Obanga n'oye Kiricito ëka atëmö tyekogï ökö. **14** I dini k'Eyuda, an onwongo alö pol jii n'obedo gini nyelwaga ëka alübö thëkwarö ka kwërena kibëc. **15** Ëntö i karë na bara ënywöla, Obanga onwongo öyëra ökö, ëka ocwoda pi kica mërë. Cë oyomo cwinye **16** më nyutho nina Wode, ëk atit köp i kome both Erok. I karë na köp ni ötimërë, an ba acidhö më penyo thama ki both ngat mörö, **17** an thon ba acidhö yo Jerucalem both jö n'onwongo obedo gini ëkwëna cön nina, ëntö cücüth an acidhö i lobo Arabia ëka kinge adwogo yo Damaciko. **18** Cë kinge mwaka adek, an acidhö naka yo Jerucalem më rwatërë ki Petero ëka abedo bothe pi ninö apar wie abic. **19** An ba anëno akwëna mörö ëntö an anëno Yakobo këkën ömin Rwoth. **20** Adyer i nyim Obanga,

gin na kibëc na an atye ka cöönö niwu i waraga ni, twodo mörö ope ië. **21** Kinge manön an acidhö yo Ciria ëka Cilicia. **22** I karë nön, jö n'oye Kiricito na tye gini i Yudea onwongo bara ngeo gini koma. **23** Gin onwongo owinyo köp i koma këkën ni, "Ngat na yam oyelo onu kobedini dong tye ka titö köp i kom yee na yam ën ötëmö türö." **24** Cë öpakö gini Obanga pi gin na ën ötimö i koma.

2 Cë kinge mwaka apar wie angwën, an adök döki yo Jerucalem ki Baranaba. An thon awotho ki Tito. **2** An acidhö kunön piën Obanga onyutho nina ni myero acidhi ëk atit i nyimgi körë ki körë köp më Emuth na Bër na an atitö both Erok. Ëntö an atimö man i müng both jö na pürgi tük, ëk kür ökwër gini ticna na an atio onyo na dong atyeko tio, ëk obed më nono. **3** Tito n'onwongo owotho köda ba ëdiö ni ëk ëlir, kadï bed ni ën onwongo obedo Arok n'öya ki Grecia. **4** Köp ni öya piën utmegeo mökö n'obedo etwodo onwongo odonyo i kinwa më rïpö kuc na wan etye ködë i Kiricito Yecu ëka më miöwa bedo opii. **5** Ëntö më gwökö köp adyer më Emuth na Bër pirwu, wan ba eyeo ni gin ölööwa kadï na tidi mörö. **6** Both jö na pürgi tük—kite n'onwongo gin tye ködë ba okeko apokapoka mörö botha, piën Obanga ba lengere both ngat mörö pi kite na ën tye ködë—jö nön ba ömëdö gini gin mörö i köpna. **7** Nakaka manön, gin obino ongeon ni Obanga ömia tic më titö köp më Emuth na Bër both Erok, na calö ömïö Petero tic më titö both Eyuda. **8** Obanga n'ooro Petero na calö akwëna më tic both Eyuda, ën onwongo thon tye ka tic köda na calö akwëna both Erok. **9** Yakobo, Petero ëka Jon, n'onwongo ngere më bedo calö wir ka jö n'oye Kiricito, na dong öniang gini pi gum n'Obanga ömia wan ki Baranaba, gin omotho cingwa më nyutho ni wan kibëc ëribërë dong kanya acël. Gin oye ni wan myero ëcidh both Erok, ëka gin ëcidh both Eyuda. **10** Gin na gin ökwaöwa këkën ënë ni wan myero ëmëdërë më könyö ëcan, gin n'onwongo an aketho cwiny ni myero atim. **11** I karë na Petero obino yo Antiokia, an ajükö ën wang ki wang, piën ën onwongo ötimö gin na ba tye na bër. **12** Na bara jö n'öya ki both Yakobo othuno, Petero onwongo cemo kanya acël k'Erok. Ëntö i karë n'othuno gini, cë Petero öcakö jer thenge ëka opokere ökö ki both Erok piën ën onwongo lworo jö na mitö ni ngat mörö këkën n'oye Kiricito myero kono ëlir. **13** Eyuda nökökënë n'oye öcakö gini lübö kite ka Petero nön më twodo ëka Baranaba thon öcakö lübö kitegi më twodo nön. **14** I karë na an anëno ni gin ba döki tye ka tic na lübërë ki köp adyer më Emuth na Bër, an akobo both Petero

ĩ nyimgi kibęc ni, "In ibedo Ayuda, ęntő ikwő calő Arok ęka ba ikwő calő Ayuda. Cę dong in itwērő diő Erok nęngő mę lübő kite k'Eyuda? 15 "Onu n'ebedo Eyuda i anywōli ęka ba ebledo 'Erok n'obedo gini ębal' 16 engeo ni dhanő ba ękwanő ni kite atir pięn timő gin na cik mitő, ęntő pi yee i kom Yecu Kiricito. Kadĩ onu thon Eyuda, eketho yee onu i kom Yecu Kiricito ęk ękwan onu ni kite onu atir pi yee i kom Kiricito, ęka pathi pi timő gin na cik mitő. Pi manőn, ba ękwanő dhanő ni kite atir pięn timő gin na cik mitő. 17 "Ęntő ka onu ęrangő ni ękwan onu ni kite onu atir pi Kiricito, cę enwongo ni onu kikome ebledo ębal dōki, manőn twērő nyutho ni Kiricito őmiő onu ędōkő ębal? Adyer pathi ni kōmanőn! 18 Ka an agērő gin na yam arędhő ökő piny, an amoko kęna ni an abedo ngat na türő cik. 19 Cik kikome ęnē őmiő an athōő ęk akwő pi Obanga. 20 An dong etyeko gurona ökő ki Kiricito i kor yath ariā mērē ęka pathi an ęnē dōki akwő, ęntő Kiricito ęnē tye ka kwő i ia. Kwő na an atye kōdē i koma, an akwő pi yee i kom Wod k'Obanga, n'ōmara ęka őmirē kēnē pira. 21 An ba akwērő kica k'Obanga, pięn ka ękwanő dhanő ni kite atir pi cik, cę Kiricito őthōő nono abonge tyęn kōp mōrő."

3 Un jő Galatia kara imięg unu kōman! Nga n'örögōwu? Yam cōn onwongo enyutho niwu kanyalēr kite n'eguro ki Yecu Kiricito i kor yath ariā. 2 Ęk an apenywu peny acēl: Un inwongo Tipo Naleng pi lübő cik, onyo pi yeo kōp mę Emuth na Bēr na un iwinyo? 3 Un kara imięg kōman? Un icakő ki Tipo Naleng k'Obanga ęntő kobedini dong imitő unu tyeko ki tēk komwu? 4 Un ilimő can na pol nono? i adyer onwongo ba obedo mę nono. 5 Obanga miōwu Tipo Naleng ęka tio tango na pol i kinwu pięn ilübő unu cik onyo pi yeo kōp na un iwinyo? 6 i yoo acēl nōn, "Abraam oye i kom Obanga, ęka ękwanő ęn ni kite atir pi yee mērē." 7 Myero inge unu ni jő na tye ki yee, gin ęnē ęthinő k'Abraam. 8 Cōc na Leng onyutho ni Obanga bino kwanő Erok ni kitegi atir pi yee. Obanga yam őtitő kōp mę Emuth na Bēr both Abraam cōn nakun kobo niņē ni, "Rok kibęc bino nwongo gum piri." 9 Pi manőn, jő na tye ki yee bino nwongo gini gum k'Abraam n'obedo ki yee. 10 Jő kibęc na jengere i lübő cik ęlamōgi dong ökő, pięn ęcōő ni, "Cen opodh i kom jő kibęc na ba lübő gin na kibęc n'ęcōő i buk mę cik." 11 Kobedini kōp dong ongere ökő ni ba ękwanő dhanő mōrő ni kite atir i nyim Obanga pi timő gin na cik mitő, pięn ęcōő ni, "Jő na kitegi atir bino kwő pi yee." 12 Ęntő cik ba ocung i kom yee, pięn ęcōő ni, "Dhanő na bino gwōkő

jami ni bino kwő piri." 13 Kiricito ęnē yam ökōkő onu ki i cen n'opodho i kom onu pięn onu ba ęlübő cik. Ęn obino cę ölökērē ödōkő dhanő n'ęlamő nakaka onu, pięn yam ęcōő ni, "Cen myero opodh i kom dhanő n'ęngabő malő i wi yath." 14 Ęn ökōkő onu ęk gum na yam Obanga őmiő both Abraam myero Erok thon onwong gini pi Yecu Kiricito. Ęk onu thon enwong Tipo Naleng na yam ęn öcikő pi yee. 15 Utmegona, ęk kono amii apor mę kwő mę karē kibęc. Ka jő ariő öcikērē gini i gin mōrő na gin omoko, ngat mōrő ope na dōki twērő lōkő onyo mēdō gin mōrő iē. 16 Obanga yam öcikērē both Abraam ęka akwarē. Cōc na Leng ba okobo ni, "ki both ękwaēni," na nyutho jő na pol, ęntő okobo ni, "ki both akwaru," na nyutho ngat acēl kēkēn na ęnē Kiricito. 17 Ngő na an akobo ene: Cik na dong obino kicen kinge mwaka 430 ba dōki twērő türő cikērē n'Obanga otyeko moko cōn ęka thon ba miő gin n'ęcikő rwenyo. 18 Ka mic n'Obanga miő obedo pi cik, cę nwongo ba lübő cikērē mērē, ęntő Obanga i kica mērē őmiő mic both Abraam pi cikērē mērē. 19 Pingő ęmiő cik dōki? Cik ebino ęmēdō i kom cikērē ęk türő cik onen ökő kanyalēr naka wang n'akwar Abraam n'eketho cikērē pirē obino. Emalaika ęnē yam okelo cik cę ęmiő i cing ngat na ribő dhanő kanya acēl. 20 Ngat na ribő dhanő ba mitērē ka ngat acēl kēkēn ęnē tye; ęntő Obanga tye acēl. 21 Cik dong tye ka pyem ki cikērē k'Obanga? Pathi kōmanőn, pięn ka onwongo ęmiő cik na twērő miő kwő, cę kwanő dhanő ni kite atir obedo pi lübő cik. 22 Ęntő Cōc na Leng kobo ni jő kibęc tye gini i thē lōc mę bal, ęk gin n'onwongo ęcikő ęmii both jő n'oye pi yeegi i kom Yecu Kiricito. 23 Na bara yee i kom Kiricito enyutho both onu, cik onwongo gwōkő onu na calő emabuc, naka i karē na dong enyutho ni onu yee. 24 Kōmanőn, cik onwongo obedo gin na gwōkő onu naka Kiricito obino; cę dong ęcakő kwanő onu ni kite onu atir pi yee. 25 Kobedini dong yee i kom Kiricito tye, onu ba dōki ętwērő bedo i thē gwōk mę cik. 26 Un kibęc ibedo ęthinő k'Obanga pi yee i kom Kiricito Yecu. 27 Pięn un kibęc n'onwongo ebatcawu i Kiricito, iruko unu dong Kiricito calő bōngū na nyen. 28 Apokapoka ope i kin Ayuda k'Arok, i kin opii ęka ngat na lōrē kēnē, i kin ęcwő ęka dhakő, pięn un kibęc itye unu acēl i Kiricito Yecu. 29 Ka un ibedo jő ka Kiricito, cę un dong ibedo unu ęthinő k'Abraam na bino leo gin na yam Obanga öcikő both Abraam.

4 Gin na an atye ka kobo ęnē ni aleē jami ka pod obedo athiņ, bedo na rōm arōma k'opii, kadĩ bed ęn obedo won jami kibęc. 2 Ęn bedo i thē lōc ka jő na gwōkő ęn ęka edite na gwōkő jami naka ka karē

n'apap mërë öcîkô örömö. **3** Man ênë kite n'obedo ködë i kom onu, i karë na onu pod ebodo calö ëthinö, onu onwongo etye calö opii na tye i the twër më lobo ni. **4** Êntö ka karë n'ëcîkô kikome örömö, Obanga obino ooro Wode na dhakö önywölö ëka ökwö i the cîk, **5** më kökô jö n'onwongo tye i the cîk, ëk ëlök onu ëdök ëthinö k'Obanga ki twër n'örömö. **6** Kobedini kite na un dong ibedo ëthinö k'Obanga, ênë ömïö Obanga ooro Tipo ka Wode i cwinylu na kok nî, "Aba, Apap." **7** Pî manön un ba dökî ibedo unu opii. Un ibedo ëthinö k'Obanga, ëka ebino mïöwu gin na ên öcîkô. **8** I karë na un bara ingeo Obanga, onwongo ibedo unu opii ka gin mökö na ba obedo ginî obanga kikome. **9** Êntö kobedini dong un ingeo Obanga—onyo nî Obanga dong ngeowu—pîngö un dökî imitö dök cen i opii më bedo i the twër më lobo ni na görü ëka na pîny öldögi? Imitö unu dök më bedo opiigi dökî? **10** Un iketho cwinylu më kwero nîñö mökö, dwe, karë na papath, ëka mwaka. **11** An atye kî lworo rwök nî ticna kibëc na an atio pîrwu onwongo obedo më nono. **12** Utmegona, an akwaöwu nî ibed unu calö an, piën an dong adökö calö un. Un ba itimö gin mörö na rac i koma. **13** Kite na un ingeo nî onwongo obedo pî lith koma, ênë ömïö an acakö titö niwu köp më Emuth na Bër. **14** Un ba ibino i'caa onyo ikwëra unu kadî bed lith koma onwongo obedo atëmatëma bothwu, ëntö ijöla unu na bër na calö an onwongo abedo malaika k'Obanga, onyo na calö an onwongo abedo Kiricito Yecu kikome. **15** Ngö n'öbalö yom cwinylu kibëc n'onwongo itye unu ködë? An arömö miö caden nî, ka onwongo twërë, onwongo myero igol wangwu ökö ëka imîi unu botha. **16** An dong adökö langöwu piën an akobo niwu köp adyer? **17** Jö nökenë ca tëmö ginî kî tæk më lököwu, ëntö thamagi rac. Gin na gin mitö ênë nî ilökërë unu ökö kî botha ëk i'cac unu winyogi. **18** Ka ngat mörö tye kî miti më timö gin na bër bothwu, manön kibëc bër, ëntö myero ötim ginî i karë kibëc, pathî ka an atye kodwu këkën. **19** Êthinöna më amara, pod dökî atye ka dangö arem kodwu calö dhakö na dangö arem i karë më nywöl naka ka Kiricito obedo na tye rwök i kwöwu. **20** An onwongo amitö nî kono abin abed bothwu kobedini ëk aniang i kom gin na myero atwak bothwu, piën thama i komwu dong ocungo wia ökö! **21** Un jö na mitö nî cîk öldöwu, un ba ingeo ngö na cîk kobo? **22** Piën ëcöö nî Abraam onwongo tye k'awope ariö, acël obedo wod ka dhakö n'onwongo obedo opii, ëka acël wod ka dhakö na ba obedo opii. **23** Wod ka dhakö n'onwongo obedo opii ënywölö i kite më kom; ëntö wod ka dhakö na ba obedo opii ënywölö na calö adwogi më cîkërë n'Obanga öcîkô. **24** Man

ërömö niang ië na calö carolok, mon ariö ni nyutho cîkërë ariö. Cîkërë acël öya kî i wi kidi Cinai, önywölö ëthinö na bino bedo ginî opii: Dhakö ni ênë Aga. **25** Kobedini Aga cung pî kidi Cinai na tye i Arabia na röm aröma kî Jerucalem më karë ni piën tye i opii kanya acël k'ëthinö mërë. **26** Êntö dhakö nökenë ca cung pî Jerucalem na tye i polo; ên löörë këñë ëka ênë obedo aya onu. **27** Piën ëcöö nî: "Bed kî yom cwinylu, in dhakö nî bedo alür, na ba önywölö ëthinö mörö; red kî yom cwinylu rwök, in n'arem më nywöl ba ogoi; piën ëthinö ka dhakö na cwörë öwëkö pol na löö ëthinö ka dhakö na tye kî cwörë." **28** Utmegona, un ibedo ëthinö më cîkërë k'Obanga, na calö I'ca. **29** I karë nön, athiñ n'ënywölö i kite më kom obedo yelo athiñ n'ënywölö pî tækö ka Tipo k'Obanga, ëka röm aröma thon kobedini. **30** Êntö ngö na Cöc na Leng kobo? "Ryëm dhakö n'obedo opii ökö kî wode, piën wode ba bino leeno jami kanya acël kî wod ka dhakö na ba obedo opii." **31** Pî manön, utmegona, onu ba ebodo ëthinö ka dhakö n'obedo opii, ëntö ëthinö ka dhakö na ba obedo opii.

5 Onu dong ebodo jö më kuc piën Kiricito otyeko gönyö onu dong ökö kî i opii. Cung unu na tæk, ëka kür idök unu i opii më cîk dökî. **2** Winy unu köpna, an, Paulo, kobedini akobo bothwu nî: Ka imïö ëliröwu, cë Kiricito bino bedo gin mörö na köny mërë ope bothwu. **3** An anwö köpna dökî both dhanö acëlacël na miö ëlirë nî ên dong tye kî banya më lübö cîk kibëc. **4** Un jö na mitö nî ëkwanwu nî kitemu atir pî lübö cîk, un dong ityeko pokere ökö kenwu kî both Kiricito; inyikö unu ökö kî cecen kî kom kîca k'Obanga. **5** Pî Tipo Naleng, onu etye kî gen na thwönë rwök më nwongo kite n'atir n'ëmïö pî yee. **6** Piën i Kiricito Yecu, lirë onyo bedo abonge lirë ope kî köny mörö. Gin na könyö këkën ênë yee na tio kî mar. **7** Un onwongo itye ka ngwëc na bër. Nga n'öjököwu më lübö köp më adyer? **8** Eka pwony na calö man ba öya kî both Obanga n'ocwodowu. **9** Pwony më twodo ni cal kî thöbî na tidi mörö na yenyo mökö ogati kibëc. **10** An atye kî gen i Rwoth nî thamawu ba bino pokere kî mëga. Ngat na tye ka miöwu dönyö i arubaruba, Obanga bino pwodo kadî bed ên nga. **11** Utmegona, ka an onwongo pod atitö niwu köp më lirë, pîngö dökî pod eketho ayela i koma? Köp na makö yath ariä onwongo ba dökî römö bedo pëkö, ka an atitö nî lirë bër. **12** An onwongo athamö nî ka twërë jö nön na tye ka rubowu kî köp më lirë myero ömëdërë ginî anyim ëka opudhere ginî këñ-gî. **13** Utmegona, un yam ecwodowu më bedo kî kuc. Êntö kür dök ilök unu kuc na mewu obed më cobo miti më kwö më anywölö.

Nakaka timō kōmanōn, myero dhanō acēlacēl ōmīrē mē kōnyō awodhe kī mar. 14 Piēn cīk kibēc ērībōgi ōkō ī kōp acēl kēkēn nī, "Mar awodhi na calō īmarō komi keni." 15 Ēntō ka īkarē unu calō leeni mē thim, cē myero īgwōkērē unu ēk kūr ithum unu ōkō kenwu. 16 Gin na an akobo niwu ene, mīī unu Tipo Naleng ōtēlwu, ēk kūr icob unu mitiwu mē kwō mē anywōlī. 17 Piēn miti mē kwō mē anywōlī pyem kī miti ka Tipo Naleng, ēka miti ka Tipo Naleng pyem kī miti mē kwō mē anywōlī. Gīn arīō nī dagērē gīnī, manōn ēnē gīn na jūkōwu mē timō gīn na un īmītō. 18 Ēntō ka Tipo Naleng ēnē tye ka tēlōwu, un ba itye ī thē cīk. 19 Tic mē miti mē kwō mē anywōlī nen ōkō kanya leng. Gīn ene: tim mē ōlyang, carō, tarwang, 20 wōrō cal jwogi, tic mē jwōjwōk, adagē, dhaa, nyeko, akēmō, larō dito, pyem, apokapoka, 21 woro, mērō, cem mē yom cwiny na rac, kī mōkō nōkēnē na calō manōn gīnī. Pod dōkī acīkōwu na tēk, kite na calō acīkōwu cōn, nī jō na timō koth jami na calō man gīnī, ker k'Obanga ba bino bedo mēgi. 22 Ēntō nyig na nyak pī Tipo Naleng ene: Mar, yom cwiny, kuc, dīō cwiny, kīca, bēr, gen, 23 mwolo, ēka gwōkērē kēn. Cīk mōrō ope na kwērō jami na calō man gīnī. 24 Jō n'obedo gīnī jō ka Kiricito Yecu otyeko gīnī guro miti mē kwō mē anywōlī kī kite mērē kibēc ī kor yath arīa. 25 Tipo Naleng ōmīō onu kwō, cē onu myero ewothu nakun ēlūbō ēn. 26 Onu myero kūr ebed k'awaka, kūr ebed nyuthere rwōk both ewodh onu, ēka kūr ebed kī nyeko ī kin onu.

6 Utmegona, ka cē ēmakō dhanō mōrō timō bal, un jō na Tipo Naleng tēlōwu myero īkōny unu ēn ēk odwog ī yoo n'atīr, nakun īkōnyō unu ēn kī cwiny mē mwolo. Ēntō myero īgwōkērē unu ēk un thon kūr ētēmwu. 2 Ting unu pēkō k'ewodhwu, manōn ēnē bino mīōwu icobo cīk ka Kiricito. 3 Ka dhanō mōrō thamō nī ēn pīrē tēk ēlōō jō nōkēnē, nakun ī adyer nwongo ēn pīrē ba tēk, nwongo ēn bwōlērē kēnē. 4 Dhanō acēlacēl myero ōnēn tic mērē kēnē ka bēr. Manōn mīō tyēn kōp mē wakērē mērē bedo pī tic mērē kikome na ēn otio, na ba dōk poro kī tic ka ngat mōrō nōkēnē, 5 piēn dhanō acēlacēl tye kī yēc mērē na myero oting. 6 Dhanō n'etye ka pwonyo kī kōp ī kom Kiricito myero ōnywak jami kibēc na bēcō na ēn tye kōdē k'apwony mērē. 7 Kūr iwēk ēbwōlwu: Obanga ba etuko kōdē. Gin na dhanō ōcwō ēnē ēn thon bino kaō. 8 Ngat n'ōcwō kodhi mērē ī pwodho mē miti mē kwō mē anywōlī, gīn na ēn bino kaō kī tē ēnē thōō, ēntō ngat n'ōcwō kodhi mērē ī pwodho ka Tipo Naleng, gīn na ēn bino kaō kī tē ēnē kwō na ba thum. (aīōnios g166) 9 Kūr myero onu edher mē timō gīn na bēr, piēn ka karē ōrōmō, onu ebino kaō kac ka

onu ba edhero. 10 Dong pī manōn kite na onu pod etye kī karē, onu myero ētim gīn na bēr both jō kibēc, na lōō kibēc myero onu etī both utmego onu n'oye gīnī Kiricito. 11 Un itwērō nēnō nyukuta na thwon na an atye ka cōōnō kī cīnga kikome. 12 Jō nonu na tye ka tēmō mē dīōwu nī myero īlīrē unu, obedo gīnī jō na mītō nī gīn enen na bēr both jō nōkēnē. Tyēn kōp na mīōgi timō ēnē mē jūkō kūr eketh ayela ī komgi pī yath arīa ka Kiricito. 13 Naka thon jō n'ēlīrōgi ba lūbō gīnī cīk, ēntō gīn mītō nī ēlīrwu ēk ēwakērē gīnī pī līrē mē komwu. 14 Ēntō an ba amītō nī awakara pī gīn mōrō, kono pī yath arīa ka Rwoth onu Yecu Kiricito, kī kubotha lobo kibēc dong eguro ōkō ī kōr yath arīa, ēka an kikoma thon egura ōkō ī kom lobo pī yath arīa. 15 Piēn ka ngat mōrō ēlīrō onyo ba ēlīrō, manōn ba obedo gīn mōrō na pīrē tēk; gīn na pīrē tēk ēnē mē bedo cwec na nyen. 16 Kuc kī kīca obed ī kom jō na lūbō pwony nī, ēka both jō k'Obanga kibēc. 17 Cakērē kobedini cīdhō kōdē anyim, an ba amītō nī ngat mōrō oyela, piēn an atye kī poo na dong eketho ī koma na nyutho nī an abedo opīi ka Yecu. 18 Utmegona mē amara, kīca ka Rwoth onu Yecu Kiricito obed kodwu. Amēn.

Epeco

1 Waraga ni öya ki both Paulo n'obedo akwëna ka Kiricito Yecu pi miti k'Obanga. Both jö k'Obanga na leng na tye i Epeco, na gin ëné jö na genere i kwögí kanya acël ki Kiricito Yecu: **2** An alëgö Obanga Apap onu ëka Rwoth Yecu Kiricito ömiiwu ibed unu ki gum ëka kuc. **3** Eru ëmii pak both Obanga ëka Apap ka Rwoth onu Yecu Kiricito, n'ömiö onu gum kibëc më tipo na tye i polo i Kiricito. **4** Ën öyërö onu cön i Kiricito na pod bara öcakö cweo lobo, ëk onu ebed jö na leng i nyime abonge bal mörö i kom onu. Pi mar mëré, **5** Obanga ki miti mëré këné onwongo dong öyübö cön ni onu myero ebed ëthiñö mëré pi tic na Yecu Kiricito otio. **6** Eru ëmii pak both Obanga pi kica mëré më dheo na dit, na ën ömiö onu nono i Kiricito na ën marö. **7** Pi remo ka Kiricito Yecu, etyeko kökö onu ökö, ëtimö kica i kom bal onu ökö, na lübërë ki lönyö më kica k'Obanga na dit **8** na ën ömiö onu na thwönë i ryëkö mëré kibëc ëka ki niang. **9** Obanga ötimö man i karë na ën otuco müng më miti mëré both onu, nakun lübö yüb mëré na bër na ën onwongo öyübö më cobo i Kiricito. **10** Yüb k'Obanga na ën bino cobo ka karë örömö, ëné më cökö jami kibëc na tye i polo ëka i wi lobo, më i'ibögí ökö kanya acël i Kiricito. **11** Jami kibëc timërë na lübërë ki yüb k'Obanga ëka thama mëré. Obanga öyërö onu më bedo jögé i Kiricito nakun ën onwongo dong öyübö anaka ki i acaki **12** ëk wan, n'onwongo ëcakö bedo ki gen i kom Kiricito, myero ëmii pak ëka dheo both Obanga. **13** Kiricito thon öyëröwu më bedo jö k'Obanga i karë na un iwinyo köp adyer, köp më Emuth na Bër n'okelo niwu larë. Un iye Kiricito, ëka ëné ömiö ëmiöwu Tipo Naleng n'onwongo Obanga öcikö pirë cön ëk obed na calö anyuth mëré n'ëmwonö i komwu, **14** na ëné gin n'ejengo na nyutho ni onu ebino nwongo gin na kibëc n'Obanga öyübërë më miö onu i karë n'Obanga bino kökö jögé—na bino miö jii pakö dheo mëré. **15** Pi tyën köp ni, anaka an awinyo köp i kom yeewu i Rwoth Yecu ëka pi mar na un imarö ki jö k'Obanga na leng, **16** an ba awëkö më miö pwöc both Obanga pirwu, nakun apo pirwu i lëgana. **17** An alëgö ni Obanga ka Rwoth onu Yecu Kiricito, Obanga më dheo, myero ömiiwu Tipo Naleng më ryëkö ëka onyuth niwu Obanga ëk inge unu ën na bër rwök. **18** An thon alëgö ni ömëny thamawu ëk inge unu gen na ën ocwodowu ië, kit lönyö ëka dheo na thwönë na ën miö both jögé na leng ëk obed mëgí. **19** An thon alëgö ni iniang unu kite na tëkö mëré na dit tio ködë i kom onu jö n'oye Yecu. Tëkö ni na tio i kom onu röm

ki tic na dit më twër na ën tye ködë **20** n'ocero Kiricito ki kin jö n'öthöö ëka ömiö ën obedo i nget cingé më kucem i polo. **21** Ën dong tye malö i polo, löö ëlöc kibëc më polo, twërö, tëkö, ëka nyiing kibëc n'ëcakö, pathi i lobo më karë ni këkën ëntö thon i lobo më karë na tye ka bino. (aiön g165) **22** Obanga oketho jami kibëc i thë twër ka Kiricito ëk ölöö, ëka ömiö ën both jö n'oye Kiricito na calö wic nakun löö jami kibëc. **23** Jö n'oye Kiricito obedo gini kom Kiricito, na miö jö n'oye pong na bër, nakun Kiricito thon pong i jami kibëc.

2 i karë n'opoth un onwongo ibedo calö jö n'öthöö pi türö cik ëka balwu. **2** i karë ca onwongo un ilübö yodhi na reco më lobo ni, nakun iwinyo unu köp ka ngat na rac na löö twër mökö na tye malö i yamö, na ëné cwiny na kobedini tye ka tic i cwiny jö na ba mitö winyo köp k'Obanga. (aiön g165) **3** Onu kibëc onwongo ëröm ki jö nön i lübö miti më kwö më anywöli, nakun ecobo miti më kom onu ki gin na onu ëthamö. i kite na yam onu etye ködë, akëmö k'Obanga onwongo myero opodh i kom onu calö jö nökökë kibëc. **4** Ëntö Obanga obedo alönyö i kica mëré, mar na ën ömarö ki onu ködë dit rwök, **5** kadi bed ni onu ëdökö jö n'öthöö ökö pi türö cik mëré, ën ömiö onu kwö kanya acël ki Kiricito—obedo pi kica k'Obanga ëné ömiö ilarë unu. **6** Obanga ocero onu ki i thöö ki Kiricito, ëka ömiö onu kabedo më bedo kanya acël ki Kiricito Yecu i polo. **7** Obanga ötimö jami ni kibëc ëk enyuth i karë kibëc na tye anyim lönyö mëré na thwönë na ba pimere më kica n'onen i mar mëré both onu na Kiricito Yecu timö ni onu. (aiön g165) **8** Piën pi kica mëré ömiö Obanga ölaröwu pi yeewu—ëka man ba ötimërë pi tic mörö na un itimö, manön obedo miic k'Obanga— **9** pathi pi tic na dhanö timö, ëk kür ömii ngat mörö öwakërë. **10** Onu ebedo gin n'Obanga otio, ën ocweo onu i Kiricito Yecu ëk ebed jö na tio tic na bëcö na ën yam öyübö cön ni ëk onu ëtim. **11** Pi manön, po ni un cön onwongo ibedo unu Erok i kite n'enywölöwu ködë ëka Eyuda cwodowu ni "jö na ba ëlirö," nakun gin cwodere këngi ni "jö n'ëliro" (na cing dhanö ëné ötimö i komgi)— **12** po unu ni i karë nön un onwongo ipokere ökö ki both Kiricito. Un onwongo ëkööwu ökö ki i kom jö lcarael, ba inywakö unu cikërë k'Obanga ëka ki gin na kibëc na ën öcikö ni ebino timö pi jögé. Ibedo unu i lobo ni abonge gen ëka na ba ingeo unu Obanga. **13** Ëntö kobedini i Kiricito Yecu un n'onwongo itye unu na bor k'Obanga, ekelowu dong ökö na cwök pi remo ka Kiricito. **14** Ën kikome okelo kuc i kin jö arö, ömiöwa kodwu dong etye acël, ëka ën ötürö cël më

gero n'opoko onu. **15** Pí kelo kuc, ên ôjwaô cík ka Muca ôkô kí cík mërê kibêc. Ên ôtîmô man êk eketh jô arîô obed rok acêl na nyen n'ôribêrê kanya acêl i ên. **16** Pí thôô mërê i kor yath arîa, Kiricito odwongo jô arîô both Obanga i kom acêl, ômiô adagê ojik ôkô. **17** Kiricito obino ôtîtô kôp mê kuc bothwu un jô n'onwongo itye unu na bor kí both Obanga êka both jô n'onwongo tye na cwôk. **18** Pí Kiricito onu kibêc etyeko yabô ní onu yoo mê thuno both Apap kí Tipo Naleng acêl. **19** Kobedini dong un ba ibedo erok onyo wele, êntô un ibedo jô mê pacô acêl kí jô k'Obanga na leng êka ibedo unu jô mê ôdê. **20** Un dong ícal kí gedo n'êgêrô, n'acaki thêrê obedo êkwêna êka edwarpîny, kí Kiricito Yecu kikome na calô kidi mê gwîc. **21** Gedo ni kibêc okubere kanya acêl i Kiricito êka tye ka dôngô mê bedo ôt k'Obanga na leng pí Rwoth. **22** Kiricito thon tye ka gêrôwu kanya acêl i kome, êk ibed unu kanya Tipo k'Obanga bedo iê.

3 Pí kôp ni, an Paulo na an abedo amabuc ka Kiricito Yecu pîrwu, un Erok— **2** Adyer iwinyo unu kite n'Obanga ômîa mê tio tic mê kîca mërê pîrwu, **3** dôk thon kite na ên onyutho nîna mûng mërê, na calô atyeko côônô pîrê na cecek. **4** Ka íkwanô unu ngô na an acôô, cê un ibino nîang na bër kite na an anîang kí mûng i kom Kiricito kôdê. **5** Í karê n'opoth anged, Obanga ba onyutho mûng ni both dhanô, êntô kobedini pí Tipo Naleng Obanga onyutho both êkwêna mërê na leng êka edwarpîny. **6** Mûng ni ênê ní pí kôp mê Emuth na Bër, Erok ôdôkô gîní dong jô na leo lônýô k'Obanga kanya acêl k'Eyuda, ôdôkô gîní dul kom acêl kôdgî, êka gîn thon nywakô cîkêrê n'Obanga ôcîkêrê kôdê i Kiricito Yecu. **7** An adôkô atic mê kôp mê Emuth na Bër ni pí mîc mê kîca k'Obanga n'êmîa pí tic mê têkô mërê. **8** Kadî bed ní an pîra ba têk rwôk kí kin jô k'Obanga na leng kibêc, kîca ni onwongo êmîa mê tîtô kôp mê Emuth na Bër both Erok pí lônýô na Kiricito miô na ba êrômô pîmo, **9** êka mê miô jô kibêc ngeo yûb mê mûng k'Obanga, n'onwongo Obanga n'ocweo jami kibêc ôkanô pí karê n'opoth anged. (aîôn g165) **10** Miti k'Obanga i kôp ni kibêc onwongo mitô tic kí jô n'oye Kiricito mê miô êlôc êka wegî twêr kibêc na tye i polo ngeo ryêkô k'Obanga na kothe papath. **11** Obanga ôtîmô man na lûbêrê kí yûb mërê na ba thum na ên ômiô ocobere i Kiricito Yecu Rwoth onu. (aîôn g165) **12** Pí Kiricito kobedini dong ên ômiô onu diô cwiny êka têk cwiny piên onu dong êtwêrô bino both Obanga pí yee. **13** Pí manôn an alêgô ní kûr ídwôk unu cwinywu cen ní piên an atye ka lîmô can pîrwu, man kibêc obedo mê miôwu dheo. **14** Pí tyên kôp ni an arumo cónga i

nyim Apap, **15** na ênê Acwec mê jami kibêc na tye i polo êka i lobo. **16** An alêgô both Obanga êk kí i lônýô mërê mê dheo ômiôwu twêr ibed unu na têk i cwinywu pí Tipo mërê, **17** êk Kiricito obed i iwu piên iyee unu ên. An alêgô ní Obanga ômiô icung unu na têk i mar. **18** Ibed unu kí têkô mê nîang kanya acêl kí jô k'Obanga na leng kibêc, kite na mar ka Kiricito pí onu lac kôdê, bor kôdê, ôdôngô kôdê malô, êka kite na thuth kôdê. **19** An amîtô ní inge unu mar ka Kiricito na lôô nged kibêc—êka ipong unu i gin mórô kibêc n'opong i Obanga. **20** Dheo kibêc obed both Obanga, na ênê twêrô tio tic na thwônê rwôk, na lôô gin na onu êtwêrô kwaô pîrê onyo ketho thama onu iê, pí têkô mërê na tye ka tic i kom onu. **21** Dheo obed both Obanga naka naka i Kiricito Yecu êka kí jô n'oye Kiricito mê wang rok kibêc! Amên. (aîôn g165)

4 Pí manôn an na calô amabuc pí Rwoth, an akwaôwu ní ilûb unu kit kwô n'opore na rwatêrê kí cwodo na yam ecwodowu iê. **2** Bed unu kí wôrô êka kí mwolo i kom jô nôkênê; êka ibed unu jô na dangô gin na kibêc na balô cwiny dhanô, nakun ngat acêlacêl diô cwinye i kom awodhe kí mar. **3** Tîm unu têk mê gwôkô rîbêrê na Tipo Naleng ômiôwu êk ibed unu i kuc na tweowu kanya acêl. **4** Kom tye acêl êka Tipo k'Obanga tye acêl—kite na gen thon tye acêl n'Obanga ocwodowu iê— **5** Rwoth tye acêl, yee tye acêl, batica tye acêl, **6** Obanga tye acêl êka Apap ka jô kibêc. Ên lôô jami kibêc, tio i jami kibêc, êka tye i jami kibêc. **7** Êntô ngat acêlacêl i kin onu onwongo mîc mê kîca, n'opore kí mîc na Kiricito ômiô bothe. **8** Manôn ênê ômiô Cóc na Leng kobo ní: “Í karê na ên ôidhô kôdê malô, ên otero opii na pol êka ômiô mîc gîní both jîi.” **9** (Tyên kôp ní “ôidhô malô” gônýô nîngô? Gônýô ní ên thon obino pîny i lobo. **10** Ngat n'obino pîny ên acêl nôn ênê ôidhô malô kanya bor i nge polo kibêc, êk epong jami kibêc.) **11** Mîc na Kiricito ômiô gin ene: ômiô jô môkô mê bedo êkwêna, môkô mê bedo edwarpîny, môkô mê bedo jô na tîtô kôp k'Obanga, jô môkô mê bedo êkwath êka epwonye. **12** Ticgî obedo mê yûbô jô k'Obanga na leng i ticgî mê kônýô jîi êka mê gêrô jô n'oye Kiricito, **13** naka ka onu kibêc êdôkô acêl i yee onu êka i ngeo Wod k'Obanga, naka ka onu êdôkô jô n'otengo, nwongo êdôngô na rôm kí Kiricito, êka onu ebino bedo calô ên. **14** Cê miô onu ba dôkî ebeto calô êthînô, na pii na tataga tatago yeegî, jô na wêkô yamô mê pwony na papath lôkôgî, ryêkô ka jô êka yûbgî mê twodo na ba dôkî miôgî cacapa. **15** Nakaka manôn, onu myero êtwak kôp atîr kí mar, onu myero êdông i yodhi kibêc êka ebeto calô Kiricito, na ênê

obedo awi jö n'oye Kiricito. 16 Ënë obedo wic, dul kom kibëc rîbêrë gîni i kome ëka kubere gîni kanya acël i wang romo kibëc na tye ië. Cë ka dul acëlacël tye ka tio tic mërë kakarë, miö kom döngö na bër ki mar. 17 An akobo niwu ki twër na Rwoth ömia ni kür myero dökî imëdêrë unu më bedo ki koth kwö na jö na ba ngeo Obanga bedo ködë, i thamagi na kõny mërë ope. 18 Thamagi önyöbêrë dong ökö, ba dökî twërö niang gîni. Gîn opokere ökö ki kom kwö n'Obanga miö pi kwia piny n'obino nigî pi cwinigi n'öðökö na nwang. 19 Gîn ba dökî parö gin mörö, gin ömirë kën-gi i tim më tarwang ëka thon owor gîni rwök më timö koth tim mökö na ba bër. 20 Ëntö man ba obedo kite n'onwongo epwonyowu ködë ki köp i kom Kiricito. 21 Adyer iwinyo unu köp i kome ëka na calö ëlûbkörë epwonyowu ki köp adyer na tye i Yecu. 22 Koth kwöwu na cön na yam ikwö unu ködë, myero iwëk unu dong ökö. Koth kwö nön öbal dong ökö pi miti na reco n'öbwölöwu. 23 Wëk unu Obanga dong ölöc thamawu më cwiny obed na nyen, 24 ëka iruk unu kom na nyen, n'ecweo më bedo calö Obanga i adyer më kite atir ëka na leng. 25 Pi manön ngat acëlacël myero öwëk köp më twodo ëka ötwak köp atir both awodhe, piën onu kibëc ebodo jö më dul kom acël. 26 "Ka akëmö ömaköwu, kür ipodh unu i bal." Kür imiï unu ceng ödöny nakun akëmö pod ömaköwu, 27 ëka kür imiï unu karë both Catan. 28 Ngat n'obedo ka kwalö jami ka jii myero öwëk kwo ökö ëka öcak tio tic më timö gin mörö na bër ki cingë, ëk onwong gin mörö më kõnyö ki jö nököne na mitö kõny. 29 Kür imiï unu köp na rac odonyi ki i dhöwu, ëntö twak unu köp na bëcö këken na kõnyö më döngö jö nököne na lûbêrë ki gin na mitêrë, ëk jö na winyo köpwu onwong kõny ki ië. 30 Kür imiï unu Tipo Naleng k'Obanga okum, n'ëmiöwu ëk obed calö anën mërë n'ëmwönö i komwu pi kürö ninö më kököwu. 31 Wëk unu dong bedo ki këc cwiny, wang ic, akëmö, dha i wi jö nököne, ayeny, ëka rac cwiny kibëc. 32 Nakaka manön, bed unu jö na timö kica both ngat acëlacël ki cwiny na bër, tim unu kica i kinwu kenwu kite n'Obanga ötimö niwu kica i Kiricito.

5 Lûb unu kite k'Obanga, piën onu ebodo ëthinö na ën marö. 2 Bed unu nakun ilûbö unu yoo më mar, na calö Kiricito ömarö onu, cë ömirë këne pi onu na calö tyër n'ëwangö na ngewece kur both Obanga. 3 Dong pi manön tim më ölyang, onyo tim mökö më carö carö, onyo woro më lim myero kür ekob i kinwu, piën man ënë tim na ba opore pi jö k'Obanga na leng. 4 Ba bër niwu më twakö köp mökö më lewic, twak mökö më mingo onyo twakö köp më arath, kür

myero thon owinyere bothwu, ëntö thwara imiï unu pwöc both Obanga. 5 Un iniang na bër ni ngat mörö ope i kin jö n'obedo jö ölyang, jö na timö tim më carö carö, onyo jö n'owor i kom jami—koth dhanö ni obedo awör cal jwogi—na ba bino nwongo dul mörö më bedo mëgë i ker ka Kiricito ëka më k'Obanga. 6 Kür iye unu ngat mörö öbwölwu ki köp mökö na thërë ope, piën akëmö k'Obanga bino i kom jö na ba winyo köp mërë pi timgi nonu. 7 Pi manön kür iribêrë unu ködgi. 8 Un onwongo cön itye unu i piny na cöl, ëntö kobedini unu dong itye unu i piny na tar i Rwoth. Bed unu calö ëthinö më tar 9 (piën nyig n'önyak pi tar nen ökö i gin na kibëc na tye na bër, na kite atir ëka adyer) 10 ëka itëm unu më pwonyo ngö na yomo cwiny Rwoth. 11 Kür iribêrë unu i tic mörö kibëc më piny na cöl na ba kõnyö, ëntö thwara ituc unu tic nonu ökö kanyalër. 12 Piën obedo më lewic thon më twak i kom jami na jö na ba winyo köp timö gîni i müng. 13 Gin mörö na tar onyutho nen ökö kanya leng, 14 piën tar ënë miö jami kibëc nen. Man ënë ömiö ekobo ni: "Coo ökö, in ngat ininö, cer ökö ki i kin jö n'öthö, cë Kiricito bino mënyöni." 15 Gwökêrë unu, i kite na un i kwö ködë—kür ibed unu calö jö na kwia piny, ëntö bed unu calö jö na ryëk. 16 Tii unu ki caa n'onen na bër, piën man ënë karë më tim na rac. 17 Pi manön kür ibed unu jö na mîng, ëntö tëm unu më niang i kom gin na Rwoth mitö ni un itim. 18 Kür imër unu ki kõngö ölöc na kelo tim më carö carö. Nakaka manön, wëk unu Tipo Naleng opong i cwinywu, 19 nakun itwak unu i kinwu këkenwu ki köp më jabuli, wer ëka ki wer më cwiny. Wer unu wer më pakö Rwoth i cwinywu. 20 Miï unu pwöc both Obanga Apap i karë kibëc pi jami kibëc i nying Rwoth onu Yecu Kiricito. 21 Mirë unu këkenwu i thë löc ka jö nököne, ngat man both awodhe, pi wörö Kiricito. 22 Un mon, mirë unu kenwu i thë löc ka cwöwu, na calö imirë unu kenwu both Rwoth. 23 Piën ëcwö ënë obedo awi dhakö kite na Kiricito obedo awi jö n'oye ën, na gîn ënë kome, ëka Kiricito obedo alar ka jö n'oye ën. 24 Kite na jö n'oye Kiricito mirë gîni i thë löc ka Kiricito, mon thon myero ömirë gîni i thë löc ka cwögi i jami kibëc. 25 Un cwö, mar unu monwu kite na Kiricito ömarö ki jö n'oye ën ëka ömiö kwö mërë pîrgi, 26 ëk ëlöngi obed na leng, kinge na dong ölwökögi ki pii ëka ki köp, 27 ëk ekel jö n'oye ën i nyime na calö nyakö n'ëyübö më anyöma, na poo mörö ope i kome onyo na terinyime öjüjunga onyo gin mörö nököne na rac, ëntö obed na leng na bal mörö ope i kome. 28 I yoo acël nön, cwö myero ömar mon-gi kite na gîn marö ki komgi kën-gi. Ngat na marö dhakö mërë nwongo marö kome këne. 29

Ngat mörö ope na dag kome kënë, ëntö pïdhö kï cem ëka gwökö, kite na Kiricito thon gwökö ëka pïdhö kï jö n'oye ën, 30 pïën onu ebodo dul kom Kiricito. 31 Kite n'ëcö ködë i Cöc na Leng nï: "Pï tyën köp ni ëcwö bino wëkö apap mërë ëka aya mërë, cë rïbërë kï dhakö mërë, ëka jö arïö bino dökö kom acël." 32 Man obodo müng na dit—ëntö an atye ka twak i kom Kiricito ëka kï jö n'oye ën. 33 Pï manön, ëcwö acëlacël i kinwu myero thon ömar dhakö mërë kite na ën marö kï kome kënë ëka dhakö myero öwör cwörë.

6 Un ëthïnö, winy unu enyodowu i Rwoth, pïën manön ënë bër. 2 Cöc na Leng kobo nï, "Wör apapni ëka ayani," man ënë cïk më acël n'ëcïkö pï gin mörö na bër na bino yaa kï tÿ— 3 "ëk ibed unu na bër ëka ibed unu i lobo pï karë na lac." 4 Un jö kabebe, kür iter unu ëthïnowu i yoo na rac na mïö akëmö makögi, ëntö mïi unugi ödöng na bër nakun ipwonyo unugi ëka inyutho unu nïgi kite na bëcö na Rwoth pwöyö. 5 Un opii, winy unu editewu më lobo kï cwiny acël, na calö iwinyo unu Kiricito, nakun ilworo unugi kï myël kom. 6 Ticwu myero kür obed tic n'ënönö kï wang këkën më yomo cwiny dhanö, ëntö tii unu gin n'Obanga mïtö kï cwinywu kibëc, na calö opii ka Kiricito. 7 Tii unu ticwu kï cwiny na bër, na calö itio unu pï Rwoth, ëka pathi pï dhanö, 8 pïën un ingeo nï Rwoth bino cülö ngat mörö këkën, kadï obodo opii onyo ngat mörö na löörë kënë pï gin mörö këkën na bër na ën otio. 9 Wegi opii, ter unu opiwu i yoo acël nön. Kür ibür unugi, kite na un ingeo nï adit na löögï ëka kï un tye i polo, na ën makö jö kibëc na röm aröma. 10 Më ajiki, bed unu na tük i Rwoth ëka i twërö më tükö mërë. 11 Ruk unu jami më lwëny n'Obanga mïö, ëk icung unu na tük, nakun i'gëngërë unu kï kom ökörä ka Catan. 12 Pïën onu ba ëlwënyö kï dhanö adhana, ëntö ëlwënyö k'ëlöc ëka wegï twër më yökö, na löö wi lobo thükül i karë ni më cöl piny ëka kï tipo mökö na reco na tye malö i wi yamö. (aion g165) 13 Pï manön, myero iruk unu jami lwëny n'örömö n'Obanga mïö, ëk ökönywu më cung na tük ka nïnö na rac othuno, ëka kinge lwëny naka i ajiki, un pod ibino cung unu na tük. 14 Pï manön myero icung unu nakun itweo unu wang pyërwu kï del më köp atir, ruk unu kite atir obed nywenyo më gwökö korwu, 15 ëka i'yübërë unu më tütö köp më Emuth na Bër më kuc na calö wör më tyënwu. 16 Mëd i kom jami ni kibëc, yeewu myero obed kwotwu na un i'twërö neko mac kï i kom athërö na Catan yuo. 17 Ruk unu larë obed tok nywenyo më wiwu, ëka köp k'Obanga na ënë pala abadë ka Tipo Naleng. 18 Lëg unu lëga kibëc na papath kï tükö ka Tipo Naleng i karë kibëc. Bed

nï yübërë unu i karë kibëc nakun idangö unu pëkö, ëka ilëgö unu pï jö k'Obanga na leng kibëc. 19 Lëg unu thon pira ëk Obanga öyab dhöga, ömia ngö na myero atwakï, ëk atuc müng më köp më Emuth na Bër. 20 An abedo akwëna mërë na röm kï ngat mörö na cung pï lobo mërë, ëntö etwea ökö kï nyör. Lëg unu ëk atwak abonge lworo i kom köp më Emuth na Bër kite na an myero atwak ködë. 21 Ömïn onu Tukiko omego më amara ëka atic na genere i Rwoth, bino kobo niwu köp kibëc i koma ëka i kom ticna, ëk un thon inge. 22 An atye ka oro ën yo bothwu pï tyën köp ni, ëk ën ömïiwu inge kite na wan etye ködë ëka ödïi cwinywu. 23 An alëgö nï Obanga Apap ëka Rwoth Yecu Kiricito bino mïö kuc, mar ëka yee both utmegö kibëc. 24 Kica k'Obanga obed both jö kibëc na marö Rwoth onu Yecu Kiricito kï mar na ba thum.

Pilipi

1 Waraga ni öya kî both Paulo gîn kî Timoteo, n'obedo gîni etic ka Kiricito Yecu. Both jö k'Obanga na leng kibêc na tye i Kiricito Yecu na bedo gîni i Pilipi, kanya acêl k'etêla êka êköny tic ka jö n'oye Kiricito: **2** Obanga Apap onu êka Rwoth Yecu Kiricito ômiîwu gum êka kuc. **3** An apwöyô Obangana i karê kibêc na an apo pîrwu. **4** I lëgana kibêc, an alëgö pîrwu kibêc kî yom cwiny **5** piên cakêrê i ninö më acêl më thuno kôdê naka tin, un i rîbêrê kôda i tic më titö köp më Emuth na Bêr. **6** An angeo na bër ni Obanga n'ôcakö tic ni i kinwu bino mëdêrê kî tic mërê naka ka othum i ninö na Kiricito Yecu bino dwogo. **7** Opo nîna më parö pîrwu kibêc kômanôn, piên pîrwu tæk rwök botha; piên un kibêc i rîbêrê unu kôda kanya acêl më nywakö kîca n'Obanga ômiâ i buc kany, êka dôkî i karê na an atwakö köp na bër më moko köp më Emuth na Bêr më cung na tæk. **8** Obanga ênê obedo caden-na na ngeo ni par na thuth na an abedo kôdê pîrwu yaa kî mar ka Kiricito Yecu kikome. **9** An alëgö ni marwu myero ômedêrê amêda na thwönê i ngec êka kî niang na thuth, **10** êk ômiî i yêr unu gin na bër. Cê un ibino bedo na cwinywu leng abonge bal mörö naka i ninö na Kiricito bino dwogo, **11** êka thon bino miö ticwu kibêc na bêcö më kite n'atîr nya i komwu pî Yecu Kiricito—nakun miö dheo kî pak both Obanga. **12** Utmegona, an amîtö inge unu ni gin n'ötîmêrê i koma êkönyö rwök më miö köp më Emuth na Bêr nya. **13** Acikari gîni më pacö k'adit êka jö kibêc na tye kany, ngeo gîni ni an etwea piên an abedo alübkör Kiricito. **14** Bedona i buc ôcükö cwiny utmego na pol na tye i Rwoth më titö köp k'Obanga kî tæk cwiny abonge lworo. **15** Adyer jö mökö titö köp i kom Kiricito kî cwiny më nyeko êka dhaa, êntö jö nôkênê titö gîni kî cwiny na bër. **16** Jö na titö kî cwiny na bër titö gîni pî mar, nakun ngeo gîni ni Obanga oketha kany më cung na tæk pî köp më Emuth na Bêr. **17** Jö nôkênê ca titö gîni nying Kiricito pî larö dito nakun cwinygî nwongo ba bër, thamagi tye më mëdö can nîna i buc kany. **18** Köp mörö ope, piên i yodhi kibêc, kadî i köp më twodo onyo i köp adyer, gîn tye ka titö pî Kiricito êka an abino mëdara më bedo kî yom cwiny. Eyo, an abino mëdara më bedo kî yom cwiny, **19** piên an angeo ni pî lëgawu êka kî köny n'öya kî both Tipo ka Yecu Kiricito, bino miöna donyo yökö kî i can. **20** Mitina êka gen-na rwök tye ni an lewic ba bino maköna i gin mörö, êntö an athamö më miö dheo both Kiricito i koma kî tæk cwiny na thwönê rwök, i karê ni na calö karê kibêc, kadî akwö onyo

athöö ökö. **21** Piên kî kubotha, kwö ênê bedo na kwö pî Kiricito, êka ka athöö, abino nwongo magoba rwök. **22** Ka an myero akwö i kom, manôn bino miö an atio tic mökö na könyö êntö an ba angeo gin na myero ayêr. **23** Yêrö acêl kî kom jami ariö ni ocungo wia ökö: Mitina tye ni kono athöö ökö êk abed kanya acêl kî Kiricito, piên manôn ênê bër na löö kibêc, **24** êntö pîrê tæk rwök pîrwu ni abed na kwö. **25** An dong ayee i köp ni, an angeo ni pod abino bedo êka an abino mëdara më bedo kodwu pî döngö êka ibed unu kî yom cwiny i yeewu. **26** Manôn bino miö wakêrêwu pîra i Kiricito Yecu bedo na thwönê rwök, ka an dôkî adwogo bothwu. **27** Gin na pîrê tæk rwök ênê ni kite më kwöwu myero örwatêrê kî gin na köp më Emuth na Bêr i kom Kiricito mitö, êk kadî an abino më nënöwu, onyo kadî an atye na bor kodwu, ka an awinyo köp i komwu, myero an ange ni icung unu na tæk i cwiny acêl kî thama acêl nakun i lwényö unu kanya acêl pî yee n'obino pî köp më Emuth na Bêr. **28** Kür i miî jö na pyem kodwu ômiîwu lworo i kom gin mörö. Man ênê anyuth na címö bothgi ni gin bino rwenyo ökö na twal, êntö anyuth ni nyutho bothwu ni ebino laröwu—êka manôn obedo gin na yaa kî both Obanga. **29** Piên ên ômiöwu gum më tic pî Kiricito, pathî gum më yee i kome kékên, êntö më limö can pîrê thon. **30** Onu etye ka limö can kanya acêl. Un i nënê limö can-na i karê n'opoth êka un ingeo ni an pod atye ka limö can.

2 Pî manôn, ka un inwongo tæk cwiny mörö pî bedo i Kiricito, onyo mar k'Obanga na cükö cwiny onu, onyo ka êmiöwu rîbêrê kanya acêl më Tipo Naleng, onyo cwiny më kîca êka cwiny më timö gin na bër both jö nôkênê, **2** cê i miî unu yom cwiny ocobere na bër ni kôman, bed unu kî thama acêl êka mar acêl nakun i rîbêrê unu kanya acêl i cwinywu êka thamawu thon obed acêl. **3** Kür i tim unu gin mörö pî larö dito onyo më awaka kékên, êntö bed unu kî mwolo, nakun ngat acêlacêl wörö awodhe na calö ngat na dit na löö ên ökö. **4** Kür i tham pî gin na konyi kékên êntö tham pî gin na könyö jö nôkênê thon. **5** Bed unu kî thama na bër i kom ewodhwa na röm kî thama na yam Kiricito Yecu tye kôdê: **6** Kadî i cal mërê, Kiricito adyer onwongo obedo Obanga, ên ba ocere më moko bedo na röm k'Obanga, **7** êntö ên öwêkö rwöm më dit mërê kibêc, cê ökwanyö kite më opii, êka ênywölö ên na calö dhanö. **8** I karê na ên obedo dhanö, ên omwolere êka obedo kî winy i kom Obanga naka i thöö—naka thon më thöö i kor yath ariä! **9** Pî manôn Obanga oketho ên malö i kabedo më wörö êka ômiö ên nying na tye malö na löö nying

kibéc, 10 ék gin na kibéc na tye i polo éka lobo, naka gin na tye piny i thé lobo, orum công-gĩ piny mé wörö nyĩng Yecu, 11 éka lëb kibéc otuc nĩ Yecu Kiricito ên Rwoth, nakun êmiö dheo both Obanga Apap. 12 Pĩ manön, utmegona më amara, na calö ibedo unu kĩ winy i kōpna i karë kibéc n'onwongo an pod atye bothwu, myero dong ibed unu kĩ winy na löö kobedini na an dong atye na bor kodwu—médërë unu më tio tic më cobo larëwu kĩ lworö éka kĩ myël kom, 13 piën Obanga ênë tye ka tic i cwinywu, nakun miöwu miti éka tēkö më tic, êk itim unu jami na yomo cwiny Obanga. 14 Tii unu tic kibéc abonge ngüngüta onyo pyem, 15 ék ibed unu abonge gin mörö na rac éka ibed unu na leng, êthiñö k'Obanga na bal mörö ope i komgi. Cë na calö ikwö unu i kin rok n'ogom n'öbal gĩni ökö, myero ibed unu calö cër na ryëny gĩni i wi lobo. 16 Mak unu dong köp më kwö na tēk—ék i ninö na Kiricito bino dwogo, an atwërö wakara nĩ an ba angwécö ngwéc më nono onyo atio tic më nono. 17 Êntö an abino bedo kĩ yom cwiny kadĩ bed nĩ ëöny remona ék obed calö gin n'ëönyo i keno tyër, nakun yeewu éka ticwu bothe bedo calö mĩc n'ëtyërö both Obanga, an cwinya yom, éka an thon anywakö yom cwinya kodwu. 18 Cë un thon myero ibed unu kĩ yom cwiny éka inywak unu yom cwinywu köda. 19 An atye kĩ gen i kom Rwoth Yecu më oro Timoteo yobothwu piöpiö, êk ka an awinyo kite na un itye ködë öcük cwinya. 20 An ba atye kĩ ngat mörö nököñë döki na calö ên, na twërö parö pĩrwu adyer. 21 Jö nököñë kibéc parö gĩni pĩ gin na kōnyögi kēkēn, ba thamö gĩni pĩ gin na makö köp i kom Yecu Kiricito. 22 Êntö un ingeo kite ka Timoteo éka kōny mērë na ên onyutho. Ên kĩ an etye na calö wod éka apap mērë, ên otio kanya acël köda i titö köp më Emuth na Bër. 23 Pĩ manön, an atye kĩ gen më oro ên yo bothwu piöpiö, ka an anëñö kite na piny tye ka woth ködë kĩ kubothona kany. 24 An atye kĩ gen i Rwoth nĩ an kikoma abino nëñöwu na cwöcwök. 25 An athamö thon nĩ myero aor Epaprodito yo bothwu, ömëra na an atio ködë kanya acël éka acikari, na ên thon obedo aor na un ioro yo botha më kōnyöna. 26 Adyer ên parö pĩrwu nakun mitö nĩ êñëwu, éka thon cwinye opodho, piën ibino iwinyo unu nĩ ên onwongo two. 27 Adyer ên onwongo two rwök n'öbwöth thöö ökö. Êntö Obanga onwongo tye kĩ kica i kome, éka pathi i kome kēkēn êntö i koma thon, êk kür ömëd nina cwer cwiny i kom cwer cwiny. 28 Manön ênë gin n'ömiö an amitö rwök nĩ myero aor ên yo bothwu êk ibed unu kĩ yom cwiny ka inëñö unu ên döki éka an thon kür abed kĩ cwer cwiny na thwönë rwök. 29 Jöl unu ên i Rwoth kĩ yom cwiny na dit, éka iwör unu jö na cal ködë, 30 piën

ên öbwöth thöö pĩ tic ka Kiricito, öjalö kwö mērë êk ecob gin n'orem i kom kōny n'onwongo un ba itwërö miöna.

3 Më ajiki mērë, utmegona, bed unu kĩ yom cwiny i Rwoth! An ba adhero më nwönö cöönö köp n'onwongo acöö cön bothwu, piën köp nön bino gwököwu. 2 Gwökërë unu kĩ kom jö na reco na cal gĩni kĩ gwongi, na cere gĩni më ngölö dul kom dhanö. 3 Piën onu ênë jö n'ölirë adyer. Onu jö n'ëwörö Obanga kĩ Tipo Naleng. Onu eketho dheo i kom Kiricito Yecu nakun onu ba eketho gen i kom gin na onu ëtimö na calö dhanö. 4 Êntö an kikoma thon atwërö bedo kĩ gen na calö manön. Ka ngat nököñë thamö nĩ ên etye kĩ tyën köp më ketho gen i kom gin na onu ëtimö na calö dhanö, an atye ködë na löö: 5 An ëlira i ninö më aboro më ditna, éka rokna obedo jö Icarael më kaka ka Benjamin. Adyer an abedo dhanö më lburu na jö lburu ênë önywöla. I köp na makö Cík ka Muca, an abedo Aparicayo. 6 Köp na makö ketho cwiny, an alwënyö i kom jö n'oye Kiricito. Köp na makö kite atir na cung i lübö Cík, köp mörö na rac onwongo ope i koma. 7 Êntö jami kibéc n'onwongo cön an athamö nĩ kōnyä, kobedini dong an anëñögi na calö jami na kōnygi ope pĩ gin na Kiricito ötimö. 8 Adyer, tye gin mörö na bër na löö, ênë më ngeo Rwothna Kiricito Yecu. Manön ênë gin n'ömiö an anëñö jami kibéc na calö gin na kōnygi ope. Pĩ Kiricito ömiö an adökö acan jami kibéc, éka an anëñögi na calö yugi, êk anwong Kiricito 9 ék an aríbara ködë kanya acël. An ba atye kĩ kite atir n'obedo mëga na lübërë kĩ lübö Cík. An dong atye kĩ kite atir n'ëmiö pĩ yee i kom Kiricito—kite atir na yaa kĩ both Obanga éka ocung i kom yee. 10 An amitö nĩ ange Kiricito kĩ tēkö na ên ocer ködë. An amitö thon nywakö ködë can na ên ödangö, êk abed na calö ên i thöö mērë, 11 ék ka twërë athun naka i cer kĩ i kin jö n'öthö. 12 An ba atye ka kobo nĩ atyeko dong timö jami nĩ kibéc, onyo nĩ atyeko dong bedo na bër, êntö pod atye ka mëdara më cidhö anyim nakun an atëmö më makö pira kēna gin na Kiricito Yecu ömaka pirë. 13 Utmegona, an ba athamö nĩ atyeko dong makö. Êntö tye gin mörö acël na an amarö timö: Wia wil ökö i kom gin n'opoth angec, nakun alarö gin na tye anyim calö dhanö na tye ka ngwéc. 14 An angwécö më thuno naka i ajiki më ngwéc, êk anwong mĩc na ênë cwodo n'Obanga tye ka cwodona ködë i kwö na malö i Kiricito Yecu. 15 Onu jö kibéc n'etengo myero ebed kĩ koth thama nön. Êntö ka thamawu opokere ökö i köp mörö, Obanga thon bino nyutho bothwu yoo n'atir. 16 Gin na mitërë kēkēn ênë nĩ onu myero

ëmëdërë më cung na tək i yoo na dong onu ethuno ië. 17 Utmegona, rībērë unu kanya acël nakun ilübō unu kitenā. Wan dong etyeko nyutho bothwu apor na myero ilüb unu, ëka myero inën unu na bër jō na lübō apor nōn. 18 An abedo ka kobo niwu wang na pol ëka kobedini an akobo dōkī kī pii wanga nī tye jō na pol na kwōgī ōmīōgī ōdōkō lang më yath ariā ka Kiricito. 19 İ ajiki mērë, jō nōn ebino tyekogī ōkō na twal, piën iği ënë obedo obangagī. Gīn nwongo dheogī kī kom gin na myero ōmīōgī lewic. Thamagī kemo jami më lobo ni kēkēn. 20 Ēntō pacō onu tye i polo. Onu etye ka kürō Alar na tye ka bino kī kunōn, Rwoth onu Yecu Kiricito. 21 Ēn bino lōkō kom onu na görü ëka mīō dōkō calō kome më dheo. Ēn tio kī tēkō mērë na mīō ěn twēr më kelo jami kībēc i thē lōc mērë.

4 Pī manōn, utmegona, na an amarō ëka aparō pīrwu rwōk, cung unu na tək i Rwoth kōmanōn, nyikoneina më amara, un ěnë ibedo yom cwinya ëka tok më dheo na an anwongo pī ticna. 2 An akwaōwu in Euodia ëka Cintuke, më tyeko kōp i kinwu piën un ibedo jō ka Rwoth. 3 An akwai in atic awodha më adyer, kōny mon ni, piën gīn thon otio rwōk më titō kōp më Emuth na Bër kōda, kanya acël kī Kelemento ëka k'etic ewodha kībēc, na nyīng-gī dong etyeko cōōnō ōkō i buk më kwō. 4 Bed unu kī yom cwiny i Rwoth i karē kībēc, ëka an anwō dōkī nī: Bed unu kī yom cwiny! 5 Mīi unu jō kībēc onge mwolo na un itye kōdē. Rwoth dong cwōk. 6 Kür ibed unu kī par i kom gin mōrō, ěntō i kōp kībēc mīi unu Obanga onge gin na un imītō i lēga ëka kī bakō dhōwu kanya acël kī mīō pwōc thon. 7 Ēka kuc k'Obanga, na lōō ngec ka jō kībēc, bino gwōkō cwinywu ëka thamawu i Kiricito Yecu. 8 Më ajiki, utmegona, gin mōrō kēkēn na tye adyer, gin mōrō kēkēn na rōmō awōra, gin mōrō kēkēn na tye atīr, gin mōrō kēkēn na tye na leng, gin mōrō kēkēn na më amara, gin mōrō kēkēn na dhanō pwōyō, gin mōrō tye na bër na lōō onyo gin mōrō na myero apaka, tham unu i kom gin ni gīnī. 9 Keth unu i tic gin na yam ipwonyo unu onyo igamō unu onyo iwinyo unu kī botha, onyo inēnō unu ka an atīmō. Cē Obanga më kuc bino bedo kodwu. 10 An atye kī yom cwiny rwōk i Rwoth piën kobedini un dōkī iparō pīra. Adyer, un ibedo ka parō pīra, ěntō un onwongo ba itye kī karē më kōnyōna. 11 An ba atye ka kobo kōp ni piën an atye ka mītō gin mōrō kī bothwu. An dong apwonyara ōkō nī gin mōrō na an atye kōdē rōma. 12 An angeo bedo kī gin mōrō na nōnōk, ëka thon angeo bedo kī gin mōrō na büp. An apwonyara më yeng kī gin mōrō kēkēn na an anwongo i karē mōrō, kadī yengo rwōk, onyo dangō

kec, bedo kī lōnyō na büp onyo bedo kī can. 13 An atwērō tīmō gin na kībēc piën Kiricito ěnë mīa tēkō. 14 Un itīmō bër më rībērë kōda i pēkōna. 15 Un jō Pilipi ingeo unu na bër nī i karē na an ayaa kī i Macedonia i acaki titō kōp më Emuth na Bër, ba tye jō n'oye Kiricito mōrō n'ōrībērë kōda i kōp më mīō ëka gamō mīc, na path kī un kēkēn. 16 Kadī naka i karē na an atye i Tecalonika un ibedo ka oro nīna kōny na an amītō wang na pol. 17 An ba akobo kōp ni piën an atye ka mītō mīc kī bothwu, ěntō an amītō nī inwong unu magoba na bino kī i mīō mīc. 18 An atyeko gamō gin na un imīa kībēc ëka dwong rwōk; an atye kī jami kībēc na an amītō, piën an agamō mīc na un ioro k'Epaprodito. Mīc ni obedo gin na ngwece kur n'ētyērō both Obanga, na ěn pwōyō ëka na yomo cwinye. 19 An alēgō nī Obangana bino mīōwu jami kībēc na un imītō, nakun kwanyō kī i lōnyō mērë më dheo na ěn tye kōdē i Kiricito Yecu. 20 Dheo obed both Obanga Apap onu naka naka. Amen. (aiōn g165) 21 Moth unu jō k'Obanga na leng kībēc i Kiricito Yecu. Utmego na tye gīnī kanya acël kōda omothowu. 22 Jō k'Obanga na leng kībēc omothowu, rwōk mērë jō na tio gīnī i pacō ka Cija. 23 Kica ka Rwoth Yecu Kiricito obed kodwu.

Kolocai

1 Waraga ni öya ki both Paulo na ënë akwëna ka Kiricito Yecu pi miti k'Obanga, ëka ki both ömîn onu Timoteo. **2** Both utmego na tye gîni i Kolocai n'obedo jö k'Obanga na leng ëka na genere gîni i Kiricito: Obanga Apap onu ömîiwu gum ëka kuc. **3** Wan ëmîö pwöc i karë kibëc both Obanga, Apap ka Rwoth onu Yecu Kiricito, ka wan ëlëgö pîrwu, **4** piën wan ewinyo pi yeewu i kom Kiricito Yecu ëka pi mar na un ïmarö ki jö k'Obanga na leng kibëc— **5** yee ëka mar n'obino pi gin na un igeno n'ëkanö i polo pîrwu, n'onwongo iwinyo unu cön i köp më adyer na ënë köp më Emuth na Bër **6** n'obino bothwu. I wi lobo thükül köp më Emuth na Bër ni tye ka nyakö nyige ëka tye ka nya i kit yo acël nön, na calö kite n'obedo timërë ködë i kinwu, cakërë i nînö na un iwinyo tē ëka iniang unu i kica k'Obanga i adyer mërë kibëc. **7** Un inwongo pwony ni ki both Epapira na ënë atic awodhwa më amara, n'obedo atic ka Kiricito na genere na kakarwa, **8** ëka ën thon okobo niwa pi mar na Tipo Naleng ömîöwu. **9** Pi tyën köp ni, cakërë i nînö na wan ewinyo köp i komwu, wan ëlëgö pîrwu na ba ekeng, nakun ëkwaö Obanga ni ömîiwu ngec na thuth i gin na ën mitö, nakun ibedo unu ki ryëkö ëka niang kibëc na Tipo Naleng miö. **10** Cë kwöwu obed n'opore both Rwoth, na yomo cwinye na bër, nakun itio unu tic na bëcö na miö kwöwu nyakö nyige ëka më döngö i ngec k'Obanga. **11** Obanga ömîiwu tēkö kibëc na rwatërë ki twërö më dheo mërë, ëk idang unu can kibëc nakun idiö unu cwinywu ki yom cwiny. **12** Mii unu pwöc both Obanga Apap na miö onu ebodo jö n'opore më nywakö jami më alea kanya acël ki jö k'Obanga na leng i ker më tar. **13** Ën ölarö onu ki i twër më cöl piny cë okelo onu i ker ka Wode na ën marö, **14** ënë kökö onu ëka timö kica i kom bal onu. **15** Kiricito obedo cal k'Obanga na ba nen, ën obedo na tye n'onwongo bara ecweo gin mörö ëka ën obedo athin kaö na tye ki löc i kom gin acwea kibëc. **16** Piën i ën, Obanga ocweo jami kibëc: jami na tye i polo ëka na tye i wi lobo, gin na nen ëka gin na ba nen, kadî wegî then ker onyo wegî tēkö onyo ëlöc ëka wegî twër; jami kibëc ecweo ki twër mërë ëka pîrë. **17** Ën öcakö bedo na tye ki i kin jami kibëc, ëka i ën jami kibëc ribërë kanya acël. **18** Ën thon obedo wic, ëka jö n'oye Kiricito ënë obedo kome. Ën obedo acaki n'öcakö cer ki i kin jö n'öthö, ëk ën obed ngat na tëlö yoo i jami kibëc. **19** Piën Obanga obino obedo ki yom cwiny cë oyeo ni Wode obed ki kite kibëc na cal ki mëgë, **20** ëka i Kiricito ën oyeo më dwökö jami

kibëc bothe, gin na tye i wi lobo onyo gin na tye i polo, nakun kelo kuc pi remo ka Kiricito n'öny i kor yath ariä. **21** Un yam ipokere ökö ki both Obanga ëka i thamawu ibedo unu lang mërë, piën itimö unu gin na reco. **22** Ëntö kobedini pi thöö ka Kiricito i kite më kom dhanö, Obanga ödwoököwu yo bothe, ëk ekelwu i nyime na nwongo itye unu na leng abonge bal mörö ëka na köp mörö na rac ope i komwu, **23** ka ibino mëdërë unu më bedo ki yee, nakun icung unu na tēk ëka imoko unu tē na ba ilengere ki i gen më köp më Emuth na Bër. Man ënë köp më Emuth na Bër na un iwinyo, n'ëtütö both gin acwea kibëc na tye i thë polo, ëka na an, Paulo, adökö atic pîrë. **24** Kobedini an cwinya yom pi can na an anwongo pîrwu, piën an atye ka nywakö can ka Kiricito na tye ka mëdërë pi kome, na ënë jö n'oye Kiricito. **25** Obanga ömîa tic më könyö jö n'oye Kiricito, ëk amîi jî onge na bër köp k'Obanga— **26** müng n'obedo kanërë pi mwaka na pol ëka ki wang rok n'opoth, kobedini dong Obanga ömîö onen ökö kanyalër both jögë na leng. (aiön g165) **27** Obanga öthamö më miö jögë ngeo müng ni na pîrë dit rwök n'obedo thon pi Erok. Müng nön ënë ni Kiricito bedo i iwu, miö ibedo unu ki gen më nywakö dheo k'Obanga. **28** Wan ëtitö pi Kiricito nakun ëcikö jö kibëc ëka epwonyo ki ryëkö kibëc, ëk ekel ngat acëlacël i nyim Obanga na nwongo dong otengo i Kiricito. **29** Manön ënë ömîö an atio ëka ayelara rwök, nakun atio ki tēkö mërë na dit rwök na tye ka tic iä.

2 An amitö ni inge unu kite na an atye ka yelara ködë më tic pîrwu ëka pi jö na tye i Laodikia, ëka pi jö kibëc na pod bara önenö koma. **2** Tyën köpna ënë ni gin myero öcük cwinygi ëka öribërë gîni kanya acël i mar, ëk onwong gîni lönyö kibëc më niang na bër, ëk onge gîni müng k'Obanga na ënë Kiricito. **3** I Kiricito ëkanö lönyö kibëc më ryëkö ëka ngec. **4** An akobo niwu köp ni ëk ngat mörö kür öbwöluwu ki köp na bër na winyo mit, ëntö nwongo obedo më twodo. **5** Kadî bed ni an ba atye kodwu i kom, ëntö an atye kodwu i cwiny, nakun cwinya yom më nënö kite na un iyübërë ködë na bër, ëka kite na un icung na tēk ködë i kom yeewu i Kiricito. **6** Kite na dong iyeo unu Kiricito Yecu na calö Rwothwu, myero imëdërë unu më kwö i ën. **7** Mii oriwu ödöny na thuth i kome, nakun ibedo unu calö öt n'ëgërö i kome, na nwongo icung unu na tēk i yeewu kite n'epwonyowu ködë, na nwongo pwöcwu mëdërë amëda. **8** Gwökërë unu ëk ngat mörö kür ömakwu na calö opii ki ryëkö mërë na thërë ope më bwöl, na lübërë ki pwony më thëkwarö ka dhanö n'öya ki kom tēkö më lobo ni ëka pathi ki both Kiricito. **9** Obanga kwö i Kiricito i kite mërë

kibéc na caló dhanó, 10 éka un ipong kí kwó i kite kibéc i Kiricito, na éné obedo awi éloc éka wegí twér kibéc. 11 I Kiricito, un thon onwongo élröwu kí liré na Kiricito éné ötimó, pathí liré na dhanó ölrö kí cing-gí i komwu, éntö mé kwanyó kite mé kwó mé anywöli ökö kí i komwu. 12 I karé n'ebaticawu, eikowu kanya acél kí Kiricito, éka thon ecerowu kanya acél kódé pí yeewu i kom tékö k'Obanga na én oceru Yecu kí i kin jö n'öthö. 13 Un onwongo ithöó unu ökö pí balwu, éka pién kwöwu mé anywöli onwongo bara élrö. Cé Obanga ömiöwu kwó kanya acél kí Kiricito. Én ötimó kica i kom bal onu kibéc, 14 cé öwékó banya n'onwongo écöó i wi onu pí Cik n'onwongo ömiö köp ölöó onu, cé ökwanyó ökö éka oguro i kor yath ariá. 15 Kiricito dong otyeko maó jami lwény kibéc kí both éloc éka wegí twér, nakun miögi lewic kanyalér kí löögi i kor yath ariá. 16 Pí manön, kür imii unu ngat möró öngöl köp i komwu pí gin na un ícamó onyo gin na un ímadhö, onyo pí karama mé ninö na dito, onyo karama mé por ka dwe, onyo ceng Cabit. 17 Manön giní kibéc obedo tipo kékén na nyutho gin na myero obin, éntö gin na tye adyer nwongere i Kiricito. 18 Kür imii unu ngat möró okob ní köp ölööwu, nakun én mitö ní jii omwolere kén-gí twodo twodo mé wörö emalaika, nakun ocung i kom anyuth mökö na én énenö. Koth jö nön wakéré nono abonge tyén köp möró nakun gin thamó thama mé kom kékén. 19 Én ba okubere i kom Kiricito na ték na éné obedo wic. Én gwökó dul kom kibéc éka kubo wang wodhi éka ler kanya acél, cé dong cakó döngö i kite n'Obanga mitö ní ödöng kódé. 20 Un ithöó kanya acél kí Kiricito éka égönyöwu ökö kí kom tékö mé löc mé lobo ni, píngö pod dóki ímedéré unu mé bedo caló jö mé lobo, nakun igwökó unu cik mökö n'obedo köman: 21 "Kür imaki! Kür ibil! Kür igudi!?" 22 Manön kibéc obedo cik éka pwony ka dhanó na makó jami na thum ökö ka etio ködgi. 23 Cik nön giní nen caló tye kí ryékó mökö pí ketho cik mé wörö Obanga na un inwongo pírwu kenwu, mé dókö na mwol éka mé yelo kom jö kí can, éntö ba konyó gin möró mé löönö miti mé kom.

3 Kite na caló dong icer unu kanya acél kí Kiricito, keth unu dong cwinywu i kom jami na tye maló kanya Kiricito obedo ié i nget cing Obanga kucem. 2 Keth unu thamawu i kom jami na tye maló i polo, éntö pathí i kom jami na tye i lobo. 3 Pién un onwongo ithöó ökö, éka kwöwu na nyen kobedini dong ékanó kanya acél kí Kiricito i Obanga. 4 Ka Kiricito na éné obedo kwöwu bino nen, un thon ibino nen kanya acél kódé éka inywakó unu dheo méré kibéc. 5 Pí manön, nek unu gin mökö mé lobo na tye i iwu ökö: tím mé

ölyang, caró, miti mé kom, thama na reco éka woro mé jami, pién woro mé jami röm aróma kí wörö cal jwogi. 6 Akémö k'Obanga bino pí koth tím nön giní i kom jö na ba winyo köp méré. 7 Un dong iwok i koth kwó ni, i karé na un ibedo mé lübögi. 8 Éntö kobedini kwér unu koth jami ni ökö kibéc: akémö, kéc ic, rac cwiny, ayeny, éka köp mé lewic myero kür owinyere kí i dhöwu. 9 Kür ikob köp mé twodo both awodhi, pién dong ityeko unu gönyó kwöwu mé anywöli éka kí tím méré na reco kibéc 10 éka iruko unu kom na nyen n'Acwec tye ka röcö i ngec na nyen mé dwökó i cal méré. 11 I kwó na nyen ni, apokapoka ope i kin jö Girik éka Eyuda, onyo ngat n'élirö éka ngat na ba élrö, arok, rok na pod odong cen i kwó mé lobo ni, opii onyo ngat na löré kéné, éntö Kiricito éné gin na píré ték, éka bedo i onu kibéc. 12 Pí manön, na caló un ibedo jö n'Obanga öyérö, jö na leng n'Obanga marö, myero ibed unu kí cwiny na miö iparö unu pí can k'ewodhwu, bed unu kí kica, mwolo, wörö éka díö cwiny. 13 Ngat acélacél myero ödii cwinye i kom awodhe, nakun itimö unu kica i kom ewodhwu i kinwu kenwu pí balwu. Tím unu kica na caló Rwoth ötimö niwu kica. 14 Na löö manön kibéc, myero ibed unu kí mar na tweowu kanya acél na bér. 15 Pién ecwodowu i kuc na caló dul kom acél, mií unu kuc ka Kiricito ölöö cwinywu éka ibed unu kí pwóc. 16 Mií unu köp ka Kiricito obed i iwu rwök. Pwonyere unu éka iükéré unu kenwu kí ryékó kibéc n'Obanga ömiöwu. Wer unu wer mé jabuli, wer mé pakó Obanga éka wer mökö mé dini. Wer unu both Obanga kí pwóc i cwinywu. 17 Gin na kibéc na un itimö, kadí kí köp onyo kí tic möró, tím unugi kibéc i nyíng Rwoth Yecu, nakun imiö unu pwóc both Obanga Apap nakun wok kí bothe. 18 Un mon, miré unu kenwu i thé löc ka cwöwu, pién manön éné gin n'opore i kin jö na tye i Rwoth. 19 Un cwö, mar unu monwu, kür ibed unu kí gero i komgi. 20 Un éthinö, winy unu enyodowu i köp kibéc, pién manön éné yomo cwiny Rwoth. 21 Un bebe, kür ibed unu kí kwinyó i kom éthinöwu, pién baló cwinygi ökö. 22 Un opii, myero iwiny unu editewu mé lobo i köp kibéc; pathí kí tic na nen kí wang-gí kékén nakun nwongo imitö unu yom cwiny na yaa kí both dhanó, éntö tii unu tic kí cwiny mé lworo Rwoth. 23 Tic möró kékén na un itio, tii unu na bér kí cwinywu kibéc na caló itio unu pí Rwoth, éntö pathí pí dhanó, 24 pién un ingeo ní ibino unu nwongo jami kibéc na yam Rwoth öyübö cón pí jögé na caló cül. Rwoth na onu etio píré éné Kiricito. 25 Ngat möró n'ötimö gin na rac ebino cülö én kí gin na rac na én ötimö, pién Obanga ba poko kin dhanó.

4 Un edite opii, tii unu k'opiwu i yoo n'atir ëka na bër, piën ingeo unu ni un thon itye k'Adit i polo. 2 Mëdërë unu ki lëga na wangwu thwolo nakun imiö unu pwöc. 3 Lëg unu pürwa thon, ëk Obanga ömiüwa karë na bër më titö köp mërë, ëk wan ëtit köp më müng ka Kiricito. Piën köp nön ënë ömiö an atye i buc kany. 4 Lëg unu ëk atit köp ni kanyalër i kite na myero atim ködë. 5 Bed unu ki ryëkö i kite na un imakö ki jö na ba oyee gini; nakun itio unu ki caa n'onen na bër. 6 Ëk köpwu na un itwakö obed gin na kelo kuc, na nwongo itwakö unu köp na mit, ëk inge unu kite më gamö peny ka ngat acëlacël. 7 Tukiko, n'obedo omego më amara, aköny tic ka jö n'oye Kiricito na genere ëka atic awodha i Rwoth, bino kobo niwu köp kibëc i koma. 8 An atye ka oro ën yo bothwu pi tyën köp ni ëk ömiü inge unu kite na wan etye ködë kany ëka myero öcük cwinywu. 9 An aoro ën kanya acël k'ömin onu Onecimo më amara. Ën obedo dhanö na genere ëka öya ki bothwu. Gin bino kobo niwu gin na kibëc na tye ka timërë kany. 10 Aricitako n'obedo amabuc awodha omothowu, ëka Marako wod eyaa ka Baranaba thon omothowu. (Un dong igamö cik na makö ën. Ka ën obino yo bothwu, jöl unu ën.) 11 Yecu, na nyingë nököenë ecwodo ni Yucito, thon omothowu. Jö adek ni këköenë obedo gini Eyuda na tio gini tic kanya acël köda kany pi ker k'Obanga ëka gin obedo ka kweo cwinya. 12 Epapira, n'obedo dhanö acël i kinwu ëka atic ka Kiricito Yecu, omothowu. Ën yelere më lëga pürwu i karë kibëc, ëk icung unu na tük i gin na kibëc n'Obanga mitö, nakun itengo unu abonge akalakala mörö. 13 An amiö caden më moko ni ën otio tic rwök pürwu ëka pi jö na tye gini i Laodikia ëka i Kerapoli. 14 Luka, n'obedo daktar më amara, ëka Dema omothowu. 15 Moth unu utmego na tye gini i Laodikia, ëka moth unu Nimpa ki jö n'oye Kiricito na cökërë i ödë. 16 Kinge na dong ëkwanö waraga ni bothwu, myero imiü unu thon ëkwan both jö n'oye Kiricito na tye gini i Laodikia ëka un thon myero ikwan unu waraga na an acöo both jö Laodikia. 17 Kob unu both Arikipo ni, "Myero inën ni icobo tic na Rwoth omii." 18 An Paulo, acöo moth ni ki cinga. Po unu i kom twecona i buc. K'ica k'Obanga obed kodwu.

1 Tecalonika

1 Waraga ni öya ki both Paulo giin ki Cilibwano ëka Timoteo, Both jö n'oye Kiricito na bedo giini i Tecalonika na giin ënë jö k'Obanga Apap ëka jö ka Rwoth Yecu Kiricito: Gum ëka kuc obed kodwu. **2** Wan ëmiö Obanga pwöc i karë kibëc pîrwu nakun wan epo pîrwu i lëgawa. **3** Wan epo kite na un iketho ki yeewu i tic i nyim Obanga Apap onu, ëka kite na un iyelere ki mar kanya acël ki kite na un iðïö unu ki cwinywu, pi genwu i Rwoth onu Yecu Kiricito. **4** Utmegowa n'Obanga marö, wan engeo ni Obanga öyërowu dong ökö, **5** piën köp më Emuth na Bër na wan ëtïtö bothwu, ba igamö unu ki köp këkën ëntö ki tükö ëka ki Tipo Naleng, nakun ödönyö na thuth i cwinywu. Un ingeo na bër kite na wan ebodo ködë bothwu më könyöwu. **6** Un ibino iporo unu kitewa ëka kite ka Rwoth; kadï bed inwongo unu can na thwönë rwök, un igamö unu köp mëré ki yom cwiny na Tipo Naleng ömiö. **7** Man ömiö iðökö unu apor na bër both jö kibëc n'oye Yecu na tye giini i Macedonia ëka Akaya. **8** Köp ka Rwoth owinyere pathi i Macedonia ëka Akaya këkën— ëntö köp i kom yeewu i kom Obanga owinyere örömö kanya kibëc. Pi manön wan ba dökï örömö kobo gin mörö ië, **9** piën jö nön kibëc odwongo köp i komwa kite na un ijlöwa ködë. Giin thon okobo kite na un i'lökërë ködë both Obanga nakun i'wëkö unu wörö cal jwogi pi tio tic n'Obanga na kwö ëka n'adyer, **10** ëka më kürö dwogo ka Wode ki i polo, na ën ocerö ki i kin jö n'öthhö—Yecu, n'ölarö onu ki i akëmö k'Obanga na tye ka bino.

2 Utmegowa, un ingeo ni binowa më limöwu ba obedo më nono. **2** Kadï bed wan ënëno can ëka ëtimö tim më lewic i komwa ki i Pilipi kite na un ingeo ködë, ëka kadï bed pyem obedo na dwong, Obangawa ömiöwa tük cwiny më titö niwu Emuth mëré na Bër kanyalër. **3** Piën köp na wan ëtïtö ba öya ki i thama na ba tye atir onyo ki i thama na ba leng, ököra mörö ope ië. **4** Ëntö kite na calö Obanga dong otyeko pwöyöwa ëka ömiöwa köp më Emuth na Bër më atïta, wan thon ëtïtö kömanön, pathi më yomo cwiny dhanö ëntö më yomo cwiny Obanga na ngeo cwiny onu. **5** Un ingeo unu ni wan ba ëtwak nono më ywaö thamawu, wan ba ëkanö thamawa pi nwongo lim—Obanga ënë obedo acadenwa. **6** Wan ba ërangö dheo ki both dhanö, kadï ki bothwu onyo ki both ngat mörö nököne. Na calö ëkwëna ka Kiricito wan onwongo myero eketh pëkö i komwu, **7** ëntö wan ebodo na mwol i kinwu calö aya k'athin na tye ka gwökö ëthinë. **8** Parö pîrwu ömiö ba ëmiöwu

köp më Emuth na Bër këkën n'öya ki both Obanga, ëntö wan ëmiö kwöwa bothwu piën wan onwongo ëmaröwu rwök. **9** Utmegowa, un ipo kite na wan onwongo eyelere ködë ki tic; i karë na wan ëtïtö niwu köp më Emuth na Bër n'öya ki both Obanga, wan etio kiceng ëka kiwor ëk kür eketh pëkö i kom ngat mörö ki i kinwu. **10** Un ibedo ecadenwa, ëka Obanga thon ngeo kite na wan ebodo ködë na leng ëka n'atir abonge köp mörö n'ölööwa i nyimwu un jö n'oye. **11** Un ingeo kite na wan ëkönyö ngat acëlacël ki i kinwu na calö apap na könyö ëthinë, **12** nakun ëcükö cwinywu, ekweo cwinywu ëka ëkwaöwu ëk ilüb unu kwö n'opore both Obanga n'ocwodowu i löc mëré ëka i dheo mëré. **13** Wan thon ëpwöyö Obanga karë kibëc pi köp ni, piën cakërë na un igamö köp k'Obanga na un iwinyo ki bothwa, ba igamö unu na calö köp ka dhanö ëntö na calö köp adyer n'öya ki both Obanga, tye thon ka tic i'wu un jö n'oye Yecu. **14** Utmegowa, un thon por unu kite ka jö k'Obanga n'oye Kiricito na tye i Yudea, na tye i Kiricito Yecu: Piën un thon inëno unu can ki both jöwu kikome na röm ki can na jö n'oye Kiricito önenö ki both Eyuda, **15** n'oneko giini Rwoth Yecu ëka edwarpiny, ëka oyelowa giini thon. Giin ba oyomo cwiny Obanga ëka thon obedo giini lang ka jö kibëc. **16** Giin thon ötemö jüköwa ökö më titö köp both Erok ëk ölarë giini. Man ömiö balgi ömëdërë na thwönë rwök, ëntö kinge akëmö k'Obanga obino i komgi. **17** Utmegowa, i karë n'epokowa kodwu pi karë na nönök (i kom ëntö pathi i cwiny), wan ëtëmö ki miti na thwönë më nwongo yoo më nënöwu dökï. **18** Wan onwongo ëmitö më bino bothwu; an, Paulo, atëmö dökï atëmö—ëntö Catan öjököwa ökö. **19** Ngö ënë genwa ki yom cwinywa ëka tok dheo më cüng i nyim Rwothwa Yecu ka obino? Pathi un? **20** Adyer un ënë ibedo dheowa ëka yom cwinywa.

3 Më ajiki, i karë na dong wan ënenö ni ba dökï ërömö dangö, wan ëthamö kënwä më dong i Atene. **2** Cë ëcakö oro Timoteo na ënë öminwa ëka atic k'Obanga i titö köp më Emuth na Bër i kom Kiricito, më jingö ëka më cükö cwinywu i yeewu, **3** ëk ngat mörö kür cwinye opodhi i atëmatëma nonu. Un ingeo na bër ni can ni myero opodh i kom onu. **4** Piën i karë na wan etye bothwu, wan ebodo kobo niwu ni karë mörö ebino yelo onu. Ëka ötimërë kömanön kite na un thon ingeo na bër. **5** Pi köp ni, i karë na an anëno ni ba dökï arömö diö cwinyä, an aoro Timoteo bothwu ëk aniang i kom yeewu. An onwongo atye ki lworö ni gwök onyo Catan öbwölöwu cë ticwa römö bedo na köny mëré ope. **6** Kobedini Timoteo pod odwogo ki bothwu yo bothwa ëka ën okelo niwa

emuth na bër i kom yee ëka marwu. Ën okobo niwa nĩ un ipo pĩrwa ëka itye unu kĩ miti mē nēnōwa kite na wan thon etye kĩ miti mē nēnōwu. 7 Pĩ manōn, utmegowa, cwinywa dong okwe i komwu pĩ yeewu i can ëka ayela n'eyelowu kōdē kibēc. 8 Piēn kobedini wan ëkwō pĩrwa ka icung unu na tēk i Rwoth. 9 Wan ëtwērō miō pwōc both Obanga nīngō pĩrwa pĩ yom cwiny kibēc na wan etye kōdē pĩrwa i nyim Obanga? 10 Kiwor ëka kiceng wan ëlēgō kĩ cwinywa kibēc nĩ ēnēnwu dōkĩ ëk ēmēd gin n'orem kĩ i kom yeewu. 11 Wan ëlēgō nĩ Obanga Apap onu ëka Rwoth onu Yecu ōyab yoo niwa mē bino bothwu. 12 Wan ëlēgō dōkĩ nĩ Rwoth ōmĩi marwu ōmēdērē rwōk both ngat acēlacēl ëka both jō kibēc kite na wan ēmarōwu kōdē. 13 Ëk ēn ōjīng cwinywu ibed unu jō na leng abonge kōp mōrō i nyim Obanga Apap onu i karē na Rwoth onu Yecu bino bino kĩ jōgē kibēc na leng.

4 Mē ajiki mērē utmegowa, wan ëkwaōwu i Rwoth Yecu nĩ imēdērē unu anyim naka naka kĩ kwō na un imakō kĩ bothwa mē yomo cwiny Obanga, na un itye ka lūbō. 2 Po unu i cik na yam wan ēmīōwu kĩ twērō ka Rwoth Yecu. 3 Obanga mitō nĩ ibed unu jō na leng: wēk unu tīm mē ōlyang. 4 Ngat acēlacēl myero onge kite mē bedo kĩ dhakō mērē kēnē kĩ cwiny na leng ëka kĩ wōrō, 5 kūr imīi unu miti mē kom obuwwu calō jō na ba ngeo gīnī Obanga. 6 Ngat mōrō kūr ōtīm bal i kom ōmīn mērē onyo ōbwōl ēn kĩ kōp ni. Piēn Rwoth bino pwodo dhanō pĩ bal nōn gīnī kibēc, kite na yam wan ekobo ëka ēcīkōwu. 7 Obanga ba ocwodo onu mē nyōbērē kĩ bal ēntō mē bedo jō na leng. 8 Pĩ manōn, ngat n'ōkwērō cik ni ba ōkwērō dhanō ēntō ōkwērō Obanga, na miōwu Tipo mērē Naleng. 9 Kobedini kōp na makō mar mē utmego wan myero kūr ēcōō niwu kōp mōrō iē, piēn un kikomwu Obanga dong opwonyowu ōkō mē marō ngat acēlacēl. 10 Ëka adyer dong imarō unu utmego kibēc i Macedonia kibēc. Ëntō wan ëkwaōwu, utmegowa, nĩ imēdērē unu iē naka naka. 11 Keth cwinywu i bedo moth, ngat acēlacēl ōpar pĩ tic mērē nakun tio kĩ cīngē kite na yam wan ēcīkōwu kōdē, 12 ëk kwōwu mē nīnō kibēc ōmīi jō na ba ngeo Yecu ōwōrwu ëka un ba ibino jengere i kom jō nōkēnē pĩ gin na un imītō. 13 Utmegowa, wan ba ēmītō nĩ ibed na ba ingeo unu kōp i kom jō na dong ōthōō, onyo mē bedo kĩ cwer cwiny calō jō n'ope kĩ gen. 14 Wan eye nĩ Yecu ōthōō ëka ocer dōkĩ ëka thon wan eye nĩ Obanga bino kelo jō n'ōthōō na yee i kom Yecu kanya acēl kōdē. 15 Wan ekobo niwu kōp ka Rwoth nĩ onu jō na kwō na pod edong naka i nīnō mē dwogo ka Rwoth, ba ebino tēlō nyim jō na dong

ōthōō. 16 Rwoth bino idho pīny kĩ i polo kĩ cwodo mē twēr, dwōn malaika na dit bino winyere, buruji k'Obanga bino kok ëka jō na yam ōthōō n'oye i kom Kiricito bino cakō cer. 17 Kinge manōn, onu jō na pod edong na kwō ebino tero onu kanya acēl kōdgi i wi pōl mē romo kĩ Rwoth i wi yamō ëk dong ebed both Rwoth na twal. 18 Pĩ manōn, cūk unu cwiny ngat acēlacēl kĩ kōp ni gīnī.

5 Kobedini, utmegona, kōp na makō caa ëka nīnō myero wan kūr ēcōō niwu, 2 piēn un ingeo na bër nĩ nīnō mē dwogo ka Rwoth bino bino calō akwo i kiwor. 3 Na jīi pod kobo nĩ, “Kuc tye, pīny okwe moth, gin mōrō ope na rac,” cē can na rac bino podho i komgi athura calō arem mē nywōl na bino i kom dhakō na yac, ëka ngat mōrō ope na bino bwōth. 4 Ëntō un, utmegona, ba itye unu i pīny na cōl na twērō miō nīnō nonu bino i komwu athura calō akwo. 5 Un kibēc ibedo unu jō mē tar ëka jō mē kiceng. Onu ba ebodo jō mē kiwor onyo mē pīny na cōl. 6 Pĩ manōn, myero onu kūr ēnīn calō jō nōkēnē, ēntō ebed na wang jō thwolo nakun ēgwōkērē kēn onu. 7 Piēn jō na nīnō, nīnō gīnī kiwor, ëka jō na mēr, mēr gīnī kiwor. 8 Ëntō kite na onu ebodo jō mē kiceng, myero ēgwōkērē kēn onu, nakun nwongo eruko yee ëka mar na calō nywenyo mē gēngō kor, ëka gen mē larē na calō tok n'obedo nywenyo. 9 Piēn Obanga ba ōyērō onu nĩ ëk akēmō mērē opodh i kom onu ēntō mē nwongo larē na yaa kĩ both Rwoth onu Yecu Kiricito. 10 Ën yam ōthōō pĩ onu ëk kadĩ onu ëkwō onyo ēthōō, ebin ëkwō kanya acēl kōdē. 11 Pĩ manōn, cūk unu cwiny ngat acēlacēl ëka ikōny unu ngat acēlacēl mē dōngō, kite na un itye ka tīmō kōdē. 12 Pĩ manōn, wan ëkwaōwu utmegowa, wōr unu jō n'obedo ételawu na tye ka tic na tēk i kinwu, na yelere gīnī pĩrwa i Rwoth ëka na pwonyowu. 13 Bed unu kĩ wōrō na dit ëka kĩ mar i komgi pĩ tic na gin tio. Bed unu kĩ kuc i kinwu kenwu. 14 Wan ëkwaōwu utmegowa, jūk unu jō na balō gīnī karēgi abonge tic mōrō, cūk unu cwiny jō na lwor, kōny unu jō na gōrū, dīi cwinywu i kom jō kibēc. 15 Nēn unu nĩ ngat mōrō ba ōcūlō gin na rac kĩ gin na rac, ēntō karē kibēc tēm unu mē tīmō gin na bër i kinwu ëka both jō kibēc. 16 Bed unu kĩ yom cwiny i karē kibēc; 17 lēg unu karē kibēc; 18 mīi unu pwōc i gin na kibēc, piēn manōn ēnē gin n'Obanga mitō kĩ bothwu i Kiricito Yecu. 19 Kūr ijūk unu Tipo Naleng mē tio tic mērē; 20 kūr i'caa unu kōp k'edwarpīny. 21 Tēm unu gin na kibēc. Mak unu gin na bër. 22 Kwēr unu tīm na reco kibēc. 23 An alēgō nĩ Obanga kikome, Obanga mē kuc, ōmīi ibed unu jō na leng i yodhi kibēc, ōgwōk cwinywu, tipowu ëka

komwu më bedo abonge bal mörö i karë më dwogo
ka Rwoth onu Yecu Kiricito. 24 Ngat n'ocwodowu
obedo ngat na genere ëka bino cobo. 25 Utmegowa,
lëg unu pîrwa. 26 Moth unu utmego kibëc kî moth më
mar. 27 Aciköwu i nyîng Rwoth më kwanö waraga
ni both utmego kibëc. 28 Kîca ka Rwoth onu Yecu
Kiricito obed kodwu.

2 Tecalonika

1 Waraga ni öya ki both Paulo gin ki Cilibwano ëka Timoteo, Both jö n'oye Kiricito na bedo giní i Tecalonika na gin ëné jö k'Obanga Apap ëka jö ka Rwoth Yecu Kiricito: **2** An alëgö nî Obanga Apap ëka Rwoth Yecu Kiricito ömîiwu gum ëka kuc. **3** Utmegowa, wan myero ëmîi pwóc both Obanga pi karë kibëc pîrwu, piën yeewu tye ka döngö rwök ëka mar ka ngat acëlacël i kom awodhe thon tye ka mëdërë. **4** Pî manön, wan etye k'awaka i kin jö n'oye Kiricito n'obedo giní jö k'Obanga i kom diö cwinywu ëka yee i ayela ëka atëmatëma kibëc na un itye ka dangö. **5** Man kibëc nyutho nî ngölö-köp k'Obanga tye kakarë, ëka pi manön ebino kwanöwu nî jö n'opore pi ker k'Obanga na un itye ka dangö can pîrë. **6** Obanga bino timö gin na tye atir, ën bino miö can i kom jö n'ömiöwu can, **7** ëka bino miö yweo both jö n'eyelo ëka bothwa thon. Man bino timërë i karë na Rwoth Yecu bino nen k'emalaika mërë na tük ki i polo i mac na lyël. **8** Ën bino pwodo jö na ba ngeo Obanga ëka na ba wörö giní köp më Emuth na Bër ka Rwoth onu Yecu. **9** Ën bino pwodogí ki can na bedo na twal ëka ebino ryëmögí ökö ki i nyim Rwoth ëka ki i dheo më tükö mërë (aiönios g166) **10** i nînö na ën bino dwogo, ën bino nwongo dheo ki both jögë kibëc na leng ëka wörö ki both jö na yee i kome. Un thon ibino bedo i kin-gí, piën iyee unu cadenwa na wan ekobo niwu. **11** Ëné ömîö wan ëlëgö pîrwu i karë kibëc ëk Obanga onu ömîiwu ibed jö n'opore ki cwodo mërë, ëka ökönywu ki tükö mërë më cobo mitiwu kibëc na bëcö na un itio pi yeewu. **12** Cë nyíng Rwoth onu Yecu ebino wörö pîrwu, ëka un thon inwong dheo pîrë pi kica na yaa ki both Obanga onu ëka Rwoth Yecu Kiricito.

2 Utmegowa, na lübërë ki köp i kom dwogo ka Rwoth onu Yecu Kiricito ëka cökërë onu më rwatërë ködë, wan ëkwaöwu nî **2** kür iwëk thamawu orubere ökö piöpiö, cwinywu thon kür opodhi kadí pi köp k'adwarpiñy onyo köp n'ëtítö onyo waraga mörö n'ekobo ni öya ki bothwa na kobo nî nînö ka Rwoth dong othuno. **3** Ngat mörö kür öbwölwu i yore mörö këkën, piën nînö ka Rwoth bara bino naka ka jem i kom Obanga obedo na tye ëka atür cîk thon onen, ngat na myero ebol i mac më kapiny. **4** Ën bino pyem ëka bino tingere malö ën këné na löö gin na kibëc n'ecwodo nî Obanga onyo gin mörö më awöra. ëk ebed i öt k'Obanga nakun nyuthere këné nî ën ebodo Obanga. **5** Ba ipo unu nî an akobo niwu köp ni i karë na an atye bothwu? **6** Un dong ingeo ngö na tye ka

jükö, ëk Ngat na Rac onen ka karë mërë n'opore örömö. **7** Piën müng më tükö k'atür cîk dong tye ka tic; ëntö ngat na tye ka jükö pod mëdërë më jükö naka ka ëryëmö ën ökö. **8** Cë atür cîk bino nen ëka Rwoth Yecu bino neko ën ökö ki yamö më dhögë cë tyeko ökö i karë na ën bino dwogo. **9** Bino k'atür cîk bino yaa ki i tic ka Catan nakun tio ki koth twodo kibëc më tango, anyuth ëka gin më aura giní, **10** ën bino tic ki bwöl na reco kibëc i kom jö na bino rwenyo. Gin bino rwenyo piën ökwërö giní marö köp adyer na larögí. **11** Pî manön, Obanga bino kethogí i thë twër më bwöl ëk gin oyee köp më twodo **12** ëk köp ölöö jö kibëc na yee köp më twodo ëntö cwinygí yom i timö gin na ba tye atir. **13** Utmegowa na Rwoth marö, myero wan ëmîi pwóc both Obanga pîrwu i karë kibëc piën Obanga öyërowu i acaki laröwu pi Tipo Naleng na lönyöwu më bedo na leng ëka pi yee köp më adyer. **14** Ën ocwodowu i larë ni k'Emuth na Bër na wan ëtítö niwu; ëk ömîi inywak unu dheo ka Rwoth onu Yecu Kiricito. **15** Pî manön utmegona, cung unu na tük ëka imak unu pwony na wan epwonyowu ködë kadí ki köp më dhök onyo ki waraga. **16** Kobediní ëk Rwoth onu Yecu Kiricito kikome ëka Obanga Apap onu na marö onu ki kica mërë okwe cwiny onu ki gen na bedo naka naka, (aiönios g166) **17** öcüik cwinywu ëka öjingwu i gin na kibëc na bër i tic ëka i köp.

3 Më ajiki utmegowa, lëg unu pîrwa ëk köp ka Rwoth ömëdërë më këth piöpiö ëka ëgam ki wörö, kite n'onwongo tye ködë bothwu. **2** Lëg unu thon ëk Obanga ölarwa ki both jö na timö bal ëka jö na reco; piën pathi jö kibëc ëné tye ki yee. **3** Rwoth genere, ën bino miöwu tükö ëka bino gwököwu ki both ngat na rac. **4** Rwoth ömîöwa gen i komwu, ëka wan etye ki gen ni itye unu ka mëdërë anyim më tio ngö na wan ekobo niwu. **5** An alëgö nî Rwoth ötël cwinywu i mar k'Obanga ëka idió cwiny na yaa ki both Kiricito. **6** Utmegowa, an aciköwu i nyíng Rwoth onu Yecu Kiricito më pokere ökö ki dhanö mörö na bedo abeda abonge tic ëka na ba lübö pwony na wan ëmîögí. **7** Un kikomwu ingeo na bër kite na myero ipor unu ki kitewa. Wan onwongo ba ebodo abeda abonge tic i karë na wan etye bothwu. **8** Wan ba ëcamö cem ka ngat mörö abonge cülö, ëntö wan eyelere ki tic i kiceng ëka i kiwor ëk kür eketh pëkö i kom ngat mörö ki i kinwu. **9** Wan ëtimö kömanön pathi nî wan epe ki twërö më nwongo köny ki bothwu ëntö wan ëmirë kënwä më bedo apor bothwu më alüba. **10** i karë na wan etye bothwu, wan ëmîöwu cîk nî: "Ngat n'ökwërö tic myero kür ocem." **11** Wan ewinyo nî jö mökö ki i kinwu bedo giní abeda abonge tic ëntö dönyö giní

ĩ tic ka jö nököñě. 12 Wan ěcĩkő koth jö nõn ěka
dőkĩ ěbakő dhōwa ĩ Rwoth Yecu Kiricito nĩ myero
gĩn otii ticgĩ ěk ngat acėlacėl ōpĩdhērě kěñě. 13 Ěntő
utmegowa, kūr idher unu mē tĩmő gin na běr. 14 Ka
ngat mörő ökwērő lübő cĩk na tye ĩ waraga ni, myero
ĩnĩang unu ĩ kom ngat nõn na běr, ěk kūr ĩrĩbērě unu
kődě ěk lewic ōmakĩ. 15 Kūr iter unu ěn na calő langő
ěntő na calő ōmĩnwu. 16 An alęgő nĩ Rwoth mē kuc
kikome ōmĩnwu kuc ĩ karě kibēc ěka ĩ yodhi kibēc.
Rwoth obed kodwu. 17 An, Paulo, acőő moth ni kĩ
cĩnga an kikoma, man ěñě kite na an aketho kĩ cĩnga
ĩ waragana kibēc. Man ěñě kite na an acőő ködě. 18
Kĩca ka Rwoth onu Yecu Kiricito obed kodwu.

1 Timoteo

1 Waraga ni öya ki both Paulo n'obedo akwëna ka Kiricito pi cik k'Obanga Alar onu ëka Kiricito Yecu na gen onu tye i kome. **2** Both Timoteo athin-na më adyer i yee: Obanga Apap ëka Kiricito Yecu Rwoth onu ömiiwu gum, kica ëka kuc. **3** I karë na an aya më cidhë yo Macedonia, an akwai ni ëk idong i Epeco ëk icik jö mökö kür döki opwony gini pwony më twodo **4** onyo kür oketh gini cwinygi i kom köp mökö më ödödö, ëka ki nying mökö na gin öryëö na böcöböcö na lübö thëkwarö. Koth jami ni kelo pyem këkën, ba könyö yüb k'Obanga—n'ocung i kom yee. **5** Tyën köp më cik ni ënë ni jö n'oye kibëc myero obed ki mar na dhanö tye ködé ka cwinye leng ëka na kite bër, na bal mörö ope i kome, ëka yee mërë twodo mörö ope ië. **6** Jö mökö ölökerë gini ökö ki i kom köp ni cë ödönyö gini më twakö köp atata na köny mërë ope. **7** Gin mitö bedo epwony cik k'Obanga, ëntö ba ngeo gini köp na gin twakö, onyo ngö na gin tye ka twakö na gin ocung ië na tøk rwök. **8** Wan engeo ni cik bër ka dhanö mörö otio ködé i yoo na bër. **9** Wan thon engeo ni cik ba eketho pi jö na kitegi atir, ëntö eketho pi ëtür cik ëka pi jö na jëm gini, pi jö na ba lworo Obanga ëka pi ëbal, pi jö na ba leng gini, jö na ba ketho cwinygi i kom Obanga, pi jö na neko apapgi onyo ayagi, pi enek, **10** pi jö na timö tim më ölyang, jö na bedo ki cwö ewodhgi, onyo jö na kwalö dhanö ëka rwenyo gini ködgi ökö i mung, etwodo, jö na kwongo kwong abonge thërë—onyo ngat mörö na kwö mërë ba rwatërë ki pwony më adyer, **11** man ënë pwony na nwongere i köp më Emuth na Bër n'ëmia më atita, köp më Emuth na Bër na titö pi dheo k'Obanga më gum. **12** An amiö pwöc both Kiricito Yecu Rwoth onu, na ën ömia tøkö, ëka önënö ni abedo ngat na genere, ëka öyëra më tio tic mërë. **13** Kadï bed yam onwongo abedo ngat na yanyö nying Kiricito ëka abedo ka ketho ayela i kom jögë, ëka ngat na ger, ëntö Obanga obino onyutho kica mërë i koma piën an abino atimö manön kibëc pi kwia piny abonge yee. **14** Kica ka Rwoth onu ömëdërë na thwönë rwök i koma, kanya acël ki yee ëka mar na tye i Kiricito Yecu. **15** Man ënë köp adyer na myero dhanö kibëc oyee gini: Kiricito Yecu obino i lobo më larö ëbal—na an ënë abedo abal na löögi. **16** Ëntö pi tyën köp ni ën obino onyutho kica mërë botha ëk i an, abal na löö ki kin ëbal, Kiricito Yecu onyuth diö cwinye më aura botha na calö apor both jö na bino gini yeo ën, ëka onwong gini kwö na ba thum. (aiönios g166) **17** Wörö ëka dheo kibëc obed naka naka

both Rwoth na löö karë kibëc, na ba thöö, na ba nen, Obanga acël këné. Amën. (aiön g165) **18** Athin-na Timoteo, an amiö cik ni bothi na lübërë ki köp na yam edwarpiny okobo i komi, ëk ka in ilübö köpgi, ilwëny ilwëny na bër, **19** nakun icung i yeeni na tøk ëka na ii lër. Jö mökö ökwërö thama më i igi na nyutho nigï balgi ëka ömiö yeegi dong öbalërë ökö. **20** I kin-gi ënë Kumenayo ëka Alegijanda, na an amiögi i cing Catan ëk opwonygi öwëk gini yanyö Obanga.

2 Köp më acël na an aciki ködé ënë ni lëg pi jö kibëc. Lëg both Obanga ökönygi ëka ömiiigi gum, ëka imii Obanga pwöc piigi kibëc. **2** Lëg pi rwodhi ëka ki jö kibëc na tye gini i löc, ëk ömii onu ebed ki kwö na yot n'elworo k'Obanga nakun onu thon ebedo ki wörö n'opore. **3** Man bër, ëka yomo cwiny Obanga Alar onu, **4** na mitö ni jö kibëc ölarë gini ëka onge gini köp më adyer. **5** Piën Obanga tye acël, ëka ngat acël na rübö Obanga ki dhanö tye acël, na ënë Kiricito Yecu, **6** na ën ömirë këné më kökö jö kibëc. Man ënë caden n'Obanga ömiö i karë mërë n'opore. **7** Man ënë ömiö Obanga öyëra më titö ëka më bedo akwëna më köp më Emuth na Bër—an atye ka kobo köp adyer, an ba abedo atwodo. Obanga oora më pwonyo Erok ki köp i kom yee ëka adyer. **8** Pi manön amitö ni cwö ölëg gini Obanga i kabedo kibëc nakun tingo cing-gi na leng malö abonge akëmö onyo pyem. **9** An thon amitö ni mon myero orukere na bër, ki wörö, nakun gwökërë gini, pathi ki yer wic n'ekedo, onyo gol, onyo aculo, onyo ruk mökö më wel na malö, **10** ëntö bërgi myero onen i tic na bëcö na gin tio, manön ënë gin na mitërë both mon na cwodere gini kën-gi ni gin jö na wörö Obanga. **11** Dhakö myero opwonyere aliling ëka obed ki winy. **12** An ba ayeo ni dhakö myero opwony onyo më bedo ki twër i kom ëcwö; ën myero öling alinga. **13** Piën Adam ënë ëcakö cweo, ëka dong Eba. **14** Ëka pathi Adam ënë ëbwölö, ëntö dhakö ënë ëbwölö ëka ödökö abal. **15** Ëntö dhakö bino larö kwö mërë i karë më nywöl—ka ën bino mëdërë më bedo ki yee, mar ëka bedo na leng nakun gwökërë këné.

3 Man ënë köp më adyer: Ka cë dhanö mörö mitö tic më bedo atël jö n'oye Kiricito, nwongo ën ömitö tic na bër. **2** Atëla ka jö n'oye Kiricito myero obed abonge köp mörö n'ëjükö ën ië, obed ki dhakö acël, ngat na lörrë këné, obed ngat na gwökërë, obed ngat n'ëwörö, obed ngat na gwökö welo, obed ngat na twërö pwony, **3** na ba obedo amërö, na ba obedo ngat na kwiny, ëntö na mwol, na ba dhaa atata, na ba obedo ngat na marö lim. **4** Myero obed ngat na löö jö më ödë na bër ëka önën ni ëthinë winye ki

wörö n'opore. 5 Ka ngat mörö ba twërö löö ödë na bër, ën twërö gwökö jö n'oye Kiricito n'obedo giní jö k'Obanga ningö? 6 Myero kür obed ngat na nyen na pod ölökerë alöka, miö kethere malö k'awaka, cë podho ökö, miö köp löö ën na calö yam ölöö Catan. 7 Më ajiki, ën myero obed dhanö na jö na ba obedo ëlúbkór Yecu wörö, ëk kür okel lewic i kome ëka ömii ën omok i owico ka Catan. 8 Kömanön thon, ëköny tic ka jö n'oye Kiricito myero obed giní jö n'ëwörö, jö na dhögi ba tye ariö, jö na ba obedo ëmadh köngö rwök, ëka kür obed giní eworo më nwongo lim. 9 Gin myero obed jö na niang na bër i müng më yee onu, nakun cwinigi leng. 10 Myero kono ëtëmgí, ka enwongo ni köp mörö na rac ope i komgi, cë ëmiiigi otii na calö ëköny tic i kin jö n'oye Kiricito. 11 Kömanön thon, mon-gí myero obed mon n'opore më awöra, na ba obedo jö na twakö köp më twodo i kom jö nökenë ëntö obed giní jö na gwökérë kën-gí ëka na genere giní i jami kibëc. 12 Aköny tic ka jö n'oye Kiricito myero obed ki dhakö acël ëka myero ölöö ëthinë ëka ödë na bër. 13 Jö n'otio na bër na calö ëköny tic i kin jö n'oye Kiricito nwongo giní dito pürgi kën-gí, ëka dökö giní jö na cwinigi tük i kom yee na tye i Kiricito Yecu. 14 Kadí bed an atye ki gen më bino yo bothi na cwöcwök, an atye ka cöönö bothi cik ni giní ëk, 15 ka an aruu, in ibino ngeo kite na myero jii obed ködë i öt k'Obanga, na ënë jö n'oye Kiricito n'obedo giní jö k'Obanga na kwö, wir ëka acaki thërë më köp adyer. 16 Aderer onu kibëc eyee ni müng më lworo Obanga na onu ëtütö pirë dit rwök: Ën onyuthere i kom, ëkwanö ën ni kite atir pi Tipo Naleng, emalaika önönö giní ën, ëtütö pirë both Erok, ebino eyeo ën i lobo kibëc, ëka dong etero ën malö i dheo.

4 Tipo Naleng kobo atir ni karë mörö i anyim jö mökö bino lökërë giní ökö ki kom yeegi, cë cakö giní lübö tipo na reco më bwöl ëka ki pwony na yaa ki both cene. 2 Pwony n'obedo köman yaa ki both jö n'obedo etwodo, na thama na tye i igi na nyutho nigí balgi odhil ökö na calö gin n'ëwangö ki nywenyo na lyeth. 3 Gin jükö jii ni kür onyom giní ëka cikögi ni kür öcam giní cem mökö n'Obanga oketho ëk jö na yee ën ëka ki jö na ngeo köp adyer ögam giní ki pwöc. 4 Jami kibëc n'Obanga oketho bëcö, ëka ba tye mörö na myero ëkwër ökö ka ëgamö ki pwöc, 5 piën nwongo ëlönyö ki köp k'Obanga ëka ki lëga. 6 Ka in ibino miö pwony ni both utmego, in ibino bedo atic ka Kiricito Yecu na bër, n'ëpidhö ki köp më yee ëka ki pwony na bëcö na in ilübö. 7 Kwër köp mökö më mingö na thërë ope na ba obedo më lworo Obanga. Pwonyiri keni më lworo Obanga. 8 Piën

pwony më ryëö ler kom tye ki köny mökö, ëntö lworo Obanga tye ki köny i yodhi kibëc, piën twërö kelo kwö më karë ni ëka ki karë na tye ka bino anyim. 9 Man ënë köp më adyer na myero jö kibëc oye. 10 Manön ënë ömiiö onu etio rwök ëka eyelere piën eketho gen onu i kom Obanga na kwö, na ënë obedo Alar ka jö kibëc, ëka rwök mërë pi jö n'oye. 11 Pwony cik ni giní ëka ikob ni jö kibëc më timö gin na in ikobo. 12 Kür iye ngat mörö ocai ni in pod itüdi, ëntö bed apor both jö n'oye i twak, i kwö, i mar, i yee ëka bedo abonge gin mörö na rac. 13 Mii karëni më kwanö Cöc na Leng i nyim lwak, i itü köp mërë ëka më pwonyogi naka ka an adwogo. 14 Tii ki mic n'emii i karë n'edwarpiny ötwak ëka edite ka jö n'oye Kiricito omii gum ki ketho cing-gí i wii. 15 Keth köp ni i tic, keth cwinigi ië, ëk jö kibëc önën kite na in itye ka woth ködë anyim. 16 Gwokiri keni ëka igwök pwonyini thon. Makgi na tük, piën ka itimö kömanön, in kikomi ibino lari kanya acël ki jö na winyo köpni.

5 Kür itwak ki gero both adwong mörö n'otii, ëntö twak ködë na calö apapni. Myero imak awope na calö utmegoni, 2 mon n'otii na calö ayani, ëka ki mon na thinö na calö amegeni, abonge thama mörö na rac. 3 Mii wörö both mon na cwögi öthöö, na mitö giní köny rwök. 4 Ëntö ka dhakö na cwörë öthöö na tye k'ëthinhö onyo k'ëkwaë, myero gin kono öcak pwonyo tic më dinigi ki gwökö pacögi nakun miö giní köny both jö n'önywölögi. Man ënë gin na yomo cwin y Obanga. 5 Ëntö dhakö na cwörë öthöö n'odong këne abonge ngat mörö na miö ën köny, ketho gen mërë i kom Obanga ëka mëdërë më lëga both Obanga kiceng ëka kiwor pi köny. 6 Ëntö dhakö na cwörë öthöö na rangö yom cwin y më jami na bëcö këkën nwongo öthöö kadí bed pod kwö. 7 Mii cik ni both jii, ëk obed giní abonge köp mörö n'ëjükögi ië. 8 Ka cë dhanö mörö ba miö köny both wede mërë, ëka rwök mërë pi jö më ödë, nwongo dong ökwërö yee mërë ökö, ëka rac rwök na löö ngat na ba oyeo Obanga. 9 Myero kür ëcö nyieng dhakö mörö na cwörë öthöö na mwaka më dit mërë bara thuno pyer abicël, ëka myero obed dhakö n'obedo ki cwörë acël këkën, 10 myero obed ngat na ngere pi tic mërë na bëcö, na calö gwökö ëthinhö, ngat na jölö wele, ngat na lwökö tyën jö k'Obanga na leng, ngat na kónyö jö na pëkö diögi, ëka ngat na mirë pi tic na bëcö i yodhi kibëc. 11 Ëntö pi mon na pod thinö na cwögi öthöö, kür iketh nying-gí i kin jö nön. Ka miti më komgi ödiögi, miö kwërö giní ketho gen-gí i kom Kiricito ökö, cë cakö giní bedo ki miti më nyom. 12 Pi manön miö kelo ngölö köp i komgi, piën nwongo ötürö giní cikërë

na mëgi më acël. **13** Mëd i kom manön, lökërë gini dökö jö na komgi wac ëka nwongo bedo gini ka woth awotha i öt ki öt. Gin ba obedo jö na komgi wac këkën, ëntö dökö gini jö na twak atata, ëka bedo gini jö na ridërë i gin na ba obedo mëgi, bedo ka twakö gini köp na ba myero ötwak gini. **14** Pi manön ömïö akobo both mon na thinë na cwögi öthöö ni myero önyömërë gini ëk önywöl gini ëthinë, ëka ölöö gini pecigi ëk kür ömïi karë both lang onu më twakö gin mörö na rac i kom onu. **15** Piën jö mökö ki kin-gi dong ölökërë gini ökö më lübö kör Catan. **16** Ka cë dhakö mörö n'oye Kiricito tye ki mon thöö na ën gwökögi, ën myero ömëdërë më könyögi ëk kür oketh pëkö i kom jö n'oye Kiricito, ëk jö n'oye Kiricito obed gini ka könyö mon na cwögi öthöö na mitö ëkönyögi. **17** Edite na löö jö n'oye Kiricito myero ëmïigi wörö rwök, pol mërë jö na ticgi obedo më titö köp k'Obanga ëka pwony. **18** Piën Cöc na Leng kobo ni, "Kür itwe dhö thwön ka tye ka nyönö kal më apwoda," ëka ni, "Atic myero ëcül öcara mërë." **19** Kür iye köp mörö më adoth i kom adit mörö thwara ka ecaden ariö onyo adek omoko gini kokogi i kome. **20** Edite na timö bal myero ijükgi ökö i nyim jii, ëk ömïi jö nököne obed gini ki lworo. **21** An dong aciki, i nyim Obanga ëka i nyim Kiricito Yecu k'emalaika n'ëyëro, më gwökö cik ni gini abonge lengere, ëka kür ibed ngat na lengere. **22** Kür ibunyiri më ketho cingi i wi ngat mörö piöpiö, ëka kür iribiri ki jö nököne i kom balgi. Ëntö myero ibed na leng. **23** Cakërë kobedini, kür imodh pii këkën, ëntö cak madhö köngö ölöc na nökök më könyö ii pi two na maki karë ki karë. **24** Bal ka jö nököne nen ökö kanya leng, na bara othuno anyim i kabedo më ngölö-köp; ëntö bal ka jö nököne lübö körgi. **25** I yoo acël nön, tic na bëcö nen ökö kanya leng, ëka ba tye mörö na twërö kanërë.

6 Jö kibëc na tye gini i thë löc më opii, myero otii gini k'editegi na calö jö na myero ëwörgi ki wörö n'opong, ëk ngat mörö kür ötwak köp na rac i nyiing Obanga ëka pwony onu. **2** Jö na dong tye k'editegi n'oye myero kür ökwër gini nyutho wörö bothgi, piën gin obedo utmego. Nakaka manön, gin myero otii tic bothgi na löö, piën jö na nwongo köny ki i ticgi obedo gini jö n'oye ëka jö na gin marö. Man ënë jami na in myero ipwony ëka ikönygi i yodhi kibëc na in itwërö. **3** Ka ngat mörö pwonyo pwony na path nakun ba lübö köp adyer ka Rwoth onu Yecu Kiricito ëka ki kite na myero jö n'oye ökwö ködë, **4** nwongo ën kethere malö këne k'awaka, ëntö ba ngeo gin mörö kadä k'acël. Ën nwongo opong ki par na reco më pyem ki dhaa i kom köp mökö, na kelo nyeko, pyem, ayeny ki par na reco

na miö gen rwenyo ökö ki i kin dhanö, **5** ëka miö jö na thamagi ba tio, n'ope gini dong ki köp më adyer. Gin thamö gini ni lworo Obanga ënë obedo yoo më nwongo lönyö. **6** Lönyö dit rwök i lworo Obanga ka cë iyeng ki gin mörö këkën na in itye ködë. **7** Piën onu ba ekelo gin mörö i lobo, ëka onu ba ebino tero gin mörö ki i lobo. **8** Ëntö ka onu etye ki cem ki ruk, jami ni bino römö onu. **9** Jö na mitö bedo ëlönyö dönyö gini i atëmatëma cë podho gini i bal, ëka moko gini i miti na pol më mingo na miö rwenyo gini ëka thöö gini ökö. **10** Piën marö lim ënë acaki më gin na reco kibëc. Man ënë gin n'ömiö jö mökö yaa gini ökö ki i yee, na tye gini ki miti rwök i kom lim, ëka miö can na pol ata bino i komgi. **11** Ëntö in, dhanö k'Obanga, kwër jami ni kibëc, ëka iketh cwinyi i kite n'atir, i lworo Obanga, i yee, i mar, i diö cwinyi ëka ki mwolo. **12** Lwëny lwëny na bër më yee. Mak kwö na ba thum na ték na yam ecwodi ië i karë na in ituco yeeni i nyim ecaden na pol. (aiönios g166) **13** An aciki i nyim Obanga na miö kwö both gin na kibëc, ëka i nyim Kiricito Yecu, na ën otuco yee mërë na bër i karë na ën ömïö caden mërë i nyim Pontio Pilato: **14** Gwök cik n'ëmiö bothi abonge bal mörö onyo köp mörö n'ejuki ië, naka ka Rwoth onu Yecu Kiricito bino nen, **15** n'Obanga bino kelo i karë mërë kikome—Obanga, n'ëpwöyö, ën acël këkën ënë Won Twër, Rwoth ka rwodhi, **16** na ën Obanga acël këne na ba thöö, na bedo i tar mörö na ngat mörö ba römö nyikö na cwök ködë, na ngat mörö pod bara önenö onyo twërö nënö. Wörö ëka twër na ba jik obed bothe na twal. Amën. (aiönios g166) **17** Cik ëlönyö më karë ni, öwëk gini wakërë, ëka kür oketh gini gen-gi i kom lönyö, na gen mörö ope ië, ëntö oketh gini gen-gi i kom Obanga na miö onu jami kibëc na büp na yomo cwinyi onu. (aiön g165) **18** Kob niggi otii tic na bëcö, ëka obed gini jö n'ölöny i timö gin na bër. Po wiggi më miö jamiggi ki yom cwinyi, ëka önywak gini gin na gin tye ködë. **19** Ka ötimö gini kömanön, nwongo ökanö gini lönyö na bër piirgi kën-gi pi karë më anyim, ëk ömak gini kwö na ënë kwö më adyer. **20** In Timoteo, gwök gin n'ëmiö i cingi. Gwokiri ki kom köp mökö n'ëtwakö na ba obedo më wörö Obanga, ëka ki kom pyem mökö na yaa ki gin na gin cwodo twodo twodo ni ngec, **21** na jö mökö orwenyo yeegi ökö pi yeo koth twak ni. Kica k'Obanga obed kodwu.

2 Timoteo

1 Waraga ni öya kî both Paulo n'obedo akwëna ka Kiricito Yecu pî miti k'Obanga, na lûbërë kî cîkërë mërë më miö onu kwô na tye i Kiricito Yecu. **2** Both Timoteo athîn-na na an amarô: Obanga Apap ëka Kiricito Yecu Rwoth onu ömîi bothi gum, kîca, ëka kuc. **3** An amiö pwôc both Obanga, na an atio bothe kî thama n'atîr, kite na kwerena otio ginîi bothe. Kiceng ëka kiwor an apo piri i lëgana. **4** Ka an apo i kom pii wangi, miö athamö më nënôni, ëk ka twërë apong kî yom cwiny. **5** An apo i kom yeeni na twodo mörö ope ië, n'ôcakö bedo both adhani Loi ëka ayani Yuneki, ëka an angeo nî yee nën tye bothi thon. **6** Pî tyën köp ni an apo wii më tic kî mîc n'Obanga omii i karë na an aketho cînga i wii. **7** Piën Obanga ba ömîö onu cwiny më lworö, ëntö cwiny na miö onu tükö, mar ëka gwökërë kën jö. **8** Dong pî manön lewic kür ömakî më miö caden i kom Rwoth onu, onyo i koma na an abedo amabuc mërë. Kî tükö n'Obanga mii, yubiri më dangö can köda pî köp më Emuth na Bër. **9** Ën ölarö onu ëka ocwodo onu më bedo jögë na leng—pathî pî gin mörö na onu ëtimö ëntö pî tyën köp më yüb mërë ëka kîca. Kîca ni ëmiö both onu i Kiricito Yecu na bara ecweo lobo, (aiönios g166) **10** ëntö kobedi dong enyutho ökö both onu i bino k'Alar onu Kiricito Yecu n'ökwanyö thöö ökö ëka okelo kwô na bedo na twal n'onen kanya leng pî köp më Emuth na Bër. **11** Obanga öyëra na calö akwëna ëka apwony më titö köp më Emuth na Bër ni. **12** Man ënë gin n'ömiö an atye ka limö can kobedini. Ëntö an lewic ba ömaka, piën an angeo ngat na yeena ocung i kome ëka angeo nî ën twërö gwökö na bër gin n'eketho i cînga naka i nînö nön. **13** Köp na in iwinyo kî botha, gwök na calö gin na pîrgî tük më pwony, kî yee ëka mar na tye i Kiricito Yecu. **14** Gwök gin na bër n'eketho i cingi pî tükö ka Tipo Naleng na bedo iï onu. **15** In ingeo nî jö kibëc na bedo ginîi i Acia öwëka ginîi ökö, ëka Pugelo gin kî Kermogen tye ginîi i kin-gî. **16** An alëgö nî Rwoth myero obed kî kica i kom pacö k'Oneciporo, piën ën obedo ka kweo cwinya ëka lewic ba obino ömakö ën i koma i karë n'etwea i buc. **17** Ëntö i karë na ën othuno i Roma, obedo ka rangöna rwök naka obino onwonga. **18** An alëgö nî Rwoth myero ömîi ën onwong kica na yaa kî both Rwoth i nînö nön! In ingeo na bër rwök kit kõny na pol na ën ökönya ködë i Epeco.

2 Timoteo, athîn-na, cung na tük i kica n'ëmiö both onu i Kiricito Yecu. **2** Gin na in iwinyo kî botha i nyim ecaden na pol, in thon ikob both jö na genere

na römö pwonyo kî jö nökenë. **3** Dang gin na rac n'ëtîmö i komi kanya acël ködwa, calö acikari na bër ka Kiricito Yecu. **4** Acikari mörö ope na tye i dhö tic na miö tic kî yökö bodo wie, piën thama mërë tye nî myero eyom cwiny adit n'öcöö ën i acikari. **5** Röm aröma, ka ngat na tye ka pyem i ngwëc, ba twërö löönö ngwëc ka ba ölübö cîk më ngwëc. **6** Apur n'otio tic na tük ënë myero öcak camö gin n'öcëk kî i pwodho mërë. **7** Tham pî gin na an atye ka kobo. Rwoth bino miöni kite më nîang i kom jami nî kibëc. **8** Po i kom Yecu Kiricito, akwar Daudi n'Obanga ocero kî kin jö n'öthö. Man ënë köpna më Emuth na Bër, **9** na an atye ka limö can pîrë, nakun etwea kî nyör calö abal. Ëntö köp k'Obanga ba etweo. **10** Pî manön ënë gin n'ömiö atye ka limö can kibëc pî jö n'ëyërogî, ëk gin thon onwong larë na tye i Kiricito Yecu, kanya acël kî dheo na ba thum. (aiönios g166) **11** Man ënë köp më adyer: Ka onu ëthöö ködë, onu thon ebino kwô kanya acël ködë; **12** ka onu ëdangö can, onu thon ebino löc kanya acël ködë. Ka onu ëkwërö ën, ën thon bino kwërö onu, **13** ka onu ba egenere, ën gire genere naka naka, piën ën ba twërö kwërë kënë. **14** Bed ka po wi jö k'Obanga i kom köp ni, ëka icikgî döki i nyim Obanga ëk öwëk ginîi pyem i kom köp mökö; piën manön ba bino kõnyö ngat mörö, ëntö balö jö kibëc na winyo. **15** Tim kî tük më miri keni both Obanga na calö atic n'ëpwöyö, atic na lewic myero kür ömakî ëka makö köp më adyer i yoo n'atîr. **16** Kwër boko köp mökö na ba obedo më wörö Obanga, piën jö na dönyö ië bino rwenyo arwenya i kite më wörö Obanga. **17** Pwonygi bino këth calö bür na camö kom dhanö. Kumenayo gin kî Pileto tye ginîi i kin jö nön, **18** n'ölökërë ginîi ökö kî kom köp më adyer. Gin kobo nî cer ötimërë dong ökö, ëka tye ka balö ginîi yee ka jö mökö. **19** Ëntö acaki thërë n'Obanga oketho tye n'ocung na tük, na tye kî cöc i kome nî: "Rwoth ngeo jö n'obedo mëgë," ëka nî, "Dhanö acëlacël na cwodo nying Rwoth myero ölökerë ökö kî i kom bal." **20** I öt na thwönë, ba bedo ië jami më gol kî ryal këkën, ëntö bedo ië thon jami mökö n'ëyübögi kî bao ëka lobo; mökö ëyübö pî tic na pîrë tük ëka nökenë pî tic na pîrë ba tük. **21** Ka dhanö mörö ölönyërë nakun öwëkö kite mërë na reco ökö, ën bino bedo gin më tic n'etio ködë i karë më dheo, kwô mërë bino bedo na leng, ëka bino bedo dhanö na pîrë tük both Adwong nakun yübërë më tio tic mörö këkën na bër. **22** Pî manön, kwër miti më awobi ökö, ëntö iketh cwinyi i kite n'atîr, yee, mar kî kuc, kanya acël kî jö kibëc na tye ka cwodo ginîi Rwoth kî i cwinygi na leng. **23** Kwër pyem më mingö ökö na bino pî kwia piny, piën in ingeo koth pyem na calö manön kelo dhaa. **24** Atic

ka Rwoth myero obed ngat na ba dhaa atata, èntò myero obed ngat n'obedo akica both jò kibèc, obed apwony na ryèk na ngeo pwony, ngat na diò cwinye. **25** Obed ngat na twèrò tirò jò na pyem kòdè k' mwolo, èk karè nòkènè Obanga twèrò miò jò nòn cwiny mè ngut èk òniàng gini na bèr i kom kòp adyer, **26** cè miò ryèkògì dwogo èka bino gini bwòth k' kom pawaka ka Catan n'onwongo miògì tio gin na èn mitò.

3 Myero ìniàng unu n'ì karè mè ajiki, piny bino bedo na rac. **2** Jii bino marò komgì kèn-gì, nakun bedo jò na marò lím, jò na wakèrè, jò na caò jii, jò na yanyò jii. Ba bino gini winyo enyodogì, ba bino gini miò pwòc mòrò, bino bedo gini jò na ba leng, **3** ba tye gini k' mar, ba timò gini kica both jii, obedo gini jò na twakò kòp mè twodo i kom jò nòkènè, obedo gini jò na mitigi ba jùkèrè, jò na ger, jò na dag gini gin na bèr, **4** obedo gini jò òròrò, jò na tye atata na ba parò gini piny, jò na kethere gini malò kèn-gì k' wakèrè, jò na marò kwò na yot nakaka marò Obanga— **5** bino gini makò kite mè lworo Obanga na nen k' yòkò, èntò kwèrò gini tèkò mèrè òkò. Pokiri òkò k' i kom jò na calò manòn. **6** Jò mòkò tye i kin-gì na dönyò gini i peci ka jò nòkènè, cè lòò gini thama ka mon mòkò na tye k' gòrù, na pèkò mè bal obuogì òkò, na mitigi tye na papath cè bedo ka ywaogì tungi k' tungi, **7** nakun pwonyere gini karè kibèc, èntò ba twèrò gini niàng i kom kòp adyer. **8** Jò nòn ròm aròma k' Yane èka Yambure na yam opyem gini k' Muca. Gin thon tye ka pyem k' kòp adyer i kite acèl nòn, thamagì dong kòny mèrè ope, èka yeegì ba tye kakarè. **9** Èntò gin ba bino mèdèrè anyim pièn mingogì nòn bino ngere òkò both lwak kibèc calò mè ka Yane èka Yambure. **10** Èntò in, dong ingeo pwonyina òkò kibèc, k' kite na an abedo ka kwò kòdè, yùbna kibèc inénò, yeena, diò cwinya, mar na an atye kòdè, k' kite na an abedo ka dangò k' can kòdè, **11** inénò thon kite na gin obedo ka yelona kòdè, k' can na pol—dòk ingeo gin n'òtimèrè i koma i Antiokia, i Ikonio, k' Licitra, ayelayela na pol na an anwongo. Èntò Rwoth òlara òkò k' i è kibèc. **12** Adyer, jò kibèc na mitò gini kwò i kite mè lworo Obanga i Kiricito Yecu ebino yelogì, **13** nakun jò na reco k' jò n'obedo gini etwodo bino gini mèdèrè k' bedo na rac rwòk na dong lòò òkò, nakun bwòlò gini jò nòkènè èka gin thon èbwòlògì. **14** Èntò na calò in, myero imediri jò gin na in ipwonyiri i èka na in iyeo, nakun ingeo jò na yam opwonyi gini, **15** èka kite na in ingeo k' Còc na Leng kòdè i karè mè thinoni na twèrò miòni bedo na ryèk i yoo mè larè pi yee i Kiricito Yecu. **16** Còc na Leng kibèc ècòò pi tèkò ka Tipo Naleng k' Obanga. Kònyò mè pwony,

mè coko, mè tirò kite ka dhanò, èka mè pwonyo dhanò i yoo mè kite atir, **17** èk dhanò k' Obanga obed n'otengo, na nwongo òyübèrè i yoo kibèc mè tio tic na bèr kibèc.

4 Aciki i nyim Obanga èka i nyim Kiricito Yecu, na bino ngòlò kòp ka jò na kwò k' jò n'òthòò, èka ka bino dwogo mè lòc na calò Rwoth, an amiò cìk ni bothi: **2** Tit kòp k' Obanga; bed n'ì yubiri i karè na bèr èka i karè na rac, tir jii, cokgì èka icùk cwinygì—nakun ìdiò cwinyi rwòk èka k' pwony na pìrgì tèk. **3** Pièn karè tye ka bino na dhanò ba bino winyo gini pwony mè adyer. Nakaka manòn, gin bino rangò epwonye na bino yomo cwinygì mè kobo gin na ithgì mitò winyo. **4** Gin bino lòkò ithgì òkò k' kom kòp mè adyer èka lòkèrè gini i kòp mòkò mè òdòdò. **5** Èntò in, myero ibed ngat na gwòkèrè i karè kibèc, i dangò can, i diò cwinyi, ti tic mè titò kòp mè Emuth na Bèr, dòk icob ticni kibèc na bèr. **6** An dong ècwòk ònyò remona calò gin mè atyèra i wi keno tyèr, èka karèna mè wèkò lobo ni dong cwòk. **7** An dong alwènyò lwèny na bèr, atyeko ngwèc, èka agwòkò yee. **8** Kobedi dong èkanò nina tok mè kite atir, na Rwoth na ngòlò kòp atir bino miò botha i nìnò nòn—èka pathi botha kèkèn, èntò both jò kibèc na cwinygì tye ka kùrò pi dwogo mèrè. **9** Tim k' tèk mè bino botha piòpiò, **10** pièn Dema dong òwèka òkò pi marò jami mè lobo ni, èka òcidhò òkò yo Tecalonika. Krecen òcidhò yo Galatia, èka Tito òcidhò yo Dalmatia. (aiòn g165) **11** Luka kènè ènè tye kanya acèl kòda. Nwong kom Marako èka ibin kòdè, pièn èn bèr rwòk èka kònya i dhò ticna. **12** An aoro Tukiko òcidhò yo Epeco. **13** Ka in ibino, kel nina bòngù na bor na yam awèkò i Teroa i pacò ka Karpo. Kel thon bukena nòkènè na pìrgì tèk n'èyübò k' pyen. **14** Alegijanda n'obedo athedh mola òtimò tim na rac rwòk i koma, Rwoth bino cùlò èn i kom tim mèrè nòn. **15** In thon myero igwokiri rwòk kòdè, pièn èn obino opyem rwòk i kom kòp onu. **16** I pidona mè acèl, ngat mòrò ope n'obino ocung pira. Jò kibèc obino òwèka gini òkò. Pi manòn Obanga kùr òngòl kòp i wigì. **17** Èntò Rwoth ocung ka ngeta èka òmia tèkò, èk an abed ka tuco kòp mèrè kakarè, èk Erok kibèc owiny gini. Èka Rwoth obino òlara k' i dhò kibwor. **18** Rwoth bino laròna k' i kom gin na reco kibèc, èka bino kelona na bèr i ker mèrè mè polo. Dheo obed bothe naka naka. Amèn. (aiòn g165) **19** Mtho Piricila gin k' Akwila, k' jò mè pacò ka Oneciporo. **20** Eracito obedo i Korinti, èka awèkò Tropimo na two i Mileto. **21** Tim k' tèk ibin na bara karè mè cwir òcakèrè. Yubulo omothi, Pudèn gin k' i

Lino, Kalaudia, ěka utmego kībēc. 22 Rwoth obed
kodi. Kīca mēřē obed kodwu.

Tito

1 Waraga ni öya ki both Paulo, n'obedo atic k'Obanga ëka akwëna ka Yecu Kiricito. An eora më jïngö yee ka jö n'Obanga öyëro ëka më pwoyogî më ngeo köp më adyer na nyutho nîgî kite më kwô më lworo Obanga. **2** Yee ëka ngec ni ocung i kom gen më kwô na ba thum, n'Obanga, na ba twakô köp më twodo, onwongo öcikö na bara ecweo lobo. (aiönios g166) **3** Man ënë karë n'Obanga onyutho köp mëré kanyalër na wan ëtitö both jö kibëc. Man ënë köp n'onwongo egena ködë, n'Obanga Alar onu öcikö botha më atîta. **4** Both Tito, athi-n na më adyer na an anywakô kodi yee: Obanga Apap ëka Alar onu Kiricito Yecu ömïwu gum ëka kuc. **5** Tyën köp n'ömiö an aweki i Kurete onwongo obedo më yübö tic n'odong na ba othum, ëka më ketho edite i taun acëlacël, kite n'onwongo an aciki ködë. **6** Atëla myero obed ngat na köp möro na rac ope i kome. Ën myero obed ngat na tye ki dhakö acël. Ëthinë myero obed jö n'oye Yecu Kiricito, na köp möro më carö carö kür owinyere i komgî, onyo na ba winyo ginî pîny. **7** Piën atëla ka jö n'oye Kiricito obedo ngat na gwökô jami k'Obanga, myero obed ngat na köp möro na rac ope i kome—kür obed ngat na wakërë, kür obed ngat n'akëmö makö piöpïö, kür obed ngat na më, kür obed akwinyö, kür obed ngat n'owor i lim. **8** Ën myero obed ngat na gwökô welo, ngat na marö timö gin na bër, ngat na löre këné, ngat na kite atîr, ngat na cwinye leng, ëka na gwökërë këné. **9** Ën myero ömak köp më adyer na tæk kite n'epwonyo ködë, ëk ömïi ën öcük cwiny jö nökökë ki pwoy më adyer ëka më yübö thama ka jö na pyem ködë. **10** Piën jö n'obedo epyem pol ginî, jö na twakô köp na thërë ope ëka jö na bwölö ginî jïi, pol mëré gurup ka jö na mitö ni jö kibëc myero ëlirgî pi larë. **11** Koth jö nön myero imiwugî ölling ökö, piën nwongo tye ka balö ginî jö na pol naka ki jö më udigî kibëc ki pwoy jami na myero gin kür opwony—ëka ni pi woro më nwongo lim. **12** Naka thon ngat möro acël ki kin edwarpînygî okobo ni, “Jö Kurete obedo ginî etwodo karë kibëc, cal ginî ki leeni na ger, eworo na komgî wac.” **13** Caden ni tye atîr. Pi manön, myero ijükgî na tæk ëk obed ginî ki yee më adyer, **14** ëka kür obed ginî më ketho cwinygî më winyo köp k'Eyuda më ödödö mökö na thërë ope, onyo cik ka jö na kwërö ginî köp adyer. **15** Both jö na leng, jami kibëc tye na leng, ëntö both jö na kitegî öbal ökö ëka ba yee ginî, gin möro na leng dong ope bothgî. I adyer, ryëkögî ëka thama na tye i igi na nyutho nigî bal otyeko bal dong ökö. **16** Gin tuco

ki dhögî ni gin engeo Obanga, ëntö ticgî nyutho ni gin ba ngeo Obanga. Gin obedo jö na reco, jö na ba winyo pîny ëka ba twërö ginî timö gin möro na bër.

2 In myero ipwony gin na rwatërë ki köp më adyer. **2** Pwoy cwö na dito më bedo jö na löre kë-n-gî, jö na römö awöra, jö na gwökërë kë-n-gî, jö na yeegî ki margî tye kakarë nakun diö cwinygî. **3** Kömanön thon, pwoy mon na dito ni gin myero obed ki wörö i kite më bedogî kibëc, kür obed ginî wegî anîi na nwongo cökö köp ki both jö nökökë, kür obed ginî jö na dong ödökö ginî opii ka köngö, ëntö obed ginî jö na pwoy gin na bër. **4** Cë gin dong twërö pwoy mon na thinë më marö cwögî ëka ëthinögî, **5** obed ginî mon na löre kë-n-gî ëka mon na leng, na tio ginî tic më pacö, mon n'obedo ginî ëkica nakun mirë ginî both cwögî, ëk kür ömïi jö nökökë öyany köp k'Obanga. **6** I yoo acël nön, cük cwiny awope ni myero obed ginî jö na gwökërë kë-n-gî ki thama na tye atîr. **7** In kikomi myero ibed apor më timö gin na bër i yodhi kibëc. Bed ngat na kite atîr i pwoyni, keth cwinyi ië rwök, **8** nakun itwakô köp adyer na ba miögî karë më nwongo bal möro ië, ëk ömïi lewic ömak ngat möro na mitö pyem kod onu, piën nwongo gin na nënö gin möro na rac na myero okob ginî i kom onu. **9** Pwoy opii obed ginî ki winy both editegî i karë kibëc, më tëmö yomo cwinygî. Gin myero kür opyem ködgî, **10** ëka kür ökwäl ginî gin möro ki bothgî, ëntö myero onyuth ginî ni gin jö na genere rwök, ëk i gin na kibëc na gin bino timö ömïi pwoy i kom Obanga Alar onu onen na bër. **11** Piën kica k'Obanga na kelo larë onen dong ökö both jö kibëc. **12** Kica nön pwoy onu më kwërö lübö kite ka jö na ba lworo Obanga ëka ki miti kibëc më lobo ni. Pwoy onu më gwökërë këkën onu, ëk ebed na cwiny onu tye atîr, ëka ki kwô më lworo Obanga i lobo ni, (aiön g165) **13** nakun onu ëküro gum na gen onu ocung ië—ënë më nënö Obanga onu na dit ëka Alar, Yecu Kiricito ka bino dwogo ki dheo. **14** Ën ömirë këné pi onu më gönyö onu ökö ki i kom bal kibëc ëka më lönyö onu ëk ebed jögë kikome, na tye ginî ki miti më timö gin na bër. **15** In myero dong ikob köp ni ginî. Cük cwinygî ëka ijükgî ki twër kibëc. Kür imïi ngat möro ocai.

3 Po wi jö n'oye më mirë kë-n-gî i thë löc k'ëtëla ëka wegî twër, më bedo ki winy, më yübëré pi tio tic kibëc na bëcö. **2** Kob nigî kür ötwak ginî köp na rac i kom ngat möro, obed ginî ki kuc, obed ginî ki mwolo ëka më timö kica both jö kibëc. **3** I karë möro n'opoth anged, onu thon onwongo pod ebedo jö na ming, jö na ba winyo pîny, onu onwongo erwenyo ökö ëka ebedo opii më miti ka jami na papath na yomo

cwiny onu. Onu ëbalô karë onu i cwiny më nyeko ëka
 adagë, jii ödagö onu ëka onu thon ëdagërë këkën
 onu. **4** Ëntö i karë na kica ëka mar k'Obanga Alar
 onu onen, **5** ën ölarö onu, pathi pi tic mörö na bëcö
 n'onwongo onu ëtimö, ëntö pi kica mëre. Ën ölwökö
 bal onu nakun miö onu nywölërë më ariö ëka më
 miö onu dökö jö na nyen ki Tipo Naleng. **6** Ën öönyö
 Tipo Naleng i kom onu na thwönë i Alar onu Yecu
 Kiricito. **7** Pi kica mëre ën ökwanö onu ni kite onu
 atir ëka ömïö onu më bedo ki gen më nwongo kwö
 na ba thum. (aiönios g166) **8** Man ënë köp adyer. An
 amitö ni icung unu na tük i köp ni gini, ëk jö na dong
 oye gini Obanga obed gini ki thama më mirë më
 tio tic na bëcö. Manön ënë bër rwök ëka bedo më
 köny both jö kibëc. **9** Ëntö kwër unu köp më pyem
 mökö më mingo mingo ëka ki köp i kom nying mökö
 më thëkwarö, dhaa ëka larö köp i kom cik. Man gini
 kibëc ba bino könyöwu, ëka köny mëre ope. **10** Cok
 dhanö na kelo apokapoka wang më acël, ëka icok
 wang më ariö. Kinge manön, kür döki iribiri ködë. **11**
 Myero inge ni koth dhanö nön ölökerë dong ökö ki
 köp adyer ëka ötimö bal; ën dong öngölö köp i kome
 këne. **12** Ka an abino oro Artema onyo Tukiko bothi,
 nën ni itimö tük më bino yo botha i Nikopoli, piën an
 dong atyeko moko thamana më bedo kunön i karë
 më cwir. **13** Tim ki tük më miö köny both Jena, na ën
 obedo ngat na ngeo cik, gin k'Apolo i wothgi ëka
 inën ni gin tye ki jami kibëc na gin mitö. **14** Jö onu
 myero opwonyere gini më mirë më tio tic na bëcö, ëk
 obed gini jö na twërö könyö ewodhgï na can mökö
 diögï, ëka kür obed gini ki kwö na köny mëre ope.
15 Utmego kibëc na tye gini kanya acël köda kany
 omothi gini. Moth utmego kibëc na marö onu i yee.
 Kica k'Obanga obed kodwu!

Pilemon

omothowu. 24 Marako, Aricitako, Dema ëka Luka
etic ewodha thon omothowu. 25 Kica ka Rwoth Yecu
Kiricito obed kodwu.

1 Waraga ni öya kî both Paulo, n'obedo amabuc ka
Kiricito Yecu, ëka Timoteo ömîn onu, Both Pilemon
okone onu më amara ëka atic awodh onu, 2 kî jö
n'oye Kiricito na cökêrê î odî gîn k'amîn onu Apia, ëka
both Arikipo acikari awodh onu: 3 Obanga Apap onu
ëka Rwoth onu Yecu Kiricito ömîiwu gum ëka kuc. 4
An apwöyö Obangana î karê kibêc kite na an apo piri
î lëgana, 5 piën an atye ka winyo köp î kom marni pî
jö k'Obanga na leng kibêc ëka yeeni î kom Rwoth
Yecu. 6 Kite na in itye ka nywakö yeeni kî jö nökênê î
gürê kanya acêl, an alëgö nî ëk iniang na thuth î kom
gin na bër kibêc na onu etye ködê î Kiricito. 7 Marni
ömia yom cwiny na thwönê rwök ëka thon öcükö
cwinya, piën in, ömëra, ikweo cwiny jö k'Obanga na
leng. 8 Pî manôn, kadî bed nî an atye kî tæk cwiny î
Kiricito na mïö an aciki më tio gin mörö na mîtêrê, 9
ëntö pî mar, an anênö nî bër akwai. An Paulo, na
bedo ngat n'otii ëka kobedini thon abedo amabuc
pî Kiricito Yecu, 10 an akwai pî athîin-na Onecimo,
na an adökö apap mërê nakun onwongo an atye î
buc kany. 11 Î karê n'opoth ên onwongo ba tye kî
köny mörö bothi, ëntö kobedini ên dong tye kî köny
na thwönê rwök bothi ëka botha. 12 An atye ka oro
ên cen yo bothi—na ên obedo dhö cwinya kikome.
13 An onwongo amîtö nî agwök ên botha kany, ëk
ömia köny na kakari nakun pod atye î buc pî tîtö köp
më Emuth na Bër. 14 Êntö an onwongo ba amîtö nî
atîm gin mörö nakun in ba iyeo, ëk bërnî kür obed na
calö gin mörö n'edii adîa ië, ëntö obed kite na in iyeo
ködê. 15 Gwök onyo gin n'ömiö ên opokere kodi pî
karê na nönök onwongo obedo nî ëk igam ên yo bothi
dong na twal— (aiōnios g166) 16 pathî dökî na calö opii,
ëntö na löö opii ökö, na calö omego më amara. Ên
pirê tæk botha ëntö pirê tæk bothi rwök na calö dhanö
na konyi ëka na calö omeru î Rwoth. 17 Pî manôn, ka
in ingeo nî an abedo atic awodhi, jöl ên kite na in
onwongo itwêrö jölöna ködê. 18 Ka cê ên ötimö gin
mörö na rac bothi, onyo tye kî banyani mörö, kwan-gî
î wia. 19 An, Paulo, ênê acöö waraga ni kî cinga. An
abino cülöni—nakun an ba akobo nî in thon itye kî
banyana, ên kwöni kikome. 20 Eyo, ömëra, an amîtö
köny mörö kî bothi î Rwoth. Kwe cwinya î Kiricito. 21
An atye kî gen na tæk î komi nî in ibino winyo dhöga,
ênê ömiö an acöö nini köp ni nakun angeo nî ibino
timö na löö gin na an akwaö. 22 Gin acêl nökênê:
Yüb nîna kabedo mörö na an abino bedo ië, piën an
atyë kî gen nî lëgawu bino mïö ëgönya më dwogo yo
bothwu. 23 Epapira, amabuc awodha î Kiricito Yecu,

Yakobo

1 Waraga ni öya kî both Yakobo atic k'Obanga ëka Rwoth Yecu Kiricito. Both kaka apar wie ariö n'ökêth gîni i wi lobo thükül. Amothowu. **2** Utmegona, bed unu kî yom cwiny na thwönë ka ëtëmöwu i yodhi na papath, **3** piën ingeo unu nî tëmö yeewu miö i'diö unu cwinyu. **4** Wëk unu diö cwiny ocob tic mërë ëk ibed unu jö n'otengo, na bal mörö ope i komwu ëka döki ibed unu na gin mörö thon ba orem kî bothwu. **5** Ëntö ka ngat mörö tye i kinwu na ryëkö mërë nönök, myero ën ökwa kî both Obanga na miö both jö kibëc kî yom cwiny, nakun ba coko ngat mörö, ëka ebino miö bothe. **6** Ëntö ka ën lëgö, myero ën oyee ëka kür obed k'alakalaka, piën ngat na tye k'alakalaka röm kî pii më nam na tagere, na yamö cwarö. **7** Dhanö nön myero kür ötham nî ën ebino nwongo gin mörö kî both Rwoth, **8** piën ën obedo dhanö na thama mërë ariö, na ba cung na tük i jami kibëc na ën timö. **9** Jö n'oye n'obedo ëcan myero öwakërë gîni ka etingogi malö, **10** ëka ngat n'obedo alönyö myero öwakërë ka ëdwökö piny, piën ën bino rwenyo calö Thur lum. **11** Ceng donyo kî lyetho mërë ëka nero lum ökö, thure öny cë lengo mërë bal ökö. I kit yoo acël nön, ngat n'ölöny bino rwenyo ökö i dyere tic mërë më karë kibëc. **12** Ngat na cung na tük i atëmatëma tye kî gum, piën ka ën ölöö atëmatëma, ën bino nwongo tok më kwö n'Obanga öcükërë më miö both jö na marö ën. **13** Ka ëbwölö ngat mörö, ën kür okob nî, "Obanga ënë öbwöla." Piën gin na rac ba twërö bwölö Obanga, ëka ën thon ba bwölö ngat mörö. **14** Ëntö ngat acëlacël miti mërë kënë ënë bwölö ën, ywaö ën ökö, ëka ömö cwinye. **15** Cë kinge ka miti dong öyac, nywölö bal. Bal ka ödongö n'otengo dong, nywölö thöö. **16** Utmegona më amara, kür iwëk ëbwölwu. **17** Gin mörö na bër ëka mic kibëc na bal mörö ope ië bino kî malö both Obanga Apap, na ënë acwec më tar na ryëny, na ba lökërë calö tipo na wirë. **18** Ën öyëro më nywölö onu kî köp mërë n'adyer, ëk onu ebed calö cem na tye i pwodho n'öcakö cëk kî kin jami kibëc n'ecweo. **19** Utmegona më amara, ngee unu köp ni: Dhanö acëlacël myero owiny köp piöpiö, ëntö kür myero öbünyërë më twak, ëka kür akëmö ömak ën piöpiö. **20** Piën akëmö ka dhanö ba cobo kit kwö n'atir n'Obanga mitö. **21** Pi manön, kwër unu gin na kibëc më lewic ëka kî tim na reco na tye i kwöwu. Gam unu kî mwolo köp n'Obanga öpidhö i cwinyu na twërö laröwu. **22** Ëntö bed unu jö na ketho gin n'ëtwakö i tic. Kür ibed unu jö na winyo awinya kékën nakun i'bwölërë unu kenwu. **23** Piën ka dhanö mörö

obedo ngat na winyo köp ëka ba ketho i tic, ën bedo calö ngat na ripo wangë kî i kiyo. **24** Ëntö ka otyeko dong riperë, cidhö ökö ëka cücüth wie wil ökö i kite na ën ebedo ködë. **25** Ëntö ngat na ripo i cik na bal mörö ope ië na kelo kuc, ëka ketho thama mërë ië, na wie ba wil i kom gin na ën owinyo, ëntö tio gin nön—ën bino bedo kî gum i kom gin na ën tio. **26** Ka ngat mörö thamö nî ën ebedo adini nakun ba gwökö lëbë, ën nwongo tye ka bwölërë kënë kî i cwinye ëka dini mërë köny mërë ope. **27** Dini na leng i nyim Obanga Apap na gin mörö na rac ope ië ënë: më könyö ëthinö kic ëka mon thöo na tye i can, ëka më gwökërë kën kür gin mörö më lobo obali.

2 Utmegona, na calö jö n'oye Rwothwa më dheo Yecu Kiricito, kür döki inyuth unu apokapoka mörö. **2** Cë ka dhanö mörö n'oruko agith më gol ëka kî böng na bëcö obino i athukowu, ëka döki dhanö n'obedo acan n'oruko böng na reco obino, **3** un i'cakö unu thamö pi ngat n'oruko böng na bëcö nakun ikobo unu nî, "Adwong, bed i then kany," ëntö both acan ikobo unu nî, "Cung kunön, onyo bed piny ka tyëna kany," **4** manön nwongo ba dong iketho unu apokapoka ökö i kinwu nakun ibedo unu ëngöl-köp kî thama na reco? **5** Winy unu, utmegona më amara: Pathi Obanga ënë öyëro ëcan i lobo ni më bedo ëlönyö i yee ëka më leeno ker na ën öcükö both jö na marö ën? **6** Ëntö un i'caö ëcan. Pathi ëlönyö ënë bürowu? Pathi gin ënë terowu i nyim okiko? **7** Pathi gin ënë jö na twakö köp na reco i kom nyíng na bër n'ëmiö bothwu? **8** Ka igwökö unu cik na pírë tük n'ëcöö i Cöc na Leng nî, "Mar awodhi na calö imarö komi keni," nwongo itimö na bër. **9** Ëntö ka inyutho unu apokapoka, nwongo itimö unu bal ëka ebino ngölö niwu köp na calö jö n'ötürö cik. **10** Piën ngat na gwökö cik kibëc ka opodho i acël nwongo ötürö cik kibëc. **11** Piën ngat n'okobo nî, "Kür idöny i elomi," ënë thon okobo nî, "Kür ineki." Cë ka ba idönyö i elomi ëntö ineko nek, nwongo ibedo ngat na türö cik. **12** Twak na un i'twakö ëka tic na un itio myero obed na calö më ka jö n'ebino ngölö köp nigí kî cik na kelo kuc. **13** Piën ngölö-köp abonge kica bino timërë both ngat mörö kékën na ba obedo timö kica. Ngat na timö kica ba bino lworö ngölö-köp. **14** Köny mërë ngö, utmegona, ka ngat mörö kobo nî eut kî yee nakun ba ketho i tic? Koth yee nön twërö larö ën? **15** Ka omego onyo amego mörö ope kî böngü ëka cem më ninö kibëc, **16** cë ngat mörö kî kinwu okobo ninë nî, "Apë kî kuc; komi obed na mömör ëka cem na bër," ëntö nwongo ba imiö ën gin mörö na mitërë pi kom, cë manön könyö ngö? **17** Kömanön thon, yee kékën, ka ba eketho i tic,

nwongo dong öthöö. **18** Ëntö ngat mörö bino kobo nĩ, “In itye kĩ yee; ĩka an atye kĩ tic.” Nyuth nĩna yeeni abonge tic, ĩka An abino nyutho nini yeena kĩ ngö na an atimö. **19** Un iyee nĩ Obanga tye acël. Bër! Cene thon yee kōmanōn—ĩka komgĩ myël kĩ lworo. **20** In amingo, ĩmitö nĩ enyuth nini nĩ yee abonge tic kōny mērē ope? **21** Kwarö onu Abraam yam ba ĩkwanö nĩ kite atĩr pĩ gin na ĩn ötimö ĩ karē na ĩn ömiö wode lcaka mē aryēda ĩ wi keno tyēr? **22** Un ĩnēnō nĩ yee ĩka tic mērē onwongo tio kanya acël, ĩka yee mērē onwongo ocobere pĩ gin na ĩn ötimö. **23** Ömiö Cōc na Leng ocobere na kobo nĩ, “Abraam oyee Obanga, ĩka ömiö ĩkwanö ĩn nĩ kite atĩr,” ĩka dōkĩ ecwodo ĩn nĩ okone k’Obanga. **24** Un ĩnēnō nĩ ĩkwanö dhanö nĩ kite atĩr pĩ tic na ĩn timö ĩka pathĩ pĩ yee kēkēn. **25** ĩ yoo acël nōn, yam Raab n’obedo ölaya ba ĩkwanö nĩ kite atĩr pĩ ngö na ĩn ötimö ĩ karē na ĩn öjölö öröth pĩny ĩka ömiögĩ owok kĩ ĩ yoo nōkēnē na path? **26** Kite na calö kom abonge yweo nwongo dong öthöö, yee abonge tic thon nwongo öthöö.

3 Utmegona, myero jö na pol kĩ kinwu kür obed ginĩ epwonye, piēn ingeo unu nĩ wan epwonye ebino ngölö niwa köp na tēk na löö jö nōkēnē. **2** Adyer onu kibēc ĩtimö bal ĩ yodhi na pol. Ëntö ka cē ngat mörö ba ötimö bal ĩ ngö na ĩn kobo, nwongo ĩn obedo dhanö na kite bër ĩka dōkĩ twērö gwökö kome kibēc. **3** Onu eketho nywenyo ĩ dhö angole ĩk ömiĩ owiny onu, ĩka onu ĩrömö miö angole cidhö kanya onu ĩmitö. **4** Onyo nēn unu apor kĩ kom mel. Kadĩ bed nĩ döngö ginĩ rwök na yamö ĩnēnē kölogĩ, ĩntö adwö mel twērö wirö wie cidhö kanya ĩn mitö kĩ gin n’ēdwö kĩ mel na tidĩ mörö. **5** Kōmanōn thon, lēb obedo dul kom na tidĩ mörö, ĩntö wakērē ĩ kom jami na thwon rwök. Nēn kite na mac na tidĩ mörö wangö kĩ thwōn bunga ködē. **6** Lēb thon cal kĩ mac, obedo tēkö na rac na balö kom dhanö. Lēb balö kwö ka dhanö kibēc, ketho kwö ka dhanö kibēc kanya rac, ĩka ĩn kikome mac mē kapĩny moko ĩ kome. (Geenna g1067) **7** Dhanö römö gwökö kwa leeni kibēc, wĩny, leeni na wotho ĩ ngöm kĩ korgĩ ĩka leeni na kwö ĩ pii, **8** ĩntö ngat mörö ope na römö gwökö lēb. Lēb rac ĩka ba jükērē, opong kĩ kwir na rac. **9** Kĩ lēb onu ĩpakö Rwoth onu ĩka Apap, ĩka kĩ lēb onu ĩlamö kĩ jö n’ecweogi ĩ thē cal k’Obanga. **10** Kĩ ĩ dhö jö acël nōn donyo kĩ ĩē gum ĩka alem. Utmegona, man myero kür obed kōmanōn. **11** Pii na mit ĩka pii na wac römö möl kĩ ĩ wang kulo acël? **12** Utmegona, yath ölam twērö nyakö yaü, onyo yath ölok twērö nyakö ölam? Kōmanōn thon pii na wac ba römö molo kĩ ĩ wang pii na mit. **13** Nga na tye kĩ ryēkö ĩka na


nĩang kĩ ĩ kinwu? ĩk ĩn onyuth tic mērē mē ryēkö kĩ mwolo pĩ kwö mērē na bër. **14** Ëntö ka itye unu kĩ nyeko na reco, ĩka woro ĩ cwinyw, kür ĩwakērē unu ködē onyo ĩkwēr unu köp n’atĩr. **15** Koth “ryēkö” nōn ba obino pĩny kĩ ĩ polo ĩntö obedo mē lobo, ba wörö Obanga ĩka obedo mē ka cene. **16** Kanya nyeko ĩka larö dito tye ĩē, nwongo anyöbanyöba ĩka tim na reco kibēc tye ĩē. **17** Ëntö ryēkö n’öya kĩ ĩ polo n’öcakö bedo na leng, ĩka bedo mē kuc, mē mwolo, gamö thama kibēc na bēcö, opong kĩ kica, ĩka nyakö nyige na bēcö, ngat na ute ködē ba poko kin dhanö, bedo na cwinye atĩr. **18** Jö na kelo kuc cwöö ginĩ kodhi mē kuc ĩka kaö ginĩ kac mē kite atĩr.

4 Ngö na kelo dha ĩka lwēny ĩ kinwu? Pathĩ miti na reco na un itye ködē ĩ cwinyw ĩnēnē tye ka lwēny ĩ dul komwu? **2** Un ĩmitö gin mörö ĩntö ba inwongo unu. Un ibedo kĩ miti ĩ kom jami ka jö nōkēnē ĩka ineko unu nek, ĩntö ba inwongo unu gin na un ĩmitö. ĩdhaa ĩka ĩlwēnyö unu. Ba inwongo gin ĩmitö unu, piēn un ba ĩkwaö kĩ both Obanga. **3** Ka ĩkwaö unu, ba inwongo unu, piēn ĩkwaö unu kĩ thama na rac, ĩk inwong unu gin na un ĩmitö mē cobo mitiwu. **4** Un jö nĩ balö watwu k’Obanga, ba ingeo unu nĩ makö okone kĩ lobo miö dhanö dōkö langö k’Obanga? Ngat mörö na yērö mē bedo okone kĩ lobo bedo langö k’Obanga. **5** Onyo un ĩthamö nĩ Cōc na Leng na yam ĩcöo obedo köp na thērē ope na kobo nĩ, “Tipa na yam Obanga oketho ĩ kom onu tye kĩ nyeko rwök?” **6** Ëntö ĩn miö both onu kica. Manōn ĩnēnē ömiö Cōc na Leng kobo nĩ, “Obanga pyem kĩ jö na wakērē, ĩntö miö kica both jö na mwol.” **7** Pĩ manōn dong, mirē unu kenwu mē bedo ĩ thē löc k’Obanga. Kwēr unu Catan, ĩka ĩn bino ringö ökö kĩ bothwu. **8** Nyingi unu na cwök both Obanga, ĩka ĩn thon bino nyingo na cwök bothwu. Lwök unu cingwu, un ĩbal, ĩka ĩlönyērē unu ĩ cwinyw, un jö na thamawu tye arĩö. **9** Bed unu kĩ cwer cwin, kum unu, ĩka ikok unu. Nyēröwu myero ölökerē ödök kumo, ĩka yom cwinyw myero ölökerē ödök kumo. **10** Mwolere unu ĩ nyim Rwoth, ĩka ĩn bino tingowu malö. **11** Utmegona, kür ĩtwak unu köp mörö na rac ĩ kom awodhi. Ngat na twakö köp na rac ĩ kom ömin mērē, onyo ngölö köp ĩ kom ömin mērē, nwongo twakö köp na rac ĩ kom cik ĩka ngölö köp ĩ kom cik. Ëntö ka in ĩngölö köp kĩ cik, in ba ibedo ngat na cobo cik ĩntö ĩdökö angöl-köp. **12** Ngat na miö cik ĩka angöl-köp tye acël, na ĩnēnē ngat na twērö larö ĩka kĩ neko. Ëntö in—ibedo nga mē ngölö köp ĩ kom awodhi? **13** Winy unu, un jö na kobo nĩ, “Tin onyo diki wan ebino cidhö ĩ pacö ni onyo maca, wan ebino tyeko mwaka acël kunōn, wan ebino cadhö

jamiwa ëka enwongo magoba.” 14 Un ba ingeo ngö na bino timërë diki. Kwöwu tye ningö? Un ical k'edou na nen pī karë mörö na nönök, ëka kinge rwenyo ökö. 15 Nakaka manön, un onwongo myero ikob unu ni, “Ka Rwoth oye, onu ebino bedo na kwö, ëka ëtimö man onyo maca.” 16 Kite na calö, un iwakërë ëka inyuthere unu. Koth wakërë ni kibëc obedo gin na rac. 17 Ngat mörö na ngeo gin na bër na ën myero ötim, ëka ba ötimö, nwongo ën ötimö bal.

5 Winy unu, un ëlönjö, kok unu ëka ikok unu rwök, pī can na tye ka bino më podho i komwu. 2 Lönjöwu dong ötöp ökö, ëka nyënyë öcamö böngwu ökö. 3 Gol ëka ryalwu nyali ömakö ökö. Nyali ënë bino bedo caden i komwu, ëka bino camö ringo komwu calö mac. Un ityeko kanö lönjö pī karë më ajiki. 4 Nën! Öcara k'etic n'otio gin i pwothiwu na un ikwërö cülö, tye ka kok i komwu. Koko k'ëcac owinyere i ith Rwoth Won Twër. 5 Un ikwö i wi lobo ki jami na bëcö rwök ëka ki yom cwiny. Un icwëë unu, ëntö ninö më nekowu dong örmö. 6 Un ingölö köp ëka ineko unu ngat na kite atir, n'onwongo ba ökwëröwu. 7 Utmegona, dii unu cwinywu naka i ninö na Rwoth bino dwogo ködë. Nën unu kite n'apur kürö ki gin na bër na cëk ki i ngöm, ëka kite na ën diö ki cwinye ködë naka köth më cwir ki oro cwee. 8 Un thon, dii cwinywu ëka icung unu na tük, piën dwogo ka Rwoth onyingo na cwök. 9 Kür ingüngüta unu i kinwu kenwu, utmegona, onyo ebino ngölö niwu köp. Nën, Angöl-köp ocung i dholokek. 10 Utmegona, na calö apor më dangö can ëka diö cwiny, nën unu apor ki both edwarpiny na yam ötwak gin i nying Rwoth. 11 Na calö ingeo unu, wan ecwodo jö na yam ödangö can ni jö na komgi gum. Un iwinyo kite na Job ödangö ki can ëka inënö unu gin na Rwoth onwongo mitö. Rwoth opong ki timö gin na bër ëka kica. 12 Na löö kibëc, utmegona, kür ikwong unu kwong—ki nying polo onyo ki nying lobo onyo ki nying gin mörö këkën. Mii unu “Eyo” na mewu obed eyo, ëka “Pe” obed pe, onyo ebino ngölö niwu köp. 13 Ngat mörö ki kinwu tye ki can? Ën myero öleg both Obanga. Ngat mörö tye na cwinye yom? Ën myero ower wer më pakö Obanga. 14 Ngat mörö tye na kome lith? Ën myero ocwod edite ka jö n'oye Kiricito ëk öleg gin i pirë ëka ewir ën ki möö i nying Rwoth. 15 Ëka lëga n'ëlëgö ki yee bino miö atwo cang, ëka Rwoth bino tingo ën malö. Ka ën onwongo ötimö bal, ebino timö ninë kica. 16 Pi manön ngat acëlacël otuc bal mërë both awodhe, ëka ngat acëlacël öleg pi awodhe, ëk icang unu. Lëga ka dhanö na kite atir tük ëka tio rwök. 17 Eliya onwongo obedo dhanö kamë

onu. Ën ölegö Obanga na tük ni köth kür ocwee, ëka köth ba ocwee i wi lobo pi mwaka adek ki nucu. 18 Ën döki ölegö, ëka ömörö köth ocwee ki i polo, ëka lobo öcëgö cem. 19 Utmegona, ka cë dhanö mörö ki kinwu öngël ökö ki i köp n'atir, ngat mörö nökökë myero odwongi ën cen, 20 po unu i köp ni: Ngat mörö na bino lökö abal ki i yoo mërë na rac bino larö ën ki kom thöo ëka ebino timö kica ninë.



The New Jerusalem

"I saw the holy city, New Jerusalem, coming down out of heaven from God, prepared like a bride adorned for her husband. I heard a loud voice out of heaven saying, 'Behold, God's dwelling is with people, and he will dwell with them, and they will be his people, and God himself will be with them as their God.'"

Revelation 21:2-3

Reader's Guide

Thur at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Thur at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aīdios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Thur---Leb-Thur-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Luka 8:31
Roma 10:7
Revelation 9:1
Revelation 9:2
Revelation 9:11
Revelation 11:7
Revelation 17:8
Revelation 20:1
Revelation 20:3

Tic k'Ēkwēna 3:21
Tic k'Ēkwēna 15:18
Roma 1:25
Roma 9:5
Roma 11:36
Roma 12:2
Roma 16:27
1 Korinti 1:20
1 Korinti 2:6
1 Korinti 2:7
1 Korinti 2:8

1 Peter 1:25
1 Peter 4:11
1 Peter 5:11
2 Peter 3:18
1 John 2:17
2 John 1:2
Jude 1:13
Jude 1:25
Revelation 1:6
Revelation 1:18
Revelation 4:9
Revelation 4:10
Revelation 5:13
Revelation 7:12
Revelation 10:6
Revelation 11:15
Revelation 14:11
Revelation 15:7
Revelation 19:3
Revelation 20:10
Revelation 22:5

aidios

Roma 1:20
Jude 1:6

1 Korinti 3:18
1 Korinti 8:13
1 Korinti 10:11
2 Korinti 4:4
2 Korinti 9:9
2 Korinti 11:31

aiōn

Matayo 12:32
Matayo 13:22
Matayo 13:39
Matayo 13:40
Matayo 13:49
Matayo 21:19
Matayo 24:3
Matayo 28:20
Marako 3:29
Marako 4:19
Marako 10:30
Marako 11:14
Luka 1:33
Luka 1:55
Luka 1:70
Luka 16:8
Luka 18:30
Luka 20:34
Luka 20:35
Jon 4:14
Jon 6:51
Jon 6:58
Jon 8:35
Jon 8:51
Jon 8:52
Jon 9:32
Jon 10:28
Jon 11:26
Jon 12:34
Jon 13:8
Jon 14:16

Galatia 1:4
Galatia 1:5
Epeco 1:21
Epeco 2:2
Epeco 2:7
Epeco 3:9
Epeco 3:11
Epeco 3:21
Epeco 6:12
Pilipi 4:20
Kolocai 1:26
1 Timoteo 1:17
1 Timoteo 6:17
2 Timoteo 4:10
2 Timoteo 4:18
Tito 2:12
Hebrews 1:2
Hebrews 1:8
Hebrews 5:6
Hebrews 6:5
Hebrews 6:20
Hebrews 7:17
Hebrews 7:21
Hebrews 7:24
Hebrews 7:28
Hebrews 9:26
Hebrews 11:3
Hebrews 13:8
Hebrews 13:21
1 Peter 1:23

aiōnios

Matayo 18:8
Matayo 19:16
Matayo 19:29
Matayo 25:41
Matayo 25:46
Marako 3:29
Marako 10:17
Marako 10:30
Luka 10:25
Luka 16:9
Luka 18:18
Luka 18:30
Jon 3:15
Jon 3:16
Jon 3:36
Jon 4:14
Jon 4:36
Jon 5:24
Jon 5:39
Jon 6:27
Jon 6:40
Jon 6:47
Jon 6:54
Jon 6:68

Jon 10:28
Jon 12:25
Jon 12:50
Jon 17:2
Jon 17:3
Tic k'Ēkwēna 13:46
Tic k'Ēkwēna 13:48
Roma 2:7
Roma 5:21
Roma 6:22
Roma 6:23
Roma 16:25
Roma 16:26
2 Korinti 4:17
2 Korinti 4:18
2 Korinti 5:1
Galatia 6:8
2 Tecalonika 1:9
2 Tecalonika 2:16
1 Timoteo 1:16
1 Timoteo 6:12
1 Timoteo 6:16
2 Timoteo 1:9
2 Timoteo 2:10
Tito 1:2
Tito 3:7
Pilemon 1:15
Hebrews 5:9
Hebrews 6:2
Hebrews 9:12
Hebrews 9:14
Hebrews 9:15
Hebrews 13:20
1 Peter 5:10
2 Peter 1:11
1 John 1:2
1 John 2:25
1 John 3:15
1 John 5:11
1 John 5:13
1 John 5:20
Jude 1:7
Jude 1:21
Revelation 14:6

eleēse

Roma 11:32

Geenna

Matayo 5:22
Matayo 5:29
Matayo 5:30
Matayo 10:28
Matayo 18:9
Matayo 23:15
Matayo 23:33
Marako 9:43

Marako 9:45
Marako 9:47
Luka 12:5
Yakobo 3:6

Hadēs

Matayo 11:23
Matayo 16:18
Luka 10:15
Luka 16:23
Tic k'Ēkwēna 2:27
Tic k'Ēkwēna 2:31
1 Korinti 15:55
Revelation 1:18
Revelation 6:8
Revelation 20:13
Revelation 20:14

Limnē Pyr

Revelation 19:20
Revelation 20:10
Revelation 20:14
Revelation 20:15
Revelation 21:8

Sheol

Acaki 37:35
Acaki 42:38
Acaki 44:29
Acaki 44:31
Numbers 16:30
Numbers 16:33
Nwō C'ik 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 Peter 2:4

Questioned


None yet noted




Abraham's Journey

"By faith, Abraham, when he was called, obeyed to go out to the place which he was to receive for an inheritance. He went out, not knowing where he went"

Hebrews 11:8




"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Naka thon Wod ka Dhanö ba obino ni'ëk etii ninë ëntö më tic pi'jii ëka më miö kwö mëre më kökö jö na pol. - Marako 10:45

Jesus' Journeys



Paul's Missionary Journeys

Waraga ni öya ki both Paulo, atic ka Kiricito Yecu, n'Obanga öyëro më bedo akwëna ëka eoro më titö köp më Emuth na Bër k'Obanga. - Roma 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.



New Heavens and Earth



- Christ returns for his people**
- 1956** Jim Elliot martyrd in Ecuador
 - 1830** John Williams reaches Polynesia
 - 1731** Zinzendorf leads Moravian mission
 - 1614** Japanese kill 40,000 Christians
 - 1572** Jesuits reach Mexico
 - 1517** Martin Luther leads Reformation
 - 1455** Gutenberg prints first Bible
 - 1323** Franciscans reach Sumatra
 - 1276** Ramon Llull trains missionaries
 - 1100** Crusades tarnish the church
 - 1054** The Great Schism
 - 997** Adalbert martyrd in Prussia
 - 864** Bulgarian Prince Boris converts
 - 716** Boniface reaches Germany
 - 635** Alopen reaches China
 - 569** Longinus reaches Alodia / Sudan
 - 432** Saint Patrick reaches Ireland
 - 397** Carthage ratifies Bible Canon
 - 341** Ulfilas reaches Goth / Romania
 - 325** Niceae proclaims God is Trinity
 - 250** Denis reaches Paris, France
 - 197** Tertullian writes Christian literature
 - 70** Titus destroys the Jewish Temple
 - 61** Paul imprisoned in Rome, Italy
 - 52** Thomas reaches Malabar, India
 - 39** Peter reaches Gentile Cornelius
 - 33** Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we?			▶		Genesis 1:26 - 2:3		
How are we sinful?			▶		Romans 5:12-19		
Where are we?			▶				
					Innocence		
			Eternity Past		Creation 4004 B.C.		
▶ Who are we?	God	Father		John 10:30	Genesis 1:31 God's perfect fellowship with Adam in The Garden of Eden		
		Son					
		Holy Spirit					
	Mankind	Living		Genesis 1:1 No Creation No people			
		Deceased believing					
		Deceased unbelieving					
	Angels	Holy			Genesis 1:31 No Fall No unholy Angels		
		Imprisoned					
		Fugitive					
		First Beast					
		False Prophet					
		Satan					
Why are we?			▶		Romans 11:25-36, Ephesian 2:7		

Mankind is created in God’s image, male and female He created us

Sin entered the world through Adam and then death through sin

When are we?				
Fallen				Glory
Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
1 Timothy 6:16 Living in unapproachable light				Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
John 8:58 Pre-incarnate		John 1:14 Incarnate	Luke 23:43 Paradise	
Psalm 139:7 Everywhere		John 14:17 Living in believers		
Ephesians 2:1-5 Serving the Savior or Satan on Earth				
Luke 16:22 Blessed in Paradise				
Luke 16:23, Revelation 20:5,13 Punished in Hades until the final judgment				
Hebrews 1:14 Serving mankind at God's command				
2 Peter 2:4, Jude 6 Imprisoned in Tartarus				Matthew 25:41 Revelation 20:10 Lake of Fire prepared for the Devil and his Angels
			Revelation 20:13 Thalaasa	
1 Peter 5:8, Revelation 12:10 Rebelling against Christ Accusing mankind			Revelation 19:20 Lake of Fire	
			Revelation 20:2 Abyss	

For God has bound all over to disobedience in order to show mercy to all

Destiny

Thur at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. *"If the first fruit is holy, so is the whole,"* Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Disciple All Nations

Pi manön ciah unu dong êk ilök unu jö më rok kibéc ödök gini ëlëbköra, baticagi unu ki nying Apap, éka Wod éka Tipo Naleng, - Matayo 28:19

